

Tũpa Ñehengagüer

Guarayu New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

SAN MATEO.....	4
SAN MARCOS.....	37
SAN LUCAS.....	57
SAN JUAN	92
LOS HECHOS.....	117
ROMANOS.....	148
1 CORINTIOS	162
2 CORINTIOS	176
GALATAS	185
EFESIOS	190
FILIPENSES.....	195
COLOSENSES	199
1 TESALONICENSES	202
2 TESALONICENSES	205
1 TIMOTEO.....	207
2 TIMOTEO.....	211
TITO	214
FILEMÓN	216
HEBREOS.....	217
SANTIAGO	227
1 SAN PEDRO.....	231
2 SAN PEDRO.....	235
1 SAN JUAN	238
2 SAN JUAN	242
3 SAN JUAN	243
SAN JUDAS	244
APOCALIPSIS	246

SAN MATEO

Ava eta oyesu vahe Jesucristo yesu renondeve

1 Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve. ³Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram. ⁴ Aram rahir Aminadab, Aminadab rahir Naasón, Naasón rahir evocoyase Salmón, ⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, ⁶ Isaí rahir mborerecuar guasu David, David rahir evocoyase Salomón, Urías rembirecocuer pipe oyesu vahe.

⁷ Salomón rahir Roboam, Roboam rahir Abías, Abías rahir Asa. ⁸ Asa rahir Josafat, Josafat rahir Joram, Joram rahir evocoyase Uzías. ⁹ Uzías rahir Jotam, Jotam rahir Acaz, Acaz rahir ahe Ezequías. ¹⁰ Ezequías rahir Manasés, Manasés rahir Amón, Amón rahir evocoyase Josías. ¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel. ¹³ Zorobabel rahir Abiud, Abiud rahir ahe Eliaquim, Eliaquim rahir evocoyase Azor. ¹⁴ Azor rahir Sadoc, Sadoc rahir ahe Aquim, Aquim rahir evocoyase Eliud. ¹⁵ Eliud rahir Eleazar, Eleazar rahir ahe Matán, Matán rahir evocoyase Jacob. ¹⁶ Jacob rahir José, María mer, María evocoyase Jesús si secoi. Ahe imembri Tüpa Rembiporavo Poropširosar.

¹⁷ Evocoyase Abraham yesusa sui tupri oyepota oso David yesusa rupive. Ahe catorce yesu yoapí agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapí agüer. Mbiguai ava serecosa sui oyepota araviter Poropširosar haragüer rupi, ahe omomba iri avei ambuae catorce yesu yoapí agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyesu yuvirecoiēhi vite-seve rumo, Espiritu Santo pīratasa pipe imembri. ¹⁹ Evocoyase José, imevi, ahe ava seco catupri vahe, “Tapoiño ayase ava icuaēhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe. ²⁰ Aipo opīhañemoñeta reseve oque. Iquerve rumo, Tüpa rembiguai

oyemboyecua chupe aipo ehi: “José, David suindar, eresiquiyei rene María rese nde menda āgua. Esepia, Espiritu Santo sui ou imembriā. ²¹ María virecose omembri, pemondora sererguā Jesús. Esepia, ahe oipširora omu judío eta yangaipa sui” ehi.

²² Co rupi opa yaviye yande Yar remimombehugüer aipo ehi vahecuer iñehe mombehugar aracahe:

²³ “Cuña ndaseco marai vahe imembri.

Ahe imembri rer-ra Emanuel” ehi

(Tüpa yande rese ité secoi’ oya aipo ehi).

²⁴ Omahese José, Tüpa rembiguai oyeupe ñehe agüer omboyeroya ité. Ichui omenda María rese cute.

²⁵ Ndoyapo vitei eté rumo mbahe oyesu yuvireco.

Yipindar imembri rane ité, ahese José omondo Jesús sererguā.

Ava yasitata rese oyembohe vahe ari sēsa cotindar yuviraso pītani repia

2 Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sēsa coti sui Jerusalén ve. ² Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sēsa coti sui imboetei āgua —ehi yuvireco chupe.

³ Aipo ihese, mborerecuar Herodes oyembosiquiye tēi, ava Jerusalén pendar avei ēgüe ehi pāve yuvireco.

⁴ Iyavei cūrteimi opa omonuha uca pahi rerecuareta, Moisés porocuita rese oporombohe vahe avei. Ipare oporandu chupe:

—¿Que vo aipo ohara Poropširosar? —ehi.

⁵ Ahe omboyevi yuvireco chupe:

—Ahe ohara Judea rupi Belén ve —ehi—. Esepia, Tüpa ñehe mombehugar Miqueas rembicuachiagüer pipe aipo ehi:

⁶ ‘Pe, tecua mini Belén pipendar, ndahei ivi coti tēi vahe ambuae tecua Judá pipendar sui peico.

Esepia, pe sui osēra mborerecuar che recua iguar Israel yocuai āgua’ ehi —ehi yuvireco Herodes upe.

⁷ Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pipe ité vo pesepia ramo aipo yasitata?” ehi. ⁸ Oyeupe mombehu pare, omondopa Belén ve aipo ehi chupe:

—Peso evocoyase, peseca pītani. Acoi peyosuse, co rupi avei peyevi cheu icua uca āgua. Che avei evocoyase tasomi imboetei —ehi angahu chupe.

⁹ Aipo oyeupe he pare, yasitata rese oyembohe vahe osiriño voi yuviraso. Ahe pipeve yasitata oyemboyecua iri senonera. Ichui pītani recosa rese tupri tecua Belén ve opita yasitata. ¹⁰ Sepiase, ovihareté yuvireco.

¹¹ Ipare yuviroique oi pipe, osepia pītani ichi María reseve yuvireco. Ichui oñenopiha sovai imboeteisa pipe. Ipare opōhe ombahe riru pipe yuvireco oicuvāhe va herā oporerecosa sepirusu vahe oro, itaisi, ambuae mbahe sñacua vahe mirra serer vahe avei. ¹² Yuviroyevisé güecuave yuviraso, ndoyuviroyevi iri Jerusalén rupi mborerecuar Herodes upe imombehu. Esepia, Tūpa aipo omombehu iquerve chupe ambuae perī rupi iyevi āgua.

Jesús pītani seroñemisa Egipto ve

¹³ Aipo ava yepepi pare, José upe oyemboyecua Tūpa rembiguai iquerve, aipo ehi chupe: “Eñarapuha, eroñemi pītani ichi reseve eraso Egipto ve. Aheve erepitara acoi che amombeuse voi nde yeve āgua. Esepia, mborerecuar Herodes osecara pītani yuca āgua oico” ehi chupe.

¹⁴ Ahe pītū pipeve voi José viraso pītani ichi reseve Egipto ve. ¹⁵ Aheve yuvirecoi co mborerecuar Herodes mano rāro. Co rupi imboaviyesa Tūpa ñehe mombehusar remimombehugüer: “Egipto sui anose che Rahir” ehi vahe.

Herodes oyuca uca chñivahe eta

¹⁶ Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuviraso sundao tecua Belén ve, toyucapa chñivahe cuimbahemi yuvireco opacatu ñuvirío araviter ovireco vahe, chñivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cūrtei. ¹⁷ Ēgüe ehi yaviye Tūpa ñehe mombehusar Jeremías remimombehugüer aipo ehi vahe:

¹⁸ “Oyeendu ava Ramá ve.

Ahe Raquel oyaseho ité omembireta manose; ndoyemboviha catui eté ipipe” ehi.

¹⁹ Mborerecuar Herodes manore, Egipto ve José upe oñehe iri Tūpa rembiguai iquerve aipo ehi: ²⁰ “Eñarapuha, eroyevi pītani ichi reseve Israel recuave. Esepia, opa omano pītani yuca potasar yuvireco” ehi.

²¹ Aipo oyeupe hese, oñarapuha, viroyevi pītani ichi reseve Israel recuave. ²² Perī rupi oyanduse rumo Arquelao vu recoyar mborerecuar chinise, ahese oyembosiquiye aheve oso āgua. Coiyemi tēi iquerve Tūpa, “Peso Galilea ivi rese” ehi chupe. Ichui yuviraso tecua Nazaret ve. Aheve opita yuvireco cute. Ēgüe ehi yaviye Tūpa ñehe mombehusar remimombehugüer: “Nazaret pendar’ ehira serecosa” ehi vahe.

Juan Oporoāpiramo vahe ivi iporupirēhisa rupi secoi

³ Ipare Juan Oporoāpiramo vahe Tūpa recocuer rese oñehe oico Judea ivi rupi ava yemboerecuaēhisave ² aipo ehi: “iPemboasi pe angaipa; peyevi Tūpa upe! Esepia, co Tūpa mborerecuasa cōimi secoi yandeu” ehi.

³ Co Juan rese niha oñehe yipive Tūpa ñehe mombehusar Isaías aipo ehi güembicuachiagüer pipe: “Oyeendu ñehesa ava yemboerecuaēhisave: ‘Pemoingatu yande Yar raperā; pemohivi tupri avei’ ehi” ehi aracahe.

⁴ Juan turucuar ahese camello ragüer apopri, sumbicuasa mbahe pirer, sembihi evocoyase tucru, eiri caha pipendar avei. ⁵ Opacatu ava Jerusalén pendar, Judea rupindar tecua, ñai Jordán rerovica pendar avei yuviraso iñehe rendu ⁶ oangaipagüer mombehu āgua. Ahese Juan oñapiramo ñai Jordán pipe.

⁷ Yugüeru atise rumo fariseo iyavei saduceo oñeapiramo uca āgua, Juan aipo ehi ahe ava upe: “iPe mboi mboetasa tēi peico! ¿Ava vo, ‘Pesēra Tūpa ñemoirosa ou va herā sui’ ehi tupri tēi pēu? ⁸ Yipindar toyecua tupri rane Tūpa upe pe yevisa pe angaipa mboasisa pipe. ⁹ Iyavei ndapeyeroyai chira ‘ore Abraham suindar oroico’ pe hesa rese tēi pe ñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi. ¹⁰ Hacha niha imoingatusa voi eté opacatu ivira ndihai vahe sapo rupi yasia āgua. Ichui yasia pare imondosa tatave. ¹¹ Che i pipe tēi opoāpiramo Tūpa upe pe yeve āgua. Oura rumo ambuae che raquicuei, ahe pe āpiramora Espiritu Santo tata nungar pipe. Ahe seco pīrata catu vahe secoi che sui. Sese cheu ndiyai eté ahe ipitaquisā yora āgua ichui. ¹² Ahe oipehara mbahe rāñi ihigüer sui. Sāñi evocoyase oyapocatura, ihigüer rumo omondora tata apirēhi vahesave” ehi.

Jesús āpiramosa

¹³ Ipare Jesús oso Galilea sui ñai Jordán ve Juan recosave ‘tache āpiramo’ oya. ¹⁴ Yipindar rumo Juan ndoipotai eté, aipo ehiño chupe:

—Nde rumo iya ité che āpiramora eve viña, ¿nde rumo ereyu che nde āpiramo āgua? —ehi.

¹⁵ —Ēgüe tehiño aipo. Iyacatu yayapora Tūpa porocuaita —ehi Juan upe.

Evocoyase Juan, “Aviye” ehi chupe. ¹⁶ Oāpiramo pare, osē ive sui. Ahe pipeve voi ña oyemboi tupri, aheseve avei osepia Tūpa Espiritu ogüeyise ou iharive apicasu nungar. ¹⁷ Iyavei oyeendu ñehesa ña suindar aipo ehi vahe: “Co che Rahir, che rembiaisu. Sese aviharete vichico” ehi.

Jesús recoāhasa

⁴ Ipare Tūpa Espiritu viraso Jesús ava yemboerecuaēhisave ‘tosecoāha Caruguar’ ohesa pipe.

² Aheve cuarenta ari, cuarenta p̄itu ndocarui. Sese ndasiepoi eté oico. ³ Evocoyase oyemboya Carugar sese secoãha ãgua, aipo ehi chupe:

—Tūpa Rahir ité nde recose, co ita sui eyapo pan cūritei —ehi.

⁴ Jesús rumo ombovevi chupe:

—Icuachiapri pipe rumo aipo ehi:

‘Ndahei chira pan sui gūeraño ava yuvirecove. Ēgüe ehi rumo opacatu Tūpa Ñehengagüer reroya pipe ava yuvirecovera yepi’ ehi —ehiño chupe.

⁵ Ichui Carugar v̄iraso Jesús Jerusalén maranehi pipendar tūparo torre ap̄terve. ⁶ Aheve aipo ehi chupe:

—Tūpa Rahir ité nde recose, eviapi cohava sui. Esepia niha, icuachiapri pipe:

‘Tūpa oyocuaira güembigui eta nde rãro ãgua.

Ahe nde mopuhara yuvireco que ñepe ita nde mōmara rãgüer sui’ ehi —ehi Carugar chupe.

⁷ Evocoyase ombovevi Carugar upe:

—Icuachiapri pipe rumo aipo ehi avei no: ‘Nderesecoãhai chira nde Yar Tūpa’ ehi —ehi chupe.

⁸ Ipare Carugar v̄iraso iri ivitri ivate vahe ap̄terve secoãha ãgua. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe, ⁹ aipo ehi:

—Che rovai ereñenopihase che mboetisave, co opacatu mbahe nde rembiepia amondora nde mahera —ehi Carugar chupe.

¹⁰ Aipo oyeupe hese:

—Eyepepi che sui cūritei, Carugar —ehi—. Esepia, icuachiapri: ‘Emboetei nde Yar Tūpa, ahe gūeraño tupri avei eremboyeroyara’ ehi —ehi Carugar upe.

¹¹ Ahese Carugar oyepepi ichui. Ipare Tūpa rembiguai yuvirogüeyi Jesús rese hañeco ãgua yuvireco.

Jesús omboipi oporombohe Galilea rupi

¹² Jesús oyanduse Juan roquendasa, oso Galilea ivi rese Nazaret ve. ¹³ Ndopitai rumo aheve. Osoño Capernaum ve, aheve op̄ita. Ahe tecua ipa Galilea ivi, ivi Zabulón iyavei Neftalí rupi avei. ¹⁴ Na ehi yaviye Tūpa ñehe mombehusar Isaías rembicuachiagüer aipo ehi vahe aracahe:

¹⁵ “Co ava ivi Zabulón pendar, Neftalí pendar, para guasu ivirindar, ïai Jordán rovaindar iyavei Galilea pipendar ndahei vahe judío,

¹⁶ ahe aviye p̄tumimbisave yuvirecoi vahe, osepia ramo vahe tesapesa yuvireco; iyavei mano rãgüer pipe yuvirecoi vahe upe avei aviye oyecua ramo vahe tesapesa” ehi.

¹⁷ Ahe ari suive Jesús omombehu Tūpa recocuer ava upe: “Pemboasi pe angaipa; peyevi Tūpa upe. Esepia, cōimi eté Tūpa mborerecuasa secoi” ehi.

Jesús, “Perio che rupi” ehi irungatu pira mbohasar upe

¹⁸ Coiye ipa Galilea ivi oguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco. ¹⁹ Evocoyase:

—Pe pira recasar peico. Perio che rupi. Na peye aveira ava reca ãgua cheu nara —ehi chupe.

²⁰ Aipo he ramosave, opoi opira mbohasa sui yuvireco, yuviraso supi.

²¹ Coi coti catu aipo Jesús osepia ambuae mbia Santiago tivri Juan reseve, ahe oguapi yuvinoi carite pipe oyesupa Zebedeo piri; omoingatu opira mbohasa yuvinoi. ²² “Perio che rupi” he ramosave, opaño oporaviquisa sui opoi yuvireco, oseyañe oyesupa, yuviraso supi.

Jesús ombohe ava rehii

²³ Jesús evocoyase oguata opacatu Galilea ivi rupi, judío tūparo yacatu rupi oporombohe oico. Aheve ñehesa aviye vahe omombehu Tūpa mborerecuasa resendar. Oporombogüera avei opacatu-catu tēi mbahehasa ava v̄ireco vahe sui. ²⁴ Oyepotase rumo serãcua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, carugar v̄ireco vahe, que nañaca p̄rai vahe iyavei ndoguatai vahe. Ahe opa tupri ombogüera.

²⁵ Ēgüe ehi ava rehii oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, ïai Jordán rovaindar avei no.

Jesús oporombohe ivitri

5 Ñepe ari pipe, ava rehii repiase, Jesús oyeupi ivitri rese. Aheve oguapi oĩ. Ahese semimbohe oyemboya yuvireco sese. ² Ichui omboipi imbohe aipo ehi:

³ “Sorivete catura acoi ava oicuase mbahe ipane vahe Tūpa rese ité güeco tupri ãgua. Esepia niha, chupe nara ité Tūpa mborerecuasa.

⁴ “Sorivete catura acoi ava oyaseho vahe oviharēhisa pipe. Esepia niha, Tūpa omboura viharetesa chupe coiye.

⁵ “Sorivete catura ndaseco asiimi vahe. Esepia, ahe chupe imondosara co ivi imahera curi.

⁶ “Sorivete catura ava oipota vahe teco catuprisa Tūpa suindar. Esepia, chupe ité ahe imondosara.

⁷ “Sorivete catura acoi ava oporoparaisuereco vahe. Esepia, ahe Tūpa oiparaisuerecora.

⁸ “Sorivete catura acoi ava ipihañemoñeta tupri vahe. Esepia niha, ahe osepia Tūpa yuvireco curi.

⁹ “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

¹⁰ “Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.

¹¹ “Perorivete catura pe acoi ava iñehe-ñehe tēise p̄u, iyavei pe mombaraisuse, acoi oyapo-yapo tēise güemira-mira tēi pipe mbahe pe rese che recocuer sui tēi yuvireco. ¹² Pe rumo peyembovihanora. Esepia, ivave tuvichá vahe porerecosa peipisira curi. Ēgüe ehi avei niha yipindar evocoi ava ramoi Tūpa ñehe mombehusareta mombaraisu yuvireco aracahe” ehi.

Jesús reroyasar aviye yucrí iyavei tesapesa yuvirecoi ava upe

¹³ “Co ivi pipe pe aviye yucrí peico opacatu ava upe. Yucrí rumo nasehe irise, ndayaicatui imoehe iri água, ndiporusai chietera; imombopasara ava pirunga água yuvireco.

¹⁴ “Iyavei pe tesapesa nungar peico opacatu ava upe co ivi pipe inungar que tecua guasu yapoprí ivitri rese. Ahe ndayaicatui ñomi água. ¹⁵ Iyavei ndayamoendí chira tataendí mbahevive tēi. Iyacatu rumo yasupi ivate sendave opacatu oi pipendar ava resape água. ¹⁶ Pe égüe peye aveira pemboyecua ava eta upe pe recocuer aviye vahe. Ipipe sui tomboetei yande Ru Tūpa íva pendar yuvireco” ehi ava rehii upe.

Jesús oporombohe Moisés porocuita rese

¹⁷ “Aní chira, ‘Co mbia revo oporombohe Tūpa ñehe mombehusar rembicuachía mboyeroaēhi água iyavei Moisés porocuita cuachiapri mboyeroaēhi água avei no’ peye tēi cheu. Égüe ehi rumo che ayu imboaviye água. ¹⁸ Supi eté co íva, ivi avei yandeu oime vitemiseve, ndipoi chietera que ñepei yepe Moisés porocuita, que ambuae Tūpa ñehe mombehusar rembicuachigüer ocañi tēi vaherā; ñepei-pe porocuita imombepri imboaviyesaño itera. ¹⁹ Sese acoi ava ndoviroyai vahe que ñepei mborocuitamira viña, ombohe avei ava seroyaēhi água, ahe evocoyase ivi cotí catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvireco sese, ahe evocoyase Tūpa osecombivate catura omborerecuasave curi. ²⁰ Iyavei amombehu pēu: acoi pe reco ívi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuita rese oporombohe vahe recocuer sui avei, ahese ndapeiquei chietera Tūpa mborerecuasave” ehi.

Jesús oporombohe ñemoiroēhi água rese

²¹ “Pe peicua acoi pe ramoi arachendar upe aipo ehi vahe: ‘Peporoyucaí rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirā’ ehi. ²² Che rumo aipo ahe pēu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde égüe ere tēi vahe eico’ ehi vahe ambuae ava upe, ahe serasosara porandu água mborerecuar ivate catu vahe rovai. Acoi ava rumo oñehe marase seroñrosave ambuae ava upe, ahe iyacatu imondosa ité tata guasuve.

²³ “Sese Tūpa upe pe porerecosa reropovēhesave tūparo pipe pemahenduhase ava pe amotarēhimbar rese, ²⁴ peseya rane pe porerecosa aheve; peyevi rane pe amotarēhimbar upe pēu iñero água rese. Acoi peñerose oyeupe, ahese voi peyevi, tapeicuavēhe pe porerecosa Tūpa upe.

²⁵ “Iyavei peyeamotarēhise, peñero voi oyeupe peyoepe. Anise, aviyeteramo coiyé catu tēise pe

mombehu tēira pe amotarēhimbar mborerecuar upe pe reraso água. Ichui aviyeteramo ahe pe roquenda ucara. ²⁶ Supi eté aipo ahe pēu: Ndapesēi chietera acoi peyemboepipase voi eté pesēra ichui” ehi.

Jesús oporombohe yemboaguasaēhi água rese

²⁷ “Peicua niha Moisés porocuita yipindar: ‘Peagua-sai rene ambuae ava rembireco rese’ ehi vahe. ²⁸ Che rumo aipo ahe pēu: Acoi ava omahese cuña rese ipotasa pipe, ahe inungar oyapo vahe ité mbahe sese opíha pipe yepi.

²⁹ “Iyavei inungar que pe resa pe acato cotindar oipota rai ucase mbahe pēu pe mboangaipa água tēi, iya penose ité, pemombo amombri peyesui. Aní pe mondo uca opacatu pe recocuer tata guasuve.

³⁰ Iyavei inungar que pe po pe acato cotindar pe mboangaipa ucase, iya peyasia ité imombo amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiēhi água rese

³¹ “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi. ³² Che rumo aipo ahe pēu: ava opoise güembireco sui, cuña ndoyaviise mbahe, ahese ombopíhañemoñeta tiētera güembireco mboaguasa uca água. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

Jesús oporombohe Vu Tūpa rer poru tēiēhi água rese

³³ “Iyavei peicua acoi aipo ehi vahe pe ramoi upe aracahe: ‘Pemboaviye itera pemoingatu tuprise Tūpa rer pipe mbahe pemombehu vahe yepi’ ehi. ³⁴ Che rumo, ‘Ndapeñehei chira que mbahe rer pipe, íva rer pipe tēi avei’ ahe pēu. Esepia, ahe niha Tūpa renda; ³⁵ ivi rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua.

³⁶ Pe áca rer pipe avei ndapeñehei chira. Esepia, ndapeicatui chira que ñepei pe ha momorochi água, imou água avei. ³⁷ Sese niha peñehese, ñepei reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

Jesús oporombohe yande amotarēhisar upe mbahe tēi mboyeviēhi água

³⁸ “Peicua acoi Moisés porocuita arachendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sái ichui, sái avei senosesara’ ehi vahe. ³⁹ Che rumo aipo ahe pēu: Aní chira pemboyevi pēu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe. ⁴⁰ Porandusave pe rerasose pe camisa rerocua água yuvireco pe sui, pe saco avei pemondoñora chupe. ⁴¹ ‘Ñepei legua rupi evosii co mbahe rese cheu’ ehise que ava

pëu, pe rumo perasoñora ñuvirío legua rupi chupe.
⁴² Iyavei oporanduse que pe mbahe rese yuvireco pëu, pemondoño avei chupe. Aní chira perecatëhi sese" ehi.

Pesaisu pe amotarëhimbar

⁴³ "Iyavei pesendu ñehesa yipindar: 'Pesepia potai rene pe amotarëhimbar, pe mboripar güeraño pesaisu' ehi vahe. ⁴⁴ Che rumo aipo ahe pëu: Pesaisu catu pe amotarëhimbar iyavei peyeroqui pe momara potasar rese. ⁴⁵ Evocoi nungar apo pipe pe Ru Tüpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pörai vahe upe avei. ⁴⁶ Pe raisupar güeraño pesaisu catu tëise, ndapeipisii chietera porerecosa evocoi nungar sui. Esepia niha, ava guarepochi rerocuasar ndipihai vahe guaisupar tëi osaisu yuvireco yepi. ⁴⁷ Ndahei yande mboripar upe güeraño yayapora 'avirave'. Esepia, ava ndoicuai vahe avei Tüpa oyapo 'avirave' omboripar upe yuvireco yepi. ⁴⁸ Sese pe recocuer perecora pe Ru Tüpa iva pendar seco catupri vahe nungar" ehi.

Jesús oporombohe mbahe aviye vahe apo ägua rese

6 "Tüpa upe mbahe peyapo potase, 'Tache repia ava yuvireco' ndapeyei chira. Esepia, ägüe peyese, ndapeipisii chietera pe Ru Tüpa iva pendar porerecosa. ² Evocoyase iparaisu vahe rese peporerecose, 'Tammombehupa ava upe vichico' ndapeyei chira inungar ava Tüpa reroyasar angahu tëi yuvireco yepi. Tüparove iyavei ocar rupi mimbí omoñehe yuvireco 'Co ava aviye ité yuvirecoi, tehi angahu yuvireco yandeu' oya tëi. Supi eté aipo ahe pëu: Ägüe ehi vahe rumo opa voi oipisi porerecosa co ivi pipe tëi yuvireco. ³ Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña. ⁴ Peporereco catu ava pe repiaëhisa pipe; pe Ru Tüpa niha mbahe ndoyecuai vahe osepia. Ahe omboura porerecosa pëu opacatu ava rembiepiave curi" ehi.

Jesús oporombohe yerure ägua rese

⁵ "Acoi peyerurese, peicoi rene acoi ava 'tosepia che yeruresa yuvireco' ehi vahe nungar. Esepia, ahe opüha-püha catu tüparo pipe oyeroqui yuvireco cupiha yacatu avei 'tayande repia angahu ava' ohesa pipe tëi. Supi eté che aipo ahe pëu: Ägüe ehi vahe opa voi eté co ivi pipeve tëi oipisi porerecosa yuvireco. ⁶ Iyacatu rumo pe, peyeroqui potase, peiquera pe rëta pipe peyeoquendara pe ae pe yeroqui ägua pe Ru Tüpa upe. Evocoyase pe Ru Tüpa oicua vahe mbahe pe rembiapo, iporerecora pe rese.

⁷ "Iyavei peyeroquise, ndapemboyevi-yevii chira pe ñehe pe poranduse mbahe rese Tüpa upe inungar ava Tüpa ndoicuai vahe. Ahe omboyevi-yevi oyeruresa 'Tüpa revo co rupi yande mboyeroya voira' ohesave yuvireco viña. ⁸ Aní chira inungar tëi peico. Esepia, pe Ru

Tüpa oicua pe porandu renondeve mbahe ipane vahe pëu. ⁹ Sese aipo peyera peyeroqui:

'Ore Ru Tüpa, ivave ereico vahe, imboeteipri nde rer tasecoi.

¹⁰ Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

¹¹ Embou ore rembihi ari yacatundar oreu co ari pipe.

¹² Iyavei ndeñero ore angaipa rese oreu inungar ore oreñero ore amotarëhimbar upe.

¹³ Ore mboangaipa ucai rene eve; eipeha mbahe naporai vahe ore sui' peyera.

¹⁴ "Esepia, pe amotarëhimbar upe peñerose, pe Ru iva pendar avei iñerora pëu; ¹⁵ ndapeñeroise rumo, ahe avei niñeroi chietera pëu" ehi.

Jesús oporombohe yecuacusa rese

¹⁶ "Acoi peyecuacuse, ndapemboyeuai chira pe viharëhisa, inungar acoi Tüpa reroyasar angahu tëi yuvireco yepi. Esepia, ahe opa oyeerecomeguapa tupri yuvireco, 'Co oyecuacu vahe, tehi ava yande repiasar yuvireco yandeu' ohesa pipe tëi. Supi eté aipo ahe pëu: Ägüe ehi vahe opa voi oipisi porerecosa ava güepia pipe tëi yuvireco. ¹⁷ Pe rumo peyecuacuse, peñeaca monodoro tupri, peyovai tupri aveira. ¹⁸ Evocoyase, 'Co oyecuacu vahe' ndehei chira ava yuvireco pëu. Pe Ru Tüpa, ndayasepai vahe, güeraño oicua pe yecuacusa. Ahe evocoyase iporerecora pe rese curi" ehi.

Mbahe porañeté vahe oime ivave

¹⁹ "Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoi omboaso ati-ati imocañipa, iyavei sãve-sãve tëi opochi ati-ati oapocatusave, imonda vahe avei evocoyase imondaño sese pëu. ²⁰ Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi ägua. ²¹ Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que ivave avei" ehi.

Yande resa inungar tataendi yande recocuer uve

²² "Iyavei yande resa inungar tataendi yande retecuer upe. Evocoyase yande resa aviye, opacatu yande retecuer upe osesape; ²³ acoi imarase rumo, opacatu yande retecuer pñtumimbisave tëi secoi. Tesapesa oime vahe yande rese, ahe ogüese rumo yande sui, mbahe tëi eté, pñtumimbi nungar opacatu yande recocuer upe" ehi.

Guarepochi pota raisa; Tüpa mboyeroyaëhisa

²⁴ "Iyavei ndipoi chietera que ava ñuvirío güerecuar omboyeroya vahe. Esepia, ñepeí oyamotarëhira imboyeroya potaëhisa pipe, ambuae evocoyase osaisu catura imboyeroya pipe. Ägüe peye avei, ndapeicatu Tüpa mboyeroya guarepochi pota raisa pipe" ehi.

Tūpa osāro guahireta

²⁵ “Iyavei ndapeyemomahenduha guasu ai chira mbahe pe remihura rese pe recove āgua, pe ihu āgua rese, pe turucuarā rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no. ²⁶ Pesepia vīrai eta oveve vahe: nomahetī vahe, nomonuhai avei, ndoyapocatu avei mbahe yuvireco. Pe Ru Tūpa iva pendar ité niha omoime mbahe itohu. ¡Pe rumo ivate catu vahe ité peico vīrai sui! ²⁷ Ndipoi que ñepepe pe pāhu pendar oicatu vahe opīhañemoñetas pīpe tēi güecocuer mopucu iri āgua.

²⁸ “Ndahei chira pe turucuarā rese tēi peyemomahenduha guasu ai. Pemahecua ru mbahe potri caha pipendar rese: ndoporaviqui eté iyavei ndoipiai oturucuarā. ²⁹ Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ³⁰ Tūpa niha omboporañete raimi tēi mbahe potri caha pipendar, moviro ari tēi yasepia, ichui sapisapaño horno pīpe. ¡Ahe rumo omondo catu-
ra turucuar pēu, pe ava nimbahe reroya tupri vahe!

³¹ Sese, ‘¿Mbahe pīha yahura, yaihura?’ Iyavei, ¿mbahe pīha yamondera?’ ndapeyei chira pe yemomahenduha guasu aisa pīpe. ³² Ava Tūpa reroyasarēhi aipo nungar reseño tēi ipīhañemoñeta yuvireco yepi. Pe Ru Tūpa iva pendar rumo oicua ité pēu mbahe ipane vahe.

³³ Pemahenduha rane Tūpa rese pe recocuer tupri pīpe ipovrive mbahe pe yapo āgua semimbotar rupi, ahese omboura opacatu co mbahe ipane vahe pēu. ³⁴ Peyemomahenduha guasa ai eme mbahe peyapo vahe rā rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vahe rā yepi.

Aní, “Oyavi mbahe” peye voi ambuae upe

7 “Ndiyai, ‘Oyavi ité mbahe’ peye voiño tēi ambuae ava upe; evocoyase Tūpa, ‘Oyavi mbahe’ ndehi chira pēu. ² Esepia, inungar pe ambuae ava upe peico, ēgüe ehi aveira niha Tūpa pēu. ³ ¡Mahera ambuae ava rembiavimi rese tēi pemahē! ¡Iya rumo peyese rane mbahe tuvichá catu vahe pesepia! ⁴ Ndiyai pēu, ‘Che toropītivii mbahe nde rembiavi rese’ peye vahe rā chupe. Esepia, ¡pe peyavi guasu catu mbahe ichui! ⁵ ¡Pe Tūpa reroyasar angahu tēi peico vahe! Penose uca rane mbahe pe rembiavi tuvichá catu vahe peye-sui, ahese ramo ambuae ava rembiavi tahimi vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndapemondoi chira mbahe porañete vahe ava cuchi nungar tēi upe. Aviyeteramo oyemboyera mbahe-mbahe tēi apo yuvireco pēu” ehi.

Peporandu Tūpa upe pēu mbahe ipane vahe rese

⁷ “Peporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pe-

mota oquenda, ēgüe peyera pe yeroquisa pīpe Tūpa upe, ahese imbousara pe porandusa pēu. ⁸ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyero-quisa pīpe omota vahe oquenda Tūpa upe, chupe imboisara.

⁹ “Ndipoi eté revo que ñepepe pe pāhu pendar omondo vahe rā ita tēi guahir upe pan rese oyeupe poranduse. ¹⁰ Que pira rese oyeupe poranduse revo, ndomondoi chiaveira mboi tēi chupe. ¹¹ Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar oipota catu mbahe aviye vahe mondo āgua acoi ava mbahe rese oporandu vahe upe!

¹² “Acoi mbahe peipota vahe ambuae ava oyapo vahe rā pēu, ahe tupri avei peyapora chupe. Ahe niha Moisés porocuaita iyavei Tūpa ñehe mombehusareta porombohesa” ehi.

Oime perī icāhimi vahe ava recocuer upe nara

¹³ “Peique oquendipi icāhimi vahe rupi. Esepia, oquendipi guasu iyavei perī guasu cañi tēisave oso vahe. Ahe supi setá catu ava yuviraso; ¹⁴ teco apirēhisave oso vahe rumo oquendipi, perī reseve icāhimi. Supi guata āgua yavai eté; moviromi tēi ava oseca yuvireco” ehi.

Ivira aviye vahe icuasa iha rese

¹⁵ “Coiyē yugüerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pīpe rumo secocuer aviye mahembiar oñaro ai vahe. Sese peicua catu evocoi nungar sui. ¹⁶ Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sāchi atī vahe sui. ¹⁷ Evocoyase ivira aviye vahe, iha aviye avei; ivira naporai vahe, iha naporai avei no. ¹⁸ Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe. ¹⁹ Sese opacatu ivira iha naporai vahe yasiasa yepi. Ichui imondosapa tatave. ²⁰ Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborere-cuasave

²¹ “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborere-cuasave. Che Ru iva pendar remimbotar aposar año tupri rumo yuviroiquera aheve. ²² Ari cañi pīpe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oro-mombo carugar ava sui nde rer pīpe, setá poromondiisa oroyapo’ ehi tēira yuvireco cheu. ²³ Che rumo, ‘¡Aní, ndopocuai! ¡Pe mbahe tēi peico vahe, peyepēpi che sui!’ aheñora aipo nungar upe” ehi.

Ñuvirío oi apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güëtarã. ²⁵ Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa. ²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriñehisa pipe omopuha vahe ivi cuhi harive tēi güëtarã. ²⁷ Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

²⁸ Iñehe renduse ava rehii, “¿Mara ehi rutei?” ehi tēi yuvireco chupe. ²⁹ Esepia, ndahei Moisés porocuita rese oporombohe vahe nungar; ahe rumo oporombohe güeco pīratasa pipe.

Jesús ombogüera ava lepra vireco vahe

8 Ivitri sui ogüeyise Jesús, ava rehii avei yuvirecoi supi. ² Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbahehasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cūrítei! —ehi.

Aipo ihe ramoseve, ocuera voi eté.

⁴ —Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuavēhe nde porerecosa nde cuera agüer resendar Moisés porocuita rupi. Ipipe sui toicua ava nde cuerasa yuvireco —ehi.

Jesús ombogüera sundao rerecuar remimboacua

⁵ Ipare Jesús oguataño, ñgüe ehi tecua Capernaum ve oyepota oso. Aheve oime sundao rerecuar Roma iguar. Ahe ou chupe ⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombahehasi ou —ehi.

⁷ —Aviye, cūrítei evocoyase asora imbogüera —ehi.

⁸ —Aní, che Yar, ndiyai eté che rēta pipe nde reique ñgua; iyacatu niha cohapeve ereñeheño tēi icuera ñgua. Evocoyase nde ñehe pipe tēi che remimboacua ocuerara. ⁹ Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūrítei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiai eté ava imbahe reroya vahe yuvireco yepi co ava nungar. ¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborere-

cuasave Abraham, Isaac iyavei Jacob piri coiye. ¹² Judío eta rumo, oyeupe ñehesa reroyañi pipe setá pītu-mimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbahehasicuer rereco yuvireco —ehi oñehe.

¹³ Evocoyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipare Jesús oso Pedro rētave. Aheve osepia Pedro rembireco si sohí iteangase vupave ou. ¹⁵ Opocose ipo rese, ahe ramoseve sohí opituhu ichui. Ocuerare, oñarapuha ava rese ohañeco ñgua.

Jesús ombogüera setá ava imbaheasi vahe

¹⁶ Ipare pītu ramose setá carugar vireco vahe ogüeru yuvireco chupe. Jesús rumo ñepei reseve oñe-he pipe tēi omombopa carugar ava rehii sui, iyavei opacatu imbaheasi vahe ombogüera avei no. ¹⁷ Ñgüe ehi omboaviye Tūpa ñehe mombehusar Isaías rembicuachiagüer aipo ehi vahe aracahe: “Ahe ae virocua opacatu yande mbahehasi yande sui iyavei oiporara opacatu mbahe tasi vahe yande rese” ehi.

Oguata pota tēi vahe ava Jesús rupi yuvireco

¹⁸ Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so ñgua” ehi. ¹⁹ Ahese Moisés porocuita rese oporombohe vahe aipo ehi chupe: —Porombohesar, che mo aso pota nde rupi opacatu nde guatasa rupi —ehi.

²⁰ Jesús rumo aipo ehi imboyevi chupe:

—Yavaira rumo ndeu. Esepia, vñrai vireco guaiti, iyavei aguara vireco oquesa; che rumo, Ava Riquehir, ndarecoi que che rēta ité che pītuhu ñgua yepi —ehi.

²¹ Ipare ñepei ivoya aipo ehi chupe:

—Che Yar, che ru manore voi che nde rupiño ité aicora —ehi.

²² —Aní, cūrítei voi eyu che rupi —ehi—. Ñgüe tehiño ava secocuer omano vahe nungar, ahe ae toñeñeti yuvireco —ehi chupe.

Jesús omombituhu ivitu ai, ohitu vahe avei

²³ Ipare Jesús yuviroha güemimbohe reseve yuviraso carite pipe. ²⁴ Ipa pipe yuviraso pucu ramoseve Jesús oque ou. Ahese aviyeteramo tēi ivitu ai opūha ipa pipe; i ohitu vahe ndiguayii eté, seni-seni carite oyopi.

²⁵ Evocoyase semimbohe yuviraso voi imomahe:

—¡Ore Yar, yande rerasora mo co carite ipive! ¡Yande pñisiro eve! —ehi yuvireco chupe.

²⁶ Evocoyase aipo ehi:

—¡Mahera pesiquiye! ¡Ndapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, ivitu ai upe avei no: "Pepituhupa" ehi. Aheseve voi opa tupri opituhu yuvireco.

²⁷ —¿Mara ehi rutei pñha co? —ehi tñi semimbohe yuvireco chupe—. ¿Mara ehi vahe pñha co ava secoi?

Esepia niha, ivitu, para guasu avei omboyeroa yuvireco no —ehi.

Jesús omboyepipá carugar Gadara pendar sui

²⁸ Jesús oguataño güemimbohe eta reseve oyepota ipa rovai Gadara ivi rese yuviraso. Aheve ñuvirío ava carugar vireco vahe yugüeru sovañchi. Ahe ava tehögüer ruvipa rupi tñi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe perí rupi yuvireco yepi. ²⁹ Jesús repia ramoseve rumo, oñehe pñrata yuvireco chupe aipo ehi:

—¡Jesús, Tñpa Rahir, eyepipi ore sui! Esepia niha, ndoyepota vitei ari nde ore mombaraisu água oreu —ehi tñi yuvireco.

³⁰ Namombriimi cuchi rehii yuvirecoi ichui.

³¹ Carugar evocoyase aipo ehi yuvireco chupe:

—Ore mombopaño tñi eve evocoi cuchi rese —ehi.

³² —Aviye, peso —ehi carugareta upe.

Aipo hese, carugar opa yuvirase ava sui, yuviroique cuchi rehii aviterve. Ipare rumo cuchi ndayaracua iri yuvireco; iivi socuer rupi yuviranoña yuviraso, opa ipa pipe ocañi tñi yuvireco.

³³ Yuviranoña evocoyase cuchi rãrosar tecuave yuviraso opacatu mbahe güembiepia mombehu ava upe yuvireco. ³⁴ Ichui opacatu ava tecua pendar yuvirase ati Jesús upe, "¡Eso cohava sui!" ehi yuvireco chupe.

Jesús ombogüera ava ndoguatai vahe

9 Ipare Jesús oha carite pipe osasa iri ipa rovai oso güecua Capernaum ve. ² Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicua co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopase, che ñero nde angaipa rese ndeu —ehi.

³ "¡Co mbia oyemboivate ai tñi vahe, Tñpa ñehe nungar pipe tñi oñehe!" ehi Moisés porocuita rese oporombohe vahe yuvireco chupe. ⁴ Jesús rumo oicua ipihañemoñetasa, sese aipo ehi chupe:

—¡Mahera pepihañemoñeta rai pe yapisacasa rereco! ⁵ ¿Uma rupi vo ñehesa ndayavaimi catu: 'Nde angaipa rese che ñero ndeu' hesa pñha, anise, 'Epñha, eguata' hesa tie? ⁶ Tapeicua ru che, Ava Riquehir, areco mborerecuasa co ivi pipe ava angaipa upe che ñero água —ehi.

Evocoyase aipo ehi imbaheasi vahe upe:

—Epñha, esupi nde rupa seraso nde rñtave —ehi.

⁷ Ahese opñha voi, oso güëtave. ⁸ "¡Too! ¿Mara ehi rutei vo?" ehi ava rehii yuvireco imboeteisave. "Esepia, ahe niha ombou opñratasa ava upe" ehi yuvireco chupe.

Jesús, "Erio che rupi" ehi Mateo upe

⁹ Ichui osose Jesús, che repia, che Roma pendar mborerecuar guasu upe guarepochi roerocua mesave che rñise. Ipare aipo ehi cheu:

—Erio che rupi —ehi.

Evocoyase apñha, aso voi supi.

¹⁰ Ahe ari pipeve Jesús güemimbohe reseve yuviroique che rñtave. Ambocarú setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei. ¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pñhuve tñi? —ehi seroñrosa pipe yuvireco chupe.

¹² Jesús rumo, osenduse oyendar ñehesa, aipo ehi: —Ava nimirai vahe ndosecai eté oporopñsano vahe; imbaheasi vaheño rumo oseca yuvireco. ¹³ Peyapisaca icuachiapri arachendar aipo ehi vahe rese: 'Poroparisuerecosa aipota; ndaipotai mbahe cheu serocuavñhepri tñi' ehi. Esepia, ndayui ava seco catupri vahe reca, ñgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

¹⁴ Ipare Juan Oporoñpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoyase nde remimbohe eta ndoyecuacui yuvireco yepi? —ehi yuvireco chupe.

¹⁵ Ahe rumo omboyevi ahe ava upe:

—¡Ndiyai eté ichohopri mendasave ndoyembovhai yuvireco imer oicovese ipñhuve! Oimera rumo ari imer reraso água ichui curi. Ahese ramo oyecuacura yuvireco cute —ehi.

¹⁶ "Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoyase tuvicha catu-catuño ité. ¹⁷ Iyavei ndiyai ava uva ricuer piasu oyapocatu siru mbahe pিরer cuacua vahe pipe. Ñgüe ehise, mbahe pিরer opura viña, ocañi tñira, uva ricuer avei evocoyase ocañi tñi aveira viña no. Acoi uva ricuer ipiasu vahe mbahe pিরer ipiasu vahe pipe yapocatupri rumo oyoya ndoyemomarai yuvireco" ehi.

Jairo rayri iyavei cuña Jesús turucuar rese opoco vahe

¹⁸ Jesús oporombohe viteseve, ou mborerecuar oñenopiha sovai aipo ehi chupe:

—Che rayri mo cñritei omano pota ité. Yaso, nde ermondose rumo nde po sese oicovera —ehi chupe.

¹⁹ "Aviye" ehi. Evocoyase opñha yuviraso güemimbohe reseve supi. ²⁰ Ahe pipeve cuña doce araviter rupi suvi ndopai vahe opoco saquicuei coti iturucuar popi rese. ²¹ Esepia, ahe aipo ehi opñha pipe: "Yepe que iturucuar popi rese tñi apocora, acuerara rumo" ehi.

²² Jesús evocoyase oyemboyere cuña rese aipo ehi chupe:

—Che rayri, eyemopoase, erecuera cūrítei nde yeroyasa pipe —ehi.

Aipo ihe ramoseve, cuña ocuera voi eté.

²³ Oyepotase Jesús mborerecuar rētave, osepia omimbî vahe iyemoingatupase omano vahe tĩ ãgua, ava yaseho atise avei no. ²⁴ Ahese aipo ehi ava oyaseho vahe upe:

—Pesēpa cohave sui. Co cuñatai nomanoi; oque tēi ou —ehi.

Ahe ava rumo opucaete atĩño seroyaēhisave yuvireco. ²⁵ Ichui opa ava omore, ahese oique oi pipe oipopisi cuñatai. Evocoyase ahe oñarapuha voi. ²⁶ Co sembiapo evocoyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoi vahe

²⁷ Acoi osēse evocoi oi sui Jesús, ahese ñuvirío ndasesapisoi vahe osaquicue moña, osapucaí yuvireco chupe aipo ehi:

—¡Jesús, David suindar, ore paraisuerecomi tēi eve! —ehi pucu-pucu yuvireco chupe.

²⁸ Oi pipe seique, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera ãgua rese peye? —ehi.

—Nde reroysa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroysa pipe mbahe pēu —ehi.

³⁰ Aipo ihe ramoseve osareco tupri voi yuvireco.

Ipare,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepipi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñehengatui vahe

³² Ichiri ramoseve rumo, ambuae ava viroyepota ava niñehengatui vahe carugar rerecosar Jesús upe yuvireco. ³³ Ichui omosese carugar, iñehengatu cute. Sepiase opacatu ava,

—¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

³⁴ Fariseo eta rumo aipo ehiño yuvireco:

—Carugar rerecuar pĩratasa pipe co mbia omore carugar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tũparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tēi mbaherasisa sui avei no. ³⁶ Osepia ava rehii, oiparaisuereco yuvireco. Esepia, ahe oñemosaño tēi mbahe rasicuer pãhuve inungar ovesa

ndovirecoi vahe guãrosar yuvireco ³⁷ Evocoyase aipo ehi güemimbohe upe:

—Supi eté mbahe miti imonuhapirã setá iteanga; sese oporaviqui vahe rumo moviromi tēi. ³⁸ Sese peporandu mbahe miti Yar upe, ahe tomondo ava imonuha ãgua —ehi güemimbohe eta upe.

Jesús oiporavo doce tupri apóstol

10 Evocoyase, “Perio” ehi Jesús doce güemimbohe upe. Chupe omondo güeco pĩratasa carugar ava sui imboyepepi ãgua iyavei iporombogüera ãgua opacatu-catu tēi mbaherasisa sui.

² Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan; ³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; ⁴ iyavei Simón, güecua rese secatēhi vahe pãhu pendarer; ipa vahe Judas Iscariote, ahe Jesús omondo vahe yamotarēhimbar upe.

Jesús oyocuai güemimbohe Vu mborerecuasa mombehu ãgua

⁵ Ipare oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ãgüe ehi tēi secocuer yuvireco. Evocoyase pesoi rene ndahei vahe judío recua rupi iyavei ndapeiquei chira tecua Samaria ve” ehi. ⁷ “Judío recua rupi pesoseve, ‘Cõimi Tũpa mborerecuasa secoi yandeu’ peyera imombehu. ⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepepi serecosar sui. Esepia niha, peipisi pĩratasa ndasepii vahe. Sese peyapoño evocoi mbahe guarepochi pisiēhisa pipe.

⁹ “Ava oporaviqui pipe sui ocaru yepi. Sese ndaperasoi chira guarepochi peyese. Ndaperasoi chiaveira pe mbahe riru, iyavei ambuae pe turucuar, pe pitaqui; peyesendar güeraño tupri perasora. Pe pococa avei ndaperasoi chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi.

¹² “Evocoyase peique ramoseve oi pipe, peyapora, ‘Avirave, Tũpa tape rovasa’ peyera chupe. ¹³ Acoi aviyeve oi pipendar ava pēu, ahe oipisira Tũpa porovasasa; acoi ndahaviyeise rumo ava, ndoipisii chira Tũpa porovasasa yuvireco. ¹⁴ Acoi ndosendu potaise pe ñehe, ndape pisi potaise avei yuvireco, ahese pesēño ahe oi pipe sui, anise tecua sui. Peipipetera pe pi ivi rãtachigüer sui, pesē pecua ichui ‘toipisi Tũpa ñemoirosa yuvireco’ pe yapave. ¹⁵ Evocoyase supi eté ari cañi oyepotase co tecua upe, ivate catura Tũpa ñemoirosa ava Sodoma, Gomorra iguar upendar sui curi” ehi.

Yamotarēhiprira Jesús reroyasar

¹⁶ “¡Pesendu tupri che ñehe! Che opomondo ovesa nungar ava mbahe mimba oñaro ai vahe nungar pãhuvē. Sese peresaeté tuprira peyese mboi nungar, iyavei inungar apicasu seco tupri vahe peicora.

¹⁷ Iyavei peicua catu peamotarēhimbar sui. Esepia, mborerercuar rovai pe rerasora iyavei pe nupara otũ-paro pipe yuvireco, ¹⁸ ichui pe reraso aveira mborerercuareta ivate catu vahe rovai yuvireco che recocuer sui tēi, ěgüe peyera peñehe che recocuer rese chupe iyavei ava ndahei vahe judío upe avei. ¹⁹ Acoi pe rerasose mborerercuar upe yuvireco, ‘¿Mbahe pñha amombehura chupe?’ ndapeyei chira; acoi peñehe potase rumo, Tũpa omondora pe ñehe āgua pēu. ²⁰ Esepia, ndahei chira peyesui tēi peñehe, pe Ru Tũpa Espiritu pemoñehe ucara.

²¹ “Ipare rumo ava vivri omondora oamotarēhisar upe ‘toyuca yuvireco’ oya. ěgüe ehi aveira ava guahir upe; tahir avei oyamotarēhira oyesupa yuca uca āgua yuvireco che recocuer rese. ²² Iyavei opacatu ava ndape ambotai chira che recocuer sui tēi yuvireco. Acoi oyemoviracua vaheño rumo arĩ ipa vahe rupi, ahe ipĩsiropri yuvirecoira curi. ²³ Iyavei acoi pe mañeco tēise ñepepe tecuave yuvireco, ahese peyepēpñora ichui ambuae tecua pipendar upe che recocuer mombehu āgua. Supi eté Ava Riquehir oura ndapemboaviye viteiseve pe guatasa judío recua rupi.

²⁴ “Ñepepe yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui. ²⁵ Iyavei semimbohe, ‘Aviye ité’ ehiñora ombohesar osecoupitise. ěgüe ehi aveira mbiguai güerecuar upe. Acoi oi yar upe: ‘Carugar rerecuar Beelzebú’ ehise, aipo ehi aveira niha oi pipendar upe yuvireco no” ehi.

¿Uma sui pñha siquiyesara?

²⁶ “Sese ndapesiquiyēi chira ava pe amotarēhimbar sui. Esepia, yaposa vahe imombehupirēhi cūrītei, icuasaño itera curi; iyavei mbahe ñomipri, icuasaño aveira no. ²⁷ Acoi che amombehu vahe pñtumimbisave pēu, pemombehu arĩ pipe coiye, iyavei acoi amombehu vahe pēuñomi, perosapucaĩ pe rēta harive imombehu opacatu ava upe. ²⁸ Iyavei ndapesiquiyēi chira acoi ava peyuca potasar sui. Esepia, ndoicatui niha ava hã mocañi āgua yuvireco. Tũpa sui rumo pesiquiye catura. Esepia, ahe oicatu yande retecuer, yande hã reseve imocañi āgua tata guasu pipe” ehi.

²⁹ “Yamondo niha ñuvirío vñraimi repirã ñepeimi guarepochi yepi. Yande Ru Tũpa ndoipotaise rumo, ndoviapi chietera que ñepepe vñraimi” ehi. ³⁰ “Sese pesiquiye eme. Esepia, pe niha ivate catu vahe ité peico opacatu vñrai sui. Supi eté Tũpa niha oicua opacatu ñepepepe pe ha retacuer” ehi.

“Che aicua Jesucristo” ehi vahe opacatu ava rovaque

³² “Acoi ava ‘che aicua Jesucristo’ ehi vahe opacatu ava rovaque, che avei evocoiyase: ‘Co ava che rupindar secoi’ ahera che Ru iva pendar upe. ³³ Acoi ava ‘che ndahei Cristo rese aico’ ehi vahe rumo cheu ava rovaque, che avei evocoiyase, ‘Ndahei co che rupindar secoi’ ahera che Ru iva pendar upe.

Jesús reroyasa pipe sui oimera yeamotarēhisa

³⁴ “ ‘Mbahe tupri ai revo güeru co ivi pipe’ ndapeyei chira cheu. ěgüe ehi rumo che yusa omoime ucara yeamotarēhisa. ³⁵ Sese ava oñemu ae oyeamotarēhirēhira yuvireco; ava oyesupa oyamotarēhira, iyavei cuña membri osi oyamotarēhira, cuña vovayar oyamotarēhi aveira.

³⁷ “Iyavei acoi oyesupa tēi osaisu catu vahe che sui, ahe ndiyai eté secoi che voyarã; inungar avei osaisu catu vahe guahir, anise guayri che sui. ³⁸ Iyavei acoi noñemosai vahe mbahe rasicuer upe, inungar-ra curusu rese ovosii vahe ité viña che rupi oguata pipe, ahe chupe ndiyai eté che voya seco āgua. ³⁹ Acoi ava oipĩsiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepisirora” ehi Jesús güemimbohe eta upe.

Porerecosa resendar ñehesa

⁴⁰ “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar. ⁴¹ Acoi ava oipisi tupri vahe ambuae ava Tũpa ñehe mombehusar secosa rese, ahe oipisi aveira porerecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porerecosa inungar tupri. ⁴² Iyavei acoi omondo vahe que chíhi i sōhisa vahe que ñepepe seco mbegüemi catu vahe toihi che reroyasar seco rese, ahe oipisi aveira Tũpa suindar porerecosa” ehi.

Juan Oporoãpiramo vahe ovoya omondo Jesús recocuer cua uca āgua

11 Opase Jesús oyocuai doce güemimbohe, ahese yuviraso oporombohe Tũpa Ñehengagüer rese judío recua rupi yuvireco.

² Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese ³ imboporandu āgua: “¿Nde ité vo Tũpa Rembiporavo aipo sãrombri ereico? anise, ¿oime tie ambuae orosãro vaheñã?” ehi yuvireco chupe.

⁴ Ipare omboyeve chupe aipo ehi: “Peso, pemombehu Juan upe mbahe pe rembiepia iyavei pesendu vahe. ⁵ ‘Ndasesapiso vahe osareco tupri cūrītei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pñsirosa resendar ñehesa’ peyera

chupe. ⁶ ¡Oviharetera acoi ava oyeroyaño vahe che rese!" ehi Juan rupindar upe.

⁷ Juan rupindar yuviraso pare, Jesús omboipi imombehu ava upe Juan recocuer: "¿Pesepiase Juan recocuer ava porêhisave capihata ivitu ombova-mbova vahe nungar pîha? ⁸ Anise, ¿pesepia tie iturucuar porañete ai vahe iyemboeteise? ¡Aní! Ēgüe ehi vahe rumo secoi mborerecuar guasu rêtave yepi. ⁹ Evocoiyase pesepiase, ¿'Ava' peye vo pe chupe? ¿Tüpa ñehe mombehusar ité pîha? Taa, ahe ité. Evocoi niha ivate catu vahe Tüpa ñehe mombehusar sui. ¹⁰ Ahe chupe ité Tüpa icuachiapri aracahendar pipe aipo ehi:

'Che amondora nde renondeve che ñehe mombehusar nde raperã moingatu ñgua' ehi.

¹¹ Supi eté ndipoi que ñepeí ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tüpa mborerecuasave rumo ava seco mbegüemi catu vahe ivate catu ichui.

¹² Juan yusa suive tupri Tüpa povri pendar oiporara mbahe tēi yuvireco. Osãha-sãha ava opiratasa pipe imocañi ñgua. ¹³ Opacatu Tüpa ñehe mombehusar rembicuachia pipe, Moisés porocuaíta icuachiapri pipe avei imombehusa Juan yusa rupive co Tüpa mborerecuasa resendar. ¹⁴ Yepe yavaira seroya ñgua pēu viña, Juan rumo, Tüpa ñehe mombehusar Elías. Ahe imombehupri ou vahe. ¹⁵ Acoi ava osendu pota vahe che ñehe, toyapisacaño sese" ehi.

¹⁶ "¿Mbahe rese pîha amboyoyara ava recocuer cūrteindar? Esepia, co ava inungar acoi chñivahe iguayi tēi vahe ocar rupi. Ipare oñehe pucu-pucu omboripar upe yuvireco aipo ehi: ¹⁷ 'Oromoñehe tēi mimbipēu, ndapepivoi eté rumo iyavei orosapucaí tēi sapucaisa viharēhisa resendar pēu, pe rumo ndapeyasehoi eté' ehi. ¹⁸ Esepia, ouse Juan Oporoãpiramo vahe, ahe ndohui tembihu sepirusu ai vahe iyavei ndoihui uva ricuer ipirata vahe, sese, 'Co mbia caruguar vireco vahe oyese' peye tupri tēi chupe. ¹⁹ Coiye che ayu, Ava Riquehir, acarú, aihu tupri avei. Ipare, 'Co icaru guasu ai vahe secoi, iihu guasu ai vahe avei' peye cheu; 'Ava angaipa viyar mboripar tēi iyavei guarepochi rocuar mboripar tēi' peye avei cheu. Acoi ava supi eté vireco vahe Tüpa mbahecuasa, ahe icuasara semiapi rese yepi" ehi.

Tecua ndiporeroyai vahe

²⁰ Ahe se Jesús oñehe pírata moviro tecua pendar upe. Esepia, aheve acoi oyapo atí catu mbahe poromondiisa viña. Ahe pendar ava rumo ndosecuñaro potai eté güecocueraí Tüpa upe nara yuvireco. Evocoiyase aipo ehi chupe: ²¹ "¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondiisa pe pãhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharēhisa resendar, tanimbu avei omondora oãca rese oangaipa mboasisa pipe yuvireco viña no. ²² Pe rumo peipisira ivate catu vahe Tüpa ñemoirosa ava Tiro, Sidón pendar sui arí cañi pipe coiye. ²³ Pe avei no, tecua Capernaum

pendar pemoha co ivave pe reco ñgua viña. ¡Pe rumo pe mombosara ivicuar ipicucu catu vahe pipe. Ehi revotecua Sodoma ve rane, acoi poromondiisa yapopri vahe pe pãhuve yaposara viña, cūrteí oime vitera ahe tecua viña. ²⁴ Sese, pe peipisira ivate catu Tüpa ñemoirosa ava Sodoma iguar sui arí cañi pipe coiye" ehi.

Peyu cheu mbituhusa reca

²⁵ Iyavei ahe arí pipe Jesús oyerure: "Che Ru, aviye ndeu. Nde niha iva pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecuai vahe sui; eremboyecua rumo ava seco mbegüemi vahe upe. ²⁶ Ēgüe ere niha mbahe nde remimbotar apo, che Ru" ehi.

²⁷ "Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tupri. ²⁸ Peyu cheu opacatu icueraí vahe. Che amondora pe pituhu ñgua. ²⁹ Peico che povrive, peyembohe avei che sui. Esepia, che ndache reco asii, iyavei che povrive pe recosa ndayavaimi eté. Ahe se ramo oimera mbituhusa pēu" ehi.

Mbituhusa arí pipe Jesús remimbohe oipoho trigo yuvireco

12 Mbituhusa arí pipe Jesús yuviraso güemimbohe rese, oguata mbahe miti pãhu rupi. Ahe se semi-bohe ndasiepoi. Evocoiyase trigo rãhii oipoho-pohomi güemihura yuvireco. ² Fariseo yuvirecoi vahe osepia, aipo ehi Jesús upe:

—Esepia nde remimbohe. Oporaviquiño mbituhusa arí pipe yuvireco —ehi yuvireco chupe.

³ Ahe rumo omboyeví ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha yuviroique ité tūparo pipe pan imboeteipri Tüpa upendar hu ñgua ondugüer reseve. Ahe chupe acoi ndipotasai ihu ñgua yuvireco viña. Judío pahi yuvirecoi vahe upeño ité niha ipotasa ihu ñgua yepi. ⁵ ¿Ndapeyeroquií vo Moisés porocuaíta resendar pipe? Esepia, judío pahi tūparo rese hañecosar ndopituhui eté tūparo pipe yuvireco mbituhusa arí pipe yepi. Ndahei rumo oyemboangaipa ipipe yuvireco. ⁶ Cūrteí cohava oime ava ivate catu vahe tūparo sui. ⁷ Evocoiyase pe ndapesenducuai eté Tüpa Ñehengagüer aipo ehi vahe: 'Che aipota peporoparaisuereco, aní chira peropovēhepa porerecosa mbahe mimba tēi cheu' ehi vahe. Pesenducua se viña, ahe se, "Oyavi mbahe" ndapeye voi chira che remimbohe mbahe ndoyavii vahe upe viña. ⁸ Esepia, Ava Riquehir mbituhusa arí rerecuar ité secoi —ehi fariseo eta upe.

Mbia ipo nomii vahe Jesús ombogüera

⁹ Ichui osose Jesús, oi que judío tūparove. ¹⁰ Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese,

—¿Iyaño pīha mbituhusa ari pipe ava imbogüerasa yepi’ —ehi yuvireco chupe.

¹¹ Evocoyase Jesús aipo ehi imboyevi:

—¿Ava vo pe pāhu pendar acoi mbituhusa ari pipe oviapise seimba ovesa ivicuarve ndosoi chira senose viña? ¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

¹³ Ahese aipo ehi aipo mbia upe:

—Eichoho nde yiva —ehi.

Evocoyase oichohose oyiva, ocuera tupri voi inungar ambuae iyiva. ¹⁴ Evocoyase fariseo opa yuvinose yuviraso oyemoingatu Jesús yuca āgua yuvireco.

Yaviye aracahendar imombehupri Jesús recocuer re-sendar

¹⁵ Evocoyase Jesús oicua se fariseo pihañemoñetasa, osē oso, ava rehii avei yuviraso supi. Setá avei imbaheasi vahe ombogüera, ¹⁶ iyavei, “Che mombehui rene ava upe peyé” ehi. ¹⁷ Ēgüe ehi yaviyepa Tūpa ñehe mombehugar Isaías remimombehugüer:

¹⁸ “Co ité che mboyeroyasar che rembiporavo.

Ahe asaisu etepri.

Sese ité ayemboviha.

Amondora che Espiritu chupe.

Ahe omombehu aveira mbahe ihivi vahe opacatu ava ivi pipendar upe.

¹⁹ Noiñhepoepi-epii chira ava, nasase-sasei tēi chiveira; iyavei ndosendui chietera ava iñehe ocar rupi.

²⁰ Iyavei nomopei chietera que ñepei pataviimi oyeapa vahe; nombogüei chiveira tataendi sātachiñomi tēi vahe.

Ēgüe ehira mbahe ihivi vahe pipe opacatu secopipa.

²¹ Evocoyase opacatu tecua pendar ava ndahei vahe judío oyeroyara yuvireco sese’ ehi Isaías aracahe.

“Jesús vireco carugar pīratasa oyese” ehi tēi ava yuvireco

²² Ichui ava ndasesapisoi vahe, noñehei vahe carugar rerecosar viraso Jesús upe yuvireco. Evocoyase Jesús ombogüera. Ahese osareco, oñehe avei. ²³ Evocoyase opacatu ava oyepihamondiisave aipo ehi yuvireco: “¿Tūpa Rembiporavo David suindar pīha co?” ehi yuvireco chupe.

²⁴ Osenduse rumo fariseo, “Co mbia carugar rerecuar Beelzebú pīratasa pipe tēi omboyepepi carugar ava sui” ehi yuvireco.

²⁵ Oicuaño rumo ipihañemoñetasa. Sese aipo ehi: “Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi

mborerecuar pīratasa ocañi tēira. Iyavei que tecua pendar, anise, que ava omu rese ovavase oyeupe, oyo oyeocañi tēira yuvireco. ²⁶ Ēgüe ehi avei carugar. Esepia, serecuar omboyepepise opovri pendar, ovavara oyeupe yuvireco viña. Evocoyase ahe oyeocañi tēira yuvireco. ²⁷ Iyavei pe, ‘Beelzebú pīratasa pipe sui tēi omboyepepi carugar ava sui’ peye tēi cheu. Evocoyase, ¿ava pīratasa pipe vo pe voya eta omboyepepi carugar ava sui yuvireco? Tūpa pīratasa pipe, che avei evocoyase ayapo evocoi nungar ipīratasa pipe. Pe voya ae omboyecuar pe ñehe pe rembiavi yuvireco pēu. ²⁸ Che rumo Tūpa Espiritu pīratasa pipe amboyepepi carugar ava sui. Sese cūrítei pesepia ité Tūpa mborerecuasa.

²⁹ “Iyavei no, que ava oi que potase ambuae ava ipīrata etepri vahe rētave imbahe rerocua āgua ichui viña, yipindar opa rane itera oñapichi-pichi. Ipare voi opara virocua imbahe ichui.

³⁰ “Iyavei acoi ava ndache mboyoyai vahe, ahe che amotarēhimbar yuvireco; acoi ava ndosecai vahe ava cheu nara, ahe omosai tēi yuvireco che sui.

³¹ “Sese ava upe oimera ñeroisa opacatu angaipa rese iyavei iñehe mara-mara tēi vahe upe avei. Co catu acoi iñehe-ñehe tēi vahe Tūpa Espiritu upe, ahe chupe ndipoi chietera ñeroisa. ³² Iyavei acoi ava oñehe-ñehe tēi vahe che, Ava Riquehir rese, ahe chupe oimeño ñeroisa; acoi oñehe-ñehe tēi vahe rumo Espiritu amotarēhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

Ava recocuer icuasa sembiapo rese

³³ “Emoatiro tupri ivira, ahe iha aviye; ndere-moatiro tupriise ivira, ahe evocoyase virecora oha naporai vahe. Esepia, ivira icuasa iha rese. ³⁴ ¡Evocoyase pe, mboi nungar tēi peico vahe, pe recocuer naporaise, ndapeicatu chira mbahe aviye vahe rese pe ñehe āgua! Esepia, pe piha pipe sui tēi osē pe ñehe āgua. ³⁵ Iyavei acoi ava aviye vahe oñehe tupri opihañemoñeta catuprisa pipe; acoi ava recocuer naporai vahe rumo, opihañemoñeta raisa pipe tēi oñehe. ³⁶ Sese ari cañi pipe opacatu ava opara omombehu oñehe-ñehe tēisa Tūpa rovai yuvireco. ³⁷ Esepia, pe ñehe aviye vahe repri peipisira, pe ñehe naporai vahe repri peipisi aveira” ehi Jesús.

Ava eta ndaseco pōrai vahe oporandu poromondiisa rese yuvireco

³⁸ Evocoyase fariseo iyavei Moisés porocuita rese oporombohe vahe aipo ehi yuvireco Jesús upe: —Porombohesar, ore orosepia pota mbahe nde rembiapo poromondiisa nde recocuer cua āgua —ehi yuvireco.

³⁹ Jesús rumo omboyevi iñehe:

—Pe ava ndaseco pōrai vahe, ndiporeroyai vahe, peporandu tēi poromondiisa tecocuer cua āgua rese. Che rumo namboyecuai chira ambuae poromondiisa; Jonás recocuer rese güeraño opomomahenduhara.

⁴⁰ Esepia, inungar Jonás secoi mbosapí ari pira guasu aviterve aracahe, ěgüe ehi aveira Ava Riquehír mbosapí ari ivivrive taira omano vahe pãhuve. ⁴¹ Evo-coiyase ari cañi pipe ava tecua Nínive pendar porandusave omombeura ava cūrteindar cañipa āgua. Esepia, Nínive pendar niha omboasise oangaipa, oyeví Tūpa upe yuvireco Jonás omombeuse Tūpa Ńehengagüer chupe. Cūrteirum oime Jonás sui aviye catu vahe pe pãhuve. ⁴² Iyavei ari cañi pipe cuña mborerecuar guasu irohí coti secua vahe porandusave, omombeura cūrteindar ava cañipa āgua. Esepia, ahe ou amombri sui Salomón mbahecuasa rendu āgua. Cūrteirum oime ivate catu vahe Salomón sui —ehi fariseo eta upe.

Carugar oyevi iri ava güeco agüerve

⁴³ “Iyavei carugar osěse ava sui, oguata tēi ivi ipiru vahe rupi opituhu āgua reca. Ipare rumo ndoyosuise, ipihañemoñeta, ⁴⁴ ‘Ayevi irira che reco agüerve vicho’ ehi. Aheve oyevisse, osepia iri secocuer inungar oi ndiporusai vahe, sahuvapri tupri. ⁴⁵ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui. ěgüe ehi aveira ava cūrteindar ndaseco pōrai vahe upe” ehi.

Jesús si, tivireta avei

⁴⁶ Jesús oñehe vitesseve ava upe, ahese ichi, tivireta reseve ocarve yuvinoai. Ahe oñehe pota yuvireco chupe. ⁴⁷ Evocoyase mbia omombeu Jesús upe:

—Nde si, nde rivireta reseve co ocarve yuvinoai. Ahe oñehe pota yuvireco ndeu —ehi.

⁴⁸ Ahe rumo,

—¿Ava piha che si; ava piha che rivri? —ehi ahe mbia upe.

⁴⁹ Evocoyase omboyecua opo pipe güemimbohe eta aipo ehi:

—Co che si eta, co che rivireta. ⁵⁰ Esepia, acoi che Ru íva pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

Mbahe miti sui yembohesa

13 Ahe ari pipe Jesús osě oi sui oso, oguapi ipa popive oí. ² Aheve ava oñemonuha atise yuvireco, oha carite pipe oguapi oí, evocoyase opacatu ava opita ipa popi rupi yuvireco. ³ Ahese omboyoya-yoya oporombohesa setá mbahe rese aipo ehi:

“Ńepeí mbia osě omaheti oico. ⁴ Ahe otiapi-apise mbahe rãhii oso, moviro oiti peri rupi. Vĩrai ogüeyise rumo sese, opaño yuvirohu. ⁵ Iyavei moviro oiti ivi nayanai vahesave ita pãhuve. Sese cūrteimi sorí; ⁶ ari tasise rumo, opaño ipiru. Esepia, ndasapoi niha.

⁷ Iyavei ambuae mbahe rãhii oiti yu pãhuve. Ahe yu rumo sorí poyava catu yuvireco ichui. Sese opaño oyopi.

⁸ Ambuae rumo oiti ivi aviye vahesave, ahe setá iha imonuhasa; ñepeí ihí sui osě cién iha, ambuae sui osě sesenta, ambuae sui treinta. ⁹ Acoi ava osenducua

pota vahe che ñehe, toyapisacaño sese” ehi Jesús ava eta upe.

¿Mahera piha co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesús rese yuvireco mbahe rese oporandu āgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi. ¹¹ Jesús aipo ehi: “Pēu rumo Tūpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté. ¹² Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasañora ichui. ¹³ Sese añehese chupe, amboyoyaya aipo nungar mbahe yavai vahe ambuae mbahe rese yepi. Esepia, ahe osepia tēi, ndosepiacuai rumo yuvireco iyavei osendu tēi, ndosenducuai avei yuvireco no. ¹⁴ Na ehi yaviye Tūpa Ńehengagüer Isaías remimombeu:

‘Pe niha pesendu tēira, ndapeicuai chira rumo; iyavei pesepia tēira, ndapesepiacuai chira rumo.

¹⁵ Esepia, evocoi ava eta upe yavai eté ipiha pipe imbahe reroya āgua, ndayapisai eté sendu potaēhisave; ndoyemboesapisoi avei sepia potaēhisave.

Esepia, ndosenducua potai opiha pipe yuvireco cheu oyevi potaēhisave ombogüera āgua’ ehi Isaías aracahe.

¹⁶ “Pe rumo perorivete ité sepiacuase, pesenducua avei no. ¹⁷ Supi eté setá Tūpa ñehe mombehusar iyavei ava seco catupri vahe aracadendar osepia pota tēi mbahe pe rembiepia, ahe rumo ndosepiái eté yuvireco; iyavei osendu pota tēi co pe remiendu, ahe rumo ndosendui avei yuvireco” ehi Jesús güemimbohe eta upe.

Jesús omombeu yembohesa mbahe miti resendar

¹⁸ Ipare aipo ehi: “Peyapisaca omaheti vahe recocuer rese. ¹⁹ Acoi osendu tēi vahe Tūpa Ńehengagüer imborerecuasa resendar, ipare rumo ndosenducuai, ahe inungar acoi mbahe rãhii oviapi vahe peri rupi. Ipare rumo carugar ou chupe. Ahe ipiha pipe osendu vahe Tūpa Ńehengagüer opa tupriño omocañi ichui.

²⁰ Iyavei acoi mbahe rãhii seitipri ita pãhuve, ahe inungar ava recocuer yipiño osendu vahe, oipisi vahe avei vorivetesá pipe Tūpa Ńehengagüer. ²¹ Ipare rumo inungar co mbahe miti ndovirecoi vahe guapo ovĩracua āgua, ěgüe ehi avei evocoi nungar ava oimese mbahe mbahe tēi Tūpa Ńehengagüer sui chupe, cūrteimi seroyaēhisave oyepepi ichui. ²² Acoi mbahe rãhii seitipri yu pãhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saisusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Ńehengagüer rupi. Sese secocuer ndaviye iri eté, inungar mbahe miti ndihai vahe. ²³ Acoi itĩsa vahe mbahe rãhii ivi aviye vahe rese, ahe inungar ava osenducua vahe Tūpa Ńehengagüer. Iyavei inungar acoi co

mbahe miti ihá iteanga vahe, ěgüe ehi avei ava sec-
ocuer aviye vahe inungar ñepe-peí sãhii sui osẽ que
cien iha, sesenta iha, anise que treinta” ehi Jesús
güemimbohe eta upe.

Trigo pãhuve caha naporai vahe sui yembohesa

²⁴ Jesús omombehu iri co ambuae mbahe rese yem-
bohesa oyoya vahe: “Tũpa mborerecuasa oyoya tupri
ava oivi pipe mbahe rãhii oñoti vahe rese. ²⁵ Opatu
ava queseve rumo oyepota yamotarẽhisar, caha tẽi
rãhii oñoti trigo pãhuve oso. ²⁶ Acoi trigo iha potase,
supive avei sorĩ caha. ²⁷ Evocoyase oporaviqui vahe
yuviraso, omombehu iyar upe aipo ehi yuvireco: ‘Ore
rerecuar, ¿ndahei vo acoi mbahe rãhii aviye vahe
ereñoti nde ivi pipe? ¿Que sui ru caha sorĩ ipãhuve?’
ehi yuvireco chupe. ²⁸ Iyar rumo aipo ehi chupe: ‘Oime
revo que che amotarẽhisar’ ehi. Evocoyase oporaviqui
vahe oporandu yuvireco chupe: ‘¿Ndiyai pĩha caha tẽi
orosapohopara ichui viña?’ ehi. ²⁹ Ahe rumo aipo ehi
chupe: ‘Aní, aviyeteramo caha rupive pesapoho tiẽtera
trigo’ ehi. ³⁰ ‘Evocoyase peseya, tocuacuaño oyoya yu-
vireco. Yaviyese voi mbahe miti, ahese che ayocuaire
oporaviqui vahe caha tẽi rane rerocua ãgua imboa-
puha uca sapi. Ipare oyapocatura trigo rãhii che mba-
he apocatusave yuvireco’ ehi ivi yar” ehi Jesús.

Yembohesa mostaza rãhii suindar

³¹ Jesús omombehu iri co ambuae mbahe rese yem-
bohesa oyoya vahe: “Tũpa povri pendar oyoya tupri
mostaza rãhii rese. Ahe mbia oñoti vahe oivi pipe.
³² Supi eté co mostaza rãhii tahimi catu opacatu am-
buae mbahe rãhii sui. Ipare rumo, ocuacuase, tuvichá
catu ambuae mbahe miti sui inungar ivira tuvichá va-
he. Ahe sãca rese vĩrai rehii oyapo guaitirã” ehi
oporombohe.

Yembohesa pan mboapeposa sui

³³ Ipare Jesús oporombohe iri ambuae mbahe rese
aipo ehi: “Tũpa povri pendar oyoya tupri pan mboape-
posa rese, acoi cuña omboyeseha tupri vahe trigo cuhi
rese opacatu imboapepo ãgua yepi” ehi oporombohe.

Jesús oiporu oporombohe ãgua mbahe rese mboyoy- asa yepi

³⁴ Jesús omombehu opacatu evocoi nungar mbahe
omboyoya-yoyase oporombohesa ambuae mbahe
rese opacatu ava upe. ³⁵ Co rumo na ehi Tũpa ñehe
mombehusar rembicuachiagüer aviye ãgua:
“Che añehese, amboyoyara che porombohesa am-
buae mbahe rese.
Iyavei amombehu Tũpa ivi apo suive mbahe ni-
porẽhii vahe” ehi.

Jesús omombehu tupri oporombohesa caha tẽi re- sendar

³⁶ Ahese Jesús, “Aviye” ehi ava upe. Ipare oi que oi
pipe. Aheve semimbohe oyemboyapa yuvireco sese
‘tomombehu trigo pãhuve caha oime vahe resendar
yandeu’ oya. ³⁷ Evocoyase omboyevi chupe: “Acoi ava
mbahe rãhii aviye vahe oñoti vahe, ahe che, Ava
Riquehir. ³⁸ Ivi mbahe miti rupa, ahe ava co ivi pipen-
dar. Iyavei mbahe rãhii aviye vahe, ahe ava Tũpa povri
pendar; caha naporai vahe, ahe ava caruguar suindar
yuvirecoi vahe. ³⁹ Acoi yamotarẽhimbar, oñoti vahe ca-
ha, ahe niha Caruguar ité. Evocoyase ari mbahe miti
pohosa, ahe ari cañisa; acoi omonuha vahe mbahe
miti, ahe Tũpa rembiguai iva pendar yuvireco. ⁴⁰ Iyavei
inungar acoi caha tẽi imonuhapri sapi ãgua, ěgüe ehi
aveira ari cañi pipe coiye. ⁴¹ Evocoyase che, Ava Rique-
hir, che rembiguai iva pendar amondora opacatu ava
ambuae omboangaipa uca vahe, mbahe-mbahe tẽi
aposar avei rerocua ãgua che povri yuvirecoi vahe
pãhu sui. ⁴² Ichui omondopara tata guasuve. Aheve oy-
aseho tẽira iyavei ombotere-tere tẽira guã yuvireco.
⁴³ Aheseve voi ava Tũpa reroyasar seco tupri vahe, ari
nungar sendi yaira Vu mborerecuasave yuvireco. Que
ava osendu pota vahe che ñehe, toyapisacaño sese”
ehi.

Mbahe repirusu ñomimbri sui yembohesa

⁴⁴ “Evocoyase Tũpa mborerecuasa oyoya tupri mba-
he sepirusu vahe que ivi pipe ñomipri rese. Ipare ava
aviyeteramo tẽi oyosura viña. Ahe rumo aheve avei
oñomi. Ipare vorivetesu pipe opacatu ombahe omon-
dopa co ivi rerocua ãgua mbahe sepirusu vahe pota
raisa pipe” ehi.

Mbohir sepirusu catu vahe sui yembohesa

⁴⁵ “Iyavei Tũpa mborerecuasa inungar ava mbahe re-
rocuar oseca vahe mbohir icatupri vahe yepi. ⁴⁶ Ahe
oyosuse mbohir sepi catu vahe, oso opacatu ombahe
mondo co sepi catu vahe rerocua ãgua.

Pira mbohasa sui yembohesa

⁴⁷ “Iyavei Tũpa mborerecuasa inungar pira mbohasa.
Imondopri ipive. Ipare omboha opacatu-catu tẽi pira.
⁴⁸ Acoi savapipose pira mbohasa, vinose ivi ãtasave yu-
vireco. Aheve oiporavo pira aviye vahe oñõñapa omba-
he riruve yuvinoi, naporai vahe rumo opaño omombo
yuvireco. ⁴⁹ ěgüe ehi aveira ari cañi pipe: ahese Tũpa
rembiguai iva pendar yuvinosera opacatu ava ndaseco
põrai vahe mboyepepi ãgua ava seco catupri vahe sui.
⁵⁰ Evocoyase ava ndaseco põrai vahe imondosara tata
guasuve. Aheve oyaseho tẽira iyavei ombotere-tere
tẽira guã yuvireco” ehi.

Mbahe ipiasu vahe iyavei ocuacua vahe sui yembohe-sa

⁵¹ Evocoyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

⁵² Evocoyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

⁵³ Oñehe pare, Jesús osẽ ichui ⁵⁴ oyepota güecuave oso. Aheve ombohe ava judío tũparo pipe oico. Evocoyase ahe pendar ava oyepihamondii tẽi:

—¿Que pĩha co ava oyembohe catu ombahecua ãgua? iyavei, ¿mara ehi pĩha co mbahe poromondiisa apo? —ehi yuvireco—. ⁵⁵ ¿Ndahei vo acoi carpintero rahir tẽi? Ichĩ niha acoi María, iyavei yuvirecove tivri, ahe Santiago, José, Simón, Judas. ⁵⁶ Seindri avei niha yuvirecove yande pãhuvẽ. Evocoyase, ¿que pĩha oyembohera viña? —ehi tẽi yuvireco chupe.

⁵⁷ Ipĩpe sui ndoviroyai yuvireco. Ahe rumo aipo ehi chupe:

—Tũpa ñehe mombehusar niha omboetei opacatu rupi yuvireco yepi. Secua pipendar, sãta pipendar ae rumo nombotei yuvireco —ehi.

⁵⁸ Evocoyase, ahe ava viroyaẽhisa rese, moviro tẽi oyapo mbahe poromondiisa ipãhuvẽ.

Juan Oporoãpiramo vahe mano agüer

14 Ahe arĩ rupi Herodes, mborerecuar guasu Galilea pendar, oyandu Jesús rerãcua. ² Evocoyase aipo ehi opĩtiviisar upe: “Juan Oporoãpiramo vahe revo ocuerayevi. Sese oyapo poromondiisa ipĩrata vahe” ehi.

³ Esepia niha, yipĩndar Herodes Juan oipisi, oñapĩchi carena pipe soquenda ãgua vivri Felipe rembireco Herodías sui tẽi, ⁴ “Ndiyai eté nde rembireco nungar ererocora” oyeupe hese.

⁵ Herodes oyuca pota Juan viña, osiquiyeño rumo ava eta sui. Esepia, ahe, “Tũpa ñehe mombehusar secoi” ehi yuvireco chupe. ⁶ Acoi Herodes haragüer mboeteisa pipe rumo aipo cuña Herodías membrĩ osẽ opivoi ava rehii rembiepiave. Herodes upe evocoyase aviye ai eté. ⁷ Sese ahe oyemoingatu ñepeĩ reseve que mbahe oyeupe oporanduse imondo ãgua chupe.

⁸ Evocoyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoãpiramo vahe ãca poratu pipe cheu —ehi.

⁹ Aipo ñehesa nombovihai eté Herodes; ndiya iri rumo, “Aní” ohe ãgua. Esepia, opacatu ava güemimborĩ eta rovaque aipo ehi. Sese, “Taperu chupe” ehiño.

¹⁰ Ahese oporocuai Juan ãca hasia ãgua soquendasave.

¹¹ Ipare viraso poratu pipe cuñatai upe yuvireco. Evocoyase ahe omondo osi upe.

¹² Ahese Juan remimbohe oyepota yugüeru, viraso sete ñoti yuvireco. Ipare yuviraso Jesús upe imombehu.

Jesús oyopoi cinco mil cuimbahe

¹³ Jesús oyanduse Juan manosa, ahese ahe ae oso ava porẽhisave carite pipe. Ava rehii rumo oyanduse, yuvinosẽ voi güecua sui, ivi rupi yuviraso osupiti secosave yuvireco. ¹⁴ Evocoyase osẽse carite pipe sui, osepia ava rehii. Ahese oiparisuereco ava eta. Sese opa ombogüera imbaheasi vahe serasopri. ¹⁵ Evocoyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovirocua mbahe güemihura yuvireco? —ehi yuvireco chupe.

¹⁶ —Aní, ndiyai yuviraso. Pe pemondora mbahe semihura yuvireco —ehiño chupe.

¹⁷ —Poyandepomi tẽi rumo pan orovireco iyavei ñuviriomi tẽi avei pira —ehiño semimbohe yuvireco chupe.

¹⁸ —Peruño ave cheu —ehi güemimbohe upe.

¹⁹ Ipare aipo ehi ava rehii upe: “Peguapi capihĩ harive” ehi. Evocoyase oipisi poyandepomi vahe pan, ñuviriomi vahe pira. Ichui omahese iva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoyase omboyaho-yaho ava eta upe semihura yuvireco. ²⁰ Evocoyase opacatu ava ocaru vahe ihĩtaropa tẽi yuvireco. Ipare semimbohe omboapipopa doce tupri iruova sembihu rumbirer yuvireco. ²¹ Ahe cuimbahe ocaru vahe retacuer cinco mil. Cuña rumo iyavei chĩhivahe ndipapasai yuvireco.

Jesús oguata i hari rupi

²² Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe. ²³ “Aviye” ohe pare ava upe, oyeupi oso ahe ae ivitri rese oyeroqui ãgua. Pĩtuse chupe, opitãño aheve. ²⁴ Aheseve carite oso pucuse ipa popi sui, ivitu ipĩrata vahe osovaĩchi yuvireco. Sese ohitu vahe nambegüẽ-mbegüẽi ocua sese. ²⁵ Cõhe potase, oguata i hari rupi oso güemimbohe coti. ²⁶ Semimbohe i hari rupi iguatase, oyembosiquiye yuvireco ichui. Sese, —iNdahei vo evocoi hãgüer secoi! —ehi yuvireco chupe.

²⁷ Güemimbohe upe rumo aipo ehi:

—iPeyemoviracuaño, che tẽi! iPesiquiye eme che sui! —ehi.

²⁸ —Che Yar —ehi Pedro—. Nde ité ereicose, taguata i hari rupi vicho nde piri —ehi.

²⁹ —Erio ru —ehi chupe.

Evocoyase Pedro ogüeyi carite pipe sui, oguata i hari rupi. Osora ipiri viña. ³⁰ Ivitu pĩrata repiase rumo, osiquiye ichui. Oso senise rumo ipive,

—¡Che Yar! ¡Che p̄s̄iromi eve! —ehi.

³¹ Aheſe c̄uriteimi voi oip̄s̄i Pedro po rese, aipo ehi chupe:

—¡Ch̄iñi t̄ei ereyeroya che rese! ¡Mahera ndereyeroya tuprii che rese! —ehi.

³² Oyuvirohase rumo carite pipe, opituhu voi ivitu.

³³ Evocoyase carite pipe yuvirecoi vahe oñenopiha sovai,

—¡Supi eté catu nde Tūpa Rah̄ir ereico! —ehi yuvireco chupe.

Jesús ombogüera imbaheasi vahe Genesaret pendar

³⁴ Osasase ipa, oyepota Genesaret ivi rese yuviraso.

³⁵ Opacatu ahe pendar ava oicuaeſe Jesús yepota, aheſe opacatu tecuami rupi omombehu-mbehu ava upe yuvireco. Evocoyase viraso imbaheasi vahe chupe, ³⁶ aipo ehi yuvireco: “Topocomi t̄ei nde turucuar popi rese yuvireco” ehi; evocoyase opacatu sese opoco vahe, ocuerapa voi eté yuvireco.

Porombohesa yande mboangaipa vahe resendar

15 Oyemboya Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

² —¿Mahera vo nde remimbohe ndoguatai yande ramoi aracahendar aracuasa rupi yuvireco? ¿Mahera vo yande porocuita mboaviyeēhisa pipe ndoyepoi ocaru āgua yuvireco yepi? —ehi.

³ Jesús omboyev̄i aipo ehi chupe:

—Pe no, ¡mahera ndapemboyeroyai Tūpa porocuita pe ramoi aracahendar aracuasa rupi t̄ei pe guata āgua! ⁴ Eſepia, Tūpa aipo ehi: “Pemboyeroyara iyavei peip̄t̄iv̄iira pe ru, pe si avei no. Acoi iñehe mara vahe oyesupa upe, ahe tomanoño” ehi aracahe. ⁵ Pe rumo aipo peye t̄ei: “Acoi ava aipo ehi vahe vu upe, osi upe avei no: ‘Ndiyai chira mbahe mondo āgua p̄eu. Eſepia, che opacatu mbahe areco vahe imondopri Tūpa upe’ ehise, ⁶ aheſe ndiyai eté ip̄t̄iv̄i āgua chupe” peye. Ēḡüe peye pe aracua raisa pipe pemocañi Tūpa porocuita peyesui. ⁷ ¡Pe Tūpa reroyasar angahu t̄ei peico vahe! Supi tupri ité Tūpa ñehe mombehusar Isaías rembicuachia aracahendar omombehu pe recocuer:

⁸ “Co tecua pendar ava oyuru pipe t̄ei che mboetei yuvireco; ipihañemoñetasa rumo amombri t̄ei che sui.

⁹ Oyerure tupri t̄ei yuvireco cheu.

Eſepia, iporombohesa ava porocuita t̄ei ehi Isaías rembicuachiagüer pipe aracahe —ehi Jesús imombehu.

¹⁰ Ipare,

—Perio —ehi ava reh̄i upe—. Peyapisaca, pesenducua tupri che ñehe: ¹¹ mbahe oique vahe ava yuru rupi nomboangaipa ucai. Mbahe osē vahe ava yuru pipe sui, ahe rumo omboangaipa uca —ehi.

¹² Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

¹³ Ahe rumo aipo ehi chupe:

—Opacatu mbahe miti ndahei vahe che Ru iba pendar remiti, opara sapohosa curi —ehi—. ¹⁴ Ēḡüe tehiño yuvireco. Eſepia, evocoi inungar ndasesapisoi vahe viroguata ambuae ava ndasesapisoi vahe yuvireco. Ahe evocoyase oyoya voira oviapi ivicuar pipe yuviraso —ehi.

¹⁵ Evocoyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

¹⁶ —¿Ndapesenducua vitei avei catu pe co ñehesa?

¹⁷ ¿Ndapeicuai vo opacatu mbahe acoi ava yuru rupi oique vahe oso yaviterve, ipare osē setecuer sui?

¹⁸ Ava pihañemoñetasa sui osē vahe rumo iyuru rupi, ahe ava omboangaipa. ¹⁹ Eſepia, ava pihañemoñetasa sui osē pihañemoñeta raisa, porapichisa, mendasa sui yemboaguasasa, nomendai vahe yemboaguasa t̄eisa, mondasa, temira iyavei ava rese ñemoñeta t̄eisa.

²⁰ Evocoi nungar mbahe rumo omboangaipa ava; ndahei angaipa acoi yande caru renonde yande yepoiēhisa nungar —ehi.

Cuña ndahei vahe judía viroya Jesús

²¹ Ichui osē Jesús oso, oguata Tiro ivi rupi, Sidón ivi rupi avei. ²² Cuña cananea, Tiro, Sidón ivi rese secoi vahe oyemboya Jesús rese aipo ehi:

—¡Che Yar, David suindar, che paraisuerecomi eve! ¡Che membri vireco caruguar oyese! —ehi pucu-pucu ou chupe.

²³ Ahe rumo nomboyev̄i eté chupe. Evocoyase semimbohe oyemboya yuvireco sese aipo ehi:

—Emboyep̄i co cuña yande sui. Eſepia, sãse pucu-pucu ou yande raquicuei —ehi yuvireco chupe.

²⁴ Evocoyase aipo ehi güemimbohe upe:

—Che Ru Tūpa rumo che mbou Israel recua pendar upeño. Eſepia, ahe ovesa ocañi t̄ei vahe nungar yuvireco —ehi.

²⁵ Ahe cuña rumo oñenopiha sovai, aipo ehi chupe:

—¡Che Yar, che p̄t̄iv̄iimi eve! —ehi.

²⁶ Ahe rumo aipo ehi chupe:

—Naporai rumo yarocua pan tah̄ir sui cave tohu yamondo vaherã —ehi.

²⁷ —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

²⁸ —¡Cuña, tuvichá nde yeroyasa! Aviye, ēḡüe tehi eté nde remimbotar rupi —ehi.

Aipo ihe ramoseve, ocuera voi eté imembri.

Jesús setá ombogüera ava imbaheasi vahe

²⁹ Ichui Jesús osē oso ipa Galilea ivi. Ipare oyeupi ivitri rese oguapi oī. ³⁰ Aheve setá ava oyepota, güeru at̄i imbaheasi vahe yuvireco chupe: ndip̄induḡüei vahe, ndasesapisoi vahe, ip̄ari-p̄ari vahe, niñehengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera. ³¹ Ichui ava

niñehengatui vahe oñehe; ipãri-pãri vahe ocuera tupri; ndoguatai vahe uguata avei iyavei ndasesapisoi vahe osareco yuvireco. Sepiase ava rehii oyepihamondii aipo ehi: “Imboetepri Israel Tũpa tasecoi” ehi yuvireco.

Jesús oyopoi cuatro mil cuimbahe

³² Evocoyase Jesús oñehe güemimbohe upe aipo ehi: —Iparaisu catu co ava yuvireco cheu. Esepia, mboſapĩ ari yuvirecoi yande pĩri iyavei ndipoi eté mbahe semihura. Ndiyai sētave sie porēhi reseve amondo. Aviyeteramo oviroviapi-api tiētera tieporēhi perĩ rupi yuvireco viña —ehi.

³³ Evocoyase semimbohe aipo ehi yuvireco chupe: —¿Que sui pĩha orosecara tembihu ava rehii upe nara cohava ava porēhisave viña? —ehi yuvireco.

³⁴ —¿Mbovi vo pan pereco? —ehi.
—Orovirecomi siete pan iyavei moviromi tēi pirami —ehi semimbohe yuvireco chupe.

³⁵ Evocoyase, “Peguapi ivi harive” ehi ava rehii upe.
³⁶ Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoyase omondopa ava rehii upe yuvireco. ³⁷ Opatatu ava ocaru vahe ihĩtaro yuvireco. Ipare semimbohe omboapipo iri rane sumbirer siete iruova yuvireco. ³⁸ Cuimbahe ocaru vahe retacuer cuatro mil. Cuña, chĩhivahe retacuer rumo ndicuasai.
³⁹ Ipare Jesús, “Aviye” ehi ava upe, ahese oha carite pipe oso ivi Magadán rupi.

Fariseo iyavei saduceo oporandu poromondiisa rese yuvireco

16 Fariseo iyavei saduceo yuviraso Jesús repia secoãha ãgua yuvireco viña. “Emoporēhi Tũpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pĩrã iteanga’; ³ iyavei añihivei: ‘Co pipe ari naporai chira. Esepia, iva rese pĩra vai anga, pĩtu guasu-guasú avei’ peye. Pe niha peicua mbahe iva resendar tēi oyecua vahe mombehu; ndapeicuai rumo mara oyapave co poromondiisa cūrteindar ava upe imombehu. ⁴ Co ava ndaseco pōrai vahe oyepēpi vahe Tũpa sui oporandu poromondiisa rese ‘¿Tũpa suindar ité pĩha?’ oyapave. Che rumo namboyecuai chira ambuae poromondiisa chupe; acoi poromondiisa Tũpa oyapo Jonás upe güeraño tupri asevara chupe” ehi.
Ichui oseyapaño ava rehii oso.

Fariseo iyavei saduceo porombohesa inungar pan mboapeposa

⁵ Evocoyase semimbohe oyepota ipa rovai yuviraso. Pan sui rumo sesarai eté yuvireco. ⁶ Evocoyase Jesús aipo ehi chupe:
—Peicua catu fariseo iyavei saduceo pan mboapeposa sui —ehi.

⁷ Iñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tēi oyeupe yuvireco.

⁸ Ahe rumo oicua güemimbohe pĩhañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tuprii che rese! ⁹ ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase? ¹⁰ ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer?

¹¹ ¡Too, mara peye rutei pe aipo senducuaēhi! Ndaheimo pan rese ité añehe. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndaheimo pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

Pedro oicua uca Jesús Tũpa Rembiporavo secose

¹³ Oyepotase Jesús, oso tecua Cesarea coti Filipino ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? —ehi.

¹⁴ Semimbohe evocoyase aipo ehi yuvireco chupe:
—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tũpa ñehe mombehusar mboetasã” ehi yuvireco ndeu —ehi.

¹⁵ —Pe no, ¿‘Ava co secoi’ peye ru pe cheu no? —ehi güemimbohe upe.

¹⁶ —Nde niha Tũpa supi eté vahe Rembiporavo imombehupri; Tahir ité ereico —ehi Simón Pedro.

¹⁷ —Nde sovasapri ereico Simón, Jonás rahir. Esepia, ndaheimo tēi omboyecua co mbahe ndeu, che Ru iva pendar teieté omboyecua ndeu —ehi—. ¹⁸ Nde Pedro ereico, co ita guasu harive amopuhara che tũparoguã. Ñepeipe manosa ndosecoreroyii chietera opĩratasa pipe. ¹⁹ Evocoyase che amondo Tũpa mborerecuasa resendar mboisa ndeu; acoi, “Aviye” erese que mbahe uve co ivi pipe, ãgüe ehi aveira ivave; iyavei, “Ani” erese que mbahe uve co ivi pipe, ãgüe ehi aveira ivave —ehi.

²⁰ Ipare Jesús aipo ehi güemimbohe upe: “‘Co Tũpa Rembiporavo Poropĩsĩrosar’ peye eme ava upe cheu” ehi.

Jesús omombehu omano ãgua

²¹ Ichive tupri Jesús omboipi imombehu güemimbohe upe oico: “Iya niha cheu che so ãgua tecua guasu Jerusalén ve. Aheve judío rerecuar, pahi rerecuar ivate catu vahe iyavei Moisés porocuita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe

acuerayevira" ehi. ²² Pedro rumo viraso co cotimi chupe oñehengata água:

—¡Tūpa ndoipotai eté evocoi nungar nde reco água, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esiri che sui, Carugar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tūpa upendar rese, ava nungar tēi nde pihañemoñeta eico —ehi.

²⁴ Ipare aipo ehi güemimbohe upe:

—Acoi uguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosiira viña, toyemoingatu voi che recocuer rese oparaisu água iyavei toguata tupri che rupi. ²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisiora. ²⁶ Esepia, ¿aviye ai angahu pñha ava upe opacatu mbahe co ivi pipendar pisi água, ahe ae tēi omocañise güecocuer yuvireco viña? ¿Mbovi pñha omondora ava güecocuer repirã viña? ²⁷ Esepia che, Ava Riquehir, ayevira che Ru reco pñratasa pipe che rembiguai iva pendar reseve curi. Che evocoyase aicuara ñepepei-pei ava rembiapo agüer rupi chupe. ²⁸ Supi eté oimera amove cohava ava nomano vitei chivaherã, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

Jesús ñecuñaro agüer

17 Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi. ² Aheve, aviyeteramo tēi oñecuñaro güemimbohe rovai. Evocoyase sendi sova inungar ari, iturucuar mochí, sendi avei. ³ Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha. ⁴ Ahese Pedro aipo ehi chupe:

—Che Yar, javiye ai eté cohava yaico! Ereipotase, ayapora mbosapi teyupami: ñepepei ndeu nara, ambuae Moisés upe, ambuae evocoyase Elías upe nara —ehi.

⁵ Aviyeteramo tēi iva quiha rese osesapé ogüeyi ou oyopipa tupri ité. Ipãhuve oyeendu ñehesa aipo ehi: "Co che Rahir, che rembiaisu. Che mboviharete; peyapisaca catu iñehe rese" ehi vahe.

⁶ Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui. ⁷ Ahese oyemboya oso güemimbohe rese, oñatoi aipo ehi chupe:

—Pepūha; pesiquiyeyi rene —ehi.

⁸ Evocoyase omahe yuvireco sese, ahese ahe güer-año osepia imoha yuvireco.

⁹ Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemombehui chietera que ñepepei ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: "Elías rane rumo oura curi" ehi yuvireco? —ehi yuvireco chupe.

¹¹ Evocoyase omboyevi güemimbohe upe aipo ehi:

—Elías rane ité niha oura opacatu mbahe moingatu água curi. ¹² Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Égüe ahe aveira niha cheparaisura ahe ava povrive vichico —ehi.

¹³ Evocoyase semimbohe osenducua ramo iñehe yuvireco. Égüe ehi Jesús oñehe Juan Oporoãpiramo vahe rese.

Jesús ombogüera chñhivahe carugar rerecosar

¹⁴ Viroyepota Jesús güemimbohe ava rehisave seraso. Aheve mbia oyemboya oso sese, oñenopiha sovai aipo ehi chupe:

¹⁵ —Che Yar, ereiparaisuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no. ¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —¡Too, ndapeyeroya tupri vitei eté che rese! ¡Co coti tēi vite pe pihañemoñetasa! ¡Mbovi rupi rutei vo aico vitera pe pãhuve che ñemosasa pipe! Peru evocoi chñhivahe cheu —ehi.

¹⁸ Ahese oñehe pñrata carugar upe chñhivahe sui imose. Aheseve ocuera tupri voi eté.

¹⁹ Ipare semimbohe oporandu co cotimi yuvireco chupe:

—¿Mahera pñha ndoromose catui eté carugar ichui? —ehi yuvireco.

²⁰ —Esepia, ndapeyeroya tuprii Tūpa rese. Supi eté sese pe yeroyasa, yepe ndoyavii chira mostaza rãñi tahimi vahe viña, aipo peyera co ivitri upe: 'Esiri, eso coi coti' peyera. Evocoyase ivitri osiriño itera. Ahese ndapemboavaimi chira mbahe. ²¹ Evocoi nungar carugar imosesa yayerurese yande yecuacusa pipe —ehi.

Jesús omombehu iri omano água

²² Jesús uguata vitesave Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarëhimbar povrive. ²³ Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tēi yuvireco.

Jesús omondo guarepochi tūparo uve nara oyeupe oporandu vahe upe

²⁴ Oyepotase Jesús güemimbohe reseve tecua Capernaum ve, aheve guarepochi rerocuasar tūparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondo guarepochi tūparo upe nara? —ehi.

²⁵ —Omboepi niha —ehi Pedro chupe.

Evocoyase oiquesse Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo virocua guarepochi mborerecuar guasu co ivi pipe yepi? ¿Omu sui pñha, ambuae ava sui tie? —ehi.

²⁶ Pedro evocoyase omboeyvi chupe:

—Ambuae ava sui —ehi.

—¡Taa! —ehi—. Evocoyase mborerecuar povri pendar nomboepii chira yuvireco —ehi—. ²⁷ Guarepochi rerocuasar moñemoiroēhi āgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepeí guarepochi. Ahe eraso chupe. Ipípe iyacatura imboepi āgua yandeu —ehi Jesús Pedro upe.

¿Ava vo seco ivate catu vahe?

18 Ahe arí pipeve semimbohe oyemboya Jesús rese yuvireco mbahe rese oporandu āgua chupe:

—¿Uma vo seco ivate catu vahe Tūpa mborerecuasa pipendar? —ehi.

² Evocoyase Jesús: “Erio” ehi ñepeí chñhivahemi upe, omondo güemimbohe pñhuve imoha, ³ aipo ehi:

—Supi eté, acoi ndapeñecuñaraise iyavei ndapeicoise chñhivahemi nungar, ahese ndapeiquei chira Tūpa mborerecuasa pipe. ⁴ Acoi oñemomini vahe rumo inungar co chñhivahemi, evocoi nungar seco ivate catura Tūpa mborerecuasave. ⁵ Acoi ava oipisi vahe co chñhivahemi nungar che rer pipe sereco, che ité che pisi yuvireco —ehi.

Iparaisu itera ava oporomboangaipa uca vahe

⁶ “Acoi que ava rumo omboangaipa uca vahe co chñhivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo āgua. ⁷ ¡Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroātoisa yepi, ¡ahe imboangaipa ucasar rumo iparaisu itera!

⁸ “Sese inungar pe po, anise que pe pi avei pemboangaipa uca vahe, peyasia, pemombora amombri peyesui viña. Esepia, aviye catu peiquera tecove apirēhisave ñepeí pe pi, pe po rese, peso rāgüer sui tata guasu apirēhisave ñuvirío pe po, que ñuvirío pe pi reseve. ⁹ Iyavei pe resa pe mboangaipa ucase, penose, pemombo amombri peyesui. Esepia niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rāgüer sui.

Porombohesa ovesa ocañi tēi vahe resendar

¹⁰ “Peroñroi rene que ñepeí chñhivahemi che reroyasar. Esepia, ivave sembiguai che Ru pirindar ité yuvirecoi yepi” ehi. ¹¹ “Che niha, Ava Riquehñr, ayu ava ocañi tēi vahe pñsiro āgua.

¹² “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepeí ichui viña,

evocoyase oveya ranera noventa y nueve tēi vahe ovesa ivitri rese. Oyevira ocañi vahe reca oso. ¹³ Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui. ¹⁴ Ēgüe ehi avei che Ru ivave secoi vahe, ndoipotai eté que ñepeí ava che reroyasar chñhivahemi nungar cañi āgua” ehi.

Porombohesa yande ñero āgua rese

¹⁵ “Acoi nde mboetasa Tūpa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute. ¹⁶ Nande reroyaise rumo, ahese ereñehera ñepeí, anise ñuvirío ava upe nde pñtivii āgua rese. Ahe avei tosendu pe ñehe. Ahese oimera que ñuvirío, anise mbosapi sendusar. ¹⁷ Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tūpa ndoicuai vahe nungar pereco iyavei inungar mbahe-mbahe tēi aposar, ēgüe peye sereco” ehi.

¹⁸ “Supi eté acoi, ‘Aviye’ peyese que mbahe upe co ivi pipe; ēgüe ehi aveira ivave. Iyavei co ivi pipe, ‘Aní’ peyese que mbahe upe, ēgüe ehi aveira ivave.

¹⁹ “Iyavei co amombehu potami avei pñu: Acoi ñuvirío co ivi pipe pe pihañemoñetasa oyoya tuprise que mbahe rese peporandu āgua pe yeruresa pipe, evocoyase che Ru ivave pendar omondora pe porandusa pñu. ²⁰ Esepia, acoi ava ñuvirío, que mbosapi oñemonuhase che rer pipe yuvireco, aheve che aico ipñhuve” ehi.

²¹ Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tēi cheu oyapose? ¿Siete yupagüer rupi pñha? —ehi.

²² —¡Aní! —ehi—. ¡Setenta rupi siete oyupagüer! —ehi Pedro upe.

Yembohesa ava niñero potai vahe resendar

²³ “Tūpa mborerecuasa inungar mborerecuar guasu omoingatu pota vahe güembiguai revesa chupe.

²⁴ Evocoyase omboipi imoingatu āgua, ahese ipñtiviiisar güeru ireve atí catu vahe guarepochi rese chupe.

²⁵ Ahe rumo ndovirecoi imboepi āgua. Sese co mborerecuar oyocuai opñtiviiisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa āgua cheu’ ehi. ²⁶ Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tēi cheu. Opara niha amboepi ndeu’ ehi chupe. ²⁷ Ahese oiparaisuereco, opoi irevesa sui.

²⁸ “Aheseve voi rumo sembiguai osēse, osepia ambuae ondugüer oyeupe ndaseta tuprii vahe ireve. Ahe chupe aipo ehi iyesho pisi: ‘¡Emboepipa acoi nde revesa cheu!’ ehi. ²⁹ ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi. ³⁰ Niñero potai eté rumo. ‘Tomboepipa rane ité orevesa cheu’ ehi soquenda uca. ³¹ Osepiase rumo ambuae imboetasa, tasí iteanga

ipíha pipe. Ahese yuvíraso omombehu güerecuar uve opacatu sembiapocuer yuvireco. ³² Evocoiyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu.

³³ ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi. ³⁴ Ichui serecuar oñemoirosave oyocuai imombaraisu ãgua ‘tomboepipa rane ité orevesa cheu’ oyapave.

³⁵ “Indó, evocoiyase ãgüe ehi aveira che Ru iva pendar pēu ndapeñeroise ité peyeupe” ehi Jesús güemimbohe upe.

Jesús oporombohe mendasa sui poiēhi ãgua

19 Ipare Jesús osē Galilea sui, oso Judea ivi rupi arí sēsa coti iai Jordán rovai. ² Ava rehii yuvíraso saquicuei. Aheve setá imbaheasi vahe ombogüera.

³ Evocoiyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye pīha opoi cuimbahe güembireco sui que mbahe tēi oyapose? —aipo ehi yuvireco chupe.

⁴ Ahe rumo omboyeví fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi? ⁵ Iyavei aipo ehi: ‘Sese niha cuimbahe omendase, oyepēpīra oyesupa sui güembireco rese ité yuvirecoi ãgua. Evocoiyase ñuvirío yuvirecoira ñepeí ava nungar’ ehi. ⁶ Sese ndahe iri ñuvirío, ñepeí vahe ité yuvirecoira. Evocoiyase ava Tūpa omomenda vahe oyese, ndiyai ava tēi omboyepēpī yuvireco oyesui —ehi.

⁷ Evocoiyase fariseo oporandu yuvireco chupe:

—¿Mahera ru oyocuai Moisés cuimbahe omondo vahe ñehesa güembireco upe cuachiar poisa resendar opoi ãgua ichui? —ehi.

⁸ —Pe poreroyaēhisa pipe niha Moisés ãgüe ehi pēu. Yipisuive ité rumo Tūpa ndoipotai oyesui opoi ãgua yuvireco. ⁹ Esepia, acoi opoi vahe güembireco mbahe ndoyavii vahe sui omendase ambuae cuña rese, ahe oyemboaguasa tēi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ègüe ehise cuimbahe güembireco rese, evocoiyase aviye catu ndayamendai chira —ehi.

¹¹ —Ndahei chira rumo opacatu osenducua che aipo ahe vahe yuvireco. Tūpa ombou vahe sembiaporã, ahe güeraño osenducua yuvireco —ehi güemimbohe upe—. ¹² Esepia, oime pīhañemoñetasava mendaēhi ãgua: amove ohasa suive ndatahii vahe, ambuae nomboahi ucai ava yuvireco, ambuae evocoiyase nimendasei. Esepia, ahe oporaviqui pota Tūpa mborerecuasa reseño ité. Acoi oicatu vahe co ñehesa reroya ãgua, toviroyaño —ehi.

Jesús osovasa chīhivahe

¹³ Ipare ahe pendar güeru moviro chīhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño

tēi chīhivahe?” ehiño serusar upe yuvireco. ¹⁴ Jesús rumo aipo ehi:

—¡Mahera ndapeipotai iyu ãgua! Toyugüeruño chīhivahe cheu. Esepia, co chīhivahe nungar ava yuviroiquera che Ru povrive —ehi.

¹⁵ Ipare omondo opo chīhivahe harive osovasa. Ichui osē oso.

Mbia chīhivahe imbahe eta vahe omoñeta Jesús

¹⁶ Mbia chīhivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco ãgua? —ehi.

¹⁷ —¡Mahera ereporandu cheu mbahe aviye vahe rese! —ehi—. Ñepeño ité aviye vahe oime. Erereco potase rumo tecovesa apirēhi vahe, emboyeroya mborocuita —ehi.

¹⁸ —¿Uma vo aipo mborocuita? —ehi.

Ahese omboyeví chupe:

—‘Ndereporoyucaí chira, nandeaguasai chira, nandemondai chira, nanderemirai chiaveira ambuae ava rese, ¹⁹ eremboyeroyara nde ru, nde si avei, eresaisura ambuae ava nde yeaisu nungar eico’ ehi icuachiapri pipe —ehi mbahe yar upe.

²⁰ —Co rumo mborocuita opacatu amboaviye ité yepi. ¿Mbahe vo evocoiyase ipane vite che ayapo vahe ñehesa? —ehi.

²¹ —Ereipotase mbahe tupri pipe nde reco ãgua, emondopa rane nde mbahe; ahe sepi evocoiyase eremondora ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepēpīño ichui oviharēhisave oso. Esepia, mbahe yar ité secoi.

²³ Evocoiyase aipo ehi güemimbohe upe:

—Supi eté yavai eteanga imbahe eta vahe upe oique vahe ñehesa che Ru mborerecuasave. ²⁴ Aipo ahe iri: Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

²⁵ Aipo iñehesa renduse, semimbohe oyepīhamondii aipo ehi:

—¡Ava angahu pīha evocoiyase oñepisirora yuvireco viña! —ehi yuvireco.

²⁶ Omahe güemimbohe rese, aipo ehi:

—Ava tēi upe yavai aipo nungar mbahe apo. Tūpa upe rumo mbahe opacatú ndayavaimi eté —ehi.

²⁷ Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata ãgua. ¿Mbahe evocoiyase oimera oreu? —ehi.

²⁸ —Oime itera niha mbahe pēu. Esepia, acoi arí oyeopotase opacatu mbahe recuñaro ãgua, ahese che, Ava Riquehir, aguapira che rendave che mborerecuasave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese peporandura curi. ²⁹ Acoi opacatu ava oseya vahe güeta, anise que viquehir, anise vivri,

güeindri, que vu, anise osi, guahir, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirëhi vahe. ³⁰ Seta vai rumo cüritei yipindar vahe, ipa tëira yuvirecoi; setá aveira cüritei ipa tëi vahe, yipindar yuvirecoira curi —ehi.

Yembohesa oporaviqui vahe resendar

20 “Tüpa mborerecuasa inungar acoi ava ivi yar osë añihiveive oyeupe nara oporaviqui vahe reca ‘toporaviqui che uva tive yuvireco’ oyapave. ² Oyosuse ava, ahesa omoingatu oyeupe oporaviqui vahe rã upe ñepe arí mboraviqui repí imboepi água. Ahesa opa omondo ocove imboporaviqui. ³ Ipare osë, oso añihivei, arivate catumi osepia ocarusu pipe ambuae ava oporaviquisa ndovirecoi vahe, ⁴ aipo ehi chupe: ‘Peso, tapeporaviqui che uva tive. Amboepi tuprira niha pëu’ ehi. Ahe evocoyase yuviraso oporaviqui água icove. ⁵ Ipare oso iri mbiter arí rupi oyeupe oporaviqui vahe reca, ëgüe ehi tupri avei caharuse, las tres rupi. ⁶ Ipa osë iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohi tëi arí momba cohava pehá?’ ⁷ ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi. ⁸ “Pïtu ramosa, cove yar aipo ehi oporaviqui vahe rese yangarecuar upe: ‘Eñhepa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenonendar uve’ ehi. ⁹ Evocoyase las cinco pipe yuviroique vahe oporaviqui, ahe rane tenonde yugüeru. Oyacatu ñepepei ñepepei arí rupindar oipisi guarepochi yuvireco. ¹⁰ Ipare tenonde catu yuviroique vahe oporaviqui, ahe chupe ipa tëi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepepei arí rupindar yuvireco. ¹¹ Guarepochi pisire rumo oñemoiro cove yar upe yuvireco, ¹² aipo ehi: ‘Co ava yugüeru ipa tëi vahe, ñepepei horami tëi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañño tëi oroporaviqui arí momba sacucuer upe oroico’ ehi. ¹³ Cove yar rumo aipo ehi ñepepei ipãhu pendar upe: ‘Mbori, ndahei mbahe tëi ayapo ndeu. Esepia, amboepi guarepochi ñepepei arí resendar ndeu acoi, Aviye, peye vahecuer rese cheu’ ehi. ¹⁴ ‘Evocoyase ndo co, eipisi nde guarepochi, eraso. Che rumo amondo pota co ava ipa tëi oique vahe upe inungar tupri ndeu amboepi. ¹⁵ Esepia, cheu iyacatu ité che remimbotar rupi mbahe ayapo che guarepochi rese. Nderecatëhi tie ambuae ava mbahe rese che ayapose mbahe aviye vahe chupe’ ehi.

¹⁶ “Indó, ëgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tëi vahe rã yuvireco curi” ehi güemimbohe upe.

Jesús omombehu iri omano água

¹⁷ Jesús oguata oso tecua Jerusalén piar rupi. Ahesa co cotimi oipeha güemimbohe doce vahe oyeupe aipo ehi chupe:

¹⁸ —Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, “Tomanó” ehira yuvireco cheu. ¹⁹ Ipare che mondora ava ndahei vahe yande mu upe mara-mara tëi che rereco água che reroñrosa pipe. Ipipe che yucara curusu rese yuvireco. Imombosapisa arí pipe rumo acuerayevira —ehi.

Santiago, Juan si oporandu Jesús upe mbahe rese omembri upe nara

²⁰ Ipare Zebedeo rembireco ñuvirio omembri reseve, oyemboya Jesús rese yuvireco. Ahesa oñenopiha sovai oporandu água mbahe rese. ²¹ Evocoyase,

—¿Mbahe vo ereipotami? —aipo ehi ichi upe.

—Che aipota che membri eremboguapira ndeyepiri ñepepei nde mbahe rese pocosa coti, ambuae nde mbahe rese pocoëhisa coti nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura piha co mbahe-mbahe tëi aiporara vahe rã, inungar-ra que igua iro vahe aihu vahe rã viña? —ehi.

—Taa, oroicatuño itera —ehi yuvireco.

²³ —Supi eté peiporarara mbahe-mbahe tëi. Co rumo ndiyai cheu, che piri opomboguapi água che mbahe rese pocosa coti, ambuae che mbahe rese pocoëhisa coti avei. Che Ru rumo omoingatu güembiporavo upe nara oguapi vahe rã che ipive —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei. ²⁵ Evocoyase, “Perio” ehi oreu.

—Peicua niha acoi mborerecuar guasu yuvirecoi vahe Tüpa cuaparëhi oporocuai oporoyuca ai tëisa pipe, iyavei acoi ivate catu vahe oyeecoapirasá omborerecuasa pipe yepi. ²⁶ Pe rumo ëgüe ndapeyei chira peico. Iyacatu rumo acoi ava oipota vahe ivate catu güeco água pe pãhuve, ihañeco rane itera opacatu ambuae ava rese. ²⁷ Iyavei acoi pe pãhu pendar oipota vahe tenonde catu güeco água, ihañeco tupri ranera opacatu pe pãhu pendar rese. ²⁸ Esepia, che, Ava Riquehir, ayu ndahei ava che rese ihañeco água, che rumo ayu ava rese che hañeco água iyavei amano vahe rã ava eta repirã Carugar povri sui senose água —ehi.

Jesús ombogüera ñuvirio ndasesapisoi vahe

²⁹ Ipare Jesús, güemimbohe reseve oñocuase tecua Jericó yuvireco, ahesa ava rehi yuviraso saquicuei.

³⁰ Aheve peri popive ñuvirio ava ndasesapisoi vahe oguapi yuvirio. Evocoyase osenduse Jesús ocuase supi, osapucaí pirata yuvireco chupe aipo ehi:

—¡Ore Yar, mborerecuar guasu David suindar, ore paraisuerecomi tēi eve! —ehi yuvinoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucaí pīrata catuño ité yuvireco aipo ehi:

—¡Ore Yar, David suindar, ore paraisuerecomi tēira eve viña! —ehi iriño ité yuvireco.

³² Evocoyase osendu iñehe, opīta, “Perio” ehi chupe. Ipare,

—¿Mbahe vo peipota ayapo vaheṛā pēu? —ehi.

³³ —¡Ore Yar, ore mbosarecomi tēi eve! —ehi.

³⁴ Evocoyase saiskusave opoco sesa rese. Ahe ramo-seve ndasesapisoí vahe osareco tupri ai eté yuvireco. Ipare yuvirasofño ité supí.

Jesús oi que Jerusalén pipe

21 Acoi orovirovise Jerusalén, oroyepota tecuami Betfagé popive, ivitri Olivo serer vahe ĩpiimi. Aheve omondo ñuvirío güemimbohe ² aipo ehi chupe: —Peso co tecuami yande rovaingarve. Aheve pesepi-ara guaricu imembrí reseve ñapichimbri imoha. Ahe peyorañora seru cheu. ³ Acoi que ava oporanduse yuvireco pēu sese, “Yar oiporu pota, ipare niha omboyeveí voiflora” peyera chupe —ehi güemimbohe upe.

⁴ Co ěgüe ehi chupe aracahendar Tūpa ñehe mombehusar ñehengagüer mboaviye āgua, aipo ehi vahe:

⁵ “Pemombehu Sión pendar upe:

‘Pesepia, pe rerecuar guasu ou oico güeco mbegüesa pipe pēu guaricu harive imembrí reseve’ peyera” ehi.

⁶ Evocoyase evocoi semimbohe yuviraso, oyapo ité ocuaisa yuvireco. ⁷ Güeru guaricu imembrí reseve yuvireco chupe. Omondo oturucuar icupeao āgua yuvireco. Ipare Jesús oyeupi iharive. ⁸ Iyavei ava rehii oipipira oturucuar perí rupi imboetei guasusa pipe. Ambuae evocoyase oyasia pindo omondo perí rupi yuvireco saperā. ⁹ Ava rehii senonde, saquicuei avei oguata vahe osapucaí yuvireco aipo ehi:

—¡Co mborerecuar guasu David suindar, imboeteipri tasecoi! —ehi—. ¡Sovasapri secoi ou vahe yande Yar rer pipe! ¡ivave imboeteipri tasecoi! —ehi yuvireco.

¹⁰ Oiquese Jerusalén pipe, opacatu co tecua pipendar oyepihamondii yuvireco. Iyavei setá oporandu-randu yuvireco:

—¿Ava pñha co mbia? —ehi tēi yuvireco.

¹¹ Ava rehii oguata vahe Jesús rupi aipo ehi yuvireco chupe:

—Co niha Jesús, Tūpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar tūparo pipe sui

¹² Ipare Jesús oi que judío tūparo guasu pipe. Ipipendar opa omombo ichui ava mbahe mondosar, mbahe reroquasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo. ¹³ Ipare aipo ehi chupe:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo imonda rai vahe rēta nungar tēi pereco —ehi.

¹⁴ Aheve oyemboya Jesús rese yugüeru ava ndasesapisoí vahe, ipāri-pāri vahe avei. Ahe opa ombo-güera. ¹⁵ Osepiase rumo pahi rerecuar guasu iyavei judío porocuita rese oporombohe vahe yuvireco mbahe ndayasepai vahe sembiapo, iyavei tūparo pipe osenduse chñhivahe sapucaisa: “¡Imboeteipri David suindar tasecoi!” ehise, ahese oñemoiro yuvireco ¹⁶ aipo ehi chupe:

—¡Eresendu vo aipo ehi tēi vahe chñhivahe yuvireco! —ehi.

—Taa, asendu ité —ehi—. Pe no, ¿ndapeyeroquii vo sesendar ñehesa icuachiapri pipe:

‘Chñhivahemi, pñtanimi avei osapucaira nde mboeteisa pipe yuvireco’ ehi vahe? —ehi.

¹⁷ Ipare opaño oseya ava oso tecua Betania ve. Aheve ñepeí pñtu oque.

Jesús omomara ivira higuera ndihai vahe oñehe pipe

¹⁸ Ahere ayihive añihiveive, oyevisse tecua Jerusalén ve, Jesús ndasiepoi oico. ¹⁹ Aheve perí popive osepia ivira higuera. Ahe sese oyemboya oso ‘¿iha pñha?’ oya viña. So güeraño tēi rumo osepia. Evocoyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru. ²⁰ Ahe mbahe repiase, ore,

—¡Too, mara ehi rutei pñha co cñriteimi opa voi ipiru! —orohe tēi chupe.

²¹ Ahese omboyeveí oreu:

—Acoi peyeroyase ité Tūpa rese, ahese ndahei co mbahe güeraño peyapora. Co ivitri uve avei rumo: ‘Es-iri ave sui, eso para guasu pipe’ peyese, ahe evocoyase osiriño itera. ²² Indó, acoi peyeruresse mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

Jesús mborerecuasa

²³ Ichui Jesús oi que iri judío tūparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā ndeu? —ehi.

²⁴ Evocoyase ahe aipo ehi chupe:

—Che avei aporandura mbahe rese pēu. Pemboyevisse che porandusa, ahese che avei amombehura ava porocuita rupi eté pñha ayapo co mbahe vichico. ²⁵ ¿Ava vo Juan ombou ava āpiramo āgua? ¿Tūpa pñha, ava tēi tie? —ehi.

Evocoyase oñemoñeta aipo ehi oyeupe yuvireco: “Tūpa ombou’ yahese chupe, ahe evocoyase omboyevira yandeu: ‘¿Mahera ru evocoyase ndaperoyai?’ ehira. ²⁶ Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe” ehi. ²⁷ Sese,

—Ndoroi cuai eté Juan mbousar —ehiño yuvireco.
 Ahese ahe aipo ehi:
 —Evocoyase che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:
 —¿Mara ehi pe pihañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, eporaviqui cove’ ehi. ²⁹ ‘¡Nachequerëhii!’ ehi voifño. Coiye rumo, ‘¿Maha her a egüe ahe?’ ehi. Ipare osoño ité, oporaviqui.
³⁰ Ipare oso ambuae guahir upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipare rumo ndosoi eté. ³¹ ¿Uma vo co ñuvirío yuvirecoi vahe oyapo vu remimbotar? —ehi.
 —Co yipindar vahe —ehi yuvireco.
 —Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui. ³² Esepia, Juan Oporoāpiramo vahe ou co tecocuer ihēvi vahe mboyecua āgua pëu pe reco tupri āgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuerai sui seroya āgua —ehi mborerecuar guasu yuvirecoi vahe upe.

Ava mbahe tēi oporaviqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva rñavii āgua; oyapo avei oi ivate vahe ahe sese mahemoha āgua. Ipare oseya oivi ava oporaviqui vahe upe iporu āgua. Ichui osē oso amombri vahesa rupi. ³⁴ Coiye oyepotase ari uva pohosa, ahese omondo güembiguai oporaviqui vahe upe imboporandu āgua ‘taipisi uva pohopri cheundar cute’ oyapave viña. ³⁵ Ipare rumo oporaviqui vahe oipisi sembiguai yuvireco: amove oinupa-nupa yuvireco, amove oyuca, oyapi-yapi avei amove ita pipe yuvireco. ³⁶ Ipare rumo ivi yar setá catu omondo iri güembiguai. Oporaviqui vahe rumo mara-mara tēiño avei vireco yuvireco.
³⁷ “Coiye rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña. ³⁸ Evocoyase ahe ava tahir repiase, ‘Co aipo oipisira vu mbahe; yayucaño, evocoyase co ivi opitara yandeu nara’ ehi oyeupe yuvireco. ³⁹ Evocoyase oipisi, vinose miti pāhu sui, oyuca ité yuvireco” ehi.
⁴⁰ “Acoi ouse ivi yar, ¿mbahe vo oyapora oporaviqui vahe upe?” ehi oñehe rendusar upe.
⁴¹ Ahe evocoyase,
 —Opara revo oyuca saisuēhisa pipe ité co ava ndipihai vahe yuvireco. Ipare revo omondora oivi am-

buae ava oporaviqui vahe uve iporu āgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:
 —¿Ndapeyeroquii vo co aipo ehi vahe icuachiapri pipe?

‘Co ita oi aposar opaño omombo yuvireco.
 Ahe ita rumo aviye catu vahe oi moviracua tupri āgua.

‘Egüe ehi niha Yar yapo yande mohapisi ai eté’ ehi icuachiapri pipe. ⁴³ Sese che Ru Tūpa mborerecuasava serocuasara pe sui. Ambuae ava upe rumo imondosara. Ahe virasora che Ru mombahe chupe.

⁴⁴ Acoi que oviapi vahe evocoi ita harive, opa tēira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

⁴⁵ Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco. ⁴⁶ Aheseve oipisi pota voi yuvireco viña. Osiquiyēño rumo ava rehii sui yuvireco. Esepia, opacatu ava ipihañemoñeta: “Co ité Tūpa pīratasa pipe oñehe” ehi yuvireco chupe.

Jesús oporombohe carusa mendasa resendar rese

22 Ipare Jesús oporombohe iri ambuae ava recocuer rese aipo ehi:

² “Tūpa omborerecuasave inungar mborerecuar guasu guahir mendase oyapo pieta. ³ Ipare oyocuai güembiguai eta ‘ava ichohopri upe toyugüeru cute’ oya. Ichohopri rumo niquerēhi iri yugüeru aheve. ⁴ Ipare oyocuai iri ambuae güembiguai eta aipo ehi: ‘Aipo peyera ichohopri upe: ¡Toyugüerño ité! Esepia, opa ité oingatu tembihu iyavei ayuca uca tivi iyavei ambuae mbahe mimba iquira vahe. Che opacatu amoingatu. Sese toyugüerño ité mendasave, ehi, peyera chupe’ ehi güembiguai upe. ⁵ Ichohopri rumo ndoviroyai eté yuvireco. Evocoyase ñepe i osoño ocove, ambuae oso ombahe movendesave, ⁶ ambuae rumo oipisi sembiguai mara-mara tēi sereco āgua. Ahe ipipe oyuca yuvireco. ⁷ Evocoyase mborerecuar guasu oñemoiro etepri save omondo osundao eta co ava oporapichi vahe yuca uca āgua, iyavei secua rapipa āgua. ⁸ Ipare aipo ehi ambuae güembiguai eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vaherā cohava. ⁹ Sese peso opacatu ava guata catusa rupi, peñehe mendasave yugüeru vaherā opacatu pe rovañchisar upe’ ehi. ¹⁰ Evocoyase sembiguai eta yuvinosepa yuviraso ocar rupi. Ahe osovañchi vahe setá omonuha yuvireco que seco tupri vahe, seco rai vahe avei; egüe ehi ava savapipo tupri oi guasu mendasave yuvireco.

¹¹ “Evocoyase acoi mborerecuar oique ava ichohopri repia. Ipare omahecua tupri ñepe i ava ipāhu pendar rese. Ahe rumo ndomondei turucuar mendasa resendar. ¹² Evocoyase aipo ehi chupe: ‘Che mboripar, ¿mara ere eique ave co turucuar mendasa resendar porēhi?’ ehi. Ahe rumo noñehiño ité chupe. ¹³ Evo-

coiyase, ‘Peipisi co mbia, peñapichi ipi, ipo avei, pemose ocarve p̄tūmimbisave. Aheve oyaseho tēira, sāitere-tere tēira mbaheasicuer rereco’ ehi ichohopri rese hañecosar upe. ¹⁴ Esepia, setá tēi ichohopri, moviromi tēi rumo iporavopri ipāhu sui” ehi mborerecuareta uve.

Fariseo osecoāha iri tēi Jesús guarepochi rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavi uca āgua mborerecuar rovai imomara-mara tēi āgua. ¹⁶ Ahe evocoyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore orocua nde supi eté vahe mbahe eremombehu eico iyavei ereporombohe mbahe supi tupri vahe Tūpa recocuer rese. Nde niha ndereroyai vahe ava ñehesa tēi. Esepia, ava pihañemoñeta rupi ndereicoi vahe; nde pihañemoñeta rumo ñepe reseve erereco. ¹⁷ ¿Mara ehi nde pihañemoñeta? ¿Aviyera pīha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁸ Oicua rumo fariseo pihañemoñeta raisa. Sese aipo ehi chupe:

—Pe seco tupri angahu tēi vahe peico. ¡Mahera che moingue pota mbahe tēi pipe peye! ¹⁹ Pemboyecua ru ñepe guarepochi mborerecuar guasu upendar cheu —ehi.

Evocoyase güeru yuvireco chupe.

²⁰ —¿Ava rahanga vo co guarepochi rese chini iyavei ava rer vo co chini sese no? —ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, Tūpa upendar mbahe evocoyase pemondora Tūpa upe —ehi fariseo upe.

²² Osenduse, oyepihamondii tēi yuvireco. Evocoyase yuvinose yuviraso ichui.

Saduceo oporandu Jesús upe cuerayevisa rese sec-oāhasave

²³ Ahe ari pipe saduceo “ndipoi eté cuerayevisa” ehi vahe yugüeru Jesús upe, oporandu tēi angahu yuvireco chupe:

²⁴ —Porombohesar, Moisés aipo ehi aracahe: ‘Que cuimbahe omanose guahiēhiseve, ahese tivri omendara sembirecocuer rese ahe viquehir omano vahecuer upe nara tahirā oico’ ehi —ehi yuvireco chupe—.

²⁵ Cohave, ore pāhuve, oime siete tupri oyesuindar pāve yuvirecoi vahe. Yipindar vahe omenda. Ipare omanoño guahiēhiseve. Evocoyase tivri omenda sembirecocuer rese. ²⁶ Ahe omano guahiēhiseve avei no. Ēgüe ehi avei opacatu ambuae tivri, omano avei guahiēhiseve yuvireco. ²⁷ Opacatu imano pare, cuña avei omano cute. ²⁸ Evocoyase opase ocuerayevi yuvireco, ¿uma rese ité pīha opitara ahe cuña? Esepia,

opacatu niha omenda yuvireco sese —ehi saduceo yuvireco chupe.

²⁹ —Pe pihañemoñetasa co coti tēi eté. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pīratasa —ehi—. ³⁰ Esepia, acoi omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave —ehi—. ³¹ Co cuerayevisa resendar rumo amombehura pēu. Aviye ndapeyeroquii anga vahe acoi Tūpa omombehu vahecuer rese. Supi eté ahe aipo ehi aracahe: ³² ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

³³ “¡Too!” ehi ava rehii. “¡Mara ehi rutei iporombohesa!” ehi tēi yuvireco.

Porocuita aviye catu vahe

³⁴ Ipare fariseo oyanduse yuvireco Jesús omonguiriripañose saduceo oyesui, ahese oñemonuha yuvireco.

³⁵ Ñepe ipāhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

³⁶ —Porombohesar, ¿uma ité vo porocuita aviye catu vahe opacatu ambuae porocuita sui? —ehi.

³⁷ Evocoyase ahe aipo ehi chupe:

—‘Eresaisura nde Yar Tūpa opacatu nde pihañemoñetasa pipe, opacatu nde recocuer pipe, nde yapisacasa pipe avei’ ehi. ³⁸ Co porocuita aviye catu vahe ambuae porocuita sui. ³⁹ Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi. ⁴⁰ Co ñuvirio porocuita rupi oguata opacatu Moisés porocuita icuachiapri, opacatu Tūpa ñehe mombehusar rembicuachía avei —ehi.

¿Ava suindar pīha Poropširosar?

⁴¹ Fariseo ñemonuha viteseve, ⁴² Jesús oporandu chupe:

—¿Mara ehi pepihañemoñeta acoi Tūpa Rembiporavo ou vaheā ava pširo āgua rese? ¿Ava suindar-ra pīha secoi? —ehi.

—Ahe niha David suindar secoira —ehi fariseo yuvireco chupe.

⁴³ Ahese aipo ehi fariseo upe:

—¿Mahera pīha evocoyase David oñehese Espiritu pīratasa pipe aracahe, “Che Yar” ehi chupe? Esepia, ahe aipo ehi:

⁴⁴ ‘Yar aipo ehi che Yar upe:

Eguapi che acato coti acoi che amondose voi eté nde amotarēhimbar nde povrive yuvireco’ ehi David aracahe. ⁴⁵ Evocoyase, ¿mahera ru: “Poropširosar David suindar secoira” peye, David tei-eté, “Che Yar” ehise chupe? —ehi fariseo upe.

⁴⁶ Evocoyase ndoicatu iri imboyevi āgua yuvireco cute. Ahe ari pipe sui ndipo iri que ñepe iquerēhi vahe iñehe avi uca āgua oñehe pipe yuvireco.

Jesús oicua uca fariseo iyavei Moisés porocuita rese oporombohe vahe recocueraí

23 Ipare Jesús aipo ehi ava eta upe, oreu avei no: ²“Co Moisés porocuita rese oporombohe vahe iyavei fariseo eta, ahe icuaita Moisés porocuita mombehu tuprí ãgua yuvireco. ³Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tuprí tēi mbahe viña, ipare rumo co coti tēi mbahe oyapo yuvireco. ⁴Iyavei omondo porocuita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepeí oporocuita yuvireco no. ⁵Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tēi. Osíva rese, oyíva rese avei ipe guasu vahe vireco-reco tēi oturucuar rese Tūpa Ñehengagüer cuachiapri yuvireco. Iyavei ipi catu vahe oturucuar popi moaro ãgua omondo yuvireco. ⁶Oipota carusa rupi güenara aviye catu vahe yuvireco, oseca avei tenda porañete catu vahe güenara otūparo pipe yuvireco no. ⁷Oipota avei ava oyeupe ‘avirave’ apo ãgua omboetisave ocar rupi iyavei oipota, ‘Porombohesar’ oyeupe he yuvireco.

⁸“Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeíño ité pereco pe Mbohesar. ⁹Iyavei, ‘Cheru’ ndapeyei chira que ava co ivi pipendar tēi upe. Esepia, ñepeíño ité pe Ru pereco, ahe niha íva pendar. ¹⁰Ndiyái avei, ‘Mborerecuar’ pembohe uca ava peyeupe. Esepia, Poropĩsirosar güeraño ité pe rerecuar secó. ¹¹Acoi ava seco ívate catu vahe, ahe toporopĩtivii güeco mbegüesa pipe. ¹²Esepia, acóí oyemboívate ai vahe opara seco reroyísa, iyavei acóí ava seco mbegüe vahe, ahe seco mboívate catusara curi.

¹³“¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tuprí angahu tēi vahe peico! Pemombitaño ava Tūpa povrive seique rãgüer sui peico yepi. Pe avei eté ndapeiquei ipovrive, iyavei acóí yuvíroique pota vahe pemombitaño seique rãgüer sui.

¹⁴“¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tuprí angahu tēi vahe peico! Esepia, perocuarocuaño tēi cuña imer mano vahecuer rēta ichui, ipare peyeroqui tuprí tēi angahu ava rembiepiave. Sese peipísira Tūpa ñemoirosa ipĩrata catu vahe curi.

¹⁵“¡Peparaisu catu itera pe Moisés porocuita rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ivi rupi iyavei para guasu rovaí rupi ava mbohe. Ipare rumo pe remimbohecuer mbahe tēi catu pe sui. Pe nungar carugar ratave nara tēi pereco uca.

¹⁶“¡Peparaisu catu itera, pe ava mbohesar ndasesapisoí vahe nungar peico! Pe aipo peye tēi vahe: ‘Yamombehuse mbahe tūparo rer pipe yande ñehe mboaviye ãgua, ãgüe yahe tēi eté; co rumo yamombehuse mbahe oro tūparo pendar rer pipe, ahese iya it-

era yamboaviye yepi’ aipo peye tēi. ¹⁷¡Pe ndapembahecuai vahe nungar, ndasesapisoí vahe nungar avei peico! ¿Uma vo aviye catu vahe: oro píha, anise tūparotie? Tūparo pipe niha oro rovasasa yepi. ¹⁸Iyavei co uve avei aipo peye tēi peico: ‘Yamombehuse mbahe seropovēheprí renda rer pipe yande ñehe mboaviye ãgua, ãgüe yahe tēi eté; co rumo mbahe yamombehuse mbahe seropovēheprí renda hari pendar rer pipe yande ñehe mboaviye ãgua, ahese iya ité yamboaviyera yande ñehe yepi’ aipo peye tēi. ¹⁹¡Pe ndasesapisoí vahe nungar peico yepi! ¿Uma vo aviye catu vahe? ¿Evocóí porerecosa seropovēheprí píha, anise mbahe seropovēheprí renda tie? Ahe tenda harive niha porerecosa sovasasa yepi. ²⁰Sese acóí mbahe omombehu vahe mbahe seropovēheprí renda rer pipe oñehe mboaviye ãgua, ndahei serer pipe güeraño, omombehu avei opacatu iharí pendar mbahe seropovēheprí rer pipe, ²¹iyavei acóí ava omombehu vahe mbahe tūparo rer pipe oñehe mboaviye ãgua, ahe omombehu ipipendar rer pipe avei. Ahe niha Tūpa secóí. ²²Iyavei acóí omombehu vahe mbahe que ambuae ava upe íva resendar rer pipe oñehe mboaviye ãgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité secóí.

²³“¡Peparaisu catu itera, pe Moisés porocuita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepeí-peí diez pe remití menta, anis, comino pereco vahe sui ñepeí Tūpa uve nara viña, pe rumo pepoi co porombohesa aviye catu vahe porocuita resendar sui. Ahe peyapora mbahe ihívi vahe, peporoparisuerecora iyavei pemboaviye tupríra pe cuaita yepi. Iyacatu rumo ahe pemboaviye aveira viña. ²⁴¡Pe ava mbohesar ndasesapisoí vahe nungar peico! Pe pembogua rutei mbahe rahícuer sui pe ígua; mbahe tuvicha vahe rumo pemocoño ité evocóiyase. Ëgüe peye co mborocuita upe.

²⁵“¡Peparaisu itera pe Moisés porocuita rese oporombohe vahe iyavei pe fariseo peico vahe, pe seco tuprí angahu tēi vahe! Esepia, inungar ígua ríru iyavei tembihu ríru icupe rupi tēi yoseipri. Ipipe rumo iquíha opitaño ité. Ëgüe ehi tēi pe recocuer pe monda raisave, mbahe pota-pota tēisave avei. ²⁶¡Pe fariseo peico vahe, ndapepihañemoñetai vahe mbahe pe rembiapo ai rese, pemoatíro rane pe píha pipe mbahe yavaeté vahe sui! Ahese ramo pe rembiapo icatupríra cute.

²⁷“¡Peparaisu catu itera, pe Moisés porocuita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvípa imomorochimbri tēi. Iharive tēi icatuprí chupe. Ipipe rumo tehögüer cangüer iyavei opacatu mbahe yavaeté vahe ovireco oyese. ²⁸Ëgüe peye: ava rembiepiave aviye pe reco ihívi vahe viña, pe píha pipe rumo oime pe porombopasa iyavei opacatu mbahe mbahe tēi.

²⁹“¡Peparaisu catu itera pe Moisés porocuita rese oporombohe vahe, pe fariseo peico vahe, pe reco tuprí

angahu tēi vahe! Esepia, pemoingatu Tūpa ñehe mombehusar ruvipagüer peico sese pe yemomahenduha āgua iyavei pemoporañete ai tēi ava seco ihñvi vahe ruvipagüer yepi viña. ³⁰ Ipare aipo: 'Yande yaicose revo aracahe yande ramoi recose, ndayaipñivii chiterera Tūpa ñehe mombehusar yuca āgua yuvireco viña' peye tupri tēi. ³¹ Aipo peyese rumo, pemboyecua Tūpa ñehe mombehusarer yucasar suindar pe yesusa. ³² ¡Pemboyepi iriñño evocoyase pe ramoi rembiapocuerai!

³³ "¡Pe mboi vai suindar tēi peico! Ndapesoyepi chira rumo Tūpa ñemoirosa sui, pesora rumo tata guasuve. ³⁴ Evocoyase che amboura pēu Tūpa ñehe mombehusar ava yaracua vahe iyavei ava pe mbohe āgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinu-para pe ñemonuhasa rupi iyavei ambuae peseca-secara peico tecua yacatu rupi. ³⁵ Sese pēuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco ñvi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tūparo pipe mbahe seropovēhepri renda rovai. ³⁶ Supi eté opacatu co mbahe tēi oura pe recove vite-seve" ehi.

Jesús oyaseho Jerusalén pendar rese

³⁷ "¡Too rutei, pe Jerusalén pendar, peyuca vahe Tūpa ñehe mombehusar, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri ope-povrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco āgua. ³⁸ Sese seyapirā tēi peicora. ³⁹ Esepia, ndache repiai chira peye acoi, '¡Imboeteipri Yar remimbou tasecoi!' peyese voi che repia irira peye" ehi Jesús ava eta upe.

Jesús omombehu judío tūparo guasu mocañi āgua

24 Ipare Jesús osē judío tūparo pipe sui oso. Ahe-seve ore semimbohe oroyemboya sese aipo orohe chupe: "¡Ore Yar, esepia co tūparo!" orohe. ² Ahe rumo:

—Supi eté amombehu pēu: co opacatu pesepia vahe, ndipoi chietera que ñepe ita oyeha vite vahe. Opacatu ité imondurusara curi —ehi oreu.

Jesús omombehu mbahe oime vahe arí cañi renonde

³ Ipare Jesús oso ivitri Olivo ve oguapi oñ. Aheve ore güeraño tupri oroso chupe mbahe rese ore porandu āgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu āgua iyavei arí cañi āgua? —orohe chupe.

⁴ —Peicua catu, peyembopa ucai rene ambuae ava upe peico. ⁵ Esepia, setá ava yugüerura, 'Che aico Tūpa remimbou ava pñiño āgua' ehi tēira ava eta mbopa yu-

vireco. ⁶ Iyavei pesendura ñehesa vavasa resendar co-have iyavei que rupi. Ndapeyembosiquiyei chira rumo ichui. Esepia, Ēgüe ehi rane itera niha; ndehi vitei chira rumo arí cañisa. ⁷ Esepia, ñepe ivi pipendar ovavara ambuae ivi pipendar rese oyeupe yuvireco. Aheve oimera tiavor, ivi ririi opacatu-catu tēi tecua rupi.

⁸ Opacatu evocoi mbahe rumo omboipi ramomi vahe mbahe tēi porarasa.

⁹ "Aheve pe pisira yuvireco mara-mara tēi pe rereco āgua, pe yuca āgua avei. Iyavei opacatu ava-ava tēi ndape ambotai chira che recocuer sui tēi yuvireco.

¹⁰ Ahe arí rupi evocoyase setá ava ndache roya iri chira yuvireco. Ahe oyeamotarēhira iyavei omondora ambuae omboetasagüer yamotarēhimbar povrive yuvireco. ¹¹ Iyavei setá Tūpa ñehe mombehusar angahu tēi oimera, ahe ava ombopa-mbopa tēira yuvireco.

¹² Ombouvicha catura mbahe-mbahe tēi naporai vahe. Ipipe sui ndoyeaisu tupri iri chira ava yuvireco. ¹³ Acoi ava oyemoviracua vaheño rumo arí ipa vahe rupi, ipñiropri yuvirecoira. ¹⁴ Iyavei co ñehesa icatupri vahe Tūpa mborerecuasa resendar imombehusapa ranera opacatu ivi rupi icua uca āgua. Aheve ramo oimera cañisa co ivi pipe" ehi oreu.

¹⁵ "Tūpa ñehe mombehusar Daniel oicuachía mbahe-mbahe tēi aposa resendar oime vahe arí tūparo guasu maranehi vahe pipe aracahe. Ahe pesepiase oi maranehi pipe —acoi oyoeroqui vahe, ahe tosenducua tupri yuvireco—, ¹⁶ evocoyase Judea ve yuvirecoi vahe toñemipa poyava ivitri rese yuvireco ichui; ¹⁷ iyavei acoi güeta harive yuvirecoi vahe ogüeyise, toique iri eme güetave ombahe reca; ¹⁸ iyavei acoi que rupi tēi yuvirecoi vahe, toyevi iri eme güetave que oyeaosa renose āgua yuvireco. ¹⁹ ¡Iparaisu itera cuña ipuruha vahe, imembi pñtani vahe avei yuvireco! ²⁰ Peoporandu Tūpa upe pe recua pipe sui pe sēñi āgua irohi pipe, mbituhusa arí pipe avei. ²¹ Esepia, ahe arí pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar.

²² Iyavei nomombituhuse Tūpa co arí naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombituhura" ehi.

²³ "Iyavei que ava, 'Esepia co Poropñisrosar secoi'; anise, 'Peve secoi' ehise yuvireco pēu, aní chira peroya aipo ehi vahe. ²⁴ Esepia, yugüerura ava 'che Poropñisrosar aico' ehi tēi vahe iyavei 'che amombehu vahe Tūpa Ñehengagüer' ehi angahu tēi vahe; iyavei oyapora mbahe ava ndoyapoi vahe poromondiisa güeco pñratasa mboyecua āgua yuvireco. Ipipe osecoñhara Tūpa rembiporavo imbopa āgua yuvireco. ²⁵ Opa aipo co senondeve amombehu pēu. ²⁶ Sese que ava pēu: 'Pesepia pe ivi iporupirēhisave secoi' ehise, pesoi rene aheve seroyasave, aní chiaveira peroya acoi 'pesepia co secoi oi pipe' ehi vahe yuvireco. ²⁷ Che rumo inungar overa vahe sendi añihivei sui caharu coti ocua iva rese, Ēgüe ahera che, Ava Riquehir, opacatu ava rembiepiave ayevi irise vitu curi. ²⁸ Esepia, mbahe rehögüer reimesave, uruvu oñemonuha atí yuvireco yepi" ehi güemimbohe eta upe.

Jesús yevi ãgua resendar

²⁹ "Ahe ari pipe mbahe-mbahe tã pare cõriteimi ndoyecua iri chira ari, yasi avei ndosesape iri chira, yasitata avei opara oviapi iva sui iyavei iva resendar mbahe oririira yuvireco. ³⁰ Ahese oimera iva rese iporãhi vahe che, Ava Riquehir, yu ãgua resendar. Evo-coiyase opacatu ava-ava tã co ivi pipendar oyaseho tãira osiquiyepave yuvireco. Che repia aveira yuvireco agüeyise iva quiha rese che pãratasa rendigüer porañtesa pipe. ³¹ Iyavei amboura che rembiguai eta iva pendar. Ahe evocoyase güemimbi omoñehe pãratara opacatu che rembiporavo co ivi rupindar que amombri rupi yuvirecoi vahe monuha ãgua" ehi.

³² "Peyembohera ivira higuera recocuer sui: Co ivira soqui ramosa, yaicua cõimi ari sacu vahe yepota ãgua yandeu yepi. ³³ Na ehi aveira pãu che ñehe rupi tupri mbahe pesepiase, sese peicuara cõimi eté che yevi ãgua. ³⁴ Supi eté yuvirecove vitera ava osepiya vahe co mbahe opase yaviye. ³⁵ Iva, ivi opara ocañi, che ñehen-gagüer rumo imboaviyasa rane itera.

³⁶ "Ndipoi eté rumo ava oicua vahe ari iyavei hora che yevi ãgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güer-año ité rumo oicua.

³⁷ "Inungar ava Noé recose yuvirecoi aracahe, ãgüe ehi tupri aveira che, Ava Riquehir, yevi ãgua renonde. ³⁸ Yipive amarusu renonde, ahese ava ocaru, oiñu; guahir, guayri avei omomendaño yuvireco. Noé arca pipe seiquese, ãgüe ehi vite yuvireco. ³⁹ Nomohai eté rumo amarusu viapi ãgua yuvireco oyeupe viña, ãgüe ehi rumo aviyeteramo tã amar oviapi imocañipa. ãgüe ahe aveira che, Ava Riquehir, ayei aviyeteramo tã.

⁴⁰ Evocoi ari pipe oimera ñuvirio ava amombri güecua sui yuvirecoi vahe: ñepe serasosara, indugüer rumo opitara. ⁴¹ ãgüe ehi aveira ñuvirio cuña ohicho vahe upe: ñepe serasosara, indugüer rumo opitara.

⁴² "Sese pemahemoha yepi. Esepia, ndapeicuai mbahe ari pipe che, pe Yar, ayevira iva sui. ⁴³ Iyavei peyapisaca tupri co rese: inungar acoi oi yar oicuase revo que hora pãtu pipe imonda vahe yepota ãgua, ahese imahemohara sese güeta pipe seiqueñhi ãgua viña. ⁴⁴ ãgüe peye aveira peyemoingatu che yevi ãgua rese. Esepia niha, che, Ava Riquehir, aporoesapiha tãira vitu curi" ehi.

Mbiguai omboaviye vahe ocuaita, nomboaviyei vahe avei

⁴⁵ "Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güeta pipendar rese hañeco ãgua 'tembihi tomondo che rãta pipendar upe che porocuita rupi' ohesave. ⁴⁶ Acoi omboaviyese ocuaita, ahese oviharetera güerecuar yevise. ⁴⁷ Supi eté niha serecuar oyocuaire opacatu ombahe rese hañeco ãgua. ⁴⁸ Ahe mbiguai rumo ndipihaise 'ndoyepota vitei chira revo che rerecuar' oya, ⁴⁹ omboetasa omboipi

mara-mara tã sereco iyavei oyemboya caguar tã rese ipiri ocaru iyavei oiñu tã ãgua. ⁵⁰ Ipare rumo serecuar oyepotara imahemohañeiseve. ⁵¹ Ahese omombaraisu catura, 'Tinupasa, ava seco tupri ai angahu tã vahe nupasa nungar pipe' ehira chupe. Ahese oyaseho tãira, oyemoaitere-tere tã aveira" ehi güemimbohe upe.

Diez cuñatai ndaseco marai vahe resendar ñehesa

25 "Evocoi ari pipe Tũpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi ãgua yuvireco. ² Ipãhuve yuvirecove cinco ndipihañemoñetai vahe, ambuae cinco rumo ipihañemoñeta tupri vahe yuvireco. ³ Ipare ndipihañemoñetai vahe oipisi guataendiã yuvireco, ndovirasoi rumo yandi guataendi riru mboapipo iri ãgua yuvireco; ⁴ evocoi ipihañemoñeta tupri vahe rumo viraso yandi siru pipe guataendi reseve yuvireco. ⁵ Acoi ndoyepota apihaise cuña mevi, ahese sopesii tã yuvireco. Coiye opaño yuviroque yuvireco ichui. ⁶ Pãtu mbiter senise rumo, osendu ñehesa aipo ehi vahe yuvireco: '¡Coi imevi turi! ¡Pesé ipisi ãgua cute!' ehi. ⁷ Evocoyase opacatu evocoi cuñatai oñarapuha voi iyavei omoingatu guataendi yuvireco. ⁸ Ahese nimahemohai vahe aipo ehi ambuae imahemoha vahe upe yuvireco: 'Pemboumi tã chíhi pe yandi oreu. Esepia, ogüe pota ité ore rataendi' ehi tã yuvireco. ⁹ 'Aní, ndiyai chira revo oromondo vaherã pãu. Iyacatu revo peso imboepisave serocua peyeupe nara' ehi. ¹⁰ Imboepi yuviraso vitesave, ou cuña mevi cute. Oyemoingatu vahe rumo yuviroique supi mendasave. Evo-coiyase saquicuerive voi omboya oquenda rãrosar. ¹¹ Ipare oyepotase ambuae cinco cuñatai yugüeru aipo ehi yuvireco oi yar upe: '¡Emboimi tã oreu!' ehi tã yuvinoha. ¹² 'Aní, ndopocuai vahe ité' ehiño chupe.

¹³ "Pe evocoyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevira" ehi Jesús oreu.

Ñehesa guarepochi mondosea resendar

¹⁴ "Iyavei Tũpa omborerecuasave inungar-ra ava mbahe yar oso ãgua renonde ivi amombri save omonuha güembiguai oguarepochi rãro ãgua viña. ¹⁵ Yipindar ñepe upe omondo cinco mil guarepochi, ambuae upe omondo dos mil, iyavei imombosapisa upe omondo mil tã: ahe omondo ñepepei upe seco etegüer rupi-rupi. Ipare voi oso cute. ¹⁶ Evocoyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipipe sui coiye oipisi catu iri ambuae cinco. ¹⁷ Inungar avei ambuae oipisi vahe dos mil, ichui oipisi catu iri ambuae dos mil. ¹⁸ Ambuae oipisi vahe rumo ñepe guarepochi, ahe oyoho ivicuar. Aheve ofoti güerecuar guarepochi.

¹⁹ "Ipare coiye oyevisave serecuar, ahese oñehe güembiguai upe oguarepochi retacuer cua ãgua. ²⁰ Yipindar cinco mil guarepochi oipisi vahe ranengatu oyemboya güerecuar rese aipo ehi: 'Ndo co acoi erembou vahe cinco mil cheu, ichui co ambuae cinco aipisi irimi ndeu'

ehi. ²¹ 'Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese' ehi chupe. ²² Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: 'Ndo co erembou vahe dos mil cheu. Ipipe sui co ambuae aipisi irimi dos mil avei ndeu' ehi. ²³ 'Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese' ehi avei chupe.

²⁴ 'Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: 'Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovepiser tēi avei ereipisi ndeyeupe nara. ²⁵ Sese che siquiyasa pipe añomi ivivri vahe guarepochi. Ndo co nde mbahe' ehi chupe. ²⁶ 'Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañotii vahe sui. ²⁷ Ereyapocatumira che guarepochi guarepochi apocatusave cuese rahe viña che yevisse voi senose āgua che imboyevi catumi āgua viña' ehi. ²⁸ Ipare aipo ehi: 'Perocua guarepochi ichui, pemondora evocoi diez rupi guarepochi omboeta vahe upe' ehi. ²⁹ 'Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui. ³⁰ Sese pemose co mbiguai ēgüe ehi tēi vahe ocarve pītumimbisave. Aheve toyaseho, tasāitere tēi oī ehira serecuar chupe' ehi Jesús oreu.

Jesús oura opacatu ava recocuer rese porandu āgua

³¹ 'Che, Ava Riquehir, ayevisse, opacatu che Ru rembiguai iva pendar reseve che reco ivategüer pipe, ahese aguapira che renda porañete vahesave ava recocuer rese porandu āgua. ³² Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rārosar oipeha vahe ovesa cavara sui. ³³ Che evocoiyase ovesa aipehara mbahe rese che pocosa coti, cavara mbahe rese che pocoēhisa coti. ³⁴ Ahese che mborerecuar ivate catu vahe aipo ahera che acato cotindar upe: 'Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ivi apo ramo suive imoingatupri pēu nara. ³⁵ Esepia, ndacheriepoise, pe evocoiyase pembou mbahe che remihura; iyavei che huseise, pe evocoiyase pembou taihu; che aguata tēise pe recua rupi vichico, pe avei oi pembou che que āgua. ³⁶ Turucuar cheu ipanese, pe avei pembou che turucuarā; chembaheasise, peso avei che piri; che roquendasave peso avei che repia no' ehi. ³⁷ Evocoiyase evocoi seco catupri vahe aipo ehira yuvireco cheu: 'Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? ³⁸ ¿Mbahese vo nde repiasa nde guatase ore recua

rupi, ipare nde monguesa ore piri, ipanese nde turucuarā, ore aipo evocoiyase oromondo ndeu? ³⁹ Iyavei, ¿mbahese vo aipo nde repiasa nembahesise, anise que nde roquendasave, aheve aipo oroso nde repia yepi?' ehira yuvireco cheu. ⁴⁰ Evocoiyase che, mborerecuar ivate vahe, amboevira yuvireco chupe aipo ahera: 'Supi eté, opacatu mbahe peyapose que ñepeico seco mbegüemi vahe che reroyasar pāhu pendar upe viña, cheu rumo ēgüe peye' ahera.

⁴¹ 'Ahese aipo ahera cute che mbahe rese pocoēhisa cotindar upe: 'Pesiri che sui. Esepia, pe peico Tūpa ñemoirosavri pendar. Pesopa tata guasu apirēhisave, evocoi imoingatupri opacatu caruguar upe nara serecuar reseve. ⁴² Esepia, ndacheriepoise, pe evocoiyase: Yamondomi icaru āgua, ndapeyei eté cheu; che huseise, ahese, Yamondomi toihu, ndapeyei avei cheu; ⁴³ ambuae tecua pipe aguata tēise vichico, ahese, Eique che rētave che piri, ndapeyei eté cheu. Ipanese che turucuarā, pe rumo ndapembou cheu, chembaheasise vichico, iyavei che roquendasave, Yasomi tēi sepia, ndapeyei eté cheu' ahera. ⁴⁴ 'Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarā ndeu no, nembahesise, anise nde roquendasave, marase vo mbahe rese nande pītiviisai?' ehi tēira yuvireco cheu. ⁴⁵ 'Supi eté acoi amove mbahe ndapeyapose que seco mbegüemi vahe upe viña. Ipipe rumo cheu avei mbahe ndapeyapoi eté' ahera. ⁴⁶ Ahe ava yuvirasora Tūpa ñemoirosa apirēhi vahesave. Seco ñvi vahe rumo teco ori opaēhisave yuvirasora' ehi Jesús oreu.

Jesús yamotarēhimbar omboguai yuca āgua yuvireco

26 Ipare Jesús aipo ehi oreu:

² —Pe peicua ñuvirio ari tēi ipane vite co Pascua pieta yepota āgua yandeu. Ahese che, Ava Riquehir, imondopri aicora che atica āgua curusu rese yuvireco —ehi.

³ Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rētave. ⁴ Aheve oñemoñeta: 'Yambopa ipisi yuca āgua' ehi yuvireco oyeupe. ⁵ Ahe rumo:

—Ndiyai pieta pipe ité yaipisi ava rehi yemondii guasuēhi āgua yandeu —ehi.

Cuña oipiyere Jesús āca rese mbahe sīacuá vahe

⁶ Jesús tecua Betania ve secoi, Simón lepra vireco vahecuer rētave. ⁷ Aheve mesave chiniseve, cuña vireco vahe mbahe sīacuá vahe siru reseve viroyepota chupe. Ahe oipiyere Jesús āca rese. ⁸ Orosepiase rumo oroñemoiro aipo orohe oreyeupe:

—¡Mahera vo co omocañi tēi! ⁹ Omondo vahe ité tie co setá guarepochi rupi ava iparaisu vahe pītivi āgua viña —orohe tēi chupe.

¹⁰ Jesús rumo oicua ore pihañemoñetasa. Sese aipo ehi oreu:

—¡Mahera vo co cuña pemañeco tēi! Esepia, co mbahe oyapo vahe aviye ité cheu. ¹¹ Ava iparaisu vahe niha yuvirecoiño itera pe pāhuve. Che rumo ēgüe ndahe viteñoi chira vichico pe pāhuve. ¹² Esepia, co cuña oipiyere mbahe s̄iacuá vahe che rese che t̄i āgua renondeve. ¹³ Supi eté aipo ahe p̄eu: co ñehesa p̄s̄irosa resendar mombehuse opacatu tecua rupi, imombehusa aveira co cuña rembiapo sese mahenduha āgua —ehi.

Judas Iscariote oyemoingatu Jesús mondo āgua yamotarēhimbar povr̄ive

¹⁴ Ipare ñepeí ore pāhu pendar, Judas Iscariote, oso, oñehe pahi eta rerecuar yuvirecoi vahe upe ¹⁵ aipo ehi: —¿Mbovi rupi vo pemboepira cheu amondose Jesús p̄eu viña? —ehi. “Treinta guarepochi rupi” ehi yuvireco chupe. ¹⁶ Ahesa reseve voi oseca Jesús mondo āgua yamotarēhimbar upe.

Jesús caru agüer ipa vahe güemimbohe rese

¹⁷ Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

¹⁸ Evocoyase,

—Peso tecua guasuve che cua vahe r̄etave aipo peyera chupe: ‘Ore Mbohesar aipo ehi: Cōimi che mano āgua, sese ayapo potami s̄etave Pascua pieta che remimbohe reseve, ehi ndeu’ peyera chupe —ehi.

¹⁹ Evocoyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

²⁰ P̄itu ramomise, opacatu orogup̄i mesave Jesús piri ore caru āgua. ²¹ Ore carusave aipo ehi oreu:

—Supi eté aipo ahe p̄eu: ñepeí pe pāhu pendar che mondora che amotarēhisar upe —ehi.

²² —Che Yar, ¿che p̄iha? —orohe-rohe t̄ei ñepeí-peí ore yacatu ore viharēhisa pipe chupe.

²³ —Omondo vahe opo che caro pipe, ahe che mondora che amotarēhisar upe —ehi—. ²⁴ Imboaviyesa itera che, Ava Riquehir, rese ñehesa icuachiapri. ¡Iparaisu catura rumo acoi mbia che mondosar! Aviye catura ndoyesuise viña —ehi.

²⁵ Ahese Judas imondosavi oporandu:

—Ore Mbohesar, ¿che tie? —ehi.

—Taa, inde ité niha ēgüe erera! —ehi chupe.

²⁶ Ore caru vitesese, Jesús oipisi pan, “Aviye ndeu” ehi Vu upe. Aipo ohe pare, ombohi-mbahi oreu imondo, aipo ehi:

—Ndo co, pehu co che rete —ehi.

²⁷ Ipare oipisi igua r̄iru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui. ²⁸ Esepia, co che ruvi, ahe omoimera che Ru remimbotar ipiasu vahe p̄eu, ahe opepiyerera ava rehii angaipa rese ñero āgua.

²⁹ Ndaihu iri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ipiasu vahe —ehi oreu.

Jesús, “ ‘Ndaicuai vahe ité aipo mbia’ erera cheu” ehi Pedro upe

³⁰ Ore sapucaire, oroso ivitri Olivo ve. ³¹ Evocoyase Jesús aipo ehi oreu:

—Opara pemocañi che rese yeroyasa peyesui co p̄itu pipe. Esepia, acoi icuachiapri pipe aipo ehi: ‘Ayucara ovesa r̄ārosar, ahese oñemosai t̄eira ovesa opacatu rupi yuvireco’ ehi vahe. ³² Che cuerayevire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya iri chira yuvireco, che rumo ndayepēpi chietera nde sui —ehi chupe.

³⁴ —Che rumo supi eté aipo ahe ndeu: co p̄itu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe p̄ave tupri t̄ei chupe.

Jesús oyerogui Getsemaní ve

³⁶ Ipare Jesús rupi orosoño Getsemaní ve. Aheve aipo ehi oreu:

—Peguapi cohove; che aso ranera peve catumi, ayerogui —ehi.

³⁷ Aheve viraso Pedro oyeupi iyavei ñuvirío Zebedeo rahir. Ahese oyandu oviharēhisa oico. ³⁸ Evocoyase ahe aipo ehi chupe:

—Ndavihai eté. Esepia, che h̄a oyandu ité manosa. Pepita rane cohove iyavei pemahemohara pe yeroqui pipe che rese —ehi.

³⁹ Evocoyase oso tenonde catumi. Aheve oñenopiha ovapi ivi rese oyerogui Vu upe aipo ehi: “Che Ru, iyase ndeu che renose mbahe-mbahe t̄ei sui eve; tayapo eme ru che remimbotar t̄ei, nde remimbotar rupi catu tayapo” ehi.

⁴⁰ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—¡Ndapeñemosai eté vo pe ropesii upe che r̄āro āgua que ñepeí hora che mondugüe āgua peye!

⁴¹ Pemahemoha, peyeroqui mbahe t̄ei pipe pe viapiēhi āgua. Supi eté pequerēhi ité viña, pe retecuer t̄ei niha nipiratai p̄eu —ehi.

⁴² Ichui imoñuviriosa rupi oso iri oyerogui aipo ehi: “Che Ru, ereipotase che reique āgua co mbahe t̄ei pipe, eyapo nde remimbotar che rese” ehi.

⁴³ Ipare oyevise, osesapiha iri iquesese ou. Esepia, sopesii nomboyeroyai eté yuvireco. ⁴⁴ Evocoyase os-yapa iri oso oyerogui āgua imombosapisa rupi. Aipo

ehi tupriño avei oyeruqui Vu upe. ⁴⁵ Ipare oyeve iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mondo água ava yangaipa vahe povrive. ⁴⁶ Pepūha, yaso. Esepia, cōimi eté che amotarēhisar upe che mondo vaheerā secoi —ehi.

Jesús oipisi yuvireco

⁴⁷ Jesús ñehe vitesese, Judas oyepota oso chupe. Ahe ñepei semimbohe ore pāhu pendar, iyavei setá iteanga ava yugüeru quise pucu, ivira reseve-seve supi. Ahe pahi eta rerecuar yuvirecoi vahe judío rerecuareta porocuaita rupi oyapo yuvireco. ⁴⁸ Yipindar rumo imondosar Judas aipo ehi: “Asovaupitese, ahese pecuara; ahe peipisira” ehi. ⁴⁹ Ipare oyemboya voi oso sese.

—¡Avirave, Porombohesar! —ehi sovaupite.

⁵⁰ —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

⁵¹ Evocoyase semimbohe secoi vahe supi vinose oquise pucu, oyasia pahi rerecuar ivate catu vahe rembiguai nambi.

⁵² —¡Aní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco. ⁵³ ¿Ndereicuai vo aporanduse che Ru uve viña, ahe evocoyase cūrítei voi omboura doce mil sui setá catu vahe güembiguai che repi água viña? ⁵⁴ Ēgüe ehise rumo Tūpa Ñehengagüer icuachiapri ndayaviyei chietera viña, ahe co cūrítei osupiti —ehi.

⁵⁵ Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisi água imonda rai vahe nungar che rereco peye. Che ari yacatu rupi aguapise pe pāhuve pe mbohe água tūparo pipe, ndapeyapoi eté co nungar cheu. ⁵⁶ Co rumo opacatu Ēgüe peye Tūpa ñehe mombehusar rembicuachiagüer mboaviye água cute —ehi ava rehii upe.

Ahese voi opacatu oroñemosaipe, oroseya ahe aetemi Jesús ava rehii upe imoha.

Jesús serasosa pahi rerecuar ivate catu vahe rovai

⁵⁷ Ahese Jesús pisisar viraso Caifás rētave yuvireco, ahe pahi rerecuar ivate catu vahe secoi. Aheve oñemonuha Moisés porocuaita rese oporombohe vahe, judío rerecuar yuvirecoi vahe avei no. ⁵⁸ Pedro rumo amombri rupive tēi osaquicue moña oso. Ēgüe ehi oyepota pahi rerecuar ivate catu vahe rēta rocar āchisave. Aheve oique ipipe, iyavei oguapi oĩ sundao pāhuve ‘¿mara ehi etera pīha sereco yuvireco?’ oya.

⁵⁹ Ahese pahi eta rerecuar iyavei opacatu porandusa ivate catu vahe pendar, ahe oñhengapo-ngapo uca tēi ava Jesús amotarēhisave yuca uca água yuvireco, ⁶⁰ yepe oyemboyecua setá iteanga yamotarēhisar semira-mira tēi vahe yuvireco viña, ndoyosui eté rumo mbahe sembiapo naporai vahe yuca uca água yuvire-

co. Aheseve yugüeru ñuvirío yamotarēhisar oporombo-mbopa tēi vahe yuvireco cute.

⁶¹ —Co mbia aipo ehi: ‘Che aicatu co tūparo monduru; aicatu aveira imopuha iri mbosapi ari rupi’ ehi —ehi tēi yuvireco chupe.

⁶² Ahese pahi rerecuar ivate catu vahe opūha, oporandu Jesús upe:

—¿Mahera vo nderemboyevii eté iñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

⁶³ Noñehei eté rumo. Ahese,

—Che orocuai Tūpa supi eté vahe rer pipe emombehu oreu: ¿Poropširosar ité nde ereico, Tūpa Rahir? —ehi pahi rerecuar ivate catu vahe chupe.

⁶⁴ —Taa, supi eté niha aipo aipo ere cheu, co catu amombehura pēu, che repiara niha peye che, Ava Riquehir, aguapise Tūpa mbahe mboavaisarēhi acato coti, ayevise avei iva quiha rese curi —ehi.

⁶⁵ Evocoyase pahi rerecuar ivate catu vahe imboasi-pave omondo oturucuar aipo ehi:

—¡Indó, mbahe tēi eté iñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūrítei. ⁶⁶ ¿Mara ehi aipo pe pihave? —ehi.

—Supi eté, oyavi mbahe. ¡Tomanoño ité! —ehiño ivoya eta yuvireco chupe.

⁶⁷ Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete, ⁶⁸ aipo ehi yuvireco chupe:

—Nde niha aipo ereico Tūpa remimbou Poropširosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹ Pedro evocoyase oguapi sãro ocarve ñachimbri pipe oĩ. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pãrigüer rese nde cuasaño —ehi yuvireco.

⁷⁴ Ahe evocoyase,

¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehe. ⁷⁵ Ahese Pedro oyemom-ahenduha Jesús oyeupe, 'Acoi tacura ñehe renondeve mbosapí oyupagüer rupi: Ndaicuai vahe ité aipo mbia, erera cheu' ihe agüer rese. Ahese osë, oyasehó iteanga oso.

Jesús serasosa Pilato rovai

27 Cõhe ramose, ahese opacatu pahi eta rerecuar, judío rerecuar avei oñemonuha ati oyemboyoya guasu 'Jesús tayucasa ité' oyapave yuvireco. ² Ipare oipocua-pocua seraso mborerecuar guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarëhisar uve oicua, "Jesús tayucasa cute" ehise, ahese tasí iteanga chupe. Evocoyase oso voi tẽi tũparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyevi ãgua aipo ehi:

⁴ —Che ayemboangaipa tiẽte vichico. Esepia, amon-doño tẽi mbia seco catupri vahe pẽu yuca uca ãgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoyase opaño guarepochi omombó tũparo pipe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pipe. Esepia, ava yucapirã reprim tẽi —ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi re-rocua ãgua 'toime ava secua ambuae vahe rehögüer tã ãgua' oyapave yuvireco. ⁸ Sese cõritei co ivi upe, "Ava ruvi reprim tẽi" ehi yuvireco yepi. ⁹ Egüe ehi co im-boaviye ité Tũpa ñehe mombehusar Jeremías remimombehugüer aipo ehi vahe: "Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbia pisi ãgua.

¹⁰ Ipipe virocua ñaihu rese oporaviqui vahe ivi yuvireco. Cheu che Yar omombehu vahecuer rupi tupri ité oyapo yuvireco" ehi Tũpa ñehe mombehusar araca-hendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, 'Ahe ereico' ere cheu —ehiño im-boyevi Pilato upe.

¹² Evocoyase acoi pahi eta rerecuar iyavei judío rerecuareta oñemonuha vahe eipeve oiñhengapo-ngapo tẽi yuvireco. Nomboyevii eté rumo iñehe chupe oyeeipi ãgua. ¹³ Evocoyase:

—¿Nderesendui vo aipo co opacatu ndeu ñehe-ñehe tẽisa? —ehi Pilato chupe.

¹⁴ Nomboyevii eté rumo que ñepei angara ñehesa chupe viña. "¡Too, mara ehi rutei vo co!" ehi-ehi tẽi mborerecuar chupe.

"¡Tayaticasa!" ehi Jesús upe ava yuvireco

¹⁵ Mborerecuar guasu recosa ité ñepei ava soquendapri renose ãgua Pascua pieta pipe ava rehii remimbotar rupi yepi. ¹⁶ Aheve oime soquendapri mbia icuapri vahe ité Barrabás serer vahe; ¹⁷ evocoyase ava rehii oñemonuha atise, Pilato oporandu chupe yuvireco:

—¿Uma peipota che amose ucara pẽu: Barrabás pĩha, anise Jesús "Poropõsiosar" ehi vahe yuvireco chupe tie? —ehi.

¹⁸ Esepia, ahe oicuaño ité ava rese yemoecatẽhisa pipe sui imondopri secoise.

¹⁹ Pilato güendave chini viteseve, sembireco omondo oñehe chupe aipo ehi: "Ereyapoi rene mbahe evocoi ava seco catupri vahe upe. Esepia, che querve asepia mbahe tẽi eté sesendar" ehi.

²⁰ Evocoi pahi eta rerecuar iyavei judío rerecuareta rumo ava rehii omonguerẽhi, "Barrabás tosẽ; Jesús evocoyase tomano" he ãgua yuvireco. ²¹ Evocoyase Pilato oporandu iri ava rehii upe:

—¿Uma peipota catu co ñuvirío yuvirecoi vahe sui amose vaherã pẽu? —ehi.

—¡Barrabás tosẽ! —ehi yuvireco.

²² —¿Mbahe vo evocoyase che ayapora Jesús rese chupe acoi ava, "Poropõsiosar" ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

²³ —¿Mbahe ité vo oyapo naporai vahe? —ehi tẽi ava rehii upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

²⁴ Evocoyase Pilato: "Ndaicatui mbahe moingatu sepi ãgua" ehi tẽi oyeupe. Sese ava yaivu guasu catu-catu irise, ogüeru uca i. Ipipe oyepoi opacatu ava rehii rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

²⁵ —¡Ore rese ité, ore rahir rese avei toviapi que mbahe tẽi co mbia mano sui! —ehi atiño ité yuvireco.

²⁶ Ahese Pilato omose uca Barrabás; Jesús rumo oin-upá iteanga uca tucumbo tupeicha nungar pipe imon-do curusu rese yatica ãgua.

²⁷ Evocoyase mborerecuar sundao viroique Jesús ambuae oi pipe. Aheve opacatu omboetasa omboyere tupri uca sese yuvireco. ²⁸ Ahese osequiipa iturucuar ichui. Ipare omunde turucuar pĩra vahe yuvireco sese ²⁹ iyavei omunde ñaca rese yu piapri, omondo avei ñepei tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayi tẽisa pipe yuvireco.

³⁰ Iyavei ondivi-ndivi yuvireco sese. Ipare yuvirocua-rocua ipo pendar tacuarmi pipe ñaca rese yuvireco.

³¹ Egüe ehi yoyai catu-catu yuvireco. Ipare virocua

turucuar pīra vahe ichui, ahese omonde iturucuar ité yuvireco sese. Ichui vīraso curusu rese yatica āgua yuvireco cute.

Jesús yaticasa curusu rese

³² Acoi yuvinosese yuvirasó, osepiā mbia Cirene pendar, Simón serer vahe. Ahe chupe, “Erio, terevosii co curusu Jesús vireco vahe rese” ehi voĩño tēi yuvireco.

³³ Oyepotase yuvirasó Gólgota serer vahesave, ahe ‘ava ācagüer’ oya aipo ehi chupe, ³⁴ aheve uva ricuer imboyesehapri mbahe pīhaupiar rese omondo tēi yuvireco Jesús toihu. Osāha tēi, ndoihu potai rumo.

³⁵ Ipare oyatica curusu rese yuvireco. Ahese sundao iguayĩño oyeupe iturucuar mboyaho-yaho āgua rese.

³⁶ Ipare aheve oguapī yuvinoi sãro. ³⁷ Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecuar guasu” ehi icuachiapri oĩ.

³⁸ Ñuvirío imonda rai vahe yaticasa avei curusu rese supive yuvireco, ñepeī mbahe rese ipocosa coti, ambuae evocoyase mbahe rese ipocoēhisa coti yuvireco.

³⁹ Acoi ava ñocuasar iñehe-ñehe tēi, oñeaca mbovava, ⁴⁰ aipo ehi yuvireco chupe:

—Nde acoi, “Opara tūparo amonduru. Ipare mbosapī arī rupi opa irira amopuha” ere acoi cuese. ¡Eñepisiro ru nde ae cute! ¡Tūpa Rahīr nde recose, egüeyī curusu sui! —ehi tēi yuvireco chupe.

⁴¹ Aipo ehi avei pahi eta rerecuar, Moisés porocuaita rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

⁴² —Oipīsīro ambuae, ahe ae rumo ndoicatui oñepisiro. Israel rerecuar guasu secoise, ¡togüeyī curusu sui cūrītei, ahese voi seroyasara! ⁴³ Ahe oyeroya Tūpa rese, Tūpa evocoyase oipotase, toipīsīro cūrītei. Esepia, ahe, “Che Tūpa Rahīr aico” ehi yandeu cuese —ehi yuvireco.

⁴⁴ Imonda rai vahe avei rumo acoi yaticapri supive, ahe avei mara ehi-ehi tēi chupe.

Jesús mano agüer

⁴⁵ Ahese mbīter arī pipe, opa tupri pĩtu ivi rupi. Ēgüe ehi las tres rupi. ⁴⁶ Ahese tupri avei Jesús oñehe pĩrata aipo ehi: “Elí, Elí, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

⁴⁷ Ava aheve yuvirecoi vahe osenduse iñehe, aipo ehi yuvireco:

—Esendu co mbia, Tūpa ñehe mombehusar Elías upe oñehe —ehi yuvireco chupe.

⁴⁸ Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe ‘toihu’ oya. ⁴⁹ Ambuae rumo aipo ehiño yuvireco:

—Ēgüe tehiño rane, ¿oura pĩha Elías ipīsīro āgua? —ehi yuvireco.

⁵⁰ Ahese Jesús sãse pĩrata iri, omano. ⁵¹ Ahe pipeve voi tūparo guasu turucuar ivate coti sui ovo tupri. Ahe-

seve avei ivi oririi iyavei ita guasu-guasu oyeca.

⁵² Tehögüer ruvípa ita apopri avei oyemboi yuvireco iyavei setá Tūpa reroyasar omano vahecuer, ahe avei opa ocuerayevi yuvireco. ⁵³ Ēgüe ehi Jesús cuerayevire, ahe opa yuvinosē tehögüer ruvípa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

⁵⁴ Evocoyase co sundao rerecuar iyavei Jesús rãrosareta, ahe oyanduse ivi ririi yuvireco iyavei ambuae mbahe Ēgüe ehi vahecuer repiase, ahese oyembosiquiye guasu aipo ehi yuvireco:

—¡Supi eté catu co mbia Tūpa Rahīr ité secoi! —ehi tēi yuvireco.

⁵⁵ Iyavei setá cuña aheve amombrive osepiā catu yuvinoha, ahe acoi Galilea sui yugüeru vahecuer Jesús rupi iyavei setá rupi oipĩtivii yuvireco yepi. ⁵⁶ Ahe ipāhuve María Magdalena secoi, iyavei ambuae María ahe Santiago, José si, Zebedeo rahīr si avei supi secoi.

Jesús apocatu agüer tuvīpa pipe

⁵⁷ Pĩtu potase, ou mbia mbahe yar José serer vahe, ahe Jesús reroyasar tecua Arimatea pendar. ⁵⁸ Evocoyase ahe oso Pilato upe oporandu Jesús rehögüer rese. Evocoyase Pilato aipo ehi: “Aviye, timondosaño chupe” ehi. ⁵⁹ José evocoyase vīraso sehögüer. Ipare oimama tupri turucuar secose vahe ndiquihai vahe pipe. ⁶⁰ Ichui omoingue ombahe tuvīpa ipiasu vahe, ita oyoho uca vahe pipe. Ipare osovapi ita guasu yapayere vahe pipe oso. ⁶¹ Aheve María Magdalena ambuae María rese suvīpa rovai oguapī yuvinoi.

Jesús ruvípa osãro sundao yuvireco

⁶² Ahere ayihive mbituhusa arī pipe, yuvirasó pahi eta rerecuar iyavei fariseo Pilato upe mbahe rese oporandu āgua ⁶³ aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosapī arī pare omano vahe pāhu sui” ehi acoi cuese oicove vītese —ehi yuvireco—. ⁶⁴ Sese emondo sundao sehögüer ruvípa rãro tupri āgua mbosapī arī rupi semimbohe ñomiēhi āgua pĩtu pipe yuvireco. Aviyeteramo, “Ocuereyevi omano vahe pāhu sui” aipo ehi tupri tēi tiētera ava upe yuvireco. Aipo ehise yuvireco, yipīndar semira tēi vahe sui ivate catura serecosa —ehi yuvireco.

⁶⁵ Pilato evocoyase aipo ehi chupe yuvireco:

—Aviye —ehi—. Amondora sundao pēu. Peraso, pemoviracua tupri ité sãro āgua —ehi.

⁶⁶ Evocoyase yuvirasó tehögüer ruvípa rãro tupri āgua yuvireco. Ahese omondo tehögüer rovapisa ita guasu rese mbahe imomiisa cua āgua yuvireco. Ipare oseya aheve sundao sãro āgua yuvireco cute.

Jesús ocuerayevi

28 Cōhe ramomise, domingu pipe, María Magdale-na iyavei ambuae María yuvirasó tehögüer ruvípa repia yuvireco. ² Aviyeteramo tēi oririi pĩratá ivi Tū-

pa rembiguai iva sui igüeyise. Ēgüe ehi oyepota tehögüer ruvipave ou, ahe virocua itape guasu so-vapisa ichui. Ipare iharive oguapi oí. ³ Ēgüe ehi sendí iteanga aviye acoi overa vahe. Iturucuar evocoiyase morochí eté. ⁴ Osepiase sundao, oriríí eteanga os-iqúiyepave yuvireco ichui, opa oyuca pucu-pucu tēi yuvireco. ⁵ Tūpa rembiguai rumo aipo ehi voi eté cuña upe:

—Pesiquíyei rene. Esepia, che aicua pe peseca Jesús yaticapírer. ⁶ Ndipoi eté cohave. Esepia, ahe ocuerayevi güemimombehu rupi eté. Tapesepia ru supagüer —ehi.

Ipare aipo ehi:

⁷ —Peso poyava voi, tapemombehu semimbohe eta upe: ‘Ocuerayevi omano vahe pāhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu āgua pēu —ehi Tūpa rembiguai cuña upe.

⁸ Evocoiyase cuña yuviraso poyava voi suvipa sui, os-iqúiyē pāhuve rumo ovihāño yuvireco; Ēgüe ehi yuvinoñá iteanga imombehu yugüeru oreu. ⁹ Ahese Jesús oyemboyecua cuña upe cute omboavirave. Ahe cuña evocoiyase oyemboya sese oñenopiha ipicuh-aguā imboeteisave yuvireco. ¹⁰ Evocoiyase ahe aipo ehi chupe:

—Pesiquíyei rene che sui. Pesoño, tapemombehu che reroysareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

¹¹ Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe

osepia vahecuer yuvireco. ¹² Evocoiyase pahi rerecuaqueta oñemoñeta judío rerecuar rese opihāñemoñeta mboyoya āgua. Ichui omondo setá guarepochi sundao upe yuvireco, ¹³ aipo ehiño yuvireco chupe:

—Aipo peyera ava uve: “Oroque viteseve pītu pipe, ahese revo Jesús remimbohe yugüeru sehögüer ñomi āgua ore sui” peyera —ehi mborerecuar yuvireco chupe—. ¹⁴ Acoi oyanduse rumo mborerecuar guasu curi, ahese opoviroya ucara chupe. Evocoiyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoiyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ēgüe ehi vite cūrítei judío Jesús cuerayevisa reroyaēhi yuvireco yepi.

Jesús omondo güemimbohe ivi yacatu rupi oñehen-gagüer mombehu āgua

¹⁶ Evocoiyase Ēgüe orohe oroso semimbohe once oroico vahe Jesús remimombehu ivi Galilea pendar ivitrive. ¹⁷ Acoi orosepiase rumo Jesús, ahese oromboetei oroico, yepe moviro tēi ore pāhu pendar ndoviroya tupri vitei yuvireco viña. ¹⁸ Evocoiyase ahe oyemboya ore rese aipo ehi oreu:

—Tūpa che mbou mborerecuar ivate catu vahe che reco āgua ivave, ivive nara avei no —ehi—. ¹⁹ Peso ava upe opacatú ivi rupi iyavei pembohe che recocuer rupi eté yuvirecoi vaheerā; peñapiramo avei che Ru rer pipe, che rer pipe, Espíritu Santo rer pipe avei no. ²⁰ Iyavei pembohe che opacatu pe mbohe agüer reroya āgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

SAN MARCOS

Juan Oporoãpiramo vahe ivi iporupirêhisa rupi secoi

1 Co yipindar aviye vahe ñehesa Jesucristo, Tūpa Rahir, recocuer resendar amombehu potami pëu.
² Yipiindar Tūpa aipo ehi imombehu oñehe mombehusar Isaías rembicuachía pipe aracahe:
 “Amondora che ñehe mombehusar nde renonera, ndeu peri moatiro água” ehi.
³ “Oyeendu ñehesa ipirata vahe ava porêhise: ‘Pemoingatu yande Yar raperã; pemohivi tupri avei’ ehi” ehi aracahe.
⁴ Egüe ehi Juan ou ava ãpiramo ivi iporupirêhisa rupi oico, aipo ehi: “Pemboasi pe angaipa, peyevi Tūpa upe, ahese opoãpiramora Tūpa pëu ñero água pe angaipa rese” ehi ava upe. ⁵ Opacatu ava oyugüeru iñehe rendu água ivi Judea rupindar, iyavei tecua Jerusalén pendar oangaipagüer mombehu água. Ahese Juan oñapiramo iai Jordán pipe.
⁶ Juan turucuar camello ragüer apopri, sumbicuasa mbahe pirer, sembihu evocoyase tucru, eiri caha pipendar avei. ⁷ Ahe aipo ehi oñehe ava upe oico: “Che raquicuei oura seco pirata catu vahe che sui, sese cheu ndiyai chira ayeaivi ipitaquisã yora água. ⁸ Che supi eté opoãpiramo i pipe tēi; ahe rumo pe ãpiramora Espiritu Santo pipe” ehi.

Jesús ãpiramo agüer

⁹ Ipare Jesús osë tecua Nazaret sui oso Galilea rupi. Aheve Juan oñapiramo iai Jordán pipe. ¹⁰ Osë ramoseve i sui, Jesús osepia iva oyemboi tupri, ahese Espiritu ogüeyi iharive apicasu nungar. ¹¹ Ahese oyeendu ñehesa iva sui aipo ehi: “Nde che Rahir ereico, che rembiaisu, aviha etepri nde rese” ehi vahe.

Jesús recoãhasa

¹² Ipare voi, Espiritu Santo viroguata Jesús ava porêhisa rupi. ¹³ Aheve Jesús secoi cuarenta ari mbahe mimba vai pãhuve. Aheve avei Carugar osecõha; Tūpa rembiguai iva pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico ¹⁵ aipo ehi: “Oyepota ari iyavei cõimi eté Tūpa mborerecuasa yandeu. Sese, pemboasi pe an-

gaipa, peyevi Tūpa upe, iyavei peroya co ñehesa aviye vahe Tūpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepe ari Jesús oguata ipa Galilea ivii. Ahese osepia Simón, tivri Andrés avei, ahe pira omboha yuvireco.
¹⁷ Ahese Jesús aipo ehi chupe:
 —Pe pira recasar peico, perio che rupi, na peye aveira ava reca água cheu nara —ehi.
¹⁸ Aipo he ramoseve voi, opoi opira mbohasa sui yuvireco, yuviraso supi.
¹⁹ Ipare chíhi oguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri. ²⁰ Ahe chupe avei: “Perio che rupi” ehi, evocoyase vu oseya carite pipe ipitiviisar reseve, yuviraso supi.

Mbia carugar vireco vahe oyese

²¹ Oyepotase tecua Capernaum ve yuvireco mbituhusa ari pipe, Jesús oi que oporombohe tūparove.
²² Evocoyase ava osenduse iporombohesa, “¿Mara ehi rutei?” ehi tēi yuvireco chupe. Esepia, ahe oporombohe güeco piratasa pipe, ndahei Moisés porocuita rese oporombohe vahe nungar. ²³ Aheve mbia ahe tecua pendar vireco vahe carugar oyese, oñehe pirata chupe aipo ehi:
²⁴ —¿Mahera vo ereyuño tēi cohava oreu, Jesús Nazaret pendar? ¿Ereyu vo ore mocañi água tēi? Che orocua ité, nde Tūpa suindar ndaseco marai vahe ereico —ehi chupe.
²⁵ Oñehe pirata rumo carugar upe aipo ehi:
 —¿Quiriri, esë co mbia sui! —ehi chupe.
²⁶ Evocoyase carugar mbia rese secoi vahe omoe-hoha seiti ivive, sãse, osë oso ichui. ²⁷ Opacatu ava ombosiquiye, ichui oporandu-randu oyeupe yuvireco aipo ehi:
 —¿Mbahe pãha co? ¿Iporombohesa ipiasu vahe ité! ¿Co mbia vireco ité omborerecuasa! ¿Carugar avei eté omboyeroya oyeupe iñehese! —ehi tēi ava yuvireco.
²⁸ Cüriteimi voi yandusa serãcua opacatu ivi Galilea rupi.

Jesús ombogüera Pedro rembireco si

²⁹ Jesús yuvinosese tūparo sui, yuviraso Santiago, Juan rese Simón, Andrés rêtave. ³⁰ Aheve Simón rembireco si sohí iteanga vupave ou. Evocoyase omombehu Jesús upe imbaherasisa yuvireco. ³¹ Ahese oso chupe oipisi ipo rese imopuha, ahe ramoseve, sohí

opituhu ichui. Ipare voi ahe cuña ihañeco semihura rese.

Jesús setá ombogüera ava imbaheasi vahe

³² Pĩtu ramosé opacatu imbaheasi vahe iyavei carugar víreco vahe víraso yuvireco chupe imbogüera água. ³³ Opacatu ava ahe tecua pendar oñemonuha oquendipive yuvireco. ³⁴ Evocoyase setá ombogüera mbaherasi-rasi tẽi víreco vahe, iyavei omboyepepi setá carugar ava sui. Ndoipotai rumo carugar ñehe. Esepia, ahe oicua ité evocoyase seco yuvireco.

Jesús Vu Tũpa Ñehengagüer omombehu judío tũparo rupi

³⁵ Ayihiteve Jesús oñarapuha oso ava porẽhisave oyoeroqui água. ³⁶ Evocoyase Simón ondugüer reseve yuvirasosca. ³⁷ Osepiase,

—Opacatu ava nde reca tẽi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tũpa Ñehengagüer mombehu água aheve; evocoi nungar apo água niha che ayu —ehi.

³⁹ Ēgüe ehi oguata opacatu Galilea ivi rupi, omombehu Vu Tũpa Ñehengagüer judío tũparo yacatu rupi oico, iyavei setá omose carugar ava sui.

Jesús ombogüera mbia lepra víreco vahe

⁴⁰ Ñepei mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cũritei! —ehi chupe.

⁴² Aipo ihe ramoséve, ocuera voi eté. ⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei ermondora porerecosa nde cuerasa resendar Moisés porocuita rupi. Evocoyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatú ava upe. Sese Jesús ndoicatu iri güeique água güecocuer mombehuse tecua rupi; secoiño tẽi tecua popi rupi ava porẽhisave. Ava rumo yugüeruño ité opacatu tecua rupindar sepia.

Jesús ombogüera ava ndoguatai vahe

2 Ñepei ari pipe Jesús oyeví ou tecua Capernaum ve, ahese opacatu oyandu ñepei oive secoise yuvireco. ² Cũriteimi voi eté setá ava oñemonuha yuvireco secosave. Sese ndipoi eté ava reique iri água oi pipe oquendipi rupi. Ahe rumo omombehuño ité Vu Ñehengagüer. ³ Aheseve irungatu mbia viroyepota ndoguatai vahe yuvireco chupe. ⁴ Ahe rumo ndiyai seroique água Jesús uve ava rehisave yuvireco. Sese viroyeupi oi harive seraso yuvireco. Aheve teca virocua

oi sui yuvireco; supi viroyi supa reseve imondo Jesús rovai tupri yuvireco. ⁵ Ahe oicuase co mbia yuvirecoi vahe oyese yeroya, aipo ehi imbaheasi vahe upe:

—Che rahir, che ñero nde angaipa rese ndeu —ehi.

⁶ Moisés porocuita rese oporombohe vahe rumo ipihañemoñeta aheve yuvinoi: ⁷ “¿Mahera co mbia aipo ehiño tẽi oñehe? Ahe oyemboivate ai tẽi vahe Tũpa ñehe nungar pipe tẽi oñehe. Tũpaño ité niha oicatu ava angaipa upe oñeroi água” ehi. ⁸ Ahe rumo oicuño ipihañemoñetasa, sese aipo ehi:

—¿Mahera vo pepihañemoñeta rai tẽi che rese?

⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pĩha, anise: “Eñarapuha, esupi nde rupa, eguata” hesa tie?

¹⁰ Tapeicua ru che, Ava Riquehir, areco mborerecuasa co ivi pipe ava angaipa upe che ñero água —ehi.

Evocoyase aipo ehi imbaheasi vahe upe:

¹¹ —Eñarapuha, esupi nde rupa, eso nde rõtave —ehi.

¹² Imbaheasi vahe aipo ihe ramoséve, oñarapuha, osupi vupagüer, osẽ oso ichui opacatu ava rembiepiave. Sese opacatu oyepihamondii yuvireco, omboetei Tũpa yuvireco aipo ehi:

—Yipisuive ndayasepiai vahe ité co nungar mbahe —ehi tẽi yuvireco.

Jesús oñehe mbia Leví serer vahe upe

¹³ Ipare Jesús oso iri ipa ivi. Aheve oporombohe oyese ava rehii yemboyase. ¹⁴ Ichui oguata vítese, osepia Leví, Alfeo rahir, guarepochi reroquasave chinise, aipo ehi chupe:

—Erio che rupi —ehi.

Evocoyase Leví opũha, oso voi supi.

¹⁵ Ipare ocaru Leví rõtave güemimbohe reseve yuvireco, ava sui guarepochi reroquasar iyavei ava yangaipa vahe pãhuve. Esepia, setá ava osaquicue moñaño ité yuvireco. ¹⁶ Evocoyase Jesús ocaruse ipãhuve, fariseo eta, oporombohe vahe Moisés porocuita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi reroquasar iyavei yangaipa guasu vahe pãhuve tẽi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

¹⁸ Ñepei ari pipe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoyase moviro mbia ipãhu pendar yuvirasosca, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

¹⁹ Evocoyase omboyeveí ahe ava upe:

—¡Ndiyái eté ichohopri mendasave iyecuacu água imer oicove vitesé ipáhuve! ²⁰ Oimera rumo ari imer reraso água ichuí curi, ahese ramo oyecuacura yuvireco cute —ehi.

²¹ “Ndiyái yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri água, ichorosa evocoyase tuvicha catu-catuño ité. ²² Iyavei uva ricuer ipiasu vahe ndiyái iñasa mbahe pírer cuacua pipe. Esepia, uva ricuer ipiasu vahe osose mbahe pírer cuacua vahe pipe, ombopuñora, uva ricuer evocoyase ocañipa tēira, iyavei mbahe pírer ocañi tēi aveira. Sese uva ricuer ipiasu vahe ñoñasara mbahe pírer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

²³ Ñepeí mbituhusa ari pipe, Jesús oguata güemimbohe rese trigo pãhu rupi fariseo rembiepiave yuvireco. Ahese semimbohe oipoho-poho sãhii yuvireco.

²⁴ Evocoyase fariseo aipo ehi:

—¡Mahera nde remimbohe mbituhusa ari pipe oporaviquiño yuvireco! —ehi yuvireco chupe.

²⁵ Ahe rumo aipo ehi:

—Peyeroqui niha icuachiapri aracahendar pipe mborerecuar guasu David rembiapogüer rese acoi ndasiepoise ondugüer reseve yuvireco aracahe. ²⁶ Pahi rerecuar ivate catu vahe Abiatar serer vahe recose, ahese David oique Tüpa rēta pipe pan imboetepri Tüpa upendar reca ondugüer reseve yuvirohu água. Ahe chupe acoi ndipotasai ihu água yuvireco viña; judío pahi yuvirecoi vahe upeño ité niha ipotasa ihu água yepi. Ahe rumo ohuño, omondo avei ava oyeupindar tohu aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara. ²⁸ Sese Ava Riquehir mbituhusa ari rerecuar secoi —ehi Jesús fariseo upe.

Mbia ipo nomii vahe Jesús ombogüera

3 Jesús oique iri judío tūparove. Aheve oime mbia ipo co cotigüer nomii vahe. ² Aheve avei fariseo ‘¿ombogüerara pñha mbituhusa ari pipe?’ oya omahengatu yuvireco sese ‘yaiñhengapo angahu’ oyapave tēi. ³ Evocoyase Jesús aipo ehi co mbia ipo nomii vahe upe:

—Epñha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pñha, mbahe naporai vahe tie? ¿Yaipñsiro pñha ava recocuer, yamocañi uca tēi tie? —ehi chupe.

Ahe rumo opaño iquiriri tupri yuvireco. ⁵ Evocoyase omahe ava oyese oyere tupri vahe rese vorieñhiseve iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yiva —ehi.

Evocoyase oichoho oyiva, ocuera tupri ité. ⁶ Ahese fariseo opa yuvinose yuviraso oyemoingatu Herodes rupindar rese Jesús yuca água yuvireco.

Ava rehii ipa popi rupi yuvirecoi

⁷ Ipare Jesús yuviraso güemimbohe reseve ipa popi rupi, ava rehii avei ivi Galilea rupindar yuviraso supi.

⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, íai Jordán cotindar avei, opacatu ava Tiro, Sidón pendar yugüeru sepia água. ⁹ Sese oyocuai güemimbohe vireco voi vaherá ñepeí carite yuvireco ava omboti etepriñhi água yuvireco. ¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuviraso chupe sese opoco água.

¹¹ Iyavei ava carugar vireco vahe sepiase, oñenopiha sovai, oñehe pucu-pucu yuvireco:

—¡Nde Tüpa Rahir ereico! —ehi.

¹² Jesús rumo oñehe pñrata chupe: “Che mombehui rene ava rovaque peye” ehiño imondo.

Jesús oiporavo doce tupri güemimboherã

¹³ Ipare Jesús oyeupi ivitri rese oso. Aheve ava viroyasar upe oñehe iporavo água güemimbotar rupi. Ichuí oyugüeru yuvireco chupe. ¹⁴ Ahe ipãhu pendar osenoi doce tupri güemimboherã ‘toguataño che rupi, tomombehui Tüpa Ñehengagüer opacatu ivi rupi’ oya.

Ahe osero “apóstol” ¹⁵ ‘toipisi avei mborerecuasa carugar ava sui imboyepipi água yuvireco’ oyapave.

¹⁶ Evocoi doce yuvirecoi vahe, ahe: Simón (sererguã acoi omondo Pedro), ¹⁷ Santiago iyavei tivri Juan Zebedeo rahir, ahe avei omondo sererguã Boanerges (‘osunu vahe rahir’ oya aipo ehi); ¹⁸ iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatēhi vahe pãhu pendarer; ¹⁹ iyavei Judas Iscariote, ahe omondo vaherã Jesús yamotarēhisar upe.

“Jesús carugar pñratasa vireco oyese” ehi tēi ava yuvireco

²⁰ Ipare Jesús oique oi pipe güemimbohe reseve. Aheve oñemonuha ati irise ava yuvireco sese, ndiyái icaru água yuvireco. ²¹ Oyanduse imu secocuer yuvireco, oyugüeru seraso água ‘ndayaracua iri revó’ oya.

²² Iyavei oporombohe vahe Moisés porocuaíta rese oyugüeru vahe Jerusalén sui aipo ehi: “Co mbia carugar rerecuar Beelzebú oyocuai vahe, ipñratasa pipe tēi omboyepipi carugar ava sui” ehi yuvireco.

²³ Evocoyase Jesús omombehui carugar recocuer aipo ehi: “¿Mara ehira aipo carugar ahe ae oyeenose ava sui viña? ²⁴ Acoi mborerecuar guasu povri pendar, ahe ovava-vavase oyeupe; evocoi nungar mborerecuar pñratasa ocañi tēira. ²⁵ Acoi oñemu oyese ae oyeamotarēhise, oyemboyahose yuvireco viña, ahe ndipocopií chiaveira yuvireco. ²⁶ Acoi carugar oyemboyahose ovava água oyeupe ae yuvireco, ndipocopií chiaveira

yuvireco, ahe evocoyase secocuer ocañi tēi vaheṛā ité yuvireco.

²⁷ “Ndipoi eté niha ava oique vahe que ava ipĩrata etepri vahe rēta pipe imbahe rerocuapa āgua ichui; oñapichi rane itera. Ipare voi opara imbahe virocuā ichui.

²⁸ “Supi eté aipo ahe pēu: Acoi ava yangaipa vahe upe Tūpa iñerora opacatu yangaipa rese, iñehe-ñehe tēisa rese avei. ²⁹ Acoi iñehe-ñehe tēi vahe rumo Espiritu Santo rese, ahe chupe ndipo iri chietera ñerosa apirēhi vaheṛā ité” ehi.

³⁰ Aipo ehi Jesús imboyevi ava upe. Esepia, “Carugar tēi erereco” ehiño ava yuvireco chupe.

Jesús si, tivireta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichē āgua. ³² Yivii yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tēi yuvireco —ehi.

³³ Ahe rumo,

—¿Ava pĩha che si; ava pĩha che rivireta yuvirecoi? —ehi.

³⁴ Evocoyase omahe ava oivirindar yuvinoi vahe rese aipo ehi iri chupe:

—Co che si eta; co che rivireta. ³⁵ Esepia, acoi Tūpa remimbotar oyapo vahe yuvireco, ahe che rivri, che reindri, che si avei yuvirecoi —ehi.

Mbahe miti sui yembohesa

4 Jesús oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve oguapi oñehe. Ava rumo opacatu ivi ātasa rupi opitaño yuvireco. ² Evocoyase ava mbohe āgua omboyoya tecocuer mbahe tĩsa rese aipo ehi:

³ “Pesendu co ñehesa: Ñepe mbia osē omaheti.

⁴ Ahe otiapi-apiise mbahe rāhii oso, moviro oviapi perirup. Vĩrai yugūeruse rumo, opaño yuvirohu. ⁵ Iyavei moviro oiti ivi nayanai vahesave, ita pāhuve. Sese cūriteimi sorí. ⁶ Ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rāhii oiti yu pāhuve; ahe yu rumo sorí poyava catu. Sese opaño oyopi. Evocoyase ahe miti ndihai eté. ⁸ Ambuae mbahe rāhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco” ehi.

⁹ Evocoyase, “Acoi osendu pota vahe che ñehe, toyapisacaño sese” ehi Jesús ava rehii upe.

¿Mahera pĩha co yembohesa imboyoyasa ambuae mbahe rese?

¹⁰ Ipare Jesús opita ahe ae. Ava opita vite vahe semi-mbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe. ¹¹ Ahe aipo ehi: “Pēu niha Tū-

pa oicua uca mbahe ndicuasai vahe omborerecuasa resendar. Ndache reroya potai vahe upe rumo imboyoyasa mbahe ambuae mbahe rese yepi. ¹² Yepe osepia tēira, ndosepiacuā chietera rumo yuvireco. Iyavei yepe osendu tēira, ahe rumo ndosenducua chietera yuvireco, Tūpa upe oyevi potaēhisave, ipipe sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tĩsa resendar

¹³ Iyavei aipo ehi: “¿Ndapesenducuaimi vo aipo porombohesa? ¿Mara peyera ru opacatu ambuae che porombohesa cua tupri āgua? ¹⁴ Evocoi mbahe rāhii oñoti vahe, Tūpa Ñehengagüer mombehusar nungar. ¹⁵ Amove ava recocuer inungar co mbahe rāhii seitipri perirupi: osendu angahu Tūpa Ñehengagüer. Sendu pare rumo, ou Carugar ovirocuapaño oique vahe ipiha pipe ichui. ¹⁶ Ambuae ava recocuer inungar mbahe rāhii seitipri ita pāhu rupi: osendu Tūpa Ñehengagüer, oipisi tupri angahu oyeupe nara vorivetesā pipe; ¹⁷ ndovirecoi rumo guapo oyese opĩrata āgua. Evocoyase yuvirecoise mbahe-mbahe tēi pipe Tūpa Ñehengagüer sui tēi, cūriteimi seroyaēhisave, ‘Apoira ichui’ ehi yuvireco. ¹⁸ Ambuae ava recocuer inungar mbahe rāhii ñotimbri yu pāhu rupi: osenduse ñehesa Tūpa suindar, ¹⁹ ahe rumo ipihañemoñeta catu opacatu ombahe eta co ivi pipendar rese saisusave. Oyembopa uca rumo ombahe eta upe. ‘Opacatu ité mbahe tareco’ ehi tiēte viña. Ipipe sui omocañi tēi Tūpa Ñehengagüer. Ndoypo ucai avei mbahe eta aviye vahe evocoi nungar ava upe. ²⁰ Ambuae ava rumo osendu vahe Tūpa Ñehengagüer seroyasa pipe, oyapoño ité mbahe aviye vahe. Ahe inungar mbahe rāhii ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvrive nara tēi iyavei yande rupavrive nara tēi no? Aní, tataendi imondosa ivate poroesape āgua. ²² Ndipoi chietera mbahe ñomipri ndayasepiai vaheṛā curi.

²³ Acoi osendu pota vahe che ñehe, toyapisacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua uca che ñehe pēu. Iharive amondo iri catura pēu. ²⁵ Vireco tupri vahe upe, imondosa catura. Acoi ndovireco tupri vahe sui, serocuasañora” ehi.

Yembohesa mbahe rāhii rorisa resendar

²⁶ Aipo ehi iri avei Jesús: “Tūpa mborerecuasa co ivi pipe inungar que ava oñoti vahe mbahe rāhii. ²⁷ Omaheti pare, oso oque. Ipare coiye catu oñarapuha. Ahe oñocua pĩtu, ari avei, evocoyase mbahe rāhii sorí poyava yuvireco. Itĩsar rumo ndoicuai mara ehi vorí. ²⁸ Ivi rese niha oyesu miti: yipindar sorí, ipare iha, ipare sāhii yuvinosē sese. ²⁹ Evocoyase co mbia mbahe ha

yaviyese, oipoho. Esepia, oyepota ari ipoho āgua chupe” ehi.

Yembohesa mostaza rāhii suindar

³⁰ Iyavei aipo ehi: “¿Mara ehi vo Tūpa povri pendar co ivi pipe pēu; mbahe rese pīha iyacatu imboyoyasa icua āgua? ³¹ Ahe oyoya tupri mostaza rāhii rese. Ahe tahimi catu opacatu ambuae mbahe rāhii sui. ³² Nōti pare rumo, sorī, ocuacuase tuvichá catu ambuae mbahe miti sui. Sāca tuvichá ité, sese vīrai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ēgüe ehi Jesús oporombohe Tūpa Nēhengagüer rese, omboyoya-yoya ñepe mbahe ambuae mbahe rese ava mbahecuagüer rupi. ³⁴ Nomombehui eté mbahe ambuae mbahe rese imboyoyaēhi pipe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohitu vahe, ivitu ai reseve

³⁵ Ahe ari pipe pītu ramomise, aipo ehi güemimbohe upe:

—Yaso ipa rovai —ehi.

³⁶ Evocoyase ava sui osiri yuvireco, yuviraso carite pipe. Ambuae carite pipendar avei yuviraso supi.

³⁷ Oyepotase rumo ivitu ai ipirata vahe, i ohitu vahe oha guasu-guasú carite pipe, omboapipo seni yuvireco chupe. ³⁸ Jesús rumo oyeatocoño, oque ou supita coti. Evocoyase omomahe voi yuvireco, aipo ehi chupe:

—¡Pomombohesar! ¿Nandemahemohaimi rutei vo yande rese? ¡Opara moco yaso ipive! —ehi.

³⁹ Evocoyase aipo hese, omahe, oñehe pīrata ivitu ai upe, ipa upe avei:

—¡Pepituhu! —ehi.

Aheseve voi opituhu tupri. ⁴⁰ Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroa vitei vo che rese? —ehi.

⁴¹ Ahe rumo osiquiyepave oporandu-randu oyeupe yuvireco:

—¿Ava pīha co mbia secoi? Esepia niha, ivitu ai, ipa avei omboyeroa —ehi tēi yuvireco chupe.

Mbia Gerasa iguar vireco vahe carugar oyese

5 Jesús güemimbohe reseve oyepota ipa rovai Gerasa ivi rese yuviraso. ² Yuvinose pare carite pipe sui, ahese mbia carugar rerecosar tuvipa pāhu rupi secoi vahe oso Jesús upe. ³ Co mbia tuvipa pāhu rupi secoi vahe yepi. Ndipoi eté ava secopisar, carena avei eté opa-opaño omondoso. ⁴ Setá yupagüer rupi tēi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe. ⁵ Ari, pītu rupi uguata, osapucái oico ivitri mahugüer rupi, tuvipa mahugüer rupi avei; ocua-ocua ita pipe oyese yepi. ⁶ Amombri Jesús repia

ramoseve, oña senonde oñenopiha voi sovai, ⁷ oñehe pīrata chupe:

—¡Eyepepi che sui Jesús, Tūpa seco ivate catu vahe Rahir! ¡Aporandu Tūpa rer pipe che mombaraisuēhi āgua eve! —ehi.

⁸ Aipo ehi, esepia, yipindar Jesús aipo ehi chupe:

—¡Carugar mbahe tēi vahe, esē co mbia sui! —ehi chupe.

⁹ Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepia, ore rehii eté —ehi.

¹⁰ Oporanduño chupe omondopaēhi āgua co ivi sui.

¹¹ Ichui namombriimi setá cuchi ocaru vahe ivitri rese yuvireco. ¹² Sese carugar oporandu yuvireco chupe:

—Ore mondopaño cuchi aviterve eve —ehi yuvireco.

¹³ Evocoyase Jesús omondo carugar sē āgua ahe mbia sui. Ahe opa yuviroique cuchi aviterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

¹⁴ Evocoyase cuchi rārosar yuvinoña osiquiyepave yuviraso imombehu āgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pīha?’ oya yuvireco. ¹⁵ Oyepotase Jesús recosave, aheve osepia mbia carugar vireco vahecuer yuvireco oyemonde tuprise oī, yaracua tuprise avei. Ahese oyembosiquiye tēi yuvireco. ¹⁶ Mbahe oime vahe carugar vireco vahe rese, cuchi rese avei, ahe sepiasar omombehupa ambuae ava upe yuvireco.

¹⁷ Evocoyase ava Jesús upe: “Esē cohava sui” ehi yuvireco.

¹⁸ Oha irise Jesús carite pipe, co mbia carugar rerecosarer oporandu chupe supi oso āgua. ¹⁹ Ahe rumo, —Esoño nde rētave, nde mu piri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tēi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyevise Jesús carite pipe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive. ²² Evocoyase oyepota mbia mborerucuar tūparo pendar, ahe serer Jairo. Jesús repiase, oñenopiha sovai, ²³ aipo ehi chupe:

—Che rayri omano pota. Yaso, teremondomi tēi nde po iharive imbogüera āgua —ehi.

²⁴ Evocoyase oso supi. Ava rehii avei yuviraso supi.

²⁵ Ipāhuve avei oime cuña doce araviter rupi suvi yepiyere-yere vahe. ²⁶ Iparaisú iteanga, setá oporoposano vahe ndoicatui imbogüera yuvireco omondavete catu iposanosa pipe yuvireco. Opa tupri tēi omondo mbahe vireco vahe, ivate catuño rumo imbaherasisa chupe. ²⁷ Co cuña osenduse Jesús rese ñehesa, uguata saquicuei oso ava rehii pāhuve, iturucuar rese opoco. ²⁸ Aipo ehi oyeupe oico: “Iturucuar rese

apocose rumo, acuerara" ehi. ²⁹ Ahe ramoseve voi ndasuvi yepiyere iri. Ipare oyandu güetecuer yemoingatu tuprisa, ocuerase ombaherasisa sui. ³⁰ Jesús rumo oyandu osése opīratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

³¹ Semimbohe omboyeve yuvireco chupe:

—¿Nderemahei vo ava oyere tupri yuvireco nde rese? ¿Mahera ru, '¿Ava vo opoco che rese?' ere iri? —ehi yuvireco chupe.

³² Ahe rumo omaheño vite ité ava oiviindar rese '¿uma ité pīha opoco che turucuar rese?' oya. ³³ Evocoyase co cuña oicuase mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe. ³⁴ Evocoyase Jesús aipo ehi chupe:

—Che rayri, erecuera cūritei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

³⁵ Iñehe viteseve, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vite Porombohesar —ehi yuvireco chupe.

³⁶ Ahe rumo Jairo upe aipo ehi:

—Aní eresiquiye. Eyeroya catuño —ehi.

³⁷ Ndoipotai rumo ambuae ava oyeupi icho āgua; Pedro, Santiago, Juan güeraño oipota. ³⁸ Oyepotase Jairo rētave, osepia ava yemondii oyaseho vahe. ³⁹ Ichui oiquese oi pipe, aipo ehi:

—¿Mahera vo perāse guasu tēi peyaseho peyu? Co cuñatai nomanoi, oque tēi ou —ehi ava upe.

⁴⁰ Ava rumo opucaete-eteño seroyaēhisave yuvireco. Evocoyase omose opacatu ava. Ipare omoingue iyepa, ichi, oyeupindar reseve cuñatai rehögüersave.

⁴¹ Ipare oipopisi aipo ehi:

—Talita, cum —ehi chupe ('cuñatai, eñarapuha, ahe ndeu' ohesave aipo ehi).

⁴² Ahe ramoseve voi cuñatai doce araviter vahe oñarapuha, ipare oguata. Sepiase ava, oyembosiquiye guasu yuvireco. ⁴³ Jesús rumo oyocuai imombehuēhi āgua ambuae ava upe. Ipare,

—Pembocar co cuñatai —ehi.

Jesús Nazaret ve secoi

6 Jesús osé co tecua sui oso güecuave; semimbohe avei yuviraso supi. ² Oyepotase mbituhusa ari, ahese oporombohe tūparo pipe. Setá ava iñehe rendusar oyepihamondiiisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pīha vinose co mbahecuasa co poromondiisa apo āgua? —ehi yuvireco oyeupe—. ³ Co niha carpintero, María membrí; Santiago, José, Judas iyavei Simón riquehir, seindri avei yuvirecove yande pāhuve —ehi.

Sese ndoviroyai yuvireco. ⁴ Jesús rumo aipo ehi ahe ava eta upe:

—Tūpa ñehe mombehusar avei niha ava omboetei opacatu rupi yuvireco yepi, imu sēta pipendar ae rumo nomboetei yuvireco —ehi.

⁵ Ndoicatu mbahe oporomondii vahe apo āgua ava viroyaēhisa pipe, sese moviro tēi imbaheasi vahe harive omondo opo imbogüera āgua. ⁶ Ndoyembovihal ava viroyaēhisa rese.

Jesús oyocuai güemimbohe Tūpa mborerecuasa mombehu āgua

Ipare Jesús oso, oguata tecua-tecuami namombrii vahe rupi oporombohe oico.

⁷ Evocoyase, "Perio" ehi güemimbohe doce vahe upe. Ipare oyocuai ñuvirío-río, iyavei omondo güeco pīratasa carugar mboyepepi āgua chupe.

⁸ —Ndaperasoi chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe riru, pan, guarepochi avei. ⁹ Iyavei pemondera pitaqui güeraño. Ndapemondugüei chiaveira pe camisa seraso.

¹⁰ —Que pesosave peiquese oi pipe, pepitaño ipipe, ichuive tupriño ité pesēra pecua. ¹¹ Acoi ambuae tecua pendar ndape pisi potaise, ndosendu potaise avei pe ñehe yuvireco, peyepipiñora ichui. Peipipeteño aveira pe pi ivi rātachigüer sui. Ēgüe pe hesa omboyecuara cañisa apirēhi yuvireco chupe —ehi.

¹² Evocoyase semimbohe eta yuviraso, "Pemboasi pe angaipa, peyevi Tūpa upe" ohe āgua yuvireco. ¹³ Iyavei setá omboyepepi carugar ava sui, setá avei omondo mbahe quira ava imbaheasi vahe rese imbogüera āgua yuvireco.

Juan Oporoāpiramo vahe mano agüer

¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoāpiramo vahe revo ocuerayevi. Sese oyapo poromondiisa ipirata vahe —ehi.

¹⁵ Ambuae rumo,

—Tūpa ñehe mombehusar Elías mo evocoi —ehi yuvireco.

Ambuae evocoyase,

—Tūpa ñehe mombehusar aracahendar mo evocoi —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cūritei ocuerayevi —ehi.

¹⁷ Herodías recocuer sui tēi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese. ¹⁸ Juan aipo ehi Herodes upe: "Ndiyai eté nde errecora nde rivri rembireco" ehi.

¹⁹ Herodías evocoyase oyuca pota Juan yamotarēhisave; ndoicatu rumo yuca. ²⁰ Esepia, Herodes osiquiyeño ichui oicuase co mbia reco tupri aisa iyavei seco maranehise. Sese osepi ité; yepe ndoyembohe catui osenduse iñehe viña, ahe rumo osendu pota raiño ité. ²¹ Coiye rumo osupiti ari Herodías remimbotar apo āgua, ahese Herodes oharagüer pipe oyapo

carusa guasu mborerecuareta rese, ava Galilea pendar icuapri ivate catu yuvirecoi vahe rese avei. ²² Herodías membrí cuñatai oique carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoyase amondora ndeu —ehi.

²³ Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi. ²⁴ Ahe cuñatai osê oso, osi upe oporandu:

—¿Mbahe rese pñha aporandura chupe? —ehi.

Ichí aipo ehi chupe:

—Eporandu Juan Oporoãpiramo vahe áca rese —ehi chupe.

²⁵ Ipare cuñatai oña, oique oso mborerecuar guapisave, aipo ehi chupe:

—Che aipota co pipeve voi eremboura Juan Oporoãpiramo vahe áca poratu pipe cheu —ehi.

²⁶ Mborerecuar rumo ndoyembovíhai tēi. Esepia, ava ichohopri rovaque ité yipindar oñehe. Sese ndoicatui, “Aní” ohe água. ²⁷ Evocoyase ipare voi mborerecuar oyocuai sundao Juan áca reru água. ²⁸ Sundao oso soquendasave, oyasia Juan áca, seru poratu pipe. Mborerecuar omondo co cuñatai upe, evocoyase cuñatai omondo osi upe.

²⁹ Oyanduse Juan remimbohe, yuviraso setecuer reca. Ipare viraso yuvireco tuvípave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe. ³¹ Ahese aipo ehi oapóstol upe:

—Perio cohove, yaso, yapituhumi rane co coti —ehi.

Esepia, oyepindecuaño ité ava yugüeru chupe, sese ndiyai icaru água yuvireco. ³² Evocoyase ahe güeraño apóstol reseve yuviraso carite pipe co coti ava sui.

³³ Setá rumo ava osepia ichose. Ichui opacatu ava tecua rupindar osaquícue moñaño; ahe ranengatu oyepotapa yuvireco ichui. ³⁴ Ogüeyise rumo carite pipe sui, osepia ava rehii, ahese iparaisu ava eta chupe, inungar ovesa ndovirecoi vahe guãrosar. Ipare ombohe opacatu mbahe rese. ³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe. ³⁶ ¿Ndiyai vo eremondopa ava tecua-tecuami cõi vahesa rupi? Aheve tovirocua ocaru água yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pñha oreu doscientos denario pan repirã ava mbocarú água? —ehi.

³⁸ Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoyase omboyaho-yaho ava imboguapí capihi hari rupi. ⁴⁰ Cincuenta, cien rupi-rupi oyemboyaho yuvireco. ⁴¹ Ichui Jesús oipisi poyandepo pan, ñuvirío pira. Ipare omahe íva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo água yuvireco. Pira ñuvirío vahe avei omboyaho-yaho opacatu ava upe. ⁴² Evocoyase opacatu ava ocaru vahe ihitaropa tēi yuvireco. ⁴³ Ipare semimbohe omboapipopa doce tupri iruova pan iyavei pira rumbirer yuvireco. ⁴⁴ Cuimbahe ocaru vahe retacuer cinco mil tupri.

Jesús oguata i hari rupi

⁴⁵ Ipare Jesús, “Peha pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe. ⁴⁶ “Aviye” ohe pare ava upe, oyeupi oso ivitri rese oyeroqui água. ⁴⁷ Pñtuse carite ipa mbiterve ité secoi. Jesús rumo ahe ae opitãño ivive. ⁴⁸ Ahese omahe güemimbohe rese iyeapicui catuēhise. Esepia, ivitu ipirata vahe osovañchi yuvireco. Cõhe potase, oguata i hari rupi güemimbohe coti oso. Aviye ité acoi oñocuaño vaherã oso. ⁴⁹ Sepiase rumo ‘hãgüer tēi revó’ oya, sãse pucu-pucu i hari rupi iguatase semimbohe yuvireco. ⁵⁰ Esepia, opacatu osepiase osiquiye yuvireco ichui. Ahe rumo aipo ehi:

—¿Peyemoviracuaño, che tēi! ¿Pesiquire eme che sui! —ehi güemimbohe upe.

⁵¹ Ahe ohasa carite pipe, opituhu voi ivitu. Evocoyase, “¡Mara ehi rutei!” ehi tēi yuvireco. ⁵² Esepia, ndoicua vitei eté pan apo ati agüer yuvireco, yavai vite seroya água yuvireco chupe.

Jesús ombogüera ava imbaheasi vahe Genesaret pendar

⁵³ Osasase ipa, oyepota Genesaret ivi rese yuviraso, ahe imbehive oñapichiño carite yuvireco. ⁵⁴ Yuvinosesa ramomiseve, ava oicua voi Jesús yuvireco. ⁵⁵ Ichui opacatu ahe ivi pipendar güeru imbaheasi vahe Jesús upe yuvireco. ⁵⁶ Oyepotase que tecuamive, anise tecua guasuve, caha pipe oi-oimi rupi, ahe supi imbaheasi vahe ocar rupi yuvinosesa voi yuvireco. “Topocomi tēi nde turucuar popi rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

Mbahe omonguiha vahe ava recocuer

7 Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco. ² Ahese ahe osepia Jesús remimbohe ocaru água iyepoiēhise porocuita mboaviyeēhise yuvireco, sese oñemoiro yuvireco chupe. ³ (Esepia, fariseo iyavei opacatu judío eta arachendar recocuer sui ndipoisai eté yuvireco, sese oyepoiēhise ndocarui eté yuvireco yepi. ⁴ Mbahe rocuasa sui oyevisse, ndocarui oyepoiēhi viteseve yuvireco. Iyavei tecocuer arachendar tēi oyapo vite yuvireco inungar igua riru piisa, mbahe riru guarepochi

apopri iyavei vupa moatiro tuprisa.)⁵ Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi aracahendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.

⁶ Jesús rumo aipo ehi chupe:

—Pe Tūpa reroyasar angahu tēi peico vahe, supi tupri ité Tūpa ñehe mombehusar Isaías rembicuachía aracahendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

⁷ Oyerure tupri tēi yuvireco cheu.

Esepia, iporombohesa ava porocuita tēi’ ehi.

⁸ Ēgüe peye pepoipa Tūpa porocuita sui ava recocuer aracahendar rupi tēi pe guata āgua —ehi.

⁹ Iyavei aipo ehi iri chupe:

—Pe ramoi recocuer aracahendar pipe tēi peseyaño co coti Tūpa porocuita. ¹⁰ Esepia, Moisés aipo ehi:

‘Pembroyera iyavei peipñiviira pe ru, pe si avei no. Acoi iñehe mara vahe oyesupa upe ahe, Tomanofño, ehi’ ehi aracahe. ¹¹ Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mondo āgua pēu. Esepia, che opacatu mbahe areco vahe Tūpa upe imondopri, ahe Corbán, ehi’ peye; ¹² pe evocoyase, aipo ehi vahe upe, ‘Ndiyai eté oyesupa pñivivi āgua’ peye. ¹³ Co nungar apo pipe Tūpa porocuita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

¹⁴ Ipare, “Perio” ehi iri ava rehii upe.

—Peyapisaca, pesenducua tupri che ñehe: ¹⁵ Ndahei ocar sui tēi ou ava recocuer monguiha āgua. Ahe rumo osē ipiha sui. ¹⁶ Acoi osendu pota vahe che ñehe, toyapisacaño sese —ehi.

¹⁷ Ipare oseyapase ava, oique oi pipe. Aheve semimbohe eta oporandu yuvireco co porombohesa omombehu vahe rese chupe. ¹⁸ Ahe evocoyase aipo ehi güemimbohe upe:

—Evocoyase pe avei no, ¿ndapesenducuai? ¿Ndapeicuai vo acoi ocar sui oique vahe ava aviterve nomboangaipai eté? ¹⁹ Esepia niha, ndahei ipihave oso, ahe rumo oso yaviterve. Ipare osē ichui —ehi ‘opacatu tembihu aviyeño ité’ oyapave aipo ehi.

²⁰ Ipare aipo ehi:

—Ava piha sui osē vahe rumo mbahe, ahe omonguiha ava recocuer. ²¹ Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa, ²² mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa nihivi vahe. ²³ Co mbahe opacatu naporai vahe yuvinose ava sui imboangaipa uca āgua —ehi.

Cuña ndahei vahe judía viroya Jesús

²⁴ Ichui Jesús osē oso tecua Tiro coti. Aheve oique oi pipe, ndoyecua uca potai ava upe viña; ndoicatui rumo

ava sui oñemi. ²⁵ Oime cuña vireco vahe omembri cuñatai, ahe vireco carugar oyese; ahe cuña oicuaese Jesús recosa, oso voi sovai oñenopiha. ²⁶ Ahe rumo ndahei judía, sirofenicia iguar ité. Ahe aipo ehi Jesús upe: “Enose che membri sui carugar” ehi. ²⁷ Jesús rumo aipo ehi chupe:

—Tahir judío rane toipisi mbahe yuvireco. Esepia, naporai yarocua pan tahir sui cave tohu imondo āgua —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

²⁹ Aipo ihese, aipo ehi:

—Aviye ité nde ñehe. Eyevi eso. Carugar osē nde membri sui —ehi chupe.

³⁰ Co cuña oyepotase güētave, osepia omembri supave; yipive rumo osē carugar ichui.

Jesús ombogüera mbia ndayapisai, iñehe ipiti-piti vahe

³¹ Jesús oyevi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve. ³² Aheve mbia ndayapisai, iñehe ipiti-piti vahe rerasosar: “Emondomi tēi nde po iharive” ehi yuvireco chupe. ³³ Ichui Jesús viraso coi cotimi ava sui. Aheve ocuã omonde yapisa pipe. Ipare omondo güendi ñapecu rese. ³⁴ Ipare omahe iva rese, ipñitue pucu aipo ehi: “¡Efata!” ehi (‘timboisa’ ohesave aipo ehi).

³⁵ Ahe pipeve voi yapisa tupri, oñehe tupri avei.

³⁶ “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco. ³⁷ Evocoyase ava oyemboviha guasusave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, iñehe ipiti-piti vahe avei omoñhengatu tupri!” ehi yuvireco.

Jesús oyopoi cuatro mil cuimbahe

8 Ñepeí arí pipe setá ava oyemboya iri Jesús rese yuvireco. Ndipoi rumo mbahe icaru āgua. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapi arí yuvirecoi yande piri, iyavei ndipoi eté mbahe semihura. ³ Amondopase sētave sieporēhi reseve, viroviapi-api tiētera tieporēhi peri rupi yuvireco viña. Esepia, setami ava yugüeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo cohava porēhisave? —ehi.

⁵ Ahe oporandu:

—¿Mbovi vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoyase, “Peguapi ivi harive” ehi ava rehii upe. Ahese oipisi siete pan, “Aviye ndeu” ehi Tūpa upe. Ichui omboyaho-yaho pan imondo güemimbohe upe, semibohe evocoyase omondo ava rehii upe yuvireco.

⁷ Iyavei vireco moviro pirami yuvireco, sese avei, “Aviye

ndeú" ehi iri Tūpa upe. Ichui güemimbohe upe, "Pemboyaho-yaho ava upe" ehi. ⁸ Opacatu ité ava ocaru vahe ihītaru yuvireco. Ipare rumo semimbohe omboapipo iri rane sumbirer siete iruova yuvireco. ⁹ Ava rehī ocaru vahe retacuer cuatro mil tupri. Ipare Jesús, "Aviye, peso tupri" ehi ava upe. ¹⁰ Ipare voi eté yuvirasu güemimbohe eta reseve carite pipe Dalmanuta ivi rese.

Fariseo eta oporandu poromondiisa rese yuvireco

¹¹ Ipare fariseo eta oyepota Jesús ñehe poepi-epi āgua yuvireco. Jesús recoāha āgua, oporandu iva pendar poromondiisa rese '¿Tūpa sui eté pīha ou?' oya yuvireco chupe. ¹² Sese Jesús ipītuhe pucu, aipo ehi:

—¡Mahera vo co ava oipota iva pendar poromondiisa che recocuer cua āgua yuvireco! Namboyecuai chiteera rumo que ñepei evocoi nungar mbahe pēu —ehi.

¹³ Ipare oseyapaño ava. Ichui yuviroha iri carite pipe, osasapa ipa yuvirasu sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeimi tēi pan vīraso güemihura yuvireco. ¹⁵ Evocoiyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: "Pan ndayarui revo aipo ehi yandeu" ehi-ehi tēi oyeupe yuvireco.

¹⁷ Ahe rumo oicua güemimbohe pīhañemoñetasa, aipo ehi:

—¿Mahera, "Pan ndayarui" peye? ¿Ndapeicua vitei vo che rembiapo? ¿Yavai vite tie seroya āgua pēu? ¹⁸ Oime tēi pe resa, ndapesepiai rumo; oime tēi pe nambi, ndapesendui rumo mbahe. ¿Ndapeyemomahenduha iri vo ¹⁹ acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

²⁰ —Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

²¹ Ipare aipo ehi:

—¿Ndapesenducua vitei vo? —ehi güemimbohe upe.

Jesús ombogüera ava ndasesapisoi vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasesapisoi vahe yuvireco chupe 'epocomi tēi sese' oya yuvireco. ²³ Evocoiyase oipopisi ndasesapisoi vahe seraso co cotimi tecua sui. Aheve omondo güendi sesa rese, omondo avei opo iharive. Ipare oporandu chupe: "¿Eresepia vo mbahe?" ehi. ²⁴ Ndasapisoi vahe omahese, aipo ehi:

—Asepia ava inungar ivira oguata vahe yuvireco —ehi.

²⁵ Evocoiyase omondo iri opo sesa rese. Ipare co mbia omahe tupri ité cute, ocuera ité, opacatu mbahe osepia tupri. ²⁶ Ichui Jesús omondo sētave aipo ehi chupe:

—Ereyevi iri eme tecuave —ehi.

Pedro oicua uca Jesús Tūpa Rembiporavo seco rese

²⁷ Ipare yuvirasu Jesús güemimbohe reseve ivi Galilea sui tecua Cesarea coti, Filipino ivi rese. Peri rupi oporandu güemimbohe upe:

—¿Mara ehi vo ava oñehe yuvireco che rese? —ehi.

²⁸ Semimbohe evocoiyase omboyevi yuvireco chupe: —Amove ava, "Juan Oporoāpiramo vahe" ehi yuvireco ndeu; ambuae evocoiyase, "Elías" ehi; ambuae, "Tūpa ñehe mombehúsar mboetasa" ehi yuvireco ndeu —ehi.

²⁹ Evocoiyase oporandu iri güemimbohe upe:

—Pe no, ¿ava, "Co secoi" peye ru pe cheu no? —ehi.

Pedro evocoiyase aipo ehi chupe:

—Nde niha Tūpa Rembiporavo Poropširosar ereico —ehi.

³⁰ Jesús rumo, "Pemombehui rene que ñepei ava upe" ehi.

Jesús omombehu omano āgua

³¹ Evocoiyase Jesús omboipi oporombohe: "Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuita rese oporombohe vahe remiamotarēhi aicora. Ahe avei che yuca ucara yuvireco. Acuerayevira rumo mbosapi ari rupi" ehi. ³² Ahe omboyecua tupri ité chupe. Evocoiyase Pedro vīraso co cotimi chupe oñehengata āgua. ³³ Oyemboyere rumo, omahe güemimbohe eta rese, oñehengata Pedro upe aipo ehi:

—¡Esiri che sui, Carugar! Esepia, nde nandepīhañemoñetai mbahe Tūpa upendar rese; ava nungar tēi nde pīhañemoñeta eico —ehi.

³⁴ Evocoiyase Jesús, "Perio" ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosiira viña, toyemoingatu voi che recocuer rese oparaisu āgua iyavei toguata tupri che rupi. ³⁵ Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisiora.

³⁶ ¿Aviye ai angahu pīha ava upe opacatu mbahe ivi pipendar pisi āgua tēi, ahe ae tēi omocañi güecocuer yuvireco viña? ³⁷ ¿Mbovi pīha omondora ava güecocuer repirā viña? ³⁸ Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tupri vahe rovai, che avei, Ava Riquehir, ēgüe ahera acoi ayevise che Ru reco pīrata porañetasa pipe, sembuguai rehī iva pendar maranehi reseve curi —ehi.

9 Ipare Jesús aipo ehi iri:

—Supi eté, oimera amove cohava ava nomano vitei chivaherã, osepia rane itera ouse Tüpa mborerecuasa ipĩratasa pipe yuvireco curi —ehi.

Jesús ñecuñaro agüer

² Seis arí pare, Jesús viraso Pedro, Santiago, Juan reseve ivitri ivate vahesave oyeupi. Aheve aviyeteramo tēi oñecuñaro güemimbohe rovai. ³ Iturucuar sendí, morochí eteanga. Ndipoi eté que ava co nungar co ivi pipe turucuar oyosei vahe. ⁴ Iyavei aviyeteramo tēi oyemboyecua Elías, Moisés reseve Jesús rese oñemoñeta yuvinoha. ⁵ Ipare Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

⁶ Osiquiye tēi semimbohe yuvireco. Sese Pedro ndoicuaise oñehe ãgua, aipo ehiño tēi. ⁷ Ahe ramoseve avei ogüeyi iva quiha iharive, oyopipa tupri yuvireco. Ahe ipãhuve oyeendu ñehesa aipo ehi vahe: “Co che Rahir, che rembiaisu; peyapisaca catu iñehe rese” ehi vahe. ⁸ Ahe ramoseve avei omahese oivii yuvireco, ndosepia eté que ambuae ava, Jesús güeraño tupri ité osepia opãhuve yuvireco.

⁹ Ipare ogüeyi ivitri sui yuvireco, aipo ehi güemimbohe upe ou: “Ndapemombehui chietera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi” ehi. ¹⁰ Oyeupeño mi tēi vireco aipo ñehesa yuvireco, ahe rumo oporandu-randu oyeupe: “¿Mara oya pĩha aipo, ‘Acuerayevira’ ehise?” ehi tēi yuvireco. ¹¹ Evocoyase semimbohe oporandu chupe:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoyase aipo ehi chupe:

—Elías rane ité niha oura opacatu mbahe moingatu ãgua. ¿Mahera aracahendar icuachiapri pipe aipo ehi: “Ava Riquehir oiporarara mbahe, yamotarēhimbrí avei secoira” ehi? ¹³ Che niha aipo ahe pēu: Elías rumo ou ité, ava evocoyase opacatu güemimbotar tēi oyapo yuvireco sese. Ēgüe ehi opacatu yaviye aracahendar icuachiapirer sese —ehi.

Jesús ombogüera chĩhivahe carugar rerecosar

¹⁴ Ipare oyevi yuvireco güemimbohe recosave. Aheve osepia ava rehii oyere guasuse yuvireco sese, iyavei oime aheve Moisés porocuita rese oporombohe vahe oñehopoepi-epi semimbohe yuvireco. ¹⁵ Ichui Jesús repiase, opacatu yuvinoña yuviraso chupe “avirave” apo. ¹⁶ Evocoyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepeí ipãhu pendar omboyevi chupe:

—Porombohesar, co aru che rahir ndeu, vireco vahe carugar oyese, nomoñehengatu ucai vahe yepi.

¹⁸ Iyavei que iguatasu rupi co carugar aviyeteramo tēi opocose sese, oitĩ voi ivive iyavei sendiriyuiyusu, säitere-tere avei; sese cūritei nipirata iri eté. “Penose-

mi carugar ichui” ahe tēi nde remimbohe eta upe. Ahe rumo ndoicatui eté yuvireco —ehi.

¹⁹ Jesús omboyevi chupe:

—¡Too, ndapeyeroya tupri vitei eté che rese! ¿Mbovi rupi rutei vo aico vitera pe pãhuve che ñemosasa pipe? Peru evocoi chĩhivahe cheu —ehi.

²⁰ Evocoyase ogüeru yuvireco chupe. Osepia carugar Jesús, oitĩ uca iri chĩhivahe ivive. Omboapayere-yere iyavei sendiriyui guasu-guasú. ²¹ Sese oporandu tu upe:

—¿Mbahese vo na ehi chupe? —ehi.

Tu evocoyase aipo ehi:

—Ichĩhivahemi suive ité. ²² Amove co carugar oitĩ uca tatave, ive avei yuca pota uca ãgua yepi. Sese erecatuse, ore pĩtiviiñomi tēi catu eve ore paraisuere-cosave —ehi.

²³ Jesús aipo ehi chupe:

—¡Mahera, “Erecatuse” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che pĩtivii ru eve nde reroya catu ãgua! —ehi pĩrata chupe.

²⁵ Osepiase Jesús ava rehii, oyemboyase sese, oñehe pĩrata carugar upe aipo ehi:

—Carugar noñehei vahe, ndayapisai vahe, che orocuai, epoi co chĩhivahe sui, ereique iri eme secocuer rese —ehi.

²⁶ Carugar sãse pucu chĩhivahe yuca tupri oso.

“Omano ité co chĩhivahe” ehi ambuae ava yuvireco.

²⁷ Jesús rumo oipopisi imopuha; evocoyase chĩhivahe opũha tupri voi eté.

²⁸ Ichui oi que oi pipe. Aheve semimbohe ahe aemi oporandu yuvireco chupe:

—¿Mahera pĩha ndoromose catui eté carugar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar carugar yaicatu imombo —ehi.

Jesús omombehu iri omano ãgua

³⁰ Ichui yuvinosepase, yuviraso ivi Galilea rupi. Jesús rumo ndoyemboyecua uca potai eté que ambuae ava upe. ³¹ Esepia, güemimbohe güeraño ité ombohe aipo ehi:

—Che, Ava Riquehir, imondopri aicora che amotarēhimbar povrive, che yuca aveira yuvireco, mbosapi arí rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu ãgua yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroquese oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

³⁴ Ahe rumo noñehei tupri yuvireco chupe. Esepia, perĩ rupi, “¿Ava pñha ivate catu vahe?” ehi asi-asi oyeupe yuvireco. ³⁵ Evocoyase oguapisave, “Periopa” ehi güemimbohe upe, aipo ehi avei:

—Oimese pe pñhu pendar oyemboivate ai vahe, ahe rumo seco ivi coti catura opacatu sui ava eta pñtivii ãgua —ehi.

³⁶ Ipare oipisi chñhivahe güemimbohe pñhuve seno- aipo ehi:

³⁷ —Acoi ava oipisi vahe co chñhivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

Acoi ndahei vahe yande amotarẽhimbar, ahe yande mboyoyasar secoi

³⁸ Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe carugar. Ahe rumo ndoguatai cüritei ore rupi; ore ité ndoroipotai chupe —ehi.

³⁹ Jesús rumo,

—Aní ãgüe peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vaheñã oñehe rai che rese. ⁴⁰ Sese ndayande amotarẽhii vahe, ahe yande mboyoyasar secoi. ⁴¹ Acoi que omondo vahe i vaso pipe che rupi pe recosa pipe pñu, evocoi nungar oipisi itera porrecosa oyeupe nara —ehi.

Yaicua catura mbahe tñi apoẽhi ãgua

⁴² “Acoi que ava omboangaipa uca vahe co chñhivahe- mi nungar che reroyasar, iyacatu evocoi nungar ñapichisa ita mbahe mbocuhisa iyesho rese para guasu pipe imombo ãgua. ⁴³ Sese pe po pe mboangaipa uca vahe peyasia ité peyesui. Esepia, aviye catu peiquera tecove apirẽhisave ñepepe po rese, peso rãgüer sui que ñuvirio pe po rese tata guasu apirẽhisave. ⁴⁴ Aheve acoi uru nomanoi vahe, tata ndogüei vahe avei. ⁴⁵ Pe pi pe mboangaipa ucase, peyasia avei peyesui. Esepia, aviye catu ndape pindugüei peique tecovesave, que ñuvirio pe pi rese peique rãgüer sui tata guasu ndopai vahesave.

⁴⁶ Aheve acoi uru nomanoi vahe, tata ndogüei vahe avei. ⁴⁷ Pe resa avei pe mboangaipa ucase, penose ité peyesui. Esepia, aviye catu peique ñepepe pe resa rese Tupa mborerecuasave que ñuvirio pe resa rese tata guasu apirẽhisave pe reique rãgüer sui. ⁴⁸ Aheve acoi uru nomanoi vahe, tata ndogüei vahe avei.

⁴⁹ “Esepia, opacatu ava imoehesara tata nungar pipe. ⁵⁰ Sese yucri aviye ai eté. Nasehe irise rumo, ndayaicatu chira imoehi iri ãgua. Peico catu yucri nungar mbahe tupri pipe peyeupe nara” ehi.

Jesús oporombohe mendasa sui poiẽhi ãgua

10 Ipare Jesús osẽ tecua Capernaum sui, oso Judea ivi rupi ñai Jordán rovai arĩ sãsa coti. Aheve ava rehii oñemonuha iri yuvireco sese. Iyavei ombohe iri

ava güecocuer rupi tupri. ² Evocoyase fariseo oyemboya seco rãha ãgua tñi yuvireco sese, “¿Aviye pñha cuimbahe omenda vahe opoi güembireco sui?” ehi yuvireco chupe. ³ Ahe rumo omboyeve chupe:

—¿Mara ehi vo acoi Moisés porocuita pipe? —ehi.

⁴ Ahe evocoyase omboyeve yuvireco chupe:

—Moisés remimombehu aipo ehi: “Pemondora pe rebireco upe cuachiar poisa resendar pe poi ãgua pe rebireco sui” ehi —ehi fariseo yuvireco chupe.

⁵ Evocoyase fariseo upe aipo ehi:

—Moisés omondo co porocuita pe poreroaẽhisa pipe sui pñu. ⁶ Yipisuive ité niha, ‘Tupa oyapo opacatu mbahe, oyapo avei cuimbahe, cuña reseve. ⁷ Sese niha cuimbahe omendase, oyepepira oyesupa sui güembireco rese ité yuvirecoi ãgua. ⁸ Evocoyase ñuvirio yuvirecoira ñepepe ava nungar.’ Sese ndahe iri ñuvirio, ñepepe nungar ité yuvirecoira. ⁹ Evocoyase ava Tupa omomenda vahe oyese, ndiyai ava tñi omboyepepe yuvireco oyesui —ehi.

¹⁰ Oive yuvirecoi vitesese, semimbohe oporandu iri co mbahe rese yuvireco chupe. ¹¹ Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tñi vahe güembireco sui.

¹² Acoi cuña oprise omer sui omendase ambuae cuimbahe rese, ahe oyemboaguasa tñi vahe avei —ehi güemimbohe upe.

Jesús osovasa chñhivahe

¹³ Ipare ogüeru chñhivahe Jesús upe yuvireco sese ipoco ãgua. Semimbohe rumo, “¿Mahera vo peruño tñi chñhivahe?” ehi opñha vñracuasa pipe serusar upe yuvireco. ¹⁴ Evocoyase Jesús osepiase, ndasorii güemimbohe upe aipo ehi:

—¡Mahera ndapeipotai iyu ãgua! Toyugüeruño chñhivahe cheu. Esepia, co chñhivahe nungar ava yuviroiquera che Ru Tupa mborerecuasave. ¹⁵ Supi eté, acoi ndoipisii vahe che Ru Tupa mborerecuasa chñhivahe nungar yuvireco, ahe evocoyase ndoyuviroiquei chietera ipipe —ehi.

¹⁶ Evocoyase oipisi, omondo opo iharive osovasa.

Ñepepe mbia chñhivahe imbahe eta vahe oñehe Jesús upe

¹⁷ Oguata vitesese Jesús yuvireco, aheseve mbia chñhivahe oña oso sovaí, oñenopiha, oporandu chupe:

—Porombohesar aviye vahe, ¿mbahe vo ayapora tecovesa apirẽhi vahe rereco ãgua? —ehi.

¹⁸ Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepepe aviye vahe ité, ahe Tupa secoi. ¹⁹ Ereicua niha Tupa porocuita: ‘Ndereporoyuca chira, nandeaguasai chira, nanderemirai chira ambuae ava rese, ndereporombopai chira, eremboyeroyara nde ru, nde si avei’ ehi vahe —ehi.

²⁰ Ahe mbia rumo,

—Porombohesar, che aipo nungar opacatu amboaviye ité che chíhivahe suive —ehi.

²¹ Evocoyase omahe saiskusave sese, aipo ehi chupe:

—Ñepei mbahe rumo ipane vite ndeu: eso, emondopa rane nde mbahe; ahe seprí evocoyase emondo ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharēhisave oso. Esepia, ahe mbahe yar ité secoi.

²³ Evocoyase omahe oiviindar güemimbohe rese, aipo ehi:

—¡Yavai eté rumo ava mbahe yar reique ãgua che Ru Tüpa mborerecuasave! —ehi.

²⁴ Semimbohe evocoyase, “¡Mara ehi rutei!” ehi tēi iñehe renduse yuvireco. Ahe rumo omombehu iri:

—Che rahireta, ¡yavai eté Tüpa mborerecuasave imbahe eta vahe reique ãgua ombahe eta rese tēi ipihañemoñeta vahe upe! ²⁵ Yavai rai camello upe yucuar rupi seique ãgua, ava imbahe eta vahe upe rumo yavai catu che Ru mborerecuasave seique ãgua —ehi.

²⁶ Aipo nungar renduse oyepihamondii guasu yuvireco. Oporandu-randu tēi oyeupe yuvireco: “¿Ava angahu pñha oñepisírorra yuvireco viña?” ehi.

²⁷ Evocoyase omahe güemimbohe rese aipo ehi:

—Ava tēi upe rumo yavai aipo nungar mbahe apo ãgua; Tüpa upe rumo ndayavaimi eté. Esepia, Tüpa opacatu mbahe mboavaisarēhi secoi —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata ãgua —ehi chupe.

²⁹ Omboyeví rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisírosa raisusa pipe oseypa vahe güēta, viquehir, vivri, güeindri, vu, osí, guahir iyavei oivi, ³⁰ ahe oipisira omahera co ivi pipe cien yupagüer rupi avei oi, vivri, güeindri, osí, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi.

³¹ Setá vai rumo cūrítei yipindar vahe; ipa tēira yuvirecoi. Setá aveira cūrítei ipa tēi vahe, yipindar yuvirecoira curi —ehi.

Jesús omombehu imombosapisa rupi omano ãgua

³² Yuvirasose Jerusalén ve, Jesús tenonde secoi güemimbohe upe. Semimbohe rumo ndoyembovihal iyavei saquicuerindar osíquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime ãgua chupe aipo ehi: ³³ “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco.

³⁴ Mara ehi-ehi tēira yuvireco cheu, ondívi-ndívira, oyuvirocu-rocuara che rese, che yuca aveira yuvireco. Mbosapi arí rupi rumo acuerayevira” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

³⁶ Ahe evocoyase,

—¿Mbahe vo peipota ayapo vaheerã pēu? —ehi chupe.

³⁷ —Ore oroipota nde mborerecuva porañetesave ore mboguapira ndeyepiri eve, ñepei nde mbahe rese pocosa coti, ambuae nde mbahe rese pocoēhisa coti —ehi yuvireco chupe.

³⁸ Evocoyase omboyeví:

—Pe ndapeicuai mbahe rese pe porandu. ¿Peiporara catura pñha che co mbahe-mbahe tēi aiporara vaheerã, inungar-ra que igua iro vahe aihu vaheerã viña? Iyavei, ¿peicatura pñha che ãpiramosa aipisi vaheerã pisi? —ehi.

³⁹ —Taa, oroicatuño itera —ehi yuvireco.

Evocoyase ahe aipo ehi chupe:

—Supi eté peihura co mbahe iro vahe, peipisi aveira ãpiramosa che aipisi vaheerã nungar. ⁴⁰ Co rumo ndiyai cheu che piri pe guapi ãgua, che mbahe rese pocosa coti, ambuae che mbahe rese pocoēhisa coti. Che Ru Tüpa omoingatu güembiporavo upe nara oguapi vaheerã che ipive —ehi.

⁴¹ Evocoyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco. ⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tüpa cuaparēhi oporocuai oporoyuca ai tēisa pipe. Iyavei acoi ivate catu vahe oyeecoapirasá iteanga omborerecuasa pipe yepi. ⁴³ Pe rumo ēgüe ndapeyei chira pe yeereco. Iyacatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese. ⁴⁴ Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese. ⁴⁵ Aherã niha che, Ava Riquehir, ayu ndahei ava che rese ihañeco ãgua; che rumo ayu ava rese che hañeco ãgua, iyavei amondo vaheerã che recocuer manosave ava eta repirã Carugar povri sui senose ãgua —ehi.

Jesús ombogüera Bartimeo sesapisoēhisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehii avei, aheve peri popive mbia ndasesapiso vahe Bartimeo serer vahe, Timoteo rahir, oguapi oi. ⁴⁷ Osenduse, “Jesús Nazaret pendar” hesa, osapucai pñrata:

—¡Jesús, David suindar, che paraisuerecomi tēi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo,

—¿David suindar, che paraisuerecomi tēi eve! —ehi pĩrataño ité chupe.

⁴⁹ Evocoyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemonguerēhi, epũha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opũha yesapiha oso chupe. ⁵¹ Evocoyase oporandu ndasesapiso vahe upe:

—¿Mbahe vo ereipota ayapo vahe rã ndeu? —ehi.

Ahe evocoyase,

—Porombohesar, che mbosarecomi tēira eve viña —ehi.

⁵² Evocoyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapiso vahe osareco tupri ité. Ipare osoño ité Jesús raquicuei peri rupi.

Jesús oique Jerusalén pipe

11 Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ñipiimi. Aheve Jesús omondo ñuvirío güemimbohe, ² aipo ehi chupe:

—Peso evocoi tecuami yande rovaindarve. Peyepotase aheve, pesepiara guaricu ñapichimbri imoha, ava ndoyeupi vitei vahe yuvireco sese, ahe peyorañora seru. ³ Acoi que ava: “¿Mahera vo ěgüe peye?” ehise pëu, “Ore Yar oiporu pota, ipare niha omboyevi voiñora” peyera chupe —ehi.

⁴ Evocoyase ahe yuviraso peri rupi. Aheve guaricu ñapichimbri osepia imoha yuvireco oquendipive. Ichui oyoraño seru yuvireco.

⁵ Evocoyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohesa rupi tupri ité omboyevi yuvireco chupe. Evocoyase, “Tovirasoño” ehi yuvireco chupe. ⁷ Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive. ⁸ Setá ava oipipira oturucuar peri rupi, ambuae ava evocoyase oyasia pindo omondo peri rupi saperã yuvireco. ⁹ Ava senonendar, saquicuerindar avei,

—¿Imboeteipri, sovasapri tasecoi ou vahe yande Yar rer pipe! —ehi pĩrata yuvireco chupe—. ¹⁰ ¿Sovasapri yande ramoi David mborerecuasa tasecoi ou vahe oico! ¿Ivave imboeteipri tasecoi! —ehi yuvireco chupe.

¹¹ Ęgüe ehi Jesús oiquese Jerusalén ve. Ipare oique tũparo pipe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

¹² Ahere ayihive, yuvinosese Jesús tecua Betania sui, ndasiepoi oico. ¹³ Osepia amombri ivira higuera so atĩ vahe, oso chupe ‘¿iha pĩha?’ oyapave. Ahe rumo os-

epia so pãve tēi sese. Esepia, ahe ivira upe ndosupiti vitei iha āgua. ¹⁴ Evocoyase aipo ehi ahe ivira upe:

—¿Co pipe suive ndipo iri chira ava nde ha yuvirohu vahe rã! —ehi.

Semimbohe osendu iñehe yuvireco.

Jesús omombopa ava mbahe mboepisar tũparo pipe sui

¹⁵ Ipare oyepota Jerusalén ve yuvireco. Aheve Jesús oiquese judío tũparo guasu pipe, omboipi ava mbahe mondosar, mbahe rerocuar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei omboviapi imondo. ¹⁶ Ndoipotai eté que ambuae mbahe seroquepirã tũparo pipe. ¹⁷ Ipare oporombohe aipo ehi:

—Icuachiapri aracahendar pipe aipo ehi: ‘Co che rēta yeruresa rētarã opacatu ava ivi pipendar uve nara’ ehi. Pe rumo imonda rai vahe rēta nungar tēi pereco —ehi.

¹⁸ Pahi eta rerecuar iyavei oporombohe vahe Moisés porocuita rese osenduse, “¿Mara yahera pĩha sereco yuca uca āgua?” ehi voi yuvireco chupe. Osiquiye rumo opacatu ava sui. Esepia, ahe ndoyembovahi iporombohesa rese yuvireco. ¹⁹ Pĩtu ramomise, Jesús yuvinose güemimbohe eta reseve yuviraso ahe tecua sui.

Ivira higuera ndihai vahe ipiru

²⁰ Ahere ayihive, añihiveive yuvirasose, osepia ivira higuera sapo suive ipirupa vahe yuvireco. ²¹ Evocoyase Pedro oyemomahenduha voi iñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoyase,

—Peyeroya Tũpa rese —ehi—. ²³ Supi eté aipo ahe pëu: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo hesa rese, ěgüe ehi etera chupe. ²⁴ Sese aipo ahe pëu: opacatu que mbahe rese peporanduse pe yeroquisa pipe, peyeroya itera mbahe oime vahe rã rese pëu, ahese peipisi itera. ²⁵ Acoi peyeroquise, yipindar peñero rane que pe amotarēhimbar upe, ahese ěgüe ehi aveira pe Ru iva pendar iñero pe angaipa rese pëu. ²⁶ Ęgüe ndapeyeise, pe Ru iva pendar avei niñeroi chira pe angaipa rese pëu —ehi.

Jesús mborerecuasa

²⁷ Ipare oyevei Jerusalén ve yuvireco. Aheve Jesús sec-oise judío tũparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese. ²⁸ Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu co nungar apo āgua? —ehi yuvireco chupe.

²⁹ Evocoyase omboyevi chupe:

—Che avei aporandura mbahe rese pëu: ¿Ava vo Juan ombou ava äpiramo ägua; Tüpa pïha, ava tēi tie? Pemboyevisse cheu, ahese che avei amombeura pëu ava porocuita rupi eté pïha ayapo co mbahe vichico —ehi.

³¹ Evocoyase oñemoñeta aipo ehi oyeupe yuvireco: “Tüpa ombou’ yahese chupe viña, ahe evocoyase: ‘¿Mahera ru ndaperoyai?’ ehira yandeu. ³² ‘Ava tēi remimbou’ ndayahei chiaveira chupe” ehi. Ahe osiquiye tēi ambuae ava sui yuvireco. Esepia, opacatu ité oicua Juan oñehe Tüpa suindar ñehesa rese yepi.

³³ Evocoyase omboyevi chupe yuvireco:

—Ndroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

Ava mbahe tēi oporaviqui vahe recocuer sui yembohesa

12 Evocoyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose ägua. Oyapo avei oi ivate vahe opacatu mbahe moha ägua. Ipare oseya oivi ava oporaviqui vahe upe iporu ägua. Ichui osē, oso amombri vahesa rupi. ² Oyepotase ari uva pohosa, ahese omondo güembigui oporaviqui vahe upe imboporandu ‘tomboumi uva pohopri cheundar cheu cute’ oyapave viña. ³ Ahe rumo oipisiño, inupa-nupa imboyevi tupri tēi yuvireco. ⁴ Evocoyase ahe ivi yar omondo iri ambuae güembigui. Ahe oyapicha-pichaño ñaca rupi, iñehe mara-mara tēiño avei yuvireco chupe. ⁵ Ipare omondo iri ambuae. Ahe oyucaño yuvireco. Ichui omondo ati iri tēi. Ahe ipãhu pendar rese yuvirocuarocuaño yuvireco, oyucaño avei ambuae yuvireco.

⁶ “Iyavei ñepepi opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña. ⁷ Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara päve topita co ivi’ ehi yuvireco. ⁸ Ichui oipisi, oyucaño yuvireco. Ipare ovinose sehögüer ahe miti sui co coti yuvireco.

⁹ “¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

¹⁰ “¿Ndapeyeroqui vo pe co icuachiapri pipe? Aipo ehi niha acoi:

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri ägua.

¹¹ Ëgüe ehi niha yande Yar yapo.

¡Mara ehi rutei revol’ ehi icuachiapri pipe” ehi.

¹² Evocoyase oviraso pota voi Jesús soquenda ägua yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

Fariseo osecoñha iri tēi Jesús guarepochi rese yuvireco

¹³ Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe. ¹⁴ Ahe yuviraso chupe aipo ehi:

—Porombohesar, ore orocua nde supi eté vahe mbahe eremombeu eico, nde niha ndereroyai vahe ava ñehesa tēi. Esepia, “Ëgüe ehi co mbia” nderei eté ava upe iyavei ereporombohe mbahe supi tupri vahe Tüpa remibotar apo ägua rese. ¿Aviyera pïha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁵ Oicua ité rumo fariseo pïhañhisa, sese aipo ehi voi chupe:

—¿Mahera che moingue pota mbahe tēi pipe peye? Peru evocoyase ñepepi guarepochi cheu, tasepia —ehi.

¹⁶ Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoyase aipo ehi fariseo upe:

—Pemondora mborerecuar upe mbahe chupendar; Tüpa upendar mbahe evocoyase pemondora Tüpa upe —ehi.

Evocoyase oyepihamondi tēi aipo oyeupe hese yuvireco.

Saduceo oporandu Jesús upe cuerayevisa rese secoñhasave

¹⁸ Evocoyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

¹⁹ —Porombohesar, Moisés niha oseya güembicuachiagüer yandeu aipo ehi: “Que cuimbahe omen-da vahe omanose guahiñhiseve, tivri evocoyase omendara sembirecocuer rese ahe viquehir omano vahecuer upe nara tahir a oico.” ²⁰ Oime siete tupri oyesuindar päve yuvirecoi vahe. Yipindar vahe omenda. Ichui omanoño, ndatahii eté rumo. ²¹ Ipare tivri omen-da viquehir rembirecocuer rese. Ahe rumo omanoño, ndatahii avei rumo. Ëgüe ehi tupri avei tivri imombosapisa. ²² Ëgüe ehi co siete tupri omenda ahe cuña rese, ndatahii eté rumo yuvireco. Coiye rumo cuña omano avei no. ²³ Evocoyase opase ocuerayevi yuvireco, ¿uma rembireco itera pïha? Esepia niha, siete tupri ité omenda tēi yuvireco sese —ehi yuvireco chupe.

²⁴ Evocoyase Jesús omboyevi chupe:

—Pe pïhañemoñeta pipe peyavi. Esepia, ndapeicuai eté Tüpa ñehe icuachiapri aracahendar, ndapeicuai avei Tüpa pïratasa. ²⁵ Supi eté omano vahe ocuerayevise, chupe ndipo iri chira mendasa. Ahe rumo Tüpa rembiguai iba pendar nungar yuvirecoira ivave.

²⁶ Co cuerayevisa resendar rumo amombeura pëu:

aviye ndapeyeroquii anga vahe Moisés rembicuachi-agüer pipe, acoi caha rese sendi guasu vahe aviterve Tüpa aipo ehise chupe: 'Che Abraham, Isaac, iyavei Jacob Tüpa aico' ehi vahe. ²⁷ ¡Tüpa ndahei omano vahecuer Tüpa! ¡Ahe rumo oicove vahe Tüpa secoi! Sese pe pihañemoñeta pipe peyavi —ehi saduceo yuvirecoi vahe upe.

Porocuita aviye catu vahe

²⁸ Ñepeí Moisés porocuita rese oporombohe vahe osendu iñehe pĩratase oyeupe yuvireco, oicua avei Jesús omboyevi tuprise iñehe yuvireco chupe, evo-coiyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

²⁹ Jesús omboyevi chupe:

—Yipindar mborocuita aviye catu vahe aipo ehi: 'Pensendu Israel: yande Yar Tüpa aheño ité ñepeí yande Yar secoi. ³⁰ Eresaisura nde Yar Tüpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pĩratasa pipe' ehi.

³¹ Iyavei imoñuviriosa porocuita ahe co: 'Eresaisura ambuae ava nde yeaisu nungar' ehi. Ndipo iri ambuae porocuita aviye catu vahe co sui —ehi.

³² Evocoyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepeí Tüpa iyavei ndipoi eté ambuae. ³³ Iyavei yasaisura Tüpa opacatu yande pihá pipe, opacatu yande yapisacasa pipe, opacatu yande pĩratasa pipe, iyavei yasaisura ava yande yeaisu nungar. Ahe ité aviye catu mbahe seropovêhepri sui iyavei opacatu porerecosa sapipri tēi sui —ehi.

³⁴ Evocoyase Jesús icuase co ava pihañemoñeta tuprisa, aipo ehi chupe:

—Namombriimi ereico Tüpa mborerecuasa sui —ehi. Ipare ndipo iri oyemonguerēhi vahe oporandu vaheherã mbahe rese yuvireco chupe.

¿Ava suindar pĩha Poropĩsiosar?

³⁵ Jesús oporombohese tũparo pipe aipo ehi:

—¿Mahera ru Moisés porocuita rese oporombohe vahe: "Poropĩsiosar David suindar ité" ehi yuvireco?

³⁶ Esepia, David ité aipo ehi Espĩritu Santo pĩratasa pipe:

'Yar aipo ehi che Yar upe:

Eguapi che acato coti, acoi che amondose voi eté nde amotarēhimbar nde povrive yuvireco' ehi David aracahe. ³⁷ ¿Mahera ru, "Poropĩsiosar David suindar secoira" peye, David teieté, "Che Yar" ehise chupe? —ehi.

Ava rehii oquerēhisave ité osendu Jesús ñehe yuvireco.

Jesús oicua uca Moisés porocuita rese oporombohe vahe recocuerai

³⁸ Jesús aipo ehi oporombohesave: "Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe 'avirave' apo ãgua ocar rupi omboeteisa pipe yuvireco. ³⁹ Oseca avei tenda porañete catu vahe güenara otũparo pipe yuvireco yepi, iyavei carusave tenda aviye catu vahesave oguapi yuvireco yepi no. ⁴⁰ Iyavei cuña imer mano vahecuer rēta virocua-rocuá tēi ichui. Oarondaguã tēi avei oyeroqui pucu-pucu yuvireco. Ahe rumo oipisira Tüpa ñemoĩrosa ipĩrata catu vahe yuvireco curi" ehi.

Cuña imer mano vahecuer porerecosa

⁴¹ Ñepeí arĩ Jesús oguapi oĩ porerecosa rĩru rovai ava repia ãgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco. ⁴² Ahe pipeve oyepota cuña imer mano vahecuer iparaisu vahe. Ahe avei omondo ñuviriomi guarepochi oporerecosa ipipe. ⁴³ Evocoyase Jesús oñehe güemimbohe upe aipo ehi:

—Supi eté che aipo ahe pēu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi rĩru pipe. ⁴⁴ Ambuae ava eta rumo oguarepochi rumbĩrmi tēi omondo oporereco ãgua yuvireco; co cuña rumo oparaisusa pipe opa ité omondo oguarepochi —ehi güemimbohe upe.

"Imondurusara tũparo guasu" ehi Jesús

13 Jesús osēse tũparo guasu pipe sui, ahese ñepeí semimbohe aipo ehi chupe:

—Ore mbohesar, jesepia oi ita imopuhapri, icatupri ai! —ehi.

² Jesús rumo omboyevi chupe:

—¿Pesepia co oi tuvichá vahe ité? Ndipoi chietera rumo que ñepeí ita oyeha vite vahe; opacatu ité imondurusara curi —ehi.

Cañi renonde mbahe oime vaheerã

³ Evocoyase Jesús yuviraso ivitri Olivo ve, ahe ivitri tũparo guasu rovai tupri. Aheve Jesús oguapise oĩ, Pedro, Santiago, Juan iyavei Andrés oporandu co cotimi mbahe rese yuvireco chupe: ⁴ "¿Mbahese vo aipo mbahe yaviyera? ¿Mbahe poromondiisa rese rane vo icuasara?" ehi.

⁵ Jesús rumo omboyevi chupe: "Peicua catu, peyembopa ucai rene ambuae ava upe. ⁶ Esepia, setá ava yugüerura, 'Che niha Poropĩsiosar aico' ehi tēira ava eta mbopa yuvireco.

⁷ "Pesenduse rumo ñehesa vavasa resendar cohave, iyavei que rupi, ndapeyembosiquiyei chietera. Esepia niha, ēgüe ehi rane itera; ndehi vitei chira rumo arĩ cañi. ⁸ Esepia, ñepeí ivi pipendar ovavara ambuae ivi pipendar rese oyeupe yuvireco; iyavei oimera ivi ririi

opacatu-catu tēi tecua rupi, tiavor avei. Co rumo omboipī ramomira mbahe tēi porarasa.

⁹ “Peñearo catu. Esepia, pe rerasora mborerecuar rovai yuvireco, iyavei pe nupara tūparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tēi yuvireco. Ēgüe peyera peñehe che recocuer rese chupe.

¹⁰ Cañi renonde rumo co ñehesa pñisirosa resendar opacatu rane ité ava upe icua ucasara ivi rupi. ¹¹ Iyavei, ‘¿Mbahe pñha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyecuaru Tūpa pe ñehe āgua pñu. Esepia, ndahei chira peyesui tēi peñehe, Espiritu Santo ité oñehera.

¹² Ipare rumo ava omondoñora vivri yamotarēhisar upe ‘toyuca yuvireco’ oya. Ēgüe ehi aveira ava guahir upe; tahir avei oyamotarēhiñora oyesupa yuca uca āgua yuvireco che recocuer rese. ¹³ Opacatu avei ava ndape ambotai chira che recocuer sui tēi yuvireco. Acoi ava oyemoviracua vaheño rumo ari ipa vahe rupi, ahe ipñisiroprī yuvirecoira.

¹⁴ “Tūparo guasu maranehi pipe pesepiase mbahe mbahe tēi aposa —acoi oyoeroqui vahe, ahe tosenducua tupri yuvireco—, evocoiyase acoi yuvirecoi vahe ivi Judea rupi, toñemipa poyava ivitri rese yuvireco. ¹⁵ Acoi güēta harive secoi vahe, ahe ari toi que iri eme güētave mbahe renose āgua. ¹⁶ Acoi que rupi tēi secoi vahe, toyevi eme avei güētave oyeaosa renose āgua.

¹⁷ ¡Iparaisu itera cuña ipuruha vahe ahe ari pipe, imembi pñtani vahe avei! ¹⁸ Peporandu Tūpa upe, toime eme co nungar mbahe sñhisa vahe pipe pñu. ¹⁹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipoi iri chietera evocoi nungar. ²⁰ Iyavei yande Yar nomombituhise ari naporai vahe, ndipoi chietera oñepisiro vahe yuvireco viña; ahe rumo güembiporavo raisusa pipe omombituhura.

²¹ “Que oimese aipo ehi vahe: ‘Esepia, co Poropñisirosar secoi’ ehi, anise, ‘Peve secoi’ ehise yuvireco pñu, aní chira peroya aipo ehi vahe. ²² Esepia, yugüerura ava, ‘Che Poropñisirosar aico’ ehi tēi vahe, iyavei, ‘Che amombehu vahe Tūpa Ñehengagüer’ ehi angahu tēi vahe, iyavei oyapora mbahe ava ndoyapoi vahe poromondiisa güeco pñratasa mboyecua āgua yuvireco. Aviyeteramo ombopa aveira ava Tūpa reroyasar. ²³ ¡Peicua catura! opa aipo co senondeve amombehu pñu” ehi.

Mara ehira Tūpa Rahir oyevise

²⁴ “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira, ²⁵ yasitata avei opara oviapi íva sui, iyavei íva resendar mbahe orñiira yuvireco. ²⁶ Ahese che, Ava Riquehir, íva quiha rese ayecua itera vitu che pñratasa pipe che rendigüer porañetesa pipe avei. ²⁷ Ipare amboura che rembiguai eta íva pendar. Ahe evocoiyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que íva rese yuvirecoi vahe avei.

²⁸ “Peyembohera ivira higuera recocuer sui: co ivira soqui ramose, yaicua cñimi ari sacu vahe yepota āgua yandeu yepi. ²⁹ Na ehi aveira niha pñu che ñehe rupi tupri mbahe pesepiase. Sese peicuara che, Ava Riquehir, cñimi eté che yevi āgua. ³⁰ Supi eté yuvirecove vitera ava osepiya vahe, co mbahe opase yaviye. ³¹ Íva, ivi opara ocañi; che ñehengagüer rumo imboaviyesa rane itera.

³² “Ndipoi eté rumo ava oicua vahe ari iyavei hora che yevi āgua yuvireco, che Ru rembiguai íva pendar avei ndoicuai yuvireco, che avei ndaicuai eté. Che Ru güeraño ité rumo oicua.

³³ “Sese niha pemahemohara yepi, che rñrora peye. Esepia niha, ndicuasai che yevi āgua. ³⁴ Inungar que mbia amombri oso pota āgua renonde, güembiguai oseypa güēta rñro āgua, omondo avei ñepei-peí upe iporaviqui āgua, iyavei omondo güēta roquendipi rñro āgua. ³⁵ Pe evocoiyase pemahemohara. Esepia, ndapeicuai marase che oi yar ayevíra pñu, aviyeteramo pñtu ramose, pñtu mbiter, tacura ñehese, anise añihivei.

³⁶ Ndaipotai pemahemohaēhiseve tēi ayevíra. ³⁷ Che aipo ahe pñu, opacatu upe avei: ¡Pemahemohaño ité yepi!” ehi güemimbohe eta upe.

Oyemomborandu Jesús yuca āgua rese yuvireco

14 Ipare ñuvirío ari judío Pascua pieta āgua ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuaite rese oporombohe vahe avei oyemomborandu: “¿Mara yahera Jesús mbopa ipisi yuca āgua?” ehi yuvireco. ² Ambuae rumo aipo ehi yuvireco:

—Ndiyai pieta pipe ité yaipisi ava rehí yemondiēhi āgua yandeu —ehi.

Cuña Jesús rese mbahe sñacua vahe oipiyere

³ Ahese Jesús secoi Betania ve Simón lepra víreco vahe cuer rēta. Aheve mesave chiniseve, cuña güeru mbahe sñacua vahe siru reseve sepí iteanga vahe. Ahe osovapisa rerocua, ipare oipiyere Jesús āca rese. ⁴ Ambuae ava aheve yuvinoi vahe rumo oñemoiro tēi aipo ehi yuvireco oyeupe:

—¿Mahera vo co omocañi tēi mbahe sñacua vahe?

⁵ Omondo vahe ité tie co tresciento ari rupindar mboraviqui repri rupi ava iparaisu vahe pñtivii āgua viña —ehi yuvireco.

Omañeco tēi avei ahe cuña yuvireco.

⁶ Jesús rumo aipo ehi ahe ava upe:

—Teheni, ēgüe tehiño, ¿mahera vo pemañeco tēi? Co mbahe oyapo vahe rumo cheu aviye ité. ⁷ Ava iparaisu vahe niha yuvirecoiño itera pe pñhuve, iyavei peyapoño itera mbahe aviye vahe peyapo potase chupe; che rumo ēgüe ndahe viteñoi chira vichico pe pñhuve. ⁸ Iyavei co cuña oyapo mbahe ocatugüer rupi; opa voi omoiacua che rete che manoēhi vitesese.

⁹ Supi eté aipo ahe pñu: ñehesa pñisirosa resendar mombehuse opacatu tecua rupi, imombehusa aveira co cuña rembiapo sese mahenduha āgua —ehi.

Judas oyemoingatu Jesús mondo āgua yamotarēhimbar upe

¹⁰ Evocoyase Judas Iscariote, semimbohe doce vahe pāhu pendar, oso pahi eta rerecuar upe imoñeta Jesús mondo āgua. ¹¹ Senduse, oyembovīharete: “Yamondo guarepochi chupe” ehi voi eté yuvireco. Evocoyase Judas oseca voi Jesús mondo āgua yamotarēhimbar upe.

Jesús caru agüer ipa vahe güemimbohe rese

¹² Yipindar ari pan ndayapepoi vahe husa pipe, ahese avei ovesa Pascua resendar yucapri seropovēhesa yepi, ahe ari pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora, ¹⁴ seiquesave aipo peyera sēta vahe upe: ‘Ore mbohesar oporandu: ¿Uma oi pipe vo Pascua pieta resendar orohura che remimbohe reseve? ehi’ peyera. ¹⁵ Evocoyase ahe omboyecuar oi guasu ivatendar imoingaturpī pēu. Aheve pemoin-gatu mbahe yahu vaheā —ehi güemimbohe upe.

¹⁶ Evocoyase semimbohe yuviraso tecuave. Aheve semimombehu rupi tupri osepia mbahe yuvireco. Ichui omoingatu carusa Pascua pieta resendar yuvireco.

¹⁷ Pītu ramomise, Jesús doce güemimbohe rese aheve oyepota yuviraso. ¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pēu: ñepei pe pāhu pendar yande piri ocaru vahe che mondora che amotarēhimbar upe —ehi.

¹⁹ Evocoyase semimbohe ndoyembovīhai tēi yuvireco, iyavei oporandu-randu tēi ñepei-pe chupe yuvireco:

—¿Che pīha? —ehi yuvireco.

²⁰ Omboyevī rumo güemimbohe upe:

—Ñepei eté pe pāhu pendar ahe co omoaqui pan che caro pipe. ²¹ Supi eté che, Ava Riquehir, amboaviyera icuachiapri; jiparaisu catura rumo acoi mbia che mondosa! Aviye catura ahe mbia ndoyesuisse viña —ehi.

²² Yuvirocaru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipisi; co che rete —ehi.

²³ Ipare oipisi igua riru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuviroihu. ²⁴ Ahese aipo ehi:

—Co che ruvi, ahe che Ru remimbotar ipiasu vahe pēu nara. Oyepiyerera ava rehii recocuer rese nara.

²⁵ Supi eté aipo ahe pēu: ndaihu iri chietera uva ricuer cheu ari oyepotase voi che Ru Tūpa mborerecuasave aihura uva ricuer ipiasu vahe —ehi.

“Pedro, ‘Ndaicuai vahe evocoi mbia’ erera cheu” ehi Jesús Pedro upe

²⁶ Osapucaire, opa yuviraso ivitri Olivo ve. ²⁷ Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rārosar, ahese oñemosai tēira ovesa opacatu rupi yuvireco’ ehi. ²⁸ Che cuerayevire rumo aso voi etera pe renonera Galilea ve —ehi.

²⁹ Evocoyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ēgüe ndahei chietera —ehi.

³⁰ Aipo ehi rumo Pedro upe:

—Che rumo supi eté aipo ahe ndeu: co pītu pipeve voi eté tacura ñehe yupagüe renondeve, “Ndaicuai vahe evocoi mbia” erera mbosapī oyupagüer rupi cheu —ehi.

³¹ Ahe rumo,

—Yepe che amano tēira nde rupi viña, che rumo, “Ndaicuai vahe evocoi mbia” ndahei chietera —ehi-ehi catuño ité chupe.

Ambuae opacatu aipo ehi tupri tēi avei yuvireco chupe.

Jesús oyerocuī Getsemaní ve

³² Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapī cohove, che aso ranera ayeroqui peve —ehi.

³³ Aheve viraso Pedro, Santiago, Juan oyeupi. Ahese ndoyepīhambovīhai eté oico ³⁴ aipo ehi:

—Che cūritei ndavīhai eté. Esepia, che hā oyandu ité manosa. Pepita rane cohove, iyavei pemahemohara pe yeroqui pipe —ehi güemimbohe viraso vahe upe.

³⁵ Evocoyase oso tenonde catumi. Aheve oyaivi ivi rese oso, oporandu Tūpa upe mbahe tasi vahe reimeēhi āgua oyeupe. ³⁶ Oyerocuī pipe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe tēi sui eve; tayapo eme che remimbotar tēi, nde remimbotar rupi catu tayapo” ehi.

³⁷ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepei hora nde ropesii upe? ³⁸ Pemahemoha, peyeroqui mbahe tēi pipe pe viapiēhi āgua. Pe niha pequerēhi ité viña, pe retecuer tēi rumo nipiratai pēu —ehi.

³⁹ Ichui oso iri oyerocuī, aipo ehi tupri avei oñehe.

⁴⁰ Ipare oyevisse, osesapiha iri iquesseve tēi avei. Esepia, sopesii nomboyeroyai eté yuvireco, ahese ndoicatui eté iñehe mboyevi yuvireco. ⁴¹ Imombosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehir, mondo āgua ava yangaipa vahe povrive. ⁴² Pepūha, yaso. Esepia, cōimi eté che amotarēhisar upe che mondo vaheā secoi —ehi.

Jesús ipisisa

⁴³ Jesús oñehe vitesese ohã, Judas oyepota oso chupe, ahe doce pãhu pendar semimbohe, iyavei setá ava yugüeru quise pucu, ivira reseve-seve supi. Ahe pahi eta rerecuar, Moisés porocuita rese oporombohe vahe, judío rerecuareta porocuita rupi oyapo yuvireco. ⁴⁴ Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi. ⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

⁴⁶ Ahese oipisi Jesús yuvireco.

⁴⁷ Semimbohe secoi vahe supi ovinose oquise pucu. Ipipe oyasia pahi rerecuar ivate catu vahe rembiguai nambi. ⁴⁸ Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi ãgua. Imonda rai vahe nungar che rereco peye. ⁴⁹ Arí yacatu rupi niha pe pãhuve aporombohese tũparove vichico, na ndapeyei eté cheu. Co rumo ãgüe peye icuachiapri mboaviye ãgua cute —ehi.

⁵⁰ Ahese semimbohe oñemosaipe oseyá Jesús ahe ae tupri imoha yuvireco. ⁵¹ Mbia chíhivahe rumo turucuar pipe güerañomi oñemama vahe supive secoi viña; ⁵² ahe avei oipisi yuvireco. Oipoequiño rumo oturucuar reya oso nani tupri.

Jesús serasosa pahi rerecuar ivate catu vahe rovai

⁵³ Evocoyase Jesús viraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuita rese oporombohe vahe avei no. ⁵⁴ Pedro avei amombri rupive tēi oique ité oso pahi rerecuar ivate catu vahe rēta ãchisa pipe. Aheve oquapiño mbia sundao pãhuve tata ipive oyephe oĩ.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tēi ava oñehe-ñehe tēi vaheñá Jesús rese yamotarēhisave yuca uca ãgua yuvireco; ndoicatui eté rumo yuvireco. ⁵⁶ Iyavei setá iteanga tēi semira yuvireco sese; oyecopi-copi tēi rumo güemira pipe. ⁵⁷ Amove aipo ehi tēi yuvireco seco momara ãgua:

⁵⁸ —Ore orosendu iñehe aipo ehise: ‘Che opara amonduru co tũparo ava tēi rembiapo. Ipare rumo mbosapi arí rupi opara amopuha. Ndahe iri chira evocoyase ava tēi rembiapo’ ehi —ehi tēi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahi rerecuar ivate catu vahe opũha oporandu Jesús upe:

—¿Nderemboyevii chira vo iñehe yuvireco chupe? ¿Mbahe vo aipo nde amotarēhimbar oñehe nde rese? —ehi chupe.

⁶¹ Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropĩsirosar ité vo nde ereico, Tũpa imboeteipri Rahir? —ehi.

⁶² —Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisarēhi acato coti; ayevisé avei iva quiha rese curi —ehi chupe.

⁶³ Evocoyase pahi rerecuar ivate catu vahe omonoro oturucuar aipo ehi:

—¿Mbahe iri vo yande yaipota vite yaico? ⁶⁴ Yasendu-pa niha aipo Tũpa upe iñehe-ñehe tēisa, ¿mara ehi aipo evocoyase pe pihave? —ehi.

Ipare opacatu guasu ava, “¡Tomanoño ité!” ehi yuvireco chupe.

⁶⁵ Ahese amove ava ondivi-ndivi sese iyavei osesacua, ipare yuvirocua-rocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tũparo rãrosar avei osovapete-pete yuvireco.

Pedro, “Ndaicuai vahe evocoi mbia” ehi Jesús upe

⁶⁶ Pedro ivive ñachimbrí pipe secoi. Aheve cuña oye-pota ou pahi mborerecuar ivate catu vahe rembiguai chupe. ⁶⁷ Osepiase Pedro iyephehese tata ipive, omahengatu ohã sese aipo ehi chupe:

—Nde avei acoi Jesús Nazaret pendar rupindar ereico —ehi.

⁶⁸ Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osēse oquendipive ohã, ahese oñehe tacura.

⁶⁹ Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndahe i eté che” ehiño. Iparemi tēi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoyase,

—¡Tũpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehe imoñuviriosa rupi. Ahese Pedro oyemomahenduha, “Tacura ñehe yupagüesa renondeve, mbosapi oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

Jesús serasosa Pilato rovai

15 Cõhe potase, pahi eta rerecuar, judío rerecuar, Moisés porocuita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco. ² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tēi mbahe sembiaviēhi yuvireco chupe. ⁴ Evocoyase Pilato oporandu iri chupe aipo ehi:

—¿Mahera vo ndereñehei eté? Esepia, setá mbahe nde rembiavi omombehu yuvireco —ehi.

⁵ Nomboyevii eté rumo Pilato upe. Evocoyase, “¿Mara ehi rutei pñha?” ehi tñi.

“¡Tayaticasa!” ehi ava Jesús upe yuvireco

⁶ Mborerecuar guasu recosa ité ñepei ava soquendapri renose água Pascua pieta pipe ava rehii porandusa rupi yepi. ⁷ Mbia Barrabás serer vahe, ahe pipeve avei soquendasa yuvireco ambuae oporapichi vahe reseve. ⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco. ⁹ Pilato rumo aipo ehi:

—¿Peipota amose vaheñã judío rerecuar? —ehi.

¹⁰ Esepia, Pilato oicuaño ité ava rese yemoecatñisa pipe sui pahi eta rerecuar remimondo secoise. ¹¹ Pahi eta rerecuar rumo ‘Barrabás tosẽ’ ombohe ati-atñ uca ava yuvireco. ¹² Evocoyase Pilato oporandu ahe ava upe:

—¿Mbahe vo peipota ayapora co mbia chupe acoi, ‘Judío rerecuar’ peye vahe rese? —ehi.

¹³ Ahe rumo omboyevi Pilato upe:

—¡Tayaticasa curusu rese! —ehi ati-atñ uca yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-atñ iriño yuvireco.

¹⁵ Evocoyase Pilato, mbahe tupri opita água ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica água.

¹⁶ Ahese sundao viraso mborerecuar rñta sui ambuae oi pipe, aheve opacatu omboetasa omonuha yuvireco.

¹⁷ Aheve omboyemonde turucuar pñraumbi vahe pipe yuvireco, ipare yu piapri omonde ñaca rese. ¹⁸ Sãse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

¹⁹ Iyavei yuvirocua-rocua ivira pipe ñaca rupi yuvireco sese, ondivi-ndivi avei oñenopiña-pñha avei sovai yuvireco imboeteisave angahu. ²⁰ Mara-mara tñi sereco pare, ovirocua iturucuar pñraumbi vahe yuvireco ichui, ahese omonde iturucuar ité yuvireco sese. Ichui vinose ocarve yatica água yuvireco.

Jesús yaticasa curusu rese

²¹ Ñepei mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voiño tñi yuvireco chupe.

²² Jesús oviraso Gólgota serer vahesave yuvireco (‘Ava Áca Cangüer’ oyapave aipo ehi). ²³ Iyavei uva ricuer oyeseha vahe mirra rese omondo tñi yuvireco chupe. Ahe rumo ndoihui eté. ²⁴ Evocoyase oyatica yuvireco.

Ipare sundao iguayñiño Jesús turucuar rese ‘¿uma pñha virasora oyeupe’ oyapave yuvireco.

²⁵ Ahe oyatica añihivei la nueve rupi yuvireco. ²⁶ Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oi. ²⁷ Supive avei yaticasa ñuvirío imonda rai vahe ñepei mbahe rese ipocosa coti, ambuae mbahe rese ipocoñhisa coti.

²⁸ Ēgüe ehi imboaviye icuachiapri aipo ehi vahe: “Ava mbahe-mbahe tñi aposar nungar ipñhuve serecosa” ehi.

²⁹ Acoi ava ñocuasar iñehe-ñehe tñi, oñeaca mbovava aipo ehi yuvireco chupe:

—Nde acoi, “Opara tñiparo amonduru. Ipare mbosapri ari rupi opa irira amopuha” ere acoi cuese. ³⁰ ¡Eñepisiro ru nde ae cute; egüeyi curusu sui! —ehi yuvireco chupe.

³¹ Ēgüe ehi avei pahi eta rerecuar, oporombohe vahe avei Moisés porocuita rese iñehe mara-mara tñi yuvireco chupe, aipo ehi yuvireco oyeupe:

—Oipñisiro ambuae. Ahe ae rumo ndoicatu oñepisiro. ³² ¡Poropñisrosar Israel rerecuar guasu, toyerooyi ahe ae curusu sui cñritei, ahese voi seroyasara —ehi.

Iyavei supive yaticapri mara ehi-ehi tñi avei chupe.

Jesús mano agüer

³³ Osupitise rumo mbiter ari, opa tupri pñtu ivi rupi. Ēgüe ehi las tres rupi. ³⁴ Ahese tupri avei Jesús oñehe pñrata aipo ehi: “Eloi, Eloi, ¿lema sabactani?” ehi, (ahe ‘che Ru Tñpa, che Ru Tñpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tñpa ñehe mombehusar Elías upe oñehe —ehi yuvireco chupe.

³⁶ Evocoyase ñepei imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe ‘toiñu’ oya:

—Ēgüe tehiño rane, ¿oura pñha Elías seroyi água curusu sui? —ehi.

³⁷ Ahese Jesús sãse pñrata. Ipare omano. ³⁸ Aheseve tñiparo asiata turucuar ivate coti sui ovo tupri. ³⁹ Iyavei sundao rerecuar Roma iguar, ahe Jesús rehögüer rese omahengatu ohã. Osenduse Jesús rãse iyavei osepiase imano, aipo ehi:

—Supi eté catu, co mbia Tñpa Rahir ité —ehi.

⁴⁰ Iyavei cuña aheve amombrive osepiata catu yuvinoha; ahe yuvirecoi María Magdalena, José si María, ahe avei Santiago chñhivahe catu vahe si iyavei ambuae cuña Salomé. ⁴¹ Co cuña eta yuvirecoiño vahe ité Jesús rupi, oipñivii vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

Jesús apocatu agüer tuvipa pipe

⁴² Pñtu ramose, ahe ari pipe oyemoingatu ava yuvireco ari mbituhusa upe nara yepi, ⁴³ ahese José, tecua Arimatea pendar, porandusa ivate catu vahe pendar,

acoi Tūpa mborerecuasa osāro vahe oico, oquerēhisa pipe ité oique oso Pilato upe oporandu āgua Jesús rehōgüer rese. ⁴⁴ Pilato rumo oyepihamondii tēi, “Omano” hese. Oñehe sundao rerecuar upe oporandu āgua ‘¿marase vo ēgüe ehi?’ ⁴⁵ Sundao rerecuar omombehuse chupe, ahese omondo sehōgüer José upe. ⁴⁶ Evocoyase José virocuca turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayere vahe pipe osovapi. ⁴⁷ María Magdalena iyavei María, José si, osepiaño yapocatuse yuvireco.

Jesús ocuerayevi

16 Mbituhusa ari pare, María Magdalena, María, Santiago si, Salomé avei, ahe virocuca mbahe sñacua vahe Jesús rehōgüer rese nara yuvireco. ² Iyavei añihiveive, yipindar ari semana pipe, oyepota Jesús ruvipave icatu ramose yuviraso. ³ Aheve aipo ehi oyeupe yuvireco:

—¿Ava pñha co tehōgüer rovapisa virocuca yuvireco yandeu? —ehi.

⁴ Osepiase rumo ita guasu yuvireco, ndahe irise güendave ihāi, ⁵ yuviroiquesese tehōgüer ruvipave yuvireco, aheve osepia ombahe rese pocosa coti mbia chíhivahe, iturucuar pucu morochi vahe oguapise oñ. Ahese cuña oyembosiquiye yuvireco. ⁶ Ahe rumo aipo ehi chupe:

—Pesiquire eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohava. Pesepeia ru supagüer. ⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiara mbahe che remimombehu rupi tupri’ peyera —ehi.

⁸ Evocoyase ahe cuña yuvinosese tuvipa sui, yuvinoña yuviraso, oririi avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihiveive domingu pipe, oyemboyecua yipindar María Magdalena upe, ahe ichui acoi

siete tupri carugar opa omboyepipi. ¹⁰ Ahe oso imombehu supindar upe. Ahe rumo oyaseho vite oviharēhise yuvireco. ¹¹ Osenduse cuña ñehe: “Jesús ocuerayevi, che ité asepeia” ehise, ndoviroyai eté yuvireco.

Jesús oyemboyecua ñuvirío güemimbohe upe

¹² Ipare Jesús oyemboyecua iri ñuvirío güemimbohe upe ambuae güepiaca pipe peri rupi. ¹³ Ahe avei yuviraso omboetasa upe imombehu; ndoviroya viteño avei rumo yuvireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñhengata ahe oyese yeroyaēhisa rese chupe, iyavei ocuerayevisa mombehusar reroyaēhi rese avei.

¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa pñsirosa resendar peico.

¹⁶ Acoi viroya vahe, iyavei oñeapiramo vahe, ahe oñepisiora yuvireco; acoi ndoviroyai vahe rumo, ahe imocañipirã tēi yuvirecoira. ¹⁷ Co mbahe poromondiisa omboyecua che reroyasar yuvireco: Che rer pipe omboyepira carugar ava sui. Oñehe aveira ñehesa ndicuasai vahe pipe yuvireco. ¹⁸ Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapi Vu Tūpa acato coti oñ. ²⁰ Semimbohe evocoyase opa yuviraso opacatu ivi rupi ñehesa pñsirosa resendar mombehu. Yande Yar avei oipñtivii, iyavei mbahe poromondiisa pipe omboyecua uca ité ñehesa pñsirosa resendar supi eté vahe. Aipo rupive.

SAN LUCAS

Lucas oicuachía Teófilo upe

1 Imboeteipri Teófilo, setá ava oicuachía yuvireco opacatu aracahendar mbahe imombehupri mboaviyesa cūritei yande pãhuve co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu. ³ Sese che avei opa aseca tupri yipisuive opacatu co mbahe cua tupri água, Teófilo. Ichui che amoingatu tupri pota icuachiapri sesendar ndeu nara avei sereco. ⁴ Evocoyase nde ereicua tupri co porombohesa supi eté vahe acoi nde mbohe agüer.

Tüpa rembiguai omombehu Juan Oporoãpiramo vahe ha água

⁵ Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel. ⁶ Co ñuvirío secocuer aviye tupri Tüpa upe; viroya tupri opacatu Yar porocuita yuvireco. Evocoyase ndipoi eté que ava “mara” ehi vahe yuvireco chupe. ⁷ Zacarías rumo yipisuive ndatahii vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

⁸ Ñepe arí aipo osupiti icuaita tüparo pipe imboetasa reseve iporaviqui água Tüpa rovaque yuvireco. ⁹ Pahi recosa ité egüe ehi aracahe suive, ahese iporavosa Zacarías yipindar yasiapri tüparo maranehi pipe oi que vahe itaisi rapi água. ¹⁰ Itaisi rapi viteseve aipo, opacatu ava oyerure yuvireco ocarve. ¹¹ Aheseve aipo oyemboyecua yande Yar rembiguai itaisi renda maranehi ique coti chupe. ¹² Tüpa rembiguai repiase aipo, oyembosiquiyé iteanga. ¹³ Tüpa rembiguai rumo aipo ehiño chupe:

—Zacarías —ehi—, eresiquiye eme. Tüpa osendu nde yeruresa. Sese nde rembireco Isabel imembira ndeu. Ahe nde rahir rer-ra Juan. ¹⁴ Ereviharetera sese, iyavei oyemboviharera opacatu ava yuvireco nde rahir ohase. ¹⁵ Esepia niha, nde rahir secocuer tuvichara oico Tüpa rovaque. Ndoiñhui chietera uva ricuer sai vahe, iyavei que ambuae mbahe sai vahe; secoira rumo Espíritu Santo rese ohaehi viteseve. ¹⁶ Egüe ehira omonguerēhi setá ava judío Yar Tüpa reroia iri água oico. ¹⁷ Ahe virecora espíritu pīratasa oyese oyoyara Tüpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndi-

poreroyai vahe yuvireco seco catupri vahe aracuasa mboyeroia água rese’ oyapave. Egüe ehira ava mbohe imoingatu yande Yar pisi água sereco —ehi chupe.

¹⁸ Evocoyase,

—¿Mara ahera pīha aipo reroia? Che rumo acuacua-mi eté vichico, iyavei che rembireco ocuacuami avei no —ehi Tüpa rembiguai upe.

¹⁹ —Aní —ehi chupe—. Che aico Tüpa rembiguai Gabriel, Tüpa rovaindar. Ahe niha che mbou ndeu che ñehe água iyavei co ñehesa aviye vahe mombehu água. ²⁰ Nde rumo ndereroyai acoi amombehu vahe ndeu. Sese co pipe suive ité nandehengatui chira eico. Osupitise voi che remimombehugüer, acoi ohase nde rahir, ahese ramo ndehengatura —ehi aipo Tüpa rembiguai chupe.

²¹ Osãro pucu tēi aipo ocarve ambuae imboetasa eta yuvireco. “¿Mahera pīha nose vitei tüparo pipe sui?” ehi tēi yuvireco chupe. ²² Osēse aipo tüparo pipe sui, niñehengatui voi eté. “Ñaro osepia mbahe tüparo pipe” ehiño ité aipo imboetasa eta yuvireco chupe. Ipo āta-āta tēi aipo oñehengatuēhise mbahe mombehu oico.

²³ Ipare omboaviyese ocuaita tüparo pipe, oyevi oso güētave. ²⁴ Coiye aipo sembireco Isabel ipuruha oico. Judío porocuita mboyeroiasave nose iri eté ambuae ava piri poyandepo yasi rupi. Ipihañemoñeta: ²⁵ “Yar Tüpa ité egüe ehi cheu ava che rese ñeheehi iri água yuvireco” ehi vorivetesa pipe aracahe.

Tüpa rembiguai Jesús yesu água omombehu

²⁶ Coiye seis yasi pipe Tüpa omondo güembigui Gabriel tecua Nazaret ve ivi Galilea rupi ²⁷ cuñatai ndaseco marai vahe upe iñehe água; ahe serer María. Ahe omenda pota vahe cuimbahe mborerecuar guasu David suindar José serer vahe rese. ²⁸ Tüpa rembiguai oi que co cuña rētave aipo ehi chupe:

—¡María, Tüpa nde rovasa, erereco mbahe icatupri vahe pñtiviisa Yar Tüpa suindar! Tüpa nde rese ité sec-oi; nde rovasa catu opacatu cuña sui —ehi chupe.

²⁹ Tüpa rembiguai repiase, “¿Mara oya pīha co aipo ehi cheu?” ehi tēi osiquiyepave opihañemoñeta rereco.

³⁰ Evocoyase Tüpa rembiguai aipo ehi chupe:

—María, eresiquiye eme. Esepia niha, Tüpa ité nde poravo nde rovasa água. ³¹ Cūritei voira rumo ndemembira: ererecora nde membrí; ahe serer-ra Jesús.

³² Ahe niha secouvicha catu vahe secoira; “Tüpa secoivate vahe Rahir secoi” ehira yuvireco chupe. Iyavei niha Yar Tüpa ité omoinguera mborerecuar guasu seco

āgua inungar tamoi David aracahe. ³³ Mborerecuar guasu secoira judío recua rupi apirēhi vaherā; imborerecuasa niha apirēhi vaherā ité secoira —ehi.

³⁴ Evocoyase ahe aipo ehi:

—¿Mara ahera vo aipo che membi viña? Esepia niha, ndaico vitei vahe cuimbahe rese —ehi Tūpa rembiguai upe.

³⁵ —Espíritu Santo ogüeyira nde harive iva quiha nungar; Tūpa güeco pīratasa pipe nde momembira. Sese acoi ohasa nde membi seco maranehi vahe, “Tūpa Rahir” hesara chupe. ³⁶ Cūritei nde mu Isabel avei ocuacuami pipe imembi oico; ahe niha ndimembii vahe yipindar viña, cūritei rumo vireco seis yasi omembi vie pipe. ³⁷ Esepia niha, Tūpa upe ndipoi eté mbahe yavai vahe —ehi.

³⁸ Evocoyase María aipo ehi:

—Che Yar rembiguai aico, tayaviye ayase Tūpa remimbotar cheu nde ñehe rupi —ehi.

Aipo ihe pare, Tūpa rembiguai oyepepi oso ichui.

María oso omu Isabel piri

³⁹ Ahese María oso voi eté ivitri rupi tecua ivi Judea ve. ⁴⁰ Aheve aipo Zacarías rēta pipe oiquese oso, oyapo “avirave” omu Isabel upe. ⁴¹ Evocoyase Isabel rie pipe omii imembi iñehe renduse. Ahese Espíritu Santo oique Isabel aviterve. ⁴² Ipape osapucaí pīrata aipo ehi chupe vorivetesave:

—¡Tūpa nde rovasa cuña opacatu sui, iyavei osovasa nde membi! ⁴³ Noromohai eté che piri ereyu vaherā viña, che Yar si. ⁴⁴ Esepia, cheu “avirave” ereyapose, che membi omii voi vorivetesave che rie pipe. ⁴⁵ ¡Sovasapri ereico! Esepia, ereroya ité ñehesa ndeundar. Iyavei Tūpa omboaviyera güemimombehu nde rese —ehi Isabel chupe.

⁴⁶ Evocoyase aipo ihese,

“Che niha amboetei che Yar vichico;

⁴⁷ cheroriveté Tūpa che Pīsirosar rese.

⁴⁸ Esepia, ahe omahe che rese che reco yemominisa pipe seroyasar che recosave.

Co pipe suive, ‘Sovasapri secoi’ ehira opacatu ava yuvireco cheu.

⁴⁹ Esepia niha, Tūpa mbahe mboavaisarēhi, oyapo mbahe tuvichá vahe cheu.

¡Tūpa imboeteipri catu tasecoi yepi!

⁵⁰ Ahe oiparaisuereco opacatu omboeteisar yepi.

⁵¹ Nomboavai eté mbahe yapo.

Osecoreroyi ava oyemboivate ai tēi vahe.

⁵² Viroyi mborerecuar seco pīrata vahe pīratasa sui; ava seco mbegüemi vahe rumo osecomboivate.

⁵³ Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

⁵⁴ Oipitívii niha opacatu viroyasareta judío yuvirecoi vahe.

Esepia, ndasesarai eté poroparaisuerecosa mondo āgua ⁵⁵ güemimombehugüer rupi yande ramoi aracahendar Abraham upe, ichuindar upe avei yepi no” ehi vorivetesave pipe omu Isabel upe.

⁵⁶ Ipape María opita Isabel piri mbosapi yasi rupi. Ichui oyevi oso güētave.

Juan Oporoāpiramo vahe haragüer

⁵⁷ Osupitise ari Isabel upe, imembira. Ahe imembi cuimbahemi. ⁵⁸ Imu iyavei icotindar oyanduse Tūpa rembiapo mbahe aviye vahe, aipo ehi yuvireco chupe: “Aviye ai catu Yar Tūpa secoi co cuña rese” ehi vorivetesave yuvireco. ⁵⁹ Ocho ari pipe aipo, ahe pītani ombocircuncida yuvireco judío porocuita mboyeroyasa pipe. Ipape aipo omondo pota iyepi Zacarías rer yuvireco sese viña, ⁶⁰ ichi rumo,

—Aní —ehiño—. Juan itera rumo serer —ehi.

⁶¹ —¿Mahera vo? Ndipoi eté rumo nde mu rer aipo nungar —ehi yuvireco chupe.

⁶² Evocoyase aipo omahe pītani yesupa rese yuvireco ‘¿mbahe pīha ahe omondo pota sererguā viña?’ oyapave yuvireco. ⁶³ Evocoyase aipo iyepi oporandu ivirapemi rese sese serer oicuachía vaherā. Ahe serer oicuachía: ‘Juan sererguā’ ehi imoi. Ahese aipo opacatu ava: “¿Mara ehi rutei pīha co?” ehi tēi oyeupe yuvireco.

⁶⁴ Ahese ramo Zacarías iñehengatu, omboipi Tūpa upe osapucaí oico. ⁶⁵ Opacatu aipo sēta cotindar oyembosiquiye tēi yuvireco, iyavei aipo opacatu Judea recua rupi omombehu-mbehu mbahe osepi vahecuer yuvireco. ⁶⁶ Mbahe osendu vahecuer rese avei aipo oporandu-randu oyeupe yuvireco: “¿Mbahe pīha aipo pītani oyapora curi?” ehi. Esepia niha, supi eté Tūpa osovasa.

Zacarías sapucaí agüer

⁶⁷ Zacarías, Espíritu Santo pīratasa pipe, oñehe Tūpa oyeupe ñehesa pipe aipo ehi:

⁶⁸ “¡Yande Yar Tūpa imboeteipri tasecoi!

¡Esepia niha, ahe ou yande judío yaico vahe pīsiro āgua!

⁶⁹ Ombou niha Poropīsirosar güembiguai David suindar yandeu.

⁷⁰ Ēgüe ehi imombehu opacatu oñehengagüer mombehusar seco maranehi vahe upe aracahe.

⁷¹ Ahe yande pīsirora yande amotarēhimbar sui.

⁷² Ēgüe ehi Tūpa imbou oporoparaisuerecosa yande ramoi aracahendar upe, iyavei iyemomahenduha āgua güemimbotar maranehi mombehu agüer rese.

⁷³ Evocoyase, ‘Che supi eté ayapora evocoi mbahe’ ehi yande ramoi Abraham upe aracahe

⁷⁴ yande renose āgua yande amotarēhimbar povri sui ‘tache mboetei osiquiyeēhisa pipe yuvireco’ oya;

⁷⁵ ‘toyuvirecoi che rembiepiave güeco ñvisa pipe iyavei güeco maranehisa pipe ari yacatu rupi’ oyapave.

⁷⁶ Nde, che rahir, ‘Co Tūpa ivate vahe ñehe mombehusar secoi’ ehira ava yuvireco ndeu.

Esepia, nde eremoingatura ava recocuer Yar pisi āgua senondeve eico.

⁷⁷ Supi eté nde niha eremboyecua opacatu ava Tūpa upendar yuvirecoi vahe upe angaipa sui ñeroisa pisi āgua iñepisiro āgua.

⁷⁸ Esepia, yande Ru Tüpa, oporoparaisuerecosa pipe ombou oporoesapesa iva pendar yandeu yande reco mbopiasu ägua

⁷⁹ iyavei ava Tüpa cuaparēhi resape ägua 'toyuvirecoi mbahe tupri pipe' oyapave.

Esepia, ahe inungar ava pītumimbisave yuvirecoi vahe, ocañi tēi vaheṛā yuvirecoi” ehi Zacarías.

⁸⁰ Ichui pītani ocuacua iyavei vireco pīratasa Espiritu suindar oyese. Ipare rumo oso oyemboerecua ivi iporupirēhi rupi. Coiye oyemboyecua omu Israel pendar upe oico.

Jesús yesu agüer

2 Yipindar mborerecuar guasu Augusto oporocuai oico, “Tayecuachiasa opacatu tecua rupi” ehi.

² Ahe yipindar yecuachiasa mborerecuar Cirenio, Siria pendar rēise. ³ Opacatu ava yuviraso güecua yacatu rupi oyecuachía ägua yuvireco.

⁴ Sese José avei osē Nazaret, Galilea ivi rupi sui oso ivi Judea rupindar tecua Belén ve. Esepia niha, araca-hendar mborerecuar guasu David aheve oha vahecuer, iyavei José ichuindar avei secoi. ⁵ Ēgüe ehi oyoya yuviraso güembirecovi María rese oyecuachía ägua. María rumo imembira pota ité oico. ⁶ Aheve oyepota ramose, osupiti ari imembira ägua. ⁷ Aheve oha imembri yipindar vahe cuimbahemi. Ahese María oyao omembri turucuar pipe, ēgüe ehi imoñeno imondo mbahe mimba rembihi riru pipe. Esepia niha, ndoyosui eté oque ägua aheve yuvireco.

Tüpa rembiguai eta omombehu Jesús haragüer ovesa rārosar upe yuvireco

⁸ Namombriimi Belén sui ovesa rārosar yuvirecoi.

Aheve osāro ovesa pītu pipe yuvireco. ⁹ Aviyeteramo tēi oyemboyecua Tüpa rembiguai iva pendar chupe. Tüpa porañetesa avei sendi yivii chupe yuvireco. Ahe sepiase, oyembosiquiyé iteanga tēi yuvireco ichui.

¹⁰ Ahe rumo aipo ehi chupe: “Pesiquireme. Esepia, che ayu mbahe icatupri vahe mombehu ägua pēu pe mboviharete ägua iyavei opacatu ava mboviharete ägua avei no. ¹¹ Co pipe oha David recua Belén ve Poropīsiosar pēu nara. Ahe niha Tüpa Rembiporavo, pe Yarguā secoi. ¹² Icuā ägua peyosura pītani yaopri tuprimi vahe tui mbahe mimba rembihi riru pipe” ehi.

¹³ Aviyeteramo tēi oyemboyecua ambuae setá Tüpa rembiguai iva pendar yivii yuvireco. Tüpa upe osapucaí yuvireco aipo ehi:

¹⁴ “¡Imboeteipri tasecoi Tüpa ivave! ¡ivive ava Tüpa rembiaisu toyuvirecoi tupri oyeaisusa pipe!” ehi osapucaí yuvireco.

¹⁵ Opase oyeví Tüpa rembiguai ivave yuviraso, ahese ovesa rārosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

¹⁶ Evocoyase ipoyava yuviraso. Ipare osepia María, José, Jesús pītani avei yuvireco cute. Ahe pītani

omoñenomi mbahe mimba rembihi riru pipe ino.

¹⁷ Ipare yuvinoso omombehu-mbehu ambuae ava upe Tüpa rembiguai remimombehugüer pītani resendar ñehesa yuvireco. ¹⁸ Evocoyase opacatu ava oyepihamondii co ñehesa renduse yuvireco. ¹⁹ María rumo opacatu co mbahe rese oyapisacaño; ahe ehiño ité ipihañemoñetasa. ²⁰ Oyevisse ovesa rārosar yuviraso, omboetei iyavei osapucaí Tüpa upe yuvireco. Esepia niha, opacatu mbahe osendu vahe, osepia vahecuer yuvireco imombehupri rupi tupri ité.

Jesús pītani seropovēhesa Tüpa upe tūparo pipe

²¹ Ocho ari pipe ahe pītani ombocircuncida yuvireco; omondo sererguā Jesús yuvireco, ahe terer tupri avei acoi Tüpa rembiguai omombehu María upe imembieñi viteseve.

²² Ipare omboaviyese oharí güētave oñemoatiro ägua, ahe aipo ēgüe ehi Moisés porocuita rupi yuvireco yepi, ahese vinose pītani seraso tecua guasu Jerusalén tūparo pipe seropovēhe ägua Yar upe yuvireco. ²³ Ēgüe ehi yuvireco. Esepia, Yar porocuita aipo ehi icuachiapri pipe aracahe: “Opacatu yipindar pītani cuimbahe mini yuviroha vahe ipehasara Tüpa upe nara yepi” ehi. ²⁴ Yuviraso oporerecosa reropovēhe ägua yuvireco yande Yar porocuita rupi: “Ñepeí oyovaichor reseve picuhi, anise ñuvirío apicasu peropovēhera” ehi vahe.

²⁵ Ahe pipe mbia Jerusalén ve secoi Simeón serer vahe. Ahe mbia aviye etepri vahe. Oyerure vahe Tüpa upe, osāro vahe avei Israel recua pendar Pīsiosar imombehupri. Ahe secoi vahe ité Espiritu Santo rese.

²⁶ Ahe chupe Espiritu Santo opa uca oicua “eresepia rane itera Poropīsiosar Tüpa remimbou nde mano renondeve” ehi vahe. ²⁷ Ahe ari pipe Espiritu Santo viroguata tūparove. Oyepotase José, María reseve yuvireco tūparove Jesús pītani reropovēhe ägua Tüpa porocuita rupi tupri, ²⁸ ahese Simeón oyemboya oso sese, osupi ichi sui, viroyeroqui Tüpa upe señoa aipo ehi:

²⁹ “Che Yar, cūrítei che, nde rembiguai, amano tupriño itera.

Esepia niha, nde remimombehugüer eremboaviye ité cheu.

³⁰ Asepia ité niha Poropīsiosar vichico cute.

³¹ Nde niha erembou opacatu ava rembiepiave.

³² Ahe niha poroesapesa ité secoi.

Esepia, omboyecua mbahe supi eté vahe ava ndahei vahe judío yuvirecoi vahe upe, iyavei omondara poromboeteisa nde recua Israel pendar judío yuvirecoi vahe upe” ehi oyoerqui.

³³ José iyavei María ndoyembovhai tēi yuvireco pītani rese Simeón yeroqui renduse. ³⁴ Evocoyase Simeón osovasa ahe pītani iyésupa reseve. Ipare aipo ehi ichi María upe:

—Esendu, co pītani reroyaēhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboye-

cuara mbahe ava upe. Amove rumo viroïroñora yuvireco. ³⁵ Ipípe sui ava pihañemoñetasa icuasara curi. Iyavei co opacatu mbahe tasira nde piha pipe inungar quise pucu osasara nde piha viña —ehi chupe.

³⁶ Aheve avei cuña cuacuami yaracua vahe secoi, ahe serer Ana, Fanuel rayri, Aser suindar. Ocuñatamiseve rumo omenda, iyavei secoi raimi tēi omer rese siete araviter rupive. ³⁷ Cūritei secoi omer mano pare ochenta y cuatro araviter. Nosei eté tūparo pipe sui oico. Ēgūe ehi yande Yar mboetei pītu, ari rupi oyecuacusa pipe iyavei oyeruresa pipe avei oico no. ³⁸ Ahe evocoyase ahesa reseve avei ou pītani upe, “Aviye ndeu” ehi Tūpa upe. Ipare oñehe secocuer rese opacatu ava Jerusalén pendar osāro vahe güecua pīsiro āgua upe oico.

Jesús pītani reroyevi agüer Nazaret ve

³⁹ Evocoyase opacatu Moisés porocuita mboaviyere, opa oyevi Galilea pendar güecua Nazaret ve yuvireco. ⁴⁰ Ahese pītani ocuacua catumi imbahecua-ecua irimi eté oico iyavei ipīrata catu irimi. Esepia, Tūpa osovasa ité sereco no.

Jesús chíhivahe tūparo pipe secoi

⁴¹ Iyesupa yuviraso araviter yacatu Jerusalén ve Pascua pieta repia yepi. ⁴² Jesús doce araviter virecose, ahese viraso iyesupa Jerusalén ve oyeupi pieta repia yuvireco. Esepia, ēgūe ehi eté judío recocuer pietase yuvireco yepi. ⁴³ Ahe pieta pare voi, oyevise yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipitase yuvireco. ⁴⁴ “Oñño revo ava pāhu rupi” ehi yuvireco chupe viña; aipo ehiño ité ñepeí ari pipe yuvireco chupe. Oseca tēise rumo omu pāhu rupi, iyavei omboripar pāhu rupi avei no, ⁴⁵ ndoyosui eté yuvireco. Ahese oyevi iri tēi Jerusalén ve seca yuvireco.

⁴⁶ Imombosapisa ari pipe oyosu ramo tūparo pipe yuvireco. Aheve oguapi ava Tūpa porocuita rese oporombohe vahe pāhuve oī; oyapisaca iñehe rese iyavei oporandu-randu ahe ava upe Tūpa Ñehengagüer rese oī. ⁴⁷ Evocoyase opacatu ava ndoyembovīhai tēi imbahecua vaísa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa. ⁴⁸ Oyosuse iyesupa, oyepihamondii yuvireco. Ahese ichi aipo ehi chupe:

—Che membri, ¿mahera vo ēgūe ere eico oreu? Nde recasa tēi opacatu rupi, ore mopihañemoñeta atí uca eve —ehi.

⁴⁹ Evocoyase,

—¿Mahera vo che reca co coti rupi tēi peye peico? ¿Ndapeicuai vo che Ru rēta pipe aico vaheñā? —ehi osi upe.

⁵⁰ Iyesupa rumo ndosenducuai eté aipo oyeupe hesa yuvireco.

⁵¹ Evocoyase oyevi Nazaret ve oso supi. Aheve omboyeroñaño ité oyesupa. Ichi niha opacatu co mbahe rese oyapisacaño ité. ⁵² Ahese Jesús ocuacua-cuacua

iri, iyetei catu avei imbahecua catu iri avei oico no. Secoí tupri ai eté Tūpa upe iyavei ava eta upe avei no.

Juan Oporoāpiramo vahe secoi ivi iporupirēhisa rupi

3 Quince araviter pipe mborerecuar guasu Tiberio recose, Poncio Pilato evocoyase mborerecuar secoi Judea rupi, Herodes avei mborerecuar secoi Galilea ve, tivri Felipe evocoyase mborerecuar secoi Iturea ve iyavei Traconite ve, Lisanas avei mborerecuar secoi Abilinia ve. ² Anás iyavei Caifás ahe pahi rerecuar ivate catu vahe yuvirecoi. Ahese Tūpa, “Emombehu che ñehe ava upe cute” ehi Zacarías rahir Juan upe oico ivi iporupirēhisave. ³ Juan evocoyase oso opacatu iai Jordán ivi oico, supi aipo ehi ava upe: “Pemboasi pe angaipa, peyevi Tūpa upe, ahese opoāpiramora Tūpa pēu ñero āgua pe angaipa rese” ehi. ⁴ Co yaviye ité Tūpa ñehe mombehúsar Isaiás rembicuachiagüer pipendar aipo ehi vahe: “Sendusa ivi iporupirēhisave ava sapucaisa aipo ehi vahe:

‘Pemoingatu yande Yar raperā, pemohivi tupri avei’ ehi.

⁵ ‘Evocoyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyoyasa tupri no.

Acoi peri ipāri vahe, ahe imohivisapara; peri ipicucu atí vahe opara imboapiposa tupri chupe.

⁶ Iyavei opacatu ava osendura ñehesa pīsirosa re-sendar Tūpa remimbou yuvireco cute’ ehi vahe” ehi.

⁷ Ava rehii yuvinosepa chupe ‘tayande āpiramo’ oyapave yuvireco viña. Ahe rumo aipo ehi: “¡Pe mboi mboetasa tēi peico! ¿Ava vo, ‘Pesēra Tūpa ñemoirosa ou vaheñā sui’ ehi tupri tēi pēu? ⁸ Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tēi peñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi. ⁹ Hacha niha imoingatusa voi eté opacatu ivira iha naporai vahe sapo rupi yasía āgua yepi. Yasiapri evocoyase imondosapara tatave” ehi.

¹⁰ —¿Mbahe piha evocoyase oroyapora ore recocuer recuñaro āgua oroico? —ehi ava rehii oporandu yuvireco chupe.

¹¹ —Pe pereco vahe ñuvirío pe camisa, ñepeí pemondo ava ndovirecoi vahe upe; iyavei pe pereco vahe tembihu, pemboyahomi tēi ambuae ava ndovirecoi vahe upe —ehi imboyevi ava upe.

¹² Yugüeru avei moviro ava sui guarepochi rocuar ‘tayande āpiramo’ oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tūpa rupi ore guata āgua oroico? —ehi yuvireco chupe.

¹³ Evocoyase aipo ehi ahe ava yuvirecoi vahe upe:

—Aní perocua catu iri guarepochi pēu imombehusa sui —ehi.

¹⁴ Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe tēi chira ava upe sembiapoēhi rese, iyavei peyembovihañora pe poraviqui reprimi rese —ehi sundao upe.

¹⁵ Ava rumo, “¿Ndahei pīha co Poropīsīrosar sārombrī secoi?” ehi tēi Juan upe yuvireco. ¹⁶ Juan rumo aipo ehi opacatu ava upe: “Che opoāpiramo i pipe tēi; oura rumo ambuae che raquicuei, ahe pe āpiramora Espīritu Santo tata nungar pipe. Ahe seco pīrata catu vahe secoi che sui. Sese cheu ndiyai eté ahe ipitaquisā yora āgua ichui” ehi. ¹⁷ “Ahe güeru trigo mbovevesa ihigüer sui ipeha āgua. Sāhii evocoiyase yapocatusa, ihigüer rumo imondosa tata apīrēhi vahesave” ehi ava upe.

¹⁸ Omombehu-mbehu vite ñehesa aviye vahe ava upe ‘toyemonguerēhi güecocuer recuñaro āgua yuvireco’ oya. ¹⁹ Ipare rumo Juan oñehe pīrata mborerecuar Herodes upe secocuerai rese. Esepia, vivri Felipe rembireco Herodías rese secoi, iyavei setá ambuae mbahe naporai vahe sembiapo. ²⁰ Sese Herodes oyapoño ambuae mbahe tēi: seroyaēhisa pipe osoquenda ucaño Juan sereco.

Jesús āpiramosa

²¹ Yipindar rumo voquenda viteēhiseve Juan oñapiramo setá ava oico, aheseve avei oñapiramo Jesús. Jesús yerure viteseeve, aviyeteramo tēi oyemboi tupri i va. ²² Ipare Espīritu Santo ogüeyi ou iharive apicasu nungar, iyavei oyeendu ñehesa i va sui aipo ehi vahe:

—Nde che Rahir ereico, che rembiaisu; sese aviha ité nde rese —ehi.

Ava eta oyesu vahe Jesucristo yesu renondeve

²³ Jesús virecose treinta araviter, ahese ramo omboipi oporombohe. Ahe icuapri vahe ité José rahir secose viña. José Elí rahir secoi, ²⁴ Elí evocoiyase Matat rahir, ahe Matat evocoiyase Leví rahir, Leví evocoiyase Melqui rahir, ahe Melqui evocoiyase Jana rahir, Jana evocoiyase José rahir, ²⁵ ahe José Matatías rahir, Matatías evocoiyase Amós rahir, ahe Amós evocoiyase Nahúm rahir, Nahúm evocoiyase Esli rahir, ahe Esli Nagai rahir, ²⁶ Nagai evocoiyase Maat rahir, ahe Maat Matatías rahir, Matatías evocoiyase Semei rahir, ahe Semei evocoiyase Josec rahir, Josec evocoiyase Judá rahir, ²⁷ ahe Judá Joanán rahir, Joanán evocoiyase Resa rahir, ahe Resa evocoiyase Zorobabel rahir, Zorobabel evocoiyase Salatiel rahir, ahe Salatiel Neri rahir, ²⁸ Neri evocoiyase Melqui rahir, ahe Melqui Adi rahir, Adi evocoiyase Cosam rahir, Cosam evocoiyase Elmadam rahir, Elmadam evocoiyase Er rahir, ²⁹ ahe Er Jesús rahir, Jesús evocoiyase Eliezer rahir, ahe Eliezer Jorim rahir, Jorim evocoiyase Matat rahir, ³⁰ ahe Matat Leví rahir, Leví evocoiyase Simeón rahir, ahe Simeón evocoiyase Judá rahir, Judá evocoiyase José rahir, ahe José Jonam rahir, Jonam evocoiyase Eliaquim rahir, ³¹ Eliaquim Melea rahir, ahe Melea Mena rahir, Mena evocoiyase

Matata rahir, ahe Matata evocoiyase Natán rahir, ³² Natán David rahir, ahe David evocoiyase Isaí rahir, Isaí Obed rahir, ahe Obed evocoiyase Booz rahir, Booz Sala rahir, ahe Sala evocoiyase Naasón rahir, ³³ Naasón Aminadab rahir, ahe Aminadab evocoiyase Admin rahir, Admin evocoiyase Arni rahir, Arni evocoiyase Esrom rahir, ahe Esrom evocoiyase Fares rahir, Fares evocoiyase Judá rahir, ³⁴ ahe Judá Jacob rahir, Jacob evocoiyase Isaac rahir, ahe Isaac Abraham rahir, Abraham evocoiyase Taré rahir, Taré evocoiyase Nacor rahir, ³⁵ ahe Nacor Serug rahir, Serug evocoiyase Ragau rahir, ahe Ragau evocoiyase Peleg rahir, Peleg Heber rahir, ahe Heber evocoiyase Sala rahir, ³⁶ Sala Cainán rahir, ahe Cainán evocoiyase Arfaxad rahir, Arfaxad evocoiyase Sem rahir, ahe Sem evocoiyase Noé rahir, Noé evocoiyase Lamec rahir, ³⁷ ahe Lamec Matusalén rahir, Matusalén evocoiyase Enoc rahir, Enoc evocoiyase Jared rahir, ahe Jared Mahalaleel rahir, Mahalaleel evocoiyase Cainán rahir, ³⁸ ahe Cainán evocoiyase Enós rahir, Enós evocoiyase Set rahir, ahe Set Adán rahir, Adán evocoiyase Tūpa rahir.

Jesús recoãhasa

4 Jesús Espīritu Santo rese ité secoi. Ahe osē iai Jordán sui oso. Ipare Espīritu viroguata ivi iporupirēhisa rupi. ² Aheve cuarenta arī secoise Carugar osecoãha. Ndocarui avei oico. Sese ndasiepoi eté. ³ Carugar evocoiyase aipo ehi chupe:

—Tūpa Rahir ité nde recose, co ita sui eyapo pan cūritei —ehi.

⁴ Evocoiyase Jesús omboyevi chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi —ehi Carugar upe.

⁵ Ipare Carugar viraso ivate vahesave. Aheve ñepeireseve opacatu ava-ava tēi mborerecuasa ivi pipendar omboyecua chupe. ⁶ Ipare aipo ehi chupe:

—Che amondora opacatu ivi rupindar mborerecuar pīratasa iyavei mbahe porañete vahe nde povrive. Esepia niha, co opacatu cheu imboupri; iya ité amondo vaheñā ava upe che remimbotar rupi. ⁷ Acoi ereñenopiñase cheu che mboetei āgua, ahese opacatu co mbahe ereipisira nde mahera —ehi tēi Carugar chupe.

⁸ —Icuachiapri pipe rumo: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Carugar upe.

⁹ Ipare Carugar viraso oyeupi tecua guasu Jerusalén ve. Aheve oviroyeupi tūparo apiterve. Aheve Carugar aipo ehi chupe:

—Tūpa Rahir ité nde recose, eviapi cohava sui. ¹⁰ Esepia niha, icuachiapri pipe:

‘Tūpa oyocuaire güembiguaire eta nde rāro āgua.

¹¹ Ahe nde mopuhara yuvireco que ñepeire ita nde momara rāgüer sui’ ehi —ehi Carugar chupe.

¹² Evocoiyase omboyevi Carugar upe:

—¡Aní! Icuachiapri pipe niha aipo ehi avei: ‘Ndereseoãhai chira nde Yar Tūpa’ ehi —ehi chupe.

¹³ Ahese Caruguar ndoicatu iri eté Jesús recoãha ãgua oico. Ipare oyepipiño raimi tēi oso ichui.

Jesús omboipi oporombohe Galilea rupi

¹⁴ Jesús, Espíritu Santo reco pĩratasa pipe, oyevi oso Galilea ve. Ipare serãcua oguata opacatu tecua-tecuami rupi. ¹⁵ Esepia, ahe oporombohe judío tũparo pipe oico. Ahese opacatu ava omboetei yuvireco.

Jesús oyevi Nazaret ve

¹⁶ Ichui Jesús oyevi Nazaret ve ocuacua agüerve. Aheve judío mbituhusa arĩ pipe oique tũparove inungar oyapo yepi. Ahese opũha 'tayeroqui icuachiapri maranehi pipe' oya. ¹⁷ Evocoyase tũparo rese ñangarecuar pĩtivĩisar omondo Tũpa ñehe mombehusar Isafas rembicuachía chupe. Oyorase ahe cuachiar, oyeruqui icuachiapri aipo ehi vahe pipe ohã:

¹⁸ —“Yar Espíritu secoi che rese.

Esepia niha, ahe ombou che cuaitarã cheu co ñehesa aviye vahe mombehu ãgua ava iparaisu vahe upe.

Che cuaita avei ava mbahe-mbahe tēivriye yuvirecoi vahe senose ãgua ichui, iyavei ava ndasesapisoi vahe ambosarecora; iyavei che cuaita ava mbahe-mbahe tēi rasícuer oiporara vahe sui senose ãgua,

¹⁹ iyavei 'cũritei Yar oyemoingatu oporovasasa mondo ãgua pēu' he ãgua" ehi icuachiapri pipe —ehi oyeruqui.

²⁰ Sese oyeruqui pare, oyapoapipa cuachiar imondo tũparo rese ñangarecuar pĩtivĩisar upe. Ipare oguapi oĩ ava rembiepiave. Ahese opacatu tũparo pipendar omaha atĩ yuvireco sese. ²¹ Evocoyase ahe oñehe aipo ehi:

—Cũritei yaviye co icuachiapri pipendar opacatu pe rovaque —ehi.

²² Opacatu ava oñehe tupriño ité yuvireco sese. Ndoyembovĩhai tēi iñehe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tēi? —ehi yuvireco chupe.

²³ Ahe rumo aipo ehi ava upe:

—Pe aipo peyera cheu: 'Oporombogüera vahe, eñeposano nde ae eico' peyera. Ipare aipo peyera cheu: 'Acoi orosendu vahe nde rembiapogüer Capernaum pipe, ãgüe ere avei eyapo cohava nde recua pipe ité' peyera cheu —ehi.

²⁴ —Supi eté, ndipoi eté niha que ñepei yepe Tũpa ñehe mombehusar oipisi tupri vahe güecua pipe yuvireco yepi. ²⁵ Supi tupri ité Tũpa ñehe mombehusar Elías recose, iñehe rupi tupri ndoquĩ eté mbosapĩ araviter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña, ²⁶ Tũpa rumo nomondoi Elías cuña imer mano vahecuer Israel pendar upe ipĩtivii ãgua. Ëgüe ehi rumo omondo cuña ndahei vahe Israel pendar ipĩtivii ãgua. Ahe cuña tecua Sarepta pendar, ahe Sarepta Sidón ipiimindar. ²⁷ Iyavei setá ava oime Israel recua pipendar imba-

heasi vahe lepra rerecosar yuvireco evocoi Tũpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepei ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

²⁸ Ahese opacatu ava judío tũparo pipendar oñemoiró iteanga yuvireco sese aipo mbahe renduse. ²⁹ Sese opa voi eté opũha Jesús reraso ãgua tecua pipe sui ivitri ivi socuerve yuvireco, ahe iharive tecua yapos. Ahe ichui oitĩ pota yuvireco viña. ³⁰ Jesús rumo ipãhu sui osē tupriño oso.

Jesús ombogüera mbia caruguar vireco vahe oyese

³¹ Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa arĩ pipe. ³² Ipare opacatu ava, “¡Mara ehi rutei!” ehi tēi iprombohesa renduse yuvireco. Esepia niha, ahe oñehe güeco pĩratasa pipe.

³³ Aheve judío tũparo pipe oime mbia vireco vahe caruguar oyese, ahe oñehe pĩrata Jesús upe:

³⁴ —¡Ore mañeco tēi eme eve! ¡Mahera ereyuño tēi cohava oreu, nde, Jesús Nazaret pendar! ¿Ereyu vo ore mocañi ãgua tēi? Che orocua ité. Nde niha seco maranehi vahe ereico Tũpa suindar —ehi chupe.

³⁵ Evocoyase,
—¡Quiriri, esē co mbia sui! —ehi oñehe pĩrata caruguar upe.

Ahese caruguar omboviapi ahe mbia ava rovai, osē ocua ichui; nomomarai eté rumo. ³⁶ Opacatu ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opĩratasa pipe oyocuai caruguar ava sui imose ãgua! —ehi yuvireco.

³⁷ Sese Jesús rerãcua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

³⁸ Evocoyase Jesús osē judío tũparo pipe sui oso, oique Simón Pedro rētave. Simón rembireco si sohĩ iteanga ou. Evocoyase oñehe ahe pendar sese Jesús upe 'tombogüerami tēi' oyapave yuvireco. ³⁹ Evocoyase Jesús oyeavĩ oso chupe sohĩ sui imbogüera ãgua. Ocuera pare voi ahe cuña oñarapuha; ohañeco ahe ava yuvirecoi vahe rese.

Jesús ombogüera setá ava imbaheasi vahe

⁴⁰ Arĩ so ramomise opacatu ava imbaherasisa ambuae tēi vahe güeru Jesús upe yuvireco. Ahe evocoyase opo omondo iyacatu iharive ñepei-peĩ imbogüera. ⁴¹ Iyavei setá ava sui opa omose caruguar. Evocoyase caruguar osapucui tēi aipo ehi yuvireco:

—¡Nde acoi Tũpa Rahir ité ereico! —ehi.

Ahe rumo oñehe pĩrata caruguar upe, nomoñehe iri. Esepia niha, caruguar oicua ité ahe Tũpa Rembiporavo seco rese yuvireco.

Jesús oporombohe judío tūparo rupi oico

⁴² Ahere ayihive cōhe ramomise, Jesús osē tecua pipe sui, oso ivi iporupirēhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoēhi āgua ité yuvireco vinā. ⁴³ Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tūpa mborerecuasa resendar ava upe. Esepia, aherā niha che mbousa —ehi.

⁴⁴ Ēgüe ehi Jesús oguata oporombohe Judea tūparo rupi oico.

Pira mboha ati agüer

5 Ñepe arí Jesús secoi ipa Genesaret popi rupi. Aheve ava rehii oyepota yuvireco chupe, oyere ati yuvireco sese. Esepia niha, ahe osendu pota ité Tūpa Ñhengagüer yuvireco. ² Aheve oime ñuvirío carite imbehí popive. Ahe ava pira mbohasar opa yuvínose evocoi carite pipe sui yuvireco. Ipare opira mbohasa oyosei yuvínoi. ³ Evocoiyase Jesús osepiase, oha Simón carite pipe iyavei aipo ehi chupe: “Tosiri catumi tēi chíhi coi coti iai popi sui” ehi. Ipare oguapi oī carite pipe. Aheve ombohe ava cute. ⁴ Oñehe pare aipo ehi Simón upe:

—Yaso ipa tipí catu vahesave. Aheve erembohara pira —ehi.

⁵ Simón rumo omboyeve chupe:

—Porombohesar, orosāha tēi niha pītu momba pira mboha oroico. Nde porocuita pipe rumo amondo irira pira mbohasa ive —ehi.

⁶ Ēgüe ehise, pira rehii omondoromi ombohasa yuvireco. ⁷ Ahese oyaiti yuvireco omboetasa evocoi ambuae carite pipe yuvirecoi vahe upe ‘toyugüerumi yande pītivii’ oyapave yuvireco chupe. Ahe yugüeru chupe. Ipare opa ñuvirío carite omboapipo tupri yuvireco; seni iri rumo omondo ipive. ⁸ Co mbahe repiase, Simón Pedro oñenopiha oso sovai aipo ehi chupe:

—¡Eyepepimi tēi che sui, che Yar! ¡Esepia, che yangaipa vahe tēi aico! —ehi.

⁹ Esepia, Simón iyavei opacatu ava yuvirecoi vahe supi osiquiyé iteanga co pira rehii repiase yuvireco.

¹⁰ Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ēgüe ere aveira ava reca cheu nara —ehi.

¹¹ Evocoiyase opa vínose carite ivi ātasave yuvireco, oseyapaño opacatu mbahe. Ipare yuviraso supi.

Jesús ombogüera ava lepra rerecosar

¹² Ñepe arí Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

¹³ Evocoiyase, opocose sese, —Aipota. ¡Erecuerara cūrite! —ehi chupe.

Aipo ihe ramoseve voi eté ocuera. ¹⁴ Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavēhe nde porerecosa nde cuerasa resendar Moisés porocuita rupi. Ipipe sui toicua opacatu ava nde cuerasa yuvireco —ehi chupe.

¹⁵ Jesús rerācua rumo oyembouvicha catu-catu iri eté. Evocoiyase setá ava oyemboya yuvireco sese iñe-he rendu āgua ‘tayande mbogüerami tēi yande mba-herasisa sui’ oyapave yuvireco. ¹⁶ Ava rehii sui rumo amove Jesús oyepepiño ahe aemi oyerure āgua yepi.

Jesús ombogüera ava ndoguatai vahe

¹⁷ Ñepe arí Jesús oporombohe oico. Yar Tūpa pīratasa vireco oyese ava mbogüera āgua. Aheve avei oguapi yuvínoi fariseo, Moisés porocuita rese oporombohe vahe avei ipiri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no.

¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyi āgua yuvireco viña; ¹⁹ ndoicatui eté rumo seroique yuvireco ava rehii pāhu rupi. Evocoiyase viroyeupi yeupisa rupi ahe oi ipe vahe harive yuvireco. Aheve virocuca teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai. ²⁰ Ahe oicuae co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuita rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpaño ité niha oicatu ava angaipa upe oñero āgua” ehi tēi oyeupe yuvireco.

²² Ahe rumo oicuaño ité ahe ava pihañemoñetasa. Evocoiyase aipo ehi chupe:

—¡Mahera vo pepihañemoñeta rai tēi che rese!

²³ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise: ‘Epūha, eguata’ hesa tie? ²⁴ Tapeicua ru che, Ava Riquehir, areco ité mborerecuasa co ivi pipe ava angaipa upe che ñero āgua —ehi.

Evocoiyase,

—Eñarapuha, esupi nde rupa, eso nde rētave —ehi imbaheasi vahe upe.

²⁵ Ahese opūha voi ava rovaque, osupi vupagüer. Ipare osapucui oso güetave Tūpa upe. ²⁶ Ahese opacatu tupri ité ava, “¡Too! ¿Mara ehi rutei pīha co?” ehi tēi imboeteisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepiai vahe ité —ehi.

Jesús oñehe Leví upe

²⁷ Ichui osẽse Jesús, osepia mbia Roma ve nara guarepochi rerocuasar Leví serer vahe, ahe guarepochi rerocuasave chini. Sepiase,

—Erio che rupi —ehi chupe.

²⁸ Evocoiyase Leví opũha. Oseyapa oporaviquisa, oso supi.

²⁹ Ipare Leví oyapo pieta guasu chupe nara güẽtave. Aheve iyemborisave setá imboetasa ava guarepochi rerocuasar iyavei ambuae ava ocaru yuvinoi ipiri.

³⁰ Pieta repiasar fariseo yuvirecoi vahe rumo iyavei ipãhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarepochi rerocuasar rese iyavei ambuae ava yangaipa guasu vahe rese tẽi avei no! —ehi.

³¹ Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco. ³² Esepia, che ndayui ava seco catupri vahe reca; che rumo ayu ava yangaipa vahe reca Tũpa uve iyeví ãgua yuvireco —ehi.

Yecuacusa rese ñehesa

³³ Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoãpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyeve chupe aipo ehi:

—Ndiyai eté ichohopri mboyeacu mendasave imer oicove viteseve ipãhuve. ³⁵ Oimera rumo ari imer reraso ãgua ichui, ahese ramo oyecuacura yuvireco cute —ehi.

³⁶ Iyavei ambuae mbahe rese oporombohe imboyeve ãgua:

—Ndiyai eté ava upe virocua vaheñã turucuar ipiasu vahe sui ambuae turucuar cuacuami vahe apete ãgua. Esepia niha, ãgüe ehise evocoiyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—. ³⁷ Iyavei no, ndiyai eté ñoñasa uva ricuer piasu mbahe pিরer cuacua pipe no. Esepia niha, ãgüe ehise, uva ricuer piasu evocoiyase opara ombopu mbahe pিরer cuacua viña, ãgüe ehira oyepiyerepa, mbahe pিরer avei evocoiyase ocañi tẽira viña. ³⁸ Uva ricuer piasu rumo yamondora mbahe pিরer piasu pipe. ³⁹ Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

Jesús remimbohe oipoho trigo mbituhusa ari pipe yuvireco

⁶ Ñepe mbituhusa ari pipe Jesús viroguata güemimbohe mbahe miti pãhu rupi. Semimbohe evocoiyase oipoho-poho yuviraso trigo rãhi. Ipare oyequii opo pipe sãhi yuvireco ãgua. ² Evocoiyase fariseo osepiase, aipo ehi yuvireco semimbohe eta upe:

—¡Mahera peporaviquiño tẽi co mbituhusa ari pipe peico! —ehi.

³ Jesús rumo omboyeve chupe:

—Peicua tẽi niha icuachiapri arachendar mborerucuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha oique ité Tũpa rẽta pipe, opoco pan imboeteipri Tũpa upendar rese evocoi pahi upe güeraño ipotasa vahe ihu ãgua yepi. Ahe rumo ohu, ondugüer tohu avei omondo —ehi.

⁵ Iyavei aipo ehi chupe:

—Ava Riquehir mbituhusa ari rereciar ité secoi —ehi fariseo upe.

Jesús ombogüera mbia ipo nomii vahe

⁶ Ambuae mbituhusa ari pipe, Jesús oique judío tũparo pipe oporombohe oico. Aheve mbia yasu coti ipo nomii vahe secoi. ⁷ Moisés porocuita rese oporombohe vahe, fariseo avei omahengatu Jesús rese yuvireco ‘¿ombogüerara pãha co mbia mbituhusa ari pipe?’ oya; ‘yaiñehengapo angahu’ oyapave tẽi yuvireco. ⁸ Ahe rumo oicuaño ité ipihañemoñetasa oico. Ipare aipo ehi evocoi mbia ipo nomii vahe upe:

—Epũha cohave terehã ava pãhuve —ehi.

Ahe mbia evocoiyase opũha, opita aheve ohã ⁹ Ahese Jesús oporandu ahe ava upe:

—Aporandura mbahe rese pẽu —ehi—. ¿Mbahe vo yaposara mbituhusa ari pipe yepi, mbahe tupri pãha, anise mbahe naporai vahe tie? ¿Yaipisiro pãha ava recocer; yamocañi uca tẽi tie? —ehi.

¹⁰ Evocoiyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yiva —ehi.

Ahe mbia evocoiyase oichoho oyiva; evocoiyase ipo ocuera tupri ité. ¹¹ Evocoiyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pãha imomara ãgua?’ oya.

Jesús oiporavo doce tupri güemimboherã

¹² Ahe ari rupi Jesús oso ivitrive, oyerure pĩtu momba tupri Vu upe oico. ¹³ Cõhese, “Perió” ehi güemimbohe eta upe. Ipãhu sui oiporavo doce tupri, ahe chupe, “Apóstol” ehi. ¹⁴ Co ahe yuvirecoi: Simón, ahe acoi Pedro avei serer; Andrés Simón rivri; Santiago, Juan, Felipe, iyavei Bartolomé; ¹⁵ Mateo, Tomás, Santiago Alfeo rahir; Simón, ava güecua rese secatẽhí vahe pãhu pendarer; ¹⁶ Judas Santiago rivri; iyavei Judas Iscariote, ahe omondo vahe Jesús yamotarẽhimbar uve.

Jesús ombohe ava rehii

¹⁷ Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava égüe ehi iñehe rendu potasave yuvireco 'tayande mbogüerami tēi yande mbaherasisa sui' oyapave yuvireco. ¹⁸ Acoi espíritu naporai vahe remimombaraisu avei ocuera tupri yuvireco. ¹⁹ Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco pĩratasa pipe oico.

Ava sorivete vahe iyavei ava ndoyembovĩhai vahe

²⁰ Ipare omahe Jesús güemimbohe rese aipo ehi chupe:

"Perorivete catu pe iparaisu vahe. Esepia niha, Tũpa mborerecuasa pēu nara ité secoi.

²¹ "Perorivete catu cūriteindar ndasiepoi vahe. Esepia niha, pehĩtarora peico curi.

"Perorivete catu pe acoi ava cūritei oyaseho vahe. Esepia niha, peviharetera coiye peico.

²² "Perorivete catu pe acoi ava pe amotarēhise, pe mboypepiñose avei oyesui yuvireco, iñehe-ñehe tēise yuvireco pēu pe amotarēhisave, iyavei acoi viroĩrose pe rer mbahe tēi pipe che, Ava Riquehir, recocuer sui tēi yuvireco. ²³ Peyembovĩhaño iyavei perorivete catuñora ahe ari pipe peico. Esepia niha, ipare peipisira porerecosa tuvichá vahe ivave. Égüe ehi tupri avei evocoi ava ramoĩ aracahendar mara-mara tēi Tũpa ñehe mombehusar seroco yuvireco" ehi.

²⁴ "¡Peparaisu catu rumo cūritei mbahe yar peico vahe! ¡Esepia niha, pemboaviye pe rorivetesasa peico!

²⁵ "¡Peparaisu catu acoi pe ihĩtaro vahe cūritei! ¡Esepia niha, ndaperiepoi chira peico coiye!

"¡Peparaisu catu acoi peviha vahe pe pietase cūritei! ¡Esepia, peyasehora pe viharēhisa pipe peico coiye!

²⁶ "¡Peparaisu catu acoi peipisi vahe pe mboeteisa opacatu co ivi pipendar ava tēi sui! ¡Esepia niha, égüe ehi tupri tamoi Tũpa ñehe mombehusar angahu tēi vahe upe yuvireco aracahe!" ehi.

Iyacatu yasaisu yande amotarēhimbar

²⁷ "Pe che ñehe rese peyapisaca vahe upe rumo aipo ahe: Pesaisu ava pe amotarēhimbar; peyapo tupri mbahe aviye vahe ava nape ambotai vahe upe. ²⁸ Paporandu Tũpa porovasasa rese ava pēu iñehe-ñehe tēi vahe upe nara; peyerure Tũpa upe pēu mbahe tēi oyapo vahe recocuer rese. ²⁹ Acoi que pe amotarēhimbar pe rovapetese, co cotindar avei pemoporēhiñora chupe. Iyavei acoi que ava virocuaño tēise pe yeaosa pe sui, toviraso avei pe yemondesa güemimbotar rupi" ehi. ³⁰ "Acoi oporanduse que pe mbahe rese yuvireco pēu, pemondoño avei chupe. Iyavei acoi que ava virocuaño tēise pe mbahe pe sui, ndapeporandui chira

pēu imboyevi āgua rese. ³¹ Acoi mbahe peipota vahe ambuae ava oyapo vaheñā pēu, ahe tupri avei peyapora chupe.

³² "Acoi ava pe raisupar güeraño pesaisu catu tēise, ndipoi eté mbahe aviye vahe ipipe. Esepia niha, ava naporai vahe égüe ehi yuvireco yepi. ³³ Anise, acoi ava mbahe tupri ai oyapo vahe pēu, chupe güeraño mbahe tupri peyapose, ¿mbahe vo evocoyase oime aviye vahe ipipe? Esepia niha, ava angaipa viyar avei égüe ehi yuvireco yepi. ³⁴ Acoi pemondoño tēise mbahe ava upe 'tomboyevi mbahe cheu' pe hesave, ¿mbahe vo evocoyase oime aviye vahe ipipe? Esepia niha, ava angaipa viyar égüe ehi avei yuvireco. ³⁵ Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, 'Tasároño rane mbahe cheu imboyevi āgua vichico' ndapeyei chietera. Ahese oimera porerecosa aviye catu vahe pēu. Pe evocoyase Tũpa seco ivate catu vahe rahir peicora. Esepia niha, ahe aviye etepri vahe ava 'aviye ndeu' ndehi vahe upe iyavei ava yangaipa guasu vahe upe avei. ³⁶ Pe peporoparaisuereco inungar pe Ru Tũpa oporoparaisuereco yepi" ehi.

Ndiyai ambuae ava seroĩrosa

³⁷ "Ndiyai, 'Oyavi ité mbahe' peye voiño tēi ambuae ava upe. Evocoyase Tũpa, 'Oyavi mbahe' ndehi chira pēu. Pemocañi uca tēi eme ambuae ava. Evocoyase Tũpa ndape mocañi tēi chira. Peñeroño catu ambuae ava upe, ahese Tũpa iñero itera pēu. ³⁸ Pemondose mbahe ava upe, evocoyase Tũpa omondoño itera mbahe aviye vahe pēu inungar-ra omondo pe mbahe riru pipe pēu sãhambri tupri aviye vahe viña. Égüe ehi ra mbahe imondo pēu. Tũpa oicua tupri itera pēu inungar pe mbahe pemondo ambuae ava upe" ehi.

³⁹ Ipare Jesús omombehu co ambuae porombohesa: "¿Oicatu pĩha ñepe ndasesapisoi vahe ambuae ndasesapisoi vahe reroguata? ¡Aní eté! Esepia, oyoya voi oviapira que ivicuar pipe yuvireco viña. ⁴⁰ Ñepe yepi niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar" ehi.

⁴¹ "¿Mahera ambuae ava rembiavimi rese tēi pemahe? Iya rumo peyese rane mbahe tuvicha catu vahe pesepiara. ⁴² Ndiyai pēu, 'Che toropĩtivii mbahe nde rembiavi rese' peye vaheñā chupe. Esepia, pe peyavi guasu catu mbahe. ¡Pe Tũpa reroyasar angahu tēi peico vahe! Penose uca rane pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura" ehi oporombohe.

Ava recocuer icuasa sembiapo rese

⁴³ "Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sãchi ati vahe sui higuera ha, iyavei ndahipohosai uva, yu pãhu sui. ⁴⁵ Égüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opiha pipe yepi.

Iyavei acoi ava ndaseco pōrai vahe oyapo mbahe tēi. Esepia niha, ahe vireco mbahe tēi eté opiha pipe yepi. Esepia niha, pe piha pipe sui tēi osē pe ñehe āgua” ehi.

Ava oyemoviracua vahe iyavei ndoyemoviracuai vahe Jesús reroyasave

⁴⁶ “¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu?
⁴⁷ Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu:
⁴⁸ ahe inungar tupri ité acoi ava oyapo vahe güētara ita harive yepi. Yipindar rumo oyoho picucu rane ité ita harive imopuha āgua. Yepe ahe oi upe oyepota tēi ivitu ai, amarusu reseve oinupa pīrata tēi, nomboyero cuai eté rumo. Esepia niha, vireco ité ovīracuasa.
⁴⁹ Acoi ava che ñehengagüer rese ndoyapisacai vahe rumo, ahe ndoyavii acoi ava oyapo vahe güētara ivi cuhi harive tēi, ndovirecoi eté ovīracuasa. Ipare amar, ivitu ai reseve oinupa pīratá, opaño omonduru; ocañi tēi eté evocoyase” ehi Jesús ava mbohe.

Jesús ombogüera chíhivahe sundao rerecuar Roma iguar remimboacua

7 Jesús oñehepase ava upe oico, oso Capernaum ve. ² Ahe tecua pipe sundao rerecuar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité. ³ Jesús rerācua anduse rumo, oyocuai moviro tēi omboripar judío imboeteipri chupe iñehe āgua ‘toumi tēi che remimboacua mbogüera’ oyapave. ⁴ Ahe judío evocoyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rerecuar oipota nde ereyapomi tēira mbahe icatupri vahe chupe viña. ⁵ Esepia niha, ore raisu iyavei ahe teieté oyapo uca tūparo oreu nara —ehi yuvireco chupe.

⁶ Evocoyase oso ahe yuvirecoi vahe rupi. Virovise rumo sēta yuvireco, ahese sundao rerecuar omondo ambuae omboripar chupe. Imboripar evocoyase omombehu iñehe aipo ehi vahe: “‘Che Yar, ereyemañecoí rene. Esepia niha, ndiyai eté che rēta pipe nde reique āgua. ⁷ Sese niha che teieté ndasoi nde reca. Nde ñehe pipe tēi rumo che remimboacua erembogüerara. ⁸ Esepia, che avei niha areco che cuaita. Iyavei areco sundao che voya. Eso peve, ahese ñepepe upe, ahe evocoyase oso voi eté; ambuae upe: Erio, ahese, ou voifño ité cheu. Ipare, Ereyapora co mbahe, ahese che rembiguai upe, ahe evocoyase che reroyaño voi’ ehi ore mboripar” ehi Jesús upe yuvireco.

⁹ Aipo oyeupe hese Jesús, “¡Too!” ehi. Ipare aipo ehi vupindareta upe:

—Supi eté ndasepiái vahe ité co mbia che reroya tupri vahe nungar judío eta pāhuve —ehi.

¹⁰ Yuviroyevipase sundao rerecuar mboripar sētave yuvireco, aheve osepia evocoi semimboacua yuvireco ocuera tuprise.

Jesús ombogüerayevi cuña imer mano vahecuer membrí cuimbahe

¹¹ Ipare voi Jesús oso tecua Naín ve, iyavei semimbohe yuvirasofño ité supi ava rehii reseve avei no.
¹² Virovise tecua oso, osepia tehögüer ava virocuase yuvireco ñoti āgua. Ahe cuña imer mano vahecuer membrí ñepepe vahe ité viña. Tecua pipendar setá iteanga ava yuviraso supi. ¹³ Cuña repiase rumo, oiparaisuereco. Ipare aipo ehi chupe:

—Ereyaseho eme —ehi.

¹⁴ Evocoyase oyemboya oso, opoco tehögüer riru rese. Sese ovosii vahe evocoyase viropitaño yuvireco chupe. Ipare aipo ehi tehögüer upe:

—Mbía chíhivahe, che aipo ahe ndeu: ¡Eñarapuha! —ehi.

¹⁵ Evocoyase omano vahecuer oñarapuha oñ iyavei oñehe no. Ichui Jesús omondo ichi upe. ¹⁶ Opatu tupri ité ava oyembosiquiye sepiase yuvireco:

—Cūrítei oyemboyecua Tūpa ñehe mombehusar seco ivate vahe yande pāhuve cute —ehi yuvireco.

Iyavei,
 —Tūpa niha ou güecua pñivii āgua oico —ehi avei yuvireco.

¹⁷ Ipare co Jesús rerācua yandusa opacatu Judea rupi, yivirindar rupi avei no.

Juan Oporoāpiramo vahe omondo vupindar Jesús recocuer cua uca āgua

¹⁸ Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe. ¹⁹ Evocoyase omondo ñuvirío vupindar Jesús upe mbahe rese porandu āgua ‘¿nde ité vo Tūpa Rembiporavo aipo sārombri ereico, anise oime tie ambuae orosāro vaheerā?’ oyapave. ²⁰ Evocoyase oyepota yuviraso Jesús upe aipo ehi yuvireco chupe:

—Juan Oporoāpiramo vahe ore mbou ndeu co mbahe rese porandu āgua: ¿Nde ité vo Tūpa Rembiporavo ereico imombehupri ereyu vaheerā, anise ambuae pñha orosārora oroico? —ehi yuvireco chupe.

²¹ Ahe arí pipeve voi Jesús ombogüera setá ava imbaheerasisa sui oico, ava carugar rerecosar sui avei no. Iyavei ava ndasesapisoi vahe setá ombogüera. ²² Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasesapisoi vahe osareco tupri cūrítei yuvireco, ipāri-pāri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pñirosa resendar ñehesa” peyera chupe. ²³ ¡Oviharetera acoi ava oyeroyaño vahe che rese! —ehi Juan rupindar upe.

²⁴ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave, capihiata ivitu ombova-mbova vahe nungar pñha? ²⁵ Anise, ¿pesepia tie iturucuar porañete ai vahe iyemboeteise? Ēgüe ehi vahe rumo sec-

oi mborerecuar guasu guapisave yepi. ²⁶ ¿Mara ehi secocuer' peye vo chupe? ¿Tüpa ñehe mombehusar ité pñha? Ahe ité, iyavei evocoi niha ivate catu vahe Tüpa ñehe mombehusar sui. ²⁷ Ahe chupe ité Tüpa icuachi-apri aracahendar pipe aipo ehi:

'Amondora che ñehe mombehusar nde renondeve nde raperã moingatu ñgua' ehi.

²⁸ Aracahe suive ndipoi eté ivate catu vahe Juan sui. Yepe ahe ivate catu vahe viña, Tüpa mborerecuasave rumo ava seco mbegüemi catu vahe ivate catu ichui.

²⁹ "Co iñehe renduse opacatu ava, opacatu guarepochi reroquasar yuvirecoi vahe avei oñeapiramo uca vahecuer Juan upe yuvireco: 'Supi eté Tüpa aviye vahe ité' ehi eté yuvireco cute. ³⁰ Fariseo eta rumo iyavei Moisés porocuita rese oporombohe vahe ahe noñeapiramo uca potai vahe Juan upe yuvireco, ahe viroñoño Tüpa remimbotar oyeupendar yuvireco.

³¹ "¿Mbahe rese pñha amboyoyara ava recocuer cūrteindar? ¿Mara ehi pñha secocuer? ³² Ahe inungar chíhivahe iguayi tēi vahe ocar rupi. Ipare oñehe pucupucú omboripar upe yuvireco aipo ehi: 'Oromoñehe tēi mimbí pēu, ndapepivoi eté rumo; iyavei orosapucaí tēi sapucaisa viharēhisa resendar pēu, ndapeyasehoi avei' ehi. ³³ Esepia, ou Juan Oporoñpiramo vahe oico. Ahe ndohui vahe pan iyavei ndoihui vahe uva ricuer. Pe evocoyase, 'Co mbia carugar vireco vahe' peye tupri tēi chupe no. ³⁴ Coiye che ayu, Ava Riquehír, acarú iyavei aihu tupri avei. Ipare, 'Co mbia icaru guasu ai vahe secoi, iihu guasu ai vahe avei no' peye cheu; 'Ava angaipa viyar mboripar tēi iyavei ava guarepochi reroquasar mboripar tēi' peye avei cheu. ³⁵ Ava Tüpa mbahecuasa vireco vahe rumo icuasara sembiapo rese" ehi.

Fariseo Simón serer vahe rētave Jesús secoi

³⁶ Fariseo Simón serer vahe oñehe Jesús upe: "Terecarumi che piri" ehi. Jesús evocoyase oso sētave oguapi oī mesave. ³⁷ Ahese cuña angaipa viyar evocoi tecua pendar secoi vahe oyandu ichose Simón rētave icaru ñgua. Sese viroyepota aheve mbahe sñacua vahe siru pipe seraso sepirusu vahe chupe. ³⁸ Aheve oyasehó ite oñenopiha Jesús pive iyavei güesai pipe opa tupri omoaqui ipi. Ipare opaño omombiru oha apri pipe ichui, iyavei oipirupite, oipiyere avei mbahe sñacua vahe ipi rese. ³⁹ Sepiase fariseo, ipihañemoñeta tēi: "Co mbia Tüpa ñehe mombehusar itese, oicuaño itera co cuña opoco vahe oyese ndipihai vahe viña" ehi tēi fariseo chupe. ⁴⁰ Evocoyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

⁴¹ Evocoyase Jesús aipo ehi chupe:

—Ñuvirío mbia oime virocua guarepochi mbia guarepochi mondosar sui yuvireco. Ñepeí virocua guarepochi quiniento tupri mboraviqui repirã ichui. Ambuae evocoyase cincuenta rupive virocua. ⁴² Ipare ndoicatu irise ité imboyeví ñgua yuvireco chupe, evocoi mbia guarepochi mondosar iñeroño chupe yuvireco —ehi—. Esãha, emombehu cheu, ¿uma evocoyase

osaisu catura mbia guarepochi mondosar? —ehi fariseo upe.

⁴³ —Cheu ndoyavii guarepochi virocua catu vahe ichui —ehi Simón.

—Taa, supi eté aipo ere —ehi Simón upe.

⁴⁴ Evocoyase omahe cuña rese aipo ehi Simón upe: —¡Emahe co cuña rese! Aiquesese acoi nde rēta pipe, nde nderembouimi eté i che pisei ñgua cheu; co cuña rumo güesai pipe oyosei che pi. Ipare omombiru oha apri pipe ae no. ⁴⁵ Iyavei nde ndache rovarupitei eve; co cuña rumo, acoi nde rēta pipe che reique ramomi-seve che pirupite voi eté.

⁴⁶ "Nde nderemondoí mbahe sñacua vahe che ñca rese; co cuña rumo opa tupri voi oipichi mbahe sñacua vahe che pi rese. ⁴⁷ Sese co cuña opa oipisi ñerosa oan-gaipa guasu rese. Esepia, che raisú iteanga. Acoi ava upe nañerosa tupri vahe rumo, ahe ndoporoaisu tuprii avei" ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoyase ambuae ava ichohopri oguapi vahe yuvinoi aheve, ahe aipo ehi oyeupe yuvireco:

—¡Uma pñha co mbia iñero vahe ité angaipa upe! —ehi.

⁵⁰ Jesús rumo aipo ehiño cuña upe:

—Nde yeroyasa pipe ereipisi pñsirosa. Sese eso tupriño eico —ehi.

Cuña oipñivii vahe Jesús yuvireco

8 Ipare Jesús oguata opacatu tecua rupi, omombehu ñehesa aviye vahe Tüpa mborerecuasa resendar oico. Doce vahe apóstol supive yuvirecoi.

² Cuña avei yuviraso supi, ahe ombogüera vahecuer carugar rerecosa sui imbaherasisa sui avei no. Ahe ipãhuve avei María secoi, Magdalena serer yoapisa vahe, ahe ichui osē vahecuer siete tupri carugar;

³ iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipñivii mbahe güembiereco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvinose tecua yacatu rupi pipe sui Jesús repia ñgua yuvireco. Ipare oñemonuha guasuse yuvireco, ahese Jesús setá mbahe rese omboyoya-yoya oporombohe aipo ehi: ⁵ "Ñepeí mbia osē omaheti oico. Ahe otiapi-apiise mbahe rãhii oso, moviro oiti perí rupi. Ahe opa tēi oicambe yuvireco, iyavei vírai opa tēi yuvirohu. ⁶ Iyavei moviro tēi oiti ivi nayanai vahesave ita pãhuve. Sese cūrteí sorí; opaño rumo ipiru. Esepia niha, ivi nañaquii chupe. ⁷ Iyavei ambuae oiti yu pãhuve. Ipare oyoya tupri sorí yuvireco; yu rumo opaño oyopi. ⁸ Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepeí-peí mbahe miti sui osē" ehi.

Aipo ohe pare, Jesús oñehe pñratá iteanga aipo ehi: "¡Acoi ava osenducua pota vahe che ñehe, toyapisacaño sese!" ehi ava rehii upe.

¿Mahera pīha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi. ¹⁰ Evocoyase omboyevi chupe: “Pēu Tūpa oicua uca ité mbahe ndicuasai vahe omborerecuasa resendar; ambuae ava rumo ambohe tēi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

Jesús omombehu tupri yembohesa mbahe tīsa resendar

¹¹ “Co yembohesa resendar aipo oyapave aipo ehi: Mbahe rāhii ahe inungar Tūpa Ñehengagüer; ¹² iyavei mbahe rāhii peri rupi seitipri, ahe inungar acoi ava osendu tēi vahe Tūpa Ñehengagüer yuvireco oyapave. Ipare rumo ou vīrai chupe, ahe inungar carugar ou vahe chupe opaño oyaracua mocañi Tūpa Ñehengagüer sui ‘toviroya eme iyavei toñepisiro eme yuvireco’ oyapave tēi. ¹³ Acoi mbahe rāhii seitipri ita mahugüer rupi, ahe inungar acoi ava osendu tēi vahe Tūpa Ñehengagüer yuvireco iyavei oipisi tupri oviharetasa pipe yuvireco viña no. Ahe rumo inungar co mbahe miti ndovirecoi vahe guapo ovīracua āgua; viroya raimi tēi yuvireco. Oyepotase rumo mbahe tēi chupe, oyepēi voiño yuvireco ichui. ¹⁴ Acoi mbahe rāhii seitipri yu pāhu rupi, ahe inungar acoi osendu tēi vahe. Ipare rumo oyemboyepepi uca mbegüēño ambuae mbahe rese opihañemoñetá iteangasa pipe tēi, ombahe eta rese iyavei güemimbotarai mbahe tēi potasa pipe avei. Ēgüe ehi ahe ava inungar mbahe miti ndihai vahe ité. ¹⁵ Acoi mbahe rāhii seitipri rumo ivi aviye vahesave, ahe inungar ava vireco vahe opihañemoñetasa aviye vahe iyavei oyemoingatu voi Tūpa Ñehengagüer rese oyapisaca āgua yepi; viroya tupri ité no; yuvirecoiño ité sese. Ēgüe ehise, oyapo mbahe aviye vahe yuvireco” ehi.

Yembohesa tataendi resendar

¹⁶ “Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape āgua. ¹⁷ Esepia, ndipoi eté mbahe ñomipri, ndayasepiai vaherā curi. Iyavei yaposa vahe imombehupirēhi, icuasano itera curi.

¹⁸ “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocuasano itera” ehi oporombohe.

Jesús si, tivireta avei

¹⁹ Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vaherā yuvireco ava rehii sui. ²⁰ Oime rumo ambuae ava imombehusar chupe,

—Nde si, nde rivireta reseve nde repia pota tēi ocarve yuvireco —ehi chupe.

²¹ Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

Jesús omombituhu i ohitu vahe, ivitu ai reseve

²² Ñepe i ari Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoyase ahe yuviraso. ²³ Yuviroguata viteseve, oqueño Jesús ou. Ahese ipa pipe aviyeteramo tēi ivitu ai omboha guasu-guasú carite pipe i, omondo pota ité ipive viña. ²⁴ Evocoyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pīrata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri. ²⁵ Evocoyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyēño, ndoyembovihaiño iyavei oporandu-randu tēi oyeupe yuvireco:

—¡Mara ehi vahe pīha co mbia! Esepia niha, ivitu ai, para guasu avei omboyeroya —ehi tēi oyeupe yuvireco.

Mbia Gerasa iguar vireco vahe carugar oyese

²⁶ Coiye oyepota yuviraso Gerasa ivi rese cute, ahe ambuae ipa coti ivi Galilea rovai. ²⁷ Aheve mbia tecua iguar carugar vireco vahe secoi. Aracahe suive nani tupri ité secoi iyavei ndopitai vahe ité oi pipe yepi; Ēgüe ehi rumo ahe tehögüer ruvipa rupindar tēi secoi. Setá rupi carugar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme carugar’ oyapave yuvireco chupe viña, ahe rumo ombosando-sandoño ité iyavei carugar omoñemi ucaño ava porēhisa rupi sereco. Evocoyase Jesús osēse carite pipe sui, osovaichi ahe mbia. Sepiase rumo, ahe mbia oñenopiha voi oso so vai oñehe pīrata chupe:

—¡Eyepepi che sui, Jesús, Tūpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai carugar sereco ‘tosē ichui’ oyapave.

³⁰ —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri carugar yuviroique yaviterve. ³¹ Oimese rumo cuchi setá ocaru vahe ivitri ruambesave, carugar evocoyase oporandu chupe aipo ehi: “Toroiqueño tēi co cuchi aviterve” ehi yuvireco chupe ‘tayande mondo eme cañi tēisa apirēhi vahe pipe’ oyapave viña. “Peiqueño sese” ehi carugar upe. ³³ Ahese opa yuvinose mbia sui yuviroique cuchi aviterve cute. Aheseve voi cuchi opa yuvinoña yuviraso ivivate sui ipa pipe. Aheve ipive opa tēi eté ocañi yuvireco.

³⁴ Cuchi rãrosar osepiase ahe mbahe yuvireco, opa yuvinoña yuviraso co mbahe mombehu tecua pipe ava upe, cove rupi avei no. ³⁵ Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osepiase ahe mbia carugar rerecosarer oguapí oĩ ñipiimi, oyemonde tupri, yaracua tupri avei oico. Ahese oyembosiquiye tẽi yuvireco.

³⁶ Acoi ava osepiase vahecuer, ahe opa mbahe omombehu yuvireco co mbia carugar rerecosar cuera agüer.

³⁷ Ahese opacatu ava Gerasa pendar, yivirindar avei Jesús upe, “Esiri cohave sui” ehi yuvireco. Esepia niha, osiquiyé iteanga yuvireco ichui. Evocoyase oha carite pipe. Ipare osoño. ³⁸ Yipindar rumo evocoi mbia carugar vireco vahecuer, “Tasomi tẽi nde rupi” ehi viña. Ahe rumo, “Epitaño” ehi.

³⁹ —Eyevi nde rêtave, emombehu opa opacatu mbahe Tũpa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰ Oyevise Jesús ipa rovai oso, aheve ava rehii oviharetosa pipe oipisi tupri yuvireco. Esepia niha, ava opacatu ité osãro yuvireco. ⁴¹ Ahese Jairo serer vahe oyepota oso Jesús upe, evocoi judío tũparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tẽi che rêtave che rayri mbogüera’ oyapave. ⁴² Esepia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rêtave, aheve peri rupi ava rehii yuvirasoño supi; oyemboti tupri ité yuvireco. ⁴³ Ahe ipãhu rupi oime cuña doce araviter rupi suvi yepiyere-yere vahe. Opa-opa tẽi omondo ombahe ocuera água repirã yepi; ndocuera ité rumo. ⁴⁴ Ahe cuña evocoyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui.

⁴⁵ Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehii mo oyemboya nde rese iyavei nde moañi-añii yuvireco opacatu rupi —ehi.

⁴⁶ —Che rumo aicua oime ava opoco vahe che turucuar rese. Esepia, ayandu che pĩratasa osẽse che sui —ehi Pedro upe.

⁴⁷ Ahe cuña ndoicatui oñemi. Sese oririi oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tupri apocose iturucuar rese’ ahe ndeu” ehi. ⁴⁸ Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

⁴⁹ Jesús ñehe vitesese, ahese oyepota aheve mbia Jairo rãta sui aipo ehi Jairo upe oso:

—Omano nde rayri cute. Eremañeco tẽi iri rene Porombohesar —ehiño Jairo upe.

⁵⁰ Evocoyase iñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

⁵¹ Oyepotase Jairo rêtave oso, aheve ndomoiingue uca potai eté ava oyeupi. Pedro, Santiago, Juan iyavei cuñatai yesupa upeño oipota seique água. ⁵² Aheseve opacatu ava oyaseho atĩ, ndoyembovĩhai tẽi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tẽi ou —ehi.

⁵³ Ava rumo opuca ete-eteño seroyaẽhisave yuvireco. Esepia niha, ahe oicua ité imanose yuvireco viña.

⁵⁴ Evocoyase oipopisi cuñatai. Ipare aipo ehi chupe: —¡Cuñatai, eñarapuha! —ehi.

⁵⁵ Ahe evocoyase oñarapuha voi eté ocuerayevi.

Ipare Jesús, “Pembocarú” ehi iyepota upe. ⁵⁶ Iyesupa evocoyase, “¿Mara ehi rutei pĩha co?” ehi tẽi yuvireco chupe. Jesús rumo omombehu chupe: “Ndapemombehu chietera que ñepeí ava upe” ehi.

Jesús doce güemimbohe omondo Vu Tũpa mborerecuasa resendar mombehu água

9 Jesús opa omonuha güemimbohe doce vahe oyeupe. Ipare omondo opĩratasa opacatu upe carugar ambuae-ae tẽi vahe imboyepepi água ava sui iyavei ava mbogüera água imbaherasisa sui. ² Opa omondo Vu Tũpa mborerecuasa resendar mombehu água, ava imbaheasi vahe mbogüera água avei.

³ Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe rĩru, tembihu, que guarepochi avei no. Perasora rumo ñepeí güeraño pe turucuar; ndahei chira ñuvirio peraso. ⁴ Pepitami ranera ñepeí oĩ pipe güeraño tecua yacatu peico. ⁵ Acoi ava ndape moingue uca potaise güeta pipe yuvireco, peyepipiñora ichui iyavei peipipetera pe pi sui ivi cuhi ‘toicua Tũpa ñemoĩrosa oyeupendar yuvireco’ pe hesave —ehi güemimbohe eta mondo.

⁶ Evocoyase opa yuvinoñe yuviraso, iyavei oñemosai opacatu tecua rupi omombehu Tũpa Ñehengagüer pĩsirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

Herodes, “¿Mara ehi pĩha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera pĩha?” ehi tẽi. Esepia niha, aipo, “Juan ocuerayevi” ehi yuvireco chupe. ⁸ Ambuae aipo ehi: “Tũpa ñehe mombehusar Elías, ahe tẽi oñemoporẽhi iri” ehi yuvireco. Ambuae aipo ehi: “Que ñepeí Tũpa ñehe mombehusar arachendar revo, ahe tẽi ocuerayevi” ehi yuvireco viña. ⁹ Herodes rumo aipo ehi:

—Che niha ayasia uca Juan áca —ehi—. ¿Uma rerãcua pĩha evocoyase ayandu? —ehi tẽi.

Sese Herodes osepiase pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepepi ava rehii sui, viraso ivi iporupirêhisave tecua Betsaida cotive. ¹¹ Ahe ava rehii rumo oyanduse yuvireco, yuvirasofno saquicuei. Evocoyase, “Perioño” ehi chupe. Ipare oñehe Vu Tüpa mborerecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cõi va-hesa rupi? Esepia niha, cohava ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tõi rumo pan orovireco, ñuviriomi tõi avei pira, toroso ayase co ava opacatu remihura re-rocua —ehi yuvireco chupe.

¹⁴ Esepia niha, cuimbahe retacuer cinco mil tupri.

Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ëgüe ehi semimbohe yuvireco chupe. Ipare oguapi opacatu ava yuvireco. ¹⁶ Evocoyase oipisi poyandepo pan iyavei ñuvirio pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo ãgua yuvireco. ¹⁷ Evocoyase opacatu ava ocaru vahe ihĩtaropa tõi yuvireco. Ipare semimbohe omboapipopa doce tupri iruova sembihu rumbirer yuvireco.

Pedro, “Jesús, Tüpa Rembiporavo Poropĩsrosar secoi” ehi

¹⁸ Ñepepi ari pipe Jesús oyeruqui ahe ae güemimbohe pãhuve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

¹⁹ —Amove ava, “Juan Oporoãpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tüpa ñehe mombehusar aracahendar ocuerayevi” ehi yuvireco ndeu —ehi.

²⁰ Evocoyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tüpa Rembiporavo Poropĩsrosar ereico —ehi Pedro imboyevi chupe.

Jesús omombehu omano ãgua

²¹ Ahe rumo aipo ehi güemimbohe eta upe: “Pemmombhui rene Tüpa Rembiporavo che recosa ava upe” ehi. ²² Iyavei aipo ehi chupe:

—Che, Ava Riquehir, che paraisu itera, iyavei opacatu judio rerecuareta, pahi rerecuar ivate catu vahe iyavei Moisés porocuita rese oporombohe vahe remiamo-

tarêhi aicora. Ahe avei che yuca ucara yuvireco; mbosapi ari rupi rumo acuerayevira —ehi.

²³ Ipare aipo ehi opacatu upe:

—Acoi oguata pota vahe che rupi, topoi mbahe güemimbotar tõi aposa sui iyavei inungar-ra curusu rese ovosiira viña, toyemoingatu voi che recocuer rese oparaisu ãgua ari yacatu rupi iyavei toguata tupri che rupi. ²⁴ Esepia, acoi ava güetecuer tõi raisupar ocañi tõi itera; acoi ava omocañi tõi vahe rumo güetecuer che recocuer rese, ahe oñepisirora. ²⁵ Esepia, ¿aviye ai angahu pĩha ava upe opacatu mbahe co ivi pipendar pisi ãgua tõi, ahe ae tõi omocañise güecocuer yuvireco viña? ²⁶ Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, Ëgüe ahera ichui acoi ayevisé che reco pĩratasa pipe, che Ru reco pĩrata porañetesa pipe avei sembuguai rehii iva pendar maranehi reseve curi. ²⁷ Supi eté, oimera amove cohava ava nomano vitei chivaherã, osepia rane itera ouse Tüpa mborerecuasa yuvireco curi —ehi.

Jesús ñecuñaaro agüer

²⁸ Ocho ari pare Jesús oyeupi ivitri rese oso oyerure ãgua. Pedro, Santiago iyavei Juan ahe viraso oyeupi.

²⁹ Oyerure vitesese, oñecuñaaro sepiaca. Iturucuar evocoyase sendi, morochi eteanga. ³⁰ Ahese ñuvirio ava oyemboyecua yivii imoñeta yuvinocha. Evocoi ava yuvirecoi vahe ahe Moisés, Elías avei. ³¹ Oyere tupri sendigüer iporañetesa yuvireco sese, iyavei co ñuvirio mbia oñehe imano ãgua rese yuvireco chupe: “Nde niha ereyemomborarara nde mano ãgua Jerusalén pipe eico” ehi yuvireco chupe. ³² Yepe Pedro, ondugüer reseve sopesi eteanga yuvireco viña. Aviyeteramo tõi opa sopesii yuvireco ichui. Ahese osepia Jesús porañetesa yuvireco iyavei co ñuvirio mbia yuvinocha vahe yivii no. ³³ Evocoi mbia oyepépise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teypami: ñepepi ndeu nara, ambuae Moisés upe, ambuae evocoyase Elías upe nara —ehi.

Pedro rumo ndoicuai eté aipo ohesa. ³⁴ Iyavei iñehe vitesese, aviyeteramo tõi iporêhi iva quiha, oyopipa tupri ité. Evocoyase osiquiye tõi yuvireco. ³⁵ Ipãhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu iñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae ihãise yuvireco. Semimbohe rumo oyeupe tõi ovireco yuvireco; ndomombehu vitei eté ava upe mbahe osepia vahecuer yuvireco.

Jesús ombogüera chĩhivahe carugar rerecosar

³⁷ Ahere ayihive, ogüeyise ivitri sui yuvireco, setá ava oyugüeru Jesús rovaichi yuvireco. ³⁸ Ahese mbia ava pãhuve aipo ehi pĩrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité;

³⁹ carugar rumo opoco sese, omoase pucu-pucu uca

yepi iyavei omoeōha-ōha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui. ⁴⁰ Amombehu tēi niha nde remimbohe upe 'tomboyepepimi tēi carugar ichui' che yapave viña; nomboyepepi eté rumo ichui yuvireco —ehi.

⁴¹ Ahe omboyevi:

—¡Too, ndapeyeroya tupri vitei eté che rese, co coti tēi vite pe pihañemoñetasa! ¿Mbovi rupi rutei vo aico vitera pe pãhuve che ñemosasa pipe? Eru nde rahir co have cheu —ehi ahe mbia upe.

⁴² Chĩhivahe oyemboyase rumo sese, carugar omboviapi voi imondo ivive, imoeōha iri. Jesús rumo oñe-he pĩrata carugar upe imose ãgua chĩhivahe sui. Ahese chĩhivahe ocuera tupri ité. Ipare omboyevi tu upe.

⁴³ Ahese opacatu ava, "¡Mara ehi rutei!" ehi tēi yuvireco Tũpa pĩratasa rembiapo aviye vahe repiase.

Jesús omombehu iri omano ãgua

Opacatu ava ndoyembovihal viteseve yuvireco, ahese aipo ehi güemimbohe upe:

⁴⁴ —Pesendu tupri che ñehe; peresarai eme ichui: che, Ava Riquehir, imondopri aicora che amotarẽhimbar povrive —ehi.

⁴⁵ Semimbohe rumo ndosenducuai eté oyeupe ñehesa yuvireco. Esepia niha, Tũpa ndoipotai eté senducua ãgua chupe; osiquiye chupe oporandu ãgua yuvireco yepi.

¿Ava vo seco ivate catu vahe?

⁴⁶ Coiye semimbohe eta omboipi oyeecopi-copi yuvireco '¿ava ité pĩha ivate catu vahe?' oyapave.

⁴⁷ Jesús rumo oicuaño ipihañemoñetasa yuvireco. Evocoyase oipisi chĩhivahemi seru oipive imoha. ⁴⁸ Ipare aipo ehi güemimbohe eta upe:

—Acoi ava oipisi vahe co chĩhivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pãhu pendar, ahe aviye catu vahe —ehi.

Acoi yande mboyoyasar, ahe ndahei yande amotarẽhisar

⁴⁹ Evocoyase Juan aipo ehi chupe:

—Ore mbohesar, orosepia niha mbia ombogüera vahe carugar pĩratasa sui ava nde rer pipe oico; ore rumo ndoroipotai chupe evocoyase seco ãgua. Esepia niha, ndahei yande rupindar secoi —ehi.

⁵⁰ Jesús rumo,

—¡Aní ndapeipotai chupe! —ehi—. Esepia niha, evocoyase nungar ava ndahei yande amotarẽhisar; ahe rumo yande mboyoyasar —ehi güemimbohe eta upe.

Jesús oñehengata Santiago upe, Juan upe avei

⁵¹ Virovise rumo ari ivave Jesús so ãgua, ahese ahe aipo ehi: "Yaso ru Jerusalén ve cūrítei" ehi. ⁵² Evocoyase omondo ava güenonera. Ahe yuviraso tecua Samaria ivi rupi ipituhu ãgua moingatu viña;

⁵³ Samaria iguar rumo nomoingue potai eté güetave yuvireco. Esepia, oicua Jerusalén ve ichose yuvireco.

⁵⁴ Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mocañi ãgua —ehi yuvireco chupe viña.

⁵⁵ "¡Aní!" ehi oyemboyere chupe. ⁵⁶ Ipare yuviraso ambuae tecuave.

Oguata pota vahe Jesús rupi

⁵⁷ Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

⁵⁸ Ahe rumo aipo ehi:

—Aguara vireco güetara, vĩrai avei vireco guaiti; che rumo, Ava Riquehir, ndarecoi que che rēta che pituhu ãgua —ehi chupe.

⁵⁹ Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

⁶⁰ —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tũpa mborerecuasa resendar ava upe —ehi.

⁶¹ Evocoyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rēta mbahe moingatu che so ãgua —ehi.

⁶² —¡Aní! —ehi ahe mbia upe—. Esepia, inungar acoi oipisi vahe ivi mboyeresas imohivi tupri ãgua, omahese rumo guaquicuei coti, evocoyase nungar naporai Tũpa mborerecuasave yuviroique vahe —ehi.

Jesús oyocuai setenta y dos tupri güemimbohe

10 Ipare yande Yar oiporavo setenta y dos ava ñepeipei tecua rupi ñuvirío-río güenonera.

² Yipindar rumo aipo ehi: "Supi eté mbahe imonuhapirã setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha ãgua" ehi. ³ "Peso, opomondo ovesami nungar ava mbahe mimba oñaro vahe nungar pãhuve. ⁴ Peraso rene mbahe riru iyavei guarepochi siru reseve. Ndapemondugüei chiveira pe pitaqui; iyavei aní pepita 'avirave' apo ava upe peri rupi.

⁵ Acoi peiquese que oi pipe, yipindar rumo peyapo ranera: 'Avirave. Tũpa tape rovasa' peyera. ⁶ Acoi aheve oimese ava aviye vahe, ahe oipisira Tũpa porovasasa; anise evocoyase ndipoi chira porovasasa chupe nara.

⁷ Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rēta rupi-rupi tēi. Ñepeipei pipe güeraño pepitañora.

⁸ Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui. ⁹ Ahe pendar imbaheasi vahe evocoyase pembogüerara, iyavei aipo peyera chupe: 'Tũpa mborerecuasa namombriimi pe sui' peyera.

¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera: ¹¹ ¡Co pe recua pipendar ivi chimborer oya vahe ore pi rese oroipipete oreyesui, peicua catu, ore hesa pipe. Peicua tupri rumo Tüpa mborerecuasa namombriimi pe sui' peyera chupe. ¹² Supi eté acoi ari cañi oyepotase, oimera Tüpa ñemoirosa ahe tecua pendar upe ivate catu vahe ava tecua Sodoma pendar sui" ehi güemimbohe eta upe.

Opacatu tecua ndiporeroyai vahe

¹³ ¡Peparaísu ava tecua Corazín pendar, pe avei peparaísu tecua Betsaida pendar! Esepia, acoi poromondiisa pe pãhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharêhisa resendar, tanimbu avei omondora oãca rese oangaipa mboasisa pipe yuvireco viña no. ¹⁴ Pe rumo peipisira ivate catu vahe Tüpa ñemoirosa ava Tiro, Sidón pendar sui ari cañi pipe coiye. ¹⁵ Pe avei no tecua Capernaum pendar, ¡pe-moha co ivave pe reco ãgua viña! ¡Pe mombosapara rumo ivicuar ipicucu catu vahesave!

¹⁶ "Acoi ava oyapisaca vahe pe ñehe rese yuvireco, ahe evocoyase oyapisaca avei che ñehe rese. Iyavei acoi ava pe mboyepipiño vahe oyesui, ahe evocoyase che avei che mboyepipi oyesui yuvireco. Acoi ava rumo che mboyepipiño vahe oyesui, ahe evocoyase che mbousar avei omboyepipiño oyesui" ehi güemimbohe upe.

Oyevipa iri ava setenta y dos vahe

¹⁷ Oyevipase ava setenta y dos vahe, oviharetasave aipo ehi yuvireco chupe:

—¡Ore Yar, carugar avei eté niha ore mboyeroya etepri yuvireco nde rer pipe! —ehi.

¹⁸ Evocoyase aipo ehi güemimbohe eta upe:

—Taa, asepia ité niha carugar rerecuar oviapise iva sui overa vahe nungar. ¹⁹ Che niha amondo pĩratasa pëu peguata vaheñã mboi iyavei mbahe rumbiquãpe hari rupi opacatu pe amotarêhisar pĩratasa reroyi ãgua, que mbahe pe momaraêhi ãgua avei. ²⁰ Peyemboviharetei rene carugareta pe mboyeroysa. Iya rumo peyemboviha pe rer iva pendar icuachiapri rese —ehi güemimbohe eta upe.

Jesús oviharete

²¹ Ahe pipeve voi Jesús, Espíritu Santo rese, vorivete-sa pipe aipo ehi: "Che Ru, che oromboetei. Nde niha iva Yar, ivi Yar avei no. Esepia niha, ereñomi co mbahe ava oyesui tēi mbahe oicua vahe sui iyavei co ivi pipendar ava imbahecuva vai vahe sui avei no. Eremboyecua rumo co mbahe ava ndoyembohe tupri vahe upe nde rese oyeroyase. Ahe niha ereipota ité, che Ru" ehi.

²² "Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi

que ava upe aicua uca potase, aicua uca tupri aveira" ehi ava eta upe.

²³ Evocoyase omahe güemimbohe eta rese, chupe güeraño aipo ehi: "Perorivete catu co mbahe pesepia vahe rese. ²⁴ Esepia niha, setá etepri ava Tüpa ñehe mombehusar yuvirecoi vahe iyavei mborerecuar guasu eta arachendar osepi pota tēi mbahe pe rembiepia; ndosepia eté rumo yuvireco. Osendu pota tēi co pe remiendu yuvireco; ahe rumo ndosendui avei yuvireco" ehi güemimbohe upe.

Jesús porombohesa Samaria iguar recocuer sui

²⁵ Iyavei no Tüpa porocuita rese oporombohe vahe oso Jesús upe secoãha ãgua, mbahe rese oporandu:

—Porombohesar, ¿mara ahera vo vichico teco apirēhi vahe rereco ãgua? —ehi chupe.

²⁶ Ahe omboyevi:

—¿Mara ehi vo Moisés porocuita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

²⁷ Evocoyase oporombohe vahe omboyevi:

—"Eresaisura nde Yar Tüpa opacatu nde pihá pipe, opacatu nde recocuer pipe, opacatu nde pĩratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar" ehi Moisés porocuita —ehi chupe.

²⁸ —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererecora tecovesa apirēhi vahe —ehi co mbia upe.

²⁹ Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

³⁰ Evocoyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvinose ava ndipihai vahe yuvireco chupe. Ahe virocuapa imbahe yuvireco ichui, iturucuar opacatu reseve; iyavei yuvirocuaro-cuava yuvireco sese. Ipare oyuca seni seya peri rupi yuviraso. ³¹ Ahese judío pahi ou ahe peri rupi. Evocoi mbia repiase rumo, co coti rupi oñacuasaño oso. ³² Ègüe ehi tupri avei ambuae mbia pahi pĩtiviisar levita, osepiase, oñacuasa tupriño avei oso no. ³³ Ipare rumo mbia sepia potapirēhi Samaria iguar oso ahe peri rupi avei. Ahe osepiase, oiparaisuereco. ³⁴ Evocoyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, viraso ava quesave. Aheve ihañeco sese. ³⁵ Ahere ayihive Samaria iguar osose, omondo guarepochi ahe pendar oi yar upe. Ipare aipo ehi chupe: "Esãro tuprimi tēi co ava cheu. Acoi ndehañeco catuse sese, amboepi catu irira che yevisse ndeu" ehi sēta vahe upe. ³⁶ Indó, ¿uma vo co evocoyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

Jesús oso Marta iyavei María rētave

³⁸ Ipare Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güeta pipe. ³⁹ Icupihir evocoyase María serer. Ahe oguapi Jesús pive ifehe rendu oĩ. ⁴⁰ Marta rumo oyembopihavĩracua opacatu mbahe rese oico. Ipare oyemboya oso Jesús rese opihavĩracuasa pipe aipo ehi chupe:

—Che Yar, zavıye ai vo evocoi che cupihir chini tēi nde piri che poraviqui viteseve? Emombehu chupe, tou, tache pĩtivii rane —ehi chupe.

⁴¹ Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo água eico? ⁴² Iya rumo ñepe mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaherã ichui —ehi Jesús Marta upe.

Jesús ombohe güemimbohe eta yerure água rese

11 Ñepe ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure água rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera:

‘Ore Ru Tũpa, ivave ereico vahe, imboeteipri nde rer tasecoi.

Tou nde mborerecuasa oreu.

Tayaposa nde remimbotar co ivi pipe, iva pendar nungar.

³ Embou ore rembihi ari yacatundar oreu.

⁴ Iyavei ndeñero ore angaipa rese oreu.

Esepia niha, ore oreñero opacatu ore amotarēhimbar upe.

Ore mboangaipa ucai rene eve, ore renose catu mbahe tēi sui eve’ peyera —ehi

⁵ Iyavei aipo ehi no:

—Inungar co perecora pe mboripar viña. Ipare pesora ahe sētave pĩtu mbiter rupi aipo peyera chupe: ‘Che mboripar, emboumi tēi mbosapi pan cheu tamboyevíre ndeu. ⁶ Esepia, ambuae che mboripar oye-pota ou che rētave; ndarecoi eté rumo mbahe amon-domi vaherã chupe’ peyera chupe. ⁷ Ipare ahe, ‘Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apũha mbahe mondo ndeu’ ehiñora pēu viña. ⁸ Supi eté, yepe nopuhai chietera mbahe mondo pēu pe mboripar secose viña, opũhaño itera rumo ‘tache mañeco iri eme’ oyapave. Ipare omondoño itera opacatu mbahe pe porandusa pēu. ⁹ Sese aipo ahe pēu: Pe porandura mbahe rese Tũpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera peyeroquisa pipe Tũpa upe, ahese im-

boisara mbahe mbou água pēu. ¹⁰ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyerokuisa pipe omota vahe oquenda Tũpa upe, chupe imboisara.

¹¹ “Oimese tahi vahe pe pãhuve, tahir oporanduse pira rese vu upe, ¿omondora pĩha mboi tēi guahir upe viña? ¹² anise, ¿omondora pĩha oporanduse mbahe rupiha rese, mbahe rumbiquiãpe tēi chupe viña?

¹³ ¡Aní! Esepia, pe yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar omondo catura Espĩritu Santo acoi ava oyeupe porandusar upe!” ehi güemimbohe eta upe.

“Jesús víreco carugar pĩratasa oyese” ehi tupri tēi ava yuvireco

¹⁴ Ambuae ari pipe, Jesús osepia mbia carugar nomoñehengatui vahe. Evocoyase omose carugar ichui. Aheseve voi ifehengatu. Ipare ava rehii sepiase, ndoyembovihai tēi yuvireco. ¹⁵ Amove rumo ava aipo ehi tēi yuvireco: “Beelzebú, carugar rerecuar pĩratasa pipe revo omboyepepi carugar oico” ehi tēi yuvireco chupe.

¹⁶ Ambuae ava secoãhasa pipe oporandu yuvireco chupe: “Eyapo ru mbahe nde rembiapo iva pendar nde recocuer cua água” ehi tēi. ¹⁷ Ahe rumo oicuaño ipihañemoñetasa. Evocoyase aipo ehi chupe:

“Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pĩratasa ocañi tēira. Iyavei ava omu rese ae oyeamotarēhi vahe, oyemocañi aveira yuvireco no. ¹⁸ Ēgüe ehi avei niha carugar. Esepia, serecuar omboyepepise opovri pendar, ovavara oyeupe yuvireco viña. Ahese oyemocañi tēira yuvireco. Co ñehesa aipo ahe pēu. Esepia pe, ‘Beelzebú pĩratasa pipe tēi opa omose carugar ava sui oico’ peye tēi cheu. ¹⁹ Ēgüe ahese rumo viña, ¿ava pĩratasa pipe ru evocoyase pe voya omboyepepi carugar ava sui? Pe voya ae omboyequera pe ñehe pe rembiavi yuvireco pēu. ²⁰ Che rumo Tũpa pĩratasa pipe carugar amboyepepi ava sui. Sese cūrítei Tũpa mborerecuasa oyepota ité pēu.

²¹ “Inungar oime ava ipĩrata etepri vahe, iyavei víreco oyeroyasa. Ipipe osãro güeta opacatu mbahe ipipendar avei icañiēhi água. ²² Acoi ouse rumo ambuae ipĩrata catu vahe chupe, ahe osecoreroyise, opa virocua iyeroyasa ichui. Evocoyase güembierocua ahe opa viraso oyeupe.

²³ “Acoi ava ndache mboyoyai vahe, ahe che amotarēhimbar yuvirecoi; iyavei acoi ava ndosecai vahe ava cheu, ahe omosai tēi yuvireco che sui” ehi.

Carugar oyevi iri güeco agüerve

²⁴ “Acoi osēse carugar ava sui, oguata tēi ivi ipiru vahe rupi opituhu água reca. Ipare rumo ndoyosuise, ipihañemoñeta oyeupe, ‘Ayevi irira che reco agüerve vicho’ ehi. ²⁵ Aheve oyevisse, osepia iri secocuer inungar oi sahuvapri tupri. ²⁶ Sepiase, oso siete carugar napo-

rai catu vahe reca. Ichui güeruse, oyoya guasu yu-viroique co mbia piha pipe. Sese mbahe tēi catu ité secocuer yipindar güeco agüer sui" ehi Jesús ava rehii upe.

Tüpa Ñehengagüer viroya vahe sovasapri secoira

²⁷ Oñehe viteseve aipo mbahe rese, cuña ava rehii pähu pendar oñehe pírata aipo ehi:

—¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tüpa Ñehengagüer iyavei viroya vahe ité, ahe sovasapri secoira che Ru Tüpa rovaque! —ehi ahe cuña upe.

Ava eta ndaseco pōrai vahe oporandu poromondiisa rese yuvireco

²⁹ Ava rehii oyere ati vitese Jesús rese yuvireco, ahe aipo ehi: "Pe cūrteindar ava ndaseco pōrai vahe, peporandu tēi poromondiisa che recocuer cua āgua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara. ³⁰ Inungar Jonás poromondiisa secoi ava

Nínive pendar upe, ēgüe ehi aveira niha Ava Riquehir reco pipe oimera poromondiisa ava cūrteindar upe. ³¹ Acoi arí cañi pipe cuña mborerecuar guasu irohí coti secua vahe porandusave omombehura co ava cūrteindar cañipa āgua. Esepia, ahe ou amombri ivi sui Salomón mbahecuasa rendu āgua; cūrteitei rumo oime ivate catu vahe cohava Salomón sui. ³² Iyavei arí cañi pipe ava tecua Nínive pendar porandusave omombehura ava cūrteindar cañipa āgua. Esepia niha, omboasise oangaipa, oyevi Tüpa upe yuvireco

Jonás omombehuse Tüpa Ñehengagüer chupe; cūrteitei rumo oime ivate catu vahe Jonás sui pe pähuve" ehi.

Tesapesa yande retecuer resendar

³³ "Ndayañomi chira tataendi que imoendi imoi; ndayamondoi chaveira que mbahevrive. Iyacatu rumo yamondora ivate tataendi rendave 'tosapape opacatu ava oique vahe oi pipe' yande yapave. ³⁴ Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pñtumimbi vahe nungar tēi. ³⁵ Sese peicua catu co poroesapasa pereco vahe, tape rereco eme pñtumimbi vahe nungar. ³⁶ Co supi eté vahe osesape tuprise opacatu pe pihave, ndipoise que pñtumimbisa nungar mbahe ipipe, evocoyase ahe inungar tataendi osesape vahe opacatu pe recocuer pipe. Ahese ndipoi que pñtu vahe pēu" ehi.

Jesús omombehu fariseo iyavei Moisés porocuita rese oporombohe vahe recocuerai

³⁷ Opase oñehe Jesús, fariseo viraso güētave imocarú. Oiquese sētave oso, oguapi mesave oí. ³⁸ Ocaru renondeve ndoyepoise rumo, ahese fariseo ndoyem-

bovihal tēi nomboaviyeise judío porocuita. ³⁹ Ahe rumo aipo ehi fariseo upe:

—Inungar igua riru iyavei tembihu riru icupe rupi tēi yoseipri, ipipe rumo iquiha opitaño ité, ēgüe ehi tupri avei pe recocuer pe monda raisave mbahe-mbahe tēi pe reco pipe. ⁴⁰ ¡Pe ndayaracuai vahe peico! ¿Ndapeicuai vo pe rete aposar, pe piha aposar avei? ⁴¹ Sese pemondo porerecosa ava iparaisu vahe upe pe recatēhiēhisa pipe. Evocoyase ipipe sui opacatu imoatirombri peicora.

⁴² "¡Peparaisu pe fariseo! Esepia, yepe pe remiti sui pemondo peyacatu ñepeipei diez vahe sui Tüpa upe viña, pe rumo ndaperoyai teco ñvisa iyavei peseyaño tēi Tüpa poroaisusa. Iyacatu rumo peyapora evocoi mbahe pe porerecosa sui pe poiēhisa pipe viña.

⁴³ "¡Peparaisu pe fariseo! Esepia, peipota pe renda porañete catu vahe pe guapi āgua tūparo pipe, iyavei peipota pēu opacatu 'avirave' oyapora ava pe mboeteisave ocar rupi yuvireco.

⁴⁴ "¡Peparaisu! Esepia, pe recocuerai inungar tehögüer ruvipa icuaēhise ava oguata ihari rupi yuvireco" ehi chupe.

⁴⁵ Evocoyase Moisés porocuita rese oporombohe vahe,

—Porombohesar —ehi—, aipo eremombehu vahe pipe niha ava ore amotarēhiño yuvireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase ndapeipñtiviimi eté ahe ava imboaviye āgua rese yuvireco.

⁴⁷ "¡Peparaisu! Esepia, pemoingatu Tüpa ñehe mombehusar ruvipagüer peico Tüpa mboeteisa angahu pipe tēi. Pe ramoi teieté rumo oyuca yuvireco.

⁴⁸ Evocoyase pemboyecua co pe ramoi eta pihañemoñeta agüer secocuer moña pipe peico. Esepia, ahe oyuca Tüpa ñehe mombehusar yuvireco. Pe evocoyase cūrteitei pemoingatu vite suvipagüer peico.

⁴⁹ "Sese Tüpa ombahecuasa pipe aipo ehi: 'Amondora che ñehe mombehusar, apóstol avei ndiporeroyai vahe upe. Ahe ipähu pendar oyucara yuvireco. Iyavei ambuae mara-mara tēi virecora yuvireco' ehi. ⁵⁰ Esepia, ava ndiporeroyai vahe cūrteindar upe ité omondora oñemoirosa opacatu oñehe mombehusar yucagüer rese aracahe suive, cūrteindar avei oyucase yuvireco.

⁵¹ Abel yuca agüer suive oyepotara Zacarías yuca agüerve oso. Ahe oyuca tūparo maranehi rocar mbahe reropovēhesa rovai. Supi eté aipo ahe pēu: Tüpa opara omondo oñemoirosa ahe yuca agüer rese ava ndiporeroyai vahe cūrteindar upe curi.

⁵² "¡Peparaisu pe Moisés porocuita rese oporombohe tēi vahe! Esepia, pe mbahecuasa aviye soquendapri pereco ava sui. Pe niha ndaperoyai, iyavei ambuae ava upe ndapeipotai seroya āgua" ehi chupe.

⁵³ Ipape Jesús osē oso ichui. Ahese Moisés porocuita rese oporombohe vahe iyavei fariseo eta oñemoiró iteanga yuvireco sese. Ahe omañeco tēi, oporandurandu mbahe rese yuvireco chupe, ⁵⁴ osecōãha-ãha tēi

mbahe pipe ‘toyavi angahu oñehe yandeu’ ohesa pipe yuvireco.

Fariseo recocuer rese Jesús oñehe

12 Ahe pipeve avei ava oñemonuha atí iteanga oyemboti tupri oyemombo guasu-guasú yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavii supi tupri vahe viña; ndahei eté rumo. ² Esepia, yaposa vahe imombehupirēhi cūrítei icuasaño itera curi. Iyavei mbahe ñomipri icuasaño aveira no. ³ Supi eté opacatu mbahe pemombehu vahe pītumimbisave, ahe sendusa tupri ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oī harive opacatu ava rovaque” ehi.

¿Uma sui pñha siquiyesara?

⁴ “Iyavei aipo ahe pēu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo āgua pēu. ⁵ Che rumo amombehura pēu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera. ⁶ “Pe pemondo poyandepo vīrai ñuvirío guarepochi rupivemi tēi yepi. Tūpa rumo ndasesarai eté que ñepei sui. ⁷ Tūpa niha oicua ñepei-pe yande ha retacuer. Sese, pesiquiye eme; pe niha ivate catu vahe ité peico opacatu vīrai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riquehir, ‘Co che reroyasar secoi’ aipo ahera che Ru upe sembiguai rovaque. ⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secoi’ ahe aveira che Ru Tūpa upe sembiguai rovaque” ehi.

¹⁰ “Iyavei opacatu oñehe-ñehe tēi vahe che, Ava Riquehir, rese, ahe chupe oimeño ñeroisa. Acoi que ava iñehe-ñehe tēi vahe rumo Espiritu Santo amotarēhisave, ahe chupe ndipoi chietera ñeroisa” ehi.

¹¹ “Acoi pe amotarēhisar che recocuer sui tēi pe rerasose porandusave pe recoñha āgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe pñha amombehura?’ ndapeyei chira. ¹² Esepia niha, ahe pipeve voi Espiritu Santo pe mbohera aviyeteramo tēi mbahe mombehu āgua rese” ehi güemimbohe eta upe.

Ñearosa mbahe pota raisa sui

¹³ Ñepei mbia ava rehii pñhu pendar aipo ehi Jesús upe:

—Porombohesar, emombehumi che riquehir upe, tomboyahomi tēi mbahe che mombahesa cheu —ehi.

¹⁴ Ahe rumo omboyeve chupe:

—Che mboripar, che ndachecuitai mbahe moingatu āgua, mbahe mboyaho-yaho āgua avei —ehi ahe mbia upe.

¹⁵ Ipare aipo ehi:

—Peñearo tupri opacatu mbahe pota raisa sui. Esepia niha, ndahei mbahe rereco atí āgua pe recocuer —ehi.

¹⁶ Ipare omboyoya ambuae mbahe rese imbohe: “Oime mbia mbahe yar, iha tupri ai eté semiti. ¹⁷ Ahese ipihañemoñeta oico oyeupe: ‘¿Mara ahera pñha che rembipoho rereco?’ ehi tēi. ‘Ndareco iri eté yapocatu āgua’ ehi. ¹⁸ Ipare ipihañemoñeta cute: ‘Aicua mbahe che rembiaporã. Opara aroyi tembihu rēta. Ichui ayapo irira ambuae tuvichá catu vahe. Aheve ayapocatura che remiti rāhii opacatu mbahe areco vahe avei no. ¹⁹ Evocoyase aipo ahera cheyeupe: Che mboripar, oime setá mbahe cheu araviter momba-momba āgua; sese cūrítei apituhura vichico, acarura, acahura iyavei ayemboviahareta no, ahera’ ehi. ²⁰ Tūpa rumo aipo ehira chupe: ‘Mbia, nandearacuai eté eico, co pñtu pipeve voi eté eremanora. Co mbahe nde rembiapocatu, ¿ava mahera pñha evocoyase?’ ehira chupe.

²¹ Ēgüe ehi eté niha que ava oyeupeñomi tēi mbahe omonuha atí vahe, iparaisu rumo Tūpa rovaque” ehi ahe mbia upe.

Tūpa osāro opacatu guahir

²² Ipare aipo ehi Jesús güemimbohe upe: “Co amombehura pēu: Ndapeyemomahenduha guasu ai chira pe remihura rese pe recove āgua, pe turucuarã rese tēi avei no. ²³ Yande recovesa rumo aviye catu vahe tembihu sui; yande retecuer avei aviye catu turucuar sui no. ²⁴ Pesepia vīrai: nomahetii vahe, nomonuhai vahe avei, ndovirecoi vahe avei mbahe rāhii rēta yuvireco. Tūpa rumo omoime mbahe itohu. ¡Pe rumo ivate catu vahe ité peico vīrai sui! ²⁵ Ndipoi eté que ñepei pe pñhu pendar oicatu vahe opihañemoñeta iteangasa pipe tēi güecocuer mbosaviño āgua. ²⁶ Supi eté ndapeicatuise yapo, ndiyai peyemomahenduha guasu ai mbahe rese.

²⁷ “Pemahecua ru mbahe potri caha pipendar rese: ndoporaviquii eté iyavei ndoipiai oturucuarã. Iyavei no yepe mborerecuar guasu Salomón vireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ²⁸ Tūpa niha omboporañete raimi tēi mbahe potri caha pipendar. Ichui sapisapaño horno pipe. ¡Ahe rumo omondo catura turucuar pēu, pe ava nimbahe reroa tupri vahe! ²⁹ Sese, ‘¿Mbahe pñha yahura, mbahe pñha yamondera?’ ndapeyei chira pe yemomahenduha guasu aisa pipe. ³⁰ Esepia, ava Tūpa reroyarēhi co ivi pipendar aipo nungar mbahe reseño tēi ipihañemoñeta yuvireco yepi. Pe Ru Tūpa rumo oicua ité pēu mbahe ipane vahe. ³¹ Aviye catu rumo pesecara pe Yar Tūpa povrive pe reco āgua, ahese omboura que mbahe ipane vahe pēu” ehi.

Ivave mbahe eta oime vahe yandeu

³² “Aní pesiquiye, che ovesa nungar, yepe pe moviromi tēi peico viña, pe Ru rumo oporoaisusa pipe oipota opovrive pe rereco āgua. ³³ Pemondopa mbahe pereco vahe ava oipota vahe upe. Ipare pemondo seprī avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda rai vahe ndoiquei chira ñomi āgua pe sui iyavei mbahe rasoi nomomarai chiaveira. ³⁴ Esepia, pe mbahe pe rembiereco setá catu vahesa rupi-rupi pe pīhañemoñeta yepi” ehi.

Peyemoingatu Tūpa Rahir yevi āgua

³⁵ “Peyemoingatu tupri che yevi āgua. Inungar tataendi ndogüei vahe, pemboyecua tupriño ité che recocuer pe recocuer pipe ava upe. ³⁶ Peico imboacuapri güerecuar osāro vahe nungar mendasa sui iyevise, oquenda imotase, omboi voi vahe yuvireco chupe. ³⁷ Aviye itera serecuar upe osepiase iyemoingatu voi; evocoyase serecuar ae niha ihañecora sese, omboguapira mesave imbocarū. ³⁸ Yepe serecuar oyeptara pītu mbiter ou viña, anise añihiveive, ahe rumo osāroño itera chupe imboi āgua yuvireco. Evocoyase serecuar aviye ai etera chupe. ³⁹ Peyapisaca tupri co rese: acoi oi yar oicuae mbahe hora imonda vahe yepota āgua, ahese opitara imonda vahe rāro güeta pipe sui mbahe renoseñhi āgua. ⁴⁰ Ēgüe peye aveira peyemoingatu che yevi āgua. Esepia niha, che, Ava Riquehir, aporoepiha tēira vitu curi” ehi Jesús viroyasareta upe.

Mbiguai omboaviye vahe ocuaita iyavei nomboaviyei vahe

⁴¹ Evocoyase Pedro oporandu Jesús upe aipo ehi: —Che Yar, ¿oreuñomi pīha eremombehu co porombohosa eremboyoya vahe ambuae mbahe rese, opacatu upe tie? —ehi.

⁴² Evocoyase ombovevi Pedro upe aipo ehi: “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarā güeta pipendar rese hañeco āgua ‘tembihu tomondo che rēta pipendar upe che porocuita rupi’ ohesave. ⁴³ Acoi omboaviyese ocuaita, ahese oviharetera güerecuar yevise. ⁴⁴ Supi eté niha, serecuar oyocuaire opacatu ombahe rese hañeco āgua. ⁴⁵ Ahe mbiguai rumo ‘ndoyepota vitei chira revo che rerecuar’ oya omboetasa cuimbahe iyavei cuña omboipi mara-mara tēi sereco iyavei ocaru, oi hu tēi osavaipo-ipoño avei oico. ⁴⁶ Ipare rumo serecuar oyeptara imahemohañiseve; ahese omombaraisu catu- ra inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua tēise mbahe güerecuar remimbotar, noyemoingatuise rumo iyavei ndoviroyaise oico, ahe evocoyase serecuar oinupara. ⁴⁸ Acoi mbiguai nomboaviyei vahe ocuaita icua tupriñehisa

pipe, nañemoirosa rutei chira chupe. Esepia niha, acoi imondosa catu vahe icuaitarā, porandusa catura chupe. Acoi oyeroya catu vahe, oporandu catu aveira sese” ehi.

Jesús reroyasa pipe sui oimera yeamotarēhisa

⁴⁹ “Che ayu tata nungar yavai vahe reru āgua co ivi pipendar upe ‘joyandu tarahu yuvireco cute viña!’ viya. ⁵⁰ Aique ranera rumo mbahe tēi che recoñhasa pipe, jēgüe ahera che paraisú itera imboaviye āgua! ⁵¹ ‘Mbahe tupri ai revo güeru co ivi pipe’ ndapeyei chira cheu. Ēgüe ehi rumo che ayu che sui ava yeamotarēhi āgua. ⁵² Esepia niha, co pipe suive ité que poyandepo tupri revo oñemu yuvirecoi vahe amove oyeamotarēhira yuvireco che recocuer sui: mbosapi oyamotarēhira ñuvirío vahe, ñuvirío vahe evocoyase oyamotarēhira mbosapi vahe yuvireco. ⁵³ Que ava oyamotarēhira guahir, anise tahir evocoyase oyamotarēhira vu; cuña oyamotarēhira omembri, imembri evocoyase oyamotarēhira osi; sovayar oyamotarēhira vovayar” ehi güemimbohe upe.

Iva pendar poromondiisa mboyecua

⁵⁴ Ipare Jesús aipo ehi ava rehii upe: “Pe pesepiase mbahe pītu ari sosa coti sui opūhase, ahese, ‘Oquirá’ peye. Ēgüe ehi eté oqui. ⁵⁵ Iyavei acoi ivitu oipeyuse irohí coti sui, ahese, ‘Sacú iteangara’ peye. Ipare ēgüe ehi eté. ⁵⁶ ¡Pe Tūpa reroyasar angahu tēi peico vahe! Pe niha peicua mbahe iva rese oyecua vahe tēi iyavei ivi rese mbahe oyecua vahe tēi mombehu, ¡mahera ru ndapeicuai peyeupe mbahe cūritei oime vahe rā mombehu peico!” ehi.

Peñero pe amotarēhimbar upe

⁵⁷ “¿Mahera napesāha ranei pe ae ité co mbahe supi eté vahe? ⁵⁸ Acoi que ava nde amotarēhisar nde soho ucase nde mondo āgua mborerecuar rovai, emoingatu tupri voi mbahe eico chupe tenondeve nde rerasoñhi āgua sovai; anise, mborerecuar nde mondora ava naporai vahe rarōsar upe. Ahe evocoyase nde roquendar. ⁵⁹ Supi eté nderesēi chietera acoi eremboepipase voi eté eresēra ichui” ehi ava rehii upe.

Aviye catu ité yañecuñaro

13 Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovēhese mbahe mimba yucapri yuvireco chupe. Ahe suvi oyeseha mbahe mimba ruvi rese.

² Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui ēgüe ehi mbahe chupe viña. ³ ¡Aní rumo! Acoi ndapemboasiise pe angaipa Tūpa upe pe yevi āgua, pe avei opara pecañi tēi. ⁴ Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava

Jerusalén pipendar sui' peye viña no. ⁵ Aní rumo; acoi ndapemboasiise pe angaipa Tüpa upe peyevi ägua, pe avei opara pecañi tēi" ehi.

Yembohesa ivira higuera ndihai vahe resendar

⁶ Evocoiyase Jesús omombehu mbahe omboyoya oporombohe ambuae mbahe rese aipo ehi: "Oime mbia vireco vahe ivira higuera oco pipe. Setá ari ahe oso sepia 'ziha pīha?' oyapave. Ndosecai eté rumo iha sese. ⁷ Ahese aipo ehi mbia oco rārosar upe: 'Esendu, che ayu pihi tēi higuera ha reca mbosapī araviter rupi. Ndasepiai eté rumo que ñepe iha sese yepi' ehi. 'Eyasiapa; ndiyai ihāi tupri tēi cohave' ehi. ⁸ Ico rarōsar rumo omboyevi chupe aipo ehi: 'Che rerecuar, ēgüe tehiño vite tēi rane co araviter; amonguhira ivi chupe. Ipare amondora ivi sū vahe mbahe repochi resendar sese. ⁹ Ahese revo ambuae araviter ihara cute; anise ité rumo, ereyasia ucaño itera' ehi ico rārosar güerecuar upe" ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepe mbituhusa ari pipe Jesús oporombohe judío tūparo pipe. ¹¹ Aheve oime cuña imbaheasi vahe, dieciocho araviter rupi ahe mbaherasisa vireco, carugar tēi omboyepami uca sereco. Sese ndoicatu opūha tupri oguata. ¹² Osepiase rumo Jesús, "Erio" ehi chupe.

—Cuña, cūrítei nanembaheasi iri eico cute —ehi.

¹³ Evocoiyase omondose opo sese, aheseve voi cuña oyemohivi. Ipare omboetei Tüpa oico. ¹⁴ Judío tūparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboraviqui ägua; ahe ari pipe peyura peposano ägua, ndahei chira mbituhusa ari pipe —ehi.

¹⁵ Evocoiyase ahe mbia upe omboyevi aipo ehi:

—Pe Tüpa reroyasar angahu tēi peico vahe, ¿nomboihui vo pe pāhu pendar acoi güeimba tivī iyavei guaricu mbituhusa ari pipe yuvireco yepi no? ¹⁶ Co rumo cuña, Abraham suindar Carugar omombaheasi vahe dieciocho araviter suive sereco, ¿ndiyai eté pīha evocoiyase imbogüerasa mbituhusa ari pipe? —ehi tūparo pendar rerecuar upe.

¹⁷ Aipo ehise, opacatu yamotarēhisar yuvinochi tēi yuvireco ichui. Ambuae ava rumo oyembovihaño opacatu Jesús rembiapo osepiase yuvireco.

Yembohesa mostaza rāhii suindar

¹⁸ Evocoiyase Jesús aipo ehi avei: "¿Mbahe nungar pīha Tüpa povri pendar, iyavei mbahe rese vo amboyoyara? ¹⁹ Oyoya tupri ité mostaza rāhii rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sāca rese vīrai rehii oyapo guaitirā" ehi oporombohe.

Yembohesa pan mboapeposa sui

²⁰ Evocoiyase Jesús aipo ehi iri: "¿Mbahe rese pīha amboyoyara Tüpa povri pendar? ²¹ Oyoya tupri co pan mboapeposa rese, acoi cuña omboyeseha tupri vahe mbosapī sāhambri trigo cuhi rese opacatu imboapepo ägua yepi" ehi oporombohe.

Jesús peri icāhimi vahe nungar

²² Ipare Jesús osoño Jerusalén ve, opita-pita tecua yacatu rupi oporombohe oico. ²³ Ahe supi ichose, ñepe mbia oporandu chupe aipo ehi:

—Che Yar, ¿supi eté pīha moviromi tēi ava oñepisiro-ra yuvireco? —ehi.

Ahe evocoiyase omboyevi chupe:

²⁴ —Peyemoviracua tupri catu peique ägua oquendipi cāhimi rupi. Esepia niha, supi eté setá ava osāha tēira yuviroique vahe ahe oquenda rupi yuvireco viña, ndoyuviroique catui chira rumo yuvireco. ²⁵ Supi eté ahe inungar oi yar ouse oquenda mboya viña. Amove ava evocoiyase ocarve yuvirecoi vite vahe omota tēira oquenda, 'Ore yar, emboimi tēi oreu' ehi tēira yuvireco. Ahe rumo aipo ehiñora chupe: 'Aní, ndopocuai vahe rumo pe' ehiñora chupe. ²⁶ Evocoiyase ahe aipo ehi tēira yuvireco: 'Ore niha orocarua vahe, oroihu vahe nde piri, iyavei ore mbohe ore rocar rupi eve yepi' ehi tēira yuvireco chupe. ²⁷ Ahe rumo aipo ehira: 'Ñepe reseve niha acoi, Ndopocuai vahe, ahe pēu. ¡Pesiri che sui, pe opacatu mbahe-mbahe tēi aposar!' ehiñora chupe. ²⁸ Pe rumo imomboprira pe recocuer Tüpa povri sui, sese peyaseho tēira, peyemoaitere tēira peico pesepiase Abraham, Isaac, Jacob iyavei opacatu Tüpa ñehe mombehusareta yuvirecoise Tüpa povrive ivave. ²⁹ Iyavei ava yugüerura añihivei coti sui, caharu coti sui, norte coti sui iyavei irohī coti sui, ahe evocoiyase yuviroguapira ocaru Tüpa mborerecuasave ipiri yuvireco. ³⁰ Supi eté amove ava ndoyavii ipa tēi vahe seique ägua ivave Tüpa piri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavii ahe rane oique vahe rā ivave viña. Ahe rumo ipa tēi yuviroiquera —ehi Jesús ava rehii upe.

Jesús oyaseho Jerusalén pendar rese

³¹ Ahe ari pipe oyepota moviro fariseo aipo ehi tēi Jesús upe yuvireco:

—Eyepipiño ave sui. Esepia, Herodes niha nde yuca pota oico —ehi tēi yuvireco chupe.

³² Ahe rumo,

—Peso, tapemombehu aipo mbia aguara nungar tēi upe: 'Esepia, co pipe iyavei ayihive amboyepipiñora ava sui carugareta vichico, ambogüerañora ava imbaherasisa sui, curi ayihive evocoiyase amombara che cuaita' peyera. ³³ Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tüpa ñehe mombehusar omano co coti tēi Jerusalén sui yuvireco —ehi.

³⁴ “¡Too rutei pe Jerusalén pendar, peyuca vahe Tüpa ñehe mombehúsar, iyavei ita pipe peyapi-yapi ava Tüpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive, ěgüe ahe pota tēi pe rereco viña, pe rumo ndapeipotai eté! ³⁵ Sese seyapirã tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

Jesús ombogüera mbia iruru sui

14 Ñepe mbituhusa ari pipe Jesús oso ocaru mborerecuar fariseo rētave. Aheve ambuae fariseo eta oiviro yuvireco. ² Aheve avei mbia iruru vahe secoi. ³ Evocoyase Jesús oporandu Moisés porocuaita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera āgua; aní tie? —ehi.

⁴ Ahe rumo noñeheiño yuvireco chupe. Aheve ahe opoco imbaheasi vahe rese, ombogüera. Ipare, “Eso tupriño” ehi chupe. ⁵ Fariseo eta upe evocoyase aipo ehi:

—¿Ava pñha pe pñhu pendar novinose voi chira güe-imba guaricu, anise tivi oviapise ivicuar pipe mbituhusa ari pipe viña? —ehi.

⁶ Aheve nomboyevi catui eté iñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imboyeroy-apri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucasa mendasa pietasave yuvireco, ndayaguapii chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvireco. ⁹ Ipare yande soho ucasar aipo ehira yandeu: ‘Epñha evocoi sui, co mbia toguapi eipeve’ ehira yandeu. Evocoyase yande yachĩ tēira yaso ipami tēi yaguapi. ¹⁰ Yande soho ucasa rumo yuvireco, yaguapira evocoyase ipa; yande soho ucasar ouse, aipo ehira yandeu: ‘Mbori, erio cohava tenda imboeteipri catu vahesave ore piri’ ehira. ěgüe yahera imboeteipri yaico acoi ava yuviroguapi vahe rovaque yande piri. ¹¹ Esepia niha, acoi ava oyemboivate ai vahe opara seco reroyisa; acoi ava seco mbegüe vahe rumo, ahe seco mboivate catusara curi —ehi.

¹² Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rivri, que nde mu iyavei que nde rēta cotindar imbahe eta vahe. Esepia niha, ahe omboyevira ndeu, nde soho ucara oyepiri yuvireco; ěgüe ehira evocoyase mbahe imboyevipa yuvireco ndeu. ¹³ Ereyapose rumo pieta, ereichoho ucara ava iparaisu vahe, ava ipo ichutu vahe, anise ipi chutu vahe, ipñri-pñri vahe, ndasesapisoi vahe avei. ¹⁴ Esepia niha, ahe ndoicatui mbahe mboyevi yuvireco ndeu. Opase rumo

ocuerayevi ava seco catupri vahe yuvireco, aheve ereviharetera eico. Esepia, erepisira mbahe aviye vahe Tüpa suindar —ehi.

Jesús oporombohe carusa rese

¹⁵ Iñehe renduse rumo, ñepe mbia yuviroguapi vahe mesave, ahe aipo ehi Jesús upe:

—¡Sovasapri catu ava Tüpa piri ocaru vahe imborerecuasave! —ehi.

¹⁶ Evocoyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri. ¹⁷ Ipare oyepotase ari caru āgua, aheve aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatu cute’ ehi. ¹⁸ Opacatu rumo ava, ‘Eñemosañomi tēi cheu’ ehi pñve yuvireco. Yipindar mbia aipo ehi: ‘Che rumo arocuā ivi; iya ité aso sepia. Sese eñemosañomi cheu’ ehi chupe. ¹⁹ Ambuae mbia aipo ehi: ‘Che arocuā ramo diez tupri tivi, ahe asñha ranera. Sese eñemosañomi cheu’ ehi chupe. ²⁰ Ambuae aipo ehi no: ‘Che amenda ramomi vichico. Sese tēi ndasoi chira’ ehi. ²¹ Oyeveise mbiguai, opa tupri omombehu mbahe güerecuar upe. Aheve serecuar aipo ehi oñemoirosa pipe güembiguai upe: ‘Eso voi evocoyase opacatu ocar rupi. Supi sui eru ava iparaisumi vahe, que ava ipo chutu vahe, anise ipi chutu vahe, que ndasesapisoi vahe, anise que ava ipñri-pñri vahe avei no’ ehi. ²² Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane vite rumo ava’ ehi. ²³ Evocoyase aipo ehi güembiguai upe: ‘Eguata iri ambuae perit tecua ivirindar rupi avei toyugüerumi che rētave yuvireco che piri, tomboapipopa ité che rēta yuvireco’ ehi. ²⁴ ‘Esepia niha, acoi yipindar ava aichoho uca vahe ndipoi chietera que ñepe ocaru vaherã che piri’ ehi güembiguai upe —ehi Jesús ahe mbia mbohe.

Yavai Cristo rupi guata āgua

²⁵ Ava rehii Jesús raquicuei oguata yuvireco. Sese ahe oyemboyere aipo ehi ava upe: ²⁶ “Acoi oimese que ava oipota vahe che rupi oguata āgua, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. ěgüe ndehise, evocoyase ndiyai chupe che remimbohe seco āgua. ²⁷ Iyavei que ava noñemosañomi vahe mbahe-mbahe tēi upe oiporarase ari yacatu rupi inungar-ra ocurusu rese ovosii vahe viña che rupi oguata āgua, ahe chupe ndiyai che remimbohe seco āgua” ehi. ²⁸ “Que ava pe pñhu pendar omopuha potase oi, ¿ndoyapisaca ranei chira ‘¿amomba angara pñha?’ oya-pave? ²⁹ Esepia niha, omondose oi renara yipindar. Ipare rumo nomboaviye catuise, aheve opacatu ava sepiase viroñora ³⁰ aipo ehira yuvireco: ‘Aye evocoi mbia omopuha pota tēi oi viña, ndoicatui eté rumo imboaviye’ ehira yuvireco chupe. ³¹ Iyavei que mborerecuar guasu diez mil sundao vireco vahe oyeeipi potase ambuae mborerecuar veinte mil vahe vireco vahe sui, oyapisaca ranera yipindar icua tupri āgua ‘¿yaicatura

pñha setá catu vahe rese yavava?’ ohesave. ³² Esepia, ndoicatuisse, evocoyase ambuae mborerecar guasu amombri vite secoise, omondora mbahe mombehúsar mbahe tupri rese porandu água chupe. ³³ Égüe ehi avei pe recocuer ndapeseya potaise pe mbahe opacatu, égüe ehi vahe ndahei eté che remimbohe” ehi.

Yande recocuer inungar yucrí

³⁴ “Yucrí aviye vahe ité yandeu; nasehe irise rumo, ndayaicatui chietera imoehé iri água. ³⁵ Naporai eté ivi upe nara; ndiyai avei ivi mbahe repochi resendar rese oyeseha vaheerã. Evocoyase ahe imombopri tēi vaheerã. Sese aipo ahe acoi ava oyapisaca pota vahe, toyapisacaño” ehi.

Porombohesa ovesa ocañi tēi vahe resendar

15 Opacatu ava sui guarepochi rerocuasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu água yuvireco.

² Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroñro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipāhuve no —ehi.

³ Evocoyase Jesús omombehu ovesa resendar yembohesa: ⁴ “Que ñepei pe pāhuve virecose cien ovesa güeimba, ipare co ocañira ñepei ichui viña, oseya ranera evocoyase evocoi noventa y nueve tēi aviye vahe save seco água. Ipare oyevira ocañi vahe reca oso, oyosu rane itera viña. ⁵ Oyosuse, osupira oachihive vorivetesa pipe. ⁶ Ipare oyepotase güetave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira. ⁷ Supi eté égüe ehi aveira oime torivetesa guasu catu ivave acoi ñepei ava yangaipa guasu vahe oñecuñarose güecocuerai sui noventa y nueve yuvirecoi tupri vahe sui yuvireco” ehi.

Yembohesa guarepochi ocañi vahe resendar

⁸ “Acoi que cuña omocañise ñepei guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera. ⁹ Evocoyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira. ¹⁰ Supi eté égüe ehi aveira oime torivetesa Tüpa rembiguai iva pendar rehii upe que ñepei ava yangaipa guasu vahe oñecuñarose güecocuerai sui” ehi.

Yembohesa mbia rahir ocañi vahe resendar

¹¹ Aipo ehi avei oporombohe: “Oime mbia vireco vahe ñuvirio guahir. ¹² Chñhivahe catu vahe aipo ehi oyosupa upe: ‘Che ru, embou mbahe che mombahesa cheu’ ehi. Iyesupa evocoyase omboyaho ombahe

imondo chupe. ¹³ Ipare coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pipe. ¹⁴ Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoyase ndasiepoi tēi oico. ¹⁵ Evocoyase oso mboraviqui reca mbia piri aheve. Ahe mbia evocoyase omondo ocove güeimba cuchi rãro água. ¹⁶ Aheve oyemohitaro pota tēi cuchi rembihi pipe oico viña. Ndipoi eté rumo omondo vahe chupe. ¹⁷ Evocoyase oyemomahenduha tēi güeta pendar oporaviqui vahe rese: ‘¡Che ru rēlave oporaviqui vahe rumo co omoumbire guasu-guasú tēi güembihu yuvireco! ¡Che rumo che yuca pota tēi che rieporēhi che rereco cohave! ¹⁸ Sese ayevira che ru rēlave. Aipo ahera chupe: Ayemboangaipa Tüpa rese, nde rese avei no. ¹⁹ Ahese che ndahe iri chira nde rahir nungar aico; iyacatu revo ndeu, oporaviqui vahe nungar tēi che rerecoñora eve, ahera’ ehi. ²⁰ Evocoyase oyeví iri oso vu rēlave cute.

“Amombri vitemi tahir recose rumo iparaisu catu chupe, oña voi oso guahir rovañchi, oyaco osovaupte avei. ²¹ Ahese tahir aipo ehi chupe: ‘Che ru, ayemboangaipa Tüpa rese, nde rese avei; ndiya iri nde rahir che reco água’ ehi. ²² Tu rumo aipo ehi güembiguai upe: ‘Peso, taperumi aviye catu vahe turucuar pemboyemonde, pemonde avei cuã penda sese, pitaqui avei. ²³ Iyavei guaca iquira catu vahe peyuca. ¡Yayapora pieta guasu!’ ehi. ²⁴ ‘Esepia, co che rahir aviye omano vahe secoi viña, cñritei rumo oyeví iri cheu’ ehi. Égüe ehi opacatu sorivete yuvireco pieta apo.

²⁵ “Tahir cuacua catu vahe rumo ocove vite secoi. Oyevisé ou güeta rerovicave, osendu voi ipieta guasu vahe yuvireco. ²⁶ Evocoyase oporandu mbiguai upe mbahe oime vahe rese. ²⁷ ‘Nde rivri mo co oyeví tupri iri ou. Sese nde ru oyuca uca guaca iquira vahe iyevisa resendar’ ehiño. ²⁸ Evocoyase tiquehir oñemoirosa pipe, ndoique potai oyosupa uve oi pipe; tu rumo osēño ité ocarve ‘eique’ oya chupe. ²⁹ Evocoyase tahir omboyeví chupe aipo ehi: ‘Che niha setá araviter rupi oropñivii vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mboripar rese ore pieta água’ ehi vu upe. ³⁰ ‘Indó, cñritei oyepota ndeu nde rahir, omocañi tēi vahe nde guarepochi cuña ndipñhai vahe rese tēi. Ahe eremboetei catú che sui; ereyuca uca rutei guaca iquira vahe chupe’ ehi.

³¹ “Evocoyase tu: ‘Eyapisacaño, che rahir, nde niha nderesirii vahe che sui. Opacatu che areco vahe rumo nde mbahe ité yepi. ³² Cñritei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe iri’ ehi guahir upe” ehi Jesús ava eta mbohe.

Mbahe yar mbahe rese ñangarecuar ndoyemboaracuai vahe resendar yembohesa

16 Jesús aipo ehi avei güemimbohe eta upe: “Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe

mocañi tēi agüer mombehu. ² Evocoyase sereciar ñepeí opñiviisar omondo seca, ahe güeruse, '¿Mbahe vo aipo ereyapo eico; ayandu cūrítei nde rerācua? Emoingatupa tupri voiño nde poraviquisa resendar cheu' ehi, 'Nandehañeco iri chira cohove mbahe rese cheu' ehi, 'Nandehañeco iri chira cohove mbahe rese cheu' ehi chupe. ³ Evocoyase mbahe rese ñangareciar: '¿Mara ahera pñha co evocoyase vichico imombo-pri che recose che poraviquisa sui? Ndareco iri rumo pñratasa cheyese ivi rese che poraviqui āgua. Achī eteanga aveira rumo mbahe rese che porandu āgua' ehi tēi. ⁴ Aicua rumo cute mara ahera vichico: che poraviquisa sui opa che momboise, oimera che pisi tupri vaheerā oyepiri' ehi. ⁵ Evocoyase oñehe ñepeí-peí güereciar sui mbahe vinose tēi vahe rese chupe. Yipindar vahe upe oporandu: '¿Mbovi mbahe erenose tēi yande rereciar sui?' ehi. ⁶ Cien tupri chereve aceite siru tuvichagüe vahe rese' ehi. Evocoyase, 'Eguapi ru, co oime cuachiar sesendar nde yecuachía agüer. Emondoro, eyapo iri ambuae cincuenta rupindar año' ehi chupe. ⁷ Ichui ambuae mbahe vinose tēi vahe upe oporandu no: '¿Mbovi mbahe vo erenose tēi yande rereciar sui?' 'Cuatro ciento quintar rupindar' ehi. Evocoyase, 'Co oime cuachiar sesendar. Yaicuachiaro rumo tresciento veinte quintar rupindar' ehi. ⁸ Evocoyase sereciar oyanduse, 'Too, oicua ité mbahe apo' ehi ombopasa rese ombahe rese ñangareciarer ndipihai vahe upe. Esepia, ahe oyemoingatu voi oyeupe mbahe moingatu āgua. Supi eté ava ndoicuai vahe Tūpa oicua catu mbahe moingatu āgua oyeupe Tūpa reroyasar sui.

⁹ "Sese che aipo ahe pēu: peiporu pe guarepochi pereco vahe co ivi pipe pe mboripar reime āgua. Ichui opa tēise pe guarepochi, oimera pe pisi vaheerā teco apirēhisave.

¹⁰ "Acoi ava mbahe tupri chíhi oyapo vahe, ahe oyapo tupri catura mbahe tuvichá vahe. Iyavei acoi ēgüe ndehi vahe chíhi vahe rese, ēgüe ndehi chiaveira mbahe tuvichá vahe rese. ¹¹ Evocoyase ndapemboaviyese co ivi pipendar pe cuaita guarepochi rese, ahese ndaperecoi chira ivave mbahe rese hañeco āgua.

¹² Iyavei acoi ndapemboaviye tupriise pe cuaita ambuae ava mbahe rāro pipe, ¿ava pñha evocoyase omondoro pe mbahe ité pēu viña?

¹³ "Iyavei ndipoi chietera ñepeí mbiguai omboyeroya vahe ñuvirío güereciar. Esepia, ñepeí osaisu catura imboyeroya pipe, ambuae evocoyase ndoyambotai chira imboyeroya potaēhisa pipe. Égüe peye avei ndapeicatui Tūpa mboyeroya guarepochi pota raisa pipe" ehi güemimbohe eta upe.

¹⁴ Aipo ñehesa renduse, fariseo yuvirecoi vahe oguarepochi raisusa pipe oviroñro yuvireco. ¹⁵ Evocoyase aipo ehi fariseo eta upe: "Pe co ava rembiepiave pe recocuer aviye angahu pe reco viña. Tūpa rumo oicua opacatu pe pñhañemoñetasa. Esepia, yepe ava rovaque ndoyavii aviye ai vahe pe recocuer viña, Tūpa uve rumo mbahe tēi eté" ehi.

Mborocuita iyavei Tūpa mborerecuasa rese ñehesa

¹⁶ "Yipisuive Moisés porocuita iyavei Tūpa ñehe mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tūpa mborerecuasa resendar, sese ava iquerēhi catu cūrítei aheve yuviroique vaheerā.

¹⁷ "Yavai catura que ñepeí Tūpa porocuita mboaviyeēhi āgua co iva, ivi opa vaheerā sui" ehi.

Jesús oporombohe mendasa sui poiēhi āgua

¹⁸ "Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei" ehi Jesús.

Ava mbahe yar iyavei Lázaro

¹⁹ "Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe. ²⁰ Oime avei mbia iparaisu ité vahe Lázaro serer vahe. Ahe mbia icaracha atí vahe imboguapisa ivive imoi mbahe yar roquendipive. ²¹ Co mbia iparaisu catu vahe aipo ehi oyeupe, 'Tomboumi tēi que güembihu rahicuer oviapi vahe mesa sui' ehi mbahe yar upe viña. Aheve mbahe yar reimba cave oyemboya sese, icaracha osere yuvireco. ²² Omanose co mbia iparaisu vahe, ahese Tūpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

²³ "Ahese oso Tūpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve. ²⁴ Evocoyase osapucái pñrata: '¿Che ramoi Abraham, che paraisuerecomi tēi eve! Emboumi tēi Lázaro che āpecu morohisa āgua ive ocuā pipe. Esepia, che paraisu etepri co tata pñratagüer pipe vitu' ehi. ²⁵ Evocoyase Abraham omboyeví aipo ehi chupe: 'Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tēi oico' ehi. 'Cūrítei rumo Lázaro oviharete oico cohove, nde evocoyase nde paraisu eipeve eico. ²⁶ Iyavei oime co ivicuar ipicucu vahe rasaēhi āgua oreu iyavei pēu no' ehi.

²⁷ "Ahe mbia aipo ehi: 'Che ramoi Abraham, emondomi tēi Lázaro ²⁸ che rivri poyandepo vahe upe, chupe iñehe āgua. Ahe tosecuñaro güecocuer yugüeruēhi āgua co tecocuer mbahe tēisave' ehi. ²⁹ Abraham rumo, 'Vireco niha Moisés porocuita iyavei Tūpa ñehe mombehusar rembicuachiagüer yuvireco. ¡Ahe toviroya yuvireco!' ehiño chupe. ³⁰ Evocoyase, 'Taa, che ramoi Abraham, que omano vahecuer pñhu pendar rumo yuvirasose chupe, ahe evocoyase omoingatura güecocuer yuvireco viña' ehi. ³¹ Abraham rumo aipo ehi chupe: 'Acoi ndoyapisaca potaise Moisés porocuita rese iyavei ambuae Tūpa ñehe mombehusar remimombehu rese no, ndoviroyai chiaveira que ava

omano vahecuer ocuerayevise yuvireco' ehi Abraham ava mbahe yar upe" ehi.

Iparaisu itera ava oporomboangaipa uca vahe

17 Jesús aipo ehi güemimbohe eta upe: "Oimeño itera poroãtoisa che reroyasar reiti ãgua. ¡Ahe imboangaipa ucasar rumo iparaisu itera! ² Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo ãgua chihivahemi nungar mboangaipa uca rãgüer sui. ³ ¡Sese peñearo tupri! "Acoi nde mboetasa Tüpa reroyasar oyemboangaipase, pemboaracuara. Omboasi pare oyevise güecocuer tupri pipe, ahese peñerora chupe. ⁴ Supi eté acoi que ambuae ava pe amotarêhi vitese rumo siete yupagüer ñepe arí pipe, acoi ouse pëu siete yupagüer avei, 'Ëgüe ndahe iri chira' ehise, peñero chupe" ehi Jesús güemimbohe upe.

Yayeroyase Tüpa rese oime pĩratasa

⁵ Co doce tupri apóstol aipo ehi chupe:
—Emboumi oreu Tüpa rese ore yeroya catu ãgua —ehi yuvireco chupe.

⁶ Evocoyase yande Yar omboyevi chupe:
—Supi eté, Tüpa rese pe yeroyasa, yepe ndoyavii chira mostaza rãhii tahimi vahe viña, co ivira tuvicha vahe upe rumo, 'Eyeapoho ave sui. Eso eñeñeti para guasu aviterve' peyese Tüpa rese pe yeroyasa pipe, ahe evocoyase pe mboyeroya itera —ehi.

Ambuae ava rese hañecosar cuaita

⁷ "Inungar que pe pãhu pendar virecora güembigui oporaviqui vahe ivi mboyere cove, anise que guaca rãro yuvi rupi viña; ichui iyevisse, ¿'Eique, eguapi terecaru' ehira pãha sereciar chupe? ⁸ Aní eté, ahe rumo aipo ehiñora chupe: 'Emoingatu voi mbahe che tohu, che toihurã avei. Ipare nde erecarura, ereihura' ehira chupe. ⁹ 'Aviye ndeu' ndehi chietera icuai pare chupe. ¹⁰ Ëgüe peye avei mbiguai nungar pe opacatu Tüpa pe cuaitarã ombou vahe mboaviyere, 'Yande niha mbiguai tã yaico. Esepia, yande cuaita mboaviyesar tã yaico' peyeñora" ehi.

Jesús ombogüera diez tupri ava lepra pipe imbaheasi vahe

¹¹ Osose Jesús Jerusalén ve, oguata ivi Samaria iyavei ivi Galilea rupi. ¹² Oyepotase tecuamive oso, ahese yuvinosse diez ava lepra pipe imbaheasi vahe yuvireco chupe. Amombrive rumo opitaño yuvireco ichui. ¹³ Osapucái yuvireco chupe aipo ehi:

—¡Jesús, Porombohesar, ore paraisuerecomi tã evel! —ehi.

¹⁴ Sepiase aipo ehi lepra vireco vahe upe:
—Peyevi, peso, tapeyemboyecua pahi eta yuvirecoi vahe upe —ehi.

Oyevise rumo yuviraso, opa ocuera tupri omba-herasisa sui yuvireco. ¹⁵ Evocoyase ñepe ipãhu pendar, Samaria pendar, osepiase ocuerasa, oyevi chupe

osapucái pĩrata Tüpa upe imboetisave. Oñenopiha oso sovai, oyaivi, "Aviye ndeu" ehi Jesús upe. ¹⁷ Evocoyase ahe aipo ehi:

—¿Ndahei vo acoi diez tupri opa ocuera omba-herasisa sui yuvireco? ¿Aique que ru ambuae nueve yuvirecoi vahe? ¹⁸ ¡Co mbia ambuae ivi pendar güer-ãño rumo oyevi 'aviye ndeu' ohesave Tüpa uve! —ehi. ¹⁹ Evocoyase aipo ehi ahe mbia upe:

—Eñarapuha, eso tupriño. Nde poreroyasa pipe niha erecuera eico —ehi Jesús chupe.

Tüpa mborerecuasa yande pãhuve secoi

²⁰ Ñepe arí pipe fariseo eta, "¿Marase vo aipo oura Tüpa omborerecuasa pipe mbahe moingatu ãgua?" ehi Jesús upe yuvireco. Ahe omboyevi chupe:

—Tüpa mborerecuasa ndahei acoi yasepia vahe. ²¹ 'Co secoi, aheve secoi' ndapeyei chira chupe. Esepia, ahe oicove ité pe pãhuve —ehi fariseo eta upe.

²² Ipare aipo ehi güemimbohe eta upe:
—Oimera arí pe peipota tãira aico vaheã pe piri que ñepe arí rupi che, Ava Riquehir, che recosa pipe; ndache repiai chira rumo peye. ²³ Iyavei ava, 'Co secoi, aheve aipo secoi' ehi tãira yuvireco cheu. Ndape-saquicue moñai chira rumo. ²⁴ Esepia, inungar acoi overa vahe osesape guasu iva rese ocua yepi, ãgüe ahera che, Ava Riquehir, vitu arí osupitise che yevi ãgua curi. ²⁵ Yipindar rumo co ivi pipe che paraisu ranera ava cüriteindar mara-mara tã che rerecose yuvireco che repia potaëhisave. ²⁶ Inungar ava Noé recose yuvirecoi aracahe, ãgüe ehi tupri aveira che, Ava Riquehir, yevi ãgua renonde. ²⁷ Esepia, ocaru, oiñu, omendaño avei yuvireco. Oyepotase rumo arí ipapapri amarusu viapi ãgua, ahese Noé yuviroique arca pipe. Ambuae ava rumo opa ocañi tã yuvireco. ²⁸ Ëgüe ehi avei aracahe Lot recose, ava ocaru tã, oiñu tã, virocua tã mbahe omahera yuvireco iyavei mbahe mondosar tã, mbahe tãsar tã, oi aposar tã avei yuvirecoi oyapisacaëhisa pipe. ²⁹ Osëse rumo Lot tecua Sodoma sui, aviyeteramo tã oviapi tata amar nungar iva sui. Opa tupri oyuca ava rehii aracahe. ³⁰ Ëgüe ahe aveira aviyeteramo tã che, Ava Riquehir, ayemboyecua curi.

³¹ "Ahe arí pipe acoi ava güëta harive secoi vahe, ahe toique iri eme güëta pipe ombahe renose. Iyavei ava que rupi tã secoi vahe, toyevi iri eme güëtave. ³² Sese peyemomahenduha co aracahendar Lot rembireco rese. ³³ Opacatu güecocuer osaisu vahe, ahe ocañi tãira. Iyavei setecuer tã ocañi vahe, ahe rumo oñepisiro- ra" ehi.

³⁴ "Ahe pĩtu pipe oimera que ñuvirío ava vupave yuviroque vahe yugüeru: ñepe acoi che reroyasar serasosara, ambuae rumo opitara. ³⁵ Ahese avei ñuvirío cuña ohichora yuvireco: ñepe serasosara, indugüer rumo opitara. ³⁶ Ëgüe ehi aveira ñuvirío ava amombri güecua sui yuvirecoi vahe: ñepe serasosara, indugüer rumo opitara" ehi.

³⁷ Aipo ñehesa renduse, oporandu yuvireco chupe:

—Ore Yar, ¿que vo aipo ěgũe ehira mbahe curi?
—ehi.

Ahe evocoyase,

—Mbahe rehõgũer reimesave uruvu oñemonuha
atira yuvireco —ehi gũemimbohe eta upe.

**Jesús omboyoya yeruresa cuña imer mano vahecuer
iyavei mborerecuar mbahe moingatusar recocuer rese**

18 Jesús omboyoya ambuae ava recocuer sui
querẽhisa pipe yerureño ãgua ari yacatu rupi
2 aipo ehi: “Ñepei tecuave oime mbia mborerecuar
mbahe moingatusar ndosiquiyei vahe Tũpa sui, am-
buae ava sui avei. 3 Ahe tecuave avei oime cuña imer
mano vahecuer. Ahe oso co mborerecuar rẽtave,
'Oime ava oyapo mbahe tẽi eté cheu, tomboepi cheu'
ehi chupe. 4 Yipindar rumo noipitĩvii potai. Coiye catu
rumo cuña ombopihavĩracua tẽise, ipihañemoñeta iri:
'Yepe che ndasiquiyei vahe Tũpa sui, ava sui avei
ndasiquiyei vahe ité, 5 amoingatuñora rumo mbahe co
cuña che mañeco tẽisar upe. Ayapoñora semimbotar
cheu iyu pihĩhĩ ãgua' ehi opihañemoñetasave” ehi.

6 Ipare yande Yar aipo ehi: “Peyapisaca aipo mbor-
erecuar naporai vahe ñehe rese. 7 Tũpa avei niha
omoingatura mbahe gũembiporavo oyeupe yeruresar
ari, pĩtu rupindar upe yepi. Nosaro tẽi chiranera
opĩtivii ãgua yuvireco. 8 Supi eté Tũpa omoingatu voira
mbahe aviye vahe yande porandusa pipe yandeu. Co
rumo che, Ava Riquehir, ayevisa co ivi pipe vitu, oimera
ava moviromi tẽi oyeroya vite vahe che rese yuvireco”
ehi Jesús.

**Yembohesa fariseo sui iyavei guarepochi reroquasar
sui**

9 Ichui Jesús oporombohe iri ambuae ava recocuer
rese. Esepia, oime amove ava aviye ai angahu secoi
oyeupe viña, iharive rumo viroĩro ambuae ava. 10 “Ñu-
virio ava yuviraso tũparove oyerokuĩ. Ñepei ava
fariseo, ambuae evocoyase ava sui guarepochi re-
roquasar. 11 Evocoyase fariseo oso tenonde ava rem-
biepiave oyerokuĩ aipo ehi: ‘Tũpa, aviye ndeu, che nda-
hei ambuae ava nungar che recocuer; ndachemondai
vahe, ndachereco rai vahe, ndacheaguasa-guasa tẽi
vahe. Iyavei ndahei eté che recocuer co mbia ava sui
guarepochi reroquasar nungar tẽi aico no. 12 Iyavei ñu-
virio yupagũer ñepei semana pipe ayecuacu ité nde re-
cocuer rese, iyavei ñepei-peĩ cien guarepochi che po-
raviquĩ repĩ aipisĩ vahe sui amboyaho diez che porere-
cosa ndeu’ ehi. 13 Ava sui guarepochi reroquasar rumo
opitaño amombri ichui. Aheve nomahei iva rese oyer-
okuĩ ãgua oangaipa mboasisa pipe. Oyepochihanupa-
nupa aipo ehi: ‘Tũpa, che paradiserecomi eve, che an-
gaipa viyar aico!’ ehi oyerokuĩ” ehi. 14 “Sese aipo ahe
pẽu: co mbia ava sui guarepochi reroquasar opa oipisĩ
ñerosa Tũpa suindar gũõtave oso. Fariseo rumo anĩ
eté. Esepia niha, opacatu acoi oyemboivate ai vahe,
opara seco reroyisa. Acoi ava seco mbeğũe vahe rumo
seco mboivate catusara curi” ehi.

Jesús osovasa chĩhivahe eta

15 Iyavei chĩhivahe gũeru Jesús uve yuvireco sovas-
apirã. Evocoyase semimbohe osepiase yuvireco, “¿Ma-
hera vo peruño tẽi chĩhivahe?” ehi opihavĩracuasa pipe
serusar upe yuvireco. 16 Jesús rumo aipo ehi:

—¿Mahera ndapeipotai iyu ãgua! Toyugũeruño
chĩhivahe cheu. Esepia, co chĩhivahe nungar ava yu-
viroiquera che Ru Tũpa povrive. 17 Supi eté acoi
ndoipisii vahe che Ru Tũpa mborerecuasa chĩhivahe
nungar yuvireco, ahe evocoyase ndoyuviroiquei chi-
etera ipipe —ehi.

**Ñepei mbia mborerecuar imbahe eta vahe omoñeta
Jesús**

18 Ñepei mbia mborerecuar oporandu Jesús upe:
—Porombohesar aviye vahe, ¿mbahe vo ayapora
tecovesa apirẽhi vahe rereco ãgua? —ehi.

19 Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo
ñepei aviye vahe ité, ahe Tũpa secoi. 20 Ereicua niha co
porocuita aipo ehi vahe: ‘Nandeaguasai chira, ndere-
poroyucaĩ chira, nandemondai chira, nanderemirai chi-
ra ambuae ava rese, eremboyeroyara nde ru, nde si
avei’ ehi vahe —ehi chupe.

21 Ahe mbia rumo,

—Che aipo nungar opacatu amboaviye ité che
chĩhivahemi suive —ehiño chupe

22 Aipo ihese rumo,

—Ipane vite mbahe ndeu —ehi—. Emondopa rane
nde mbahe, ahe sepi evocoyase eremondora ava
iparaisu vahe upe. Ichui ererocora mbahe aviye vahe
ivave cute. Ipare ereguatara che rupi —ehi chupe.

23 Aipo oyeupe hese rumo, ahe mbia ndoyembovihai
tẽi. Esepia niha, mbahe yar ité secoi. 24 Sese omahe
aipo ehi:

—¿Yavai eté rumo ava mbahe yar reique ãgua che Ru
Tũpa mborerecuasave! —ehi—. 25 Yavai rai camello upe
yucuar rupi seique ãgua; ava imbahe eta vahe upe ru-
mo yavai catu che Ru mborerecuasave seique ãgua
—ehi.

26 —¿Ava angahu pĩha evocoyase oñepisĩrora yuvire-
co viña? —ehi sendusar chupe.

27 Evocoyase ahe chupe aipo ehi:

—Ava tẽi upe mbahe yavai eté, Tũpa upe rumo
ndayavaimi eté —ehi.

28 Evocoyase Pedro aipo ehi:

—Che Yar, ore rumo opa oroseya ore mbahe nde
rupi ore guata ãgua —ehi chupe.

29 Evocoyase aipo ehi gũemimbohe upe:

—Supi eté acoi oseya vahe que gũẽta, gũembireco,
viquehir, vivri, oyesupa, que guahir Tũpa mborere-
cuasa rese, 30 ahe setá iteanga catu oipisira mbahe
aviye catu vahe co ivi pipe oseya vahe sui. Ipare rumo
tecua ambuaeve oipisĩ aveira tecovesa apirẽhi vahe
curi —ehi.

Jesús omombehu iri omano água

³¹ Evocoyase yande Yar opa viraso co cotimi doce güemimbohe. Aheve aipo ehi: “Cūrítei yasora tecua Jerusalén ve yaico, aheve omboaviyera co Tüpa ñehe mombehusar rembicuachiagüer co che, Ava Riquehir, resendar ñehesa. ³² Che imondopri aicora ndahei vahe yande mu upe mara-mara tēi che rereco água. Che roñro-ñrora iyavei ondivi-ndivira yuvireco che rese” ehi. ³³ “Iyavei che nupa-nupara. Ipare che yucara yuvireco. Imombosapisa ari pipe rumo acuerayevira omano vahe pāhu sui” ehi.

³⁴ Semimbohe rumo ndosenducuai eté ñehe yuvireco. Esepia niha, yavai eté senducua água yuvireco chupe.

Jesús ombogüera ñepeí mbia ndasesapisoi vahe

³⁵ Evocoyase Jesús ovirovise tecua Jericó oso, aheve mbia ndasesapisoi vahe oguapi oĩ peri popive porerecosa oyeupe mondo água rese. ³⁶ Osenduse ahe ndasesapisoi vahe ava rehii piambu, ahese, “¿Mbahe vo pēu?” ehi ava upe. ³⁷ Ahe evocoyase, “Jesús, Nazaret pendar, ocuara co rupi” ehi yuvireco chupe. ³⁸ Evocoyase ahe güendapeve oñehe pĩrata:

—Jesús, David suindar, che parañsuerecomi tēi eve! —ehi chupe.

³⁹ Evocoyase ava tenonde oguata vahe oyaca-ya-caño, “Quiriri” ehi yuvireco chupe. Ahe rumo,

—David suindar, che parañsuerecomi tēi eve! —ehi pĩrataño ité chupe.

⁴⁰ Evocoyase Jesús opitase aheve, oyocuai ava seru água. Ovirovise seru yuvireco, aipo ehi ndasesapisoi vahe upe:

⁴¹ —¿Mbahe vo ereipota ayapo vaheñã ndeu? —ehi.

—Che Yar, che mbosarecomi tēira eve viña —ehi chupe.

⁴² —¿Esareco, erecuera niha! Esepia, ereyeroya ité che rese —ehi chupe.

⁴³ Ahe ramoseve ndasesapisoi vahe, osareco tupri ité; osoño ité Jesús rupi imboeteisave. Opacatu ava osepia vahe avei omboetei Tüpa yuvireco.

Zaqueo osepia pota Jesús

19 Ichui Jesús oique tecua Jericó pipe oguata oico. ² Aheve mbia mbahe yar Zaqueo serer vahe sec-oi. Ahe ava sui guarepochi rerocuar rerecuar. ³ Osepia pota tēi Jesús ‘taicua ité’ oya viña. Ndoicatu rumo opucueñise ava rehii pāhuve sepia água. ⁴ Evocoyase ahe oña tenonde oso ‘tasepia ité’ oyapave, oyeupi ivira rese ivate oĩ senonera. ⁵ Evocoyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rēlave nde piri —ehi.

⁶ Aipo oyeupe he ramoseve, Zaqueo ogüeyi voi vorivetesá pipe oipisi. ⁷ Sepiase rumo opacatu ava, “Yangaipa guasu vahe rēlave tēi oso” ehi yuvireco chupe. ⁸ Evocoyase Zaqueo opūha aipo ehi chupe:

—Che Yar, esendu rane, amboyaho tuprira che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboyevi água —ehi chupe.

⁹ —Co pipe Tüpa oipisiro ité co mbia. Esepia, ahe niha Abraham suindar avei secoi. ¹⁰ Esepia, che, Ava Riquehir, ayu co ivi pipe ava ocañi tēi vahe pĩsiro água —ehi Jesús Zaqueo upe.

Guarepochi sui yembohesa

¹¹ Aipo ñehesa rendu viteseve, Jesús oporombohe ambuae tecocuer resendar rese. Esepia, viroví Jerusalén, “Oyepota voi etera revo Tüpa mborerecuasa” ehi ava yuvireco viña.

¹² Ahe rumo aipo ehi ava upe imbohe: “Oime mbia imboyeroyapri, ahe senopri oso vaheñã amombrí oivi pendareta rerecuarã oyevise. ¹³ Oso água renonde oichohopa uca diez tupri güembiguai. Ahese opa omondo ñepeí-peí upe guarepochi sepĩrusu vahe, aipo ehi chupe: ‘Peporaviqui co guarepochi rese imboeta água che yevise nara’ ehi. Ipare oso. ¹⁴ Setá ava rumo secua pendar saquicuei tēi viroví yuvireco. Sese omondo moviro ava ‘tomombehu: Ore rumo ndoroipotai ore rerecuarã secoi água, tehi yuvireco’ oya viña.

¹⁵ “Ahe rumo mborerecuar guasu güecosa pipe oyevi ou cute. Opa uca oichoho oguarepochi pisisar ‘¿mbovi-mbovi pĩha oipisi oyacatu yuvireco?’ oya.

¹⁶ Evocoyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi. ¹⁷ Evocoyase mborerecuar guasu omboyevi chupe: ‘Mbiguai aviye vahe ereico, nde cuaita co nde poraviquisa chĩhimi vahe eremboaviye ité. Sese ereicora diez tecua guasu pendar rese hañeco água’ ehi chupe. ¹⁸ Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. ¹⁹ Aipo ehi tupri avei ahe chupe: ‘Nde evocoyase ereicora cinco tecua pendar rese hañeco água’ ehi.

²⁰ “Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco. ²¹ Esepia, che asiquiye nde sui. Nderecatēhi mete ai vahe mbahe rese. Ambuae ava poraviqui sui tēi iyavei acoi ndahei vahe mbahe nde remití, ichui tēi avei ereipisi mbahe ndeyeupe nara yepi’ ehi chupe. ²² Evocoyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehe sui aicuara nde recocuer. Ereicua ñegüe che hesa viña, ²³ evocoyase, ¿mahera ru ndereyapocatuí che guarepochi guarepochi apocatusave che yevise voi senose água cheu imboyevi catumi água viña?’ ehi. ²⁴ Evocoyase, ‘Perocua guarepochi ichui. Pemondora acoi diez rupi guarepochi omboeta vahe upe’ ehi vupindar upe. ²⁵ Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi tēi yuvireco chupe. ²⁶ Evocoyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovireco vahe setá mbahe, ichui serocuasara’ ehi. ²⁷ ‘Acoi ava che amotarēhimbar, ndache

potai vahe mborerecuarã yuvireco, ahe opara peru co-have che rovai yucapa ãgua' ehi" ehi Jesús ava eta upe.

Jesús oique Jerusalén pipe

²⁸ Jesús aipo ohe pare, oguata vite oso Jerusalén coti. ²⁹ Evocoyase coiye catu tecua Betfagé iyavei Betania rerovicave, ivitri Olivo ãpimi, aheve omondo ñuvirio güemimbohe ³⁰ aipo ehi chupe:

—Peso co tecuamive, yande rovaindarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorañora seru. ³¹ Acoi, '¿Mahera vo peyora?' ehise que ava pëu, 'Yar oiporu pota' peyorañora chupe —ehi güemimbohe upe.

³² Evocoyase semimbohe yuviraso, semimombehu rupi tupri ité osepia mbahe yuvireco. ³³ Evocoyase oy-orase guaricu,

—¿Mahera vo peyora ore reimba? —ehi iyar yuvireco.

³⁴ —Yar oiporu pota —ehiño yuvireco chupe.

³⁵ Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyepi sese oso ãgua. ³⁶ Oyeupise oso guaricu harive, oipipira ava oturucuar peri rupi senonera imboetei guasusave yuvireco. ³⁷ Ovirovise ivitri Olivo sui ogüeyi ãgua oso, opacatu ava seroyasar supi oguata vahe omboipi osapucái yuvireco vorivetesave mbahe poromondiisa sembiapogüer rese Tüpa upe ³⁸ aipo ehi yuvireco:

—¿Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tüpa tasecoi! —ehi.

³⁹ Evocoyase amove fariseo yuvirecoi vahe supi aipo ehi chupe:

—Porombohesar, eñehe nde rupi oguata vahe upe imonguiriri ãgua —ehi tã yuvireco.

⁴⁰ Evocoyase aipo ehi:

—Supi eté amombehu pëu: co ava iquiririse yuvireco, ita rumo evocoyase osapucái pĩratara che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese ⁴² aipo ehi: "¡Pesenducara tarahu co co ari pipe teco tupri amondo pota vahe pëu viña, cüritei rumo ocañi tupriño pe sui, ndapeicatu eté sepia!" ehi oyaseho. ⁴³ "Oimera rumo ari imombehupri naporai vahe pëu curi. Pe amotarëhimbar oñachi irira pe recua. Ipare oyere tupri yuvireco pe rese pëu ovava ãgua. ⁴⁴ Iyavei yuviroiquera pe recua pipe, opara pe rëta omonduru yuvireco, pe yuca aveira yuvireco. Ndipoi chietera ita que ñepeí oya vahe ambuae rese. Esepia, ndapeicuai eté Tüpa ouse pëu pe pĩsiri ãgua" ehi Jerusalén pendar rese oyaseho.

Jesús omombopa ava mbahe rerecosar tüparo pipe sui

⁴⁵ Ichui Jesús oique judío tüparo guasu pipe. Aheve omboipi ava mbahe mondosar mombopa tupri ocarve oico ⁴⁶ aipo ehi:

—Icuachiapri aracahendar pipe aipo ehi: 'Che rëta yeruresa rëtarã' ehi. Pe rumo, imonda rai vahe rëta nungar tã pereco —ehi.

⁴⁷ Ichui ahe tüparo guasu pipe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, '¿Mara yahera pĩha yuca uca ãgua viña?' ehi yuvireco chupe.

⁴⁸ Ndoicatu rumo yuvireco. Esepia, ava rehii oyapisaca iporombohesa rese yuvireco.

Jesús mborerecuasa

20 Ñepeí ari Jesús judío tüparo guasu pipe güecose, ombohe ava eta, omombehu ñehesa pĩsirosa resendar oico. Ahese yugüeru pahi eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei ² aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã? —ehi ahe ava yuvireco chupe.

³ Ahe omboyevi chupe:

—Che avei aporandura mbahe rese pëu. Pemboyevira cheu —ehi—. ⁴ ¿Ava vo Juan ombou ava ãpiramo ãgua: Tüpa pĩha, ava tã tie? —ehi ahe ava yuvirecoi vahe upe.

⁵ Ahese, "¿Mara yahera pĩha?" ehi-ehi tã oyeupe yuvireco. " 'Tüpa' yahese chupe, '¿Mahera ru ndaperoyai?' ehira yandeu. ⁶ Anise, 'Ava tã remimbou' yahese chupe, opacatu seroyasar evocoyase yande api-apira ita pipe yuvireco. Esepia, ava, 'Juan omombehu vahe ñehesa Tüpa suindar' ehi eté yuvireco chupe" ehi tã oyeupe yuvireco. ⁷ Evocoyase ahe ava, "Ndroicuai rumo Juan mbousar, que sui oporoãpiramo oico" ehiño yuvireco chupe. ⁸ Sese aipo ehi ahe ava upe:

—Sese che avei, 'Ahe iporocuita pipe co mbahe ayapo' ndahei chietera pëu —ehi mborerecuar guasu upe.

Ava mbahe tã oporaviqui vahe recocuer sui yembohesa

⁹ Ipare Jesús oñehe ava eta upe ambuae ava recocuer rese aipo ehi: "Oime mbia oñoti vahe uva oivi pipe. Ipare oseya oivi ava oporaviqui vahe upe iporu ãgua. Ichui oso pucu que amombri vahesa rupi. ¹⁰ Evocoyase oyepotase ari uva pohosa, ahese omondo ñepeí güembiguai oporaviqui vahe upe imboporandu 'tomboumi uva pohopri cheundar cheu cute' oyapave viña. Ahe rumo oinupa-nupaño imboyevi tupri tã yuvireco serecuar upe. ¹¹ Ipare ambuae güembiguai omondo iri no. Ahe oinupa-nupaño, iñehe mara-mara tã avei ipogüer tã imboyevi imondo yuvireco. ¹² Ichui omondo iri tã imombosapisa rese ambuae güembiguai no. Ahe oyapicha-pichaño imosë imondo yuvireco.

¹³ "Coíye miti yar aipo ehi: '¿Mara ahera pĩha? Amondora revo che rahir, che rembiaisu. Ahe tie revo, osepia

ase, omboyeroyara yuvireco' ehi. ¹⁴ Evocoyase ahe ava tahir repiase, 'Co aipo oipisira vu mbahe. Yayaña. Yandeu nara pãve topita co ivi' ehi oyeupe yuvireco.

¹⁵ Evocoyase ovínose miti pãhu sui, oyuca ité yuvireco. "¿Mbahe vo evocoyase oyapora ivi yar ahe ava naporai vahe upe? ¹⁶ Oura evocoyase ahe ava mocañipa ãgua, omondora ambuae ava upe oivi rese oporaviqui vaheã" ehi.

Aipo renduse,

—¡Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

'Co ita oi aposar opaño omombo yuvireco, ahe ita rumo aviye catu vahe oi moviracua tupri ãgua' ehi.

¹⁸ Acoi que oviapi vahe evocoi ita harive, opa tẽira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

¹⁹ Pahi eta rerecuar guasu iyavei oporombohe vahe Moisés porocuita rese, iñehe vitesese, oipisi pota tẽi Jesús yuvireco. Esepia, osenducua ité oyesendar iporombohesa yuvireco. Osiquiyeyño rumo ava rehii sui yuvireco.

Judío rerecuar oseoãha iri tẽi Jesús guarepochi rese yuvireco

²⁰ Ahe judío rerecuar evocoyase omondo ava ndaseco asiimi angahu vahe iviro, chupe iñehe ãgua 'toyavi angahu oñehe' oya viraso vaheã mborerecuar Pilato rovai. ²¹ Ahe evocoyase,

—Porombohesar, ore orocua nde ñehe iyavei nde porombohesa supi eté vahe. Iyavei nderem-boyoviratii vahe nde ñehe yepi. Nde rumo ereporombohe mbahe supi tupri vahe Tũpa recocuer rese.

²² ¿Aviyera pĩha yamondo guarepochi Roma pendar mborerecuar ivate catu vahe upe viña? ¿Ani tie? —ehi yuvireco chupe.

²³ Opa rumo oicua iñehe porombopasa tẽi. Sese,

²⁴ —Pemboyecua ru ñepe guarepochi cheu. ¿Ava hanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

²⁵ —Taa, pemondo ru mborerecuar uve chupendar, iyavei Tũpa upendar pemondoño ité Tũpa upe —ehi ahe ava upe.

²⁶ Ndoyavi uca catui eté iñehe ava rovaque ipisi ãgua yuvireco. Ahe rumo oyeupe imboyevise, iquiriripa tupriño oyepihamondiisa pipe yuvireco.

Porandusa cuerayevisa rese

²⁷ Ipare saduceo, ahe "ndipoi eté cuerayevisa" ehi vahe, yugüeru Jesús upe. Oporandu tẽi angahu yuvireco chupe:

²⁸ —Porombohesar, Moisés niha oseya güembicuachiagüer yandeu aipo ehi: 'Que cuimbahe omen-

da vahe omanose guahiẽhiseve, tivri evocoyase omendara sembirecocuer rese. Ahe viquehir omano vahecuer upe nara tahira oico' ehi. ²⁹ Evocoyase oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiẽhiseve. ³⁰ Ichui tivri omenda sese. Ahe omanoño avei guahiẽhiseve. ³¹ Ipare imombosapisa tivri omenda iri tẽi sese. Egüe ehi tupriño avei chupe. Ambuae ichuindar egüe ehi tupri avei omanopa yuvireco guahiẽhiseve. ³² Coiye cuña avei omano cute. ³³ Evocoyase opase ocuerayevi yuvireco, ¿uma rembireco itera pĩha omendase opacatu siete yuvirecoi vahe rese? —ehi saduceo yuvireco chupe.

³⁴ Ahe rumo omboyevi chupe:

—Co ivi pipe cuimbahe iyavei cuña omenda vahe yuvireco yepi. ³⁵ Ocuerayevi pare oicatu vahe ivave yuviroique vaheã, chupe ndipo iri chira mendasa.

³⁶ Iyavei nomanoi chietera aheve. Esepia, yuvirecoira Tũpa rahir, Tũpa rembiguai eta iva pendar nungar yuvireco. ³⁷ Moisés rebicuachía agüer pipe niha caha pãhu sendi vahe resendar oicua uca cuerayevisa yandeu. Aheve aipo ehi: "Ahe niha yande ramoi aracahendar Abraham, Isaac, Jacob Tũpa" ehi. ³⁸ ¿Tũpa ndahei omano vahe Tũpa! ¡Ahe rumo oicove vahe ité Tũpa secoi! Esepia, chupe opacatu yuvirecove vahe —ehi saduceo upe.

³⁹ Evocoyase moviro Moisés porocuita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

⁴⁰ Sese niquerẽhi iri eté mbahe rese oporandu ãgua yuvireco chupe.

¿Ava suindar pĩha Poropĩsirosar?

⁴¹ Evocoyase Jesús aipo ehi ahe ava upe:

—¿Mahera ru, "Poropĩsirosar David suindar ité" ehi yuvireco? ⁴² David teieté niha aipo ehi güembicuachía pipe:

'Yar aipo ehi che Yar upe:

Eguapi che acato coti ⁴³ acoi che amondose voi eté nde amotarẽhimbar ñenopiha ãgua nde povrive yuvireco' ehi David aracahe.

⁴⁴ ¿Mahera ru, "Poropĩsirosar David suindar secoira" peye? David teieté, "Che Yar" ehise chupe —ehi Jesús ahe ava upe.

Jesús oicua uca Moisés porocuita rese oporombohe vahe recocuerai

⁴⁵ Opacatu ava oñehe rendu vitesese, Jesús aipo ehi güemimbohe upe: ⁴⁶ "Peicua catu co Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe 'avirave' apo ãgua ocar rupi omboeteisa pipe yuvireco. Oseca avei tenda porañete catu vahe güenara otũparo pipe, carusave avei oseca tenda aviye catu vahe yuvireco. ⁴⁷ Iyavei virocuar-rocuaño tẽi cuña imer mano vahecuer rẽta ichui. Oarondaguã tẽi

avei oyerogui pucu-pucu yuvireco. Ahe rumo oipisira Tūpa ñemoirosa ipirata catu vahe yuvireco curi” ehi güemimbohe eta upe.

Cuña imer mano vahecuer iparaisu vahe porerecosa

21 Ipare Jesús osepia ava imbahe eta vahe omondose oporeciosa guarepochi riru pipe yuvireco. ² Aheve avei cuña imer mano vahecuer iparaisu vahe, omondo ñuviriomi guarepochi oporeciosa. ³ Evocoyase Jesús aipo ehi:

—Supi eté co cuña iparaisu vahe omondo catu oporeciosa opacatu mbahe yar sui. ⁴ Esepia, ava imbahe eta vahe, oguarepochi rumbirer tēi omondo oporeciosa Tūpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporeciosa āgua Tūpa upe —ehi.

Jesús omombehu tūparo guasu monduru āgua

⁵ Evocoyase amove semimbohe oñehe yuvireco tūparo guasu recocuer rese: “Co tūparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

⁶ —Oimera ari opacatu co mbahe cūritei pesepia vahe pipe ndipoi chietera que ñepepe ita oyeha vite vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa iva rese

⁷ Evocoyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

⁸ Evocoyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropñirosar aico, cūritei osupiti ari imombehupri yandeu’ ehi tēira yuvireco. Ndaperoyai chira rumo ava aipo ehi vahe. ⁹ Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serācua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

¹⁰ “Ñepepe ivi pipendar ovavara ambuae ivi pipendar rese oyeupe yuvireco. ¹¹ Ahese avei oimera ivi rirrii tuvichá vahe, tiavor, mbaherasisa opacatu-catu tēi tecua rupi. Iyavei pesepiara iva rese mbahe pe mbosiquiye vahe, poromondiisa tuvichá vahe avei curi.

¹² “Co mbahe-mbahe tēi reime renondeve rumo pe pisira yuvireco che recocuer sui mara-mara tēi pe rereco āgua. Pe reraso aveira pēu porandu āgua tūparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recocuer sui tēi. ¹³ Ipipe pemombehura che recocuer chupe yuvireco. ¹⁴ ‘Aipo ahera añehe’ ndapeyei chira pepiñemoñeta rereco pe yepepe āgua. ¹⁵ Esepia, che amondora che mbahecuasa pe ñehe āgua.

Ndoicatui chietera evocoyase pe amotarēhimbar imboyeve yuvireco pēu. ¹⁶ Pe amotarēhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pāhu pendar yuvireco.

¹⁷ Opacatu ava ndape ambotai chira che recocuer sui tēi yuvireco. ¹⁸ Nocañii chietera rumo que ñepepe pe ha pe āca sui. ¹⁹ ¡Peyemoviracua evocoi nungar mbahe upe pe ñepisiro āgua!

²⁰ “Iyavei pesepiase ava Jerusalén rese sundao oyere tuprise, peicuara evocoyase mbahe-mbahe tēi reime āgua yuvireco chupe. ²¹ Evocoyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvinose poyava avei ichui. Iyavei acoi que rupi yuvirecoi vahe, ahe toyevi iri eme yuvireco. ²² Esepia, ahe ari oimera Tūpa ñemoirosa. Ahe omboaviyera icuachiapri arachendar pipe imombehupri. ²³ ¡Iparaisu itera ahe ari pipe cuña ipuruha vahe, imembi pītani vahe avei! Esepia, oimera tecoasisa co ivi pipendar upe, ñemoirosa tuvichá vahe ahe ava recocuer rese. ²⁴ Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

Ava Riquehir yevisa

²⁵ “Iva rese iporēhira poromondiisa, ari rese, yasi rese, yasitata rese; iyavei ivi pipe, opacatu tecua rupi ava ndayaracua iri chira yuvireco. Oyembosiquiye guasu-guasú tēi aveira yuvireco para guasu riapugüer renduse. ²⁶ Ahese ava setá yaracua cañi tēira osiquiyepave yuvireco opihañemoñeta guasu aise co ivi pipe mbahe oime vaherā sui. Ahese avei iva resendar opacatu mbahe oriñira. ²⁷ Ahese ramo opacatu ava che, Ava Riquehir, che repiara yuvireco, agüeyise iva quiha rese che pīratasa rendigüer porañetesa pipe. ²⁸ Omboipise evocoi nungar mbahe, peyemonguerēhi catura, peyemopoase pe querēhisa pipe. Esepia, pe renosesa pihaivira mbahe tēi sui” ehi.

²⁹ Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei. ³⁰ Co ivira soqui ramose, yaicua cōimi ari sacú vahe yepota āgua yandeu yepi. ³¹ Na ehi aveira pēu che ñehe rupi tupri mbahe pesepiase. Sese peicuara Tūpa mborerecuasa cōimi eté secoise.

³² “Supi eté yuvirecove vitera ava osepia vahe co mbahe opase yaviye. ³³ Iva, ivi opara ocañi, che ñehengagüer rumo imboaviyesa rane itera” ehi güemimbohe upe.

³⁴ “Peicua catu, aní pemboavai etepri pe mbahe reroya āgua mbahe tēi aposa pipe, pe caguar tēisa pipe, co ivi pipendar tecocuer rese pe pihañemoñeta tēisa pipe avei. Evocoyase toposapiha eme ³⁵ inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe. ³⁶ Sese peyemoingatu, peyeroqui ari rupi co mbahe tēi sui pe

yepepi āgua, pe yemboyecua tupri āgua che, Ava Riquehir, rovai” ehi güemimbohe eta upe.

³⁷ Ēgüe ehi Jesús oporombohe ari rupi tūparo guasu pipe. Pītu pipe evocoyase opita ivitri Olivo rese.

³⁸ Iyavei opacatu ava yuviraso añihiveive tūparo guasu pipe iñehe rendu āgua yepi.

Yemomborandusa Jesús yuca āgua

22 Ovirovise Pascua pieta pan ndayapepoi vahe hu āgua, ² ahese pahi rerecuareta, Moisés porocuaita rese oporombohe vahe avei ava sui os-iquiyepave, oseca-seca tēi Jesús yuca āgua yuvireco.

³ Evocoyase Carugar oi que Judas piha pipe, ahe acoi doce tupri semimbohe pāhu pendar Iscariote serer vahe. ⁴ Ahe oso pahi eta rerecuar yuvirecoi vahe upe, tūparo rārosar yuvirecoi vahe upe avei imoñeta āgua, “Tamondo Jesús pe povrive” ehi. ⁵ Ahe evocoyase oyembovitharete yuvireco. “Yamondo guarepochi chupe” ehi voi eté yuvireco. ⁶ Judas evocoyase, “Aviye” ehi. Oseca voi ava porēhiseve Jesús mondo āgua yamotarēhimbar upe.

Yande Yar caru agüer ipa vahe

⁷ Oyepota ari yipindar vahe pan ndayapepoi vahe hu āgua. Ahe pipeve avei ovesa Pascua pieta resendar yucapri seropovēhesa yepi. ⁸ Evocoyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru āgua Pascua pieta resendar —ehi.

⁹ Semimbohe rumo,

—¿Que vo ereipota oromoingatura? —ehi yuvireco chupe.

¹⁰ Evocoyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sētave supi. ¹¹ Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera. ¹² Evocoyase ahe omboyecuara oi guasu, ivatendar pēu. Aheve pemoingatura yande caru āgua —ehi güemimbohe upe.

¹³ Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

¹⁴ Osupitise icaru āgua apóstol reseve yuviroguapi mesave. ¹⁵ Evocoyase aipo ehi:

—¿Cueseve tēi eté niha aipota acarar vahe pe piri Pascua pieta resendar rese che mano āgua renonde!

¹⁶ Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pipe —ehi.

¹⁷ Evocoyase oipisi igua riru, “Aviye ndeu” ehi Vu upe, iyavei aipo ehi:

—Co amondora pēu, perova-rova peyacatu. ¹⁸ Esepia, co pipe suive ndaihu iri chira uva ricuer acoi ouse voi Tūpa mborerecuasa —ehi.

¹⁹ Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirā pe recocuer rese. Na peyera pe mahenduhasa pipe che rese yepi —ehi.

²⁰ Ēgüe ehi avei carusa pare yapo igua riru rese aipo ehi:

—Co igua riru pipendar omboyecua che Ru remimb-otar ipiasu vahe pēu nara, ahe che ruvi ipiyerepirā pe recocuer rese nara. ²¹ Cūritei rumo oime mbia mesave yande piri che mondo vahe rā che amotarēhimbar upe. ²² Supi eté imboaviyesa itera che, Ava Riquehir, rese ñehesa yipive imombehupri. ¿Iparaisu catura rumo acoi mbia che mondosar! —ehi.

²³ Evocoyase aipo ehise, semimbohe oporandu-randu tēi oyeupe: “¿Ava piha ēgüe ehi?” ehi tēi yuvireco.

¿Ava vo ivate catu vahe?

²⁴ Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco.

²⁵ Evocoyase Jesús aipo ehi: “Ava mborerecuar co ivi pipendar oyocuai pīrata ava yuvireco yepi. Ahe chupe rumo, ‘Mbahe tupri aposar’ ehi yuvireco. ²⁶ Pe rumo ēgüe ndapeyei chira. Acoi oyemboivate pota vahe, toyemochihivaheño güeco mbegüesa pipe. Acoi ava cuaisar, tihañeco catu ambuae ava rese. ²⁷ ¿Uma piha ivate catu vahe: co mesave oguapi vahe ocaru yuvireco? ¿Sese ihañeco vahe tie? Acoi mesave oguapi vahe niha. Che rumo co aico pe pāhuve inungar pe rese ihañeco vahe.

²⁸ “Pe rumo peico vahe che rupi yepi opacatú che recoãhasa pipe. ²⁹ Sese che amondo pēu pe mborerecuasa inungar che Ru ombou cheu che mborerecuasa āgua. ³⁰ Esepia, pecarura iyavei peihura che mborerecuasave che piri. Iyavei peguapira opacatu judío recocuer rese porandu āgua” ehi güemimbohe upe.

Jesús, “ ‘Ndaicuai vahe evocoi mbia’ erera cheu” ehi Pedro upe

³¹ Aipo ehi avei yande Yar:

—Simón, Simón, esendu: Carugar oporandu pe recoãha āgua rese. ³² Che rumo ayeroqui nde rese nde yeroyasa paneñi āgua. Ereyevise cheu, emonguerēhi catu ambuae nde rivireta imoviracua uca āgua yuvireco oyese —ehi Pedro upe.

³³ —Che Yar, che rumo ayemoingatu voi eté nde rupi che so āgua nde roquendasave iyavei che mano āgua nde rupi —ehi Pedro chupe.

³⁴ —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoi mbia” erera mboisapi oyupagüer rupi cheu —ehi.

Virovi ité Jesús recoãha āgua

³⁵ Evocoyase Jesús oporandu güemimbohe eta upe:

—Opomondose acoi mbahe riru porēhi, guarepochi riru porēhi, ambuae pe pitaqui ndugüer rerasoēhise, ¿ipane vo acoi mbahe ahese pēu? —ehi.

—Aní eté —ehi yuvireco chupe.

³⁶ Evocoyase,

—Cūrítei, acoi mbahe riru vireco vahe, tovirecoveño, guarepochi riru vireco vahe, tovirecoveño avei; acoi ndovirecoi vahe quise pucu, tomondo oyeaosa quise repirã. ³⁷ Supi eté amombehu pëu: iyacatu ité imboaviye tupri ãgua co che rese ñehesa imombehupri aipo ehi vahe: ‘Ava vireco ndaseco pōrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

³⁸ Evocoyase semimbohe aipo ehi yuvireco:

—Ore Yar, cohava oime ñuvirío quise pucu —ehi.

—Ahe güeraño ité aviye —ehi güemimbohe eta upe.

Jesús oyerocu Getsemaní ve

³⁹ Ipare Jesús osë oso ivitri Olivo ve. Ahe ivitri ve oso yepi, aheve semimbohe yuviraso yuvireco supi. ⁴⁰ Oyeopotase aheve yuvireco, Jesús aipo ehi güemimbohe upe:

—Peyeroqui angaipa pe yapoëhi ãgua —ehi.

⁴¹ Ipare oyepeti güemimbohe sui, inungar ita imombosa vahe amombrimi, aheve oñenopiha, oyerocu ⁴² aipo ehi: “Che Ru, ereipotase, che renose eve co mbahe tēi sui; tayapo eme che remimbotar tēi, nde remimbotar rupira rumo” ehi.

⁴³ Evocoyase oyemboyecua Tūpa rembiguai chupe, seco momirata ãgua. ⁴⁴ Mbahe-mbahe tēi porarasa pipe oyerocu catu. Ahese sacuvor inungar tūvi osë ichui otiqui ivive.

⁴⁵ Oñarapuhase oyerocuisa sui, oyevi oso güemimbohe uve. Ahe rumo opaño yuviroque yuvirocua oviharēhisa pipe. ⁴⁶ Evocoyase,

—¡Mahera opaño peque! Peñarapuha, peyeroqui catu pe viapiēhi ãgua mbahe tēi pipe —ehi güemimbohe upe.

Jesús oipisi yuvireco

⁴⁷ Jesús ñehe viteseve, oyepota ati ava yuvireco chupe. Judas doce semimbohe pāhu pendar tenonde seci. Ahe oyemboya oso sese sovaupite ãgua. ⁴⁸ Evocoyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotarēhimbar upe? —ehi.

⁴⁹ Semimbohe eta rumo, mbahe-mbahe tēi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

⁵⁰ Ñepe rumo supindar, pahi rerecuar ivate catu vahe rembiguai nambi yasu cotindar oyasia. ⁵¹ Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. ⁵² Ichui aipo ehi güecasar opacatu pahi eta rerecuar upe, tūparo rārosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye?

⁵³ Aicose tūparo pipe pe pāhuve ari yacatu rupi, na ndapeyapoi eté co nungar cheu. Aviyēño rumo, oye-

pota ité niha pëu imombehupri Caruguar pīratasa pipe mbahe-mbahe tēi apo ãgua —ehi.

Pedro, “Ndaicuai vahe evocoi mbia” ehi Jesús upe

⁵⁴ Evocoyase Jesús oipisi yuvireco, oviraso pahi eta rerecuar ivate catu vahe rētave yuvireco. Pedro rumo amombri rupive tēi osaquicue moñaño oso. ⁵⁵ Aheve ñachimbri pipe oyatapi yuvireco, oyere tupri tata rese oyephe yuvinoi. Aheve avei Pedro ipāhuve chini.

⁵⁶ Evocoyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

⁵⁷ Ahe rumo aipo ehiño:

—Cuña, ndaicuai vahe ité ahe mbia —ehi.

⁵⁸ Iparemi tēi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndahei eté rumo che supindar aico —ehi.

⁵⁹ Ñepe hora paremi tēi, ambuae aipo ehi chupe:

—Supi eté rumo co ité supi seci vahe. Esepia, Galilea iguar ité niha —ehi.

⁶⁰ Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura. ⁶¹ Evocoyase yande Yar oyemboyere sese. Ahe ramosave oyemomahenduha: “Co pipe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese.

⁶² Ahese osë, oyasehó iteanga oso.

Sārosar mara-mara tēi Jesús vireco yuvireco

⁶³ Evocoyase ava Jesús rārosar iguay tēi yuvirocuarocua yuvireco sese. ⁶⁴ Osesacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

⁶⁵ Iyavei setá mbahe rese oñehe-ñehe tēi yuvireco chupe.

Jesús serasosa ava ñemonuhasa ivate catu vahesave

⁶⁶ Ahe ari pipe, cōhese, oñemonuha ava judío rerecuar, pahi eta rerecuar iyavei opacatu Moisés porocuita rese oporombohe vahe yuvireco Jesús reraso uca ãgua ava ñemonuhasa ivate catu vahesave, oporandu mbahe rese yuvireco chupe:

⁶⁷ —¿Supi eté vo nde Poropīsīrosar ereico? Emombehu ru oreu —ehi yuvireco chupe.

—Amombehuse rumo pëu, ndache reroyai chietera peye —ehi judío rerecuar upe—. ⁶⁸ Inungar che oporanduse mbahe rese pëu, pe avei ndapemboyevii chietera cheu viña no. ⁶⁹ Co pipe suive rumo che, Ava Riquehir, aguapira Tūpa mbahe mboavaisarēhi acato coti —ehi.

⁷⁰ Ichui opacatu ava oporandu yuvireco chupe:

—Evocoyase, ¿nde ité ereico Tūpa Rahir? —ehi.

—Supi eté niha aipo aipo peye cheu —ehi mborerecuareta upe.

⁷¹ Evocoyase ahe aipo ehi yuvireco:

—¡Indó! ¿Ava iri vo evocoyase mbahe omombeura yandeu? Yasendu niha iñehe ité cute —ehi mborerecuar oyeupe yuvireco.

Jesús serasosa mborerecuar Pilato rovai

23 Evocoyase opacatu ava opūha yuvireco Jesús reraso āgua mborerecuar Pilato rovai. ² Aheve oiñehengapo aipo ehi yuvireco:

—Orosepia co mbia oipihañemoñeta rerova atí uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropñisrosar mborerecuar ivate catu vahe aico” ehi oico —ehi yuvireco Pilato upe.

³ Evocoyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyevi Pilato upe.

⁴ Evocoyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaherã —ehi

⁵ Ahe ava eta rumo,

—Supi eté opacatu ava oipihañemoñeta mboyeaviratí uca opacatu tecua rupindar. Yipindar omboipi Galilea rupi oico. Cūrítei co Judea ve ěgüe ehiño ité —ehi ava eta Pilato upe yuvireco.

Jesús imondosa mborerecuar Herodes rovai

⁶ Pilato osenduse aipo ñehesa oporandu, “¿Supi eté piha co mbia Galilea iguar?” ehi. ⁷ “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei secoi Jerusalén ve. ⁸ Herodes sorivete Jesús repiase. Esepia, setá ari osepia pota tēi serācua anduse yepi. Evocoyase oipota ité poromondiisa oyapo vaherã oyeovaque viña. ⁹ Sese oporandu atí mbahe rese chupe. Nomboyeví eté rumo Herodes upe. ¹⁰ Aheve opacatú pahi eta rerecuar iyavei Moisés porocuaite rese oporombohe vahe eta seroñrosave oñemoñeta-ñeta tēi sese Herodes rovaque yuvireco. ¹¹ Evocoyase Herodes osundao eta reseve iñehe mara-mara tēi Jesús upe sese oguayí tēisa pipe yuvireco. Omboyemonde avei turucuar iporañete vahe pipe yuvireco. ěgüe ehi imboyeví Herodes Pilato upe. ¹² Ahe ari pipe suive oyembori Pilato Herodes rese. Ndoyeambotai vahe tie yipindar yuvireco viña.

“¡Tayaticasa!” ehi Jesús upe yuvireco

¹³ Evocoyase Pilato opa uca omonuha opacatu pahi eta rerecuar, judío rerecuareta, opacatu ava eta avei.

¹⁴ Ipare aipo ehi chupe:

—Pe niha peru co mbia cohava cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi.

¹⁵ Herodes avei, ‘Ndipoi mbahe sembiapo naporai vahe

imano āgua’ ehi. Sese omboyeviño Jesús imbou cheu.

¹⁶ Ainupa ucara rumo. Ipare amoseñora —ehi Pilato.

¹⁷ Pascua pieta pipe iya ité Pilato ava upe ñepei soquendapri mose āgua.

¹⁸ Opacatú guasu rumo ava oñehe pīrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

¹⁹ Co mbia Barrabás tecua pipe mbahe tēi mopuhasa sui iyavei oporapichisa sui oyeoquenda uca vahe. ²⁰ Pilato rumo omose pota Jesús viña. Sese oporandu iri ava upe imose āgua. ²¹ Ahe rumo osapucaí pīrata catu yuvireco:

—¡Aní, tayaticasa! ¡Tayaticasa curusu rese! —ehi atiatiño yuvireco.

²² Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca āgua, ainupa uca tēira rumo. Ipare amoseñora —ehi.

²³ Ava rehii rumo osapucaí pīratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoyase semimbotar yuvireco” ehiño Pilato ava eta upe. ²⁵ ěgüe ehi imose co mbia Barrabás, acoi soquendapri mbahe-mbahe tēi mopuhasa sui, iporapichisa sui avei ava remimbotar rupi. Ipare omondo Jesús sārrosar upe ava remimbotar apo āgua sese.

Jesús yaticasa curusu rese

²⁶ Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica āguave, ahe mbia upe, “Nde terevosii curusu rese Jesús raquicuei” ehi voiño tēi yuvireco.

²⁷ Ava rehii yuviraso saquicuei. Cuña avei setá oyaseho oviharēhisave yuvireco sese. ²⁸ Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membrí rese avei. ²⁹ Esepia, oura ari naporai vahe. Ahese aipo peye tēira: ‘Aviye catu acoi cuña nimembii vahe iyavei ndoicuai vahe imocambu omembrí’ peye tēira. ³⁰ Ahese avei ava ivitri uve aipo ehira yuvireco: ‘¡Toviapi ore harive!’ ehira osiquiyepave. Iyavei ivivate vahe upe: ‘¡Tore mi!’ ehi tēira yuvireco. ³¹ Esepia, ěgüe ehise ivira yivive vitesse, ¿mara ehira vo catu oipise? —ehi cuña eta upe.

³² Iyavei viraso ñuvirío mbia ndaseco pōrai vahe supive yaticapirã yuvireco. ³³ Oyepotase Ava Āca Cangüer serer vahesave, aheve oyatica curusu rese yuvireco. Iyavei oyatica ñuvirío mbia, ñepei mbahe rese ipocosa coti, ambuae evocoyase mbahe rese ipocoēhisa coti. ³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembiapo yuvireco —ehi.

Sundao evocoyase iguayíño Jesús turucuar rese oyeupe imboyaho-yaho āgua yuvireco. ³⁵ Ava rehii osepia yuvireco; mborerecuareta avei seroñrosave aipo ehi yuvireco chupe:

—Oipĩsĩro ambuae ava, toñepĩsĩro ru ahe ae ité cute Tũpa Rembiporavo Poropĩsĩrosar güecosa pipe —ehi yuvireco.

³⁶ Iyavei sundao seroĩropare omondo vinagre itoihu yuvireco, ³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepĩsĩro ru nde ae ité! —ehi sundao eta yuvireco chupe.

³⁸ Curusu rese ñaca harive icuachiapri aipo ehi oĩ: “Co judío rerecuar guasu” ehi.

³⁹ Evocoyase ndaseco pōrai vahe yaticapri iñehe mara tēi chupe aipo ehi:

—¡Nde Poropĩsĩrosar ereicose, eñepĩsĩro ru nde ae, ore avei ru ore pĩsĩro eve! —ehi chupe.

⁴⁰ Ambuae evocoyase aipo ehi voi ondugüer uve:

—¿Nderesiquiyeimi rutei vo Tũpa sui? Nde avei niha ocañi tēi vahe. ⁴¹ Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoēhi pipe sui tēi na ehi serecosa —ehi ondugüer upe.

⁴² Evocoyase aipo ehi iri:

—Jesús, che paraisuerocomi tēi eve nde eremboipise nde mborerecuasa —ehi.

⁴³ Evocoyase omboyevĩ chupe:

—Supi eté co pipe ereicora tecua apirēhi vahesave che rupi —ehi Jesús ahe mbia upe.

Jesús mano agüer

⁴⁴ Osupitise rumo mbiter ari, opa tupri pĩtu ivi rupi; las tres pipe rumo opa icatu. ⁴⁵ Ari avei ogüe tupri, turucuar guasu tũparo asiassa avei mbiter rupi tupri ovo.

⁴⁶ Evocoyase Jesús oñehe pĩrata:

—¡Che Ru, amondo che espíritu ndeu! —ehi.

Aipo ohe pare voi omano.

⁴⁷ Evocoyase Roma iguar sundao rerecuar osepiase co mbahe poromondiisa Tũpa mboeteisa pipe aipo ehi:

—Supi eté co mbia ndaseco marai vahe —ehi.

⁴⁸ Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tēi oyepihamondiisa pipe yuvireco. ⁴⁹ Opacatu avei ava oicua vahe Jesús, ipãhuve cuña Galilea sui yugüeru vahe, osepiño tēi amombrive co nungar mbahe yuvireco.

Jesús apocatu agüer tuvĩpa pipe

⁵⁰ Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar secoi. Ahe mbia viroya vahe ité Tũpa ombou vahe omborerecuasa pipe mbahe moingatu ãgua. Sese ndahei ipihañemoñeta rupi co mborerecuar oyapo vahe mbahe Jesús upe yuvireco. ⁵² Evocoyase ahe oso Pilato rē-tave oporandu ãgua Jesús rehögüer rese. ⁵³ Curusu sui seroyi pare voi, oimama turucuar secose vahe pipe, ipoyava imondo tuvĩpa pipe ita guasu yohopri ndiporusa vitei vaheve yuvireco. ⁵⁴ Esepia, ahe ari omoin-

gatu mbahe mbituhusa ari upe nara, ahe mbituhusa rumo osupiti pota ité.

⁵⁵ Cuña yugüeru vahe Jesús rupi Galilea sui, yuvira-soño ité suvipave, osepi sehögüer apocatus yuvireco. ⁵⁶ Oyeveise güētave yuvireco omoingatu mbahe sñacua vahe tehögüer resendar ipichi ãgua.

Jesús ocuerayevĩ

Ahe cuña opituhu mbituhusa ari pipe judío porocuai-ta reroyasave yuvireco.

24 Cõhe ramomise domingu pipe, oyeve yuvirasotuvipave mbahe sñacua vahe reseve. ² Oye-potase yuvireco tuvipave, osepi soquendasa ita guasu ndipo irise güendagüerve. ³ Evocoyase yuviroique voi tuvĩpa pipe. Ndoyosui rumo yande Yar rehögüer yuvireco. ⁴ Ndoyembovihai tēi; ndoicatu iri. Ahese avieteramo tēi osepi ñuvirio mbia iturucuar sendi vahe oipive yuvireco. ⁵ Opaño ñaca iviso ivi coti yuvireco osiquiyepave. Evocoyase co mbia aipo ehi yuvireco chupe:

—¡Mahera peseca tuvĩpa pãhu rupi ava oicove vahel! ⁶ Ndipoi mo cohava; ocuerayevĩ mo ahe. Peyemomahenduha iñehengagüer ivi Galilea rupi omombehu vahecuer rese, ⁷ “Che, Ava Riquehir, imondoprira ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

⁸ Evocoyase cuña oyemomahenduha voi Jesús ñehengagüer rese yuvireco. ⁹ Oyeveise tuvĩpa sui yuvireco, omombehu opacatu co once apóstol yuvirecoi vahe upe, opacatu ambuae upe avei. ¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no. ¹¹ Apóstol upe rumo oyeupe mombehuse aviye aipo ehi tēi vahe; ndoviroyai eté yuvireco.

¹² Pedro rumo yandu ramoseve voi, osē, oña oso tuvipave. Omahese tuvĩpa pipe, turucuar güeraño osepi co cotimi tuise. Evocoyase oyepihamondi tēi ‘¿mara ehi rutei pĩha?’ oya oyeve oive oso.

Jesús oyemboyecua ñuvirio güemimbohe upe tecua Emaús piar rupi

¹³ Ahe ari pipeve caharuse, ñuvirio semimbohe yuvirasotecua Emaús ve. Ahe once kilómetro tecua Jerusalén sui. ¹⁴ Ahe peri rupi oñemoñeta yuvirasotecua opacatu co mbahe oime vahecuer rese. ¹⁵ Oñemoñeta viteseve, Jesús teieté oyemboya sese, oguata supi. ¹⁶ Yepe osepi tēi, ahe rumo ndoyepiacua ucai eté chupe. ¹⁷ Evocoyase Jesús oporandu chupe:

—¿Mbahe rese vo pe ñehe etepri pe guatasa rupi peco? —ehi.

Aipo hese, opita, ndovihai yuvino. ¹⁸ Ipãhu pendar Cleofas serer vahe omboyevĩ chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

¹⁹ Evocoyase,

—¿Mbahe vo oime yandeu? —ehi.

—Jesús mo Nazaret pendar, ahe Tūpa ñehe mombehusar seco pīrata vahe opacatu mbahe apo āgua, mbahe mombehu āgua avei Tūpa rovaque iyavei opacatu ava rovaque. ²⁰ Omondo pahi rerecuar iyavei yande rerecuareta yamotarēhisave yuca uca āgua curusu rese yuvireco. ²¹ Ore rumo oroyeroya ité sese. “Ahe yande pīsīrora yande amotarēhimbar sui” orohe chupe viña. Cūrītei rumo opa mbosapī ari yucare. ²² Ore pāhu pendar cuña ndore mbovīhai eté oyevisē suvīpa sui yuvireco. Esepīa, yīpīndar yuvīrasose añīhiveive tuvīpave, ²³ ndoyosui eté sehōgūer yuvireco. Ahese aipo osepiā Tūpa rembiguai aipo ehi vahe yuvireco chupe: “Jesús mo oicove cūrītei” ehi. Ahe evocoyase yugūeru imombehu oreu. ²⁴ Iyavei ambuae ore ndugūer yuvīrasose tuvīpave cuña remimombehu rupi tuprī avei. Ndosepīai eté rumo Jesús yuvireco —ehi Cleofas chupe tuprī ité.

²⁵ Evocoyase aipo ehi ahe ñuvirío mbīa upe:

—¡Ndapeīcuai eté rumo pe pīha pīpe seroya tuprī āgua opacatu Tūpa ñehe mombehusar remimombehugūer! ²⁶ ¿Ndapeīcuai vo Poropīsīrosar iparīaisu rane itera mbahe-mbahe tēi vīrecosa pīpe güecua porañetesave güeīque āgua renondeve? —ehi.

²⁷ Ipare opa omombehu icuachiapri Moisés cuachiar pīpendar iyavei opacatu Tūpa ñehe mombehusar cuachiar pīpendar oyese ñehe agūer.

²⁸ Oyepotase ahe tecuave yuvīraso, Jesús rumo aviye oguataño vīte vahe rā senonde. ²⁹ Co mbīa rumo oñehe yuvireco chupe:

—Epītaño ore pīri, caharu etepri. Pītura moco ndeu —ehi yuvireco chupe.

Evocoyase oīque, opītaño ipīri yuvireco. ³⁰ Oguapise yuvīnoī mesave, oīpīsī pan, “Avīye ndeu” ehi Tūpa upe. Ipare ombohī co ñuvirío mbīa upe imondo. ³¹ Ahese voi semimbohe omahecua ramo yuvireco sese, ahe rumo cūrīteīmī ndoyemboyecua iri sovai chupe. ³² Evocoyase aipo ehi oyeupe yuvireco:

—Yande mbopīhañemoñeta pīratamī eté perī rupi oñehese yandeu co tecocuer icuachiapri rese —ehi yuvireco.

³³ Ipare ndopīta pucu iri; oyevīño voi yuvīraso tecua Jerusalén ve. Aheve osepiā once tuprī vahe apóstol, omboetasā avei. ³⁴ Ahese oñemonuha vahe aipo ehi yuvireco:

—Supī eté rumo yande Yar ocuerayevī. Esepīa, oyemboyecua ité Simón upe —ehi.

³⁵ Evocoyase ahe avei omombehu, “Oreuve avei oyemboyecua oroguatase perī rupi. Ombohise pan ore pīri, ahese ramo oroīcua” ehi yuvireco omboetasā upe.

Jesús oyemboyecua güemimbohe eta upe

³⁶ Ahe oñehe vīteseve yuvireco co tecocuer rese, ahese Jesús oyemboyecua chupe aipo ehi:

—Avīrave, mbahe tuprī pīpe tapeico —ehi güemimbohe eta upe.

³⁷ Ahe rumo oyembosiquīye guasu yuvireco ‘hāgūer revo’ oyapave.

³⁸ —¡Mahera pesiquīye! ¡Mahera pereco vīte pe poreroyaēhīsa pe pīha pīpe! ³⁹ Pemahe che po rese, che pī rese avei. Che ité niha co aīco. Pepoco ru che rese. Tache reroya ru peye. Esepīa, ava hā ndovirecoī vohō iyavei ocangūer; che rumo areco ité —ehi güemimbohe eta upe.

⁴⁰ Aipo ohe vīteseve omboyecua opa opo, opī avei chupe. ⁴¹ Ahe rumo vorīvetesa pīpe iyavei oyepīhambosiquīye vītesa sui ndovīroya tuprī vīteī eté yuvireco. Evocoyase aipo ehi:

—¿Perecomī vo mbahe yande caru āgua? —ehi güemimbohe upe.

⁴² Evocoyase omondo pīra apīremī oyi vahe yuvireco chupe. ⁴³ Ipare oīpīsī, ohu opacatu güemimbohe rovaque. ⁴⁴ Ipare aipo ehi:

—Co rese acoī añehe vīchico cuese pe rese aīco vītese che mano renondeve. Yavīye ranera opacatu ñehesa che resendar Moisés porocuaīta cuachiapri pīpe, iyavei Tūpa ñehe mombehusar yuvirecoī vahe rembicuachiagūer pīpe, Salmo pīpe avei —ehi.

⁴⁵ Ēgūe ehi evocoyase opacatu osenducua uca arachendar icuachiapīrer güemimbohe upe ⁴⁶ aipo ehi:

—Co icuachiasa Poropīsīrosar iparīaisura omano āgua. Ipare mbosapī ari pare ocuerayevīra. ⁴⁷ Jerusalén sui tuprī opacatu ivī yacatu rupi imombehusara serer pīpe, “Pemboasi pe angaīpa, peyevī Tūpa upe pēu ñeroī āgua” hesara. ⁴⁸ Pe niha peico opacatu co nungar mbahe repīasar imombehu āgua. ⁴⁹ Che amboura che Ru remimombehu pe harīve. Pepītañora rumo cohave tecua Jerusalén ve acoī peīpīsise voi pīratasa īva suīndar —ehi güemimbohe eta upe.

İvave Jesús so agūer

⁵⁰ Evocoyase Jesús yuvīnose tecua sui yuvīraso tecua Betania popīve. Aheve ñuvirío opo omopuha, osovasa mbahe tuprī reīme āgua chupe. ⁵¹ Ipare oyepēpī güemimbohe sui. Ahe ramoseve serasosa ivave.

⁵² Semimbohe evocoyase osapucaī imboeteīsave. Ipare oyevī Jerusalén ve vorīvetesa pīpe yuvireco.

⁵³ Iyavei ahe ari yacatu rupi yuvīraso tūparo guasu pīpe osapucaī Tūpa mboeteīsave yuvireco yepī. Aipo rupīve.

SAN JUAN

Tūpa Ñehe oyeapo ava

1 Jesús yipisuive ité Tūpa Ñehe seci. Ahe oicove mbahe apoēhi viteseve Tūpa rese. Esepia, ahe niha Tūpa seci. ³ Ipipe avei Tūpa opacatu mbahe oime vahe oyapo; ndipoi eté mbahe sembiapoēhi. ⁴ Jesús niha vireco tecovesa apirēhi vahe oyese. Ahe tecovesa tesapesa nungar seci opacatu ava upe. ⁵ Ahe tesapesa omboyecua tecocuer supi eté vahe pītumimbi nungar mbahe naporai vahe aposar pāhuve. Ahe mbahe tēi aposar rumo ndoicatu eté secopi yuvireco.

⁶ Oime mbia Tūpa remimbou. Ahe Juan serer vahe. ⁷ Ahe rumo ou co tesapesa cua uca āgua 'toviroya opacatu ava yuvireco' ohesave. ⁸ Ahe rumo ndahei eté tesapesa; imombehusar tēi rumo seci. ⁹ Co tesapesa supi eté vahe osesape opacatu ava. Ahe ou ité co ivi pipe.

¹⁰ Yepe tie ipipe yapopri opacatu ava viña, sembiapo rumo ndoicuai co ivi pipe secoise yuvireco. ¹¹ Supi eté ouse güecuave, secua pendar ae rumo ndoipisii yuvireco. ¹² Opacatu rumo acoi oipisi vahe seroyasave yuvireco, ahe chupe omondo ñecuñarosa Tūpa rahir seco āgua yuvireco. ¹³ Ndahei rumo co ivi pipendar rahir nungar que oha vahe ambuae ava remimbotar pipe tēi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande pāhuve co ivi pipe oporoaisusave mbahe supi eté vahe aposa pipe. Iyavei orosepia ité seco porañetesa. Co seco porañetesa oipisi vahe Vu sui Tahir ñepe vahe güeco pipe. ¹⁵ Juan niha oñehe sese ava upe aipo ehi: "Co uve niha acoi aipo ahe vahe cuese: 'Acoi ou vaheṛā che raquicuei, ahe ivate catu vahe che sui. Esepia, yipive ité seci che yesuēhi viteseve' ahe" ehi.

¹⁶ Esepia, opacatu ité yaipisiño iporovasasa tuvichá vahe ombouño vahe ité yandeu arí yacatu rupi yepi. ¹⁷ Mborocuaita yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu. ¹⁸ Ndipoi eté ava osepia vahe Tūpa; Tahir ñepe vahe, seci vahe ité ipiri, ahe oicua uca yandeu.

Juan Oporoāpiramo vahe oñehe Jesucristo rese

¹⁹ Judío rerecuar guasu tecua Jerusalén pendar oyocuai pahi eta iyavei ipītiviisareta imondo Juan uve '¿Ava vo nde? tehi yuvireco chupe' oyapave icua āgua.

²⁰ Ahe rumo oyemombehu ité aipo ehi:

—Che ndahei eté Poropīsīrosar aico —ehi.

²¹ Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acoi Tūpa ñehe mombehusar ou vaheṛā? —ehi yuvireco chupe.

—Aní eté —ehi.

²² —¿Ava rutei vo evocoyase nde? ¡Emombehu oreu ore oromombehu vaheṛā ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

²³ —Che aico oñehe vahe ivi iporupirēhisa rupi aipo ahe: 'Pemoingatu pe recocuer yande Yar yepotase nara' ahe pēu. Ahe inungar acoi Tūpa ñehe mombehusar Isaías aipo ehi vahe aracahe —ehi.

²⁴ Ahe yuviraso vahe chupe, fariseo remimondo yuvirecoi, ²⁵ oporandu yuvireco chupe:

—Evocoyase ndahei niha aipo nde Poropīsīrosar, ndahei avei Elías, ndahei eté Tūpa ñehe mombehusar imombehupri ereico. ¿Mahera ru evocoyase ereporoāpiramo? —ehi yuvireco chupe.

²⁶ Evocoyase fariseo upe aipo ehi:

—Che rumo i pipe aporoāpiramo; oime rumo mbia pe pāhuve ndapeicuai vahe. ²⁷ Ahe co ivi pipe ou vaheṛā che raquicuei. Che rumo ndahei eté seco catupri vahe aico ipitaquisā yora āgua —ehi.

²⁸ Co opacatu mbahe yaposa tecua Betania ve, iai Jordán rovai añihivei coti. Aheve Juan oporoāpiramo yepi.

Tūpa remimbou Ovesa nungar opacatu ava angaipa repirā

²⁹ Ahere ayihive Juan osepia Jesús oyemboyase oyese aipo ehi: "¡Pesepia, co Tūpa remimbou Ovesa nungar seropovēhepirā opacatu ava angaipa mocañi āgua!

³⁰ Añehese sese aipo ahe: 'Che raquicuei oura mbia ivate catu vahe che sui. Esepia, yipive vahe ité che sui' ahe acoi cuese. ³¹ Che rumo yipindar ndaicuai ahe yande remiaro ou vaheṛā. Sese niha aporoāpiramo i pipe vichico imboyecua āgua che mu judío yuvirecoi vahe upe" ehi.

³² "Che asepia Espiritu Santo ogüeyise iba sui inungar apicasu, opita tupri iharive" ehi. ³³ "Yipindar rumo ndaicuai eté. Tūpa che cuai vahe rumo che poroāpiramo āgua i pipe, aipo ehi cheu: 'Acoi eresepiase Espiritu Santo ogüeyise, opitase mbia harive, ahe mbia oporoāpiramora Espiritu Santo pipe' ehi. ³⁴ Che niha asepia ité. Sese, 'Co Tūpa Rahir ité seci' ahe pēu" ehi.

Yipindar vahe Jesús remimbohe

³⁵ Ahere ayihive Juan secoi aheve avei ore ñuvirío mbia oroico vahe reseve. ³⁶ Jesús ore cuãse, Juan aipo ehi oreu:

—¡Pesepia, ndo co mbia Tüpa remimbou Ovesa nungar seropovêhepirã! —ehi oreu.

³⁷ Aipo ihe ramoseve, oroguata voi eté supi. ³⁸ Evo-coiyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoyase,

—Porombohesar, ¿que vo nde recosa? —orohe chupe.

³⁹ —Yaso, tapesepia ru —ehi oreu.

Evocoyase oroso, oroyepota las cuatro pipe secosave. Aheve ore p̄itu ité ipiri.

⁴⁰ Simón Pedro rivri, Andrés, ahe che ndugüer ahese.

⁴¹ Ahe rane aipo oseca viquehir Simón aipo ehi chupe: —Orosepia ité Porop̄sirosar —ehi ('Cristo' oyapave).

⁴² Ipare voi, viraso Simón Jesús uve. Osepiase, Jesús aipo ehi chupe:

—Nde Simón, Juan rahir, ndererguã rumo Cefas —ehi ('Pedro' oyapave).

Jesús oñehe Felipe upe, Natanael upe avei oyeupi iguata ãgua

⁴³ Ahere ayihive voi Jesús ipihañemoñeta oso ãgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

⁴⁴ "Aviye" ehi Felipe, ahe Pedro iyavei Andrés recua Betsaida pendar secoi. ⁴⁵ Ipare oso Natanael reca, aipo ehi chupe:

—Orosepia Porop̄sirosar, sesendar acoi Moisés oicuachía cuachiar porocuaita resendar pipe aracahe, oicuachía avei sesendar Tüpa ñehe mombehusareta yuvireco. Ahe Jesús, José rahir, tecua Nazaret pendar —ehi.

⁴⁶ Natanael rumo aipo ehi:

—¿Oime p̄iha yuvinose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe —ehi.

⁴⁸ —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira higeravrive ereicose —ehi Natanael upe.

⁴⁹ —Porombohesar, ¡nde niha Tüpa Rahir ereico, Israel iguar rereciar guasu! —ehi Natanael chupe.

⁵⁰ —¡Che reroya voi eté acoi, "Oroepia iviravrive" che he sui t̄ei eve! Eresepia rumo co mbahe sui aviye catu vahe —ehi.

⁵¹ Iyavei aipo ehi opacatu upe:

—Supi eté pesepiara iva oyemboi tuprise iyavei Tüpa rembiguai eta igüeyise che, Ava Riquehir, upe, iyevise avei ivave yuvireco —ehi.

Mendasa tecua Caná ve

² Ipare imombosapisa ari pipe, oime mendasa tecua Caná ve, Galilea ivi rupi. Jesús si avei secoi aheve, ² iyavei Jesús ore semimbohe oroico vahe reseve ore soho avei yuvireco aheve. ³ Ëgüe ehi rumo opa t̄ei uva ricuer. Evocoyase Jesús si,

—Ndipo iri uva ricuer —ehi chupe.

⁴ —Cuña, ¿mahera vo aipo ere cheu? Che remimbotar rumo ari ndoyepota vitei cheu —ehi osi upe.

⁵ Ichi rumo aipo ehi ava igua rese ihañeco vahe upe: —Peyapo opacatu semimbotar pe cuaise —ehi.

⁶ Aheve oime seis cambuchi guasu ita cuhi apopri, ñepepei cambuchi pipe oique cincuenta litro, amove oique setenta litro i pipe. Ahe judío oiporu pietase oyepoi ãgua yuvireco Tüpa porocuaita mboaviye ãgua yepi. ⁷ Evocoyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Omboapipopa tupri yuvireco. ⁸ Evocoyase aipo ehi ava ihañeco vahe upe:

—Penosemi ch̄ihi, peraso pieta rese hañecosar uve —ehi.

Ëgüe ehi eté yuvireco. ⁹ Ihañeco vahe pieta rese osãha i oyeapo vahe uva ricuer. Ndoicuai eté que sui osẽ ahe uva ricuer; igua rese ihañeco vahe güeraño tupri oicua yuvireco. Evocoyase pieta rese hañecosar oñehe cuimbahe omenda vahe upe ¹⁰ aipo ehi chupe:

—Opacatu ava omondo uva ricuer aviye catu vahe yipindar. Ipare acoi ava h̄itaropase yuvireco, omondo ndasepii vahe. Nde rumo ereyapocatupaño aviye catu vahe, ahe c̄uritei ramo erenose —ehi.

¹¹ Co yipindar vahe poromondiisa Jesús oyapo vahe aheve. Ipipe omboyecua güeco p̄iratasa. Sese semimbohe viroya ité yuvireco.

¹² Ipare oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro ari t̄ei.

Jesús omombopa ava mbahe rerecosar t̄uparo pipe sui

¹³ Ipare judío upendar Pascua pieta yepota senise, Jesús oso Jerusalén ve. ¹⁴ Aheve osepia t̄uparo guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi. ¹⁵ Co mbahe repiase rumo, Jesús oyapo tucumbo omombopa tupri t̄uparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiapi-apii iguarepochi ivi rupi, iyavei imesa opa omombo. ¹⁶ Apicasu mondosareta uve aipo ehi:

—¡Penosepa co mbahe c̄uritei ave sui! —ehi—. ¡Aní che Ru r̄eta mbahe mondosa t̄ei pereco! —ehi.

¹⁷ Aipo hese, ore oroyemomahenduha ñehesa icuachiapri aracahendar aipo ehi vahe rese: “Nde rêta rese che recatêhisa sui che mocañira” ehi vahe.

¹⁸ Evocoyase judío mborerecuar yuvirecoi vahe oporandu yuvirecoi chupe:

—¿Mbahe vo ereyapora nde mborerecuasa mporêhi ãgua oreu cûritei? —ehi yuvirecoi chupe.

¹⁹ Evocoyase,

—Pemondurupa co tûparo, che evocoyase mbosapi arî rupive amopuha irira —ehi judío eta upe.

²⁰ Aipo hese, mborerecuar aipo ehi yuvirecoi chupe:

—Co tûparo rumo imopuhasa cuarenta y seis araviter rupi, ¿ereicatura pîha aipo nde imopuha iri mbosapi arî rupive? —ehi yuvirecoi chupe.

²¹ Oñehese Jesús tûparo rese, güete upe têi rumo aipo ehi. ²² Ocuera yevise rumo manosa sui, ore oroyemomahenduha ñehese agüer rese. Sese oroviroya sesendar ñehesa icuachiapri pipe iyavei semimombe-güer.

Jesús oicua opacatu ava recocuer

²³ Jesús secoi vîtese Jerusalén ve Pascua pieta pipe, setá ité ava viroya osepiase poromondiisa sembiapo yuvireco. ²⁴ Ndoyeroyai eté rumo ahe ava eta rese. Esepia, opacatu ité ava recocuer oicua. ²⁵ Ndipoi eté que ambuae ava pihañemoñeta mombehu ãgua chupe. Esepia, ahe ité opa oicua.

Nicodemo omoñeta Jesús

3 Oime mbia fariseo, Nicodemo serer vahe, ahe mbia mborerecuar judío pãhuve secoi vahe. ² Ahe oso Jesús piri pîtu pipe, aipo ehi chupe:

—Porombohesar, oroicua ité Tûpa nde mbose ore mbohe ãgua —ehi—. Esepia, ndipoi eté que ava oicatu vahe evocoi nungar poromondiisa apo Tûpa oyese sec-oêhise —ehi.

³ Evocoyase,

—Supi eté aipo ahe ndeu: acoi ava ndoyesu piasu iri vahe, ndoi quei chietera Tûpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyesu piasu iri ocuacua pipe viña? —ehi—. ¿Oicatu irira pîha osi aviterve oi que oyesu iri ãgua? —ehi Jesús upe.

⁵ Jesús omboyevî chupe:

—Supi eté aipo ahe ndeu: acoi ava i pipe iyavei Espîritu pipe ndoyesu vahe, evocoi nungar ndoyu-viroiquei chira Tûpa mborerecuasave. ⁶ Acoi oyesu vahe co ivi pipendar oyesupa sui, inungar tupri avei ahe; Espîritu pipe oyesu vahe rumo, ahe espîritu.

⁷ Ereyepihamondii rene, ‘Peyesu piasu irira’ aheso ndeu. ⁸ Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Êgüe ehi avei ava oyesu vahe Espîritu pipe —ehi Jesús chupe.

⁹ —¿Mara ehi pîha aipo evocoyase? —ehi Jesús upe.

¹⁰ —¡Nde niha porombohesar ivate vahe Israel pendar ereico, nderesenducuai eté rumo co nungar mbahe! —ehi chupe—. ¹¹ Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu. ¹² Añehes têi niha mbahe co ivi pipendar rese pëu; ndache reroyai eté rumo peye. Tahetru revo mbahe iva pendar amombehuse pëu ndaperoyai chietera viña —ehi.

¹³ “Esepia, ndipoi eté ambuae ava ivave oyeupi vahe; che güeraño, Ava Riquehir, iva sui agüeyî vahe pëu.

¹⁴ Inungar Moisés osupi ivate mboi rahanga ivi iporupirêhisa rupi aracahe. Êgüe ehi aveira che, Ava Riquehir, rerecosa ivate che rupira yuvireco ¹⁵ opacatu ava che reroyasar tecovesa apirêhi rereco ãgua yuvireco” ehi Jesús Nicodemo upe.

Tûpa poroaisusa ava upe nara

¹⁶ “Supi eté Tûpa osaisú iteanga opacatu ava. Sese ombou Guahir ñepe vahe ‘tocañi têi eme che Rahir reroyasar yuvireco’ oya, ‘tovireco tecovesa apirêhi vahe’ ohesave. ¹⁷ Esepia, nombou Tûpa Guahir co ivi pipe ava mocañi têi ãgua; ahe rumo ombou ava pîsiro ãgua.

¹⁸ “Ava viroya vahe Tûpa Rahir, ndahei eté ocañi têi vaherã; acoi ava ndoviroyai vahe rumo, oipisi itera cañisa yuvireco Tûpa Rahir ñepe vahe reroyaêhisa pipe. ¹⁹ Êgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Carugar suindar pîtumimbi vahesave güeco ãgua yuvireco. ²⁰ Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaêhise. ²¹ Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tûpa remimbotar oyapo vahe cua uca ãgua opacatu ambuae ava upe —ehi.

Juan Oporoãpiramo vahe oñehes iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secoi pucu raimi oporoãpiramo. ²³ Iyavei Juan oporoãpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca ãgua. ²⁴ Co rumo mbahe yaposa Juan roquendaêhi vîteseve.

²⁵ Evocoyase Juan remimbohe omboipi ambuae omu judío rese oyecopi-copi vaherã i pipe ñeapiramosa resendar sui têi yuvireco. ²⁶ Sese yuviraso Juan uve aipo ehi:

—Ore mbohesar, acoi secoi vahe nde rese iai Jordán rovai, sese acoi ereñehes oreu, cûritei ahe oporoãpiramo têi iyavei opacatu yuviraso supi —ehi semimbohe yuvireco chupe.

²⁷ Evocoyase aipo ehi güemimbohe upe:

—Ava ndoicatui mbahe apo Tûpa nombouise chupe.

²⁸ Pesendu tupri ité che ñehes cues: “Che ndahei Propîsirosar aico, che rumo senonde imboupri têi

aico" ahese pëu. ²⁹ Esepia, acoi mendasa oimese, vireco vahe güembirecovi ahe imevi, osenduse rumo imboripar iñehe yivi ohã, oyemboviharere sese. Ëgüe ahe avei che cūrītei, ayemboviharere Jesús rese. ³⁰ Ahe niha seco ivate catu-catuño itera ari rupi oico; che rumo ivi coti catu aicora ichui —ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui. ³² Iyavei mbahe güembiepia osendu vahe reseño ité oñehe. Ndipoi eté rumo semimombehu viroya vahe yuvireco. ³³ Acoi ava viroya vahe rumo iñehe, "Supi tupri ité Tūpa omombehu mbahe" ehi. ³⁴ Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese. ³⁵ Tūpa osaisu Guahir iyavei opacatu mbahe omondo ipove. ³⁶ Opacatu ava viroya vahe Tūpa Rahir, vireco ité tecovesa apirēhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tūpa ñemoirosa ipirata vahe ité yuvireco.

Jesús oñehe Samaria pendar cuña upe

4 Fariseo eta oyandu yuvireco Jesús vireco catuse ava oyeupi oguata vahe iyavei oporoāpiramo catuse avei Juan sui ² (ndahei eté rumo Jesús oporoāpiramo; semimbohe tēi rumo Ëgüe ehi yuvireco). ³ Jesús oicuase aipo nungar, osē Judea sui, oyevi iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe. ⁶ Aheve oime ivicuar, chupe, "Jacob iguagüer" ehi yuvireco. Ahe igua rembe rese Jesús oguapi mbiter ari potase ocueraise oī. ⁷ Semimbohe eta rumo opacatu yuviraso tecuave mbahe tembihu rerocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chíhi nde i taihu —ehi.

⁹ Cuña, Samaria pendar, rumo omboyevi chupe:

—¿Mahera vo, "Embou i taihu" ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

¹⁰ Evocoyase omboyevi cuña upe:

—Ereicuase Tūpa porerecosa ndeundar viña iyavei ereicuase ahe ava ndeu i rese oporandu vahe, nde evocoyase ereporandura sese chupe. Ahe evocoyase omondora i ndopai vahe ndeu viña —ehi cuña upe.

¹¹ —Ndererecoi rumo i renose água. Esepia, co igua ipicucú ité. ¿Que sui vo aipo evocoyase eremboura i ndopai vahe cheu viña? —ehi cuña chupe—. ¹² Esepia, co igua ore ramoi Jacob oseya oreu. Cohave suiño ité niha ahe oiñu, tahir avei oiñu yuvireco ichui iyavei

opacatu seimba. ¿Nde piña ivate catu ereico ichui? —ehi cuña chupe.

¹³ —Opacatu ava oiñu vahe co i, ihuseiño itera yepi, —ehi cuña upe—. ¹⁴ Acoi ava oiñu vahe rumo i che remimondo, ndihusei iri chietera. Esepia, che amondo vahe i ndopai vaherã ité. Ahe omboura tecovesa ndopai vahe ava upe —ehi cuña upe.

¹⁵ —Nde ava, emboumi ahe i taihu che husei iriēhi água, tanose iri eme i cohava sui —ehi.

¹⁶ —Eso rane nde mer reca, seseve peyu cohava —ehi cuña upe.

¹⁷ —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer. ¹⁸ Esepia, cinco tupri erereco nde mer iyavei cūrītei erereco vahe nde resendar tēi. Supi eté aipo ere: "Ndarecoi che mer" ere cheu —ehi cuña upe.

¹⁹ —Nde ava aviye moco Tūpa ñehe mombehusar ereico cheu —ehi—. ²⁰ Ore ramoi eta omboetei Tūpa co ivitri rese yuvireco. Pe rumo, judío peico vahe, "Jerusalén ve yamboeteira Tūpa yepi" peye —ehi.

²¹ —Che reroya eve cuña, virovī ari pëu peso iriēhi água Tūpa mboetei co ivitri rese iyavei Jerusalén ve.

²² Pe Samaria pendar peico vahe pemboetei tēi pe rembiguēhi. Ore rumo oroicua oromboetei vahe. Esepia, ñepisiroso ou judío sui. ²³ Oyepota rumo ari cute, ahe ité co cūrītei co pipe suive supi eté Tūpa omboetei vahe, Tūpa Espiritu pipe omboeteira yuvireco. Supi eté Tūpa, "Ëgüe tehi che mboetei yuvireco" ehi. ²⁴ Esepia, Tūpa niha Espiritu secoi. Sese acoi omboetei vahe oya-pora Espiritu pipe supi tupri vahe ité yuvireco —ehi cuña upe.

²⁵ Cuña evocoyase aipo ehi chupe:

—Che aicua Porop̄sirosar yu água (ahe 'Cristo'). Acoi ahe ouse, omombehu tupriira opacatu mbahe yandeu —ehi cuña chupe.

²⁶ —Che niha ahe aico añehe vahe ndeu —ehi cuña upe.

²⁷ Aheseve semimbohe eta oyevi yuvireco, nombovihapri güemimbohe cuña rese oñemoñetase. Ndipoi eté rumo que "¿mbahe rese vo peñemoñeta?" ehi vahe, que "¿mahera vo ereñehe co cuña upe?" ehi vahe yuvireco chupe. ²⁸ Ahese cuña oseya tupriño ocambuchi, oso güecuave aipo ehi ava eta upe:

²⁹ —Perio, tapesepia pe ava omombehupa tupri vahe che recocuer cheu. ¿Ndahei piña ahe Porop̄sirosar? —ehi omu eta upe.

³⁰ Evocoyase ava rehii yuvirase tecua sui, yuvirase Jesús recosave sepia. ³¹ Ava yepotaēhi viteseve, semimbohe eta,

—Ore mbohesar, ecarumi —ehi tēi yuvireco chupe.

³² —Oimera rumo ambuae mbahe cheu che moviracua água. Ahe ndapeicuai vahe —ehi güemimbohe eta upe.

³³ Semimbohe aipo hese oporandu-randu tēi oyeupe yuvireco:

—¿Oime piña que ava güeru vahe mbahe semihura? —ehi tēi yuvireco.

³⁴ Güemimbohe upe rumo aipo ehi:

—Che moviracuasa rumo che mbousar porocuita, ahe ayapora iyavei amboaviye rane itera iporaviqui —ehi—. ³⁵ Esepia, pe aipo peye: ‘Ipane vite irungatu yasí mbahe miti ha monuha água’ peye yepi; che rumo aipo ahe pëu: pemahe pe ivirindar ava eta rese. Opa ité opiha omoingatu yuvireco, ahe inungar mbahe miti ha yaviye vahe. ³⁶ Acoi oporaviqui vahe Tüpa upe ava hã pisi água rese, ahe oipisira sepri yuvireco iyavei semimonuha tecovesa ndopai vaheve nara ité yuvirecoira. Evocoyase ava upe oñehe vahe iyavei oipisi vahe ava hã ivave nara, oyoya guasu oviharetera ipisipri rese yuvireco. ³⁷ Supi eté co ñehesa aipo ehi vahe: ‘Ñepeí eté omaheti vahe; imonuhasar rumo ambuae ité’ ehi. ³⁸ Che opocuai ava hã pisi água ambuae ava poraviquisave; yipindar rumo ambuae oporaviquí ité yuvireco sese. Pe evocoyase peique iporaviqui agüer rupi —ehi güemimbohe eta upe.

³⁹ Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. ⁴⁰ Evocoyase ava rehii Samaria pendar yuviraso chupe ‘epitami ore piri’ oya. Evocoyase opita ipiri ñuvirio ari rupi. ⁴¹ Setá catu iri ava viroya yuvireco ñehe ité renduse. ⁴² Evocoyase ava eta aipo ehi cuña upe yuvireco:

—Cüritei oroviroya ité cute, ndahei nde ñehe suiño oroviroya. Esepia, ore ité orosendu ñehe cute, orocua avei ahe supi eté opacatu ava pñisrosar ou vahe —ehi ava eta cuña upe yuvireco.

Jesús ombogüera mborerecuar rahir

⁴³ Ñuvirio ari pare, Jesús osé ivi Samaria sui, osoño ivi Galilea ve. ⁴⁴ Ahe ae ité aipo ehi: “Tüpa ñehe mombehusar ndasaisusai iivi rese yuvireco yepi” ehi. ⁴⁵ Oye-potase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoyase oyevi iri tecua Caná ve Galilea ivi rese, aheve acoi i tēi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. ⁴⁷ Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rētave, tombogüerami che rahir omano pota vahe cheu’ oya. ⁴⁸ Evocoyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

⁴⁹ —Che Yar, eyu poyavañomi tēi che rahir mano viteñiseve —ehi mborerecuar chupe.

⁵⁰ —Eyevi nde rētave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güētave. ⁵¹ Amombrí seco vitesave, yuvinoña voi so-vañchi sembiguai imombehu:

—¡Nde rahir oicove! —ehi yuvireco chupe.

⁵² Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca água ivi Judea sui oyeveise Galilea ve.

Jesús ombogüera ava ndoguatai vahe tecua Betzata pendar

5 Ipare oime judío pieta guasu Jerusalén ve, aheve Jesús oso. ² Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe pãve. ³ Aheve ava eta imbaheasi vahe oñeno yugüeru ivi rupi: ndasesapisoi vahe, ndoguatai vahe, ndipindugüei vahe avei i ñemomiisa osãro yuvireco yepi. ⁴ Esepia, amove tēi Tüpa rembiguai ogüeyi ahe ivicuarve i momii água, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe. ⁵ Aheve oime mbia ombaherasisa vireco vahe treinta y ocho araviter rupi. ⁶ Osepiaise Jesús, oicua voi eté vireco pucuse ombaherasisa. Evocoyase oporandu chupe:

—¿Ereipota vo nde cuera água? —ehi chupe.

⁷ Imbaheasi vahe omboyevi:

—Nde mbia, ndipoi eté que ava che mongui vaheñã i pipe i ñemomiise. Asãha tēi ‘tacui’ viya. Ambuae rane-raneño rumo yuvirocui che sui yepi —ehi.

⁸ Evocoyase,

—Epũha, esupi nde rupa, eguata —ehi imbaheasi vahe upe.

⁹ Ahe ramoseve ahe mbia ocuera tupri, osupi vupa, uguata voi oico. Mbituhusa ari pipe tupri rumo egüe ehi. ¹⁰ Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii água —ehi yuvireco chupe.

¹¹ Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

¹² —¿Uma vo aipo ehi ndeu? —ehi judío yuvireco chupe.

¹³ Ahe mbia rumo ndoicua iri ombogüerasar. Sese ndoicatui imboyevi água. Esepia, Jesús aviyeteramo tēi ndoyecua iri ava rehii pãhuve. ¹⁴ Coiye rumo Jesús osepia iri tũparove ahe mbia, aipo ehi chupe:

—Ereicua co nde cuerasa cüritei, aní ereyemboangaipa iri mbahe tēi catu reime iri água ndeu —ehi chupe.

¹⁵ Ahe mbia evocoyase oso voi eté judío eta rerecuar upe ‘Jesús che mbogüera’ oya. ¹⁶ Sese judío osaquicue moña iyavei oyuca pota yuvireco mbituhusa ari pipe iporombogüera rese tēi. ¹⁷ Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

¹⁸ Aipo hese, judío, “Yayuca ité” ehi. “Esepia, ndahei mbituhusa ari güeraño nomboyeroyai, ahe rumo

oyeapo Tūpa nungar, Tūpa uve 'che Ru' ohe angahu tēisa pipe" ehi yuvireco chupe.

Tūpa Rahir mborerecuasa

¹⁹ Evocoyase Jesús aipo ehi judío upe: "Supi eté aipo ahe: Tūpa Rahir ndoicatui eté mbahe apo oyesui tēi, Vu rembiapo mbahe oicua; aheño tupri avei oyapo yepi. ²⁰ Esepia, Tu Guahir raisupave omboyecua opacatu mbahe güembiapo chupe iyavei omboyecuaño vite itera mbahe poromondiisa tuvicha catu vahe sembiaporã, '¡Mara ehi rutei co!' pehe tēi āgua chupe. ²¹ Esepia, che Ru ombogüerayevi omano vahe iyavei omondo tecovesa chupe. Ēgüe ehi avei Tahir omondo tecovesa ava upe güemimbotar rupi. ²² Iyavei Tu nomondo iri ava upe sembiapo repri. Esepia, ombou Guahir upe opacatu pīratasa ava upe sembiapo repri mondo āgua. ²³ Ēgüe ehi Guahir upe opacatu ava imboetei āgua yuvireco inungar Tu imboetepri. Acoi ava Tahir nomboetei vahe, Tu imbousar avei nomboetei yuvireco.

²⁴ "Supi eté aipo ahe pēu: acoi oyapisaca vahe che ñehe rese, viroya vahe avei che mbousar, ahe virecora tecovesa apirēhi vahe; ndahei chietera imocañipri. Esepia, osē manosa sui oipisi tecovesa. ²⁵ Supi eté aicua uca pēu: oura ari imombehupri, cūritei eté co ari oye-pota, ava eta omano vahecuer osendura Tūpa Rahir ñehe. Acoi osendu vahe, oicoveño itera. ²⁶ Esepia, Tu vireco tecovesa oyese. Ēgüe ehi avei Guahir upe imon-do tecovesa rereco āgua. ²⁷ Ombou avei imborerecuā āgua chupe ava recocuer rese iporandu āgua. Esepia, ahe Ava Riquehir secoi. ²⁸ Peyepihamondii rene aipo che hesa sui. Esepia, oyepotara ari imombehupri, ahese opacatu ava omano vahecuer osendura ñehe. ²⁹ Ahese yuvinosera vuvipa sui. Oyapo vahe mbahe tupri, ocuerayevira yuvireco tecovesa apirēhi rereco āgua; acoi oyapo vahe rumo mbahe naporai vahe, ocuerayevira yuvireco Tūpa ñemoirosa pisi āgua" ehi Jesús judío rerecuar upe.

Jesús omboyecua tupri omborerecuasa

³⁰ "Che ndaicatui mbahe apo cheyesui tēi. Che, 'Pe peyavi vahe mbahe, peipisira che Ru ñemoirosa' ahe ava ndaseco pōrai vahe upe che cuaita rupi iyavei che amombehu vahe supi tupri ité. Esepia, che ndaipotai che remimbotar tēi mbahe apo āgua. Che Ru, che mbousar remimbotar rumo ayapo. ³¹ Que cheyese ae tēi añehese, ahese ndache reroyai chira peye viña. ³² Oime rumo ambuae che mombehusar. Ahe supi eté che mombehu pe seroya āgua; ahe Juan. ³³ Pe niha, pemondo ava chupe imboporandu mbahe rese. Ahe semimombehu niha supi tupri vahe ité. ³⁴ Yepe ahe supi eté viña, che rumo ndayeroyai ava tēi che mombehusa rese. Che rumo aipota peñepisiro āgua. Sese aipo ahe pēu. ³⁵ Juan niha inungar tataendi, ēgüe ehi omboyecua mbahe supi eté vahe. Sese pe peyemboviha raimi tēi iporombohesa tesapesa nungar pipe peico. ³⁶ Che rumo areco che yecua ucasar aviye catu

vahe Juan sui. Ahe niha co mbahe ayapo vahe yepi. Ahe sese che Ru che cuai yapo āgua. Co mbahe ayapo vahe, ahe ité omboyecua che Ru Tūpa che mbousar. ³⁷ Iyavei che Ru avei eté che cua ucasar. Ahe ñehe rumo ndapesendui vahe ité, iyavei ahe ndapesepiai eté. ³⁸ Iñehengagüer icuachiapri avei ndoiquei eté pe rese. Ipipe niha ndache reroyai eté peye che Ru che mbouse. ³⁹ Pe peicua tupri pota icuachiapri 'icuapa tupri pipe revo tecovesa apirēhi yarecora' peye viña. Co rumo cuachiar che mombehu vahe: ⁴⁰ pe rumo ndapeyu potai eté cheu co tecovesa apirēhi rereco āgua.

⁴¹ "Ndaipisii eté ava che mboeteisa tēi. ⁴² Iyavei opocua Tūpa ndapesaisuse. ⁴³ Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tēi oñehe vahe, evocoi nungar tēi peroyara. ⁴⁴ Ndapeicatui eté che reroya āgua peye. Esepia, pe ae tēi peyemboetei; ndapesecai eté Tūpa ñepe vahe suindar yemboeteisa. ⁴⁵ Ndapepihañemoñetai chira che pe recocuer mombehu āgua rese che Ru rovai. Moisés peroya vahe ité niha oicuachía pe Tūpa reroyañehisa chupe imombehu āgua. ⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuachía che resendar ñehesa. ⁴⁷ Ndaperoyaise ahe sembicuachía, evocoyase ndapeicatui chietera che remimombehu reroya āgua" ehi Jesús oamotarēhimbar upe.

Jesús oyopoi cinco mil ava

6 Ipare Pascua pieta ñipiimi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahe mbogüerese. Oyepotase ivi rese yuviraso, evocoyase oyeupi ivitri rese. Aheve oguapi opacatu güemimbohe eta reseve yuvinoi. ⁵ Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã. ⁷ Evocoyase Felipe omboyevi chupe:

—Dosciento denario pan ndosupitii chietera que chíhi-chíhimi ava retacuer viña —ehi.

⁸ Aipo hese, ñepe semimbohe pāhu pendar, Simón Pedro rivri, Andrés aipo ehi chupe:

⁹ —Co chíhivahe vireco cinco pan, iyavei ñuvirío pira, ¿iyacatura vo co ava retacuer? —ehi.

¹⁰ Evocoyase aipo ehi:

—Pemombehu opacatu upe toguapi yuvireco —ehi güemimbohe upe.

Capihi reimesave opa omboguapi yuvireco cinco mil ava. ¹¹ Evocoyase oipisi cinco vahe pan, "Aviye ndeu" ohe pare Vu Tūpa upe, opa ombohi-mbohi imondo ava rehii upe. Ēgüe ehi avei pira upe, imondopa semimbotar rupi-rupi yuvireco. ¹² Opase ava ihñitaro,

—Pemonuhapa sumbirer iyemombucañi āgua —ehi güemimbohe upe.

¹³ Evocoyase omonuha doce iruova sumbirer yuvireco pan cincomi vahe sui. ¹⁴ Evocoyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tūpa ñehe mombehúsar ivi pipe” ehi icuachiapri aracahendar pipe —ehi yuvireco.

¹⁵ Jesús rumo oicuase ava opĩratasa pipe tēi güeraso pota āgua mborerecuar guasu vireco āgua oyeupe nara yuvireco, ahese oyeupi iri oso ivate catu. Aheve ahe ae güeco āgua.

Jesús oguata i hari rupi

¹⁶ Pĩtu ramosē ogüeyi yuviraso Jesús remimbohe ipave, ¹⁷ yuviroha carite pipe sasa āgua yuvireco tecua Capernaum ve yuviraso. Ahese pĩtu ité. Jesús rumo ndoyevi vitei eté. ¹⁸ Ahese oipeyu pĩrata ivitu, i avei ohitu pĩrata. ¹⁹ Yuviraso pucumi tēi cinco, anise seis kilómetro rupi. Ahese osepia Jesús yuvireco osupiti senise carite. Ahe i hari rupi oguata oso chupe. Evocoyase osiquiye ité yuvireco ichui. ²⁰ Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

²¹ Evocoyase sorivete yuvireco carite pipe seroha. Iparemi tēi oyepota yuviraso oyuvirasosave.

Ava eta oseca Jesús

²² Ahere ayihive ava rehii opita vahe sovai yuvireco, “Semimbohe año rumo yuviraso ñepei vahe carite pipe. Jesús rumo ndosoi eté güemimbohe rupi” ehi tēi yuvireco. ²³ Aheseve rumo ambuae carite viroyepota seru yuvireco tecua Tiberias pendar, acoi Jesús ava remihura pan reroyeroqui agüer rerovicave. ²⁴ Evocoyase ava rehii oicuase Jesús semimbohe reseve iporēhise yuvireco, yuviroha yuviraso āgua co ambuae carite pipe tecua Capernaum ve seca.

Jesús, pan nungar, tecovesa apirēhi vahe secoi

²⁵ Oyepotase ava rehii ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

²⁶ Evocoyase aipo ehi chupe:

—Supi eté aipo ahe pēu. Pe rumo che reca peye che pe mbocarusa rese tēi,, ndahei co che poromondiisa reroyasave ité peico pota che rupi. ²⁷ Peporaviqui eme catu tembihu ndasecosei vahe rese; iyacatu rumo peporaviqui tembihu secose vahe rese omondo vahe tecovesa apirēhi. Co tembihu che, Ava Riquehir, amondora pēu. Esepia, che Ru Tūpa omboyecua ité che ichuindar aicose —ehi.

²⁸ Aipo hese,

—¿Mbahe mboraviqui vo oroyapora Tūpa upe? —ehi yuvireco.

²⁹ —Tūpa oipota pe che reroyara peye che semimbou che recose —ehi ava eta upe.

³⁰ Evocoyase,

—¿Mbahe poromondiisa vo eremboyecua irimira oreu orosepia vaheñā nde reroya tupri catu āgua?

³¹ Esepia, aracahe ore ramoi eta yuvirohu ivi iporupirēhisa rupi. Icuachiapri aracahendar pipe omombehu: ‘Omondo pan iva pendar semihura’ ehi —ehi ava eta yuvireco chupe.

³² —Supi eté amombehu pēu: ndahei Moisés omondo pan iva pendar chupe, che Ru rumo omondo chupe. Cūrítei che Ru ombou pēu pan supi eté vahe iva sui. ³³ Esepia, co pan ombou vahe Tūpa iva suindar ité. Ahe omondora tecovesa ivi pipendar upe —ehi ava eta upe.

³⁴ Evocoyase,

—Ore mbohesar, embouño catu co pipe suive aipo pan oreu —ehi yuvireco chupe.

³⁵ —Che ité ahe pan aico tecovesa mondo āgua. Acoi ou vahe cheu ndiyumbiasí iri chietera iyavei acoi che reroya vahe ndihusei chiveira. ³⁶ Aipo ahe niha acoi pēu. Yepe pe che repia peye viña, pe rumo ndache reroyai eté peye. ³⁷ Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui. ³⁸ Esepia, ndayui iva sui mbahe che remimbotar apo āgua tēi; ayu rumo che mbousar porocuita apo āgua. ³⁹ Che Ru che mbousar ndoipotai que ñepei ava ombou vahe cheu amocañira. Ahe semimbotar rumo che ambogüerayevira ahe ari ipa vahe pipe. ⁴⁰ Che Ru oipota avei opacatu ava oyeroya vaheñā che, Tūpa Rahir, che recosa rese. Ipipe vireco aveira tecovesa apirēhi vahe yuvireco. Supi eté ambogüerayevira ari ipa vahe pipe curi —ehi ava eta upe.

⁴¹ Evocoyase judío eta oñehe-ñehe tēi sese yuvireco, “Che pan aico, agüeyi vahe iva sui” ihesa rese ⁴² aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe iva sui” ehi no? —ehi yuvireco chupe.

⁴³ Evocoyase judío eta upe aipo ehi:

—Pepoiño che roerōrosa sui. ⁴⁴ Ndipoi chietera que oicatu vahe ou cheu, nomonguerēhiise che Ru che mbousar; omonguerēhi vahe rumo oicatu yugüeru cheu. Ahe ambogüerayevira ari ipa vahe pipe. ⁴⁵ Tūpa ñehe mombehúsar cuachiar pipe aipo ehi: ‘Tūpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

⁴⁶ “Ndipoi eté que ñepei ava osepia vahe che Ru; acoi ichui ou vaheño ité, ahe güeraño tupri ité osepia.

⁴⁷ Supi eté aipo ahe pēu: acoi che reroya vahe vireco tecovesa apirēhi. ⁴⁸ Che pan nungar aico amondo vahe tecovesa. ⁴⁹ Aracahe pe ramoi eta niha yuvirohu ité tembihu maná serer vahe ivi iporupirēhisa rupi. Ahe rumo opa iriño ité omano yuvireco. ⁵⁰ Che rumo añehe pan iva sui ogüeyi vahe rese, acoi ava ohu vahe, no-manoi chietera. ⁵¹ Ahe pan oicove vahe niha che aico iva sui ogüeyi vahe; acoi ohu vahe co pan, oicovera apirēhi vaheñā ité. Co pan amondo vaheñā, ahe che

rete ité. Ahe amondora ava recocuer rese" ehi judío eta upe.

⁵² Aipo hese, judío rerecuar oyeecopi-copi yuvireco aipo ehi:

—¿Mara ehira vo aipo co imbou tēi güete yande tohu viña? —ehi yuvireco.

⁵³ —Supi eté aipo ahe pēu: ndapehuisse Ava Riquehir rete, ndapehuisse avei suvi, ndaperecoi chietera tecovesa. ⁵⁴ Acoi ohu vahe che rete, oihu vahe avei che ruvi, vireco tecovesa apirēhi iyavei che ambogüer-ayevira ari ipa vahe pipe. ⁵⁵ Esepia, che rete supi eté vahe tembihu; che ruvi supi eté vahe avei igua. ⁵⁶ Acoi ohu vahe che rete, oihu vahe avei che ruvi, secoi che rese, che avei aico sese. ⁵⁷ Che Ru, che mbousar, vireco tecovesa. Ichui che aicove; ēgüe ehi aveira che husar che sui yuvirecovera. ⁵⁸ Añehe pan iva sui ogüeyi vahe rese. Co pan ndahei maná pe ramoi eta yuvirohu vahe nungar. Esepia, yande ramoi opaño ité omano yuvireco. Acoi ohu vahe rumo co che rete, oicovera apirēhi vahe rā ité —ehi ava eta upe.

⁵⁹ Jesús oporombohe co mbahe rese judío ñe-monuhasave tecua Capernaum ve.

Ñehesa tecove apirēhisa resendar

⁶⁰ Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya āgua; ¿ava vo viroya tēira viña? —ehi yuvireco.

⁶¹ Jesús rumo oicua voi eté ñehe-ñehe tēise co mbahe rese yuvireco, evocoyase oporandu:

—¿Pemboasiño tie che ñehe? ⁶² ¿Mara peyera pīha che repiase peye che, Ava Riquehir, ayeupise che reco agüerve vicho viña? ⁶³ Espiritu ité niha omondo tecovesa; yande retecuer rumo ēgüe ehi tēi vahe. Co amombehu vahe pēu ahe espíritu iyavei tecovesa.

⁶⁴ Oime vite rumo amove pe pāhuve ndache reroyai vahe —ehi ava rehii upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarēhimbar upe ⁶⁵ aipo ehi:

—Sese niha acoi aipo ahe pēu: "Ndipoi chietera que ava ou vahe rā cheu che Ru nomonguerēhiise imbou" ahe —ehi.

⁶⁶ Ichuive tupri Jesús rupi oguata vahe setá oseya yuvireco; ndoguata iri eté yuvireco supi. ⁶⁷ Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyevi chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirēhi vahe. ⁶⁹ Ore nde reroyasar ité oroico iyavei oroicua nde ndaseco marai vahe, Tūpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepei rumo pe pāhu pendar carugar ité —ehi Simón upe.

⁷¹ Jesús oñehe Simón Iscariote rahir, Judas, rese. Yepe doce semimbohe pāhu pendar viña, ahe rumo omondora ava yamotarēhimbar upe.

Jesús ndoviroyai tivri yuvireco

⁷ Ipare Jesús oguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité 'yayuca' oya yuvireco. ² Virovise judío pieta guasu teyupa apo āgua yuvireco, aheve tivri aipo ehi yuvireco chupe:

—Erepita eme cohave. Eso ivi Judea ve; ahe pendar nde rupi oguata vahe avei tosepia poromondiisa nde rembiapo yuvireco. ⁴ Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

⁵ Seroyañhisave tēi avei tivri aipo ehi yuvireco chupe. ⁶ Evocoyase vivri upe aipo ehi:

—Ndehi vitei rumo ari che so āgua. Pe guata āgua rumo opacatu ariño tēi aviye. ⁷ Esepia, pe ndape amotarēhii eté ava co ivi pipendar; che rumo che amotarēhi ité yuvireco. Esepia, che amboyecua ité mbahe sembiapo naporai vahe chupe. ⁸ Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

⁹ Evocoyase Jesús opitaño Galilea ve.

Jesús oso omu judío eta pietasave

¹⁰ Vivireta so pare, Jesús avei oso pietasave. Ndoyemboyecuai eté rumo ava upe. ¹¹ Judío eta oseca tēi yuvireco pietasave aipo ehi:

—¿Que pīha acoi mbia? —ehi tēi yuvireco.

¹² Ava rehii pāhuve setá iteanga oñehe yuvireco sese. Amove aipo ehi yuvireco: "Ahe mbia aviye vahe"; ambuae rumo aipo ehi: "Ndahei aviye vahe; ahe rumo ombopa tēi vahe ava" ehi yuvireco.

¹³ Nomboyecuai eté rumo oñehe yuvireco sese güerecuar sui osiquiyepave.

¹⁴ Pieta mbiterse, Jesús aviyeteramo tēi oique ava pāhuve tūparo pipe ava mbohe. ¹⁵ Judío eta rerecuar evocoyase,

—¡Too, mara ehi rute! —ehi tēi—. ¿Mara ehi vo co mbahecuá iteanga? ¡Ndoyembohe vahe niha yande yeroquisave! —ehi tēi yuvireco.

¹⁶ Judío rerecuar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi—. ¹⁷ Que ñepei pe pāhu pendar oyapo potase Tūpa remimbotar, oicua che porombohesa ndahei vahe che suindar, ahe Tūpa suindar ité. ¹⁸ Esepia, acoi ava oñehe vahe oyesui tēi, ahe 'tache mboetei ava yuvireco' ohesave tēi ēgüe ehi. Co ava rumo "tomboetei che mbousar" ehi vahe, ahe supi eté vahe; ndipoi eté porombopasa iporombohesa pipe.

¹⁹ "Moisés niha omondo tēi mborocuita pēu. Que ñepei pe pāhu pendar rumo ndipoi eté omboyeroya vahe. ¿Mahera ru che yuca pota peye?" ehi.

²⁰ —¡Nde erereco carugar ndeyese! ¿Ava vo nde yuca pota? —ehiñe ava eta yuvireco chupe.

²¹ Aipo ehi ava upe:

—Cuese acoi ayapose mbahe mbituhusa ari pipe, ahese, “¡Too, mahera ěgüe ehi!” peyeño acoi cheu. ²² Pe avei rumo amove peporaviqui mbituhusa ari pipe peporombocircuncidase porocuita Moisés omondo vahe rerozasave. (Ahe circuncisión rumo ndahei Moisés suindar, ahe rumo yipive vahe pe ramo suindar ité.) ²³ Oyepotase rumo chíhivahe mbocircuncida água mbituhusa ari pipe tupri pëu, peyapoño rane ité mborocuita mboaviye água. ¿Mahera ru cheuño pemboasi ñepe mbia mbituhusa ari pipe ambogüera tupri vahe rese? ²⁴ “Oyavi evocol” peye voi rene catu ava upe; peicua tupri rane ‘¿supi eté pñha?’ pe yapave —ehi Jesús ava eta upe.

Jesús oñehe güecocuer Tüpa suindar rese

²⁵ Evocoyase amove Jerusalén pendar mbia aipo ehi oyeupe yuvireco:

—¿Ndahei vo acoi co oseca tēi yuca água yuvireco? —ehi—. ²⁶ Ahe ité co niha co ava pñhuve oñehe oico, ndipoi eté que mara ehi vahe yuvireco chupe. ¿Omoha pñha mborerecuar co mbia Poropñsiosar seco água yuvireco? ²⁷ Yande rumo yaicua que sui turi. Acoi ouse rumo Poropñsiosar ité coiye, ndipoi chietera que ava oicua vahe iyusa —ehi yuvireco.

²⁸ Evocoyase aipo renduse oporombohe vitesave tūparove, oñehe pñrata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tēi. Oime rumo che mbousar, ahe seroyapri ité. Ahe pe ndapeicuai vahe. ²⁹ Che rumo aicua ité. Esepia, che ichui ayu iyavei ahe ité che mbou pëu —ehi.

³⁰ Aipo ihese, oipisi pota yuvireco soquenda água viña. Aní eté rumo. Esepia, ndoyepota vitei ihari chupe. ³¹ Setá iteanga rumo ava viroya iyavei aipo ehi yuvireco:

—Ouse Poropñsiosar, ¿oyapo catura pñha mbahe poromondiisa co mbia sui? —ehi yuvireco.

Fariseo oyocuai sundao tūparo rārosareta Jesús pisi água

³² Fariseo eta osendu ava ñehesa Jesús resendar yuvireco. Ahe ité iyavei pahi eta rerecuar omondo sundao tūparo rārosar Jesús pisi água yuvireco. ³³ Jesús rumo aipo ehi:

—Aicove vitemira pe rese chíhi rupive. Ipare voi ayevira che mbousar piri vicho —ehi—. ³⁴ Che reca tēira peye, ndapeicatu chietera rumo che reca. Esepia, ndapeicatu chiaveira peso vaheerã che recosave —ehi ava eta upe.

³⁵ Evocoyase judío oporandu-randu oyeupe yuvireco: —¿Que pñha aipo osora yande sui seca iriēhi água? ¿Osora tie que amombri yande mu oñemosai vahe pñhu rupi ambuae ava ndahei vahe yande mu mbohe água? ³⁶ ¿Mara oya pñha evocoyase aipo, ‘Che reca tēira peye, ndapeicatu chietera rumo che reca. Esepia, ndapeicatu chiaveira peso vaheerã che recosave’ ehi yandeu? —ehi-ehi tēi oyeupe yuvireco.

Espíritu iai ndopai vahe nungar

³⁷ Pieta ipa, ahe imboeteisa catu vahe, ahe ari pipe Jesús oñehe pñrata ohã aipo ehi:

—Acoi que ava ihusei vahe, toyugüeru cheu. Che evocoyase tamboihu —ehi—. ³⁸ Esepia, inungar aipo ehi vahe icuachiapri pipe, che rerozasar pñha sui osēra iai ndopai vahe nungar —ehi.

³⁹ ‘Che rerozasar oipisira Espíritu curi’ ohesave aipo ehi. Espíritu rumo ndou vitei ahese. Esepia, Jesús ahese ndoyevi vitei avei güecosa porañtesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi: —Supi eté co mbia Tüpa ñehe mombehugar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropñsiosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tēi oura Poropñsiosar viña? —ehi—. ⁴² Icuachiapri pipe rumo aipo ehi Poropñsiosar oyesura mborerecuar guasu David sui iyavei ahera Belén pendar, David recua pendar itera —ehi.

⁴³ Evocoyase ava oyemboyaho-yaho yuvireco Jesús recocuer sui tēi. ⁴⁴ Amove ava viraso pota tēi yuvireco soquenda; ndipoi eté rumo ěgüe ehi vahe yuvireco chupe.

Judío rerecuar ndoviroyai Jesús yuvireco

⁴⁵ Sundao tūparo rārosar oyeve yuvireco Jesús recosa sui. Fariseo eta iyavei pahi eta rerecuar evocoyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tūparo rārosar evocoyase aipo ehi:

—¡Ndipoi eté que ava oñehe vahe ahe mbia nungar! —ehiño yuvireco.

⁴⁷ Fariseo eta iyavei mborerecuareta evocoyase aipo ehi yuvireco:

—¿Pe avei eté rumo peyembopa uca chupe? —ehi—.

⁴⁸ Ndipoi eté niha ore mboetasa mborerecuar iyavei fariseo viroya vahe yuvireco. ⁴⁹ Co ava rehii tēi ěgüe ehi yuvireco. Ahe rumo ndoicuai vahe Tüpa porocuita yuvireco, sese iñemoirosavrive ité yuvirecoi —ehi sundao tūparo rārosar upe yuvireco.

⁵⁰ Evocoyase Nicodemo, acoi oso vahe pñtu pipe Jesús piri, ahe avei eté fariseo pñhuve secoi, ahe aipo ehi:

⁵¹ —Yandeundar porocuita mboaviye água ndiyai, “Ereyavi mbahe” yahe voiño tēi que ava mbahe sembiapocuaēhi vitesave —ehi.

⁵² Evocoyase omboyeve yuvireco:

—¿Nde avei tie ereico Galilea pendar? Eyembohe tupri icuachiapri pipe. Ipipe eresepiara ndipoi eté que ñepe ou vahe Galilea sui Tüpa ñehe mombehugar —ehi mborerecuareta Nicodemo upe yuvireco.

Cuña oyemboaguasa tēi vahe resendar

⁵³ Ipare opa yuviraso ñepeipei güēta rupi.

8 Jesús rumo oso ivitri Olivo ve. ² Ahere ayihive cōhese, oyevi tūparove. Ahese opacatu ava oyemboya yuvireco sese. Ahe evocoyase oguapi oī oporombohe.

³ Evocoyase Moisés porocuita rese oporombohe vahe, fariseo eta avei güeru Jesús upe cuña oyemboaguasa tēi vahe yuvireco ava rehii rovai, ⁴ aipo ehi yuvireco chupe:

—Porombohesar, co cuña iyemboaguasase cuimbase rese osesapiha ñepeipei ava. ⁵ Moisés porocuita rumo ore cuai co nungar cuña yuca āgua ita pipe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoāhasave tēi aipo ehi yuvireco ‘toyavi angahu oñehe yandeu’ oya tēi. Ahe rumo oyavi, ombahecuachía ocuā pipe ivi rese. ⁷ Evocoyase oporandu vitesese ava yuvireco, opūha aipo ehi:

—Que ñepeipei pe pāhu pendar ndoyemboangaipai vahe, ahe rane toyapi ita pipe —ehi.

⁸ Oyavi iri, ombahecuachía ivi rese. ⁹ Osenduse rumo judío rerecuareta, omboipi ñepeipei yuvinose yuvireco, cuacua catu vahe sui rane yuvinose. Opacatu yuvinosepase, Jesús güerañomi cuña rese opita yuvireco.

¹⁰ Evocoyase opūhase, ahese aipo ehi chupe:

—Cuña, ¿que que ru ava? ¿Ndipoi eté que ñepeipei opita vahe nde mocañi āgua? —ehi

¹¹ —Aní eté, che Yar, ndipoi eté —ehi.

Evocoyase aipo ehi chupe:

—Che avei ndoromocañi tēi potai. Sese cūritei eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei ndaseco iri chietera pītumimbisa nungar mbahe-mbahe tēi vahe pipe —ehi.

¹³ Evocoyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyaprii eté —ehi yuvireco chupe.

¹⁴ —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté. ¹⁵ Pe peseca ava rembiapo cua tupri āgua ava tēi pīhañemoñeta rupi. Che rumo ndayui evocoi nungar mbahe apo. ¹⁶ Asecase ava rembiapo cua tupri āgua, ahe supi tupri vahe ité. Esepia, ndahei che ae tēi ēgüe ahe, che Ru, che mbousar rumo secoi che rese. ¹⁷ Porocuita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi.

¹⁸ Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuara viña —ehi fariseo eta upe.

²⁰ Jesús aipo ehi tūparo pipe, guarepochi monuhapri riru ipive oporombohe ohā. Ndipoi eté rumo ahese osokuenda vahe. Esepia, ndoyepota vitei eté ahese ihari chupe.

Jesús, “Che sosave pe ndapeicatu chira peso” ehi

²¹ Jesús aipo ehi iri:

—Che asose, che reca tēira peye. Pe rumo opara pemanano pe angaipa reseve. Che sosave ndapeicatu chietera peso vahe —ehi.

²² Aipo ihese, judío eta aipo ehi yuvireco:

—¿Oyeyucara pīha ahe ae; ayeve pīha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico. ²⁴ Sese niha acoi aipo ahe pēu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pemanopaño —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pēu. ²⁶ Setá iteanga areco che ñehe āgua pēu mbahe pe rembiavi rese. Che mbousar niha supi eté vahe. Ahe iñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese iñehese yuvireco. ²⁸ Sese aipo ehi fariseo upe:

—Pesupise rumo Ava Riquehir ivira rese, ahese voi peicuara che recouer, ahese avei peicuara cheyesui tēi mbahe ndayapose; che rumo amombehu che Ru che mbohesa güeraño. ²⁹ Che mbousar niha che rupive ité secoi; ndache reyai eté. Esepia, ayapoaño ité mbahe semimbotar yepi —ehi ava eta upe.

³⁰ Aipo ihese, setá iteanga ava viroya yuvireco.

Ava Tūpa rahir ité yuvirecoi vahe iyavei ava angaipa pipe tēi yuvirecoi vahe

³¹ Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe. ³² Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

³³ Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesera mbiguai nungar pe recosa sui” ere oreu? —ehiño judío eta yuvireco chupe.

³⁴ Evocoyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiguai tēi, ēgüe ehi oangaipa rereco yuvireco. ³⁵ Mbiguai tēi ndahei güereciar rēta pipe nara ité; tahir rumo opitaño itera güēta pipe nara. ³⁶ Sese Tahir pe renosese mbiguai tēi pe recosa

sui, supi eté ndapeico iri mbiguai nungar. ³⁷ Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe. ³⁸ Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

³⁹ —¡Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña. ⁴⁰ Che rumo, “Tüpa che mbohe mbahe supi eté vahe rese” ahe tēi pēu. Pe evocoyase che yuca potaño ité peye. ¡Abraham rumo ndoyapoi eté co nungar mbahe! ⁴¹ Esepia, pe peyapo mbahe peyesupa rembiapo tēi eté —ehi.

Evocoyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tüpa! —ehiño yuvireco.

⁴² Evocoyase aipo ehi co judío eta upe:

—Tüpa ité pe yesupase rumo, che raisura peye viña. Esepia, che ayu Tüpa sui. Sese cūrítei cohava aico. Ndahei cheyesui tēi ayu, Tüpa rumo che mbou. ⁴³ ¿Mahera pñha ndapesenducua catui eté mbahe che remimombehu? Esepia, ndapeyapisaca potai eté che ñehe rese. ⁴⁴ Pe yesupa niha Caruguar ité, sese niha pe ahe tupri avei peico. Peyapo pota mbahe semimbotar tēi. Esepia, Caruguar yipisuive ité oporoyuca serai vahe. Ndoypoi vahe ité mbahe supi tupri vahe, noñehi avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yipindar semira tēi vahe. ⁴⁵ Che rumo añehese mbahe supi tupri vahe rese, ndache reroyai eté peye. ⁴⁶ ¿Ava pñha pe pñhu pendar oicua mbahe che rembiavi? ¡Aní eté! Che añehe mbahe supi eté vahe rese pēu, ¿mahera ru evocoyase ndache reroyai eté peye? ⁴⁷ Acoi ava Tüpa suindar, ahe osendu pota rai iñehe; pe rumo ndahei eté Tüpa suindar peico. Sese ndapesendu potai eté iñehe —ehi Jesús judío eta upe.

Poropñisrosar yipive catu vahe Abraham sui

⁴⁸ Evocoyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, caruguar ité erereco ndeyese —ehi yuvireco chupe.

⁴⁹ —Che ndarecoi eté caruguar cheyese. Che rumo che Ru amboetei; pe rumo ndache mboetei eté peye. ⁵⁰ Iyavei che ndasecai ava che mboetei ãgua. Oime rumo ñepeoi oipota vahe. Ahe niha omondora ava rembiapo reprí chupe. ⁵¹ Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

⁵² Evocoyase judío omboyeví yuvireco chupe aipo ehi:

—Cūrítei oroicua ité cute nde ererecose caruguar ndeyese. Esepia, Abraham iyavei opacatu Tüpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere? ⁵³ ¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tüpa ñehe

mombehusar omanopa ité yuvireco. ¡Mbahe angahu vo co evocoyase eremoha ndeyese! —ehi yuvireco chupe.

⁵⁴ —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tüpa” peye. ⁵⁵ Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua. Sese niha amboyeroya iñehe. ⁵⁶ Esepia, pe ramoi Abraham oyemboviha ‘asepi-ara ihari oyepotase’ oya cheu. Osepia ité niha. Sese oviharete ité —ehi judío eta upe.

⁵⁷ Evocoyase judío eta:

—¿Mara erera vo aipo Abraham repia ndererecomi vitéise cincuenta araviter? —ehiño yuvireco chupe.

⁵⁸ —Supi eté aipo ahe pēu: che aicove vahe Abraham yesuēhi vitéseve —ehi.

⁵⁹ Aipo ihese, oipisipa ita yuvireco yapi ãgua. Ahe rumo ahe ramoseve oñemi ava eta pñhuve, osēño ité oso túparo sui.

Jesús ombogüera mbia ohasa suive ndasesapisoi vahe

9 Jesús oguatase ocar rupi, osepia mbia ohasa suive ndasesapisoi vahe. ² Ore semimbohe oroico vahe, oroporandu chupe:

—Ore mbohesar, ¿mahera pñha co mbia ndasesapisoi eté oha? ¿Oyesupa angaipa sui pñha? ¿Oangaipa sui ae tie? —orohe chupe.

³ —Ndahei eté oangaipa sui, ndahei avei oyesupa angaipa sui; co rumo ãgüe ehi Tüpa mbahe sese mboyecua ãgua. ⁴ Sese oime vitése arí yandeu che mbousar poraviquisa apo ãgua, iya ité ahe yayapo. Esepia, pñtura, ahese ndayaicatui chietera mbahe apo. ⁵ Co ivi pipe che recove vitése rumo, che aico ava upe tesapesa nungar —ehi oreu.

⁶ Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese. ⁷ Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoi vahe evocoyase oso, oyovai. Oyevise ichui, omahe tupri ité. ⁸ Evocoyase sēta ivirindar iyavei ava oicua vahe sesapisoēhise oporanduse guarepochi rese aipo ehi yuvireco:

—¿Ndahei vo acoi co oguapí oñ guarepochi rese oporandu yepi? —ehi yuvireco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Aviye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoyase oporandu yuvireco chupe:

—¿Mara ere vo co esareco? —ehi.

¹¹ —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

¹² —¿Que vo ahe mbia? —ehi yuvireco chupe.
—Ndaicuai, ¿que vo catu? —ehiño ava güëta cotindar uve.

Fariseo oporandu ndasesapisoi vahe cuera agüer rese yuvireco

¹³ Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera ägua. Sese viraso ndasesapisoi vahecuer fariseo eta rovai yuvireco.

¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

¹⁶ Evocoyase ambuae aipo ehi yuvireco chupe:

—Aipo mbia ndahei eté revo Tüpa suindar. Esepia niha, nombotei eté mbituhusa ari —ehi yuvireco.

Ambuae evocoyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyeavirati tēi ipihañemoñetasa. ¹⁷ Sese oporandu iri ndasesapisoi vahecuer upe yuvireco aipo ehi:

—Nde no, ¿mara ehi nde pihañemoñeta co mbia rese? —ehi.

Ahe evocoyase aipo ehi:

—Che amoha ité Tüpa ñehe mombehusar secose —ehi.

¹⁸ Ahe fariseo rumo ndoviroyai eté icuera yuvireco, oichoho uca rane ité iyesupa yuvireco. ¹⁹ Chupe oporandu aipo ehi:

—¿Pe rahir ité vo co? ¿Ndasesapisoi oha? ¿Mara ehi vo co cūritei osareco no? —ehi iyesupa upe yuvireco.

²⁰ —Ore rahir ité niha co, ndasesapisoi oha. ²¹ ¿Mara ehi vo catu co cūritei osareco? iyavei ¿ava vo catu ombogüera? ¡Ndroicuai eté! Peporandu chupe. Ocuacia niha; ahe ae oicua ucara pëu —ehiño iyesupa yuvireco fariseo upe.

²² Iyesupa rumo osiquiyepave tēi aipo ehiño yuvireco. Esepia, fariseo opa ité oyemoingatu yuvireco ava “Jesús Poropñirosar secoi” ehi vahe oñemonuhasa sui ñepeí reseve imombo ägua. ²³ Sese niha iyesupa aipo ehiño yuvireco: “Peporandu chupe. Ocuacia niha” ehiño.

²⁴ Evocoyase fariseo güeru uca iri acoi mbia imbogüerapri yuvireco, aipo ehi yuvireco chupe:

—Emombehuño oreu Tüpa rovaque mbahe supi tupri vahe. Esepia, ore oroicua ité evocoi mbia angaipa viyar seco rese —ehi.

²⁵ Ahe evocoyase omboyevi chupe:

—Che ndaicuai eté angaipa viyar tie revo. Co güeraño catu che aicua: che ndacheresapisoi vahecuer aico; cūritei rumo asareco —ehi.

²⁶ Evocoyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

²⁷ —Amombehu niha acoi pëu. Pe rumo ndache reroyai eté peye. ¿Mahera vo peipota amombehu vite vaherä pëu? ¿Pe avei tie peguata pota supi? —ehi fariseo eta upe.

²⁸ Ahese oñehe rai tēi yuvireco chupe:

—Nde ahe mbia rupindar tēi ereico. Ore rumo yande ramoi aracahendar Moisés rupi oroguata vahe. ²⁹ Esepia, oroicua ité Tüpa oñehese Moisés upe. Aipo mbia rumo ndoroicuai eté que sui osë —ehi yuvireco chupe.

³⁰ —¡Mara peye rutei pe ndapeicuai que suindar ahe! Che rumo che mbosareco. ³¹ Supi eté, yaicua Tüpa ndosendui eté ava angaipa viyar ñehe; ava omboeteisar iyavei viroyasar ñehe güeraño ité niha osendu. ³² Esepia, ndipoi eté que avaño tēi ava oyesu sui ndasesapisoi vahe ombogüera vahe. ³³ Ahe rumo ndaheise Tüpa suindar ou vahe viña, ndoicatu chietera revo mbahe apo viña —ehi fariseo eta upe.

³⁴ Evocoyase fariseo eta aipo ehi yuvireco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi.

Ipare omose ñepeí reseve oñemonuhasa sui yuvireco.

Jesús reroyasarēhi ndasesapisoi vahe nungar tēi

³⁵ Jesús oicua ndasesapisoi vahecuer mombosa. Vupitise aipo ehi chupe:

—¿Ereyeroya nde Ava Riquehir rese? —ehi.

³⁶ Mbía evocoyase aipo ehi chupe:

—Che mbohesar, emombehumi cheu; tayeroya catu ru sese —ehi.

³⁷ —Eremahe niha co sese; che ité ahe aico —ehi ndasesapisoi vahecuer upe.

³⁸ Evocoyase mbía oñenopiha sovai:

—Oroviroya, che Yar —ehi chupe.

³⁹ Ichui aipo ehi:

—Che ayu co ivi pipe mbahe supi tupri vahe apo ägua; ava ndasesapisoi vahe nungar upe mbahe supi eté vahe che Ru suindar mboyecua ägua iyavei ava oicua tēi vahe mbahe Tüpa suindar mboesapisoēhi iri ägua —ehi.

⁴⁰ Evocoyase ambuae fariseo eta yuvirecoi vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapisoi vahe nungar oroico? —ehi.

⁴¹ Evocoyase omboyevi ahe fariseo upe:

—Peicose ndasesapisoi vahe nungar viña, “Peyavi mbahe” ndehi chietera Tüpa pe angaipa rese pëu viña. Pe rumo, “Ore oroicua tupri Tüpa suindar mbahe” peye tēi. Sese Tüpa, “Peyavi mbahe” ehi eté pëu —ehi Jesús fariseo eta upe.

Jesús ovesa rãrosar nungar

10 “Supi eté aipo ahe pëu: acoi ava co coti rupi tēi yuviroique vahe ovesa rēta pipe, ahe imonda rai vahe tēi yuvirecoi. ² Oique vahe rumo oquendipi rupi eté, ahe sãrosar ité secoi. ³ Oquendipi rãrosar omboi chupe. Evocoyase ovesa rãrosar oñehe serer rupi güeimba ovesa upe senose ägua sēta sui. Ahe evocoyase oicua iñehe yuvireco. ⁴ Güeimba ovesa renose pare oguata senonde; seimba ovesa evocoyase oguata

saquicuerive. Esepia, oicua ité iñehe yuvireco.

⁵ Ndoguatai eté rumo oyarēhi rupi yuvireco; yuvinoña-noñaño ichui. Esepia, ndoicuai eté iñehe” ehi ⁶ omboyoya güecocuer ovesa rārosar rese. Ava rumo ndosenducuai eté yuvireco.

Jesús ava rārosar aviye vahe

⁷ Evocoyase Jesús aipo ehi iri: “Supi eté, aipo ahe pēu: che año ité oquendipi nungar aico ovesa upe.

⁸ Opacatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco. ⁹ Che rumo oquenda nungar aico. Acoi oique vahe che rupi, ahera ipīsiropirā yuvirecoi. Iyavei inungar acoi ovesa oique vahe güēta pipe, ichui osē capihī reca āgua igua yepi, ēgüe ehira che reroyasar yuvireco.

¹⁰ “Imonda rai vahe rumo omonda āgua tēi ou, oporoyuca āgua, mbahe mocañi āgua tēi avei. Che rumo ayu ‘tovireco ava tecovesa ndopai vāherā ité yuvireco’ viya. ¹¹ Che ité ava rārosar aviye vahe aico. Sese ayemoingatu tupri che recocuer mondo āgua ava cheundar repirā; ¹² acoi guarepochi repirā tēi oporaviqui vahe rumo, osepiase mahembiar oñaro ai vahe, oseya-paño güemiario, oña oso. Esepia niha, ovesa ndahei eté seimba, ndahei avei eté ahe sārosar ité secoi. Evocoyase mahembiar oñaro ai vahe omondi-mondii eté ipisi āgua. ¹³ Evocoi mbia oñaño. Esepia, guarepochi repirā tēi oporaviqui. Sese niha ndosaisui eté güemiario ovesa.

¹⁴ “Che rumo ava rārosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirā yuvireco. ¹⁶ Areco avei ambuae ité che reimba ovesa. Ahe avei aru pota che mboyeroya vāherā yuvireco. Ahese ñepeí reseve guasu che remiario yuvirecoira.

¹⁷ “Che Ru niha che raisu ité. Esepia, amondo itera che recocuer manosave. Ipare rumo acuerayevira. ¹⁸ Ndoicatui chira ava ahe ae tēi che yuca āgua; che tei eté rumo amondora che recocuer che remimbotar rupi eté. Che areco ité pīratasa imondo āgua, che cuerayevi iri āgua avei. Sese ité niha che Ru che cuai” ehi güemimbohe eta upe.

¹⁹ Osenduse judío eta aipo nungar ñehesa, opa ipiñañemoñeta yoavirati yuvireco. ²⁰ Setá iteanga ipāhu pendar aipo ehi:

—¿Mahera vo co pemboyeroya? Vireco ité carugar oyese, ndayaracuai eté —ehi yuvireco chupe.

²¹ Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboesapiso tie carugar rerecosar ava? —ehi amove judío yuvireco Jesús upe.

Judío rerecuar ndoyambotai Jesús yuvireco

²² Ari sōhisa vahe pipe tecua Jerusalén ve tūparo rovasagüer pieta oyepota. ²³ Ahese Jesús oguata oico tūparo Salomón oyapo vahecuer rocupe ivi rupi.

²⁴ Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tupri ra Poropīsirosar nde recosa oreu? Emombehu tupri catu ñepeí reseve oreu —ehi yuvireco chupe.

²⁵ —Amombehu niha acoi pēu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropīsirosar che recosa; ²⁶ pe rumo ndache reroyai eté peye. Esepia, pe ndahei eté che remiario ovesa peico. ²⁷ Che remiario ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco. ²⁸ Amondo avei tecovesa apirēhi yuvireco chupe icañiēhi āgua; ndipoi chietera que ava virocua iri vāherā che sui. ²⁹ Che Ru niha ombou cheu. Esepia, ahe ipīrata catu opacatu ava sui. Ndipoi chietera que ñepeí ava oicatu vahe serocua che Ru sui. ³⁰ Che Ru iyavei che oroico ñepeíño ité —ehi judío rerecuareta upe.

³¹ Aipo ihese, judío rerecuareta osupipa iri ita yuvireco yapi āgua. ³² Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru pīratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

³³ Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo ēgüe orohera ndeu. Esepia, nde ereñehe rai tēi Tūpa rese. Nde moco ava tēi ereico. Nde rumo ereyeapo Tūpa ndeyeupe ae —ehi yuvireco chupe.

³⁴ Evocoyase aipo ehi ahe ava upe:

—Pēundar mborocuaita icuachiapri pipe niha aipo ehi: ‘Che aipo ahe pēu: pe tūpa pāve ité peico’ ehi.

³⁵ Yaicua niha icuachiapri pipendar ndiyai yayamotarēhi. Esepia, Tūpa aipo ehi: ‘Pe tūpa pāve ité peico’ ehi evocoi ava oñehe pīsaris upe. ³⁶ Che niha che Ru Rembiporavo aico. Ahe che mbou co ivi pipe. ¿Mahera ru evocoyase, ‘Nde ereñehe rai tēi Tūpa rese’ peye cheu, ‘Che Tūpa Rahir aico’ ahese pēu? ³⁷ Esepia, acoi ndayapoise mbahe che Ru remimbotar, ahese ndache reroyai chietera peye viña. ³⁸ Yepe ndache reroyai chira che recocuer rese peye viña, mbahe ayapose rumo ahe tēi peroyara. Sese tapeicua ñepeí reseve che Ru secoise che rese iyavei che sese che recosa —ehi oamotarēhimbareta upe.

³⁹ Osoquenda pota iri yuvireco viña; Jesús rumo osoño ipāhu sui.

⁴⁰ Oyevi ñai Jordán rovai. Aheve acoi Juan yipindar oporoāpiramo. Aheve opita. ⁴¹ Ava rehii yuviraso sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbia re-sendar supi eté —ehi yuvireco.

⁴² Setá iteanga ava Jesús viroya yuvireco aheve.

Lázaro mano agüer

11 Oime ava imbaheasi vahe serer Lázaro, tecua Betania pendar. Güeindri Marta iyavei María re-

seve yuvirecoi aheve. ² Ahe María, oipiyere vahe mbahe s̄īacua vahe yande Yar pi rese. Ipare oiqiti oha pipe. ³ Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano água ité. Ēgüe ehi rumo Tüpa reco porañetesa mboyecua água iyavei Tahir reco porañetesa mboyecua água avei —ehi.

⁵ Yepe osaisú iteanga Marta icupihir reseve iyavei iquivri Lázaro viña, ⁶ oyanduse rumo Lázaro mbaherasisa, opita viteño ité ñuvirío ari güecosave. ⁷ Ipare omombehu ore supi oroico vahe upe:

—Yayevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pipe yuvireco; ¿cūrítei co ereco pota iri aheve? —orohe chupe.

⁹ Oreu rumo aipo ehi:

—Ñepei ari niha vireco doce hora. Supi eté acoi oguata vahe ari pipe ndoyepiapi eté. Esepia, osepia ité co ivi resapesa; ¹⁰ acoi oguata vahe rumo p̄itu pipe, oyepiapi eté. Esepia, ipane tesapesa chupe —ehi oreu.

¹¹ Ipare aipo ehi:

—Yande mboripar Lázaro oque tēi. Che rumo amomahera —ehi.

¹² Evocoyase ore aipo orohe chupe:

—Ore Yar, oque tēise, ocuerara —orohe.

¹³ ‘Omano ité’ oyapave tēi aipo ehi. Ore rumo orepihañemoñeta: “Oque tēi revo” orohe chupe viña.

¹⁴ Ipare rumo omombehu tupri ité aipo ehi oreu:

—Lázaro omano ité. ¹⁵ Aviharete che ndaicoise aheve. Esepia, Ēgüe ehise ité aviye catura p̄eu pe che reroya água. Yaso ru catu sepia —ehi oreu.

¹⁶ Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vahe r̄a supi —ehi.

Jesús cuerayevisa secoi iyavei tecovesa

¹⁷ Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orosendu “cūrítei irungatu ari opa Lázaro t̄ire” ehi vahe. ¹⁹ Setá judío yuviraso Marta iyavei María p̄iri iquivri mano agüer sui imboviha água. ²⁰ Oicuae Marta Jesús yepota seni, oso voi eté sapeve; María rumo opitaño oi pipe. ²¹ Evocoyase Marta aipo ehi voi chupe:

—Che Yar, ehi cohava ereicose, nomanoi chietera revo ore quivri viña. ²² Che rumo aicua Tüpa omboura opacatu nde porandusa ndeu —ehi Marta chupe.

²³ —Nde quivri rumo ocuerayevi irira —ehi Marta upe.

²⁴ —Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

²⁵ —Che niha cuerayevisa aico iyavei tecovesa. Acoi ava che reroya vahe, yepe omano t̄eira viña, oicoveño itera rumo. ²⁶ Acoi che reroya vahe güecovesave, no-

manoi chietera. ¿Ereroya aipo che hesa? —ehi Marta upe.

²⁷ —Oroviroya ité, che Yar. Nde niha Porop̄isrosar ereico Tüpa Rahir, ore remiaro ereyu vahe r̄a co ivi pipe oreu nara —ehi Marta Jesús upe.

Jesús oyaseho Lázaro ruvipa rovai

²⁸ Aipo ohe pare, Marta oso ocupihir María reca, chupeñomi aipo ehi:

—Porombohesar oicove cohava, “Tou” ehi ndeu —ehi chupe.

²⁹ Evocoyase María oso voi eté sepia. ³⁰ Jesús rumo ndoique vitei eté tecua pipe; Marta rese oyoeplasave viteño ité secoi. ³¹ Osepia María s̄e poyava, judío eta s̄etave yuvirecoi vahe imbovihasar yuviraso voi saquicuerive, “Oquivri ruvipave revo osora oyaseho” ehi yuvireco viña.

³² Evocoyase María oyepotase chupe, oñenopiha so vai aipo ehi:

—Che Yar, ehi revo ereicoveño itese cohava, che quivri nomanoi chietera viña —ehi María chupe.

³³ Osepia María yaseho iyavei judío eta yuviraso vahe supi, opiha pipe oyandu ité ovihar̄ehisa. ³⁴ Evocoyase oporandu:

—¿Que vo peñoti? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

³⁵ Ahese Jesús oyaseho. ³⁶ Judío evocoyase aipo ehi yuvireco:

—¡Esepia, osaisu ité! —ehi oyeupe yuvireco.

³⁷ Ambuae rumo ip̄ahu pendar aipo ehi yuvireco:

—Co mbia omomahe vahe acoi mbia ndasesapisoi vahe, ¿ndoicatui chira p̄iha Lázaro manoñi água mbahe apo cuese rahe viña? —ehi yuvireco.

Lázaro mbogüerayevi agüer

³⁸ Jesús oyemboya suvipave ovihar̄ehisa pipe; ahe suvipa ita hopri, sovapisa ita avei.

³⁹ —Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

⁴⁰ —¿“Che reroysave eve, Tüpa p̄iratasa eresepiara” ndahei vo acoi ndeu? —ehi Marta upe.

⁴¹ Aipo ihe pare, virocua ita yuvireco ichui. Evocoyase omahe iba rese aipo ehi:

—Che Ru, “Aviye ndeu” ahe ndeu. Esepia, eresendu che ñehe. ⁴² Che aicua nde eresenduño ité che ñehe yepi, che rumo aipo ahe co ava eta rembiepiave ‘toviroya avei nde che mbousa co ivi pipe yuvireco’ che yapave —ehi.

⁴³ Aipo ohe pare, oñehe p̄irata aipo ehi:

—¡Lázaro, es̄e eipeve sui! —ehi.

⁴⁴ Omano vahe evocoyase os̄e voi opacatu turucuar omamasa reseve. Jesús evocoyase aipo ehi ava upe:

—Peyorapa imamasa ichui, toguata —ehi.

Judío rerecuareta oyemomborandu Jesús pisi água yuvireco

⁴⁵ Osepiase co poromondiisa, judío eta yuviraso vahe María rupi setá ité Jesús viroya yuvireco. ⁴⁶ Ipãhu pendar rumo moviro yuviraso voi ava fariseo rerecuareta uve sembiapo mombehu água. ⁴⁷ Evocoyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico. ⁴⁸ Ndayayapoise mbahe chupe, opacatu tiëte ava viroyara yuvireco viña iyavei aviyeteramo mborerecuar Roma iguar yanduse, yugüerura yande tũparo mondurupa iyavei omocañi tẽi uca aveira yande recua yande sui —ehi oyeupe yuvireco.

⁴⁹ Ñepe rumo mbia ipãhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe, ⁵⁰ ndapesenducuai avei co tecocuer; aviye catura ñepe mbia omanose yande recocuer rese, ndahei que opacatu yande mocañi tẽi água —ehi omboetasa eta upe.

⁵¹ Ahe rumo ndahei oyesui tẽi aipo ehi; Tũpa ité aipo ombohe uca. Esepia, ahe ité mborerecuar guasu chini ahese. Sese aipo ehi: “Jesús omanora yande recocuer rese” ehi. ⁵² Iyavei ndahei chira ahe ava reseño, omanora opacatu ava Tũpa Rahir oñemosai tẽi vahe ñepe reseve imonuha água. ⁵³ Ēgüe ehi ahe arí pipeve judío eta rerecuar oyemoingatupa voi yuca água yuvireco.

⁵⁴ Sese ndoguata iri ava judío eta pãhu rupi. Ahe rumo osẽ ivi Judea sui, oso ivi iporupirẽhi vahe rerovicave, tecua Efraín ve. Aheve opacatu oropita supi.

⁵⁵ Virovise judío Pascua pieta apo água, setá iteanga ava ambuae tecua rupindar yuviraso tecua Jerusalén ve oyeecocuer moatiro ahe pieta mboetei água renondeve. ⁵⁶ Oseca tẽi Jesús yuvireco. Ipare tũparove yuviroique, oporandu-randu oyeupe yuvireco:

—¿Mara peye pe, oura pãha pieta repia, aní chira tie? —ehi-ehi oyeupe yuvireco.

⁵⁷ Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi água” ehi yuvireco chupe.

Ñepe cuña omondo Jesús rese mbahe sñacua vahe

12 Seis arí ipane vites Pascua pieta água, Jesús oso tecua Betania ve, aheve acoi Lázaro mbogüerayevi. ² Eipeve ocaru yuvireco Jesús mboeteisave. Marta ihañeco sese; Lázaro evocoyase ocaru yuvinoi mesave ipiri. ³ Evocoyase María güeru medio litro mbahe sñacua vahe nardo, sepí iteanga vahe. Omondo ipi rese. Ipare oiquiti ohavapri pipe ichui. Sñacuá iteanga evocoyase opacatu oi pipe. ⁴ Evocoyase ore mboetasa Judas Iscariote, ahe acoi omondo vaheã ava yamotarẽhimbar uve, aipo ehi:

⁵ —¿Mahera vo ndimondosai co mbahe sñacua vahe tresciento denario rupi ava iparaisu vahe pñivii água? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe tẽi. Setá rupi guarepochi virocua güembiporuguã tẽi. ⁷ Evocoyase Jesús aipo ehi:

—Toyapoño cheu. Esepia, ahe che mano água renonde ěgüe ehi cheu. ⁸ Yuvirecoveño itera ava iparaisu vahe pe pãhuve yepi; che rumo ndaico pucu iri chira pe pãhuve —ehi Judas upe.

Pahi rerecuar oyamotarẽhi Lázaro yuvireco

⁹ Setá iteanga ava judío oyandu yuvireco Jesús rerãcua Betania ve secoise. Sese yuviraso aheve; ndahei Jesús repia güeraño yuviraso, ěgüe ehi rumo mbogüerayevi Lázaro repia avei. ¹⁰ Evocoyase pahi rerecuar, “Yayuca avei Lázaro” ehi yuvireco oyeupe.

¹¹ Esepia, ahe ichui tẽi niha setá iteanga judío oyepepi pahi rerecuar sui Jesús reroya água yuvireco.

Jesús oique Jerusalén pipe

¹² Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota água ahe tecuave yuvireco. ¹³ Ahese oyasia pindo yuvireco. Oyacatu viraso Jesús rovaichi água, osapucui yuvireco chupe:

—¡Imboeteipri, sovasapri secoi ou vahe yande Yar Tũpa rer pipe! ¡Tũpa tosovasa Israel rerecuar guasu! —ehi yuvireco.

¹⁴ Yipindar rumo opa Jesús oseca uca guaricumí. Ipare oyeupi sese icuachiapri aracahendar rupi tupri ité aipo ehi vahe:

¹⁵ “Pesiquiyei rene, Sión pendar; pesepia, pe rerecuar guasu guaricumí harive ou pẽu” ehi.

¹⁶ Yipindar, ore semimbohe eta, ndorosenducuai eté co aracahendar imombeupri. Ipare rumo oyevisse güecosa porañetesave, ahese oremahenduha aracahendar sesendar icuachiapri rese, “Supi eté omombehu” orohe tẽi sepia.

¹⁷ Acoi ava yuvirecoi vahe Jesús rupi, Lázaro mbogüerayevisa osepi vahecuer, ahe opa omombehu-mbehu ambuae ava upe yuvireco. ¹⁸ Sese ava eta yuvinosse voi sovaichi ipisi água. Esepia, oicua ité ahe mbahe poromondiisa guasu yapose yuvireco. ¹⁹ Evocoyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ¡opacatu guasu ité ava oguata cõritei yuvireco supi! —ehi yuvireco.

Oime griego oseca vahe Jesús yuvireco

²⁰ Griego oime ava rehii pãhuve yuviraso vahe pieta repia Tũpa mboetei água tecua Jerusalén ve. ²¹ Ahe oyemboya Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

²² Felipe evocoyase oso imombehu Andrés upe; ichui yuviraso ñuvirío voi Jesús upe imombehu. ²³ Evocoyase chupe aipo ehi:

—Oyepota arí cheundar che, Ava Riquehir, che yeve iri água che recua porañetesave. ²⁴ Supi eté aipo ahe pëu: inungar acoi trigo rãhi ñañotisaie, ahese ndihai chietera; ñotise rumo, ahese iha vaira. ²⁵ Acoi ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pipendar tēi che recocuer rese, evocoi nungar virecora tecovesa apirēhi. ²⁶ Acoi ava che mboyeroya pota vahe, toguata che rupi yuvireco. Esepia, acoi che mboyeroyasar yuvirecoi vahe, ahe avei yuvirecoira che piri ivave. Che Ru Tūpa evocoyase omboeteira ahe sereco —ehi chupe.

Jesús omombehu omano água

²⁷ “¡Cūrítei ayandu ité mbahe-mbahe tēi oime vaheṛã cheu! ‘¿Mara ahera pñha?’ ahe tēi. ¿Aipo ahera: ‘Che Ru, che pñsiro eve cūrítei cheu oime vaheṛã mbahe tēi sui’ ahera viña? ¡Che rumo aicua evocoi nungarã ité ayu! ²⁸ Che Ru, emboyecua nde pñratasa nde rer porañetesamboetei água” ehi oyerogui.

Ichui oyeendu iva sui ñehesa aipo ehi vahe: “Ēgüe ahe niha amboyecua che pñratasa vichico, ěgüe ahe iri aveira” ehi.

²⁹ Aheve ava yuvirecoi vahe, “Osunu revo” ehi yuvireco viña; ambuae ava,

—Tūpa rembiguai revo oñehe Jesús upe —ehi yuvireco.

³⁰ Evocoyase aipo ehi ava eta upe:

—Ndahei cheundar ñehesa pesendu, ahe rumo pëundar. ³¹ Cūrítei oimera ñemoirosa co ivi pipendar ndache reroyai vahe upe, cūrítei avei imombosara Carugar co ivi pipendar imborerecuasa sui. ³² Acoi che rupise ivate, opacatu ava arura cheyeupi —ehi.

³³ Aipo ñehesa pipe omboyecua tupri ité mara ehira omano. ³⁴ Aipo ihese ava eta aipo ehi:

—Ore rumo orosendu mborocuaíta icuachiapri pipe aipo ehi vahe: “Poropñsirosar apirēhi vaheṛã ité” ehi. ¿Mahera ru aipo nde: “Ava Riquehir osupira ivate yuvireco” ere no? ¿Uma ru aipo Ava Riquehir, ambuae tie? —ehi ava eta yuvireco chupe.

³⁵ Evocoyase aipo ehi ava upe:

—Pe pereco vitemira chíhi rupive tesapesa pe pãhuve. Peguata catu supi seime viteseve. Aviyeteramo pe resapiha tēira pñtumimbi vahe. Esepia, acoi oguata vahe pñtumimbisa rupi, ndoicuai que güecosa. ³⁶ Peroya co tesapesa cūrítei pereco viteseve, ipipe ité pe reco água —ehi.

Aipo ohe pare, Jesús osē ava rehii pãhu sui; ndoyemboyecua iri chupe.

Setá judío rerecuar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondiisa judío rerecuar rovaque viña, ahe rumo ndoviroyai eté yuvireco. ³⁸ Esepia, imboaviyesa rane it-

era Tūpa ñehe mombehusar Isaías rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pñratasa eremboyecua chupe” ehi.

³⁹ Co rese avei ava ndoicatui eté senducua yuvireco. Inungar oicuachía Isaías aipo ehi:

⁴⁰ “Tūpa nomboesapisoi ava iyavei nombopihañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevi catui yuvireco chupe ombogüera água” ehi.

⁴¹ Isaías aipo ehi. Esepia, osepia ité Jesús reco porañetesave. Evocoyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepeí reseve yuvireco’ oya. ⁴³ Esepia, ahe oipota catu ava tēi suindar yemboeteisa Tūpa suindar yemboeteisa sui yuvireco.

Jesús ñehe reroyasa rese porandusara

⁴⁴ Yipindar rumo, Jesús oñehe vitesave ava rehii upe, oñehe pñrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco. ⁴⁵ Iyavei acoi che repia vahe, che mbousar avei osepia. ⁴⁶ Che tesapesa aico. Ayu co ivi pipe ava che reroyasar pñtumimbisave yuvirecoiēhi água. ⁴⁷ Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pipendar mocañi água, che rumo ayu ipñsiro água. ⁴⁸ Acoi ava che reroñro vahe, ndoviroyai vahe avei che ñehe, oime rumo imocañi água: Co che ñehesa supi eté vahe reroyaēhisa pipe oyemocañi ucara ari ipa vahe pipe. ⁴⁹ Esepia, che ñañehei eté cheyesui tēi; che Ru, che mbousar rumo che cuai che ñehe água, che porombohe água avei. ⁵⁰ Che aicua co cheundar porocuaíta güeru tecovesa apirēhi ava upe. Sese niha amombehu che Ru che cuaisa” ehi Jesús ava rehii upe.

Jesús oyosei güemimbohe pi

13 Pascua pieta renonde Jesús oicua ité ohari yepota co ivi reya água oso vaheṛã Vu piri. Ahe osaisu vahe ité ava oyeupendar co ivi pipe yepi. Ēgüe ehi saisu arí ipa vahe rupi.

² Carugar oique ité Simón rahir, Judas Iscariote, piha pipe imondo água yamotarēhimbar uve. Jesús rumo oicua ité Vu Tūpa sui ousa, oicua avei oyeve iri água Vu Tūpa piri iyavei Tu omondo opacatu omborerecuasa chupe. Sese ocaruse güemimbohe eta reseve, mesa sui opñha, osequi oturucuar yohasa. Ipare omonde ambuae turucuar vumbicuasa rese. ⁵ Evocoyase omondo i yepoisa riru pipe, oyosei güemimbohe pi, omombiru turucuar vumbicuasa rese vireco vahe pipe oico.

⁶ Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

7 —Nde rumo nderesenducuai mbahe che rembiapo cūritei. Ipare rumo eresenducua —ehi Pedro upe.

8 Pedro rumo aipo ehi chupe:

—iChe pī rumo ndereyosei chietera! —ehi.

—Ndayoseise rumo nde pī, ndahei chietera evo-coiyase che rupindar ereico —ehi Pedro upe.

9 Pedro evocoyase aipo ehi:

—iChe Yar, aní catu che pī año ereyosei; eyosei che po, che rova avei! —ehi chupe.

10 —Acoi oyasupa ramo vahe rumo, ahe ndiquihai eté. Sese ndiyai oyasu iri. Ipī güeraño rumo iya yo-seisa. Ēgüe peye ndipoi eté mbahe pe rese; ndaopacatu rumo Ēgüe peye —ehi.

11 Ahe aipo ehi: “Ndaopacatu rumo Ēgüe peye” ehi. Esepia, oicua ité uma omondora yamotarēhimbar upe.

12 Güemimbohe pī sei pare, omonde iri oturucuar yohasa, oguapī mesave aipo ehi:

—¿Peicua vo co mbahe ayapo vahe pēu? —ehi—.

13 Pe niha, “Ore mbohesar, ore Yar” peye cheu. Supi eté niha. Esepia, ahe ité che aico. 14 Yepe supi eté, che pe mbohesar, pe Yar avei aico viña, ayosei rumo pe pī. Sese pe avei ñepei-pei peyacatu peyosei aveira pe pī.

15 Che niha ‘na tehi avei yuvireco’ viya opombohe pe rereco, Ēgüe ahe pēu. 16 Supi eté aipo ahe pēu: ava mbiguai tēi, ahe ndahei ivate catu güereciar sui; Ēgüe ehi avei imbouprī ndahei ivate catu secoi ombousar sui. 17 Pesenducua co nungar mbahe, peyapo tuprise, ahese peviharete catura peico —ehi.

18 “Che ñahehei opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarēhi’ ehi vahe. 19 Senondeve amombehu pēu. Evocoyase Ēgüe ehise ité cheu, che reroyara peye che ité niha aipo ahe vahe vichico. 20 Supi eté aipo ahe pēu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

Jesús omombehu: “Ñepei pe pāhu pendar che mondora che amotarēhimbar upe” ehi

21 Aipo ohe pare, Jesús ndoyembovihai eté iyavei mbahe oime vaheñā omboyecua tupri ité,

—Supi eté aipo ahe pēu: ñepei pe pāhu pendar che mondora che amotarēhimbar upe —ehi.

22 Evocoyase ore oromahe-mahe tēi oreyese, “¿Ava upe pīha aipo ehi?” orohe tēi oreyeupe. 23 Che sembiaisu catu yípive acaru vīte. 24 Ipare Pedro oyaiti-iti ‘¿Ava upe vo aipo ere? tehi chupe’ oyapave cheu. 25 Evocoyase che asiri catu irimi yípive, aporandu chupe:

—Che Yar, ¿ava ité vo? —ahe.

26 Ahe aipo ehi cheu:

—Cūritei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaqui pan rahicuer imondo Simón Iscariote rahir, Judas, upe. 27 Judas oipisise pan, oguapī voi eté Carugar sese. Evocoyase aipo ehi Judas upe:

—Evocoi ereyapo pota vahe, eyapo voifño ité ru —ehi chupe.

28 Que ñepei rumo mesave orocarú vahe, ndorosenducuai eté aipo ihesa. 29 Esepia, Judas guarepochi riru rārosar secoi yepi. Sese amove ore pāhu pendar ipihañemoñeta: “ ‘Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

30 Pan pisi pare, Judas osē voi eté oso pītuse.

Porocuita ipiasu vahe

31 Judas sē pare, Jesús aipo ehi:

—Cūritei oyecua che, Ava Riquehir, reco porañeta. Che Ru Tūpa reco porañeta avei oyecua che rese. 32 Acoi amboyecua che Ru Tūpa reco porañeta, ahe avei omboyecua che reco porañeta, Ēgüe ehira imboyecua pīhaivi. 33 Che rahireta, che rembiaisu, ndaico pucu iri chira pe rese. Che reca tēira peye; inungar acoi judío rereciar upe aipo ahe: “Ndiyai chietera peso che sosave” ahe. 34 Sese co amondo porocuita ipiasu vahe pēu ñepei-pei peyeaisu āgua inungar che opoaisu. 35 Peyeaisuse ñepei-pei, opacatu tupri ité ava oicua yuvireco che remimbohe supi eté pe recosa —ehi.

Jesús, “ ‘Ndaicuai eté co mbia’ erera cheu” ehi Pedro upe

36 Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyevi Pedro upe:

—Cūritei ndiyai peso vaheñā che sosave che rupi; pesorera rumo che rupi curi —ehi.

37 —Che Yar, ¿mahera ru cūritei voi ndiyai nde rupi che so āgua? ¿Ayemoingatu ité amano vaheñā nde rese! —ehi Pedro chupe.

38 —¿Supi eté pīha ereyemoingatu ité che rese nde mano āgua? Nde rumo cōhe potase tacura ñehe renondeve, mbosapī oyupagüer rupi, “Ndaicuai eté co mbia” erera cheu —ehi Pedro upe.

Jesús, Tūpa raper yandeu

14 Ipare Jesús aipo ehi opacatu oreu: “Pepihañemoñeta atii rene; peyeroya Tūpa rese, che rese avei peyeroya. 2 Esepia, che Ru rētave setá oime pe reco āgua; Ēgüe ndehise rumo, namombehui chira aipo pēu viña. Sese che asora pe recuarā moingatu.

3 Imoingatu pare ayevira pe reca che recosave pe rera-so āgua cheyepiri. 4 Pe peicua que vo asora iyavei peicua mara peyera pe yepota āgua che recosave” ehi oreu.

5 Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so āgua? —ehi.

6 —Che niha peri aico supi eté vahe iyavei tecovesa. Che rupi güeraño ité peyepotara che Ru upe —ehi—.

7 Pe peicua tuprise ité che recocuer viña, peicua aveira che Ru viña no. Cūritei suive rumo peicua, pesepia avei cute —ehi oreu.

8 Evocoyase Felipe aipo ehi chupe:

—Che Yar, torosepia ité ru aipo nde Ru. Ahese avi-
era oreu —ehi.

⁹—Felipe, setá arí aico pe rese, ¿ndapeicua vitéi eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vité cheu no? ¹⁰ ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pëu, ndahei cheyesui tēi amombehu. Che Ru secoi vahe che rese, ahe ité oyapo güemimbotar che recocuer rese —ehi—. ¹¹ Che reroya peye che Ru rese che recose, ahe avei secoise che rese. Anise, che reroyañomi tēi catu peye mbahe che rembiapo rese —ehi—. ¹² Supi eté aipo ahe pëu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—. ¹³ Acoi peporanduse que mbahe rese che rer pipe, che amondoño itera pëu. Ipipe che amboyecua che Ru reco pīratasa. ¹⁴ Che ayapora que mbahe che rer pipe pe porandusa —ehi oreu.

Jesús, “Che amboura Espíritu Santo pëu” ehi viroyasar upe

¹⁵ “Che raisuse ité peye, pemboyeroya catu che porocuaíta. ¹⁶ Che aporandura che Ru upe ombou va-herã Espíritu supi eté vahe pe pītívii água, ahe secoi vahe-herã ité pe rese. ¹⁷ Ava Tūpa ndoicuai vahe rumo, ndoicatui chietera ipisi. Esepia, ndosepia, ndoicuai avei yuvireco. Pe rumo peicua ité. Esepia, ahe ité secoi pe rese. Ipare oique itera pe pīha pipe.

¹⁸ “Ndopoyai chira pe güeraño tēi; ayevíra niha pe rese aico vahe-herã. ¹⁹ Chīhi tēi oime vité arí che reroyasarēhi che repia vité vahe-herã yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei. ²⁰ Ahe arí pipe peicuara che Ru rese che recosa, che rese pe recosa avei iyavei che aicose pe rese. ²¹ Acoi oicua vahe che porocuaíta, omboyeroya vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.

²² Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboyecua; mahera ru ndereyemboyecua iri chira ava nde reroyasarēhi upe? —ehi chupe.

²³ Evocoyase aipo ehi Judas upe:

—Acoi che raisu vahe, omboyeroya vahe che ñehe yuvireco, che Ru evocoyase osaisura iyavei che Ru reseve oroyura oroico vahe-herã sese. ²⁴ Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui tēi; ahe rumo che Ru, che mbousar suindar —ehi.

²⁵ “Pe rese che reco vitese, opa co mbahe amombehu vichico pëu. ²⁶ Espíritu Santo rumo, Poropītíviiisar, che Ru ombou vahe che rer pipe, ahe pe mbohera opacatu mbahe aviye vahe rese. Pe momahenduha aveira opacatu pëu che ñehe agüer rese.

²⁷ “Aseya teco tuprisa pëu, ahe che reco tuprisa; ndahei rumo avaño tēi rembiapo nungar amondo pëu. Aní, ‘¿Mara yahera pīha?’ peyera; aní chiveira pesiquiye. ²⁸ Pesendupa niha acoi, ‘Asora, ipare ayeví irira pe rese aico vahe-herã’ che hesa. Supi eté che raisuse peye, peviharetera peicuase che Ru piri che sosa. Esepia, ahe ivate catu vahe ité che sui. ²⁹ Sese amombehu vahe co mbahe tenondeve pëu, egüe ehise ité, ahese peroyara.

³⁰ “Namombehu pucu iri chira mbahe pëu. Esepia, ou ité co ivi pipe oporocuai tēi vahe. Ahe rumo ndahei ivate catu vahe che sui ³¹ ‘toicua ava che reroyasarēhi che Ru raisusa yuvireco’ che hesa pipe. Ayapoño ité che Ru che cuaita.

“Pepūha. Yaso cohava sui” ehi güemimbohe eta upe.

Jesús uva hi nungar

15 Ipare Jesús oñehe iri oreu aipo ehi: “Che aico inungar uva hi supi eté vahe; che Ru evocoyase inungar sese ihañeco vahe secoi. ² Ahe oyasia sãca ndihai vahe ichui yepi; iha vahe rumo omoatiro tupri iha catu água. ³ Pe pe recocuer imoatiropro ité che pe mbohesa pipe. ⁴ Peicoño ité catu che rese inungar che aicoño ité avei pe rese. Uva rãca oise ohí sui, ndiha iri ahe ae tēi; pe avei egüe peyera peyepese che sui” ehi oreu.

⁵ “Che niha uva hi nungar aico; pe evocoyase sãca nungar peico. Acoi secoi vahe che rese, che avei aico sese. Inungar mbahe miti iha ati vahe, egüe ehira ahe. Supi eté ndapeicatui chietera che porēhi mbahe apo. ⁶ Acoi ndasecoi vahe che rese, ahe imombosara inungar acoi uva rãca yipi vahe. Ipare imonuhasa sapi água” ehi oreu.

⁷ “Pe peicoñose ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pëu” ehi. ⁸ “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoyase che remimbohe supi tupri vahe pe recosa. ⁹ Che opoaisu ité, inungar che Ru che raisu. Sese peicoño ité catu che poroaisusa pipe. ¹⁰ Esepia, pemboyeroyase che porocuaíta, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

¹¹ “Che aipo ahe pëu ‘tovireco che vihasa oyese yuvireco’ viya; ‘toyemboviharete catu yuvireco’ che hesa pipe. ¹² Co che porocuaíta: Peyeaisu ñepeipei, inungar che opoaisu. ¹³ Ndipoi eté que poroaisusa ivate catu vahe co sui omondose que ava güecocuer omboripar rese nara. ¹⁴ Pe che mboyeroyase peye, ahese che mboripar peico. ¹⁵ ‘Pe mbiguai peico’ ndahe iri pëu. Esepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pëu. Esepia, aicua ucapa ñehesa che Ru cheu omombehu vahe pëu. ¹⁶ Pe niha ndache poravoi peye. Che rumo opoporavo iyavei opocuai peporaviqui vahe-herã ava reru água cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pëu. ¹⁷ Co

rese opocuai: Peyeaisu catu ñepepei-peyacatu" ehi Jesús güemimbohe upe.

Jesús amotarēhimbar, supindar amotarēhimbar avei

¹⁸ "Acoi ava ndoicuai vahe Tūpa pe amotarēhise, pe-icuaño che rane che amotarēhi yuvireco yipindar. ¹⁹ Pe peico vitesse ava Tūpa ndoicuai vahe pāhuve, evocoyase pe raisu aira yuvireco viña. Che rumo opopora-vo ipāhu sui yuvireco. Sese tēi ndape ambota iri yuvireco. Esepia, pe ndahe iri ipāhu pendar peico.

²⁰ Peyemomahenduha pēu aipo che hesa rese: 'Ndipoi eté que mbiguai ivate catu vahe güerecuar sui' ahe. Che niha yipindar yamotarēhimbrī aico, pe avei pe amotarēhira yuvireco. Acoi omboyeroya vahe rumo che porombohesa, pe porombohesa avei omboyero-yara yuvireco. ²¹ Co opacatu mbahe che recocuer sui tēi ēgüe ehira pēu. Esepia, ndoicuai niha che mbousar yuvireco.

²² "Che ndayuisse ahe ava upe mbahe sembiavi mombehu viña, evocoyase, 'Peyavi mbahe' ndehi chira Tūpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipāhuve; ahe rumo yepe osepia co mbahe yuvireco viña, che amotarēhiño, che Ru avei oyamotarēhi yuvireco. Sese, 'Pereco ité mbahe pe rembiavi peyese' ehi Tūpa chupe. Esepia, acoi che amotarēhi vahe, che Ru avei oyamotarēhi yuvireco.

²⁵ Co rumo ēgüe ehi. Esepia, imboaviyesa rane itera ñehesa sesendar icuachiapri pipe aipo ehi vahe: 'Mbahe apoēhi pipe sui tēi che amotarēhi yuvireco' ehi vahe.

²⁶ "Acoi ambouse rumo Poropřtiviisar, Espiritu supi eté vahe che Ru sui pēu, ahe omombehura che recocuer. ²⁷ Pe avei pemombehura che recocuer. Esepia, yipisuive ité peico che rupi" ehi.

16 "Pe mocañiehi āgua che rese pe yeroyasa aipo ahe opacatu co mbahe imombehu pēu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, 'Tūpa uve nara revo na yahe' ehira yuvireco viña. ³ Evocoi rumo ēgüe ehira yuvireco che Ru cuaēhi pipe iyavei che cuaēhi pipe yuvireco. ⁴ Amombehu aipo pēu acoi ēgüe ehise, peyemomahenduhara che remimombehugüer rese.

Espíritu Santo rembiapo

"Yipisuive rumo namombehui co mbahe pēu. Esepia, aicoveño ité pe rese. ⁵ Cūrítei rumo asora che mbousar piri iyavei ndipoi que ñepepei pe pāhu pendar '¿que vo aipo eresora?' ehi vahe cūrítei cheu. ⁶ Pe rumo ndapeyemboviahaiño aipo mbahe amombehuse pēu. ⁷ Supi eté rumo aipo ahe pēu: aviye catura pēu che asose. Esepia, ndasoise viña, ndoui chietera pe rese Poropřtiviisar. Asose rumo, che amboura pēu. ⁸ Ouse ahe, oicua ucara ava che cuaēhisar upe yangaipa, oicua uca aveira tecocuer řvisa iyavei cañisa ndaseco pōrai vahe upendar. ⁹ Oicua ucara yangaipa chupe

ndache reroyaise yuvireco; ¹⁰ oicua rumo che reco ihřvi tupri vahe yuvireco. Esepia, asora che Ru recosave, ahese pe ndache repia iri chietera peye; ¹¹ iyavei oicua Tūpa poromocañisa. Esepia niha, Carugar, ahe co ivi pipendar rerecuar oipisira che Ru Tūpa ñemoirosa.

¹² "Setá iteanga mbahe oime amombehu vaheř pēu. Pe rumo ndapeicatu chira cūrítei senducua. ¹³ Ouse rumo Espiritu supi eté vahe, ahe pe mbohera mbahe supi eté vahe rese. Esepia, noñehi chira oyesui tēi, ahe rumo omombehura mbahe osendu vahe güeraño, oicua uca aveira mbahe coye oime vaheř. ¹⁴ Ahe che mboeteira. Esepia, oicua ucara opacatu mbahe cheundar pēu. ¹⁵ Opacatu mbahe che Ru vireco vahe, che mbahe. Sese niha, 'Espiritu oipisira opacatu mbahe cheundar, oicua uca aveira pēu' ahe.

¹⁶ "Aviyeteramo tēi ndache repia iri chira peye. Ipare rumo coye catumi che repia irira peye" ehi oreu.

Yepe semimbohe ndovihai chira viña, coye catu rumo oviharetera yuvireco

¹⁷ Evocoyase ore oroporandu-randu tēi oreyeupe aipo orohe:

—¿Mara oya pñha: 'Aviyeteramo tēi ndache repia iri chira peye' ehi yandeu; ipare rumo aipo coye catumi yasepiara iyavei aipo osora Vu piri no? ¹⁸ ¿Mara oya vo aipo: 'Aviyeteramo tēi' ehi? Ndayasenducuai mo aipo iñehesa —orohe oreyeupe.

¹⁹ Ipare rumo 'oporandura co mbahe rese yuvireco cheu' oya aipo ehi voi oreu:

—¿Ipare rumo coye catumi che repia irira peye' che he agüer rese co pe porandu vite peyeupe? —ehi—.

²⁰ Supi eté aipo ahe pēu: peyasehora pe vihareñisa pipe, ava angaipa viyar rumo ovihareteñora yuvireco. Yepe pe, ndapevihai chira viña, coye catu rumo peviharetera. ²¹ Inungar acoi que cuña imembira potase, tasi chupe oyepotase ari imembira āgua; pñtani oha pare rumo, nimahenduha iri tasicuer rese; soriveteño omembri rese. ²² Ēgüe peye avei; pe cūrítei tasi avei pēu, ayevi irira rumo pe repia āgua, ahese peviharetera. Ahe viharetesa ndipoi chietera que ava vīrocuva vaheř pe sui.

²³ "Ahe ari pipe, ndapeporandu iri chietera mbahe rese cheu. Supi eté aipo ahe pēu: che Ru omboura opacatu mbahe pēu che rer pipe peporanduse.

²⁴ Cūrítei rumo ndapeporandu vitei mbahe rese che rer pipe. Peporandu catu sese, ahese peipisira. Ipipe sui perorivete catura.

Jesucristo mbahe-mbahe tēi recopisar

²⁵ "Opacatu mbahe rese niha amboyoya tecocuer pēu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pēu che Ru recocuer resendar. ²⁶ Ahe ari pipe pe peporandura mbahe rese che rer pipe; che rumo, 'Ayerquirira pe rese che Ru upe' ndahei pēu. ²⁷ Esepia, che Ru ae ité pe raisu. Pe raisu ité niha. Esepia, pe che raisu

peye, che reroya avei che Ru Tūpa sui che yuse peye. ²⁸ Asē che Ru sui co ivi pipe vitu; cūritei rumo asepara co ivi, ayevira che Ru upe” ehi oreu.

²⁹ Evocoyase ore aipo orohe chupe:

—Indó, aipo rupi ereñehe tupri catu ité; nderemboy- oya iri ambuae mbahe rese imombehu oreu. ³⁰ Supi eté ereicua opacatu mbahe, ereicua avei ore porandusa. Evocoyase ndiya iri ore porandu āgua mbahe rese ndeu. Sese oroviroya Tūpa sui nde yusa —orohe chupe.

³¹ —¿Evocoyase che reroya ité peye? —ehi—. ³² Supi eté oyepota ari cute, co pipe ité peyemosaipara che sui; che reyara che aemi peye. Ndahei rumo che ae aico. Esepia, che Ru secoi che rese. ³³ Amombehu co opacatu pēu che rese mbahe tupri pipe pe reco āgua. Peparaisu itera co ivi pipe; peyemonguerēhi catura rumo. Esepia, che opa ité asecoi co ivi pipendar mbahe tēi —ehi.

Jesús oyeriqui güemimbohe rese

17 Aipo ohe pare, Jesús omahe iva rese aipo ehi: “Che Ru, oyepota ari cute. Che mboetei eve, ipipe sui avei che nde Rahir toromboetei. ² Supi eté niha, nde erembou che mborerecua āgua opacatu ava ivi pipendar harive iyavei tecovesa apirēhi mondo āgua opacatu ava nde cheu erembou vahe upe. ³ Co niha tecovesa apirēhi, tande cua nde Tūpa ñepei supi eté vahe nde recose yuvireco, tache cua avei nde che mbose yuvireco.

⁴ “Che niha oromboetei co ivi pipe, iyavei ayapo nde che cuaisa. ⁵ Sese che Ru, embou irimi cūritei che reco porañete āgua, inungar acoi yipindar areco vahe nde rese ivi apoēhiseve.

⁶ “Co nde rembiporavo ava co ivi pipendar pāhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco. ⁷ Cūritei oicuapa opacatu mbahe nde suindar cheu erembou vahe yuvireco. ⁸ Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

⁹ “Che ayeroqui cheu nde remimbou rese ndeu. Esepia, ndeundar ité yuvirecoi; ndayeroqui rumo ambuae ava che reroysarēhi rese. ¹⁰ Opacatu ava cheundar, ndeundar avei; ndeundar evocoyase cheundar. Ahe sese che reco porañetesasa oyecua.

¹¹ “Che ndapitai chira co ivi pipe; ahe rumo opitara cohava yuvireco. Che evocoyase asora nde piri. Che Ru, seco maranehi vahe, esāro nde pīratasa pipe nde remimbou cheu oyese yuvirecoi tupri āgua inungar yande yaico. ¹² Aicose co ivi pipe, asāro tupri nde rer pīratasa cheu erembou vahe pipe; chemahemoha yuvireco sese mbahe tēi sui. Ndipoi eté que ñepei ocañi tēi vahe; acoi yipive ocañi vaheño ité rumo ocañi tēi; nde ñehe rupi tupri ité ēgüe ehi.

¹³ “Cūritei asora nde recosave. Co ivi pipe che reco vitesa rumo, amombehu co mbahe chupe ‘tovireco che viharetasa yuvireco’ che yapave. ¹⁴ Che niha

amombehu nde ñehe yuvireco chupe. Ava che reroysarēhi rumo oyamotarēhiño yuvireco. Esepia niha, ndahe iri Carugar povri pendar yuvirecoi inungar che ndahei ipovri pendar aico. ¹⁵ “Enose ava Carugar povri pendar pāhu sui’ ndahei ndeu, che rumo aipota eresepera Carugar sui. ¹⁶ Inungar che ndahei Carugar povri pendar aico, ēgüe ehi avei ahe yuvireco.

¹⁷ Eipeha tupri angaipa sui ndeyeupe nara yuvireco ñehesa supi eté vahe reroysase. Nde ñehesa niha supi tupri vahe ité. ¹⁸ Inungar nde che mbou eve ava co ivi pipendar pāhuve, ēgüe ahe avei che imondo ava pāhuve yuvireco. ¹⁹ Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

²⁰ “Ndayeroqui co che remimbohe reseño ndeu, ayeroqui avei rumo ambuae ava che reroysar ñehesa sui che reroya vaheñā rese. ²¹ Aporandu avei ndeu toyuvirecoi tupri ité yuvireco oyese inungar ñepei vahe, ēgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco. ²² Che reco porañetesasa nde erembou vahe cheu, ahe tupri avei amondo yuvireco chupe ñepei vahe nungar yuvirecoi āgua, inungar yande ñepei vahe yaico. ²³ Che aico yuvireco sese, nde evocoyase ereico che rese ahe yuvirecoi tupri āgua inungar ñepei vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

²⁴ “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vaheñā teco porañetesasa cheu erembou vahe yuvireco. Nde niha yipive ité che raisu eve ivi apoēhiseve. ²⁵ Che Ru, seco catupri vahe, ava co ivi pipendar tēi nande cuai yuvireco; che rumo orocua ité, co avei oicua nde che mbousa yuvireco. ²⁶ Orocuca uca chupe, orocua ucaño vite itera rumo. Evocoyase nde che raisu tovireco avei yuvireco, che avei taico yuvireco sese” ehi Jesús oyeriqui güemimbohe recocuer rese.

Jesús oipisi yuvireco

18 Aipo ohe pare, Jesús ore renose ore reraso iembī Cedrón rovai. Aheve oime mbahe miti rēta, ipipe Jesús ore reroique ore reraso. ² Iyavei Judas omondo vaheñā yamotarēhimbar upe oicua avei aheve secosa. Esepia, setá rupi Jesús rese oroñemonuha aheve yepi. ³ Sese Judas oyepotaño ité aheve sundao rehii reseve iyavei sundao tūparo rārosar pahī rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuviraso. ⁴ Yipive ité rumo oicua oyeupe mbahe oime vaheñā. Sese osē voi eté yuvireco chupe oporandu:

—¿Ava vo peseca? —ehi.

⁵ Ahe ava rehii omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipāhuve secoi imondo āgua yamotarēhimbar upe. ⁶ “Che niha ahe aico” ehise ava upe; guaquicuei

coti pãve opa oviapi yuvireco. ⁷ Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pëu —ehi—. Che che re-case peye, pepocoi rene catu co ambuae rese, toyu-virasopaño —ehi.

⁹ Co rumo ñehe mboaviye ãgua ãgüe ehi: “Acoi che Ru ombou vahe cheu, nocañii eté que ñepei che sui” ehi. ¹⁰ Evocoyase Simón Pedro vireco vahe quise, vinose, oyasía Malco serer vahe nambi yasu cotindar, ahe pahi rerecuar ivate catu vahe rembiguai. ¹¹ Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosañi itera chupe —ehi.

Jesús serasosa mborerecuar Anás rovai

¹² Evocoyase sundao rerecuar, osundao eta reseve iyavei judío tũparo rãrosar oipisi Jesús yuvireco, oipocua. ¹³ Yipindar viraso Anás rêtave yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe secoi. ¹⁴ Caifás ité aipo ehi omboetasa upe: “Yandeu aviye catu itera que ñepei mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahi eta rerecuar rëta pipendar opa ité che cua yuvireco. Sese aiqueño ité Jesús raquicuei mborerecuar rêtave vicho. ¹⁶ Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoyase asë, aporandu oquendipi rãrosar uve Pedro reique ãgua rese. ¹⁷ Evocoyase oquendipi rãrosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rãrosar upe.

¹⁸ Sõhisá iteanga ahe pïtu pipe. Evocoyase mborerecuar rembiguai iyavei sundao eta oyatapi yuvireco oyepehe ãgua. Pedro avei aheve ipãhuvu oyepehe tata ipive ohã.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. ²⁰ Jesús rumo aipo ehi chupe:

—Che niha ñehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tũparo guasu pipe avei. Indó, che nañemi eté ñehe vahe. ²¹ ¿Mahera vo evocoyase cheu tã ereporandu? Eporandu catu che ñehe ren-dusar upe. Ahe tomombehu che oyeupe ñehesa yu-

vireco ndeu. Ahe niha oicua che ñehe agüer yuvireco —ehi.

²² Aipo ihese, ñepei mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

²³ Evocoyase omboyevi ahe mbia upe:

—Añehese mbahe tã rese, emombehu che ñehe raisa; che rumo ñehe tupri ité, ¿mahera vo evocoyase che rovapete eve? —ehi.

²⁴ Evocoyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepeheño vite ohã tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¿Aviye acoi nde ité oroepia vahe mbahe miti rëta pipe supi! —ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehe.

Jesús serasosa Pilato rovai

²⁸ Evocoyase viraso Jesús Caifás rëta sui Roma pendar mborerecuar guasu recosave yuvireco. Cõhe potase ãgüe ehi. Judío rumo ndoyuviroiquei eté mborerecuar recosave oyemboangaipaëhi ãgua. Esepia, ahe icuaita yuviroiquei, ndiyai chietera Pascua re-sendar ovesa roho hu ãgua yuvireco chupe viña.

²⁹ Sese Pilato osë ava upe aipo ehi:

—¿Mbahe vo sembiapo naporai vahe? —ehi.

³⁰ Ahe omboyevi yuvireco chupe:

—Seco catuprise, ndorogüerui chietera ndeu viña —ehi yuvireco chupe.

³¹ Evocoyase aipo ehi ava upe:

—Peraso, pe ae peyapo mbahe pëundar ité porocuita rupi sese —ehi.

Judío rerecuar evocoyase omboyevi yuvireco:

—Ore judío oroico vahe upe rumo ndipotasai oroyuca vahe rã que ava —ehi.

³² ãgüe ehi Jesús ñehe imano ãgua resendar yaviye.

³³ Ahese Pilato oique iri oi pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

³⁵ —¿Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoyase ereyapo? —ehi Pilato chupe.

³⁶ —Che mborerecuasa rumo ndahei co ivi pipendar. Co ivi pipendarse viña, che rupindareta ovavara che amotarëhimbar upe che repisave yuvireco viña. Che mborerecuasa rumo ndahei eté coha pendar —ehi.

³⁷ Ahese Pilato aipo ehi chupe:

—Evocoyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherã niha che aha co ivi pipe mbahe supi eté vahe mombehu água. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—¿Mbahe vo aipo supi eté vahe? —ehi chupe.

“¡Tayaticasa!” ehi ava eta Jesús uve yuvireco

Aipo ohe pare, Pilato osë iri judío eta upe oñehe aipo ehi:

—Che ndayosui eté co mbia rese mbahe sembiavi.

³⁹ Pe rumo peicua amose ñepeí ava soquendapri Pascua pieta pipe yepi; ¿peipota amose vaheerã judío rerecuar? —ehi.

⁴⁰ Aipo ihese, opacatu osapucaí pĩratá yuvireco aipo ehi:

—¡Evocoi aní! ¡Barrabás catu emose! —ehiño yuvireco.

Barrabás rumo imonda rai vahe secói.

19 Evocoyase Pilato oporocuai Jesús nupa água.

² Sundao eta omonde ñaca rese yu piapri iyavei omboyemonde turucuar pĩraumbi vahe pipe yuvireco.

³ Ipare oyemboya sese aipo ehi:

—¡Imboeteipri judío Rerecuar tasecoi! —ehi angahu sovapete-pete yuvireco.

⁴ Pilato evocoyase osë iri ava upe aipo ehi:

—Pesepia, anose pëu pe icua água che ndayosui eté mbahe sembiavi —ehi.

⁵ Evocoyase vinose yu piapri oãca rese turucuar pĩraumbi vahe reseve senoha ava upe. Ahese Pilato aipo ehi:

—¡Ndo co aipo mbia cute! —ehi.

⁶ Osepiase pahi eta rerecuar, sundao rerecuar avei, omboipi osapucaí:

—¡Tayaticasa! ¡Tayaticasa! —ehi pãve voi yuvireco chupe.

Pilato evocoyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

⁷ Judío rerecuar rumo omboyevi yuvireco:

—Ore rumo orovireco mborocuaíta. Ipipe omanoño itera. Esepia, oyeapo tēi Tūpa Rahir —ehi yuvireco.

⁸ Aipo ñehesa renduse, Pilato oyembosiquiyé catu.

⁹ Viroique iri oi pipe seraso. Aheve oporandu chupe: —¿Que pendar ité vo nde ereico? —ehi.

Ahe rumo nomboyevi iri eté iñehe chupe. ¹⁰ Evocoyase Pilato aipo ehi chupe:

—¡Mahera ndereñehei eté cheu! ¿Ndereicuai vo che mborerecuar aico nde atica uca água, mbahe tēi sui nde renose água avei? —ehi Pilato chupe.

¹¹ —¡Aní! Ndererecoi chietera nde mborerecuasa che harive Tūpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

¹² Ahe ramoseve, Pilato osãha iri tēi Jesús renose água; judío rerecuar rumo osapucaí voiño yuvireco chupe:

—¡Acoi eremosese co mbia, ndahei chietera nde mborerecuar ivate catu vahe mboripar ereico!

¡Opacatu oyemomborerecu tēi vahe, ahe evocoyase mborerecuar ivate catu vahe amotarëhimbar tēi yuvirecoi! —ehiño yuvireco chupe.

¹³ Evocoyase Pilato osenduse aipo ihesa, vinose uca Jesús ocarve, uguapi mborerecuar guasu renda harive. Ahe mbahe rese porandusa rer hebreo ñehe pipe Gabata ‘ita apopri’ oya. ¹⁴ Mbiter arí Pascua pieta água Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucaí pĩratá aipo ehi yuvireco:

—¡Tomano! ¡Tomano ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoyase ayatica uca pe rerecuar? —ehi.

Pahi eta rerecuar rumo omboyevi yuvireco chupe:

—¡Ore ndorovireco iri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.

¹⁶ Ipare Pilato omondo sundao upe yatica uca água. Ichui viraso yuvireco.

Jesús yaticasa curusu rese

¹⁷ Evocoyase Jesús vinose curusu seraso “Ava Ācagüer” serer vahesave (ahe serer hebreo ñehe pipe Gólgota). ¹⁸ Aheve oyatica yuvireco. Seseve avei oyatica ñuvirío ava yuvireco, ñepeí-peí yique ivi. ¹⁹ Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi.

²⁰ Setá iteanga ava oyeriqui co icuachiapri rese yuvireco. Esepia, icuachiasa hebreo, latín iyavei griego ñehe pipe. Iyavei yaticasa namombriimi eté tecua sui.

²¹ Sese pahi eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

²² Pilato rumo omboyevi:

—Co aicuachía vahe, ñgüe ehiño itera oí —ehi.

²³ Jesús atica pare evocoi irungatu sundao, omonuha iturucuar oyeupe imboyaho água yuvireco. Oipisi avei iturucuar ivri pendar nimbovívísai vahe, ñepeí reseve pucuño tēi vahe. ²⁴ Sundao eta aipo ehi oyeupe yuvireco:

—Yamondoro eme; aviye catu yandeguayíño sese, ¿ava ité pĩha oipísira? —ehi yuvireco.

Ñgüe ehi icuachiapirer imboaviye yuvireco aipo ehi vahe: “Omboyaho-yaho ava che turucuar iyavei iguayí yuvireco sese” ehi vahe. Supi tupri ité ñgüe ehi sundao yuvireco.

²⁵ Curusu ivipive yuvirecoi ichi, ichi cupihir, María Cleofas rembireco, María Magdalena avei. ²⁶ Osepiase osi iyavei che repiase yipive, che güembiaisu, aipo ehi osi upe:

—Che si, evocoi nde membirã ererecora —ehi chupe.

²⁷ Ipare voi aipo ehi cheu:

—Evocoi nde si —ehi.

Ichuive tupri amoingue ichi che rêtave asãro vaherã.

Jesús mano agüer

²⁸ Ipare Jesús oicua ité Vu remimbotar yaviyepa iyavei icuachiapirer mboaviye água aipo ehi:

—Che husei —ehi.

²⁹ Aheve oime mbahe riru. Ipipe savapipo vinagre oĩ. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco.

³⁰ Osupite pare aipo ehi:

—Opa yaviye cute —ehi.

Ipare voi ñaca iviso omano.

Sundao oñaruca cutu lanza pipe Jesús

³¹ Ñepei ari Pascua pieta uve ipane vahe pipe aipo égüe ehi. Sese judío ndoipotai ava retecuer pita curusu rese mbituhusa ari pipe. Esepia, ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vahe rã sundao curusu rese yaticapri rêtima mope água 'tomano' oyapave curusu sui setecuer reroyipa água yuvireco. ³² Evocoyase sundao yuvirasopa ñuvirio mbia Jesús rese yaticasa vahe yuvireco. Ahe sëtima rane opa omope yuvireco. ³³ Oyemboyase rumo Jesús rese, "Omano ité" ehiño yuvireco chupe. Sese nomopei sëtima yuvireco.

³⁴ Ñepei sundao rumo oicutu yiqueve lanza pipe. Ahe ramoseve voi osẽ suvi, i reseve. ³⁵ Che asepiya vahe ité; supi eté aipo ahe. Evocoyase amombehu pẽu pe seroya água. ³⁶ Esepia, co mbahe égüe ehi icuachiapirer mboaviye água aipo ehi vahe: "Ndimopesai chietera que ñepei icangüer" ehi vahe aracahe. ³⁷ Iyavei ambuae icuachiapri aipo ehi: "Osepiara ava eta icutupri yuvireco" ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögüer reraso água rese. José aipo Jesús rupindar. Ndoyecua ucai rumo omboetasa judío eta upe pahirerrecuar sui osiqiyepave. Pilato evocoyase, "Aviye, eraso" ehi chupe. Evocoyase José oso víraso sehögüer. ³⁹ Nicodemo avei oipřtivii, acoi oso vahe Jesús upe přtuse. Ahe güeru mbahe sřacua vahe mirra, áloe rese oyeseha vahe, treinta kilo, sehögüer rese nara. ⁴⁰ Égüe ehi José, Nicodemo reseve víraso sehögüer yuvireco iyavei oimama tupri turucuar secose vahe imoiacuapri pipe yuvireco. Égüe ehi judío oyapo ava omano vahe tř água yuvireco yepi. ⁴¹ Namombrii Jesús aticasa sui oime mbia remitř rãta. Aheve ité oime tuvipa ita hopri, ipiasu vahe iporupirẽhi. ⁴² Ipipe

omoingue Jesús rehögüer yuvireco. Esepia, ahe tuvipa cõimi eté ichui iyavei virovi ité judío pñtuhusa ari.

Jesús cuerayevisa

20 Domingu pipe María Magdalena oso tuvipave pñtu vitemiseve. Ahe osepiya ita tuvipa rovapisa ndahe irise güendave ihã. ² Evocoyase ahe cuña oña oso Simón Pedro upe, cheu avei aipo ehi:

—¡Víraso tuvipa sui yande Yar yuvireco! ¡Ndorocuai que vo catu omondo yuvireco! —ehi.

³ Evocoyase Pedro rese oroña oroso tuvipave. ⁴ Che rumo aña catu Pedro sui. Che rane evocoyase ayepota tuvipave. ⁵ Aiviro tẽi, turucuar güeraño rumo asepiya aheve. Ndaiquei rumo ipipe. ⁶ Ipare Pedro oyepota che raquicuei, oique voi tuvipa pipe. Ahe avei osepiya turucuar imama agüer tẽi. ⁷ Iyavei osepiya turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou. ⁸ Evocoyase che avei aique; asepiya égüe ehi vahe. Ahese aroya voi eté. ⁹ Ore rumo ndorosenducua vitei eté icuachiapri: "Ocuereyevira omano vahe pãhu sui" ehi vahe. ¹⁰ Ipare oroyevipa oroso ore rêtave.

Jesús oyemboyecua María Magdalena upe

¹¹ María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe, ¹² ahese osepiya ñuvirio Tũpa rembiguai iturucuar morochí vahe oguapř yuvinoi sehögüer rupagüerve. Ñepei oguapř oĩ ñaca rupagüer coti, ambuae ipi rupagüer coti. ¹³ Ahe Tũpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehögüer víraso yuvireco iyavei ndaicuai que vo catu omondo yuvireco —ehi.

¹⁴ Aipo oheseve, oyemboyere, osepiya Jesús aheve secoise; "Jesús co secoi" ndehi eté rumo chupe. ¹⁵ Evocoyase oporandu María upe:

—Cuña, ¿mahera vo ereyaseho? ¿Ava vo eresecca? —ehi chupe.

Ahe omoha 'co mbahe miti rãta rãrosar revo' oya viña, aipo ehi chupe:

—Nde ererasose sehögüer, emombehuñomi tẽi cheu que vo eremondo. Aheve taso seca —ehi chupe.

¹⁶ Evocoyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi ('Porombohesar' ohesave).

¹⁷ Evocoyase María upe,

—Erepcoci rene che rese. Esepia, ndayeupi vitei che Ru recosave. Esoño, emombehu che reroyasar upe: "Jesús oyeupira Vu Tũpa recosave" erera chupe. Che Ru, pe Ru avei; che Tũpa, pe Tũpa avei —ehi.

¹⁸ Evocoyase María Magdalena ou imombehu: "Asepiya yande Yar" ehi iyavei opa omombehu mbahe semimombehu oreu.

Jesús oyemboyecua güemimbohe upe

¹⁹ Ahe arí pipeve, domingu pipe, pītuse, ore ore ñe-monuhasave oroyeoquenda tupri judío rerecuareta sui ore siquiypave. Ahese Jesús oi que ore pāhuve. Ore mboavirave.

—¡Peico tupri! —ehi oreu.

²⁰ Aipo ohe pare, omboyecua opo, oi que avei oreu. Ahese orerorivete yande Yar repiase oroico. ²¹ Ipare aipo ehi iri:

—¡Peico tupri! Inungar che Ru che mbou, ěgüe ahe aveira co che pēu —ehi oreu.

²² Ichui ore peyu:

—Peipisi Espíritu Santo —ehi—. ²³ Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoyase ndoipisii chira ñeroisa —ehi oreu.

Tomás osepia yande Yar icuerayevise

²⁴ Ñepei ore mboetasa rumo Tomás icōi vahe, ndipoi eté ore pāhuve Jesús oyemboyecua oreu. ²⁵ Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yique cutu agüerve, ahese ramo aroyara —ehiñ oreu.

²⁶ Ocho arí pare, ore oroñemonuha iri oi pipe oroico. Aheve ramo Tomás secoi ore pāhuve. Yepe oroyeo-quenda tupri ité viña, Jesús rumo oi queño ité ou ore pāhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepia che po, emoingue nde cuã quiravo cuarerve; embou ave nde po, emoingue avei che ique cutu agüerve. “Tachequerēhi eme seroya āgua” nderei chira cheu; ¡che reroya eve! —ehi.

²⁸ Evocoyase Tomás aipo ehi:

—¡Che Yar Tūpa! —ehi chupe.

²⁹ Ahese aipo ehi Tomás upe:

—¿Cūritei che reroya che repiase eve cute? ¡Aviye catu ava che repiaēhi pipe che reroya vahe! —ehi chupe.

Co icuachiapri Jesús reroya āgua

³⁰ Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe.

³¹ Co rumo aicuachía ‘toviroya Jesús, Poropširosar, Tūpa Rahir secosa; ipipe tovireco tecovesa yuvireco’ che yapave.

Jesús oyemboyecua siete güemimbohe upe

21 Ore sore ivi Galilea ve, Jesús oyemboyecua iri oreu ipa Tiberia ve. ² Ahese oyeseve Simón Pedro yuvirecoi, Tomás ahe acoi icōi vahe, Natanael, ahe aipo tecua Caná pendar ivi Galilea rese, ñuvirío ore

Zebedeo rahir oroico vahe iyavei ambuae ñuvirío Jesús remimbohe. ³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oro ha carite pipe. Ahe pītu pipe rumo ndorombohai eté pira. ⁴ Cōhe potase rumo, Jesús oyemboyecua imbehi ivi. Ore rumo ndoroicuai eté Jesús secose. ⁵ Evocoyase aipo ehi oreu:

—Mbia chíhivahe, ¿ndapembhaimi eté pira? —ehi.

—Aní eté —orohe chupe.

⁶ Evocoyase aipo ehi:

—Pemondo pira mbohasa ive pe asu coti. Ahese pembohara —ehi.

Ěgüe orohe, ipare voi, “¡Too!” orohe, ndorovinose ca-tui eté ipi sui pira mbohasa oroico. Esepia, savapipo tupri ité pira ipipe. ⁷ Evocoyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturu-cuar. Esepia, yipindar nani secoi; opo ive oso chupe.

⁸ Ore evocoyase oroviroypota ité carite ndatipiimisave, oroichoho pira rehii imbohasa pipe seraso, cien metro tēi oroico imbehi sui. ⁹ Orovinosese ivi ātasave, orosepia tātapii harive pira, pan reseve.

¹⁰ —Peru moviro evocoi pira penose ramo vahe —ehi oreu.

¹¹ Evocoyase Simón Pedro oha carite pipe, oichoho ndatipiisave pira guasu rehii imbohasa pipe, ciento cincuenta y tres tupri; yepe setá viña, imbohasa rumo ndosoro eté. ¹² Evocoyase aipo ehi:

—Perio, tapecarumi rane —ehi oreu.

Ndipoi eté que ñepei ore pāhuve “¿ava vo nde erico?” ehi vahe chupe. Esepia, oroicuaño ité yande Yar secose. ¹³ Chupe ore sore, oipisi pan, ombou oreu, ěgüe ehi avei pira imbou oreu.

¹⁴ Co rese Jesús oyemboyecua mbosapi rupi oreu ocuerayevire.

Jesús osecoña Pedro

¹⁵ Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroya ramomi vahe rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoyase esāro tupri che reroysar yuvireco —ehi.

¹⁷ Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovihai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoyase ndehañeco tupri catu che reroyasar rese —ehi—. ¹⁸ Supi eté aipo ahe ndeu: nde chíhivahe catu vitesse, ereyemonde vite nde ae, ereguata vite avei nde remimbotar rupi; nde cuacua catuse rumo, ereyeyivamoatara, ambuae evocoyase nde mboyemondera, nde reraso aveira nde so potaëhisave —ehi.

¹⁹ Jesús rumo omboyecua aipo ohe pipe mara ehira Pedro omano Tūpa mboeteisave curi. Ipape,
—¡Erio che rupi! —ehi Pedro upe.

Jesús remimbohe saisupri

²⁰ Che Jesús rembiaisu ité aico, che ité acoi carusa ipa vaheve yípive añ acoi aporandu chupe: “Che Yar, ¿ava vo nde mondora nde amotarëhimbar upe?” ahe acoi chupe. Aguatase Pedro raquicuei, oyemboyere che repia. ²¹ Ahese oporandu chupe:

—Che Yar, evocoi no, ¿mbahe oimera chupe? —ehi cheu.

²² Evocoyase omboyevi Pedro upe:

—Che aipotase secove vite ãgua che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroyasar ipihañemoñeta tēi aipo che namanoi chivaherã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite ãgua che yevise nara, ¿mara vo nde ererecora viña?” ehi.

²⁴ Che ité amombehu co mbahe, che avei aicuachía iyavei yaicua supi tupri vahe ité che remimombehu.

²⁵ Oime avei ambuae mbahe setá Jesús rembiapo, que opacatú icuachiasase viña, ndiyai chietera revo ivi viña. Aipo rupive.

LOS HECHOS

Tüpa omboura Espiritu Santo víroyasar upe

1 Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipíndar sembiapocuer amombehu ndeu iyavei yipísui iporombohe agüer. ² Ocuerayevire, ivave oso renondeve, Jesús omombehu oporocuaíta Espiritu Santo pĩratasa pipe güembiporavo apóstol upe sembiaporã. ³ Oyemboyecua güembiporavo upe omanore. Setá rupi omboyecua tupri ocuerayevisa chupe. Semimbohe osepia yuvireco imanore cuarenta arí rupi. Ahese omombehu Tüpa mborerecuasa resendar güemimbohe upe.

⁴ Oicove vitesse yuvireco sese, aipo ehi chupe:
—Pesëi rene Jerusalén sui. Tomboaviye rane che Ru Tüpa güemimombehu, ahe acoi amombehu pëu. Juan niha pe äpiramo i pipe tëi; Tüpa rumo Espiritu Santo pipe pe äpiramora. Movíromi tëi arí ipane vite imondo ägua pëu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūritei Israel iguar upe pĩratasa iyeyecuai ägua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe arí cua ägua pëu. Esepia, Tüpa año ité vireco omborerecuasa ahe mbahe apo ägua.

⁸ Peipisira rumo Tüpa pĩratasa oiquese Espiritu Santo pe piha pipe. Ahese pemombehu tuprira che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

⁹ Aipo ihe pare, omahe apóstol yuvireco sese, ahe-seve Tüpa víraso ivave. Ichui Jesús oique íva quiha pãhuve. Evocoyase ndosepia iri eté yuvireco cute.

¹⁰ Omahe vitesseve yuvinoha ivave ichosa rese, aviyeteramo tëi ñuvirío mbia, iturucuar morochí vahe, oyemboyecua apóstol ipive yuvinoha ¹¹ aipo ehi yuvireco chupe:

—Galilea iguar, ¿mahera vo pemahe vite íva rese pehã? Evocoi Jesús, inungar Tüpa víraso ivave pe sui, égüe ehi aveira niha ogüeyi ou co ivi pipe coíye —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoyase apóstol oyeví yuviraso Jerusalén ve ivitri Olivo sui, ahe ihamombrígüer ñepei kilómetro tëi. Supivemi imombehusa judío guata ägua mbituhusa arí pipe yepi. ¹³ Yuviroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi. ¹⁴ Co opacatu arí yacatu rupi oñemonuha oyoya guasu oyeroqui ägua yuvireco yepi Jesús rivri, ichi, ambuae cuña reseve avei.

¹⁵ Evocoyase ñepei arí pipe oñemonuha guasu ciento veinte ava yuvireco. Ipãhuve Pedro opüha aipo ehi ava upe: ¹⁶ “Che mu eta Jesucristo reroyasar, íya ité co imboaviyesa Tüpa Ñehengagüer Judas recocuer resendar. Ahe imombehupri David upe Espiritu Santo pipe aracahe. Evocoi Judas víraso vahe Jesús amotarëhímar ipisi uca ägua. ¹⁷ Ahe acoi secoi yande pãhuve co mboraviquisa rese yande pĩtivii ägua avei viña. ¹⁸ Evocoi güembiapo ai repri pipe omboepi ivi. Ipape ñaca iviso oviapi oso ivive, oyetiapiipa.

¹⁹ Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñe-he pipe ‘Ívi Tuví resendar’ oyapave. ²⁰ Esepia, icuachiapri Salmo pipe aipo ehi:

‘Taseyasa sëta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rãgüer pisi ägua’ ehi vahe.

²¹ “Evocoyase cohava oime ava yande Yar Jesús secoi vitesse yande pãhuve ²² ñapiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tiporavosa ñepei ipãhu pendar yande rupi icuerayevi agüer mombehu ägua” ehi omboetasa upe.

²³ Evocoyase oiporavo ñuvirío mbia yuvireco: ahe José Barsabás, serosa Justo; ambuae rer Matías.

²⁴ Ipape oyeroqui yuvireco aipo ehi: “Nde, ore Yar, opacatu ava piha ereicua. Emboyecua cohava nde rembiporavo oreu; ¿uma vo ereipota ²⁵ eremondo va-herã icuaitarã apóstol seco ägua Judas recuñara? Ahe oangaipa pipe oyemocañi uca tëi vahe oico” ehi Tüpa upe yuvireco.

²⁶ Evocoyase osãha iporavo yuvireco. Matías ité vinose iporavopri sui yuvireco. Ichui tupri ité oique once apóstol pãhuve.

Espíritu Santo güeyi agüer

2 Oyepotase Pentecostés pieta, opacatu Jesús reroyasar oñemonuha oi guasu pipe yuvireco. ² Aheve oi pipe aviyeteramo tēi ivitu ipirata vahe nungar siapu guasu ou iva sui. Ahe siapugüer oyendupa tupri oi pipe. ³ Ahese oyecua tata rendigüer nungar opacatu aheve yuvirecoi vahe harive. ⁴ Ahese avei Tüpa omoingue evocoi ava piha pipe oEspíritu Santo. Ichui ahe Espiritu omoñehe uca ambuae ñehesa pipe yuvireco.

⁵ Ahe ari pipe setá iteanga judío yuvirecoi Jerusalén ve omboaviye vahe ocuaita Tüpa mboeteisa, ahe oñemonuha vahe opacatu ivi rupindar yuvireco. ⁶ Mbahe siapu guasu vahe renduse, oñemonuha ati tēi yuvireco oyese. Ndoyemboaracuai tēi yuvireco ambuae ava oñehe pipe ñehese. ⁷ “¡Too!” ehi tēi oyepihamondiisa pipe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco? ⁸ ¿Mahera piha co ñepepei oñehe yande ñehe pipe yuvireco? —ehi tēi oyeupe yuvireco—. ⁹ Esepia, cohava yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar, ¹⁰ Frigia pendar, Panfilia pendar, Egipto pendar, Libia cotindar, ahe Cirene cõquivotindar. Iyavei Roma pendar, ¹¹ judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pipe Tüpa rembiapo icatupri vahe! —ehi.

¹² Opacatu oyepihamondi, ndoicuai opihañemoñeta água yuvireco.

—¿Mara ehi piha co na oya yuvireco? —ehi-ehi tēi yuvireco oyeupe.

¹³ Ambuae ava rumo seroñrosa pipe aipo ehiño yuvireco:

—¡Osavaipo mo evocoi yuvireco! —ehi.

Pedro oñehe ava upe

¹⁴ Evocoyase Pedro opüha opacatu once vahe apóstol pãhuve, oñehe pĩrata aipo ehi: “Che mu judío eta, opacatu Jerusalén pendar avei, peicua co mbahe amombehu vaheã pẽu; peyapisaca tupri che ñehe rese: ¹⁵ ndosavaipo moco co mbia yuvireco. ¿Ndapesepiai vo añihivei vite cõritei? ¹⁶ Co niha Tüpa ñehe mombehusar Joel oicuachía vahe aracahe:

¹⁷ Tüpa aipo ehi:

Coiye, ari cañi renonde, amondora che Espiritu Santo opacatu ava upe.

Ipĩratasa pipe pe rahir, pe rayri oñehera yuvireco.

Mbia chĩhivahe osepiara oquer pendar nungar mbahe yuvireco.

Oime aveira queraisa supi eté vahe cuacua vahe upe.

¹⁸ Supi eté ahe ari pipe amondora che Espiritu che rembiguai cuimbahe upe, che rembiguai cuña upe avei.

Ipape oñehera yuvireco che rese ipĩratasa pipe.

¹⁹ Amboyecua poromondiisa iva rese.

Ëgüe ahe aveira poromondiisa mboyecua ivi pipe: tuvi, tata iyavei tãtachi.

²⁰ Yande Yar ari tuvichá vahe imboeteipri renonde ohara pĩtu, yasi oyeapora tuvi nungar.

²¹ Opacatu ava, che Yar che pĩtivii eve, ehi vahe, ahe oñepisiora yuvireco' ehi Joel icuachía aracahe.

²² “Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tüpa pĩratasa pipe pe pãhuve güeco maranehi mboyecua água. Ahe niha peicua opacatu. ²³ Ipape rumo evocoi Jesús imondosa pẽu yuca água. Ahe rumo Tüpa remimbotar rupi. Esepia, yipive ité Tüpa oicua pe peipisira yuca uca água curusu rese ava naporai vahe upe. ²⁴ Tüpa rumo ombogüeravevi manosa sui. Esepia, manosa ndoicatu sereco água. ²⁵ Supi eté mborerecuar guasu David oñehe Jesús recocuer rese aracahe aipo ehi:

‘Che aicua che Yar che rese secoi che acato coti mbahe tēi pipe che viapiẽhi água yepi.

²⁶ Sese avihaño ité vichico, asapucui avei che roriveteisa pipe.

Iyavei che yeroya tuprisave asãrora mbahe aviye vahe che recove iri água.

²⁷ Esepia, nde ndereseyai chira che hã omano vahe pãhuve, nderemonduyui ucai chiaveira nde rembiguai seco maranehi vahe retecuer.

²⁸ Co tecovesa ereicua uca cheu.

Che mbovihara eve nde rese che recose' ehi David aracahe.

²⁹ “Che mu eta, supi eté yande ramoi David omano, ñotisa ita hopri pipe aracahe. Ahe suvipa ouve vite cohave yande pãhuve. ³⁰ David rumo Tüpa ñehe mombehusar, oicua Tüpa oyeupe aipo ehi vahe: ‘Supi eté aipo ahe ndeu: nde suindar oimera mborerecuar guasu nde recuñara' ehi vahe. ³¹ Ahe ndoyavii osepia vahe ité Poropĩsiosar cuerayevisa. Evocoyase aipo ehi oñehe sese: ‘Ihã ndopitai chira omano vahe pãhuve iyavei setecuer ndituyui chira' ehi aracahe. ³² Evocoi Jesús, Tüpa remimbogüeravevi secoi. Ahe imombehusar opacatu ore oroico. ³³ Ipape Tüpa vıraso oacato coti imboguapı. Ahe oipisi imombehupri Espiritu Santo Vu sui. Evocoyase ahe opa omondo co ava yuvirecoi vahe upe. Ahe pesepia, pesendu avei cõritei peico. ³⁴ Esepia, evocoi oso vahe ivave ndahei David. Ahe ae rumo aipo ehi aracahe:

‘Yar aipo ehi che Yar upe:

Eguapi cohava che acato coti che piri.

³⁵ Asecopıpa uca ranera nde amotarẽhimbar ndeu, ehi Yar che Yar upe' ehi David aracahe.

³⁶ “Pe tapecuasapa, ticuasapa avei opacatu Israel recua rupi, supi eté evocoi Jesús curusu rese peyatica vahecuer, ahe Tüpa omoingo opacatu yande Yarã iyavei yande pĩsıro água” ehi Pedro ava rehıi upe.

³⁷ Aipo renduse, tasí iteanga ipiha pipe yuvireco. Evo-coiyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoyase? —ehi.

³⁸ Evocoyase aipo ehi ahe ava upe:

—Pemboasi pe angaipa; peyevi Tüpa upe. Iyavei peñeapiramo opacatu Jesucristo rer pipe. Evocoyase Tüpa iñerora pe angaipa rese. Iyavei omondora Espiritu Santo pëu. ³⁹ Esepia, co ñehesa imombehupri, ahe pëu nara, pe suindar upe nara iyavei opacatu amombri Tüpa sui yuvirecoi vahe upe nara avei, ahe acoi opacatu yande Yar Tüpa oyeupe nara güeru pota vahe —ehi.

⁴⁰ Ēgüe ehi oñehe vite ava mboaracua aipo ehi:

—¡Peyepipi co ava secocuer co coti tēi vahe sui! —ehi chupe.

⁴¹ Acoi ava viroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús viroya vahe rese. ⁴² Opacatu viroya tupri ité apóstol porombohesa. Opacatu guasu avei oyeaisu tupri yuvireco, oyerogui iyavei oñemonuha oyeupe pan mboyaho-yaho āgua yuvireco yepi.

Yipindar vahe Jesús reroyasar recocuer

⁴³ Opacatu oyembosiquiye imboeteisa pipe yuvireco. Esepia, apóstol oyapo setá poromondiisa ‘toicua Tüpa suindar yande porombohesa yuvireco’ oyapave.

⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara. ⁴⁵ Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi. ⁴⁶ Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho āgua. Ipare oyoya guasu ocaru yuvireco oyembovīhasa pipe, opihañemoñeta tuprisa pipe avei. ⁴⁷ Osapucal yuvireco Tüpa upe yepi iyavei opacatu ava osaisu Jesús reroyasar yuvireco. Yande Yar evocoyase ari rupi ombaeta catu ava iñepisiro āgua Jesucristo viroya vahe pāhuve.

Ndoguatai vahe cuerasa

3 Ñepepi ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyerogui yuvireco yepi. ² Ahe tūparo roquendipi rer Porañete. Aheve ari yacatu rupi viraso ñepepi ava oyesu suive ndoguatai vahe ‘tomondo guarepochi ava tūparove yuviroique vahe yuvireco chupe’ oyapave. ³ Ahe ndoguatai vahe omahe Pedro, Juan rese tūparove seique potase, oporandu guarepochi rese chupe. ⁴ Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

⁵ Evocoyase ahe mbia omahengatu sese ‘omboura revo que mbahe cheu’ oya viña. ⁶ Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pipe epūha, equata —ehi chupe.

⁷ Evocoyase oipisi ipo yasu cotindar imopuha. Ahe ramosave opa tupri ipi, ipiñuha avei ovīracua. ⁸ Evocoyase opūha, opo, oguata; oique oso tūparove supi. Opo-opo vorivetesave iyavei osapucal Tüpa upe.

⁹ Opacatu ava osepia yuvireco iguatase iyavei Tüpa upe isapucase. ¹⁰ Omahecuase sese, “¡Too!” ehi tēi yuvireco. Iyavei ndoyembovīhai aviyeteramo tēi icuerase yuvireco. Esepia, evocoi ava oicuapa tūparo roquendipi Porañete serer vahesave chinise mbahe rese iporanduse yuvireco yepi.

Pedro oñehe ava rehii upe tūparo Corero Salomón serer vahevriye

¹¹ Ndoguatai vahecuer ndoyepipi potai Pedro, Juan sui. Yuvinoña ati, oyepihamondii ava sepia tūparo Corero Salomón serer vaheve yuvirecoise. ¹² Pedro evocoyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndojavii co ore pīratasa pipe tēi iyavei Tüpa rese ore pihañemoñeta tuprisa pipe tēi orombogüera vahe co mbia pëu viña. ¹³ Tüpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoi eta avei no, ahe niha omondo güeco pīratasa tuvicha catu vahe Guahir Jesús upe. Pe rumo acoi pemondoño mborerecuar Pilato povriye. Acoi omose potase, pe evocoyase ndapeipotaiño imose āgua chupe. ¹⁴ Ahe seco maranehi vahe, seco ñvi vahe renose rāgüer pipe, peporandu: ‘Tosē oporapichi vahe’ peye. ¹⁵ Ēgüe peye acoi tecovesa ombou vahe yuca. Tüpa rumo ombogüerayevi omano vahe pāhu sui. Ahe niha ore oromombehu oroico pëu. ¹⁶ Co Jesús rer rese yeroya pipe ité niha oipisi pīratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri” ehi ava upe.

¹⁷ “Che mu eta, che aicua acoi pe peipitivii vahe pe rerecuar Jesús yuca uca āgua pe icua tupriēhi pipe cuese. ¹⁸ Ēgüe ehi Tüpa imboaviye arachendar opacatu oñehe mombehusar upe güemimombehugüer: ‘Che Rembiporavo Poropīsīrosar oiporarara mbahe-mbahe tēi rasicuer omano’ ehi vahe. ¹⁹ Sese pemboasi pe angaipa; peyevi Tüpa upe. Ipipe sui tomocañi pe angaipa pe sui. Aviyeteramo co sui omboura yande Yar pe reco morohisa āgua, ²⁰ ombou aveira Jesús, ahe yipisuive iporavopri pe pīsīro āgua. ²¹ Cūrītei rumo Jesucristo ivave vite secoi acoi Tüpa opase voi omoingatu opacatu mbahe iyevi āgua. Aipo ehi acoi imoñehe uca arachendar oñehe mombehusar ndaseco marai vahe. ²² Moisés yande ramoi yuvirecoi vahe upe aipo ehi imombehu aracahe: ‘Yande Yar Tüpa omopuhara ñepepi oñehe mombehusar pe pāhuve che nungar. Ahe iñehe pesendura, pemboyeroya catu aveira. ²³ Opacatu ndoviroyai vahe iñehe Tüpa omocañira güembiporavo pāhu sui’ ehi.

²⁴ “Ēgüe ehi opacatu Tūpa ñehe mombehúsar Samuel suive aracahe omombehu avei co ari cūritei yasepia vahe yuvireco. ²⁵ Pëu nara niha Tūpa ñehe mombehúsar remimombehugüer aracahendar. Pëu nara avei acoi Tūpa omombehu vahe güemimbotar yande ramoí eta upe. Esepia, aipo ehi Abraham upe aracahe: ‘Opacatu ava co ivi pipendar ahe sovasapri yuvirecoira nde suindar sui’ ehi. ²⁶ Acoi Tūpa Guahir ombogüerayevise, pëu rane ombou pe rovása água ‘toseyapa ñepeí-peí güecocueraí yuvireco’ oya” ehi Pedro ava rehii upe.

Pedro, Juan serasosa mborerecuar rovai

4 Pedro, Juan reseve oñehe vitesese ava rehii upe, ahese oñemoirosa pipe pahi eta, tūparo rārosar sundao rerecuar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pāhu sui” ehi. ³ Ichui oipisi seraso soquenda yuvireco ‘ayihive voi yanosera mbahe rese porandu água’ ohesa pipe. Esepia, caharuse tēi osoquenda yuvireco. ⁴ Setá rumo ava iñehesa osendu vahe víroya yuvireco. Ahe cuimbahe seroyasar retacuer güeraño seni cinco mil.

⁵ Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuaíta rese oporombohe vahe, ⁶ pahi rerecuar ivate catu vahe Anás, Caifás, Juan, Alejandro, opacatu omu reseve. ⁷ Evocoyase güeru ucase Pedro iyavei Juan opāhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

⁸ Evocoyase Pedro, Espiritu Santo pīratasa pipe, aipo ehi chupe:

—Pe, mborerecuareta co tecua pipendar, pe avei pahi rerecuar: ⁹ peporandu niha co ava imbaheasi vahe ndoguata catui vahe mbogüera agüer rese oreu —ehi chupe—. ¹⁰ Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatíca uca vahecuer curusu rese. Tūpa rumo ombogüerayevi iri omano vahe pāhu sui. ¹¹ Co Jesús pe remieroño, ahe rumo yande víracuasa. Pe evocoyase inungar oi mopuhasar omomboño vahe ita aviye catu vahe oi movíracuasa rāgüer yepi. ¹² Ndipoi que ambuae ava sui poropīsiosa, Jesús güeraño ité oicatu oporopīsio. Esepia, Tūpa nomboui ambuae ava tēi co ivi pipe yande pīsio água —ehi.

¹³ Mborerecuar osepiase iyembosiquiyeñhisa yuvireco, “¿Mara ehi pīha co mbia? ¿Ava tēi, ndoyemboheí vahe niha!” ehi tēi yuvireco chupe. Ichui oicua Jesús remimbohegüer secose yuvireco. ¹⁴ Iyavei acoi ava semimbogüeragüer supive ité secoise, sese ndoicatui chupe oñehe mara água yuvireco. ¹⁵ Ipare, “Pesé ocarve” ehi mborerecuareta yuvireco chupe. Ahe güeraño evocoyase opīta oi pipe oñemoñeta yuvireco sese ¹⁶ aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ēgüe ndehi” yahe chupe. ¹⁷ Yambosiquiye ava upe Jesús rer rese iñehe iri iñhi água yuvireco. Ipipe sui ava tosendu iri eme Jesús resendar ñehesa yuvireco —ehi.

¹⁸ Aipo ohe pare, “Perio” ehi yuvireco chupe. “Pensendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe. ¹⁹ Omboyeñño rumo oñehe yuvireco chupe:

—¿Mara ehi pe pihave? ¿Uma pīha aviye catu Tūpa rovai? ¿Pe porocuaíta tie oroviroya catura Tūpa ore cuaisa sui? ²⁰ Ndiyai rumo mbahe ore rembiepia, mbahe orosendu vahe avei mombehuñhi água oreu —ehi.

²¹ Aipo ihese, mborerecuar ombosiquiye catu tēi yuvireco. Ichui rumo omose tupriño. Esepia, ava ombotei guasu Tūpa yuvireco co imbaheasi vahe mbogüera repiase. Sese ndoicatui eté mbahe apo yuvireco chupe. ²² Evocoi ava oipisi vahe Tūpa poromondiisa ocuera água, ahe otñaro catu cuarenta araviter víreco vahe sui.

Jesús reroyasar oporandu Tūpa upe siquiyeñhisa rese yuvireco

²³ Yuvinosese Pedro, Juan avei, oyevi yuviraso ombotasa piri. Aheve oñemonuhasave opa omombehu pahi rerecuar oyeupe ñehe mara-mara tēisa yuvireco.

²⁴ Aipo rendu pare, oyoya guasu oyeriqui yuvireco Tūpa upe aipo ehi: “Ore Yar, nde niha Tūpa opacatu íva, ivi, para guasu, opacatu ipor reseve aposar ereico.

²⁵ Nde Espiritu Santo pipe aipo eremombehu uca nde rembiguai mborerecuar David upe aracahe:

‘¿Mahera vo co ava ndaheí vahe judío oyamotarēhi yuvireco?

¿Mahera vo ipihañemoñeta rai tēi yuvireco?

²⁶ Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tūpa iyavei sembiporavo amotarēhi água’ ehi aracahe.

²⁷ “Ēgüe ehi eté oñemonuhase Herodes, Poncio Pilato avei, ava ndaheí vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo

Poropīsiosar Jesús, seco maranehi vahe, amotarēhi água. ²⁸ Ēgüe ehi yapo opacatu nde pīhañemoñeta aracahendar rupi tupri ité yuvireco. ²⁹ Iyavei cūritei, ore Yar, emahe ore amotarēhisar rese. Embou nde pīratasa nde rembiguai oroico vahe upe siquiyeñhisa pipe nde ñehengagüer mombehu vite água. ³⁰ Ipare, nde pīratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyeriqui.

³¹ Iyeriqui pare, Tūpa omboriri opacatu mbahe iñemonuhasave yuvireco chupe. Ahese Espiritu Santo opa oique yuvireco sese. Sese osiquiyeñhisa pipe omombehu tupri Tūpa Ñehengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güer año co che mbahe” ehi vahe; opacatu seroyasar mbahe rumo opacatu mbahe. ³³ Jesucristo apóstol omombehu vite ipiratasa pipe icuerayevi agüer yuvireco. Ipipe Tüpa osovasa catu vite opacatu yuvireco. ³⁴ Ndipoi eté ipãhu pendar mbahe ndovirecoi vahe. Espia, opacatu ivi vireco vahe iyavei oi omondo, ³⁵ ahe seprí omondo apóstol upe yuvireco yepi. Ahe evocoyase omboyaho-yaho opacatu upe mbahe ipane vahe rupi-rupi yuvireco. ³⁶ Egüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovïhasar’ oya aipo ehi), ³⁷ ahe mbia omondo oivi, güeru seprí apóstol upe.

Ananías iyavei Safira yemboangaipa agüer

5 Ambuae ava rumo, Ananías serer vahe, güembireco Safira reseve omondo ivi yuvireco. ² Ahe mbia rumo omboyaho seprí, ñepeiyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu. ³ Evocoyase Pedro aipo ehi chupe:

—Ananías, ¡mahera ereroya Carugar nde piha pipe Espiritu Santo mbopa água, eremboyahoño tēi nde ivi reprí guarepochi ndeyeupe nara! ⁴ ¿Ndahei vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahei ava upe nde remira, Tüpa upe ité rumo nde remira —ehi chupe.

⁵ Osenduse Pedro ñehesa, oviapi sehögüer oso so vai. Ahese opacatu oyandu vahe osiquiye tēi yuvireco. ⁶ Ipare mbia chíhivahe yugüeru, osupi sehögüer, oipoque seraso yuvireco ñoti água.

⁷ Mbosapi hora pare, sembireco Safira serer vahe oique oi pipe. Ndoicua vitei rumo omer mano. ⁸ Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoyase aipo ehi ahe cuña upe:

—¡Mahera peyemboyoya pe pihañemoñetasa rese pe secoãha água yande Yar Espiritu! Coi yugüeru nde mer t̄sarar. Nde avei nde reraso água yuvireco eipeve —ehi chupe.

¹⁰ Ahe ramosave avei oviapi sehögüer Pedro rovai. Mbia chíhivahe yuviroquese, oipoque voifio ité sehögüer seraso imer ivi ñoti água yuvireco. ¹¹ Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

¹² Evocoyase apóstol pipe Tüpa omboyecua uca setá poromondiisa ava pãhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco. ¹³ Opacatu ambuae ndoyemboyai yuvireco sese osiquiyepave. Ava rehii rumo, omboetei eteanga apóstol yuvirecoi vahe yuvireco.

¹⁴ Oyemboeta catu yande Yar reroyasar setá cuimbahe, setá avei cuña. ¹⁵ Iyavei ava rehii vinose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihägüer. Ahese revo ombogüerara” ehi yuvireco oyeupe. ¹⁶ Ava Jerusalén ivirindar avei güeru omonuha setá imbaheasi vahe, carugar rese yuvirecoi vahe apóstol upe imbogüerapirã. Ahe evocoyase opacatu ombogüera yuvireco.

Apóstol yamotarēhipri yuvirecoi

¹⁷ Ichui tēi pahi rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatēhisave. ¹⁸ Sese oipisi osoquendapa uca yuvireco. ¹⁹ Ipare rumo, p̄itu pipe, Tüpa rembiguai iva pendar ou omboi oquenda, vinose ichui, aipo ehi chupe:

²⁰ “Peso tūparo guasuve, pemombehu avei ava upe co ñehesa tecocuer piasu resendar” ehi chupe. ²¹ Co mbahe rendu pare, supi tupri ité oyapo yuvireco. Cōhe ramosave yuviraso judío tūparo guasuve ava mbohe água.

Aheseve pahi rerecuar ivate catu vahe, supindar avei osenoi opacatu tecua pipendar mborerecuar ñemonuha água ivate catu vahesave; omondo yuvireco güembiguai apóstol reru água soquendasa sui aheve nara viña. ²² Oyepotase rumo sembiguai yuvireco, osea tēi soquendapri. Ichui oyeve tēi yuvireco imombehu ²³ aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

²⁴ Osenduse, pahi rerecuar ivate catu vahe, tūparo rãrosar rerecuar, pahi rerecuareta avei yuvireco, ipihañemoñeta tēi: “¿Que rupi vo opoira co mbahe sui yuvireco?” ehi tēi yuvireco oyeupe. ²⁵ Aheseve ñepeiyahocuer oviapi oyoquechupe:

—Evocoi pesoquenda vahecuer, ahe mbia cūritei oporombohe tūparove yuvireco —ehi chupe.

²⁶ Evocoyase tūparo rãrosar rerecuar, sembiguai avei yuviraso seru água mbahe tupri pipe, “Aviyeteramo yande api-api tiētera ava yuvireco yaru raise” ehi yuvireco. ²⁷ Viroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

²⁸ —Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese ser-

er pipe. Pemombehu avei ava rehii upe ore mborerecuar oroyuca uca evocoi mbia —ehi pahii rerecuar chupe.

²⁹ Pedro, omboetasa reseve, omboyevi pahii rerecuar ivate catu vahe upe yuvireco:

—Ore cuaita ité Tūpa mboyeroa, ndahei chira rumo ava tēi rane oromboyeroa —ehi yuvireco chupe—.

³⁰ Yepe peyatica, peyuca uca Jesús curusu rese viña, yande Ru Tūpa rumo acoi yande ramo i eta viroya vahe, ahe ité ombogūerayevi. ³¹ Ipare osecomboivate ivate oacato coti imboguapī imoi. Ahe niha Mborerecuar guasu, Poropīsirosar avei ‘tomboasī oangaipa, toyevi cheu, toipisī angaipa resendar ñeroisa yuvireco’ oya Tūpa Israel suindar upe. ³² Ore Tūpa rembiapo repi-asarer imombehu āgua oroico, Espīritu Santo avei oñehe ore ñehe rupi ava upe, ahe acoi Tūpa ombou vahe viroyasar upe —ehi.

³³ Osenduse mborerecuar aipo ñehesa, oñemoiró iteanga yuvireco. Oyucapa pota opacatu apóstol yuvireco viña. ³⁴ Mborerecuar pāhu pendar rumo oime mbia fariseo, Gamaliel serer vahe, ahe Moisés porocuita rese oporombohe vahe iyavei imboeteipri catu vahe. Ahe opūha oporocuai, “Toyuvinose raimi ocarve apóstol” ehi. ³⁵ Ipare aipo ehi ambuae mborerecuar eta upe:

—Che mu, judío, peicua catu, yandepihañemoñeta tupri rane mbahe apo āgua renondeva co mbia upe yuvireco —ehi—. ³⁶ Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa oñemosai tēi yuvireco. Ahe peve secocuer opa. ³⁷ Coiye catu, omombe-huse mborerecuar Roma pendar ava retacuer cua āgua, ahese Judas, Galilea pendar, oyemomborerecua. Setā avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—. ³⁸ Sese cūritei peyapoi rene mbahe co ava upe. Yaseyaño. Esepia, evocoi mbahe sembi-apo ndipocopii chira oyapose opīratasa pipe tēi yuvireco. ³⁹ Tūpa suindarse rumo ndapemombituhu catui chietera. Peicua catu, aní chira yayamotarēhi Tūpa ipipe —ehi omboetasa upe.

Aipo ihese, opacatu imboetasa viroya yuvireco. ⁴⁰ Ichui rumo güeru iri apóstol inupa uca āgua iñehe iriēhi āgua Jesucristo rese yuvireco. Inupa pare opa omose yuvireco. ⁴¹ Ipipe apóstol ovihareté iteanga yuvireco. Esepia, Tūpa ombou chupe iparaisu āgua yuvireco Jesús rer rese iyeroyasa sui tēi. ⁴² Ipare ndopoi eté arí yacatu Poropīsirosar Jesús recocuer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

Siete iporavosa iparaisu vahe pītivii āgua yuvireco

6 Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tuprii ore mu imer mano vahecuer rese arí yacatu mbahe poropītivii isa imondosase chupe” ehi oñe-

he yuvireco. ² Evocoyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropītivii isa mondo āgua rese tēi —ehi yuvireco—. ³ Sese ore rivireta, peiporavo siete mbia seco aviye vahe pe pāhu sui, yaracua vahe iyavei Espīritu Santo viroya vahe ité opiha pipe. Ahe mbia tihañeco co mboraviquisa rese yuvireco. ⁴ Ore evocoyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵ Opacatu oipotañu yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espīritu Santo opiha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa. ⁶ Ichui virasopa apóstol upe yuvireco. Ahe omondo opo iharive oyerocui yuvireco sese.

⁷ Ahese Tūpa Ñehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setā avei judío pahii viroya iñehengagüer yuvireco.

Esteban pisisa

⁸ Co mbia, Esteban, vireco ité Tūpa pīratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pāhuve. ⁹ Evocoyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oiñehepoepi-epi Esteban yuvireco. ¹⁰ Ndoicatu rumo iñehe recopi āgua yuvireco. Esepia, ahe oñehe mbahecua Espīritu Santo omondo vahe pipe. ¹¹ Evocoyase yamotarēhimbar omboepi ambuae ava upe semira tēi āgua sese yuvireco. “‘Ore orosendu co mbia oñehese mbahe naporai vahe rese Moisés amotarēhisave, Tūpa amotarēhisave avei aipo peyera peñehe” ehi yuvireco chupe. ¹² Evocoyase ahe ava oyamotarēhi uca opacatu ava mborerecuar reseve iyavei judío porocuita rese oporombohe vahe upe avei yuvireco. Ichui oipisī yesapiha Esteban seraso mborerecuar uve porandusa ivate catu vahesave yuvireco. ¹³ Iyavei oseca mbia semira tēi vahe oñehe vaherā sese yuvireco. Ahe aipo ehi:

—Co mbia oñehe-ñehe tēi yande tūparo guasu imaranehi vahe amotarēhisave, Moisés porocuita amotarēhisave avei. ¹⁴ Ore orosendu iñehe: “Jesús Nazaret pendar omocañira tūparo guasu iyavei Moisés yande mbohesa avei aipo osecañarora” ehi —ehi yuvireco chupe.

¹⁵ Ahese opacatu mborerecuar oñemonuha vahe yuvinoi aheve omahe Esteban rese yuvireco. Omaha aipo yuvireco sese, ndoyavii sepiaca Tūpa rembiguai va pendar rova.

Esteban oñehe oyeepisa pipe

7 Evocoyase pahi rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe. ² Ahese omboyeví chupe: “Che mu eta, peyapisaca che ñehe rese: Tüpa imboeteipri oyemboyecua yande ramoí Abraham upe aracahe.

Mesopotamia ve secoi vitesse, icho renondeve Harán ve seco água, ³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecuara ndeu’ ehi Tüpa chupe. ⁴ Evocoyase osẽ Caldea ivi sui oso tecua Harán ve güeco água. Omano pare tu Harán ve, Tüpa ombou cohava yande recosave. ⁵ Yepe oye-pota tẽi cohava aracahe, Tüpa rumo nomondoimi eté que chĩhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tüpa chupe (ahe rumo ndatahi vitei ahese). ⁶ Tüpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguairã semimombaraisugã tẽi avei yuvirecoira cuatrociento araviter rupi’ ehi. ⁷ Tüpa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri água cohava yuvireco’ ehi Tüpa chupe aracahe. ⁸ Tüpa oyocuai güemimbotar pipe Abraham guahir mbocircuncida água rese. Sese Abraham ombocircuncida guahir Isaac iha pare ocho arí pipe. Isaac ẽgüe ehi avei guahir Jacob upe. Jacob ẽgüe ehi avei guahireta upe, ahe doce vahe Israel suindar” ehi.

⁹ “Ipare yuvirecoi vahe yande ramoí Jacob rahir omondo vivri guarepochi repirã yamotarẽhisa pipe yuvireco. Ahe tivri rer José omondo vahe Egipto pendar upe yuvireco. Tüpa rumo secoiño ité sese. ¹⁰ Ichui vınose opacatu iparaisusa sui. Omondo ombahecuasa chupe iyavei seco aviye tupri água Egipto pendar mborerecuar guasu faraón upe. Evocoyase faraón ipotasa pipe omoingue mborerecuar seco água opacatu ava ivi Egipto pendar cuai água iyavei güeta pipendar cuai água avei.

¹¹ “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoí ndoyosui mbahe güemihura yuvireco. ¹² Oyanduse rumo Jacob Egipto ve oime vitesse trigo, ahese omondo guahir aheve seca, ahe yande ramoí yuvirecoi vahe. Ahe yipindar ichosa Egipto ve yuvireco. ¹³ Ichui yuviraso yupagüe irise Egipto ve, ahese José oyecua uca viquehir upe. ẽgüe ehi faraón upe oicua uca uma sui oyesu. ¹⁴ Evocoyase José güeru uca oyesupa Jacob iyavei opacatu omu, ahe imu retacuer setenta y cinco tupri. ¹⁵ ẽgüe ehi Jacob yuviraso Egipto ve yuvirecoi água opacatu guahir reseve. Aheve omano iyavei opacatu yande ramoí eta omano yuvireco aracahe. ¹⁶ Imano pare rumo, suminogüer viraso icangüer yuvireco tecua Siquem ve. Aheve oñoti yuvireco. Aheve acoi Abraham víroca tuvipa Hamor rahir sui aracahe” ehi mborerecuar upe.

¹⁷ “Ipare, vírovise arí ipapapri Tüpa Ñehengagüer Abraham upendar, ahese yande ramoí setá catu-catu

iri oyesu Egipto ve yuvireco aracahe. ¹⁸ Ipare oporocuai ambuae mborerecuar guasu Egipto ve. Ahe ndoicuai vahe ité yande ramoí José. ¹⁹ Evocoi mborerecuar guasu ombopa yande ramoí eta aracahe. Omombaraisu avei oyucapa uca israelita rahir cuimbahe pĩtani. Ahe oyocuai iyesupa aipo ehi: ‘Peseya pe rahir oha ramomi vahe, tomanoño’ ehi yande ramoí upe aracahe. ²⁰ Aheseve avei aipo Moisés oha. Ahe pĩtani aviye ité Tüpa uve. Ihare, iyesupa mbosapi yasimi rupive vireco oyese güetave yuvireco. ²¹ Oseyase rumo iyesupa ive yuvireco, ahese faraón rayri oseca ahe i rupi sui. Ichui vınose seraso güetave, omboacua omembri nungar ité sereco. ²² Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoyase Moisés ipĩrata ité oñehese iyavei oyapose mbahe.

²³ “Virecose rumo Moisés cuarenta araviter, ipihañemoñeta: ‘Tasepia rane che mu israelita cohava yuvirecoi vahe’ ehi. ²⁴ Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repicave. ²⁵ Ahe rumo, ‘Oicua revo che mu Tüpa vınose uca água Egipto sui yuvireco cheu’ ehi viña. Imu rumo nomohai eté Moisés vınose água yuvireco evocoi ava po sui. ²⁶ Ahere ayihive oso omu pãhuve. Aheve osepia ñuvirio mbia ovavase oyeupe yuvireco. Ahe rumo oipota tẽi iñero água oyeupe yuvireco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi tẽi chupe. ²⁷ Oyemoviracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pãhuve ore rerecuarã ore recocuer moingatu água?’ ehi chupe. ²⁸ ‘¿Che yuca pota avei tie eve inungar ereyuca evocoi Egipto pendar irapipe!’ ehi chupe. ²⁹ Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oye-su ñuvirio tahir.

³⁰ “Omboaviyese cuarenta araviter Madián ve, Tüpa rembiguai oyemboyecua ivitri Sinaí rerovicave ivi iporupirẽhisave caha rese tata rendigüer pãhuve chupe. ³¹ Osepiase mbahe sendi vahe oyepihamondii, oyemboya catu sese sepia tupri água viña. Ahese osendu Yar ñehe aipo ehi vahe: ³² ‘Che nde ramoí Tüpa aico. Nde ramoí Abraham, Isaac iyavei Jacob che reroya vahecuer yuvireco’ ehi. Evocoyase Moisés orirri osiquiyesa pipe nomahe pota iri sese. ³³ Evocoyase Yar aipo ehi chupe: ‘Esequi nde pĩtaqui. Esepia, ivi nimarai vahesave ereico’ ehi chupe. ³⁴ ‘Che asepia tupri ité Egipto ve nde mu che rebiporavo paraisuse; asendu avei ipoãse tẽisa yuvireco yepi. Sese agüeyi ndeu nde oromondora aheve senosepa água’ ehi Tüpa Moisés upe aracahe.

³⁵ “Yepe yande ramoí ndoviroya potaiño ité yuvireco, ‘¿Ava vo nde moingue ore rerecuarã ore recocuer moingatu água?’ ehiño yuvireco chupe, Tüpa ité rumo oyocuai güembiguai imbogüeyi tata rendigüer pãhuve imoñehe Moisés upe iporocuai água, ava renosepa água avei ivi Egipto pendar mborerecuar povri sui. ³⁶ Ipare ahe ité vınose yande ramoí eta Egipto sui, oy-

apo avei mbahe poromondiisa aheve 'toicua Tūpa yuvireco' oya, para guasu Pīra vaheve avei oyapo poromondiisa iyavei ivi iporupirēhisa rupi avei cuarenta araviter rupi. ³⁷ Ahe avei aipo ehi israelita upe: 'Tūpa vīnosera pe pāhu sui ñepei oñehe mombehusar che nungar' ehi. ³⁸ Ahe avei acoi ivi iporupirēhisa rupi ava pāhu rupi secoi. Chupe avei oñehe Tūpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yandeu imbou āgua.

³⁹ Yande ramoi eta rumo nomboyeroa potai eté Moisés yuvireco. Ipihañemoñetaño ité Egipto ve oyeve āgua rese yuvireco. ⁴⁰ Evocoyase aipo ehi Aarón upe yuvireco: 'Eyapomi catu ava tūpa rahanga oreu ore reroguata āgua' ehi yuvireco chupe. '¿Que vo catu Moisés, ore renosesarer Egipto sui, secoi? Omano tie revo' ehi tēi israelita yuvireco aracahe. ⁴¹ Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovēhe vaheve yuvireco iyavei oyemboviha pieta apo yuvireco güembiapo ucagüer rese tēi. ⁴² Sese Tūpa opoiño ahe ava sui, 'Toyerure evocoyase yasi, yasitata upe yuvireco' ehiño chupe. Aipo ehi niha oñehe mombehusar icuachiapri pipe:

'Pe peico vahe israelita, ndahehi cheu peyuca mbahe mimba seropovēhe āgua cuarenta araviter pipe ivi iporupirēhisa rupi.

⁴³ Pe rumo che mboeteiēhisa pipe peraso tūpa rahanga Moloc rēta iyavei yasitata rahanga Refán pe ae tēi peyapo vahe pe tūpaguā.

Sese che opovinosera pe recua sui pe mondo Babilonia cupe coi coti' ehi Tūpa chupe aracahe.

⁴⁴ 'Ivi iporupirēhisa rupi yande ramoi eta vireco Tūpa porocuaita rēta oyeupive yuvireco aracahe mbahe mimba pirer apopri. 'Na peyera yapo' ehi Moisés upe. Evocoyase iñehe rupi tupri oyapo uca. ⁴⁵ Ahese coiye catu yande ramoi eta vireco co oi Tūpa rēta mbahe pirer apopri yuvireco iyavei Josué rupi yugüeru vahe güeruño ité avei yuvireco, omosepase Tūpa ambuae ava co yande recuavi sui. Ēgüe ehiño vite ité ahe seroco yuvireco mborerecuar guasu, David, secoise aracahe. ⁴⁶ Ahe David aviye ité Tūpa upe, oyapo pota setarā 'toime tūparoguā yande ramoi Jacob rembieroya upe' oya. ⁴⁷ Tahir Salomón rumo omopuha ité ahe tūparo.

⁴⁸ Tūpa rumo, seco ivate vahe, ndasecoi vahe tūparo ava tēi rembiapo pipe. Inungar acoi omombehu vahe Tūpa ñehe mombehusar aracahe aipo ehi:

⁴⁹ 'Iva che renda iyavei ivi che pirunga.

¿Mbahe nungar oi vo peyapora cheu? ehi yande Yar. ¿Que vo evocoyase che pituhu āgua?

⁵⁰ Che niha opacatu co mbahe aposar aico' ehi Tūpa icuachiapri pipe" ehi mborerecuar upe Esteban.

⁵¹ Ichui aipo ehi chupe: "Pe rumo ndapeyapisaca potai vahe ité peico. Oime tēi pe nambi, pe piha avei, ipipe rumo ndapeicuai eté Tūpa. Peico Espíritu Santo amotarēhimbar tēi inungar pe ramoi aracahe yuvirecoi. ⁵² ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cūritei ou

ndaseco marai vahe cute. Pe avei evocoyase ahe yuca uca āgua peporocuai. ⁵³ Pe pereco tēi Tūpa porocuaita acoi Tūpa rembiguai güeru vahe yuvireco; ahe rumo ndaperoyaiño ité peico" ehi Esteban opacatu mborerecuar upe.

Esteban mano agüer

⁵⁴ Osendupase mborerecuar iñehe, omboasí iteanga yuvireco; oñeaimboterepri ité yamotarēhisave yuvireco. ⁵⁵ Esteban rumo vireco ité Espíritu Santo oyese. Evocoyase iba rese omahese, osepia Tūpa porañetesa. Osepia avei Jesús opūha ohā Tūpa acato coti. ⁵⁶ Evocoyase aipo ehi:

—¡Pesepia! Asepia inungar iba imboipri. Aheve asepia Ava Riquehir Vu acato coti ihai —ehi.

⁵⁷ Mborerecuareta rumo osapucui pīrata, oyopiño oapisacuar yuvireco ichui. Ahese yuvinoña guasu yuvireco chupe. ⁵⁸ Viraso güecua ivi yuvireco. Aheve oseyaya oyeaosa Saulo pive 'tosāro' oya yuvireco chupe. Ipare oyapi-yapi ita pipe yuca yuvireco.

⁵⁹ Oapi-apiseve, Esteban oyerure Tūpa upe: "Che Yar Jesús, eipisi che hā" ehi. ⁶⁰ Ipare oñenopiha, oñehe pīrata Tūpa upe: "¡Che Yar, ndeñero co ava che amotarēhisar angaipa upe!" ehi.

Aipo ohe pare, omano.

8 Iyavei Saulo, "Peyuca ité" ehi catu-catu aheve ohā.

Saulo oseca Jesús reroyasar mocañipa āgua oico

Ahe ari pipeve omboipi Jesús amotarēhimbar seroyasar reca mara-mara tēi catu seroco āgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco. ² Oime ava Tūpa mboeteisar yuvirecoi vahe, ahe víraso Esteban rehögüer ñoti yuvireco. Itē pare, oyasehó iteanga yuvireco sese. ³ Ahe pipeve avei aipo Saulo omombaraisu ava Jesús reroyasar yuvirecoi vahe seroya ucañi āgua viña. Yuviroique-iqueño tēi aipo sēta rupi cuimbahe, cuña mbotiriri senose soquenda āgua yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa pīsirosa resendar que yuvirasosa rupi yuvireco. ⁵ Felipe oso Samaria rupi. Aheve omombehu ava upe: "Evocoi Jesús Tūpa Rembiporavo ava pīsiro āgua" ehi. ⁶ Ahese ava rehii oñemonuha Felipe ñehe rendu āgua yuvireco. Oyapisaca tupri iñehe rese yuvireco. Esepia, osepia mbahe sembiapo poromondiisa. ⁷ Iyavei setá ava carugar rerecosar sui omose carugar. Osēse ava sui, sāsē yuvireco. Iyavei setá ava nomii vahe, ndoguatai vahe avei ombogüera. ⁸ Evocoyase oviharete ahe tecua pipendar yuvireco.

⁹ Aheve rumo mbia, Simón serer vahe, yipive ipaye ai oico, ombosiquiye-quiye ava Samaria pendar. "Che

seco ivate vahe aico" ehi angahu ava mbopa. ¹⁰ Evo-coiyase opacatu ava, cuacua vahe iyavei chihivahe catu vahe oyapisaca tupri iñehe rese, aipo ehi yuvireco: "Co niha Tüpa pīratasa tuvicha vahe" ehi oyeupe yuvireco.

¹¹ Omboyeroya pucu ité yuvireco. Esepia, opayesa pipe ava ombosiquiye etepri oico yepi. ¹² Oyepotase rumo Felipe Samaria ve omombehu ñehesa aviye vahe Tüpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñeapiramo ité yuvireco cuimbahe, cuña avei. ¹³ Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tüpa suindar ndayasepaii vahe rese oyepihamondii.

¹⁴ Jerusalén ve apóstol yuvirecoi vahe oyandu Samaria ve setá ava oipisise Tüpa Ñehengagüer yuvireco. Evocoyase omondo aheve omboetasa Pedro iyavei Juan yuvireco. ¹⁵ Oyepotase aheve yuvireco, oyerure opacatu ava Jesús reroyasar rese 'Espíritu Santo toipisi yuvireco' oya. ¹⁶ Esepia, Espíritu Santo ndogüeyi vite yuvireco sese; oñeapiramoño tēi vite yande Yar Jesús rer pipe yuvireco. ¹⁷ Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

¹⁸ Ahe osepiase, Simón omondo pota guarepochi chupe, ¹⁹ aipo ehi:

—Cheu avei pemboumi tēi evocoi pīratasa, amondose che po que ava harive, togüeyi avei Espíritu Santo sese yuvireco —ehi Simón.

²⁰ Omboyevi rumo Simón upe:

—¡Tocañipa nde guarepochi nde reseve! Esepia, ndepihañemoñeta co Tüpa ombou vahe oreu, ererocua vaheñā nde guarepochi pipe viña —ehi chupe—.

²¹ Ndeu ndiyai co nungar mbahe apo āgua. Esepia, nde pihañemoñetasa ndahei ihivi vahe Tüpa rovaque.

²² Sese epoi nde pihañemoñeta raisa sui, eyerure Tüpa upe. Aviyeteramo iñerora ndeu —ehi—. ²³ Aicua nde piha naporai vite iyavei nde pihañemoñeta raisa pipe vite ereico —ehi chupe.

²⁴ Evocoyase Simón omboyevi chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

²⁵ Yande Yar ñehesa mombehu pare ahe tecua pendar upe, apóstol omombehu-mbehu co ñehesa pīsirosa resendar Samaria pipendar tecua rupi yuvireco. Ēgüe ehi oyepota yuviroyevi Jerusalén ve yugüeru.

Felipe omombehu Jesucristo recocuer Etiopía pendar upe

²⁶ Ipare Tüpa rembiguai oyemboyecua Felipe upe aipo ehi chupe: "Epūha, eso irohī coti nde yepota āgua evocoi peri ogüeyi vahe oso Jerusalén sui, Gaza ve" ehi. Evocoi Gaza piar osasa ivi iporupirēhi rupi oso.

²⁷ Evocoyase opūha oso peri rupi. Aheve osovaīchi ñepeī ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbia oso vahe Jerusalén ve Tüpa mboetei āgua.

²⁸ Oyevise ocāreto pipe, oyeruqui Tüpa ñehe mombehusar Isaías rembicuachiagüer rese ou.

²⁹ Evocoyase Espiritu aipo ehi Felipe upe: "Eyemboya cāretomi rese" ehi. ³⁰ Evocoyase virovise ahe ava, osendu iyeroqui Isaías rembicuachiagüer pipe oī. Ahese oporandu chupe:

—¿Eresenducua aipo Tüpa Ñehengagüer nde yeroquisa eī? —ehi chupe.

³¹ Etiopía pendar mbia omboyevi chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, "Erio, eyeupi, tereguapi cohava che piri" ehi Etiopía pendar chupe. ³² Ahe Isaías rembicuachía oyeruqui vahe pipe aipo ehi:

"Inungar ava viraso ovesa yuca āgua, ēgüe ehi avei ahe mbia seraso yuca āgua yuvireco.

Iyavei inungar ovesa nasasei eté guagüer rerocuase, ēgüe ehi avei ahe mbia noñehei eté.

³³ Osecomomini yuvireco, ndipoi ava sepisar.

Ndipoi ichuindar.

Esepia, omocañi co ivi sui yuvireco" ehi Isaías rembicuachía pipe.

³⁴ Oyeruqui pare ahe Etiopía pendar oporandu chupe:

—Emombehumi cheu: ¿Ava rese pīha aipo Isaías oñehe: oyese ae pīha, ambuae ava rese tie? —ehi.

³⁵ Evocoyase co ñehesa sui omombehu ñehesa aviye vahe Jesús recocuer resendar Etiopía pendar upe.

³⁶ Ipare oguata catuse yuvireco, Etiopía pendar osepiā i. Aheve ahe aipo ehi chupe:

—Esepia co i tui. ¿Ndiyai vo cohava che āpiramomi tēi eve viña? —ehi.

³⁷ Ahese omboyevi chupe:

—Ereroya itese opacatu nde piha pipe, iya ité ndeu —ehi.

—Aroya ité niha Jesucristo ahe Tüpa Rahir secoi —ehi.

³⁸ Evocoyase omombita uca ocāreto, ichui ogüeyi ive yuviraso. Aheve Etiopía pendar Felipe oñapiramo.

³⁹ Yuvinosese i sui, yande Yar Espiritu viraso ahe Etiopía pendar sui. Ahese ndosepia iri; ēgüe ehiño vorivete oso peri rupi. ⁴⁰ Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. Ēgüe ehi oyepota Cesarea ve oso.

Saulo ñecuñaro agüer

9 Jerusalén ve rumo Saulo oñemoiró iteanga vite yande Yar reroyasar upe oico. Oyucapa potañi ité. Sese oso pahi rerecuar ivate catu vahe upe, ² oporandu chupe: "Ereyapomira mbahe icatupri vahe cheu" ehi. "Taso Damasco ve, taseca co Tecocuer Piasu rupi cuimbahe, cuña yuvirecoi vahe" ehi. "Taipisipa seru cohava nde rer pipe" ehi, "evocoyase eremombehura cuachiar pipe Damasco pendar tūparo rerecuar upe" ehi pahi rerecuar ivate catu vahe upe. ³ Ēgüe ehi yuvinosese Jerusalén sui, yuviraso Damasco ve ambuae ava reseve. Virovi potase rumo Damasco yuviraso,

aviyeteramo tēi osesape guasu iva sui chupe. ⁴ Evo-coiyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

⁵ Evocoyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe. ⁶ “Epūha, eique Damasco ve. Aheve amombehu ucara mbahe nde rembiapoguã ndeu” ehi chupe.

⁷ Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepia eté ivate oñehe vahe yuvireco. ⁸ Ipare Saulo opūha, omahe tēi; ndoicatui rumo mbahe repia. Ichui supindar oipisi iyiva rese seraso Damasco ve yuvireco.

⁹ Aheve mbosapi arí ndasesapiso, ndocarui, ndoihui avei oico.

¹⁰ Aheve mbia Jesucristo reroyasar Ananías serer vahe secoi. Ahe iquer nungarve oyemboyecua yande Yar aipo ehi chupe: “¡Ananías!” ehi. “Co aico, che Yar” ehi imboyevi chupe.

¹¹ Evocoyase yande Yar aipo ehi chupe: “Epūha, eso calle Ihñivi serer vahe rupi. Eporandu Judas rētave Saulo, tecua Tarso pendar, rese. Ahe oyeruqui cūrítei.

¹² Oquerve angahu osepia mbia Ananías serer vahe omondose opo iharive omboesapiso iri” ehi.

¹³ Evocoyase omboyevi chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tēi oyapo vahe nde reroyasar reco maranehi upe Jerusalén ve. ¹⁴ Cūrítei ou rutei ahe mbia pahi rerecuar porocuaite rupi opacatu nde rer rese oyeroya vahe roquendapa água” ehi.

¹⁵ Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vahe rã ava ndahei vahe judío upe iyavei serecuar guasu yuvirecoi vahe upe, judío upe avei. ¹⁶ Che ae amboyecua setá mbahe tēi chupe oiporara vahe rã che remimbotar mboaviye água” ehi yande Yar chupe.

¹⁷ Evocoyase oso secosave. Oiquese ahe oi pipe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiso iri água. Toique avei catu Espiritu Santo nde rese —ehi Saulo upe.

¹⁸ Ahese voi eté pira pirer nungar mbahe oviapipa sesa sui. Ahese voi sesapiso iri. Ichui opūha. Ipare voi Ananías oñapiramo. ¹⁹ Ipare Saulo ocaruse, ipirata catu iri. Moviro arí tēi opita iri Jesús reroyasar piri Damasco ve.

Saulo omombehu Jesús recocuer Damasco ve

²⁰ Ipare voi oso oñehe judío tūparo yacatu rupi Damasco ve aipo ehi: “Jesús Tūpa Rahir ité secoi” ehi ahe pendar ava upe. ²¹ Ava opacatu osendu vahe iñehe,

—¿Mara ehi pīha co? —ehi tēi yuvireco—. ¿Ndahei vo acoi co mbia Jerusalén ve Jesús reroyasar mara-mara tēi vireco vahe? ¿Ndahei vo acoi co avei ou cohava ava Jesús reroyasar ha pendar pisi água serasopa água

avei Jerusalén ve pahi rerecuar upe viña? —ehi yuvireco chupe.

²² Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tūpa Rembiporavo ava pñsiro água secosa. Sese ndoicatui judío iñehe mboyevi yuvireco.

Saulo oñemi omu sui oamotarēhise

²³ Setá arí pare judío ahe pendar omboguai yuca água Saulo yuvireco viña. ²⁴ Ahe rumo oyandu omboguaisa judío osãrose tecua áchisa roquendipive arí, pñtu momba yuvireco yuca água viña. ²⁵ Jesús reroyasar rumo pñtu pipe tecua tapia áchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuvireco.

Saulo Jerusalén ve secoi

²⁶ Coiye Saulo oyepota Jerusalén ve. Aheve oyemboya pota tēi Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tēira yandeu” ehiño oyeupe yuvireco.

²⁷ Ipare rumo Bernabé viraso Saulo apóstol yuvirecoi vahe upe. Aheve Bernabé omombehu chupe aipo ehi: “Co mbia Saulo osepia yande Yar peri rupi iyavei yande Yar oñehe chupe. Ichui co oñehe osiquiyeēhisa pipe Damasco ve Jesús recocuer rese” ehi. ²⁸ Evocoyase Saulo opita aheve ipiri. Arí yacatu rupi apóstol rupi oguata yepi, iyavei omombehu yande Yar recocuer osiquiyeēhisave. ²⁹ Oiñehepoepi avei secocuer rese judío griego pipe oñehe vahe yuvireco. Ichui rumo oyuca potaño yuvireco. ³⁰ Oicuase rumo Jesucristo reroyasar yuvireco, viraso voi eté Saulo Cesarea ve. Ichui omondo Tarso ve yuvireco.

³¹ Evocoyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuvireco yande Yar mboeteisa pipe, Espiritu Santo oipñtivii iyemboeta catu água yuvireco.

Eneas mbogüera agüer

³² Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar. ³³ Aheve osepia mbia Eneas serer vahe, ahe ndoguatai vahe. Vupave tēi tui vahe ocho araviter rupi. ³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi. ³⁵ Osepia opacatu Lida pendar, Sarón pendar co ndoguatai vahe cuer guatase, viroyapa voi eté yande Yar yuvireco.

Dorcas cuerayevi agüer

³⁶ Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporopñtivii yepi. ³⁷ Imbaheasi guasu rumo. Coiye omano. Ipare ava sehögüer oyosei yuvireco. Ichui

viroyeupi oi ivate vahesave seraso yuvireco. ³⁸ Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, ahese omondo ñuvirío mbia seru poyava água Jope ve yuvireco.

³⁹ Evocoyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivii yuvireco. Omboyecua avei oturucuar ihari pendar reseve Dorcas rembiapogüer yuvireco chupe. ⁴⁰ Ipare Pedro omosepá rane opacatu ava ocarve. Ahese ahe ae oñenopiha, oyerure Tüpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oí. ⁴¹ Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe. ⁴² Serácua oyanduse opacatu Jope rupi yuvireco, setá ava yande Yar viroya yuvireco. ⁴³ Evocoyase Pedro opita setá arí aheve, mbia mbahe pírer mopítasar, Simón serer vahe, píri.

Pedro iyavei Cornelio

10 Tecua Cesarea ve mbia Cornelio serer vahe secói, ahe cuartel Italiano serer vahe pendar cien sundao rerecuar. ² Ahe mbia omboetei Tüpa opacatu guahir, güembireco reseve yepi. Iyavei omondoño ité judío pñivii água guarepochi, oyerocuí avei Tüpa upe yepi. ³ Ñepei arí, caharuse las tres rupi, osepia oquer nungar pipe Tüpa rembiguai güecosave aipo ehi chupe: “¡Cornelio!” ehi. ⁴ Omahengatuse sese, “¿Mbahe, che Yar?” ehi osiquiyepave. Tüpa rembiguai rumo omboyevi chupe: “Tüpa oipisi nde yeruresa; osepia avei nde poroparaisuerecosa” ehi chupe. ⁵ “Emondo mbia Jope ve Simón reca. Ahe serer avei acoi Pedro. ⁶ Ahe secoi ambuae Simón, mbahe pírer mopítasar píri. Ahe sêta para guasu popíve chini” ehi chupe.

⁷ Osose Tüpa rembiguai ichui, Cornelio oñehe ñuvirío güembiguai upe iyavei ñepei sundao Tüpa mboeteisar upe, sese acoi oyeroya vahe yepi. ⁸ Opacatu Tüpa rembiguai ñehe mombehu pare, omondo Jope ve.

⁹ Ahere ayihive virovise Jope yuviraso, Pedro oyeupi oi ipe vahe haríve mbíter arí senise oyerocuí água. ¹⁰ Viéporêhise ocaru pota viña. Omoingatu viteseve rumo semihura yuvireco, aviyeteramo tēi osepia mbahe oquer pendar nungar: ¹¹ ahese osepia íva oyemboise, ahe ichui turucuar tuvicha vahe pipe ogüeyi mbahe, ñapichimbri ipopi yacatu ou chupe. ¹² Ahe turucuar pipe, osepia opacatu mahembiar vai, mboi, vñrai vai tēi avei. ¹³ Ahese osendu ñehesa aipo ehi vahe: “Pedro, epñha, eyuca, ichui ehu” ehi chupe.

¹⁴ Pedro rumo omboyevi chupe: “Aní, che Yar, che rumo ndahui vahe ité co mbahe roho ava remimbotarēhi ndihusai vahe yepi” ehi chupe. ¹⁵ Osendu iri ñehesa aipo ehi vahe chupe: “Tüpa remimbotatupri upe, ‘Ava remimbotarēhi, ndihusai vahe’ nderei chira” ehi.

¹⁶ Ēgüe ehi mbosapi oyupagüer rupi chupe. Ipare turucuar oyeve ivave oso. ¹⁷ Pedro ipihañemoñeta vitese mbahe osepia vahecuer rese oquer nungar pipe: “¿Mbahe rese pñha co oyemboyecua cheu?” ehi vite oico. Aheseve Cornelio remimondo oporandu-randu pare yuvireco, oyepota Simón rēta roquendipive yuvireco. ¹⁸ Oñehe pucu oi pipendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

¹⁹ Ipihañemoñeta viteseve Pedro mbahe oyemboyecua vahecuer rese, Espiritu Santo aipo ehi chupe: “Pedro, esendu rane, pe mbosapi mbia nde reca yuvireco. ²⁰ Eyemoingatu, egüeyi chupe, eso supi. ‘¿Asora pñha?’ erei rene. Esepia, che ambou evocoi mbia nde reca” ehi Espiritu Santo Pedro upe.

²¹ Evocoyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoyase omboyevi iñehe yuvireco chupe:

—Ore oroyu sundao rerecuar Cornelio ore cuaisa pipe, ahe mbia seco ívi vahe, Tüpa mboeteisar opacatu judío osaisu, oipota rai yuvireco. Tüpa rembiguai oyocuai nde rese ereso vaheñã sêtave, ahe osendu vaheñã nde ñehesa —ehi yuvireco Pedro upe.

²³ Evocoyase omoinguepa, omombitapa oyepiri ñepei pñtu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuviraso sêtave. Cornelio rumo osãro opacatu omu eta rese yuvireco iyavei omboriparete güembisoho reseve avei.

²⁵ Oyepotase sêtave oso, Cornelio rane osê voi, osovañchi, oñenopiha sovai imboeteisa pipe. ²⁶ Pedro rumo aipo ehi chupe:

—Epñha, che niha nde nungar avei aico —ehi chupe.

²⁷ Evocoyase ahe omoñeta seroi que seraso oi pipe. Aheve ava oñemonuha vahe setá osepia yuvireco.

²⁸ Ahe ava upe aipo ehi:

—Pe peicua judío porocuita aipo ehi vahe: “Peiquei rene ndahei vahe judío píri. Aní chiaveira pembori evocoi ava peico” ehi acoi —ehi Cornelio rēta pipendar upe—. Tüpa rumo omombehu cheu che quer nungar pipe: “ ‘Ava remimbotarēhi peico’ erei rene ambuae ava upe” ehi cheu. ²⁹ Pe pemondo ava che reca. Che evocoyase nacheatēhii che yu água pñu. Sese che aicua pota, ¿mahera vo che reru uca peye? —ehi.

³⁰ Evocoyase Cornelio aipo ehi chupe:

—Opa co irungatu arí, caharuse co hora rupi tupri avei, che cohava che rētave aicose, ndacarui eté che yerure água Tüpa upe. Aheseve oyemboyecua mbia Tüpa rembiguai iturucuar rendñ iteanga vahe cheu.

³¹ Ahe aipo ehi cheu: “Cornelio, Tüpa osendu nde yeruresa iyavei oicua avei nde poroparaisuerecosa.

³² Emondo nde rembiguai Jope ve Simón Pedro serer vahe reca. Ahe oicove ambuae Simón rētave, ahe mbahe pírer mopítasar. Ahe sêta para guasu popíve chini” ehi cheu. ³³ Sese amondo voi eté nde reca água. Aviye nde ereyu cohava. Cñritei co opacatu yaico cohava Tüpa rovaque. Orosendu pota opacatu nde ñehe yande

Yar nde cuai vahe nde ñehe água oreu —ehi Cornelio chupe.

Pedro oñehe Cornelio rētave

³⁴ Evocoyase Pedro aipo ehi chupe:

—Aicua cute, supi eté Tūpa nombayahoi yande raisu.

³⁵ Sese ambuae ivi pīendar omboetei vahe Tūpa, oyapo vahe avei mbahe tupri yuvireco, ahe oipisira Tūpa.

³⁶ Aracahe Tūpa oñehe avei Israel suindar upe, omombehu ñehesa tupri yeamotarēhīhisa resendar Jesucristo rembiaporā sui, ahe opacatu ava co ivi pīendar yuvirecoi vahe Yar. ³⁷ Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare. ³⁸ Peicua revo Tūpa omondo Jesús Nazaret pendar upe opīratasa, oEspíritu Santo avei. Ipare Jesús oguata opacatu rupi mbahe tupri apo oico. Ombogüera avei opacatu ava iparaisu vahe carugar povrive yuvirecoi vahe. Esepia, Tūpa seci sese. ³⁹ Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco. ⁴⁰ Tūpa rumo ombogüerayevi imombosapisa ari pipe. Ipare omboyecua iri oreu. ⁴¹ Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oihu avei ocuerayevi pare. ⁴² Iyavei ahe ore cuai: “Pemombehu ava upe. Co che Jesucristo, Tūpa Rembiporavo, aico opacatu ava recocuer rese porandu água oicove vite vahe, omano vahe avei” ehi oreu. ⁴³ Ahe secocuer avei opacatu Tūpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tūpa ñeroisa serer pipe angaipa rese yuvireco” ehi —ehi Pedro Cornelio rēta pipe yuvinoi vahe upe.

Espíritu Santo oique ava ndahei vahe judío pīha pipe

⁴⁴ Pedro oñehe viteseve, Espíritu Santo ogüeyi opacatu ava osendu vahe rese. ⁴⁵ “¡Too! Evocoyase ndahei vahe judío upe avei Tūpa omondo Espíritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco. ⁴⁶ Esepia, osendu ahe oñehese ñehesa ndicuasai vahe pipe yuvireco Tūpa upe. ⁴⁷ Evocoyase aipo ehi vupindar upe:

—¿Oime pīha ndoipotai vahe co ava ñeapiramo água yande pāhu pendar? Esepia, co oipisi Espíritu Santo yuvireco inungar yande —ehi vupindar upe.

⁴⁸ Sese,

—Yañapiramopa Jesucristo rer pipe yuvireco —ehi.

Ipare Cornelio rēta pipe yuvinoi vahe aipo ehi: “Epīta vitemi moviro ari ore piri” ehi yuvireco chupe.

Pedro remimombehu Jerusalén pendar Jesús reroyasar upe

11 Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío vīroya avei Tūpa Ñehengagüer yuvireco. ² Oyevise rumo Pedro Jerusalén ve oso, ah-

ese setá judío Jesucristo reroyasar vīroñro sovai eté yuvireco, ³ aipo ehi:

—¡Mahera eresofno tēi eté ndahei vahe judío piri! Iyavei nde erocaruoño tēi eté ipāhuve yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahe che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai iva sui. ⁶ Asepia ipipe opacatu mahembiar ihupirēhi, mbahe mimba, mboi, vīrai vai tēi avei —ehi—. ⁷ Iyavei ahe ese asendu ñehesa aipo ehi cheu: “Pedro, epūha, eyuca, ehū” ehi cheu. ⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe. ⁹ Ichui asendu iri ñehesa: “Tūpa remimbocatupri upe, ‘Ava remimbotarēhi’ erei rene” ehi cheu. ¹⁰ Ēgüe ehi mbosapi oyupagüer rupi cheu. Ipare opacatu oyevi iri ivave oso. ¹¹ Aheve avei mbosapi mbia imboupri Cesarea sui oyepota yuvireco che recosave che reca. ¹² Espíritu Santo che cuai che so água che atēhihisa pipe supi yuvireco. Co seis mbia Tūpa reroyasar, yande mu, yuviraso avei che rupi. Ipare aheve oroyepotase oroso, oroique Cornelio rētave. ¹³ Ahe omombehu oreu osepia vahecuer güetave Tūpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru água. ¹⁴ Ahe omombehura ndeu nde ñepisiro água iyavei opacatu nde rēta pendar ñepisiro água avei” ehi Tūpa rembiguai Cornelio upe —ehi—.

¹⁵ Añehe ramosave chupe, Espíritu Santo ou sese yuvireco inungar yande rese ou aracaco. ¹⁶ Evocoyase che chemahenduha voi eté yande Yar ñehengagüer rese aipo ehi vahecuer: “Supi eté i pipe Juan oporoāpiramo, pe rumo Espíritu Santo pipe peñeapiramora” ehi vahe. ¹⁷ Tūpa Espíritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tūpa ayamotarēhira —ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo,

—¡Too, evocoyase Tūpa ombou avei ndahei vahe judío upe secocuer recuñaro água, tecovesa apirēhi vahe rereco água! —ehi Tūpa mboeteisa pipe yuvireco.

Ava Jesús reroyasar Antioquía ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarēhimbar oyamotarēhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco. ²⁰ Amove oñemosai vahe Chipre pendar iyavei Cirene pendar oyepota tecua Antioquía ve yuvireco.

Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco. ²¹ Yande Yar pīratasa vireco yuvireco. Evocoyase

setá ava viroya; oseyá ité yípindar güembieroya yuvireco yande Yar reroya água.

²² Serácua oyepotase Jesús reroyasar upe Jerusalén ve, ahesé omondo Bernabé yuvireco Antioquía ve.

²³ Oyepotase aheve, osepia Tüpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco. ²⁴ Bernabé aviye etepri vahe, viroya ité Espiritu Santo iyavei oyeroya ité yande Yar rese. Evocoiyase setá ava oyemboya yande Yar rese yuvireco.

²⁵ Ipare oso Tarso ve Saulo reca. ²⁶ Oyosuse, güeru Antioquía ve. Aheve oyemboya yuvireco ambuae viroya vahe rese imbohe água ñepeí araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yípindar, “Cristo reroyasar” ehi yuvireco.

²⁷ Aheseve Tüpa ñehe mombehusar yugüeru Antioquía ve Jerusalén sui. ²⁸ Ñepeí ipáhu pendar, Agabo serer vahe, opüha aipo ehi Espiritu Santo pĩratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose).

²⁹ Evocoiyase Jesús reroyasar Antioquía pendar omondo pota voi guarepochi Jesús reroyasar Judea pendar pĩtivii água yuvireco ocatugüer rupi. ³⁰ Égüe ehi yande Yar reroyasar rãrosar Judea pendar upe porerecosa mondo. Bernabé, Saulo ahe porerecosa viraso yuvireco.

Santiago mano agüer iyavei Pedro roquenda agüer

12 Ahe araviter pipe avei mborerecuar guasu Herodes omboipi Jesús reroyasar mombaraisu. ² Ahese oyuca uca quise pucu pipe Santiago, ahe Juan riquehir. ³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. ⁴ Pedro roquenda pare omondo irungatu imar sui irungatu-ngatu sundao omondo sãro água yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña. ⁵ Evocoiyase Pedro opita voquendasave sãrombri tupri chini. Jesús reroyasar rumo oyerocui pĩrata Tüpa upe yuvireco sese.

Tüpa omose uca Pedro soquendasa sui

⁶ Ahe ari vinose potase Herodes Pedro soquendasa sui, ahe pĩtu pipe Pedro oque ñuvirío sundao guãrosar rese. Ñapichisa ñuvirío carena pipe ou, ñuvinohambe avei sãrosar soquendasa roquendipive. ⁷ Aviyeteramo tẽi Tüpa rembiguai oyemboyecua ique vitesese chupe. Ahese sendi guasú iteanga soquendasa pipe. Ahe oña-toi Pedro iqueve imomahe: “¡Epüha poyava!” ehi chupe. Ipühase, opa voi oyera carena ipo sui. ⁸ Ahese Tüpa rembiguai aipo ehi chupe: “Eyemonde, emonde nde pitaqui” ehi. Evocoiyase Pedro omonde. Ipare aipo ehi iri: “Emonde avei nde yeaosa, eyu che raquicuei” ehi chupe.

⁹ Égüe ehi oso saquicuei. Ahe rumo ndoicuai Tüpa rembiguai oyeupe égüe ehise. Ndoyavii iquerve tẽi égüe ehi vahe chupe. ¹⁰ Ichui yuvinose, oñocua yípindar guãrosar yuvireco. Ipare yuviraso catumi ambuae imoñuviriosa guãrosar oñocua avei. Oyepota oquenda guasu guarepochi apoprive ocarve yuvinose água yuvireco. Ahe oquenda oyemboi ahe ae ité chupe yuvireco. Ipare yuvinose yuviraso pucumi ocarusu rupi. Aviyeteramo tẽi Tüpa rembiguai ndoyecua iri chupe.

¹¹ Evocoiyase Pedro aipo ehi oyeupe: “¡Too! Supi eté Tüpa ombou cheu güembiguai che renose água Herodes povri sui. Tüpa che pĩsiro judío rerecuar che yuca rãgüer sui” ehi oyeupe.

¹² Oyese opihañemoñeta pare, oso, oyepota Juan Marcos si María rêtave oso. Aheve setá ava oñemonuha oyerocui yuvireco sese. ¹³ Oñehese Pedro oquenda ocar cotindarve, cuñatai, Rode serer vahe, osẽ imboi água chupe. ¹⁴ Osenduse rumo Pedro ñehe, oquenda omboi rãgüer sui, oña oique oi pipe vorivete-save, omombehu: “Pe Pedro ihãi oquendipive” ehi oi pipendar upe. ¹⁵ Ahe rumo,

—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tüpa rembiguai mo aipo sãrosar —ehiño yuvireco chupe.

¹⁶ Aheseve Pedro oñehe viteño ité oquendipive ohã. Ichui omboise oquenda yuvireco chupe cute, oyembosiquiye iriño tẽi sepiase yuvireco. ¹⁷ Pedro rumo opo omopuha imonguiriri água. Ichui opa omombehu yande Yar opĩsiro agüer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe —ehi.

Ichui oseño, ambuaeve oso.

¹⁸ Cõhese sundao oyepihamondii eteanga yuvireco. “¿Que pĩha Pedro?” ehi tẽi oyeupe yuvireco. ¹⁹ Ipare Herodes omondo sundao Pedro reca. Ndoyosui eté rumo yuvireco. Evocoiyase Herodes porocuita rupi oporandu tupri sãrosar upe: “¿Que vo seci?” ehi tẽi chupe. Sese oyocuai ambuae sundao opacatu ahe sãrosar yucapa água. Ipare Herodes osẽ Judea sui oso Cesarea ve oyemboerecua.

Herodes mano agüer

²⁰ Yípindar rumo Herodes ndasorii eté ava Tiro pendar upe, Sidón pendar upe avei. Evocoiyase ahe pendar oyoya ipihañemoñeta yuviraso vaherã mborerecuar rovai. Ahe evocoiyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca água rese yuvireco. Esepia, Herodes porocuita sui oipisi mbahe güemihura yuvireco. ²¹ Herodes evocoiyase omombehu ari oñehe vaherã chupe. Osupitise ahe ari, omonde sese iturucuar mborerecuar secosa resendar yivirindar yuvireco. Ipare güenda imboeteipri harive oguapi oĩ. Aheve oñehe ava rehii upe. ²² Evocoiyase ava rehii osapucui pĩrata yuvireco aipo ehi: “¡Co mbia oñehe vahe ndahei ava tẽi, Tüpa ité!” ehi yuvireco Herodes upe im-

boeteisave. ²³ Ava aipo iheseve voi, ñepeí Tūpa rembiguai oyapo mbahe rasí guasu chupe. Ichui mbahe rasí ocaru yaviter rupi yuvireco. Esepia, nomboetei eté Tūpa. Sese omano.

²⁴ Tūpa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuaita mboaviye pare, viroyevi Juan Marcos seraso yuvireco.

Tūpa oiporavo Bernabé, Saulo oyeupe mboraviqui apo ãgua

13 Evocoyase Jesús reroyasar Antioquía pendar pãhuve oime Tūpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avaũ” ehi yuvireco), Lucio evocoi Cirene pendar, Manaén (ahe mbia oyoya ocuacua mborerecuar Herodes, Galilea pendar reseve) iyavei Saulo. ² Ñepeí arí opacatu Jesús reroyasar oñemonuhase yande Yar mboetei ãgua, oyecuacu avei, ahese Espíritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo ãgua” ehi Espíritu Santo yuvireco chupe.

³ Evocoyase oyeroqui pare, omondo opo yuvireco iporavopri ãca harive sovasa ãgua. Ipare omondo yuvireco ambuae tecua rupi Jesús recocuer mombehu ãgua.

Apóstol yuvirecoi Chipre rupi

⁴ Evocoyase Bernabé, Saulo Espíritu Santo remimondo yuviraso Seleucia ve. Ichui yuviraso carite pipe caha pãhu Chipre ve. ⁵ Oyepota yemboyasa Salamina ve yuviraso. Aheve omombehu Tūpa Ñehengagüer judío tūparo rupi yuvireco. Juan avei oso supi ipĩtivii ãgua.

⁶ Opase ité oguata caha pãhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tēi: “Che añehe Tūpa Ñehengagüer rese” ehi tupri tēi vahe. ⁷ Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua vahe. Ahe güeru uca Bernabé, Saulo avei Tūpa Ñehengagüer rendu potasave oyeupe. ⁸ Ipaye vahe rer griego ñehe pipe Elimas. Ahe ndoviroya ucai güerecuar upe ñehesa supi eté vahe. ⁹ Evocoyase Saulo, Pablo serer vahe, vireco ité vahe Espíritu Santo opiha pipe, omahe tupri sese. ¹⁰ Ipare aipo ehi chupe:

—¡Nde iporombopa serai vahe ereico! ¡Ndipihai vahe, Carugar rahir tēi ereico! Opacatu mbahe aviye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe rerõrosa sui. ¹¹ Eyapisaca, cūritei yande Yar nde mombaraisura. Nande mboesapisoi chira moviro arí rupi. Ichui ndericatu iri chietera arí rendigüer repia ãgua —ehi Pablo chupe.

Aipo ehi ramoseve voi, opacatu pĩtumimbi chupe. Oñehe tēi ava güeraso ãgua upe. ¹² Ahe mbahe repi-

ase, mborerecuar viroya yande Yar. Oyepihamondii porombohesa yande Yar resendar renduse.

Pablo, Bernabé reseve yuvirecoi Antioquía ve Pisidia ivi pipe

¹³ Evocoyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso. ¹⁴ Perge sui yuviraso Antioquía ve, ahe namombrii Pisidia sui. Aheve, mbihuhusa arí pipe, yuviroique judío tūparove uguapi yuvinoi. ¹⁵ Oyeroqui pare Tūpa porocuita resendar cuachiar pipe, Tūpa ñehe mombehusar cuachiar pipe avei, tūparo pendar rerecuar omondo oñehe Pablo upe:

—Ore mu, perecose mbahe pemombehu vaherã co ava monguerēhi ãgua, pemombehumi yandeu cūritei —ehi.

¹⁶ Evocoyase Pablo opũha ohã. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tūpa mboeteisar, pesendu che ñehe —ehi—.

¹⁷ Israel iguar Tūpa oiporavo yande ramoí oyeupe nara, ahe Egipto ivi pipe omboeta secua ambuae vahe secosa pipe. Ipare opĩratasa pipe vinosepa ahe ivi sui aracahe. ¹⁸ Ipare Tūpa oñemosañõ yande ramoí reco ai upe cuarenta araviter rupi, oguatase yuvireco ivi iporupirēhisa rupi. ¹⁹ Ipare omocañi ava eta Canaán pipendar siete tupri yuvirecoi vahe serecuar reseve-seve. Ipare omondo Canaán ivi yande ramoí upe nara. ²⁰ Ēgüe ehi cuatrocientos cincuenta araviter rupi yapo yuvireco —ehi.

“Ipare Tūpa ombou ava recocuer moingatusar oporocuai vaherã. Ipa vahe ipãhu pendar serer Samuel aracahe. Ahe Tūpa ñehe mombehusar avei. ²¹ Ahese yande ramoí eta oporandu yuvireco Tūpa upe mborerecuar guasu rese. Evocoyase Tūpa omondo Saúl chupe, ahe Cis rahir, ahe yande ramoí Benjamín suindar secoi. Oporocuai cuarenta araviter rupi oico. ²² Ipare Tūpa virocua imborerecuasa ichui; omondo David upe yande ramoí cuai ãgua. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboaviyera che porocuita’ ehi Tūpa. ²³ Ahe David suindar sui, Tūpa ombou Jesús Israel iguar pĩsiro ãgua. Aracaheve Tūpa omombehu co yande ramoí upe. ²⁴ Yande Yar yu renondeve, Juan omombehu opacatu Israel iguar upe: ‘Pemboasí pe angaipa, peyevi Tūpa upe pe ñeapiramo ãgua’ ehi chupe. ²⁵ Juan omboaviye senimise ocuaita, aipo ehi ava upe imombehu: ‘Pepihañemoñeta revo: co ité yande pĩsiro-ra, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisã yora ãgua ipi sui’ ehi Juan” ehi judío tūparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yande nara ombou Tūpa co ñehesa pĩsirosa resendar. ²⁷ Jerusalén pendar rerecuar avei ndoicuai evocoi Jesús Tūpa remimbou secoise yuvireco. Iyavei ndosenducuai

Tūpa ñehe mombehusar cuachiar pipe oyerouise mbituhusa ari yacatu yuvireco. Ichui ahe ae oyuca uca yuvireco. Ēgüe ehi imboaviye Jesús rese Tūpa ñehe mombehusar rembicuachiagüer pipendar yuvireco. ²⁸Yepe ndoyosui mbahe sembiapo rai yuca uca āgua yuvireco viña, ahe rumo oporanduño Pilato upe yuca uca āgua rese yuvireco” ehi. ²⁹“Ichui omboaviyese opacatu icuachiapri pipendar yuvireco, oviroyi uca curusu sui ñoti āgua yuvireco. ³⁰Tūpa rumo ombogüerayevi iri. ³¹Setá ari rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cūritei ahe ava ité omombehu Jesús recocuer ava upe yuvireco” ehi tūparo pendar upe.

³²“Sese che mu eta, cūritei oromombehu pēu evocoi ñehesa aviye vahe Tūpa omondo vahe yande ramo upe aracahe. ³³Tūpa omboaviye ramo güemimombehugüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuviriosa pipe aipo ehi: ‘Co pipe nde che Rahir ereico; che nde Ru aico’ ehi Tūpa chupe. ³⁴Tūpa omombehu avei güemimbogüerayevi sete tuyuēhi āgua icuachiapri pipe aracahe aipo ehi: ‘Che niha oroovasara acoi David upe che ñehe maranehi supi tupri vahe mboaviye āgua’ ehi. ³⁵Sese omombehu avei ambuae icuachiapri pipe: ‘Nde, Tūpa, ndereseyai chira nde rembiguai Ava seco maranehi vahe rete ituyupa āgua’ ehi. ³⁶Supi eté, David omboaviye ocuaita ava rese ohañecosa pipe yepi. Ipare omano. Evocoiyase oyapocatu tuvipave imu pāhuve yuvireco. Ahe setecuer rumo opaño ité ituyu” ehi. ³⁷“Acoi Tūpa ombogüerayevi vahe retecuer rumo ndituyui eté” ehi tūparo pendar upe imombehu. ³⁸“Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumi pēu. Moisés porocuita sui ndipoi ñeroisa angaipa rese yande reco mohivi āgua. ³⁹Jesús recocuer sui rumo oime ñeroisa ñepeipei viroya vahe upe” ehi. ⁴⁰“Peicua catu co mbahe sui, toviapi eme pe harive acoi Tūpa ñehe mombehusar rembicuachiagüer pipe aipo ehi vahe:

⁴¹‘Esepia, pe seroĩrosar peico vahe. Peyepihamondii, ipare pecañi tēira. Esepia, che ayapora mbahe pe recoveseve. Yepe ambuae omombehu tupri itera pēu che rembiaporã viña, pe rumo ndaperoyai chietera’ ehi Tūpa” ehi Pablo tūparo pendar upe.

⁴²Yuvinose potase tūparo sui, omombita Pablo yuvireco: “Teremombehu irimi eremombehu vahe ñehesa ambuae mbituhusa ari pipe oreu” ehi yuvireco chupe. ⁴³Yuvinosese ava rehii tūparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tūpa pe rovasasa pipe” ehi ava upe yuvireco.

⁴⁴Ambuae mbituhusa ari pipe seni opacatu ava ahe pendar oñemonuha yuvireco Tūpa Ñehengagüer rendu āgua. ⁴⁵Osepiase ava rehii, judío rerecuar oñemoiró iteanga Pablo upe, supindar upe avei yuvireco. Viroĩro Pablo ñehe ava upe yuvireco. ⁴⁶Evocoiyase

Pablo, Bernabé reseve oñehe yuvireco judío upe osiquiyeēhisave:

—Tūpa ore cuai pēu rane ore ñehe āgua. Pe rumo ndapeyapisaca potai iñehengagüer rese. Ipipe sui ndiyai peipisi tecovesa apirēhi vahe. Evocoiyase orosora, oroñehe ava ndahei vahe judío upe. ⁴⁷Esepia, yande Yar ombou ore cuaitarã co ñehesa rese araca-hendar aipo ehi vahe:

‘Che oroporavo tataendi nungar nde reco āgua ndahei vahe judío yuvirecoi vahe upe pĩsirosa reroguata āgua opacatu ivi rupi’ ehi.

⁴⁸Ava ndahei vahe judío osenduse co ñehesa, oviharete yuvireco, omboetei avei Tūpa Ñehengagüer. Opacatu ava iporavopri tecovesa apirēhi vahe pisi āgua, ahe viroya yuvireco. ⁴⁹Evocoiyase Tūpa Ñehengagüer omombehu opacatu ahe ivi rupi yuvireco.

⁵⁰Judío rumo omonguerēhi cuña imboyerapri Tūpa mbooteisar iyavei mbia seco ivate vahe Pablo, Bernabé mose uca āgua güecua sui yuvireco yamotarēhisave. ⁵¹Ahese Pablo, Bernabé oipipete opitaqui ivi sui yuvireco ‘Tūpa toicua mbahe sembiapo ai rese yuvireco chupe’ oya. Ichui yuviraso Iconio ve. ⁵²Jesús reroyasar rumo oviharete yuvireco, vireco ité Espiritu Santo oyese yuvireco.

Pablo, Bernabé reseve omombehu Tūpa Ñehengagüer Iconio ve yuvireco

14 Pablo, Bernabé oyepota Iconio ve yuviraso. Aheve yuviroique judío tūparo pipe, omombehu tupri yande Yar recocuer yuvireco. Sese setá ava viroya iñehesa yuvireco judío, ndahei vahe avei judío. ²Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarēhi āgua. ³Ahe rumo opita pucu yuvireco Iconio ve, omombehuño yande Yar recocuer osiquiyeēhisave yuvireco. Aheve Tūpa ombou opĩratasa mbahe yavai vahe apo āgua chupe ‘ichui toicua yuvireco Pablo, Bernabé che poroaisusa mombe-huse’ oyapave. ⁴Ahe tecua pendar rumo ipihañemoñeta yoivi yuvireco: ñepeipei judío pihañemoñetasa rupindar; ambuae evocoiyase apóstol pihañemoñetasa rupindar yuvireco. ⁵Oime judío iyavei ndahei vahe judío oyemboyoya mborerecuar rese mara-mara tēi sereco āgua yuvireco, “Ita pipe avei yayapi-yapi” ehi yuvireco chupe viña. ⁶Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei. ⁷Supi omombehu ñehesa aviye vahe Jesús resendar yuvireco.

Pablo yapi-yapisa ita pipe Listra ve

⁸Listra ve yuvirecoise, oime mbia oha ramomi suive ndoguatai vahe. Ahe mbia oguapi oĩ ⁹oyapisaca Pablo ñehe rese. Ahese Pablo omahengatuse sese, oicua ndoguatai vahe oyeroya ité Tūpa rese ocuera āgua.

¹⁰Evocoiyase aipo ehi pĩrata chupe:

—¡Epũha! —ehi.

Ahese opo, opūha, oguata voi. ¹¹ Osepiase ava rehii mbahe sembiapo yuvireco, osapucai pīrata Licaonia ñehe pipe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihañemoñeta yuvireco Bernabé ahe tūpa Zeus iyavei Pablo ahe tūpa Hermes viña. Esepia, Pablo oñe-he vahe. ¹³ Ahese co tūpa Zeus pahi güeru tivi, mbahe potri avei. Ahe tecua tapia roquendave, ahe Zeus tū-paro tecua pipe ava reiquesa rupi chini. Oyuca pota tivi Pablo, Bernabé mboetei āgua yuvireco viña.

¹⁴ Oicuase rumo Bernabé, Pablo, ahese omondoro oturucuar yuvinoña ava pāhuve; oñehe pīrata yuvireco:

¹⁵ —Mbia, ¿mahera ēgüe peye oreu? —ehi—. Ore rumo ava tēi pe nungar avei oroico. Oromombehu: “Pe-poi co mbahe ēgüe ehi tēi vahe mboeteisa sui; peroya Tūpa supi eté vahe” orohe pēu. Ahe oyapo vahe *iva, ivi*, para guasu, opacatu ipor reseve. ¹⁶ Aracahe rumo Tūpa, “Ēgüe tehi oguata ndahei vahe judío opihañemoñetasa rupi yuvireco” ehi viña. ¹⁷ Tūpa rumo ndas-esarai ava upe mbahe tupri apo āgua sui. Ahe ombou amar pēu mbahe miti ha aviye āgua yepi. Ēgüe ehi mbahe tembihu imbou iyavei viharetasa pēu —ehi ava upe yuvireco.

¹⁸ Yepe aipo omombehu yuvireco chupe, ava rehii rumo seniño ité tivi oyuca yuvireco chupe imboetei āgua viña.

¹⁹ Ahese oyepota moviro judío Antioquía sui, Iconio sui avei. Oipihañemoñeta rerova ava rehii yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ivii. Ipihañemoñeta: “Yayuca ité” ehi yuvireco chupe viña. ²⁰ Oyere tupri Pablo rese Jesús reroyasar yuvireco. Ahe rumo oñarapuha, oi que iri oso tecua pipe. Ahere ayihive yuvinoso oyevi yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco. ²² Ahe supi omonguerēhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroy-año itera rumo Jesucristo. Sese peseya eme ité seroy-asa. Yandeu aviye catu ité mbahe-mbahe tēi pipe yande recose Tūpa mborerecuasave yande reique āgua” ehi yuvireco Jesús reroyasar upe. ²³ Ipare oiporavo ava Jesús reroyasar rāro āgua ñepeipei ñe-monuhasa rupi. Oyeroqui iyavei oyecuacu. Ipare viropovēhe yande Yar upe iporaviqui āgua yuvireco.

Pablo, Bernabé oyevi yuvireco Antioquía ve Siria ivi rese

²⁴ Ipare yuviraso Pisidia rupi, oyepota Panfilia ivi rese. ²⁵ Omombehu Tūpa Ñehengagüer yuvireco Perge ve. Ipare yuviraso Atalia ve. ²⁶ Ahe ichui yuviraso carite pipe Antioquía ve, ahe tecua pipe yipindar imondopri Tūpa upe sovasapri yuvirecoi mboraviqui apo āgua. Aheve tupri avei imboaviye pare oyevi yuvireco. ²⁷ Oye-potase Antioquía ve yugüeru, omonuha opacatu Jesús

reroyasar yuvireco. Aheve omombehu opacatu Tūpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya āgua yuvireco” ehi yuvireco omboetasa upe. ²⁸ Aheve Pablo, Bernabé opita pucu yuvireco ipiri.

Jesús reroyasar oñemonuha Jerusalén ve yuvireco

¹⁵ Evocoyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tūpa oy-ocuai Moisés yande ramoi cuai āgua: ‘Pembocircunci-da opacatu pe mu cuimbahe cheu nara’ ehi Tūpa aracahe” ehi yuvireco. “Cūrítei acoi ēgüe ndapeyeise Jesús reroyasar upe, noñepisiroi chietera yuvireco” ehi Antioquía pendar upe yuvireco. ² Pablo, Bernabé reseve rumo oñehe pīrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rārosar upe aipo mbahe moingatu āgua yuvireco.

³ Ēgüe ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuviraso, oguata rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya aracahendar aracuasa Tūpa rupi oguata āgua yuvireco” ehi. Ahese opacatu Jesús reroyasar oyemboviharete yuvireco senduse.

⁴ Yuviroyepotase Jerusalén ve, apóstol, Jesús reroyasar rārosar iyavei ambuae Jesús reroyasareta oipisi tupri yuvireco. Aheve omombehu Tūpa mbahe oyapo vahe oyese yuvireco. ⁵ Osenduse rumo, moviro Jesús reroyasar fariseo opūha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuita mboaviye āgua yuvireco —ehiño ité yuvireco.

⁶ Ahese apóstol, Jesús reroyasar rārosar avei oñemonuha oyemomborandu āgua aipo mbahe rese yuvireco. ⁷ Yemomborandu viteseve, Pedro opūha ipāhuve aipo ehi:

—Che mu, peicua niha aracaco Tūpa che poravo pe pāhu sui co ñehesa poropisirosa resendar mombehu āgua ava ndahei vahe judío upe ‘toviroya yuvireco’ oyapave. ⁸ Tūpa oicua ité opacatu ava pihañemoñetasa. Chupe avei omondo Espiritu Santo inungar yandeu. Ipipe sui yaicua Tūpa oipisi avei ahe ava oyeupe nara —ehi—. ⁹ Evocoyase, “Judío aviye catu vahe ava ndahei vahe judío sui” ndehi Tūpa. Esepia, opacatu oyoya pāve Tūpa upe yaico. Sese omoatiro ipihañemoñeta rai sui oyese yeroyasa pipe. ¹⁰ ¡Pe tie pesecoña pota Tūpa! ¡Mahera peyocuai uca pota co Jesús reroyasar mbahe yavai rai vahe apo āgua! Aní rumo. Esepia, yande ramoi ndoicatui Tūpa porocuita mboaviye āgua yuvireco, yande avei ēgüe vahe —ehi—. ¹¹ Co rumo, yaroyase yande Yar Jesucristo, yande pīsirora

oporoiſusa pipe, inungar co ava ndahei vahe judío yuvirecoi —ehi Pedro.

¹² Evocoyase opacatu oyemonguiriri yuvireco, os-endu Bernabé, Pablo ñehesa, mbahe sembiapo avei yuvireco. Evocoyase omombehu ndayasepia vahe poromondiisa Tūpa oyapo uca ava ndahei vahe judío pãhuve yuvireco chupe. ¹³ Osendupase iñehe yuvireco, ahese Santiago aipo ehi:

—Che mu, Jesús reroyasar, peyapisacami che ñehe rese: ¹⁴ Simón omombehu yandeu Tūpa osaisu avei ava ndahei vahe judío. Sese oiporavo ahe ava oyeupe nara —ehi—. ¹⁵ Oyoya tupri Tūpa ñehe mombehusar rembicuachiagüer rese. Ñepe i pãhu pendar oicuachía aracahe aipo ehi:

¹⁶ Coiye catu ayevíra vitu. Ahese ayapo piasu irira che rēta David oyapo uca vahecuer, ahe oi imocañipirer. Ambopiase irira oitipa vahecuer yuvireco.

¹⁷ Ēgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapi reseve.

¹⁸ Evocoi yande Yar rembiaporã icuapri aracahe suive' ehi Tūpa ñehe mombehusar aracahe.

¹⁹ “Sese chepihañemoñeta iya ndayayocuai chira Moisés porocuaita rupi oñecuñaro vaheñā ndahei vahe judío Tūpa rupi uguata āgua yuvireco” ehi. ²⁰ “Aviye ru-mo yaicuachiase chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeaguasai chira, pehui rene mbahe mimba yucapri suvi renosepirēhi, mbahe ruvi avei” ehi. ²¹ “Esepia, opacatu tecua rupi yuvirecoi ava omombehu vahe Moisés porocuaita ñepeipei mbituhusa ari pipe judío tūparo pipe aracahe suive. Aipo rupive” ehi Santiago.

Icuachiapri ndahei vahe judío upe nara

²² Ahese apóstol, Jesús reroyasar rārosar, ambuae Jesús reroyasar avei omondo pota opãhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyeroyapri omboetasa pãhuve yuvireco. ²³ Ahe supi aipo ehi icuachía imondo yuvireco:

“Ore apóstol, Jesús reroyasar rārosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei. ²⁴ Oroyandu amove ava ore pãhu pendar pe mañeco tēi aipo oporombohesa pipe yuvireco. Ahe ava ndahei ore ocuaita pipe yuviraso pēu pe pihañemoñeta rerova. ²⁵ Sese oyoya orepihañemoñeta oroiporavo ñuvirío mbia ore rembiaisu ore rivri Bernabé, Pablo rupi imondo eipeve pēu. ²⁶ Ahe acoi oye-mondo vahe mbahe-mbahe tēi povrive yande Yar Jesu-cristo recocuer rese yuvireco. ²⁷ Oromondo Judas, Silas avei pēu: ahe teieté omombehura opacatu cuachiar pipendar pēu yuvireco. ²⁸ Aviye Espiritu Santo upe, oreu avei co porocuaita güeraño oromondo vahe rese pēu. Ndape cuaisa pota iri rumo ambuae mborocuaita rese. ²⁹ Pehui rene mbahe mimba yucapri seropovēhepri mbahe rahanga tēi upendar, ndapehui

chiaveira mbahe ruvi, mbahe mimba yucapri suvi renosepirēhi vahe iyavei ndapeaguasai chira. Pepoise evocoi mbahe naporai vahe sui, oimera mbahe tupri pēu. Aipo rupive. Peico tupri” ehi.

³⁰ “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe. ³¹ Ahe cuachiar rese oyerouise, oyemboviharere yuvireco. ³² Judas, Silas Tūpa suindar ñehesa mombehusar avei yuvirecoi. Sese omboviharere catu iyavei omonguerēhi catu avei ahe ava yuvireco oñehe pipe. ³³ Opitase moviro ari aheve, Jesús reroyasar Antioquía pendar aipo ehi: “Aviye. Peyeví tupri pe mbousar upe” ehi yuvireco chupe.

³⁴ Silas rumo opita potaño ité aheve. ³⁵ Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite āgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu āgua

³⁶ Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi piña ahe yuvireco? —ehi.

³⁷ Ahese Bernabé viraso pota Juan Marcos oyeupi viña. ³⁸ Nomboyoyai rumo Pablo ipihañemoñeta rese. Esepia, cuese Juan Marcos oseyaño oyepotase yuvireco Panfilia ve. “Taipitiviñiño iporaviquisa rese” ndehi chupe. ³⁹ Nomoingatuise mbahe oyeupe yuvireco, oyepipiño yuvireco oyesui. Ahese Bernabé viraso Marcos oyeupi carite pipe Chipre ve. ⁴⁰ Pablo rumo oiporavo Silas oyeupi icho āgua. Yuvinose āgua Antioquía sui, Jesús reroyasar ahe pendar aipo ehi yuvireco chupe: “Tape rovasa Tūpa oporoaisusa pipe” ehi yuvireco imondo. ⁴¹ Ipare yuviraso Siria, Cilicia rupi Jesús reroyasar monguerēhi catu āgua yuvireco.

Timoteo oso Silas ndugüerã Pablo rupi

16 Pablo ondugüer reseve yuviraso Derbe ve, Lистра ve avei. Aheve osepia Jesús reroyasar, Timoteo serer vahe, judía, Jesús reroyasar membrí. Iyesupa rumo griego. ² “Evocoi Timoteo aviye etepri” ehi Jesús reroyasar Lистра pendar, Iconio pendar avei yuvireco chupe. ³ Pablo viroguata potaño ité Timoteo oyeupi. Sese seroguata renondeve, ombocircuncida uca seroñroēhi āgua judío yuvirecoi vahe upe. Esepia, opacatu oicua Timoteo ru griego secose yuvireco. ⁴ Evocoyase opacatu tecua iguatagüer rupi omombehu ahe mborocuaita apóstol, Jesús reroyasar rārosar Jerusalén pendar ombou vahe yuvireco chupe. ⁵ Sese Jesús reroyasar ahe tecua rupindar oyemoviracua catu yuvireco Jesús reroyasa pipe iyavei oyemboeta catu yuvireco ari rupi.

Tūpa omondo uca Pablo Macedonia ve iquer nungar pipe

⁶ Espiritu Santo ndoipotai Asia rupi yuviraso vaherā Tūpa Ŋehengagüer mombehu āgua. Sese oyahuva yuviraso Frigia rupi, Galacia rupi avei. ⁷ Ēgüe ehi oyepota Misia popive yuvireco. Ichui yuviraso pota tēi Bitinia ve. Jesús Espiritu rumo ndoipotai icho āgua supi. ⁸ Ahese osasaviño yuviraso Misia sui carite guasu yemboya Troas ve oyepota āgua yuvireco. ⁹ Oyepotase aheve, ahe p̄tū pipe Pablo oquer nungar pipe osepia mbia, Macedonia pendar, “Ereyumira Macedonia ve ore p̄tīvii āgua viña” ehi ohā chupe. ¹⁰ Ipare ore oroyemoingatu voi eté Macedonia ve ore so āgua. Esepia, ore oroicua ité Tūpa aheve ore mondora ñehesa p̄sīrosa resendar mombehu āgua.

Pablo, Silas Filipino ve yuvirecoi

¹¹ Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve. ¹² Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro arī tēi oroico. ¹³ Mbituhusa arī pipe orosē evocoi tecua sui iai popive. “Aheve oñemonuhara judío oyeruqui āgua” orohe. Aheseve cuña oñemonuha yugüeru. Aheve oroyepota chupe, orogupā ipāhuvē. Ipare oromombehu co ñehesa p̄sīrosa resendar yuvireco chupe. ¹⁴ Ŋepe imboetasa, Lidia serer vahe, Tiatira pendar, oyapisaca ore ñehē rese oī. Ahe Tūpa mboetisar secoi, turucuar suendi vahe mbovendesar avei secoi. Yande Yar omohivi ipiñahemoñetasa iyapisaca āgua Pablo remimombehu rese. ¹⁵ Sese ñapiramosa, opacatu sēta pendar reseve. Ipare ore mombita pota güētave.

—Che reroyase peye yande Yar reroyasar che recose, pepitara che rētave —ehi oreu.

Ēgüe ehi ore monguerēhi. Sese oropita sētave ipiri.

¹⁶ Ipare ambuae arī oroso irise oroyeroqui āgua, cuñatai ore rovaichi, ahe cuñatai carugar p̄ratasa pipe mbahe mombehusar. Oicatu ava upe mbahe oime vaherā mombehu. Omombehuse mbahe, setá oipisi seprī guarepochi güerecuar yuvirecoi vahe upe nara yepi. ¹⁷ Ahe cuñatai ou ore raquicuei,

—¡Co ava Tūpa ivate catu vahe upendar oporaviqui yuvireco omombehu: “Na ehira Tūpa yande p̄sīro” ehi yuvireco! —ehi pucu-pucu ore mombehu ava upe.

¹⁸ Setá arī Ēgüe ehi oico oreu. Omañeco tēise rumo Pablo, oyemboyere chupe cute, aipo ehi icarugar upe:

—Che orocuai Jesucristo rer pipe: esē co cuñatai sui —ehi.

Aheseve voi carugar osē ichui.

¹⁹ Evocoyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasi-pave oipisi Pablo, Silas mborerecuar upe ocarusuve

seraso yuvireco. ²⁰ Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tēi yuvirecoi. Ayeve omboaiyu guasu tēi yuvireco yande recua pipe. ²¹ Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña āgua —ehi yuvireco mborerecuar upe.

²² Evocoyase ava eta oyamotarēhi Pablo iyavei Silas yuvireco iyavei mborerecuar, “Pesequii iturucuar ichui. Ipare peinupara ivira pipe” ehi. ²³ Inupá iteanga pare, osoquenda yuvireco. Oyocuai p̄rata soquendapri rārosar yuvireco, “Esāro tupri” ehi yuvireco chupe.

²⁴ Aipo oyeupe he ramoseve, soquendapri rārosar omoingue Pablo, Silas oi ava nose catui vahesa pipe. Aheve omopaha cepo pipe.

²⁵ Ahe p̄tū mbiter rupi rumo Pablo, Silas oyeruqui, osapuca Tūpa mboetisave yuvireco. Ambuae ava soquendapri evocoyase osenduño tēi yuvireco isapuca.

²⁶ Ahese aviyeteramo tēi ivi oririi eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui.

²⁷ Ahese soquendapri rārosar omahe yesapiha. Osepia oquenda imboipri, ahese vinose oquise pucu siru sui oyeyuca āgua viña. Esepia niha, “Opacatu ité revo soquendapri yuviraso” ehi viña. ²⁸ Pablo rumo,

—¡Ereyapoi rene mbahe tēi ndeyeupe! ¡Esepia, opacatu oroicoveño cohavel —ehi pucu soquendapri rārosar upe.

²⁹ Evocoyase soquendapri rārosar, “Emboumi tataendi” ehi ondugüer upe. Ichui oña oique, oririi, osiquiyepave oñenopiha Pablo, Silas rovai oso. ³⁰ Vinose pare soquendasa sui oporandu chupe:

—Mbia, ¿mara ahera vo che ñepisiro āgua vichico? —ehi chupe.

³¹ —Eroya yande Yar Jesucristo. Ichui ahe nde p̄sīro-ra, nde rēta pendar avei —ehi yuvireco chupe.

³² Ahese omombehu yuvireco Tūpa Ŋehengagüer soquendapri rārosar upe, opacatu sēta pendar upe avei.

³³ Ahe p̄tū pipeve avei soquendapri rārosar viraso oyeupi, yapichasa oyoseipa chupe. Ahese Pablo, Silas oñapiramo guārosarer, sēta pendar avei yuvireco.

³⁴ Viraso pare sārosar güētave, ombocarū. Ahe sēta pendar avei oviharete ité yuvireco Tūpa reroyasa rese.

³⁵ Cōhese mborerecuareta omondo sundao ava rese icuai pri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi. ³⁶ Ahese soquendapri rārosar omombehu co ñehesa Pablo upe:

—Mborerecuar ombou yuvireco ñehesa cheu pe mose āgua. Peso tupriño peico —ehi chupe.

³⁷ Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tēi yuvireco. Ipare aipo ava rembiepiaēhive tēi ore mosepa uca pota viña. ¡Aní eté rumo! Ahe teieté ru toyugüeru ore mose āgua —ehi soquendapri rārosar upe.

³⁸ Ipare sundao ava rese icuai pri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco. ³⁹ Ahese ahe teieté yuviraso Pablo, Silas oyeupe ñero água rese yuvireco: “Peso tupriño ore recua sui” ehi yuvireco chupe. ⁴⁰ Pablo, Silas yuvinosese voquendasa sui, yuviraso iri Lidia rêtave. Oñemonuha irise ambuae Jesús reroyasar pãhuve, omonguerêhi catu yuvireco. Ipare yuviraso ichui.

Ava yaivu guasu tõi Tesalónica ve yuvireco

17 Oguatase Pablo iyavei Silas, oñocua Anfípolis iyavei Apolonia rupi yuviraso. Êgüe ehi oyepota tecua Tesalónica ve yuvireco. Aheve oime judío tũparo. ² Secocuer rupi eté mbituhusa ari pipe Pablo oi que judío tũparove, oñemoñeta ava eta upe mbosapi mbituhusa ari rupi Tũpa Ñehengagüer rese. ³ Omboyecua tupri imombehu Tũpa Rembiporavo ava p̄siro água iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe p̄u, ahe ité niha Tũpa Rembiporavo ava p̄siro água —ehi.

⁴ Amove ipãhu pendar seroyasa pipe oyemboya sese yuvireco. Setá avei ava griego yuvirecoi vahe, Tũpa mboetesar judío aracuasa reroyasar avei. Ipãhuve setá avei cuña oyemboetei vahe oyemboya sese yuvireco. ⁵ Judío rumo ndoviroyai vahe oñemoirombave secatêhi ava rese yuvireco. Sese omonuha ava yuvireco tõi vahe, ndipihai vahe yuvireco. Imonuha pare, ahe omboai vu guasu uca tõi ahe ava upe opacatu güecua pipe yuvireco. Yuviraso Jasón rêtave Pablo, Silas reca, vïnose pota ava rehii pãhuve yuvireco viña. ⁶ Ndoyosuse rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroãse guasu seroco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cõritei oyepotapa yuvireco cohave! ⁷ Co Jasón omombituhu güêtave. ¡Opacatu co yuvirecoi vahe ndoviroyai Cesar porocuai ta yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyepihamondii guasu ava eta, mborerecuar avei tecua pipendar yuvireco.

⁹ Mborerecuar rumo oipisipase guarepochi Jasón sui, ambuae Jesús reroyasar sui avei, ahese opa omose.

Pablo, Silas omombehu Tũpa Ñehengagüer Berea ve yuvireco

¹⁰ Ahe p̄tu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tũparo pipe. ¹¹ Berea pendar ava aviye catu ava Tesalónica pendar sui. Êgüe ehi ipisi ohãpisiêhisa pipe ñehesa yuvireco iyavei ari yacatu rupi oseca Tũpa Ñehengagüer pipe ‘¿supi eté p̄ha Pablo ñehesa?’ oyapave yuvireco. ¹² Evocoyase setá avei Pablo ñehe reroyasar iyavei setá griego viroya yu-

vireco, ndahei cuimbahe güeraño, cuña oyemboetei vahe avei. ¹³ Judío Tesalónica pendar rumo oyandu yuvireco Pablo porombohesa Tũpa Ñehengagüer rese Berea ve. Sese yuviraso aheve imboai vu guasu tõi uca água ava upe yuvireco. ¹⁴ Evocoyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opita viteño aheve yuvireco. ¹⁵ Evocoyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñehe Silas upe iyavei Timoteo upe avei yuvireco yuviraso voi água Pablo piri ahe tecuave yuvireco.

Pablo Atenas ve secoi

¹⁶ Pablo osãro vitesese Silas iyavei Timoteo Atenas ve oico, ndoyembovïhai osepiase opacatu rupi tũpa rhanganga tõi. ¹⁷ Sese judío tũparo pipe omombehu Jesús recocuer judío eta upe iyavei ambuae Tũpa mboetesar upe avei. Iyavei ari yacatu omoñeta ava osepi vahe ocarusu rupi ava ñemonuhasave ahe tecua pipe. ¹⁸ Evocoyase amove mbia oyembohe vahe epicúreo aracuasa rese iyavei mbia oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroñrosave:

—¿Mbahe rese angahu p̄ha co mbia iñehe papa rai ava upe oico? —ehi.

Ambuae aipo ehi yuvireco:

—Ndoyavi co mbia oñehe vahe ambuae ava Tũpa rese tõi —ehi yuvireco.

Esepia, omombehu Jesús recocuer iyavei cuerayevisa resendar. ¹⁹ Evocoyase ahe oyembohe vahe viroyeupi Pablo Areópago serer vahesave seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña? ²⁰ Supi eté niha eremombehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

²¹ Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

²² Evocoyase Pablo opũha ahe ava pãhuve aipo ehi:

“Pesendu rane Atenas iguar. Aguatase ocar rupi asepi pe tũpa eta pemboetei vahe. Ahese asepi ñepei tũpa upe seropovêhepri renda. Sese asepi icuachiapri aipo ehi oĩ: ‘Tũpa ndicuasai vahe upendar’ ehi. Evocoi Tũpa ndapeicua vitei vahe, ahe secocuer niha amombehu p̄u” ehi.

²⁴ “Evocoi Tũpa oyapo vahe co ivi, opacatu mbahe ipor avei. Ahe niha ivi, íva Yar secoi. Sese ndasecoi tũparo ava tõi rembiapo pipe. ²⁵ Ndahei ava rembiapo pipe sui tõi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, p̄tuhesa iyavei opacatu mbahe oime vahe ivi, ivave” ehi.

²⁶ “Tũpa oyapo opacatu-catu tõi ava ñepei ava sui ava yesu água opacatu ivi rupi. Omondo ivi ava yemboere-

cua āgua ñepepepe upe. Ari avei omondo co ivi pipe iyemboerecua āgua yuvireco chupe. ²⁷ Ēgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ēgüe ehi rumo Tūpa yande resevemi eté. ²⁸ Esepia niha, Tūpa sui yaicove, ipīratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tūpa suindar’ ehi yuvireco. ²⁹ Sese yande Tūpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tūpa’ ndayahei chira. Esepia, mbahe rahanga ava rembiapo tēi, ndahei Tūpa” ehi. ³⁰ “Pe ramoi ndoicua tupriise yuvireco aracahe, Tūpa oñemosañi mbahe sembiapo rese chupe. Cūrítei rumo oyocuai opacatu ava co ivi pipendar ‘tomboasi oangaipa, toyeví yuvireco cheu’ oya. ³¹ Esepia, ahe oiporavo ari opacatu ava recocuer rese porandu uca āgua güecocuer ñvi tupriisa pipe ñepepe güembiporavo upe. Ahe ombogüerayevi güembiporavo omano vahe pāhu sui ‘toicua opacatu ava güecocuer rese iporandu āgua’ oya” ehi Atenas pendar upe.

³² Osenduse yuvireco cuerayevisa resendar, ahese oime ava oyoyai catu yuvireco seroñrosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

³³ Sese Pablo osē ipāhu sui oso. ³⁴ Moviro rumo mbia oyemboya sese, viroya ité vahe ñehesa yuvireco. Ahe ipāhuve seci mbia Dionisio serer vahe, ahe Areópago pāhu pendar iyavei cuña Dámaris serer vahe. Ambuae oime vite yuvireco seroyasar.

Pablo Corinto ve seci

18 Coiye catu Pablo osē Atenas sui, oso Corinto ve. ² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvinose ñepepe tecua Italia rupindar Roma sui oyocuaise mborerecuar guasu Claudio: “Toyuvinose ité opacatu judío Roma sui” ehise. Pablo oso, ³ opita Aquila piri oporaviqui āgua. Esepia, Pablo, Aquila avei ahe mbahe piper mbovivar pāve yuvirecoi. ⁴ Mbituhusa ari yacatu rupi Pablo omombehu Jesucristo recocuer ava upe judío tūparo pipe ‘toviroya Jesús judío iyavei ndahei vahe judío yuvireco’ oyapave.

⁵ Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu āgua rese güeraño judío eta upe aipo ehi: “Jesús niha Tūpa Rembiporavo ava pñsiro āgua seci” ehi. ⁶ Ñehese-ñehese tēi rumo seroñrosave yuvireco chupe. Sese Pablo oipipete oturucuar sovaque ‘oimera mbahe tēi pēu’ oya, iyavei aipo ehi chupe yuvireco:

—Pe ae niha peseca Tūpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pēu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoyase Pablo osē judío tūparo sui, oique mbia Ticio Justo serer vahe rētave, ahe Tūpa mboeteisar

avei seci. Ahe sēta judío tūparo iqueve. ⁸ Crispo, ahe judío tūparo rerecuar viroya avei yande Yar, opacatu sēta pendar avei viroya yuvireco. Setá ambuae Corinto pendar avei viroya osenduse ñehesa yuvireco. Seroya pare, oñeapiramopa uca yuvireco. ⁹ Ñepepe pñtu pipe yande Yar oñehese Pablo upe iquer nungarve:

“Eresiquiyei rene, ereñehese ava upe, che mombehuño eve, erepoi rene che mombehusa sui. ¹⁰ Esepia, che nde reseve aico. Sese ndiyai ava upe nde momara uca āgua. Supi eté che areco setá che rahirā co tecua pipe” ehi yande Yar chupe. ¹¹ Evocoyase opita ñepepe araviter yemombitesa rupi Corinto ve oico. Aheve ombohe Tūpa Ñehengagüer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarēhisave. Ichui viraso ahe mborerecuar upe porandusa ivate catusave yuvireco, ¹³ aipo ehi yuvireco chupe:

—Co mbia oipihañemoñeta rerova tēi ava oTūpa mboetei āgua. Ndahei rumo Roma pendar porocuaita rupi ēgüe ehi yuvireco —ehi yuvireco seroñrosave chupe.

¹⁴ Oñehese pota tēi viña, Galión rane rumo oñehese judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerēhira che yapisaca āgua pe remimombehu rese viña. ¹⁵ Pe rumo peporandu cheu mbahe pe yembohesa resendar, pe Tūpa rer resendar iyavei pe Tūpa porocuaita resendar rese tēi. Pemoingatu pe ae pe recocuer; ndaipotai aipo nungar mbahe moingatu āgua —ehi Galión ahe ava upe.

¹⁶ Ipare opa omboyepepi porandusa sui. ¹⁷ Ahese opacatu griego oipisi judío tūparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yevi irisa Antioquía ve

¹⁸ Pablo seci pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeapipa tupri oñehese mboaviye āgua. Ipare yuviraso carite pipe Siria ve.

¹⁹ Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oique judío tūparo pipe Jesús resendar ñehesa mombehu āgua chupe yuvireco. ²⁰ Ahe pendar omombita pota vite tēi yuvireco viña, Pablo rumo ndopita potai aheve. ²¹ Evocoyase, “Aviye, taso rane” ehiño chupe yuvireco. “Tūpa oipotase cheu, ayevi irira vitu pe piri” ehi.

Ipare oso Efeso sui carite pipe. ²² Oyepotase Cesarea ve, oso Jerusalén ve “avirave” apo āgua Jesús reroyasar upe. Ipare oso Antioquía ve. ²³ Opita pucu pare aheve, osē, oguata iri Galacia rupi, Frigia rupi opacatu Jesús reroyasar monguerēhi catu āgua.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tüpa Ñehengagüer. ²⁵ Ahe oyembohe vahe avei yande Yar recocuer rese. Omombehu oquerêhisa pipe secocuer ava upe, oporombohe tupri ai avei sese. Ahe rumo oicua Juan oãpiramo agüer güeraño tēi. ²⁶ Ahe osiquiyehisave judío tūparo pipe omombehu Tüpa Ñehengagüer. Osenduse Aquila, Priscila iñehesa, omombita yuvireco oyepiri. Ahese omombehu tupri catu Tüpa recocuer chupe yuvireco. ²⁷ Oso potase Apolos Acaya coti, ahese Jesús reroyasar Efeso pendar omonguerêhi catu. Oyapo cuachiar Acaya pendar upe imondo yuvireco sese hañeco tupri ãgua. Ipare oyepota oso Acaya ve. Aheve oime ava Tüpa guaisusa pipe sui viroya vahe Jesús yuvireco. Ahe ava Apolos oipitivi seroya tupri catu ãgua yuvireco. ²⁸ Omboyecua opacatu rovaque judío pihañemoñetasa co coti tēi vahe. Ahese opa osecopi oñehe pipe ahe ava. Esepia, Tüpa Ñehengagüer pipe omboyecua ité: “Jesús Tüpa Rembiporavo ava p̄s̄iro ãgua secoi” ehi eté judío eta upe.

Pablo omombehu Jesús recocuer Efeso ve

19 Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar. ² Evocoyase oporandu ahe ava upe:
—¿Peipisi vo Espíritu Santo pe piha pipe peroyase Jesús? —ehi chupe.
—Ore ndorosendui eté aipo Espíritu Santo resendar ñehesa —ehiño yuvireco chupe.
³ Ichui oporandu iri chupe:
—Evocoyase, ¿mbahe nungar vo ãpiramosa peipisi? —ehi.
—Juan poroãpiramosa oroipisi —ehi ahe ava yuvireco chupe.
⁴ Evocoyase aipo ehi ahe ava upe:
—Juan niha oñapiramo acoi omboasi vahe oangaipa oyevisé Tüpa upe. Ipare rumo omombehu ava upe: “Peroya ahe eté vahe ou vahe rã che raquicuei” ehi. Ahe ou vahe rã, “Jesús upe” aipo ehi —ehi Pablo chupe.
⁵ Osenduse Pablo ñehe, opacatu oñeapiramo uca Jesucristo rer pipe yuvireco. ⁶ Omondose Pablo opo iharive yuvireco, ahese ogüeyi Espíritu Santo, oique ipiha pipe yuvireco. Ipare aviyeteramo tēi oñehe ambuae ñehesa pipe iyavei omombehu Tüpa suindar ñehesa yuvireco. ⁷ Ëgüe ehi Tüpa ahe doce mbia yuvirecoi vahe upe.
⁸ Mbosapi yasi rupi Pablo oique omombehu Tüpa Ñehengagüer judío upe osiquiyehisave itūparo pipe ipihañemoñeta rerova ãgua Tüpa mborerecuasa resendar reroya ãgua rese. ⁹ Amove rumo judío ipihav̄iracua ité seroyaêhi ãgua yuvireco. Ipipe iñehese tēiño co tecocuer ipiasu vahe mombehusa rese yuvireco ava rehii rovaque. Evocoyase Pablo oyepipi

ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi. ¹⁰ Ëgüe ehi ñuvirio araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. ¹¹ Tüpa omondo güeco p̄ratasa Pablo upe poromondiisa apo ãgua. ¹² Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera ãgua. Carugar avei opa yuvinose yuvireco ichui.

¹³ Amove oime judío oguata vahe ocar rupi carugar mose ãgua ava sui. Sese nara oiporu pota yande Yar Jesús rer yuvireco.

¹⁴ Evocoyase aipo ehi carugar upe: “Pablo Jesús recocuer omombehu vahe rer pipe, ‘Peyepipi co mbia sui’ ahe p̄eu” ehi. Ëgüe ehi pota avei siete Esceva rahir mbahe apo yuvireco viña. Ahe iyepota judío pahir rerecuar secoi. ¹⁵ Carugar rumo omboyevi chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

¹⁶ Aheseve ahe cuimbahe carugar vireco vahe opo ipãhube oso. Opacatu op̄ratasa pipe opa ité osecopi siete mbia yuvirecoi vahe. Omomara-mara tēi oguayihisa pipe imonanipa tupri imondo. ¹⁷ Co mbahe sembiapo r̄racua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

¹⁸ Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco ¹⁹ iyavei setá ipaye vahe Jesucristo viroyase, omonuhapa ocuachiar ombopayesa resendar sapi ãgua opacatu ava rovaque yuvireco. Sapi pare, opa ahe cuachiar repri vinose yuvireco. Ahe sepi cincuenta mil tupri ari mboraviqui repri. ²⁰ Ëgüe ehi Tüpa op̄ratasa pipe ombouvicha oñehengagüer iyavei iñehese p̄ratasa oyecua catu ava rese.

²¹ Ipare Pablo ipihañemoñeta Jerusalén ve oso ãgua ivi Macedonia, Acaya rupi. “Coiye catu aheve che reco viteseve, ichuive che asora Roma ve” ehi. ²² Evocoyase omondo ñuvirio op̄tiviisar Timoteo, Erasto Macedonia ve güenonera. Ahe rumo opita vitemi Asia rupi oico.

Ava Efeso pendar yaivu guasu yuvireco

²³ Ahe ari pipe Efeso pendar yaivu guasu yuvireco co tecocuer ipiasu vahe rese. ²⁴ Aheve mbia Demetrio serer vahe secoi. Ahe oyapo Artemisa r̄eta rahanga guarepochi apopri guarepochi pisi ãgua. Ambuae ava mbahe rahanga aposar oipisi tupri avei oporaviqui repri ipiri yuvireco. ²⁵ Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaiyu guasu uca ãgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe. ²⁶ “Peicua avei Pablo opa ovirova ava eta piha Artemisa mboeteisa sui ‘ndahei Tüpa ité’ ohesa pipe yande rembiapo uve. Ndahei rumo cohapeño Ëgüe ehi, opacatu Asia rupi Ëgüe ehi avei imombehu.

²⁷ Aviyeteramo mbahe tēi oimera yandeu yande poraviquisa mocañi tēi āgua, tūparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroñora yande rembiapo catuprisa yuvireco” ehi.

²⁸ Osenduse aipo ihe ava yuvireco, oñemoirosa pipe virosapucái aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaivu guasu tēi. Osapucái vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave. ³⁰ Pablo oique pota tēi ava rehii pãhuve, ambuae Jesús reroyasar rumo nomoingue uca potai yuvireco. ³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuha guasuve” ehi avei yuvireco chupe. ³² Ñemonuhasave amove ava osapucái pĩrata ñepe mbahe rese, amove osapucái ambuae mbahe rese. Esepia, yaivu tēi yuvireco. “¿Mahera vo evocoyase yañemonuha?” ehi tēi setá ipãhu pendar yuvireco. ³³ Amove rumo ava rehii pãhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu āgua ava rehii rovaque yuvireco. Alejandro evocoyase omopuha tēi opo ava monguiriri āgua viña. Osepi pota omu judío ava rehii rovaque viña. ³⁴ Ava rehii rumo oicuase Alejandro judío secose yuvireco. Opacatu guasu osapucái pĩrata yuvireco. “¡Imboeteipri catu Artemisa yande recua pendar tasecoi!” ehi pucu-pucu yuvireco. Ēgüe ehi ahe osapucái ñuvirío hora rupi rutei yuvireco.

³⁵ Evocoyase tecua pipendar mbahe cuachiasar oicatusave ava monguiriri āgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tūparo rese yande hañecosa iyavei sahanga iva sui oviapi vahe rese avei hañecosa. ³⁶ Ndipoi niha ava, ‘Aní’ ehi vakerã che remimombehu rese. Sese peyemonguiririño, peyapoi rene mbahe pe yapisacañisave. ³⁷ Peruño tēi eté co ñuvirío mbia cohava, ndoyapoi rumo mbahe tēi Artemisa upe yuvireco. Nimondai mbahe rese itūparove, ndoviroñroi avei serer yuvireco. ³⁸ Sese Demetrio iyavei oporaviqui vahe supi ahe oñemoirose que ava upe, toyuviraso rane ava recocuer moingatusar upe yuvireco; aheve tomoin-gatu güecocuer yuvireco. ³⁹ Pemoingatu potase que ambuae mbahe, peso ranera yemomborandusave imoingatu āgua. ⁴⁰ Mborerecuar revo oyandura yande rembiapo co pipe, ‘¿Mahera peaivu guasu tēi? ¿Che amotarēmbave tie ēgüe peye?’ ehi tiētera yandeu. Oporanduse yandeu, ndayaicatui chitiētera imboyei āgua iñehe chupe. Esepia niha, co yañemonuha yande remimbotar tēi cohava” ehi chupe. ⁴¹ Aipo ihe pare, omomba aheve oñemonuha yuvireco.

Pablo guata agüer Macedonia, Grecia rupi

20 Ava aivu guasu pare, Pablo, “Toyugüeru” ehi ava Jesús reroyasar upe. Aheve omboaracua ahe ava. Chupe, “Aviye” ohe pare, oso Macedonia ve. ² Oguatase Macedonia rupi, omonguerēhi-rēhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso. ³ Aheve opita mbosapi yasi. Oso potase Siria ve carite pipe, judío ipihañemoñeta mara sereco āgua rese yuvireco. Oyanduse, carite pipe oso rāgüer sui, oyevi iri oso Macedonia ve ivi rupi. ⁴ Yuviraso moviro mbia supi, ipãhuve ñepe Berea pendar, Pirro rahir Sópater; ñuvirío Tesalónica pendar, Aristarco, Segundo; ñepe Derbe pendar, Gayo; ñuvirío Asia pendar, Tíquico, Trófimo. Timoteo oso avei supi. ⁵ Evocoi mbia yuviraso Pablo renondeve sãro āgua Troas ve. ⁶ Pieta pan ndayapepoi vahe hu pare, orosē tecua Filipo sui carite pipe, cinco arí rupi oroyepota Troas ve. Ahe tecuave oropita siete arí rupi.

Pablo Troas ve secoi

⁷ Domingu pipe, ore oroñemonuha pan hu āgua. Aheve Pablo oporombohe oico pĩtu mbiter rupi. Esepia, ahe osē pota ahere ayihive voi ichui. ⁸ Ahe oi ivate vahesave ñemonuha pipe setá tataendi. ⁹ Mbia chñivahe, Eutico serer vahe, metanave uguapi oĩ. Pablo rumo oñehe pucú iteanga. Evocoyase omboopesii ahe chñivahe. Ipare oqué; aviyeteramo tēi oviapi oi ivate vahe mbosapisa sui. Aheve ava ogüeyi sehögüer rupi ivi sui yuvireco. ¹⁰ Evocoyase Pablo ogüeyi ou chupe, oñeno oso sese icuhaguã. Ipare aipo ehi Jesús reroyasar upe:

—Pesiquiyei rene; nomanoi moco —ehi.

¹¹ Ipare oyeupi iri oso ombohi pan igua. Ichui oñehe pucu vite. Omomba cõhe senise; ipare oso cute. ¹² Evocoyase co mbia chñivahe viroyevise secosave, opacatu oyemboviha guasu catu yuvireco. Esepia, nomanoi eté.

Pablo yuviraso Troas sui Mileto ve

¹³ Pablo oso pota ivi rupi, ore ranengatu rumo oroso carite pipe Aso ve. Aheve oroyepota Pablo reraso āgua semimbotar rupi. ¹⁴ Oroyoepiase aheve, oha carite pipe ore pĩri. Ichui oroso cute Mitilene ve. ¹⁵ Ahere ayihive carite pipe oroñocua Quío oroso. Ambuae arí rese oroyepota Samos ve. Ichui oroso no oroyepota Mileto ve. ¹⁶ Pablo ipoyava. Esepia, oipota Jerusalén ve Pentecostés pieta pipe tupri güeco āgua. Sese Efeso oroñacuasaño oroso.

Pablo ñehesa Jesús reroyasar rãrosareta Efeso pendar upe

¹⁷ Mileto ve ore recose, Pablo omondo oñehe Efeso ve ‘toyugüeru Jesús reroyasar rãrosar cheu’ oya.

¹⁸ Oyepotase yuvireco chupe, aipo ehi: “Peicua niha che recocuer aviye ité yipisuive arí che reique ramosa

resendar co Asia ve. ¹⁹ Ari yacatu rupi aporaviqui yande Yar upe pe pãhuve vichico che reco asiẽhisave che yasehosa pipe. Yepe judío che mboguai etepri che recoãhasave pe recuave yuvireco viña, ²⁰ che rumo ndaicutui ñehesa aviye vahe mombehuẽhi pẽu mbahe aviye ãgua yepi. Che opombohe ava rehii rovaque, opombohe avei ñepepe-pe pe rẽta rupi yepi” ehi.

²¹ “Amombehu ñehesa judío upe, ava ndahei vahe judío upe avei aipo ahe: ‘Pemboasi pe angaipa; peyevi Tũpa upe, peroya avei yande Yar Jesús’ ahe” ehi.

²² “Cũritei asora Jerusalén ve vichico. Aheve che so ãgua Espiritu che cuai che piha pipe. ‘¿Mara ehira piha yuvireco peve cheu?’ aipo ahe. ²³ Co güeraño che aicua: opacatu tecua che sosa rupi Espiritu Santo aipo ehi cheu che roquenda ãgua iyavei che mombaraisu ãgua yuvireco yepi” ehi. ²⁴ “Ndacherecatẽhii rumo cheyese che mano ãgua. Che rumo amboaviye potaño itẽ che poraviquisa Tũpa upe, ahe yande Yar Jesucristo che cuai vahe co ñehesa icatupri vahe mombehu ãgua. Co Tũpa oporoaisusa pipe ombou ñepepe vahe Guahir ava pãsiro ãgua” ehi.

²⁵ “Opa niha Tũpa mborerecuasa amombehu pẽu. Che rumo aicua ndache repia iri chira peye. ²⁶ Sese tapeicua cũritei: ndayavii etẽ che cuaita mboaviye ãgua co tecocuer aviye vahe mombehu pipe pẽu. ²⁷ Esepia, ndaicuacui etẽ Tũpa Ñehengagüer mombehu; che rumo amombehuño itẽ opacatu Tũpa recocuer pẽu. ²⁸ Sese peñearo tupri, pesãro avei opacatu Jesús reroyasar Espiritu Santo porocuaita rupi. Inungar ovesa rãrosar, ãgüe peye tupri sãro. Ahe Tũpa remimboepi yuvirecoi. Esepia, Jesús oipiyere vuvi opacatu ava angaipa repirã. ²⁹ Aicua che opoeyare, oyugüerura ambuae ava mahembiar oñaro ai vahe nungar pe pãhuve opacatu Jesús reroyasar mocañipa pota ãgua. ³⁰ Oime aveira que ava pe pãhu pendar pe mbopa pota aveira yuvireco pe reraso ãgua oyeupi. ³¹ Sese pemahemoha tupri peyese. Pemahenduha acoi opomboaracua tuprise mbosapi araviter rupi, pãtu, ari yacatu rupi avei che yasehosa pipe pe rereco” ehi.

³² “Sese, che rivireta, opoeyara Tũpa povrive iyavei iñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pẽu opacatu ambuae güembiporavo reseve. ³³ Ndahei pe guarepochi, que oro iyavei pe turucuar pota raisa pipe aso pe pãhuve. ³⁴ Peicua niha acoi che po pipe itẽ aporaviqui che recove ãgua, che rupindar recove ãgua avei. ³⁵ ãgüe ahe amboyecua che recocuer pẽu. Supi avei ãgüe peyera; yaporaviqui tupri iparaisu vahe rese hañeco ãgua. Pepihañemoñeta acoi yande Yar Jesús remimombehu rese: ‘Sorivete catu ava iporereco vahe, mbahe oipisi vahe sui’ ehi aracahe” ehi Efeso pendar Jesús reroyasar rãrosar upe.

³⁶ Oñhehe pare, oñenopiha oyerure ãgua opacatu omboripar reseve. ³⁷ Ndoyembovĩhai etẽ, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tẽi avei yuvireco saisupave. Ipare yuvirasoño itẽ yuvireco supi carite yemboyasave.

Pablo so agüer Jerusalén ve

21 Evocoyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. ² Aheve orosepia carite oso vaheerã Fenicia ve, ahe ipipe oroha, oroso. ³ Orosasase para guasu oroso, orosepia caha pãhu guasu Chipre serer vahe. Ahe oroñocua yande mbahe rese pocoẽhisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya ãgua. ⁴ Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: “Espiritu Santo oñhehe oreu. Evocoyase eresoi rene Jerusalén ve” ehi yuvireco chupe viña, ⁵ siete ari pare rumo, orosoño itẽ para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopihapa ore yerure ãgua. ⁶ “Aviye, toroso rane” ore he pare chupe yuvireco, oroha carite pipe. Ahe evocoyase oyevi yuviraso güetave.

⁷ Tiro sui oroso Tolemaida ve. Oroyepotase, oroso Jesús reroyasar repia ãgua. Aheve oropita ñepepe ari. ⁸ Ahere ayihive oroso Cesarea ve. Aheve oroique, oropita Felipe rẽta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pãhuve. ⁹ Evocoi Felipe vireco irungatu guayri ndomendai vahe. Tayri Tũpa ñehhe mombehugar pãve yuvirecoi. ¹⁰ Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tũpa ñehhe mombehugar secoi. ¹¹ Ouse ore pãhuve, vırocua Pablo rumbicuausa ichui. Ipipe oñapichi opi, opo avei. Ahese aipo ehi oreu:

—Espiritu Santo oicua uca cheu, na ehira judío Jerusalén pendar co tumbicuausa yar ãpichi yuvireco iyavei omondora ava ndahei vahe judío upe —ehi Agabo imombehu oreu.

¹² Orosenduse aipo ihe, ore, evocoi Cesarea pendar avei, oromombehu Pablo upe: “Eresoi rene Jerusalén ve” orohe tẽi chupe. ¹³ Omboyevi rumo oreu:

—¡Mahera peyaseho che rese, ndache mbovĩhai peye! Che rumo ayemoingatu voi che ãpichi uca ãgua, che mano ãgua rese avei Jerusalén ve yande Yar Jesús recocuer rese —ehi oreu.

¹⁴ Ndroicatuise ipihañemoñetasa rerova ãgua, oropoiño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoingatu ore so ãgua Jerusalén ve. ¹⁶ Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rõtave. Ahe ore moingue oyepiri. Ahe yipive itẽ viroya yande Yar oico.

Pablo ombori Santiago

¹⁷ Oroyepotase Jerusalén ve, ahe pendar Jesús reroyasar nihapisi ore pisi yuvireco. ¹⁸ Ahere ayihive Pablo,

ore avei oroso Santiago repia. Aheve yuvirecove avei opacatu Jesús reroyasar rārosar Jerusalén pendar. ¹⁹ Pablo, “Avirave” ehi opacatu oñemonuha vahe upe. Ipape omombehu tupri yipisuive oyeupe Tūpa mbahe oyapo uca vahe ava ndahei vahe judío pāhu rupi.

²⁰ Osenduse, omboetei guasu Tūpa yuvireco.

Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute.

Opacatu evocoi ava iquerēhi vahe Moisés porocuita aracahendar mboaviye āgua yuvireco —ehi—. ²¹ Osendu tēi nde rembiapo yuvireco. Omombehu tēi avei aipo nde he yande mu ambuae tecua rupindar yuvirecoi vahe upe: “Peseya Moisés porocuita. Pembocircuncida iri rene pe rahir. Peico iri rene yande recocuer aracahendar pipe’ aipo ehi tēi oico” ehi nde mombehu yuvireco —ehi Pablo upe yuvireco—.

²² ¿Mara yahera vo? Esepia, oyandura nde yepotasa cohava yuvireco.

²³ Aviye catu ereyapora ore porocuita oromombehu vahe ndeu. Oime irungatu mbia ore pāhuve. Ahe mbia omboaviyera gūemimombehu Tūpa upe yuvireco.

²⁴ Eraso co mbia ndeyepi, eñemoatiro supi eso, emboepi avei mbahe Tūpa upe icuavēhepri. Ahe ahe mbia oicatura oñeapi yuvireco. Eremboaviyese evocoi mborocuita, opacatu judío nde reroyara, oicua va semira tēise mbahe nde rembiapo rese yuvireco.

Oicua aveira, nde ereroya vite Moisés suindar mborocuita —ehi yuvireco chupe—. ²⁵ Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe:

“Pehui rene mbahe mimba yucapri mbahe rahanga tēi upendar seropovēhepri, pehui rene mbahe ruvi, pehui rene mbahe mimba yucapri suvi renosepirēhi vahe iyavei peaguasai rene” orohe chupe —ehi yuvireco.

Judío oipisi Pablo tūparo guasu pipe yuvireco

²⁶ Evocoyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipape yuviroique judío tūparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatiro. Ahe oromondo pota ndeu porerecosa Tūpa porocuita rupi icuavēhepri” ehi yuvireco pahi upe.

²⁷ Opa potase evocoi siete ari, judío Asia pendar osepia Pablo tūparo pipe yuvireco. Ahe omoñemoiro uca opacatu ava rehii tūparo pendar. Ipape ipisise, ²⁸ sāse yuvireco: “¡Ore mu, ore pītivii peye co mbia oroipisi vahe rese! Esepia, uguata opacatu rupi. Oñehe tēi yande rese, Moisés porocuita rese, yande tūparo rese avei iyavei viroique ava ndahei vahe judío yande tūparo pipe. Sese omonguiha tēi yande tūparo maranehi” ehi yuvireco chupe.

²⁹ Co rese aipo ehi. Esepia, cuese osepia Pablo viroguatase Trófimo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tūparo pipe’ oya yuvireco viña.

³⁰ Opacatu Jerusalén pendar ndasorii yuvireco.

Cūrteimi ava yuvinoña guasu tūparove. Oipisi Pablo ombotiriri senose tūparo pipe sui yuvireco. Ahe omboya voi guaquicuei tūparo roquenda yuvireco. ³¹ Oyuca potase yuvireco, ahe yaivu rēracua oyepota sundao rerecuar guasu upe. ³² Cūrteimi serecuar viraso sundao, yuvinoña yaivu vahe upe yuviraso. Osepiase ava sundao rerecuar guasu, isundao avei yuvireco, ndoyuvirocua iri Pablo rese yuvireco. ³³ Ahe ahe sundao rerecuar guasu oyemboya oso Pablo rese, oipisi uca. Ipape oyocuai osundao, “Tapeicuhacua ñuvirío carena pipe” ehi. Evocoyase oporandu ava upe: “¿Ava vo co mbia? ¿Mbahe vo oyapo pēu?” ehi judío eta upe.

³⁴ Ahe amove ava ñepei mbahe rese oñehe, ambuae, ambuae mbahe rese tēi yuvireco. Evocoyase sundao rerecuar ndoicatu supi eté vahe mbahe reudu āgua yaivu guasu vahe pāhuve. Sese, “Peraso cuartelve” ehi.

³⁵ Viroyepotase yeupisave, ichui osupi sundao oachihive seraso yuvireco ava rehii ñemoiró iteangasa sui.

³⁶ Ava rehii rumo yuvirasoño ité saquicuei, “¡Tomanol!” ehi pucu-pucu yuvireco chupe.

Pablo oyoepi ava rehii rovaque

³⁷ Omoingue potase Pablo cuartel pipe yuvireco, aipo ehi sundao rerecuar guasu upe:

—¿Iyacatu vo yañemoñeta raimi? —ehi.

Evocoyase, omboeyvi mborerecuar chupe:

—¿Ereicua vo griego ñehe? —ehi—. ³⁸ ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe pāve cuatro mil tupri ivi iporupirēhisa rupi —ehi sundao rerecuar chupe.

³⁹ Evocoyase,

—Che judío, tecua Tarso pendar aico. Ahe tecua Cilicia pipendar imboetepri vahe secoi. Eyapomi mbahe icatupri vahe cheu, tañehemi rane catu ava upe —ehi.

⁴⁰ Evocoyase mborerecuar, “Aviye” ehi chupe. Ipape opūha yeupisa harive, omopuha opo ava eta monguiriri āgua. Ahe oyapisaca tupri ava rehii yuvireco. Ahe ava upe oñehe hebreo ñehe pipe aipo ehi:

22 “Che mu eta, peyapisaca, che añehemira che yoepi āgua pēu cūrteit” ehi.

² Oñehe hebreo ñehe pipe. Sese osenduse, oyapisaca tupri catu yuvireco.

³ “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerquisave. Aheve ayembohe tupri yande ramoi porocuita rese. Ahe che mbohesa pipe avei ayembohe Tūpa mboetei āgua rese vichico inungar pe peico cūrteit. ⁴ Che yipindar aseca-seca catu ava co Tecocuer Piasu rupi uguata vahe yamotarēhisave. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco.

⁵ Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vahe rā yande mu tūparo rerecuar Damasco pendar upe, ‘Taso Damasco ve pahi rerecuar

rer pipe ava Jesús reroyasar pisi água. Ichui tarupa co-have imombaraisu água' ahe viña.

Pablo omombehu oñecuñaro agüer

⁶“Evocoyase aso Damasco ve. Ahe ipiar rupi arovisé vicho mbiter arí rupi, aviyeteramo tēi osesape guasu íva sui oreu. ⁷Ahese aviapi ívive. Asendu avei ñehesa: ‘Saulo, Saulo, ¿mahera vo che amotarēhi etepri eve?’ ehi vahe cheu. ⁸Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarēhi etepri che rereco eve’ ehi cheu. ⁹Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco. ¹⁰Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epūha, eso Damasco ve. Aheve ava opara omombehu mbahe nde rembiaporā’ ehi cheu. ¹¹Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

¹²“Aheve mbia, Ananías serer vahe, ou cheu. Ahe Tūpa mboyeroyasar ité, víroya tupri vahe avei iporocuai-ta; sese opacatu judío secua pendar: ‘Co mbia aviye vahe ité’ ehi yuvireco chupe. ¹³Oyepotase, aipo ehi: ‘Che rívrí, Saulo, esareco iri’ ehi. Aheseve iporēhi iri mbahe cheu. ¹⁴Ipare aipo ehi: ‘Yande ramoi rembieroya, yande Ru Tūpa, nde poravo güemimbotar cua água. Oipota avei eresepia vaherā ichuindar ava seco řvi vahe, eresendu aveira iñehe’ ehi. ¹⁵‘Nde evocoyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu. ¹⁶‘Evocoyase, cūritei ndiya iri eresāro’ ehi. ‘Epūha, toroāpiramo. Eporandu yande Yar upe nde reco moatiro água nde angaipa sui’ ehi Ananías cheu.

“Tūpa che mondo ava ndahei vahe judío upe” ehi Pablo

¹⁷“Coíye catu, ayeví irise Jerusalén ve, ayerure tūparo guasu pipe. Ahese che quer nungarve asepia mbahe. ¹⁸Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che re-sendar’ ehi Jesús cheu. ¹⁹Che aipo ahe chupe: ‘Che Yar, opacatu che cua nde reroyasar roquenda-quendase, ainupa-nupa ucase avei aguatase judío tūparo yacatu rupi’ ahe. ²⁰Aipo ahe avei chupe: ‘Oyucase Esteban yuvireco, ahe nde recocuer mombehúsar, che ahese asepia. Chepíhañemoñeta rupi aviyeño oyucase yuvireco. Sese asāro yucasar yeaosa vihā’ ahe chupe. ²¹Che Yar rumo omboyeví cheu: ‘Eso, oromondora coi rupi ava ndahei vahe judío pāhuve’ ehi che Yar cheu” ehi Pablo ava rehii upe.

Pablo sundao rerecuar guasu povrive secoi

²²Aipo rupi osendu iñehe yuvireco. Ahese rumo osapucái pírata yuvireco chupe: “¡Tomano co mbia! ¡Tóicove vite iri eme co ívi pipe!” ehi yuvireco chupe. ²³Osapuca-pucaí, osequiipa oyeaosa oñemoñombave yu-

vireco iyavei omombo-mombo ívi cuhi ívate coti yuvireco yamotarēhimbave. ²⁴Ahese sundao rerecuar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sāsē atí yamotarēhimbave ava yuvireco chupe” ehi osundao upe. ²⁵Oñapichise rumo inupa água yuvireco, Pablo omombehu ñepeí sundao rerecuar upe:

—Yepe che judío, che rumo romano avei aico. ¿Iyacatu pīha peinupara romano chupe mbahe rese poranduñehiseve? —ehi mborerecuar upe.

²⁶Osenduse iñehe, oso voi omombehu güerecuar upe.

—Eicua catu, aipo mbia romano secoi —ehi.

²⁷Evocoyase sundao rerecuar guasu ou chupe:

—¿Supí eté vo aipo nde romano ereico? —ehi.

—Taa, ahe ité niha aico —ehi.

²⁸Ahese sundao rerecuar guasu aipo ehi chupe:

—Che rumo setá guarepochi amondo romano che reco água —ehi.

—Che rumo che ha ramo suive, romano aico —ehiño sundao rerecuar upe.

²⁹Ahese oinupa pota vahe osiquiyepave oyepépi yuvireco ichui; sundao rerecuar guasu avei oicucase Pablo romano secosa rese, osiquiye ñapichí ucase.

Pablo oyoepí judío porandusa ívate catu vahesave

³⁰Ahere ayihive sundao rerecuar guasu oicua tupri pota: ¿Mbahe sui pīha judío oyamotarēhi Pablo yuvireco? Evocoyase oyora. Ahese oyocuai porandusa pendar ívate catu vahe ahe opacatu judío pahí rerecuar, opacatu ambuae judío rerecuar iñemonuha água yuvireco. Ahese oviraso uca Pablo yuvireco chupe.

23 Aheve Pablo omahengatu ava oñemonuha vahe rese ohā aipo ehi chupe:

—Che mu, che rembiapo mbahe tupri Tūpa rovaque areco yepi che píhañemoñeta tuprisa pipe —ehi.

²Ahese Ananías, ahe pahí rerecuar ívate catu vahe, yipí pendar uve, “Peiyurupete” ehi. ³Ahese Pablo omboyeví chupe:

—¡Tūpa nde nupara, nde aviye tupri tēi angahu vahe ereico! Nde mbahe rese porandu água cheu porocuai-ta rupi ereí. Evocoyase, ¿mahera ereporocuai che yurupete água mborocuai mboyeroaēhisa pipe? —ehi chupe.

⁴Yivirindar aipo ehi yuvireco chupe:

—¡Ereñehe raí rute seroñrosa pipe co Tūpa rembiporavo, co yande pahí rerecuar ívate catu vahe upe! —ehi yuvireco.

⁵Ahese omboyeví chupe:

—Che mu, ndaicuai co oñehe vahe pahí rerecuar ívate catu vahe secose. Esepia, icuachiapri pipe aipo ehi yandeu: ‘Peñehe raí eme pe rerecuar upe’ ehi —ehi.

⁶Ahese oicucase oñemonuha vahe pāhuve amove oime saduceo, amove fariseo. Ahese oñehe pírata chupe:

—Che mu, che fariseo aico iyavei fariseo che yesupa yuvirecoí. Orovíroya avei ava ocuerayeví vaherā curi.

Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo oñeñehep-oepe-epi yuvireco. Sese oyemboyaho yuvireco. ⁸ Esepia, saduceo ndoviroyai vahe cuerayevisa iyavei “ndipoi Tūpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco.

⁹ Sese sãse guasu yuvireco. Ahese oime amove opūha vahe Moisés porocuita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tūpa rembiguai revo oyemboyecua mbahe mombehu āgua chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pāhu sui, pemoingue iri cuartel pipe” ehi.

¹¹ Ahe pītu pipe, yande Yar oyemboyecua chupe aipo ehi: “Eyemonguerēhi catu, Pablo, inungar che mombehu nde siquiyeēhisa pipe cohove Jerusalén ve, ēgüe ere aveira che mombehu Roma ve” ehi.

Omboguai Pablo yuca āgua yuvireco

¹² Ahere ayihive setá judío oñemonuha, omboguai Pablo yuca āgua yuvireco: “Tūpa rovaque ndayayucaise Pablo, ndayacarui chira, ndayaihui chiaveira; yayucase voi, yacarura, yaihura” ehi yuvireco. ¹³ Ahe ava aipo ehi vahe retacuer setá catu cuarenta sui.

¹⁴ Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tūpa rovaque Pablo; ndorocarui chira ndoroyucaise —ehi yuvireco chupe—. ¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sēracua, oso cuartelve chupe imombehu. ¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chīhivahe sundao rerecuar guasu upe. Omombehu pota mbahe chupe —ehi.

¹⁸ Evocoyase mborerecuar viraso ahe chīhivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chīhivahe sundao rerecuar guasu upe” ehi. Co chīhivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepipi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri āgua ñemonuhasa ivate catu vahesave ayihive yuvireco. “Oporandu pota iri Pablo upe sembiapo rese” aipo ehi tēira yuvireco ndeu —ehi—. ²¹ Ndereroyai chira ahe iporandusa yuvireco. Esepia, cuarenta sui setá catu ava oquētiro

vaherā yuvireco sese. Omboguai eté yuca āgua yuvireco. Ndocarui, ndoihui chira aipo ndoyucaise yuvireco. Cūritei oyemoingatu, osāro viteño nde porocuita yuvireco —ehi mbia chīhivahe chupe.

²² Ipare sundao rerecuar guasu omboyevi imondo, aipo ehi chupe: “Eremombehu rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirío opovri pendar sundao rerecuar upe aipo ehi yocuai: “Pemoingatu dosciento sundao Cesarea ve yuviraso vaherā opi rese, ambuae setenta sundao cavayu harive iyavei doscientos tupri toguata lanza resendar yuvireco. Ipare pesopara pītuse las nueve pipe” ehi. ²⁴ “Pemoingatu uca avei cavayu Pablo yeupi āgua. Ēgüe peye pesāro tuprira seraso yande rerecuar Félix upe” ehi. ²⁵ Evocoyase sundao rerecuar guasu oicuachía Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu. ²⁷ Iyavei co amombehu pota ndeu: judío oipisi co mbia yuvireco yuca āgua viña. Che rumo aicua romano seco rese, ahese araso sundao sepi āgua judío eta sui ²⁸ ‘¿mbahe rese pīha ndoyambotai yuvireco?’ viya. Sese araso judío porandusa ivate catu vahe pendar upe iñemonuhasave yuvireco. ²⁹ Ahese aicua yamotarēhisa judío porocuita sui tēi iyavei ndoyapoi mbahe tēi oreu. Sese ndiyai yuca āgua oreu, soquenda āgua avei. ³⁰ Ayanduse rumo judío oquētiro sese yuvireco, amondo voi evocoi mbia ndeu. Ipare amombehu yamotarēhisar upe: ‘Peoporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoyase ahe pītu pipe sundao viroguata Pablo ocuaita rupi yuvireco, viraso Antípatris ve yuvireco. ³² Ahere ayihive sundao yuviraso vahe opi rese oyevi yugüeru cuartelve. Sundao cavayu ari pendar güeraño rumo yuvirasoño vite. ³³ Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe. ³⁴ Oyeroqui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

³⁵ —Oyepotase nde amotarēhisar yuvireco, asendura nde yoepisa —ehi Félix chupe.

Evocoyase oyocuai opītiviisar Pablo rāro āgua güetave Herodes rembiapogüer pipe.

Pablo oyoepi mborerecuar Félix rovai

24 Cinco ari pare, Ananías, ahe pahi rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar pītiviisar oñehe vaherā Pablo amotarēhi uca āgua, ahe serer Tértulo. Ahe yugüeru Pablo recocuer mombehu āgua mborerecuar Félix upe. ² Evocoyase Félix güeru

uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Aviye ndeu nde porocuai tupri rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe. ³ Opacatu rupi nde ereyapo tupri vahe oroipti. Sese, “Aviye ndeu” orohe ndeu, imboyeroyapri Félix. ⁴ Ndoromombita pucu potai rumo che ñehe pipe. Sese eyapisaca raimi tēi catu che ñehe rese —ehi—. ⁵ Oroyandu co mbia ava mañeco tēisar uguata opacatu ivi rupi. Ore judío, ore mboyaho ore yeamotarēhi uca āgua, ahe Jesús, Nazaret pendar, reroyasar rerecuar —ehi—. ⁶ Viroique avei ava ndahei vahe judío ore tūparo pipe. Ēgüe ehi ore tūparo m-mara. Sese co oroipti —ehi—. ⁷ Evocoi sundao rerecuar guasu Lisias rumo oyepota ore pāhuve. Ahe opīratasa pipe vīnose ore po sui, ⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo ēgüe orohe chupe —ehi Tértulo.

⁹ Aipo ehi tupri avei ambuae judío yugūeru vahe yuvireco supi. ¹⁰ Ipare Félix oyaiti Pablo upe ‘toñehe’ oya-pave. Ahese oñehe:

—Aicua nde ereporocuai setá araviter ore recua rupi. Sese ayoepira nde rovaque che rorivetsa pipe —ehi Félix upe—. ¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei āgua. ¹² Co judío oicua yuvireco nañehengatai ava upe tūparo guasu pipe, namboaivu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—. ¹³ Co mbia ndoicatui eté mbahe che rembiavi mombehu seroya tupri āgua yuvireco ndeu. ¹⁴ Co rumo amombehu vahe ndeu: che amboetei Tūpa, ore ramoi rem-bieroya Tecocuer Piasu pīhañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuita pipendar iyavei Tūpa ñehe mombehusar rembicuachiaguer avei —ehi—. ¹⁵ Inungar co mbia, ēgüe ahe tupri avei aicua Tūpa ombogūerayevira ava omano vahecuer seco aviye vahe, ndaseco pōrai vahe avei coiyē. ¹⁶ Sese ayemoviracua tupri che pīhañemoñetasa rereco tupri catu āgua yepi Tūpa rovaque, ava rovaque avei.

¹⁷ “Setá araviter pare ayevi che recua Jerusalén ve ava iparaisu vahe upe porerecosa mondo āgua. Ahese avei mbahe mīmba ayuca uca Tūpa upe seropovēhe āgua.

¹⁸ Evocoyase moviro judío Asia pendar che repia yuvireco Jerusalén ve tūparo pipe judío porocuita rupi che ñemoatiro pare. Ndipoi ahese ava rehi che rupi, namboaivu guasu ucai avei ava. Ahe che repia vahe rumo iya yugūeru ndeu che mombehu, que virecose che amotarēhisa yuvireco viña. ²⁰ Anise, aviyeteramo co oyepota vahe cohava yugūeru, omombehura ndeu que mbahe che rembiavi yuvireco pahi rerecuar guasu ñemonuhasave che reiquesendar” ehi. ²¹ “Co rese revo oñemoiro yuvireco cheu aipo ahe pīratase ipāhuve: ‘Che aroya ava ocuerayevira coiyē. Sese che reraso pe

rovai co pipe che recoāha āgua yuvireco’ ahese” ehi Félix upe.

²² Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

²³ Evocoyase oyocuai sundao rerecuar Pablo rāro āgua: “Eremodomira rumo que mbahe semimbotar apo āgua chupe iyavei imboripar yugūeruse, tīhañecoño yuvireco sese. Ēgüe ere sāro” ehi Félix sārosar upe.

²⁴ Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehe Jesucristo reroyasa resendar yuvireco.

²⁵ Pablo rumo omombehuse chupe teco īvisa resendar, teco ñearosa resendar avei iyavei aipo ehise: “Tūpa oporandura mbahe yande rembiapogūer rese yandeu ari cañise coiyē” ehise, ahese Félix os-iqūiyepave aipo ehi Pablo upe:

—Esoño rane. Arecose ari nde ñehe rendu iri āgua, orogūeru uca irira —ehiño.

²⁶ Félix ipīhañemoñeta yepi ‘Pablo revo omboura guarepochi cheu osē āgua’ oya viña. Sese osāro pucu tēi. Iyavei setá oyupagūer güeru uca oyeupe oñemoñeta āgua sese. ²⁷ Nuvirio araviter pare rumo, Porcio Festo oique Félix recuñara. Ahese Félix judío mboviha āgua, oseya Pablo soquendasave.

Festo rovai Pablo imondosa

25 Mbosapi ari oyepotare Festo osē Cesarea sui, oso Jerusalén ve. ² Aheve oyepotase, pahi rerecua-reta, judío rerecua-reta avei omombehu Pablo recocuer yuvireco chupe. ³ Ipare oporandu chupe: “Emboumi uca Pablo cohava oreu” ehi yuvireco ‘yayuca peri rupive’ oyapave yuvireco viña. ⁴ Festo rumo aipo ehi chupe: “Aní. Esepia, Pablo Cesarea ve soquendasa oico iyavei che ayevi pīavira vicho aheve” ehi.

⁵ —Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara āgua —ehi Festo chupe.

⁶ Evocoyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive uguapi güendave ava reco moingatu āgua oī. Ahese oyocuai Pablo reru āgua. ⁷ Oyepotase Pablo oso, ahese judío yugūeru vahe Festo rupi, oyemboya yuvireco sese. Ahese omombehu-mbehu tēi Festo upe Pablo rembiapo yuvireco, ndoicatui eté rumo seroya uca āgua yuvireco. ⁸ Esepia, Pablo aipo ehi oyoepisave:

—Ndayemboangaipai judío porocuita rese, judío tūparo rese, yande rerecuar guasu Roma pendar Cesar rese avei —ehi.

⁹ Festo rumo omboviha pota judío, sese oporandu Pablo upe:

—¿Ndequerēhi vo Jerusalén ve ereso vaheñā? Aheve co mbahe nde rembiapo rese aporandura ndeu —ehi chupe.

¹⁰ Ahe rumo omboyeve chupe:

—Cūrítei aico cohava romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tēi ayapo judío amotarēhisave —ehi—. ¹¹ Ayapose que mbahe naporai vahe, aviyeño che yuca uca āgua eve; ndayapose rumo co judío omombehu vahe yuvireco ndeu, ndiyai che mondo āgua evocoi ava povrive eve. Che rumo aso pota mborerecuar Cesar ivate catu vahe upe cheu mbahe rese porandu āgua —ehi.

¹² Ahese Festo oñemoñeta opřtiviisar oporom-boaracua vahe rese, ipare omombehu Pablo upe:

—Ereso pota Cesar upe. Aviye, eresora evocoiyase —ehi chupe.

Pablo mborerecuar Agripa rovai

¹³ Evocoiyase moviro arı pare, evocoi mborerecuar guasu Agripa, cuña Berenice rese, oyepota Cesarea ve “avirave” apo āgua Festo upe yuvireco. ¹⁴ Opitase yuvireco setá arı Cesarea ve, Festo omombehu Agripa upe Pablo recocuer. Aipo ehi chupe:

—Oime ñepeı mbia soquendapri oseya vahe Félix cheu —ehi—. ¹⁵ Arose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—. ¹⁶ Ahese aipo ahe yuvireco chupe: “Ndiyai eté romano mborerecuar omondo vaheñā que ava uve sese oñemoñeta vahe rese mbahe moingatuēhi renondeve. Toyopeı rane omombehusar rovai, tomombehu tupri rane opacatu güecocuer” ahe judío upe —ehi—. ¹⁷ Sese yugüeruse cohava yuvireco, oporandu voi pota secocuer rese chupe. Evocoiyase ñepeı arı pare aguapı che rendave porandusave. Ahese ayocuai che přtiviisar evocoi mbia reru āgua —ehi—.

¹⁸ Evocoiyase opūha sese oñemoñeta vahe sembiapo ai mombehu āgua. Asendu renondeve che piñañemoñeta: “Oyapo revo mbahe naporai vahe” ahe viña. Ndipoi eté rumo mbahe sembiapo —ehi—. ¹⁹ Mbahe sembieroya tēi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi. ²⁰ “¿Mara ahera piña co sembiapo moingatu?” ahe tēi. Sese aporandu chupe: “¿Ndequerēhi vo Jerusalén ve mbahe nde rembiapo rese porandu āgua ndeu?” ahe chupe —ehi—.

²¹ Pablo rumo oporandu cheu Cesar upe oso āgua. Oipota mborerecuar ivate catu vahe oyeupe mbahe güembiapo rese porandu āgua. Sese asoquenda ucaño vite sereco imondo āgua Cesar upe —ehi Agripa upe.

²² Evocoiyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³ Ahere ayihive, Agripa oyepota, Berenice rese yugüeru chupe inungar opivondi vahe, ēgüe ehi yuviroique mborerecuar ñemoñetasave sundao rerecuar iyavei opacatu tecua piendar ava seco ivate catu vahe

reseve. Ahese Festo oyocuai opřtiviisar Pablo reru āgua yuvireco, ²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohava Cesarea ve. Osapucaı pırata tēi yuvireco ‘tomanı ité evocoi!’ oya yuvireco cheu —ehi—.

²⁵ Ndayosui rumo mbahe sembiapo yuca uca āgua iyavei oporandu oso āgua mborerecuar ivate catu vahe Cesar upe. Sese che ayemoingatu ité imondo āgua chupe. ²⁶ Ndarecoı rumo mbahe naporai vahe aicuachía vaheñā imondo āgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirā sesendar Cesar upe nara —ehi—. ²⁷ Chepiñañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

Pablo omombehu güecocuer Agripa rovai

26 Evocoiyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe āgua aipo ehi:

² “Ore rerecuar Agripa, ayoeprı che rorivetesave judío che rese ñemoñeta-ñeta tēisa sui mbahe che rembiapoēhi rese nde rovai. ³ Esepia, ereicua tupri opacatu judío recocuer, ipiñañemoñetasa avei. Sese eyapisacami nde reco mbegüesa pipe che ñehe rese” ehi.

Pablo omombehura güecocuer oñecuñaro viteēhisendar

⁴ “Opacatu judío che cua vahe yuvireco, oicua tupri che recocuer che chıhivahe suive che recuave iyavei Jerusalén ve aicose yuvireco. ⁵ Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recuarupı’ ehira yuvireco viña. ⁶ Sese cūrítei che reru nde rovai yuvireco che recocuer rese nde porandu āgua. Esepia, aroya Tüpa remimombehugüer ore ramoı uve omombehu vahe aracahe” ehi. ⁷ “Doce ore ramoı suindar opacatu judío yuvirecoı, osāro vite evocoi Tüpa remimombehugüer aviye vahe yuvireco. Sese yuviroique tüparove arı, pıtu pipe avei Tüpa mboetei āgua yuvireco. Ore rerecuar Agripa, eyapisaca tupri che ñehe rese. Evocoi Tüpa remimombehugüer reroysa sui judío eta semira-mira tēi che amotarēhisave che rese yuvireco” ehi. ⁸ “Iyavei opacatu pe, ¿mahera pe avei ndaperoyai Tüpa porombogüerayevisa?” ehi.

Pablo omombehu yipindar Jesús reroysar amotarēhi agüer

⁹ “Yipindar che avei che piñañemoñeta rai aracaco mbahe tēi apo āgua rese ava Jesús, Nazaret pendar, rer amotarēhisave. ¹⁰ Ēgüe ahe Jerusalén ve. Ombouse pahi rerecuar oporocuita cheu, ahese serer pipe setá Jesús reroysar asoquenda; iyavei ambuae ava oyucase Jesús reroysar yuvireco, ‘Toyucaño yuvireco’ ahe

voiño ité che” ehi. ¹¹ “Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pipe tēi. Ēgüe ahe aguata opacatu tūparo rupi, ambuae tecua rupi avei yamotarēhisa pipe” ehi.

Pablo omombehu güeco recuñaro agüer

¹² “Evocoyase aso avei Damasco ve Jesús reroyasar mombaraisu āgua, pahi rerecuar ombouse oporocuai ta apo āgua cheu” ehi. ¹³ “Mbiter ari rupi rumo, aguatase Damasco piar rupi, asepia mbahe sendí vahe íva sui. Ari sui osesape catu cheu, che rupindar upe avei. ¹⁴ Orovipapase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evocoi mbahe tēi, nde ae ereyemombaraisu’ ehi cheu. ¹⁵ Evocoyase amboyevi: ‘¿Ava vo nde ereico, mbia?’ ahe chupe. Omboyevi cheu: ‘Che Jesús aico, che niha co che amotarēhi eve. ¹⁶ Epūha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaherā chupe curi, viya ndeu’ ehi. ¹⁷ ‘Oropīsirora judío sui iyavei oromondora ava ndahei vahe judío upe. Ereguatase ipāhuve, oropīsiro aveira’ ehi cheu. ¹⁸ ‘Oromondora, tache cua yuvireco, che yapave iyavei toguata iri eme pītumimbi vahe nungar rupi; toguata catu tesapesa rupi yuvireco. Ipípe sui toyuvireco iri eme carugar povrive yuvireco; toguata catu Tūpa rupi; ēgüe tehi che reroya yuvireco. Ahese oipisira ñeroisa oangaipa rese yuvireco iyavei oipisira Tūpa porerecosa oime vaherā opacatu che rembipeha rupive’ ehi Jesús cheu” ehi Agripa upe.

Pablo viroya mbahe güembiepia

¹⁹ “Evocoyase, che rerecuar Agripa, che quer nungarve asepia vahe íva pendar, aroya ité. ²⁰ Aipo ahe ava upe: ‘Pemboasi pe angaipa; peyevi Tūpa upe. Peicove tupri, ipípe sui toicua ava yuvireco pe ñecuñarosa’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe. ²¹ Sese tēi judío che pisi tūparo pipe che yuca pota yuvireco” ehi. ²² “Tūpa che pītiviisa pipe rumo aicoveño ité supi, amombehu-mbehu vite Tūpa recocuer opacatu ava seco ivi coti catu vahe upe, seco ivate catu vahe upe avei. Namombehui eté que mbahe co coti tēi Tūpa ñehe mombehusar iyavei Moisés, ‘Oimera mbahe aviye vahe’ ihe agüer sui. ²³ Aracahe omombehu yuvireco: ‘Tūpa Rembiporavo Poropīsirosar omano ranera’ ehi. Ahe rumo yipindar ocuerayevi vaherā omano vahe pāhu sui. Omombehu aveira tesapesa ñepisirosa resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

Pablo osecuñaro pota tēi Agripa recocuer

²⁴ Aipo ehise Pablo oñehe oyoepisave, Festo oñehengataño chupe aipo ehi:

—¡Nande mboaracuai moco nde mbahecua vaisa! —ehiño chupe.

²⁵ Ahe rumo omboyevi chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaēhisave —ehi Festo upe—. ²⁶ Co mborerecuar revo oicua tupri avei che remimombehu. Sese ndasiquiyei opacatu co mbahe mombehu āgua chupe. Esepia, opacatu co mbahe yaposa vahe ndahei ñomipri tēi. ²⁷ Ore rerecuar Agripa, ¿ereroya vo evocoi Tūpa ñehe mombehusar rembicuachía? Che aicua ereroya ité —ehi Agripa upe.

²⁸ Ahese Agripa omboyevi chupe:

—Moviro tēi ñehesa ipane cheu Jesús reroya āgua —ehi chupe.

²⁹ Ahe omboyevi Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ēgüe ehi tarahu Tūpa pēu viña che nungar pe reco āgua. Ndahei chira rumo soquendapirā peico —ehi.

³⁰ Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco. ³¹ Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirā; ndiyai avei soquendapirā viña —ehi yuvireco oyeupe.

³² Ahese Agripa aipo ehi:

—Ahe ndoporanduisse Cesar upe oso āgua rese, yamoseño itera niha viña —ehi Festo upe.

Pablo imondosa Roma ve

27 Evocoyase mborerecuar opihañemoñeta omboyoya yuvireco ore mondo āgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehii rerecuar secoi, ahe yuvirecoi vahe rer Mborerecuar upendar. ² Oroha carite pipe, ahe Adramitio sui yuviraso pota vahe Asia ve. Mbia Tesalónica pendar, Aristarco serer vahe, oha avei ore rupi, ahe secua Macedonia ivi rupi. ³ Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri āgua yuvireco” ehi chupe. ⁴ Sidón sui orosirise, oroso Chipre ivii rupi ivitu sui ore ñemoha āgua. Oroso pota tēi ari sosa coti rupi, ndoroicatui rumo. Esepia, oipeyu pīrata ivitu icoti sui. ⁵ Evocoyase oroguata para guasu pipe Cilicia, Panfilia ivii rupi. Ipare oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vaherā Italia ve. Evocoyase ahe ipípe opa voi ore mboha. ⁷ Ichui oroguata mbegüe setá ari. Oroporaviquí iteanga oroyepota āgua Gnido rovai. Ivitu oipeyu pīrata vite. Sese oroyahuva Creta coti, oroñocua tecua Salmón rovai rupi. Ēgüe orohe oroso Creta cupe rupi. ⁸ Supi yavai rai ore guata āgua, ipare

oroyepota yemboyasa Yemboyasa Aviye vahe serer va-hesave. Ahe ichui namombrii tecua Lasea.

⁹ Ore yepota āgua aheve, setá ari oromocañi. Aheve ivitu naporai catu oreu cute. Esepia, virovi ari naporai catu vahe. Sese Pablo aipo ehi carite pipendar upe:

¹⁰ —Mbia, naporai iri chira revo yande guata vite āgua. Yaguata vitesse, yamocañira carite, ivosiita re-seve, yande avei eté aviyeteramo yacañi tēira —ehi.

¹¹ Sundao rereciar rumo nomboyeroyai iñehe, ahe omboyeroya catu carite reroquataras, carite yar avei.

¹² Ahe yemboyasa naporai ivitu ai rāro āgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasāro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

Ivitu ai para guasu pipe

¹³ Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota āgua” ehi yuvireco viña. Aheve orosirise ore yemboyasa sui, oroso Creta ivi rupi. ¹⁴ Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti sui. ¹⁵ Oyepotase oreu, ndoroicatu iri eté sovaichi. Evocoyase, “Tayande rerasoño” orohe chupe. ¹⁶ Oroñocua caha pāhumi serer Cauda. Ahe oroñocuasave oroviroha sāi ore caritemi ore carite guasu pipe. ¹⁷ Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiētera ivi cuhi Sirte serer vahe harive’ oya. Sese opa viroyi imombitasa yuvireco. Aheve ivitu ore reroquataño. ¹⁸ Ivitu rumo ombohítu iteanga para guasu. Sese ahere ayihive oporaviqui vahe omboipi carite vosiita mombo yuvireco. ¹⁹ Imombosapisa ari pipe, omombo vite mbahe carite resendar yuvireco. ²⁰ Setá ari ndoyecuai ari, yasi-tata avei oreu. Ivitu ai ndopaiño ité avei. Opa ité ore pihañemoñeta mocañi, “Yacañi tēi etera para guasu pipe” orohe viña.

²¹ Setá ari ore caruēhi pare, Pablo opūha aipo ehi carite pipendar upe:

—Mbia, ehi acoi che reroya voira peye viña, nayasēise Creta sui, aheve ndipoi chira co mbahe yandeu cūritei viña —ehi—. ²² Cūritei, peyemonguerēhi catuño. Esepia, ndipoi chira yande pāhu pendar omano vahe, carite güeraño rumo ocañi tēira. ²³ Ayihi pisa oyemoporēhi cheu Tūpa rembiguai semimbou, chupendar che aico, chupe avei aporaviqui. ²⁴ Ahe aipo ehi cheu: “Pablo, eresiquiyei rene. Ereyepotaño itera Cesar upe. Tūpa oipisiro aveira opacatu nde rupindar carite pipendar” ehi cheu. ²⁵ Mbia, ayeroya Tūpa rese. Esepia, ahe omboaviye itera oñehesa cheu. Sese peyemonguerēhiño —ehi—. ²⁶ Yande mohañira rumo imbehi coti caha pāhumi rese yande mondo —ehi.

²⁷ Ñuvirío semana ivitu ore reroquata pare ahe pītu mbiter pipe para guasu Adriático rupi oroicose, carite pipe oporaviqui vahe ipihañemoñeta yuvireco ‘yarovi revo ivi yaico’ oya. ²⁸ Sese osāha para guasu ripigüer yuvireco. Ahe tipigüer treinta y seis metros tupri. Ipare

osiri irimi yuvireco. Aheve osāha iri, tipigüer veintisiete metros tēi. Aheve oicua, “Yarovi ivi” ehi yuvireco.

²⁹ Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tūpa yandeu viña!” orohe tēi. ³⁰ Oñemi potase oporaviqui vahe carite guasu sui yuvireco, viroyi caritemi mbahe-mohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco. ³¹ Pablo rumo aipo ehi sundao rereciar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

³² Aheve sundao eta oyasia caritemi sā oiti ive imondo yuvireco.

³³ Cōhe ramose Pablo aipo ehi opacatu upe:

—Cūritei ñuvirío semana pemomba pecaruēhi peico ‘¿mara yahera pīha co yaico?’ pe hesa pipe. ³⁴ Evocoyase pehuñomi mbahe cute pe ñepisiro āgua. Acoi ocañise carite, yande rumo nayacañi chira iyavei que ñepepe pe ha nocañi chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tūpa upe ihu āgua. Ahe imbohi pare, ohu. ³⁶ Evocoyase opacatu ava oyemonguerēhi yuvireco ocaru āgua. ³⁷ Ore retacuer doscientos setenta y seis tupri. ³⁸ Ore caru pare, oporaviqui vahe opa omombo trigo carite vosiita para guasu pipe iposiiēhi āgua yuvireco.

Carite ocañi

³⁹ Cōhese, osepiase ivi, “¿Que pīha yaico?” ehi tēi yuvireco. Oyosuse rumo yācua vahe, ipipe oime ivi cuhi ipiru vahe. Aheve yuviroique pota tēi yuvireco viña.

⁴⁰ Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoyase oroique oroso yācua vahe pipe. ⁴¹ Oroguatase rumo, oroyapi ivi cuhi. Aheve carite opāha ité sese. Ndoicatu eté seroyevi yuvireco iyavei carite rupita i ohitu vahe opa tupri oyoca.

⁴² Aheve sundao eta, “Aviyeteramo soquendapri ohita tiētera, oñemi yuvireco. Sese yayucapa” ehi yuvireco chupe viña. ⁴³ Sundao rereciar rumo ndoipotai Pablo mano āgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi. ⁴⁴ “Ambuae evocoyase ivirape, carite yecacuer rese toyasecoño yuvinose āgua ivi rese” ehi. Ēgüe orohe orosēpa ivi rese oroso.

Caha pāhu Malta ve Pablo secoi

28 Ore ñepisiropare, aheve ramo oroicua caha pāhu rer Malta revo rahe. ² Ahe pendar ava nihapisi ore repiase yuvireco. Oquí iteanga, sōhisa avei. Aheve oyatapí guasu yuvireco, “Perio, tapeyepemi” ehi yuvireco oreu. ³ Evocoyase Pablo omonuha yepaha seru, omondo potase rumo tatave, aheve osē aviyeteramo tēi sacucuer sui mboi ahe eté vahe

chupe, oipomama ichuhu. ⁴ Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tūpa rumo oichuhu uca mboi upe ‘tomano’ oya” ehi yuvireco viña.

⁵ Ahe rumo omomboño mboi tatave imondo oyesui. Ipare nomomaraño ité. ⁶ Ahe pendar opacatu osāro tēi yuvireco, “Trurura chupe, ahese oviapira, omanora revo” ehi yuvireco chupe viña. Osāro pucu tēi yuvireco, Pablo rumo nimaraño ité. Ahese, “Ndahei vo co mbia tūpa ité co secoi” ehi tēi yuvireco chupe.

⁷ Evocoyase mbia Publio serer vahe, ahe opacatu caha pāhu Malta pendar ava rereciar secoi. Iivi namombriimi ichui. Ahe nihapisii ore repia güētave iyavei ihañeco tupri ai ore rese mbosapi ari rupi. ⁸ Aheve ore receseve Publio yesupa sohí iteanga ou, sepochiuví avei. Evocoyase Pablo oique chupe. Ahese oyoerouqí Tūpa upe sese, omondo opo iharive. Ēgüe ehi imbogüera. ⁹ Oyanduse ahe icuera yuvireco, ahese ambuae imbaheasi vahe evocoi caha pāhu pendar yugüeru chupe, ahe ombogüerapa avei. ¹⁰ Ahe pendar oyemboava etepri yuvireco oreu. Ipare ore ha āgua ambuae carite pipe, opacatu mbahe ore guatasa rupi ipaneñhi āgua ogüeru yuvireco oreu.

Pablo oyepota Roma ve

¹¹ Co carite mbosapi yasi osāro vahe ari mbahe tēi vahe pituhu āgua. Ipipe oroso. Ahe carite yugüeru Alejandría sui. Ahe ichí rese ñuvirío itūpa rahanga yuvireco: ñepei rer Cástor, ambuae evocoyase Pólux. ¹² Ahese oroso oroyepota yemboyasa Siracusa ve. Aheve oropita mbosapi ari. ¹³ Ichui orosē oroso oroyepota Regio ve. Ahere ayihive ivitu oipeyu irohí coti sui. Sese oroyepota Puteoli ve ambuae ari pipeve. ¹⁴ Aheve orosepia ambuae Jesús reroyasar. Ore mombita güētave yuvireco ñepei semana. Ipare oroso Roma ve ivi rupi. ¹⁵ Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda āgua yuvireco. Sepiase, Pablo, “Aviye ndeu” ehi Tūpa upe. ¹⁶ Oroyepotase Roma ve, sundao rereciar co coti omondo Pablo ñepei sundao upe sāro uca āgua.

Pablo omombehu Roma ve Tūpa Ñhengagüer

¹⁷ Mbosapi ari pare Pablo omonuha opacatu judío rereciar Roma pendar. Ahese oñehe chupe:

—Che mu eta, ndayapoi mbahe tēi judío Jerusalén pendar upe, naroñroi avei yande ramoí recocuer viña. Che roquendasa rumo iyavei imondopri aico Romano sundao rereciar povrive. ¹⁸ Ahe mborereciar oporandu che recocuer rese yuvireco. Oicuase che recocuer, opoi pota tēi che sui yuvireco viña. Esepia, ndoyosui eté mbahe che rembiapo che yuca āgua yuvireco.

¹⁹ Evocoi judío rumo ndoipotaiño ité chupe. Ahese ayu pota cohove Cesar upe che yoepi āgua. Nayamotarēhi uca potai rumo che mu Jerusalén pendar Cesar upe —ehi—. ²⁰ Che yoepi āgua oposoho uca. Opomofeta pota yande remiaro rese. Co Tūpa Rembiporavo ava pñisiro āgua resendar reroyasa rese carena pipe ñapichimbri aico —ehi.

²¹ Ahese ahe ava omboyevi yuvireco chupe:

—Ndroipisii eté cuachiar Judea sui nde resendar. Iyavei yande mu oyepota vahe Judea sui nomombehu mbahe naporai vahe nde recocuer resendar yuvireco oreu —ehi—. ²² Opacatu rupi ava viroñro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

²³ Oiporavo ari iñehe āgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tūpa mborerecuasa resendar iyavei Jesús recocuer Moisés porocuita icuachiapri pipe sui iyavei Tūpa ñehe mombehusar rembicuachía pipe avei ‘toviroya yuvireco’ oyapave. Ēgüe ehi imombehu ari momba. ²⁴ Amove osendu vahe viroya yuvireco, ambuae rumo ndoviroyai eté yuvireco. ²⁵ Opihañemoñetasa nomboyoyaise yuvireco, yuvínosepa pota. Ahese aipo ehi ahe ava upe:

—Supi eté Isaías omombehu Espíritu remimombehu pe recocuer resendar pe ramoí upe aracahe aipo ehi:

²⁶ “Eso nde mu pāhuve.

Emombehu aipo ere:

“Yepe pesendu tēira mbahe viña,

ndapesenducuai chira rumo.

Iyavei pesepia tēira mbahe viña,

ndapemahecuaí chira rumo sese’ ere chupe.

²⁷ Esepia, co ava ipiharátá iteanga seroyaēhisave.

Ndoyemboapisaiño yuvireco.

Iyavei osapñvii tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe.

Evocoyase ndoyevi potai cheu güecocuer moingatu yuvireco” ehi Espíritu Santo

remimombehu chupe aracahe —ehi—. ²⁸ Sese tapeicua co pipe suive Tūpa omboyecua ucara oporopñisirova ava ndahei vahe judío upe. Ahe niha oyapisacara imombehusa rese yuvireco —ehi chupe.

²⁹ Aipo ihe pare, judío yuvínose iñehe rese oyecopí-copí yuviraso.

³⁰ Ipare Pablo opita ambuae ava rētave ñuvirío araviter rupi omboepi oque āgua oico. Aheve nihapisii opacatu ava rese oyepiri oyepotase yepi. ³¹ Omombehu Tūpa mborerecuasa resendar iyavei oporombohe opacatu yande Yar Jesucristo recocuer resendar osiquiyeñhisa pipe. Ndipoi eté que ava omombituhu vahe Pablo ñehese.

ROMANOS

Pablo mahenduhasa Roma pendar Jesús reroyasar upe

1 Che Pablo, Jesucristo rembiguai, aicuachía co che ñehe pëu. Tüpa che poravo apóstol che reco água ñehesa poropñisirosa resendar mombehu água.

² Tüpa niha yipisuive omombehu uca co ñehesa ava oñehe mombehusar upe icuachiapri maranehi pipe aracahe. ³ Ahe ñehesa Tüpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui; ⁴ ocuerayevise oespíritu maranehi pipe, ahese opíratasa pipe omboyecua tupri ité Tüpa Rahir güecosa. Ahe niha yande Yar Jesucristo.

⁵ Ahe ichui Tüpa ombou cheu oporopñiviisa apóstol che reco água, che cuai avei ava ndahei vahe judío upe Guahir recocuer mombehu água opacatu ivi rupi sese yeroya uca água 'ipipe sui toviroya che Rahir yuvireco' oya. ⁶ Pe Roma pendar peico vahe, pe avei senoipri ipãhuve peico Jesucristo rese peico vahe. Pe niha Tüpa rembiaisu peico. Oipota avei pe reco catupri água oyeupe nara. Peipisi catu porovasasa, teco tuprisa yande Ru Tüpa suindar, yande Yar Jesucristo suindar avei.

Pablo oso pota Jesús reroyasar repia Roma ve

⁸ Che yipindar yande Yar Jesucristo rer pipe, "Aviye ndeu" ahe Tüpa upe pe rese. Esepia, opacatu ivi rupi icuapri sese pe yeroyasa. ⁹ Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico. ¹⁰ Aporanduño ité semimbotar rupi pe piri che so água rese chupe yepi. ¹¹ Esepia, che aso pota ité Espiritu suindar mbahecua mundo pëu pe pñivi água 'toyemoviracua tupri catu Cristo rese yuvireco' che yapave. ¹² Che aipota ité yande ñepeipei yañepñivi catu água Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tēisa pe piri yepi. Cūrítei rumo ndaicutuño vite ité. Che rumo aipota, "Toime que che poraviquisa sui Cristo rese oyemoviracua catu vahe yuvireco ipãhuve" ahe pëu, inungar opacatu ambuae ivi rupi égüe ahe ava ndahei vahe judío upe vichico. ¹⁴ Che cuaita ité niha opacatu ava upe che ñehe água, tecua pipendar yuvirecoi vahe upe iyavei ndayaracua vitei vahe upe, imbahecua vahe upe, nimbahecua vahe upe avei no.

¹⁵ Sese pe Roma ve peico vahe upe avei

ayemonguerēhi voi eté co ñehesa pñisirosa resendar mombehu água.

Ñehesa pñisirosa resendar pñratasa

¹⁶ Che nachí eté co ñehesa pñisirosa resendar aviye vahe sui. Esepia, ahe Tüpa pñratasa opacatu viroyasar pñsiro água, judío rane yipindar, ipare opacatu ambuae ava-ava tēi avei. ¹⁷ Supi eté co ñehesa omboyecua Tüpa ava reco mbocatuprisa. Oyese yande yeroyasa pipeño ité égüe ehi yandeu. Esepia, icuachiapri arachendar aipo ehi: "Acoi ava seco catupri vahe Tüpa rese oyeroyasa pipe sui oicoveño itera apñrēhi" ehi.

Opacatu ava rembiavi resendar

¹⁸ Supi eté niha yande Aposar oñemoirosa ipñrata vahe ombou itera iva sui opacatu ava viroyasarēhi upe, ndaseco pñrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco. ¹⁹ Ahe oicua tupri tēi mbahe Tüpa suindar yuvireco. Esepia, Tüpa ité niha omboyecua chupe. ²⁰ Égüe ehi eté Tüpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tüpa ité secoi iyavei ipñratasa apñrēhi vahe. Sese ava angaipa viyar ndiyai, "Eñemosañño tēi rane oreu" ehi vahe yuvireco chupe. ²¹ Esepia, yepe ahe oicua tēi Tüpa yuvireco viña, nomboetei rumo Tüpa secosa rese. "Aviye ndeu" ndehi avei yuvireco chupe. Iyavei ipñhañemoñeta mbahe égüe ehi tēi vahe rese. Ipipe sui mbahe ndosenducua catu iri eté yuvireco. ²² Yepe, "Ore mbahecua vai" ehi tēi viña, ndoicuai eté rumo mbahe ipipe yuvireco. ²³ Esepia, ahe Tüpa nomanoi vahe seco porañete vahe mboetei rāgüer sui, omboetei ava ocañi tēi vahe rahanga yuvireco iyavei vñrai, opacatu mbahe mimba, mboi tēi avei omboetei yuvireco.

²⁴ Sese Tüpa, "Toyapoño ité mbahe güemimbotarai yuvireco" ehi chupe. Ichui oyapo ité mbahe poromochisa guasu oyeupe oyemboeteiēhisa pipe yuvireco. ²⁵ Esepia, mbahe supi vahe reroya rāgüer sui temira tēi viroya catu yuvireco. Iyavei Tüpa ité mboyeroya rāgüer sui omboetei catu mbahe sembiapocuer tēi yuvireco. Yaposar ité ru timboeteisa catu yepi.

²⁶ Sese Tüpa opoi eté ichui, "Toyapoño poromochisa mbahe tēi güemimbotarai pipe yuvireco" ehi chupe. Evocoyase cuña avei cuimbahe rese güeco rāgüer sui yuvirecoi oyese ae. ²⁷ Cuimbahe avei cuña rese güeco rāgüer sui yuvirecoiño avei oyese ae iyavei oipota

raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

²⁸ Iyavei, "Tüpa supi eté vahe" ndehise seroyaëhisa pipe yuvireco, Tüpa evocoyase opoi eté ichui 'toy- apoño ayase mbahe ndipotasai vahe güeco raisa pipe yuvireco' oya chupe. ²⁹ Ahe evocoyase yuvirecoi opacatu mbahe-mbahe tēi pipe; oyemboaguasa-guasa tēi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tēi ava upe. Ahe oñemoiro ambuae ava mbahe pota raisave tēi, opo- rapichi, ivava serai, iporombopa serai, ipihañemoñeta ava reco momara ägua tēi iyavei imahechiroi ai ipipe yuvireco. ³⁰ Iyavei ambuae ava cupe cotive mara ehi- ehi tēi vahe, ahe Tüpa amotarëhisar yuvirecoi, viroïro avei ava, oyemboivate ai, oyecomboivate ai tēi avei oñehe pipe yepi, oseca-seca tēi mbahe naporai vahe güembiaporã, nomboyeroyai avei oyesupa yuvireco, ³¹ ndoyapisaca potai eté Tüpa suindar ñehesa rese, nombaviyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvire- co. ³² Oicua tēi Tüpa "oimera evocoi nungar aposar upe cañisa" ehi vahe, oyapo viteño rumo mbahe tēi yuvire- co iyavei ambuae ava oyapose mbahe tēi, ovihareteño sepiase yuvireco.

Tüpa omondo ava upe sembiapogüer rupi tupri ité

2 Oimese que pe pãhu pendar 'co oyapo mbahe tēi; tocañi' ohesave ambuae upe, ahese ahe ae oye- mocañi tēi uca. Esepia, ahe inungar tupri avei. ² Yaicua rumo Tüpa omocañise evocoi nungar mbahe tēi aposar recocuer, ahe evocoyase oyapo mbahe supi tupri vahe. ³ Pe opase ava recocuer pesenoi, pe avei rumo ëgüe peye tupri peico. Pe avei eté evocoyase ndapeñemi chietera Tüpa ñemoïrosa sui. ⁴ ¿Peroïro tie Tüpa oyapo vitesse mbahe aviye vahe oñemosase, seco mbegüe tupri ai vitesse avei pëu? 'Tosecuñaro güe- cocuer yuvireco' oyapave rumo ëgüe ehi pëu. ⁵ Pe ru- mo pepiharãta viteño ité Tüpa upe pe yevi potaëhi ägua. Sese pereco catu viteño ité Tüpa ñemoïrosa peyese, acoi ari oyepotase Tüpa güeco tuprisa pipe yande renoipara yande mocañi ägua, anise yande pësiro ägua curi. ⁶ Ahese opara omboepi ñepeipei yande rembiapogüer rupi yandeu. ⁷ Omboura tecovesa apirëhi vahe yandeu yasecase teco ori, Tüpa suindar poromboeteisa iyavei mbahe apirëhi vahe yande mbahe tupri aposa pipe. ⁸ Ombou aveira oñe- moïrosa ava ndiporomboyeroyai vahe upe, ahe acoi co ñehesa supi eté vahe reroya rãgüer sui viroya vahe mbahe tēi. ⁹ Judío opacatu mbahe-mbahe tēi aposar ranengatu oiporarara mbahe rasicuer yuvireco, ipar- era ndahei vahe avei judío. ¹⁰ Tüpa rumo opacatu seco catupri vahe upe omondora imboetei ägua 'toipisi teco ori iyavei toyuvirecoi mbahe tupri pipe' oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tüpa ndayande mboyoaviratii yande rere- co. ¹² Ègüe ehi eté, opacatu oyemboangaipa vahe Moisés porocuita porëhi oyemocañi tēira yuvireco.

Acoi oyemboangaipa vahe Moisés porocuita rereco pipe yuvireco, ahe porocuita pipe avei opara ocañi tēi porandusave yuvireco coie. ¹³ Esepia, osenduño tēi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri va- he yuvirecoi. ¹⁴ Supi eté acoi ndahei vahe judío yuvire- coi vahe yepe ndovirecoi co porocuita yuvireco viña, ahe rumo co porocuita rupi tupri oyapose mbahe, ahe evocoyase inungar porocuita vireco vahe yuvire- co. ¹⁵ Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyese. Ahe ipipe avei oyandu mbahe güembiavi, ichui avei oyemonguerëhi mbahe aviye vahe apose. ¹⁶ Ahe ari cañi pipe Tüpa oy- ocuai ucara opacatu ava rembiapo cuaëhisa repri pisi ägua Jesucristo upe, co ñehesa pësirosa resendar amombehu vahecuer rupi tupri ëgüe ehira curi.

Ñehesa judío resendar, Moisés porocuita resendar avei

¹⁷ Pe rumo, "Judío aico" peye vahe, peyeroya opacatu Moisés porocuita mboaviyese pipe pe reco catupri ägua Tüpa rovaque viña. Iyavei ipipe peyecomboivate ai Tüpa rese peicose. ¹⁸ Peicua semimbotar. Ahe porocuita pe mbohe avei mbahe aviye catu vahe po- ravo ägua. ¹⁹ Pe, "Aicatu ité ndasesapisoi vahe nungar ava ndayaracuai vahe mboaracua iyavei ava angaipa viyar pëtumimbi vahe nungarsave tēi resape ägua" peye tēi. ²⁰ "Aicatu avei ava mbahe ndosenducuai vahe mboaracua iyavei ava chihivahemi nungar mbohe ägua. Esepia, areco co mborocuita vireco vahe opacatu mbahecuaa iyavei mbahe supi tupri vahe ité" peye tēi avei. ²¹ Pe pembohe vahe ambuae ava, ¿ma- hera ru ndapeyembohe pe ae? Pe pemombehu vahe ambuae ava mondaëhi ägua, ¿mahera ru pe ae avei pemonda no? ²² Pe, "Ndiyai pe aguada" peye; pe teieté avei rumo ëgüe peye. Ndapesepia potai eté mbahe ra- hanga; pe avei rumo opa peñomi mbahe sepi vahe itü- paro pipe sui. ²³ Peyecomboivate ai co mborocuita rerecosa rese; ndapemboetei rumo Tüpa ipipe ahe mborocuita mboaviyeehi pipe. ²⁴ Supi eté icuachiapri arachendar pipe aipo ehi: "Pe sui tēi ava ndoicuai va- he Tüpa iñehe-ñehe tēi serer maranehi rese yuvireco" ehi.

²⁵ Supi eté co tecocuer cuacua circuncisión resendar ahe aviye angara pëu, peroya tupri itese Moisés porocuita viña. Ndaperoya tupriise rumo, pe evo- coiyase inungar ndapeyembocircuncidai vahe peico. ²⁶ Acoi ava ndoyembocircuncidai vahe, ahe rumo viroy- ase porocuita, ahe seroyapri inungar imbocircunci- dapri yuvirecoi. ²⁷ Acoi ndoyembocircuncidai vahe, oy- apose rumo mborocuita yuvireco, ahe evocoyase omombehura pe cañi ägua yuvireco. Esepia, yepe pereco Tüpa porocuita viña, pe rumo ndapem- boaviyei eté. ²⁸ Judío supi eté vahe yaicose, ndahei yande yesupa judío recocuer rupi güeraño ëgüe ya- hera. Iyavei circuncisión supi eté vahe ndahei yande retocuer rese güeraño tēi avei no. ²⁹ Judío ete ité rumo

opihá pipe ité viroya Tūpa. Iyavei circuncisión supi eté vahe, Espiritu rembiapo yande piha pipe, ndahei porocuita icuachiapri rembiapo tēi. Evocoyase judío supi eté vahe oipisira omboeteisa Tūpa suindar ité, ndahei ava tēi suindar.

3 Evocoyase, ¿mbahe vo co aviye judío yande reco água? ¿Yande yembocircuncidasa piha aviyera? ² Supi eté. Esepia, yipindar Tūpa omondo oñehe judío eta upe imboaviye água. ³ Amove yepe ipāhu pendar nomboaviyeise ocuaita viña, ¿Tūpa avei tie ēgüe ehira? ⁴ ¡Aní eté! Tūpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri arachendar pipe aipo ehi:

“‘Supi tupri vahe Tūpa’ ehira nde ñehe rese yuvireco. Sese ereiquesse ava porandusave, eresē tupriñora eso ichui” ehi.

⁵ Yande reco rai pipe tēi yamboycuase Tūpa reco tuprisa, ¿mara yahera vo evocoyase? ¿“Tūpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tēi viña.) ⁶ ¡Aní eté! Esepia, Tūpa ndaheise supi tupri vahe viña, ndiyai chietera yande recocuer rese porandupa tupri água chupe viña.

⁷ Aviyeteramo oimera ava aipo ehi vahe: “Yande remira pipe sui tēi ava omboetei catuse Tūpa supi eté vahe, ¿mahera piha evocoyase angaipa viyar nungar yande rerecora viña?” ehi. ⁸ “Yayapora ayase mbahe naporai vahe mbahe tupri reime água” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoyase? ¿Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboycuase Tūpa rovaque opacatu angaipa viyar yaico que judío, que ndahei vahe judío avei. ¹⁰ Supi eté icuachiapri arachendar pipe aipo ehi:

“¡Ndipoi eté ava seco catupri vahe, que ñepe angara viña!

¹¹ Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

¹² Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepe angara viña!

¹³ Iñehesa mbahe tēi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

¹⁴ Ipipe oñehe rai opihavĩracuá iteangasa pipe yuvireco.

¹⁵ Ndayipitii oporapichi água yuvireco.

¹⁶ Setá ava omomara, omombaraisu avei oguatasa rupi yuvireco.

¹⁷ Iyavei ndoicuai eté güeco tupri água yuvireco.

¹⁸ Ndipihañemoñetai eté Tūpa sui osiquiye água yuvireco” ehi.

¹⁹ Yande niha opa yaicua opacatu co mbahe omombehu vahe mborocuita arachendar pipe, omombehu co porocuita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tūpa ñemoirosa pisi água yuvireco’ ohesave aipo ehi. ²⁰ Esepia, ndipoi chietera que ñepe seco aviye vahe Tūpa rovaque co porocuita mboaviye pipe. Ahe mborocuita rumo oicua uca yande angaipa viyar yande reco.

Cristo rese yande yeroya pipe Tūpa yande pñsirora

²¹ Cūrítei rumo Tūpa oicua uca yandeu ndahe iri mborocuita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehu pri secoi porocuita arachendar pipe, iñehe mombehusareta rembicuachiagüer pipe avei. ²³ Supi eté yande opacatu yayapo angaipa, ndayasupitii eté Tūpa reco porañetes. ²⁴ Ahe rumo oporoaisusa pipe, “Ereyavi mbahe che ñemoirosa pisi água” ndehei iri yandeu. Esepia, ahe yande pñsira uca Guahir Jesucristo upe. Yande rumo ndayamboepii eté yande raisusa chupe. ²⁵ Tūpa rumo ombou Guahir Cristo oipiyere vahe herã vuvi yande angaipa rese ñero água. Sese yande yeroya pipe oime ñeroisa yandeu. Ipipe omboycuase güeco ñvi tuprisa. Yipisuive rumo güeco asiñhisa pipe oñemosañe arachendar ava angaipa upe; cūrítei rumo omboycuase ité güeco ñvisa yandeu, seco ñviño ité seco catupri vahe yande rerecose Tahir rese yande yeroya pipe.

²⁷ ¡Evocoyase ndiyai eté yande yeecomboivate ai água sovaque! Esepia, ndahei porocuita mboaviye rese ēgüe ehi, ahe rumo Cristo rese yande yeroya pipe ēgüe ehi yandeu. ²⁸ Sese yaicua Tūpa, “Ereyavi mbahe che ñemoirosa pisi água” ndehei iri Cristo rese yande yeroyase yandeu, ndahei mborocuita mboaviyese sui tēi.

²⁹ ¡Tūpa niha opacatu ité ava Tūpa, ndahei ore judío oroico vahe Tūpa güeraño! ³⁰ ¡Supi eté ñepeño ité secoi: sese yayeroyase Cristo rese, oyoya guasuño ité, “Ereyavi mbahe che ñemoirosa pisi água” ndehei chira yandeu, yepera imboycuase pisi viña, anise que ndahei vahe imboycuase pisi viña no! ³¹ Ndahei rumo, “Ēgüe ehi tēi vahe” vahe evocoi mborocuita upe Jesucristo reroyasa pipe. Ipipe rumo yamboycuase evocoi mborocuita ēgüe ndehei tēi vahe.

Abraham recocuer sui yembohesa

4 Iyavei, ¿mara ehi piha yande ramoi Abraham recocuer aracahe? ² Acoi mbahe güembiapo pipe sui tēi oipisise güeco tupri água Tūpa sui, oyemboivate aira oico ipipe viña. Ndiyai eté rumo ēgüe ehi Tūpa

rovaque. ³ Esepia, icuachiapri aracahendar pipe aipo ehi: "Abraham oyeroya ité Tüpa rese. Sese Tüpa, 'Co seco catupri vahe' ehi chupe" ehi. ⁴ Co rumo yande yayapose mboraviqui, ahe yaipisi vahe ndahei porerecosa tēi, ahe rumo mboraviqui repri ité yaipisi. ⁵ Yande rumo, yayeroyase Tüpa rese, Tüpa evocoyase yande pisira, 'co seco catupri vahe' ohesave. Esepia, ahe ěgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña. ⁶ David mborerecuar aracahendar avei oñehe ava rorivetesa rese Tüpa seco catupri vahe nungar pisisa rese. Ahe rumo ndahei mbahe sembiapogüer rese tēi oipisi. ⁷ Ahe aipo ehi aracahe:

"¡Sorivete acoi ava Tüpa iñeroise yangaipa rese, iyavei ndoyemomahenduha irise yangaipa rese chupe!

⁸ ¡Sorivete avei ava, 'Nde angaipa viyar ereico' ndehi irise Tüpa chupe!" ehi.

⁹ Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tüpa, "Co seco catupri vahe secoi" ehi Abraham upe oyese iyeroyasa rese. ¹⁰ ¿Marase pñha oipisi oyeupe nara sereco? ¿Oyembocircuncida renondeve pñha, anise ipare tie? Yipive ité. ¹¹ "Toicua ava co seco catupri vahe che rese iyeroyase yuvireco" ehi Tüpa chupe. Sese imbocircuncidapri secoi. ěgüe ehi Abraham opacatu ava oyeroya vahe Tüpa rese, ndoyembocircuncidai vahe yesupa nungar secoi. ěgüe ehi Tüpa, "Co seco catupri vahe yuvirecoi" ehi avei ahe ava upe. ¹² Supi eté yande ramoi Abraham opacatu ava oyembocircuncida vahe, Tüpa rese oyeroya vahe yesupa avei secoi. Abraham rumo oyeroya vahe Tüpa rese ndoyembocircuncida viteiseve.

Tüpa remimombehu imboaviyesara sese yeroyasa pipe

¹³ Esepia, aracahe Tüpa aipo ehi Abraham upe, ichuindar upe avei: "Peipisira opacatu co ivi pe maha" ehi. Ndahei Moisés porocuita mboyeroa pipe ěgüe ehi chupe, oyese yeroyasa pipe sui eté rumo ahe oipisi 'co seco catupri vahe' ohesave. ¹⁴ Supi etese co mborocuita mboyeroasar güeraño oipisise co mbahe oime vaheřa chupe viña, evocoyase yande yeroyasa Tüpa rese ěgüe ehi tēi etera, Tüpa remimombehugüer evocoyase ěgüe ehi tēi vahe aveira viña no. ¹⁵ Esepia, co mborocuita mboaviyeħhisa pipe ñemořosa oime ava upe. Ndipoise rumo mborocuita, ndipoi chietera ahe porocuita mboyeroaħhisa.

¹⁶ Sese mbahe Tüpa remimombehugüer porerecosa yaipisira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuita mboyeroasar upe güeraño, ahe rumo opacatu yande Abraham nungar Tüpa rese oyeroya vahe upe nara. Evocoyase ahe opacatu yande ramoi secoi. ¹⁷ Icuachiapri aracahendar pipe aipo ehi: "Orombou ava eta ivi rupindar ramoira" ehi. Co Tüpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya ěgua viña, Abraham rumo oyeroya ité Tüpa oyeupe ñehesa rese; sese ava eta ivi rupindar ramoi eté secoi Tüpa ñehe: "Setá oimera ava nde suindar" ehi vahe rupi tupri ité. ¹⁹ Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco rese ve nañaroi eté guahĩ ěgua yuvireco viña. ²⁰ Ndopoi eté Tüpa oyeupe ñehesa reroyasa sui. Ahe rumo oyeroya catu ité sese iyavei omboetei eté. ²¹ "Supi eté Tüpa vireco opĩratasa opacatu oñehengagüer mboaviye ěgua" ehiño ité opiha pipe. ²² Sese Tüpa, "Co seco catupri vahe secoi" ehi iyeroyasa rese chupe.

²³ Co ñehesa ndahei Abraham upe güeraño. ²⁴ Yandeu avei niha. Esepia, "Co seco catupri vahe" ehi avei yandeu yayeroyase sese. Ahe niha acoi ombogüer avevi vahe yande Yar Jesús. ²⁵ Esepia, ahe imondopri secoi yande angaipa repira. Ipare Tüpa ombogüer avevi yande pisi ěgua seco catupri vahe nungar oyeupe.

Tüpa, "Peyavi mbahe" ndehi iri

5 Sese yaico mbahe tupri pipe Tüpa, "Peyavi mbahe" ndehi irise yandeu yande Yar Jesucristo rembiapo sui sese yande yeroyasa pipe. ² Esepia, Jesucristo sui niha yareco co Tüpa suindar porovasasa yayeroyase sese. Ipipe avei yayemoviracuaño ité yaico, yayemboviha avei. Esepia, yaicua Tüpa piri yande reco ěgua imborerecuasave. ³ Ndahei rumo sese güeraño yayemboviha, yande yemombaraisusa rese avei niha yayemboviha yaico. Esepia, yaicua ahe yande mbohe yande ñemosa ěgua, ⁴ iyavei yañemosañose, yasē tupri yande recoħhasa sui, ahese yaicua yaipisi vaheřa mbahe aviye vahe Tüpa suindar yepi. ⁵ Iyavei ahe yande remiaro nayamoha tēi chira sereco. Esepia, Tüpa ombou ité oporoaisusa yandeu oEspĩritu Santo yandeu ombou vahe pipe.

⁶ Yande ae ndayaicatui yande ñepisiro ěgua yande recocuera sui, Cristo rumo osupitise ari chupe, omano opacatu yande angaipa rese. ⁷ Aviyeteramo oimera que ñepepe ava omano vaheřa ambuae ava aviye vahe upe nara; yepe que ava recocuer supi eté aviye aira viña, seni rumo ndipoi eté que ava, "Che tamano sepira" ehi vaheřa chupe. ⁸ Yepe yande angaipa viyar yaico yipindar, Tüpa rumo omboyecua yande raisusa; ombou Cristo imano ěgua yande angaipa repira. ⁹ Ipipe sui cūritei, "Peyavi mbahe" ndehi iri chira. Sese nomboui chietera oñemořosa yandeu. ¹⁰ Esepia, yamotarēhimbar yaico viteise, ahe Guahĩr manosa pipe sui yande reroyevi iri oyeupe mbahe tupri pipe; ocueravevisa pipe evocoyase oicatu ité yande pĩsiro. ¹¹ Ndahei co reseño ěgüe yahera, yaviha catu aveira Tüpa rese, yande Yar Jesucristo rese avei. Ichui niha ndipo iri mbahe Tüpa rovaque yande rese.

Adán iyavei Cristo resendar ñehesa

¹² Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oy-

apo angaipa yuvireco. ¹³ Ndipo viteise Moisés porocuita, oime voi eté angaipa co ivi pipe. Yepe tie ndicuasa vitei angaipa porocuita ndipoise viña, ¹⁴ Adán reco sui tupri ité rumo ava omanoño ité oangaipa pipe yuvireco. Ēgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuita mboaviyeēhisa resendar rese viña. Ahe Adán rese omboyecua mbia ou vaheā.

¹⁵ Tūpa porerecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tūpa ombou oporerecosa poropīsīrosa yandeu. Ahe rumo aviye catu vahe ava eta upe nara. ¹⁶ Ahe ñepei ava angaipa rumo ndoyoyai eté Tūpa poropīsīrosa ombou vahe rese yandeu. Esepia, ñepei ava angaipa sui ou Tūpa ñemoirosa; oporerecosa rumo Tūpa ombouño ité ava eta mbahe oyavi atī vahe upe nara yangaipa mocañi āgua. ¹⁷ Supi eté ñepei ava angaipa sui oimeño ité manosa opacatu yandeu. Yande rumo yaipisi mbahe ipīrata catu vahe ichui, ahe Tūpa porovasasa tuvichá vahe ité iyavei iporerecosa, “Peyavi mbahe” iheēhisa resendar. Sese yareco ité tecovesa apirēhi vahe yandeyeupe nara ñepei ava sui, ahe Jesucristo.

¹⁸ Evocoyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiēhi āgua ‘tovireco tecovesa apirēhi yuvireco’ oya. ¹⁹ Esepia, ñepei ava Tūpa reroyaēhisa sui setá oime ava angaipa viyar; Ēgüe ehi aveira ñepei ava mboyeroyasa sui setá aveira ava vireco güeco catuprisa Tūpa rese yuvireco.

²⁰ Supi eté porocuita ouse aracahe, ahese angaipa yaposu catu ité. Yepe Ēgüe ehi viña, Tūpa porovasasa rumo ivate catu ité ichui. ²¹ Evocoyase inungar angaipa ipīrata yandeu yande mano āgua viña, Ēgüe ehi avei rumo Tūpa oporovasasa ipīrata vahe pipe yande pisi seco catupri vahe nungar yande rereco ‘toipisi tecovesa apirēhi vahe che Rahir Jesucristo rembiapo sui’ oya.

Angaipa upe omano vahe nungar yaico; Cristo rese yaicose rumo oicove vahe ité yaico

6 Evocoyase, ¿iya iri pīha yayapo vite angaipa yaico Tūpa yandeu oporovasasa mboyecua catu āgua? ² ¡Aní chietera! Esepia, yande niha senosepri angaipa sui. Evocoyase ndiya iri eté yayapo viteño angaipa yaico. ³ ¿Ndapeicuai vo pe yañeapiramose Jesucristo rer pipe, ndoyavi yamano vahe ité sese? ⁴ Yande ñeapiramose, aviye acoi ñotimbrī yaico Cristo rupive yande mbogüerayevi iri āgua iyavei yande recocuer mopiasu āgua avei, inungar acoi Cristo ocuerayevi Vu reco pīratasa pipe.

⁵ Yande omano vahe nungar yaicose supive, Ēgüe yahe aveira yande yacuerayevi supi. ⁶ Yaicua avei niha yipīndar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tēi nungar yande recoēhi āgua. ⁷ Esepia, acoi omano

vahe ndoyapo iri angaipa yuvireco. ⁸ Yande avei niha omano vahe nungar Cristo rese yaico. Evocoyase yayeroya avei yaicove vaheā sese. ⁹ Yande niha yaicua, Cristo ñepei reseve ocuerayevi, nomanu iri chietera. Esepia, manosa ndoicatu iri eté chupe. ¹⁰ Supi eté omanose Cristo, omano ñepei reseve opacatu angaipa mocañi āgua; cūrītei rumo oicove Tūpa upe nara. ¹¹ Ēgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

¹² Sese aní peico vite angaipa pīratasavrive pe cuai āgua pe remimbotarai mboyeroyasa pipe. ¹³ Aní peyemondo angaipa upe mbahe tēi apo āgua. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo āgua. ¹⁴ Evocoyase, pe angaipa ndape cuai iri chira pe rereco. Esepia, ndapeicoi Moisés porocuita pipe; pe rumo Tūpa porovasasa pipe peico.

Yembohesa mbiguai tēi recocuer sui

¹⁵ Ndayaico iri mborocuita pipe tēi, yaico rumo Tūpa porovasasa pipe. Evocoyase, ¿“Tayapo vite angaipa” yahera pīha? ¡Aní chietera! ¹⁶ Pe niha peicua que ava pemboyeroyase, ipovri pendar evocoyase peico. Pemboyeroyase Carugar angaipa apo āgua, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira. ¹⁷ Aviye Tūpa upe. Esepia, pe yipīndar mbiguai tēi nungar peico angaipa pipe viña, cūrītei rumo pemboyeroya pe pihave ité porombohesa peipisi vahe. ¹⁸ Ñepei reseve pe angaipa sui Tūpa pe renosese, pe evocoyase mbiguai nungar mbahe supi tupri vahe apo āgua peico. ¹⁹ (Che amboyoya tecocuer mbahe co ivi pipendar rese imombehu pēu. Esepia, yavai vite ité pēu co ñehesa renducua tupri āgua.) Yipīndar pe retocuer pereco mbahe tēi pipe mbahe naporai vahe apo āgua. Ēgüe peye rumo pe cūrītei pe reco mohivi āgua peico mbahe tupri pipe ñepei reseve Tūpa upe pe reco āgua.

²⁰ Pe peico vitesese mbiguai tēi nungar pe angaipa pipe, ahese ndapeyapo vitei mbahe supi tupri vahe; ²¹ cūrītei rumo pechī tēi ichui, ahe niha ndape pītivīi eté pe recocuer rese, iyavei pe reraso pota manosa apirēhi vahesave yepi. ²² Cūrītei rumo angaipa sui senosepri peico Tūpa povrive pe reco āgua. Ichui mbahe tupri oime pēu. Ahe niha ombou oyeupe nara ité pe reco tupri āgua. Ipipe sui peicora apirēhi vaheā. ²³ Angaipa niha ombou manosa tēi yandeu, Tūpa rumo oporerecosa ombou tecovesa apirēhi vahe yandeu yande Yar Jesucristo rese yande recose.

Mendasa sui yembohesa

7 Che rivireta, pe niha peicua tupri mborocuita, peicua avei ahe porocuita povriveño ité opacatu yaico yaicove vitesese co ivi pipe. ² Esepia, inungar cuña omenda vahe, imer oicove vitesese, iporocuitavrive viteño ité secoi yepi. Omanose rumo imer ichui, ahe

cuña ndahe iri omer porocuitavrive secoi. ³ Acoi cuña omer recove vitesese, virecose ambuae cuimbahe, oyemboaguasa tēi evocoyase; acoi omanose rumo imer ichui, ndaseco iri ipovrive. Ahe iyacatu ité omen-da yupagüe iri; ahese ndahei yaguasa tēi cute.

⁴ Che rivireta, pe niha ěgüe peye avei Cristo rese peico vahe; Cristo manosa sui ndahe iri Moisés porocuitavrive peico Cristo rese peico āgua. Ahe niha acoi ocuerayevi vahe. Sese yande recocuer ěgüe ndehi tēi vahe Tūpa upe. ⁵ Esepia, yande yaicove vitesese yande reco ai pipe, ahe porocuita renduse, yaipota catu mbahe tēi pipe yande reco āgua. Ipare rumo ahe manosave tēi yande reraso ucara viña. ⁶ Cūrítei rumo yande omano vahe nungar yaico acoi porocuita pipe yaico vahecuer sui. ěgüe yahe, yasē ichui Tūpa upe mbahe apo āgua Espiritu sui yande reco piasu pipe. Ndahe iri mborocuita icuachiapri yipindar vahe pipe yaico.

Angaipa oime vahe yande rese

⁷ ¿“Tūpa porocuita angaipa” yahera pīha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuita ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuita pipe, ahese ndaicuai chiaveira che mbahe pota raisa viña. ⁸ Aicuase mborocuita, ahese angaipa ipīrata catu cheu. Ahe mborocuita apo potaēhisa pipe che querēhi catu opacatu che remimbotarai tēi apo āgua. Esepia, mborocuita porēhi angaipa aviye ndipoi vahe viña. ⁹ Yipindar Tūpa porocuita ndaicua viteise, ndoyavii aviye vahe ité che reco areco viña. Porocuita aicuase rumo, aipota rai angaipa apo āgua. ¹⁰ Che evocoyase acañi tēi vaherā aico ipipe viña. Ahe porocuita che recove apirēhi āgua mbou rāgüer sui, che mondo ucaño itera manosa apirēhi vahe pipe tēi viña. ¹¹ Esepia, angaipa ahe porocuita pipe che mbopa ité. Ahe ipipe avei che mocañi tēira viña.

¹² Evocoyase co porocuita ndaseco marai vahe ité, supi tupri vahe ité, aviye vahe avei. ¹³ ¿Co porocuita aviye vahe pīha che rereco che mano āgua tēi? ¡Aní eté! Angaipa tēi rumo ěgüe ehi che rereco. Evocoyase co porocuita cuasa sui oipota catu uca mbahe tēi apo āgua cheu. Ipipe aicua angaipa oime vahe che rese. ěgüe ehi avei ahe porocuita omboyecua tupri ité angaipa mbahe tēi vahe yandeu.

¹⁴ Yaicua niha porocuita Tūpa suindar, che tēi rumo imondopri aico angaipa mboyeroa āgua. ¹⁵ Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarēhi rumo ayapo. ¹⁶ Che rumo ayapose mbahe ndayapo potai vahe, ahese aicua co porocuita aviye vahe. ¹⁷ Evocoyase ndahei cheyesui eté ěgüe ahe, angaipa tēi rumo ěgüe ehi che mbohe uca. ¹⁸ Esepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicutui eté rumo yapo. Iyavei yepe ndayapo potai mbahe tēi viña, che rumo ayapaoño ité. ²⁰ Sese

ayapo viteño itese mbahe ndayapo potai vahe, ndahei rumo che ité ayapo, che pīha pipe angaipa oime vahe, ahe tēi rumo oyapo uca cheu.

²¹ Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi. ²² Che pīha pipe rumo Tūpa porocuita aipotá iteanga tēi, ²³ che rumo aicua che pīha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbuguai nungar tēi che rereco.

²⁴ “¡Che paraisu ité!, ndaicutu iri eté, ¿uma pīha co mbahe tēi sui che renosera viña?” ahe cheyeupe vichico. ²⁵ Tūpaño ité oicatu Guahir Jesucristo rese. “Aviye” yande Ru Tūpa upe. ěgüe ehi ahese mbahe cheu; Tūpa porocuita amboaviye pota viña, che remimbotarai tēi rumo che rereco uca angaipa povrive.

Yaico vaherā Tūpa Espiritu rese

⁸ Cūrítei rumo ndipo iri Tūpa ñemoirosa yandeu Jesucristo rese yaicose. ² Esepia niha, Jesucristo rese yaicose, yande cuaisar Espiritu tecovesa mondosar yande renose angaipa povri sui, manosa sui avei. ³ Esepia, yande remimbotarai rese ndayaicutui Moisés porocuita mboyeroa āgua, ahe avei evocoyase ndoicutui eté yande reco moingatu. Tūpa rumo oicatuño ité. Esepia, Guahir ombou yande nungar tupri ité ‘toyemondo ava angaipa repirā’ oya. ěgüe ehi imocañi opacatu yande angaipa yande sui, yande remimbotarai avei. ⁴ Ahe ěgüe ehi yande yamboaviye vaherā mborocuita. Esepia, ndayaico iri yande remimbotar tēi pipe. Yaico rumo Espiritu aviye vahe rese.

⁵ Esepia, acoi yuvirecoi vahe rumo güemimbotar tēi pipe, güecocuerai reseño tēi ipihañemoñeta yuvireco; Espiritu rese yuvirecoi vahe rumo semimbotar rese ipihañemoñeta catu yuvireco. ⁶ Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tupri pipe yuvireco. ⁷ Esepia, acoi güecocuerai reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicutui Tūpa porocuita mboyeroa āgua yuvireco. ⁸ ěgüe ehi eté, acoi yuvirecoi vahe güemimbotarai pipe, ndoicutui eté Tūpa remimbotar apo āgua yuvireco.

⁹ Pe rumo ndapeico iri pe remimbotarai pipe. Peico rumo Tūpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar. ¹⁰ Cristo secoise rumo pe rese, yepe pe rete ocañi tēi vaherā angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu. ¹¹ Acoi Tūpa Espiritu secoise pe rese, Tūpa evocoyase omondora tecovesa piasu pe retecuer upe oEspiritu pe rese secoi vahe pīratasa pipe. Esepia niha, ipipe ité ombogüerayevi Guahir Jesucristo.

¹² Ēgüe ehi che rivireta, yareco yande cuaita, ndahei rumo yande remimbotarai pipe yande reco água. ¹³ Esepia, pe peicoño itese pe remimbotarai pipe, ahese pecañi tēira; pemombopase rumo Espiritu pipe peyesui, ahese peicovera apirēhi vaheerā.

¹⁴ Esepia, opacatu Tūpa Espiritu ombohe vahe, Tūpa rahir ité yuvirecoi. ¹⁵ Supi eté pe Espiritu peipisi vahe ndapembosiquiye uca iri pe rereco, ahe rumo pemoin-go Tūpa rahir ité pe reco água. Ahe avei, “¡Che Ru!” pe mbohe uca chupe. ¹⁶ Co Espiritu avei oicua uca yande espiritu upe Tūpa rahir yande recose. ¹⁷ Evocoiyase yaipisi aveira mbahe yande Ru Tūpa ombou vaheerā yandeu; ahe oyoya Cristo reseve yaipisira, Cristo paraisu agüer pipe ité yaicose yareco vaheerā teco porañetesa ipiri curi.

Teco porañetesa ou vaheerā curi

¹⁸ Cūrítei rumo yande paraisusa ndoyoyai eté teco porañetesa yande rese ou vaheerā rese. ¹⁹ Opacatu Tūpa rembiapocuer osāro vite ité opacatu oquerēhisa pipe, osepia pota ité teco porañete vahe tahir yuvirecoi vahe rese. ²⁰ Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ěgüe ehi, Tūpa ité, “Ēgüe tehi” ehi chupe, ombouse angaipa repri ava upe. Mbahe sembiapocuer rumo osāroño ité ²¹ güeco opa tēi vaheerā sui ñepisiro água teco porañete vahe Tūpa rahir vireco vahe rupiti água curi. ²² Yande niha yaicua aracahe suive opacatu mbahe Tūpa rembiapo oiporara mbaherasicuer yuvireco cuña imembi rasi vahe nungar. ²³ Ndahei rumo ahe güeraño ěgüe ehi yuvireco, yande avei ěgüe vahe. Yande yareco ité Espiritu, ahe yipindar vahe yaipisi vaheerā ichui curi. Yayemombaraisu, yasāro vite yande querēhisa pipe Tūpa guahir ité yande rereco água, yande retecuer recuñaro água avei. ²⁴ Esepia, yande niha yañepisiro ité yande remiaro reroya pipe; sese acoi yasepia vahe mbahe yande remiaro, nayasāro iri. Ndipoi ava osāro vite tēi vahe mbahe güembiepia.

²⁵ Acoi mbahe yande remiaro ndayasepia viteise rumo, yasāro vite yande ñemosasa pipe sereco.

²⁶ Ēgüe ehi avei Espiritu yande pñivii ndayaicatu irise. Esepia, ndayaicuai eté mara yahera yayeroqui, co Espiritu Santo rumo oporandu ité Tūpa upe yande rese oyemopoasesa pipe. ²⁷ Iyavei Tūpa, ahe oicua vahe opacatu yande pñañemoñetasa, oicuaño ité Espiritu mbahe omombehu pota vahe oyeupe. Esepia, Espiritu oporandu chupe semimbotar rupi yande seroyasar yaico vahe rese.

Yasecopipa itera mbahe tēi

²⁸ Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime água yande raisusave. ²⁹ Esepia, yipive Tūpa yande cua, yande poravo Guahir Jesucristo nungar ité yande reco água ‘ahe che Rahir tenonde catu vahe tasecoi opacatu ambuae che rahir sui’ oya. ³⁰ Iyavei Tūpa yipi-

suive ahe yuvirecoi vahe oiporavo. Chupe oñehe oyeupe nara seco água. Ipare, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara vahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco! ³² Tūpa niha ombou ité Guahir imano água opacatu yande rese. Sese yaicua ombou aveira opacatu mbahe yandeu yande pñivii água Tahir rese yande recose. ³³ Sese ndiyai eté ava upe, “Pecañi tēira, peyavi pe recocuer” ihe água yande iporavopri yaico vahe upe yuvireco. Esepia, Tūpa opa omocañi yande angaipa yande sui Cristo omanose sepirā, iyavei ocuerayevise. Cūrítei Cristo Vu acato coti, “Co cheundar ité yuvirecoi” ehi yande rese oyerure yepi. ³⁵ ¿Mbahe pñha yande mboyepepira Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tēisa, que tieporēhi, anise que yande turucuarā ndipoise, que mbahe tēise yandeu, yande yuca potase tie yuvireco? ³⁶ Inungar icuachiapri aracahendar pipe aipo ehi:

“Oyemoingatu voi ari rupi yande yuca água yuvireco ndeundar yaicose, ovesa yucapirā nungar tēi yande rereco yuvireco” ehi aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui. ³⁸ Sese che aroya ité Tūpa yande raisu viteño itera yepi yepe que yamanora, anise que mbahe oime vahe yandeu yande recove viteise. Ndayande mboyepepii chiaveira ichui que Tūpa rembiguai, que seco ivate vahe, seco pñrata vahe ndayasepia vahe, que cūrítei mbahe oime vahe yandeu, anise que mbahe oime vaheerā curi. ³⁹ ¡Ndayande mboyepepii chiaveira que iva pendar mbahe, anise que mbahe ivi pipendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

Tūpa oiporavo Israel oyeupe nara aracahe

9 Che Cristo reroyasar che reco pipe supi eté añehe, ndopombopai. Tūpa Espiritu oicua ité che pñañemoñetasa supi vahe. ² Ndayihai eté che pñha pipe; oime mbahe tasi vahe cheu yepi. ³ Che aipota tēi opacatu che mu judío ñepisiro água yuvireco viña. “Tacañi tēi Cristo porēhi icañi tēiēhi água yuvireco” ahera viña. ⁴ Ahe niha Israel suindar yuvirecoi, aracahe Tūpa oiporavo vahe guahirguā. Ahe ipāhuve avei secoi güendigüer porañetesa pipe, iyavei omondo ité oñehe güemimbotar, oporocuita avei chupe nara viña ‘tache mboetei oyeruresa pipe che rēlave yuvireco’ oya, iyavei, “Amboaviye itera che ñehe pe rese” ehi yuvireco chupe. ⁵ Ahe avei niha yande ramoi yipindar vahe suindar yuvirecoi, Tūpa Rembiporavo Poropñisrosar avei ahe ichuindar oyesu vahe. Ahe Poropñisrosar niha Tūpa ité, ivate catu vahe secoi opacatu sui. Sese, ¡timboeteisa catu yepi! ¡Ēgüe tehi apirēhi!

⁶ “Tūpa nomboaviyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe. ⁷ Iyavei ndahei opacatu Abraham suin-

dar tahir supri tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe. ⁸ Co rumo osenducua uca yandeu ndahei Abraham suindar yuvinose vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi. ⁹ Esepia, Tūpa Abraham upe aipo ehi aracahe: “Co ari rupi avei ayevíra curi, ahese oimera Sara membrí ndeu” ehi.

¹⁰ Ndahei rumo co reseño, tahir Isaac rese avei. Esepia, ocuacuase sembiroco Rebeca imembí cōi, ahe icōi vahe yesupa rumo ñepeño ité. ¹¹ Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yipindar oha vahe nde membrí ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaísu ité Jacob, Esaú rumo ayamotarēhi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

¹⁴ ¿Sese piha Tūpa upe, “Ndaseco tupri vahe” yahera? ¡Aní eté! ¹⁵ Esepia, acoi Moisés upe aipo ehi: “Aiparaisuerecora ava, asaísu aveira che remimbotar rupi” ehi. ¹⁶ Supi eté ndahei yande remimbotar rupi tēi, ndahei avei yande pīratasa rupi Tūpa oyapo mbahe; ahe rumo oporoparaisuerecosa pipe mbahe oyapo yandeu. ¹⁷ Supi eté Tūpa aipo ehi mborerecuar guasu Egipto pendar upe aracahe: “Che oromougue uca mborerecuar nde reco āgua che pīratasa mboyecua āgua nde sui, che rer mboetei āgua avei opacatu ava upe co ivi pipe” ehi. ¹⁸ Ēgüe ehi oporoparaisuereco güemimbotar rupi. Güemimbotar rupi avei omboavai víroya āgua ava upe.

¹⁹ Aviyeteramo oimera que amove pe pāhu pendar aipo ehi vahe, “Ndiyai evocoyase Tūpa upe, ‘Pe peyavi mbahe’ he āgua yandeu. Esepia, ndipoi eté niha ava, ‘¡Aní!’ ehi vaherā Tūpa remimbotar upe” ehira.

²⁰ “Ndiyai eté rumo Tūpa poepi āgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tēi eve?” ihe āgua oaposar upe.

²¹ Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirā tēi apo āgua.

²² Tūpa rumo oñemosa pare iya ité oñemoirora, opīratasa mboyecua āgua ocañi tēi vaherā upe.

²³ Ēgüe ehi avei yapo güemimbotar rupi güeco porañetesa ivate vahe mboyecua āgua yandeu. Esepia, yande paraisuereco iyavei yipisuive teco ori porañetesa omoingatu yandeu aheve yande reique āgua.

²⁴ Yande avei yande renoi oyeupe, que judío, anise que ndahei vahe judío yande recose. ²⁵ Esepia, Oseas rembicuachiagüer pipe aipo ehi:

“Acoi ava ndahei vahe cheundar, chupe, ‘Cheundar ité’ ahera, iyavei acoi ava ndahei vahe saísupri yuvirecoi, chupe, ‘Che rembiaísu ité’ ahera” ehi.

²⁶ “‘Pe ndahei vahe cheundar peico’ ehi vahesave, ahe chupe, ‘Tūpa oicove vahe rahir ité’ hesara” ehi.

²⁷ Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tēi rumo oñepisiro yuvireco. ²⁸ Esepia, yande Yar om-

boaviye voira oñehe ava víroyasarēhi mocañi āgua co ivi pipe” ehi. ²⁹ Oyoya avei ambuae Isaías remimombehu güer yipindar vahe rese:

“Yande Yar seco pīrata catu vahe noipīsiroise que moviro yande ramoi yandeu, yacañipa tēira viña inungar tecua guasu Sodoma,

Gomorra reseve yuvireco” ehi.

Judío yuvirecoi vahe iyavei ñehesa pīsirosa resendar

³⁰ ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri āgua yuvireco viña, Cristo rese oyeroyasa pipe rumo vireco ité güeco catuprisa Tūpa rovaque. ³¹ Judío yuvirecoi vahe rumo oipota tēi güeco tupri āgua ité Tūpa porocuita mboyeroya pipe viña, ndoicatu eté rumo supiti yuvireco. ³² Esepia niha, ndahei oyeroyasa pipe ité oseca oñepisiro āgua, ahe rumo co mborocuita mboyeroyasa sui tēi Tūpa rese yuvirecoi pota viña. Ahe evocoyase ndoyavi oyeipi vahe “ita yepiapisa” rese yuvireco. ³³ Aipo ehi tupri icuachiapri arachendar pipe:

“Che amondo Sión ve ñepe ita yepiapisa, ahe oporoieiti vahe.

Acoi sese oyeroyá vahe rumo, nomochi ucai chietera oyesui” ehi Jesús recocuer upe.

10 Che rivireta, che aipota che piha pipe ité iyavei ayerure Tūpa upe che mu judío recocuer rese ‘toñepisiro yuvireco’ che yapave. ² Supi eté iquerēhi ité Tūpa upe mboraviqui apo āgua yuvireco viña. Oquerēhisa sui rumo oyavi senducuaēhisa pipe yuvireco. ³ Esepia, ndoicua potai mara ehi Tūpa ava pisi oyeupe. Sese oyesui tēi oseca güecocuer tuprisa pipe ‘tomoungatu Tūpa opiha yande pisi āgua’ ohesave yuvireco viña. Ipipe sui nomboyeroyai eté Tūpa remimbotar güeco mbocatupri āgua ité yuvireco. ⁴ Esepia, Cristo recocuer pipe imboaviyasa tupri Moisés porocuita, “Peyavi mbahe che ñemoirosa pisi āgua” ehiñi āgua Tūpa oyese oyeroya vahe upe.

⁵ Co yande reco catupri āgua porocuita pipe sui, Moisés aipo ehi icuachía: “Acoi ava omboaviye tupri vahe opacatu co mborocuita, ipipe sui yuvirecovera” ehi. ⁶ Tūpa, “Peyavi mbahe che ñemoirosa pisi āgua” heñi āgua rumo yande yeroyasa pipe, “Ava vo oyeupira ivave Tūpa Rembiporavo reroyi āgua” ndapeyei chirra. ⁷ Iyavei, “Ava vo ogüeyira omano vahe pāhuve Tūpa Rembiporavo mboyeupi uca āgua” ndapeyei chiaveira. ⁸ ¿Mara peyera evocoyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera. ⁹ “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipīsiprope peicora. ¹⁰ Esepia, yande piha pipe yayeroya Jesús rese. Ahese Tūpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipīsiprope yaicora.

¹¹ Esepia, icuachiapri arachendar pipe Tūpa aipo ehi: “Acoi sese oyeroyá vahe rumo, nomochi ucai chietera oyesui” ehi. ¹² Sese oyoya tupri judío ndahei vahe judío recocuer rese. Esepia, ñepeño ité niha Yar

opacatu ava upe nomopanei vahe oporovasasa tuvichá vahe oyeupe oporandusar upe. ¹³ Esepia, icuachiapri aracahendar pipe aipo ehi: "Acoi opacatu osenoi vahe yande Yar rer, ipisiropri yuvirecoira" ehi. ¹⁴ Ava rumo ndoporandui chira pisirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehúsar yuvireco chupe. ¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: "¡Aviye ai eté acoi ava güeru vahe ñehesa aviye vahe pisirosa resendar!" ehi.

¹⁶ Ndahei rumo opacatu che mu judío viroya co ñehesa pisirosa resendar yuvireco. Isaías niha aipo ehi avei aracahe: "Che Yar, ¿uma pñha viroya ore ñehes yuvireco?" ehi. ¹⁷ Sese yayeroya Jesucristo rese co ñehesa pisirosa rendusa pipe.

¹⁸ ¿Osendu pñha judío co ñehesa yuvireco? ¿Osendu ité! Esepia, aipo ehi avei acoi icuachiapri aracahendar pipe:

"Sendusa niha opacatu ivi rupi iñehes" ehi.

¹⁹ Iyavei, ¿osenducua pñha yuvireco? ¿Osenducuaño ité! Esepia, yipindar Moisés omombehu icuachiapri pipe aipo ehi:

"Perecatēhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe" ehi.

²⁰ Ipare omombehu tupri ité Isaías osiquiyeēhisave Tūpa ñehes aipo ehi vahe:

"Acoi ava ndache recai vahe, ahe che pisi ité yuvireco. Iyavei ayemboyecua acoi ava che rese ndoporandui vahe upe" ehi.

²¹ Judío recocuer rese avei rumo aipo ehi: "Ari rupi añehes tēi ava che reroyasarēhi ndiporeroyai vahe upe vichico" ehi aracahe.

Moviro tēi ava Israel pendar Tūpa oiporavo oyeupe nara

11 Evocoyase, ¿omombo pñha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoi eté, Benjamín suindar avei aico. ² Yipisuive ité niha Tūpa, "Co ava cheundar ité" ehi ore ramoi israelita upe. Sese cūritei ndore momboi eté oyesui. Peicua niha acoi Elías resendar icuachiapri aracahendar oyoeroku tēise omu israelita rese aipo ehise Tūpa upe: ³ "Che Yar, nde ñehes mombehúsareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potañño avei eté rumo yuvireco" ehi. ⁴ Tūpa rumo omboyeví chupe: "Aipeha rumo siete mil tupri ava che mboyeroyasar cheyeupe nara noñenopñhai vahe Baal rahanga rovai yuvireco" ehi. ⁵ Ēgüe ehi avei cūritei opñta viteño moviro judío, ahe niha Tūpa oiporavo oporoaisusa pipe. ⁶ Ipipe ité niha Ēgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

⁷ Evocoyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu viroya āgua. ⁸ Icuachiapri pipe aipo ehi aracahe: "Tūpa nomboyecua uca iri mbahe secocuer pipe. Cūritei Ēgüe ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe" ehi. ⁹ Iyavei David aipo ehi aracahe: "Ipietasa ivonde nungar iyavei pira mbohasa nungar tasecoi chupe.

Ipipe sui toyuviroha mbahe tēi pipe yuvireco, toyemombaraisu uca avei ipipe yuvireco.

¹⁰ Toicua eme mbahe inungar ndasesapisoi vahe yuvireco.

Icuhapapri nungar ayase toyuvirecoi apirēhi vahe" ehi.

Ndahei vahe judío ñepisiro agüer

¹¹ Evocoyase areco iri che porandusa pñha: ¿Apirēhi vahe ité pñha judío eta ndoyeroyai Jesucristo rese oñepisiro āgua yuvireco? ¡Aní eté! Ahe rumo Ēgüe ehi ava ndahei vahe judío pisirosa pisi āgua yuvireco. Ipipe sui oyemonguerēhi catura judío ipisi āgua yuvireco curi. ¹² Evocoyase judío eta rembiavi sui tuvichá Tūpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyevise yuvireco chupe.

¹³ Che rumo areco che ñehesa pñha pe ndahei vahe judío. Tūpa niha che cuai oñehes mombehu āgua ndahei vahe judío upe. Sese, "Aviye ai eté che poraviquisa" ahe che mu judío rovaque yepi. ¹⁴ Sendusa sui aviyeteramo oimera ipñhuve oyemonguerēhi vahe pisirosa Tūpa suindar pisi āgua oyeupe nara yuvireco. ¹⁵ Esepia, judío mombosa pipe sui Tūpa omoime ñerosa opacatu ava co ivi pipendar upe. ¿Mara ehira pñha evocoyase Tūpa ipisise? Ahese oipisira tecovesa apirēhi vahe yuvireco, evocoyase ndoyuvireco iri chira omano vahe nungar Tūpa upe. ¹⁶ Esepia, yipindar pangüā sui yapopri seropovēhesa Tūpa upe, opacatu panvi evocoyase sovasapri avei ichui. Iyavei inungar ivira rapo seropovēhesa Tūpa upe viña, sāca avei evocoyase opacatu Ēgüe ehi aveira viña.

¹⁷ Amove che mu judío inungar Olivo rāca yasiapri. Pe evocoyase ndahei vahe judío ivira caha pipendar rāca nungar peico vahe, peso yasiapri rendagüerve, ipipe sui peipisi vñracuasa pe recove āgua. ¹⁸ Aní chira rumo, "Yande aviye catu vahe yaico ivira rāca nungar yipindar yuvirecoi vahe sui" peye pe yeecomboivate aisa pipe. Esepia, ndahei pe sui judío oipisi oye-moviracua āgua yuvireco, pe rumo yipindar ichui eté peipisi pe yemoviracua āgua.

¹⁹ Iyavei, "Co judío rumo imombosa ité ivira rāca asiapri nungar yande sendagüerve yapita vahe" peye revo. ²⁰ Supi eté, co rumo Tūpa reroyaēhi pipe ahe imombosa ichui yuvireco, pe rumo seroya pipe suiño ité pepita sendagüerve. Sese peicua catu, aní

chira peyemboivate ai ipipe. ²¹ Esepia, Tūpa oiporavo co judío oyeupe nara ité viña, ndoviroyaise rumo, ndoipisii eté. Pēu avei ēgüe ehira ndapemboyeroyaise. ²² Peyapisaca tupri, Tūpa niha aviye vahe ité. Seco pīra-ta vahe avei rumo ava viroyaēhisar upe. Pēu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar tēi peicora. ²³ Opoipase rumo judío eta Cristo reroyaēhisa sui, Tūpa evocoyase viroyevi irira oyeupe nara. Esepia, chupe iya ité ipisi iri āgua. ²⁴ Pe ndahei vahe judío ivira caha pipendar rāca yasiapri nungar peico, Tūpa rumo pe mondo ivira aviye vahe nungar rese. ¡Evocoyase judío ete ité inungar ahe ivira aviye vahe rāca yasiapri, ahe ivate catu oipisi irira oyeupe nara!

Ipa vahe judío ñepisiro agüer

²⁵ Che rivireta, che aipota, “Toicua Tūpa remimbotar icuapirēhi oyemboivate aiēhi āgua yuvireco” ahe pēu. Esepia, amove Tūpa judío upe omboavai viroya āgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pēu, ²⁶ ahese ramo opacatu ava judío yuvirecoi vahe Tūpa oipīsīrora. Esepia, icuachiapri aracadendar pipe aipo ehi:

“Oura ava Pīsīrosar judío recua Sión pāhu sui, ahe oipehara mbahe naporai vahe opacatu judío sui.

²⁷ Evocoi niha che remimbotar chupe nara, amocañise yangaipagüer yuvireco ichui” ehi.

²⁸ Ēgüe ehi cūritei judío eta ndosendu potai ñehesa pīsīrosa resendar yuvireco. Sese Tūpa amotarēhisar yuvirecoi. Pēu mbahe tupri āgua rumo ēgüe ehi. Tūpa rumo osaisu vite. Esepia, yipive ité oiporavo tamoi eta oyeupe. ²⁹ Supi eté, Tūpa ndoviroyevi iri eté mbahe güemimondo iyavei ndovirova-rova tēi vahe opihañemoñetasa güembiporavo sui. ³⁰ Yipindar niha pe ndapemboyeroyai eté Tūpa. Cūritei rumo judío eta ndoviroyaise yuvireco, pe paraisuereco Tūpa. ³¹ Ēgüe ehi avei judío eta cūritei ndoviroyai yuvireco. Tūpa pe paraisuereco uca āgua rumo ēgüe ehi yuvireco. Coiye inungar pe, judío avei osupitira Tūpa poroparaisuerecosa yuvireco. ³² Esepia, Tūpa ité, “Opacatú oyavi mbahe che reroyaēhisa pipe” ehi ‘oicuae mbahe güembia-avi, tiquerēhi opacatú che poroparaisuerecosa pisi āgua yuvireco’ oya.

³³ ¡Mara ehi rutei Tūpa aracuasa, imbahecuasa avei? Ndipoi chietera que ava yaracuasa mombehu tupri āgua. Ndayaicatui avei secocuer cuapa tupri āgua.

³⁴ Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no. ³⁵ Ndipoi que ava mbahe omondo vahe yande Yar upe ‘tomboyevi cheu’ ohesave. ³⁶ Esepia, Tūpa suiño ité niha opacatu mbahe oime, oyeupe nara avei mbahe oyapo opīratasa pipe. ¡Sese imboeteipri ité Tūpa tasecoi yepi! Ēgüe tehi apirēhi.

Yande recocuer imondopri Tūpa upe nara

12 Sese che rivireta, che Tūpa poroparaisuerecosa pipe aipota pe yemondo ité pe recoveseve

chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe piha pipe sui eté peyapo vahe rā chupe. ² Peico iri eme co ivi pipendar pihañemoñetasa tēi rupi. Iyacatu rumo pese-cuñaro pe pihañemoñetasa. Ipipe sui opacatu pe recocuer oñecuñarora. Ēgüe peyese, peicuara Tūpa remimbotar ahe mbahe aviye vahe, semimbotar supi tupri vahe ité.

³ Tūpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai āgua rese. Iyacatu rumo peicua tupri pe pihañemoñetasa peyesendar Tūpa pēu mbahe imbougüer rupi sese pe yeroyasa pipe. ⁴ Inungar yande rete ñepeño ité, sesendar rumo setá, iyavei ndahoyoyai mbahe sembiapo. ⁵ Ēgüe vahe avei yande, yepe que yande retara viña, Cristo rese yayemboyase rumo, ñepe vahe nungar yaico. Evocoyase yande ñepe-pe opacatu upendar yaico.

⁶ Tūpa niha omboeaviratī mbahecuasa imbou oporoaisusa pipe ñepe-pe upe. Evocoyase Tūpa omboe oñehe mombehu āgua yandeu, yamombehura ñepe-pe iñehe sese yande yeroyagüer rupi. ⁷ Que ombouse mbahecuasa ambuae ava pītivii āgua yandeu, yaipītivii tupri aveira. Ombouse yande porombohe āgua, yaporombohe tupriño itera. ⁸ Iyavei ombouse yandeu ambuae ava monguerēhi āgua, yaporomonguerēhiño itera. Ombouse yande poropītivii āgua ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pipe; iparaisu vahe pītiviisar, toipītiviño avei vorivetesa pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe.

¹⁰ Peyeaisu catu ñepe-pe oyeivri nungar tupri pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

¹¹ Peyemonguerēhi, aní ndapequerēhi chira iyavei peyapo yande Yar upe mbahe opacatu pe recoete pipe.

¹² Peicoño pe viharetasave mbahe iva pēndar rārosa pipe; peñemosañō mbahe rasicuer peiporarase iyavei aní chira peseya pe yeruresa yepi.

¹³ Peipītivii ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

¹⁵ Peyemboviha acoi ava oyemboviha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepe-pe oyese pe yeai-susa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahecua vai vahe nungar.

¹⁷ Aní pēu mbahe tēi aposar upe pemboyevira mbahe tēi avei. Peyapo catu mbahe tupri opacatu ava rem-

biepiave. ¹⁸ Peicatu vahe rupi peseca pe reco tupri āgua opacatu ava upe. ¹⁹ Che rivireta, aní pe ae pemboyeví mbahe tēi pipe pe rereco momarasar upe. Peseyaño Tūpa upe. Ahe oicuara chupe. Esepia, icuachiapri pipe aipo ehi: “Che ité aicuara ava mbahe tēi aposar upe. Che amboepira” ehi yande Yar. ²⁰ Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, ēgüe peyese pe amotarēhimbar upe, ochíra pe sui” ehi. ²¹ Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tupri aposa pipe.

13 Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité. ² Sese acoi mborerecuar upe que mara ehi vahe, Tūpa porocuita reroaēhisar yuvirecoi. Ēgüe ehi vahe inupambri yuvirecoira. ³ Esepia, mborerecuar yuvirecoi vahe ndahei ava seco tupri vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye āgua. Ndayasiquiye potaise mborerecuar sui, iya yaicora mbahe tupri pipe. Mborerecuar evocoyase, “Aviye” ehira yande reco catuprisa rese yandeu. ⁴ Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahes mborerecuar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco. ⁵ Sese iya yamboyeroya ité mborerecuar; ndahei rumo ahe yande nupaēhi āgua reseño, yande pihañemoñeta momaraēhi āgua rese avei. ⁶ Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tūpa rembiguai yuvirecoi. Evocoyase aheño ité iporaviquisa yuvireco.

⁷ Yamondo ñepeipei ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroyapri.

⁸ Aní yandereve. Ahe yande cuaita. Yande cuaita avei yande yeaisu āgua, supi eté acoi ava osaisu vahe ambuae ava, omboaviye ité Tūpa porocuita. ⁹ Aipo ehi acoi Tūpa porocuita: “Ndapeyemboaguasai chira, ndapeporoyuca chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuita sendusa tupri ité co ambuae ñehesa rese: “Pesaisu ava pe yeaisu nungar” ehi. ¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyasa tupri ité porocuita.

¹¹ Iyavei peicua tupri co mbahe oime vahe yandeu. Cūrítei ari osupiti ité yandeu yande yemopoase āgua. Esepia, yande Yar yevi āgua cōimi catu yandeu iñehengagüer yipindar seroyasa sui. ¹² Supi eté osupiti senimi ari yandeu; sese iyacatu yapoi pītumimbi vahe nungar mbahe-mbahe tēi aposa sui mbahe icatupri vahe pipe yande reco āgua. Evocoyase tayaico sundao oyoepisa omonde vahe nungar. ¹³ Yande catu yaguata yande reco ĩvi tuprisa pipe, inungar yaguatase ari pipe. Aní

catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pihañemoñeta ndahoyoyai vahe pipe, ambuae ava mbahe pota raisa pipe avei no. ¹⁴ Iya rumo yarecora yande Yar Jesucristo recocuer yande yese, aní yande pihañemoñeta mbahe-mbahe tēi apo āgua yande remimbotarai pipe.

Aní peroñero ambuae Jesús reroyasar

14 Acoi ava ndoyeroya tupri vitei vahe yande Yar rese que oiquese pe piri, peipisi tupri; aní peiñehepoepira ipihañemoñetasa ndahoyoyaise pe pihañemoñeta rese. ² Esepia, amove evocoi nungar ava ihupri pāve tēi yuvirohu, oime rumo amove ava ipihañemoñeta opacatu mbahe hu āgua rese. ³ Acoi ava opacatu mbahe ohu vahe, toviroñero eme amove ndohui vahe mbahe iyavei acoi amove ndohui vahe mbahe, toviroñero eme acoi ohu vahe opacatu mbahe. Esepia, evocoi nungar ava Tūpa oipisi ité. ⁴ Supi eté pe ndiyai eté peroñero vaherā ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe tēi pipe, serecuar ité oicuara chupe. Esepia, yande Yar opīratasa pipe osecomoingatuño itera.

⁵ Oime avei amove ava ñepeipei ari omboetei catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepeipei opihañemoñeta rupi, “Co supi tupri vahe” ehira opiha pipe yuvireco. ⁶ Acoi que ñepeipei ari ava omboetei vahe, yande Yar mboeteisa pipe rumo ēgüe ehi. Iyavei ohu vahe opacatu mbahe, Yar mboeteisave avei ēgüe ehi. Esepia, ahe güemiapo rese, “Aviye ndeu” ehi Tūpa upe; iyavei acoi amove ndohui vahe mbahe, Yar mboeteisave ēgüe ehi, iyavei, “Aviye ndeu” ehi avei Tūpa upe.

⁷ Esepia, yande ñepeipei ndayaicoi yandeyeupe nara tēi, ndayamanoi avei yandeyeupe nara. ⁸ Esepia, yaicove vitesse, yaico yande Yar upe nara; yamanose, yamano yande Yar upe nara avei. Ēgüe vahe yande yaicove vitesse, anise yamanose, opacatu chupe nara ité yaico. ⁹ Sese niha Cristo omano, ipare ocuerayevi opacatu ava Yar güeco āgua que omano vahe, anise que oicove vite vahe upe avei.

¹⁰ ¿Mahera evocoyase peroñero pe mboetasa Cristo reroyasar iyavei mahera ndapesepia potai? Esepia, supi eté niha yande opacatu yasora Tūpa rovai. Ahe evocoyase opara oporandu yande recocuer rese yandeu. ¹¹ Esepia, icuachiapri aracahendar pipe omombehu:

“Supi eté che reco pipe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco, ehi” ehi.

¹² Evocoyase yande ñepeipei yamombehura yande recocuer Tūpa upe.

Aní pe rivireta mbahe tēi pipe pereco uca

¹³ Sese yande ndiyai yañeroiro. Iyacatu rumo ñepeí reseve pereco tupri ambuae pe rivri, angaipa pipe sereco ucaēhi āgua, iyeroyasa momaraēhi āgua avei. ¹⁴ Che yande Yar reroyasar che reco pipe aicua ndipoi eté que tembihu yande reco momara vahe. Amove rumo ava, “Mbahe tēi co tembihu, ndiyai yahu” ehise, ahe chupe evocoyase mbahe tēi, ndiyai eté ihu āgua. ¹⁵ Iyavei yande que mbahe yahuse, ipipe yamomara tēise yande rivri pihañemoñetasa Tūpa rese, ndahei evocoyase yande poroaisusa pipe ité ēgüe yahe. ¡Aní ahe yamocañi tēi uca Cristo sui evocoi nungar mbahe yahu vahesa pipe! Esepia, secocuer rese Cristo omano. ¹⁶ Yepe que mbahe aviyera yandeu viña, ndayayapoi chira rumo evocoi nungar yande rembiapo rese ava ñehe-ñehe tēiēhi āgua. ¹⁷ Esepia, ndahei ivate catu vahe Tūpa upe yande carusa, yande igua avei ipovrive yande recose. Ēgüe ehi rumo co ivate catu vahe chupe yande recocuer mohivisa, yande reco tuprisa ambuae Tūpa reroyasar pāhuve iyavei yande rorivetesasa yareco vahe Espíritu Santo sui. ¹⁸ Ēgüe yahese Cristo mboeteisave, aviye aira Tūpa upe iyavei opacatu ava rembiepiave avei no. ¹⁹ Sese opacatu yande recoeté pipe yasecara yaico tupri vaheṛā yandeyeupe. Ipipe sui yande yaicatura yañepitivi yande yemoviracua tupri āgua yande Yar rese. ²⁰ Aní pemocañi uca tēi ava recocuer Tūpa remipĩsiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pihañemoñetasa momara āgua. ²¹ Aviye catu ndayahuse mbahe roho, que ndayahuse uva ricuer iyavei que ambuae mbahe ndayayapoise, ambuae ava Cristo reroyasar angaipa pipe seiti uca iriēhi āgua. ²² Yande pihañemoñetasa yareco vahe rumo yarecoño itera yandeyeupe ité Tūpa rovaque. ¡Aviye ai catuño ité ava acoi, “Aviye yayapose evocoi nungar mbahe” he pare, “¿Mara ehi pĩha?” ndehi irise opihañemoñetasa pipe! ²³ Acoi que ava, “¿Mara ehi pĩha?” ehise tembihu upe. Ipare rumo ohuse, ahe evocoyase oyemboangaipa ipipe. Esepia, ndohui Tūpa rese oyeroyasa pipe. Iyavei ava, “¿Mara ehi pĩha?” ehi vitesa que mbahe upe, ipare oyapose ité, ahe angaipa.

Yambovihara ava yande cotindar, ndahei chira yande ae tēi yayembovihara

15 Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipihañemoñeta tupri vitei vahe rese. Ndahei chira rumo yande ae tēi yayemboviha. ² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opihañemoñeta pipe Tūpa rese yuvireco’ yande yapave. ³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe

tēi opa aipisi” ehi. ⁴ Supi eté co opacatu omombehu vahe aracahe opa icuachiasa yande mbohe āgua, yande yasāro vaheṛā Tūpa reco porañetesa yande ñemosasa pipe iyavei yande pihamonguerēhisa pipe avei ahe yareco vahe ichuindar. ⁵ Tūpa, acoi ombou vahe yande ñemosasa, yande pihamonguerēhisa avei yandeu, tape pĩtívii oyoya guasu pe reco tupri āgua ñepeipei peyese Jesucristo recocuer rupi. ⁶ Ipipe sui pe opacatu oyoya guasu ñepeipei pe pihanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

Ñehesa pĩsirosa resendar imombehusa ava eta ndahei vahe judío upe

⁷ Peyepisi tupri ñepeipei, inungar Cristo pe pisi tupri oyeupe nara Vu mboetei āgua. ⁸ Che rumo aipo ahe pēu: Jesucristo ou judío pĩtívii Tūpa remimombehugüer mboaviye āgua judío ramoí arachendar upe. Ēgüe ehi Tūpa oñehe mboaviyesa mboyecua ⁹ ‘tomboetei ava ndahei vahe judío yuvirecoi vahe che Ru Tūpa iporoparaisuerecosa rese yuvireco’ oyapave. Ahe ēgüe ehi icuachiapri rupi tupri ité aipo ehi vahe: “Sese che oromboeteira opacatu ava ndahei vahe judío pāhu rupi, iyavei asapucaira ndeu nde rer mboeteisa pipe” ehi. ¹⁰ Iyavei acoi ambuae icuachiapri pipe omombehu avei no: “¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi. ¹¹ Ambuae pipe avei aipo ehi no: “Pe opacatu ivi pipendar ava, ¡pembotei yande Yar!” ehi. ¹² Isaías avei aipo ehi icuachía: “Oimera niha ava Isaí suindar, opacatu ava rerecuarā secoira. Ava ndahei vahe judío seseño ité oyeroyara yuvireco” ehi. ¹³ Tūpa acoi ombou vahe mbahe oyesuindar rāro āgua, tayande mboviharete catu iyavei mbahe tupri tayareco sese yeroyasa pipe. Ipipe sui tombou yasāro vaheṛā ahe mbahe aviye vahe Espíritu Santo pĩratasa pipe. ¹⁴ Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepeipei peyeupe pe yemboaracua āgua. ¹⁵ Co tecocuer rese rumo aicuachía opacatu che siquiyeēhisa pipe pēu pe resaraiēhi āgua ichui. Esepia, ayapo Tūpa che cuaita ombou vahe che raisusa pipe cheu ¹⁶ Jesucristo rese che poraviqui āgua ava ndahei vahe judío recocuer aviye āgua. Evocoyase judío pahi nungar che cuaisa pipe amombehu co ñehesa Tūpa ombou vahe pĩsirosa resendar yuvireco chupe imoporēhi āgua Tūpa rovai inungar mbahe seropovēhepri aviye vahe Tūpa upe Espíritu Santo pipe yepi. ¹⁷ Supi eté che Jesucristo reroyasar che recosa pipe aviharete Tūpa che cuaita rese. ¹⁸ Esepia, cheu ndiyai añehe vaheṛā que ambuae mbahe rese: co mbahe Cristo oyapo uca vahe cheu ava ndahei vahe judío re-

cocuer rese, seseño ité iyacatu cheu añehe vaheřă. Esepia, amonguerēhi Tūpa reroya āgua yuvireco che ñe-he rese, che rembiapo sui avei. ¹⁹ Ēgüe ahe poromondiisa mbahe yavai vahe apo Tūpa pīratasa pipe. Ahe ayapo Espīritu Tūpa suindar pīratasa pipe. Īpipe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no. ²⁰ Chequerēhi avei co ñehesa pīsirosa resendar mombehu āgua ava Cristo recocuer ndosendui vahe upe yepi. Ndahei rumo ambuae ava imboaracua pare tēi, ²¹ che rumo ayapo inungar icuachiapri pipe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipihañemoñeta Roma ve oso āgua

²² Co rese tēi che ndaicatui aso pe piri, yepe setá rupi aso pota tēi viña. ²³ Cūrītei rumo opa amboaviye che poraviqui co ivi rupi, iyavei opa tēi setá araviter pe piri che sosa rāgüer. ²⁴ España ve che soseve, apita pucumira vicho pe piri yande yemboviha āgua. Iyavei pe sui che sē potase, che pītiviimira peye aheve che so āgua. ²⁵ Cūrītei rumo che asora Jerusalén ve. Arasora porerecosa ahe pendar yande mboetasa Jesús reroyasar pītivii āgua. ²⁶ Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe pītivii āgua yuvireco. ²⁷ Ahe ēgüe ehi güemimbotar rupi yuvireco iyavei iya ité imboyevi āgua yuvireco chupe ahe mbahe tupri oyeupe apo agüer rese. Esepia, yipindar Jesús reroyasar judío yuvirecoi vahe oicua uca co tecocuer Tūpa suindar ahe ava ndahei vahe judío yuvirecoi vahe upe. Sese iya ité imboyevi āgua co ivi pipendar porerecosa chupe. ²⁸ Opase che co porerecosa amondo yuvireco chupe, España ve che sose, ahese apitara vicho pe piri. ²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivireta, yande Yar Jesucristo rer pipe iyavei yeaisusa Espīritu ombou vahe pipe avei aporandu pēu opacatu che rese peyeroqui pīrata vaheřă Tūpa upe che pītivii āgua co mboraviqui rese. ³¹ Peoporandu Tūpa upe, tache repi ava Jesús reroyasarēhi sui ivi Judea ve, iyavei Jerusalén pendar yande rivireta co porerecosa pisi tupri āgua avei. ³² Ahese Tūpa oipotase, che aviharetera ayepotase pe repia, iyavei toime pītuhusa yandeu che pe piri che sose. ³³ Ēgüe tehi Tūpa güeco tuprisa pipe tasecoi opacatu pe rese.

Pablo mahenduhasa ñepepei-pei ava upe

16 Co yande reindri Febe serer vahe, ahe oipītivii tecua Cencrea pendar Cristo reroyasar oico. ² Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipītiviiño que mbahe chupe ipane vahe rese. Esepia, ahe setá ité oporopītivii iyavei che avei eté che pītivii no.

³ Pemombehu che mahenduha Prisca upe, Aquila upe avei, ahe niha che pītivii mboraviqui Jesucristo recocuer resendar rese yuvireco. ⁴ Ahe avei niha mbahe tēi pipe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe. ⁵ Pemombehu avei che mahenduha sētave oñemonuha vahe upe yuvireco. Pemombehu avei che mahenduha che rembiaisu Epene-to upe. Ahe rane niha yipindar ivi Asia pendar Cristo reroyasar. ⁶ Pemombehu avei che mahenduha María upe. Ahe niha oporaviqui iteanga vahe pe recocuer rese. ⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboeroya yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe. ⁹ Pemombehu avei che mahenduha Urbano upe. Ahe niha yande ndugüer oporaviqui vahe Cristo recocuer rese, che mboripar Estaquis upe avei. ¹⁰ Pemombehu avei che mahenduha Apeles upe. Ahe niha güecoñhasa sui osē tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo rēta pipendar yuvirecoi vahe upe avei. ¹¹ Pemombehu avei che mahenduha che mu Herodión upe, ava Narciso rēta pipendar yande Yar reroyasar upe avei. ¹² Pemombehu avei che mahenduha Trifena upe iyavei Trifosa upe. Ahe niha oporaviqui vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviqui ité yande Yar upe nara. ¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi. ¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. ¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpás upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohava omondo avei omahenduhasa yuvireco pēu.

¹⁷ Che rivireta, peicua catu pe pāhu pendar omboya-ho pota serai vahe sui. Oime ava ēgüe ehi vahe, oiti uca vahe ava mbahe tēi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepipiño itera. ¹⁸ Esepia, ahe ava ndahei yande Yar Jesucristo upe nara oyapo mbahe yuvireco. Ēgüe ehi rumo ahe oyeupe nara tēi oipota rai mbahe yuvireco. Iyavei ombopa ava ndayaracua tuprii vahe; oñehe tupri ai angahu oporomohapisi aisa pipe tēi yuvireco. ¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaheřă pe mbahecua mbahe aviye vahe apo āgua,

ndahei mbahe tēi apo āgua. ²⁰ Evocoyase Tūpa güeco tuprisa pipe pihaivi Carugar osecopipa tupri itera. Pe avei evocoyase pesecoreroyira. Yande Yar Jesucristo tape rovasa.

²¹ Omondo avei omahenduhasa Timoteo pēu. Ahe che pītivii che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pēu, che avei che mahenduhasa amondo yande Yar reroyasa pipe pēu.

²³ Omondo avei omahenduhasa Gayo pēu. Ahe sē-tave ité niha aque yepi, ipiri avei ambuae Jesús reroysasar oñemonuha yuvireco yepi. Iyavei Erasto omondo omahenduhasa opacatu pēu, ahe tecua mbahe guarepochi apocatusar. Yande rivri Cuarto avei omondo omahenduhasa pēu.

²⁴ Aviye, yande Yar Jesucristo tape rovasa opacatu.

Pablo omboetei Tūpa

²⁵ ¡Yamboetei Tūpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tūpa omboyecua ramo vahe cheu co ivi apoēhi suive mbahe ndicuasai vahe rese. ²⁶ Cūrítei rumo oyecua uca oñehe mombehusar rembicuachía pipe Tūpa apirēhi vahe porocuita rupi cute. Ahe ñehesa ndicuasai vahe omboyecua uca opacatú ava upe 'toviroya sese oyeroyasa pipe yuvireco' oya.

²⁷ ¡Tūpa güeraño imbahecuá vahe yepi, ěgüe tehi ahe yande Yar Jesucristo rer pipe imboeteipri tasecoi!

1 CORINTIOS

Pablo mahenduhasa Jesús reroyasar Corinto pendar upe

1 Che Pablo, yande rivri Sóstenes reseve, oromondo co ore mahenduhasa opacatu pëu. Tüpa niha, güemimbotar rupi, che poravo apóstol che reco ägua. ² Aicuachía co che ñehe pëu, pe Jesús reroyasar peñemonuha vahe Tüpa upe tecua Corinto ve. Peicua niha pe ipehapri peico Tüpa upe nara ité Jesucristo rese peicose. Peicua avei niha Tüpa pe poravose oyeupe nara pe reco catupri ägua, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. ³ Yande Ru Tüpa, yande Yar Jesucristo tape rovasa pe reco tupri ägua.

Jesucristo suindar porovasasa seroyasar upe

⁴ Che, “Aviye ndeu” aheño ité Tüpa upe pe recocuer rese yepi. Esepia, Tüpa pe rovasa ité Jesucristo rese peicose. ⁵ Ēgüe ehi secocuer pipe sui Tüpa ombou opacatu pe reco tupri catu ägua, pemombehu tupri vaheñā imbahecuasa, opacatu mbahe supi eté vahe cua tupri ägua avei. ⁶ Esepia niha, ore co ñehesa Jesucristo resendar pëu imombehusa pipe sui pe recuñaro uca ité. ⁷ Sese ndipoi eté que porovasasa Tüpa Espiritu suindar ipane vahe pëu yande Yar Jesucristo yevi ägua pesärose. ⁸ Tüpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe tēi secocuer rese yuvireco’ ohesave. ⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco ägua.

Jesús reroyasar pihañemoñetasa ndahoyoyai vahe resendar

¹⁰ Che rivireta, che amombehu potami mbahe pëu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiro-iro yuvireco oyeupe ae” ehi. Sese aipo ahe pëu: pemboyoya catu pe pihañemoñetasa, ndapeyemboyohoi chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar. ¹² Supi eté amove aipo, “Ore Pablo rupindar oroico” peye tēi; ambuae evocoyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye tēi aipo peico. ¹³ ¡Cristo rumo vireco porombohesa ndoyaho-yaho tēi vahe! ¿Che tie amano curusu rese pe angaipa repirā? anise, ¿che rer pipe tie

peñeapiramo uca peico? ¹⁴ ¡Aviye Tüpa upe che ndopoãpiramoise! Crispo iyavei Gayo, ahe güeraño rumo añapiramo yuvireco cuese. ¹⁵ Sese ndipoi chira “serer pipe ñapiramosa” ehi vahe yuvireco cheu. ¹⁶ Estéfanos rēta pendar avei añapiramo yuvireco, ipare ndipo iri revo ambuae ava añapiramo vahecuer. ¹⁷ Cristo niha nomombehui che poroãpiramo ägua. Ēgüe ehi rumo che cuaita ñehesa ñepisirosa resendar mombehu ägua tēi. Iyavei ndahei ñehesa yavai catu vahe aiporu. Esepia, nañomi potai eté que chñhi co ñehesa pñratagüer Jesucristo curusu rese imano agüer resendar ava sui.

Cristo Tüpa pñratasa, imbahecuasa avei

¹⁸ Esepia, acoi ava ocañi tēi vaheñā upe co ñehesa curusu rese Cristo manosa resendar aviye Ēgüe ehi tēi vahe viña. Yande ipñsiropri yaico vaheñā upe rumo co ñehesa vireco ité Tüpa pñratasa, ¹⁹ inungar Isaías rembicuachiagüer pipe aipo ehi:

“Amocañira co ivi pipendar ava tēi mbahecuasa iyavei arocuara ava yaracua vai tēi vahe sui yaracuasa” ehi.

²⁰ ¿Mara ehi evocoyase co ivi pipendar ava imbahecuasa vai vahe, ava-ava tēi aracuasa cuapar avei, iyavei iñehe cua tupri ai vahe co ivi pipendar mbahe rese yuvireco? ¡Tüpa niha osecuñaro evocoi nungar mbahecuasa Ēgüe ehi tēi vahe pipe! ²¹ Ēgüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar Ēgüe ehi tēi vahe” ehi tēi ava yuvireco chupe viña, Tüpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

²² Che mu judío osepia pota tēi mbahe poromondiisa ipñratá vahe iva pendar yuvireco. Griego evocoyase osendu pota tēi ñehesa aracuasa resendar yuvireco no. ²³ Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviye acoi Ēgüe ehi tēi vahe yuvireco chupe. ²⁴ Yande rumo, Tüpa rembiporavo yaico vahe, que judío, anise que griego avei, yandeu co ñehesa Tüpa Rembiporavo Cristo resendar Tüpa pñratasa ité, imbahecuasa avei. ²⁵ Esepia niha, ava upe, Tüpa suindar mbahe aviye acoi Ēgüe ehi tēi vahe viña. Co Tüpa suindar rumo mbahecuasa aviye catu vahe ité ava tēi mbahecuasa sui iyavei acoi mbahe Tüpa suindar aviye nipiratai vahe ava upe viña, ahe rumo ipñrata catu ité opacatu ava tēi pñratasa sui. ²⁶ Che rivireta, peyemomahenduha catu co rese: Tüpa pe poravo, yepe pe pñhu pendar ndase-

taimi imbahecua vai vahe ava rovaque yuvireco viña. Ndasetaimi avei pereco pe mu seco ivate vahe viña no. ²⁷ Evocoi ava, “Ndoicuai vahe mbahe yuvireco” ehi yuvireco pëu viña. Tūpa rumo pe poravo evocoi ava imbahecua vai vahe mochi āgua. Iyavei oiporavo ava pe pāhu pendar ndoicatu tuprii vahe yuvireco ava ipīrata vahe Tūpa cuaparēhi mochi āgua. ²⁸ Oiporavo avei co ivi pipe ava remieroīro seco mbegüemi vahe, ava seco ivi coti catu vahe pe pāhu pendar co ava seco ivaté vahe reroyi āgua ²⁹ ‘toyemboivate ai eme que ava che rovaque yuvireco’ oya. ³⁰ Tūpa ité rumo yande mboyemboya Guahir Jesucristo rese, ahe avei ombou Guahir yande mboaracua āgua, yande reco mohivi āgua avei ‘toyuvirecoi cheu nara’ ohesave iyavei ‘ipīsiroprī toyuvirecoi’ oya yandeu. ³¹ Sese inungar aipo ehi ñehesa icuachiapri arachendar pipe: “Acoi ava oyecomboivate ai pota vahe, toyecomboivate catu yande Yar rembiapo rese” ehi.

Pablo omombehu curusu rese Cristo mano agüer

2 Iyavei, che rivireta, che asose cuese, añehese pëu Tūpa suindar ñehesa supi eté vahe yipindar ndicuasai vahe pipe, nañehei co ivi pipendar tēi ava mbahecua pipe, ñehesa ivate ai vahe pipe avei. ² Esepia, acoi aicose pe pāhuve cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pihañemoñeta vichico. ³ Iyavei ndachepīratai, arirīi avei che siquiyepave pëu che sose. ⁴ Iyavei acoi añehese ñehesa pīsīrosa resendar rese pëu, ndaiporui eté rumo ñehesa ivate ai vahe pe pihañemoñetasa rerova āgua. Che rumo Tūpa Espiritu pīratasa pipe añehe pëu ⁵ ‘toyeroya catu Tūpa pīratasa rese yuvireco’ che yapave pe yeroyaēhi āgua ava tēi mbahecua rese.

Tūpa oEspiritu pipe oicua uca mbahe yandeu

⁶ Ore rumo oromombehuño ité aracuasa pëu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecua ocañi tēi vahe. ⁷ Oroñehe catu aracuasa Tūpa suindar ndicuasai vahe rese, ahe yipive vireco vahe ivi apoēhi viteseva, ahe co omboyecua ramo vahe yandeu yaico vahe teco ori apirēhi vahesave. ⁸ Co ivi pipendar ava mborerecuar ta rumo ndosenducuai eté co ñehesa. Osenducua rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña. ⁹ Icuachiapri arachendar pipe aipo ehi:

“Tūpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihañemoñetai eté sese yuvireco no” ehi aracahe.

¹⁰ Tūpa rumo oicua uca Espiritu pipe yandeu cute. Esepia, Espiritu oicua tupri catu ité opacatú secocuer oico.

¹¹ Ēgüe ehi eté, inungar opacatu ava pāhuve ndipoi eté que ñepei ava pihañemoñetasa oicua vahe, iespíritu güeraño ité oicua mbahe oime vahe ipiha pipe. Ēgüe ehi avei Tūpa Espiritu güeraño ité oicua Tūpa pihañemoñetasa. ¹² Yande evocoyase ndahei co ivi pipendar tēi espíritu yaipisi, Ēgüe ehi rumo Espiritu Tūpa suindar yaipisi yaicua vahe tēi iporerecosa oporoaisusa pipe ombou vahe yandeu. ¹³ Ahe niha oromombehu Tūpa Espiritu ore mbohe vahe, ndahei ñehesa ava tēi aracuasa sui. Ēgüe orohe co supi eté vahe ñehesa Espiritu suindar oromombehu Espiritu rese yuvirecoi vahe upe yepi.

¹⁴ Acoi ava ndovirecoi vahe rumo Tūpa Espiritu opiha pipe, ndoipisii eté mbahe Tūpa Espiritu suindar yuvireco. Esepia, chupe evocoi mbahe aviye Ēgüe ehi tēi vahe, iyavei ndosenducua catui eté yuvireco. Esepia, evocoi nungar mbahe senducua Espiritu pipeño ité.

¹⁵ Acoi ava vireco vahe rumo Tūpa Espiritu opiha pipe oicatu opacatu mbahe cua āgua. Ndipoi chira rumo ambuae ava ndovirecoi vahe Espiritu opiha pipe ahe ava recocuer cua tupri āgua. ¹⁶ Esepia, icuachiapri arachendar pipe aipo ehi: “¿Ava vo oicua tēira yande Yar pihañemoñetasa viña? ¿Ava vo ombohe tēira viña?” ehi. Yande rumo yareco yande Yar Cristo pihañemoñetasa.

Pablo iyavei Apolos Tūpa upe oporaviqui vahe yuvirecoi

3 Che rivireta, ndapeguata tuprii Espiritu reroyasa pipe; pe rumo peguataño vite ava tēi pihañemoñetasa rupi peico. Sese namombehu catui ñehesa yavai vahe Espiritu suindar pëu. Esepia, pe pītanimi nungar vite tēi pe pihañemoñetasa Cristo rese. ² Sese che opombohe mbahe ndayavaimi vahe rese. Esepia, pītanimi ndoicatu vitei ocaru. Sese ocambu viteño tēi. Cūrītei rumo Ēgüe peye vite ité. Esepia, pe ndapesenducua catu vitei eté Tūpa Ñehengagüer yavai vahe. ³ Peguata viteño co ivi pipendar pihañemoñetasa tēi rupi. Esepia, peyemoecatēhi-tēhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoyase peyapo ava ndoicuai vahe Tūpa rembiapo nungar. ⁴ Esepia, aipo peyeño tēi, “Ore Pablo rupindar oroico”; ambuae evocoyase, “Ore Apolos rupindar oroico” peye-peye tēi pe yembohesa rese pe yeecopisa pipe. Aipo ehi vahe pe pāhuve inungar ava Tūpa ndoicuai vahe pihañemoñetasa.

⁵ Pesendu che ñehe: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepei-pe mboraviqui yandeu chupe yayapo vahe. Tūpa upe ore poraviquisa pipe sui niha peroya yande Yar peico: ⁶ che rane inungar añoti vahe mbahe rāhii pe piha pipe; Apolos evocoyase inungar imboihusar; Tūpa rumo inungar omboori vahe pëu. ⁷ Evocoyase ndiyai peyeroya mbahe tīsar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco. ⁸ Ore rumo oyoya tupri oroyapo mbahe pëu nara. Sese ñepei-pe Tūpa omboura porerecosa pe rese ore poraviquigüer rupi oreu.

⁹ Ore oroporaviqui vahe Tūpa upe. Pe evocoyase ivi nungar peico Tūpa poraviqui āgua iyavei pe inungar Tūpa omopuha ramomi vahe oi peico. ¹⁰ Che inungar oi apo cuapar oyapo rane vahe oi vīracua āgua, ēgūe ahe imombehu Cristo resendar ñehesa pēu seroya tupri āgua. Ndiyai eté yaroya que ambuae ava tēi, Jesucristo gūeraño ité yaroyara. Ambuae evocoyase inungar oi aposar omopuha vahe ivīracuasa harive, ēgūe ehi ahe pe monguerēhi catu pe mbohe co ñehesa rese. Evocoyase inungar oi aposar amove oiporu mbahe ipocopi vahe oi apo āgua yuvireco oro, guarepochi, anise ita aviye vahe. Amove rumo oiporu avei ndipocopi vahe mbahe que ivirape tēi, capihi, anise tacuar tēi oiguā yuvireco. Ēgūe ehi aveira pe mbohesar yuvireco. Ahe ñepei-peí rumo iya oicua tuprira pe mbohe āgua yuvireco. ¹³ Ahe iporaviqui agüer rumo arī cañise icuasa tuprira ñepei-peí yuvireco. Esepia, ahe arī pipe yande Yar oura tata reseve ñepei-peí pe mbohesar poraviqui agüer cua āgua. ¹⁴ Acoi ava oporombohe tupri vahe inungar ava oyapo oi ndocai vahe, ahe oipisira oporaviqui repri; ¹⁵ ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe gūeraño evocoyase oñepisiro sāira tata guasu sui.

¹⁶ ¿Ndapeicuai vo pe yande Jesús reroyasar Tūpa rēta nungar yaico? IESpíritu niha seci eté yande piha pipe. ¹⁷ Oimese que ava yande pāhuve omomara vahe Tūpa rēta, Tūpa evocoyase omboura oñemoirosa ahe ava upe. Esepia, Tūpa rēta nimarai vahe ité; yande teieté niha Tūpa rēta yaico.

¹⁸ Peyembopa eme catu pe ae. Oimese que pe pāhu pendar oyeupe aipo “che yaracua tupri vahe aico” ehi vahe co ivi pipendar pihañemoñetasa rupi tēi, toyecomombegüemi rane oaracua āgua. ¹⁹ Esepia, ava tēi aracuasa Tūpa upe ēgūe ehi tēi vahe. Inungar icuachiapri aracahendar pipe aipo ehi: “Ava oaracua raisa pipe oyeiti uca mbahe tēi pipe Tūpa upe yuvireco” ehi. ²⁰ Iyavei aipo ehi no: “Yar rumo oicua ava tēi yaracua rai vahe pihañemoñetasa, ahe ēgūe ehi tēi vahe” ehi. ²¹ Sese ndapeyecomboivate ai chira que ava tēi porombohesa rupi peico. Esepia, opacatu mbahe pēundar ité: ²² Ēgūe ehi eté che Pablo, iyavei Apolos, Pedro avei, opacatu ivi pipendar mbahe Tūpa omoime vahe yandeu, tecovesa, manosa avei, yasepia vahe, iyavei mbahe oime vaherā, ahe niha opacatu pēu nara, ²³ pe niha Cristo upendar, Cristo evocoyase Tūpa upendar seci.

Apóstol yuvirecoi vahe poraviqui agüer

4 Iya aipo peye: “Co mbia Cristo povri pendar yuvirecoi, icuaita ité niha Tūpa suindar ñehesa oye-cua ramo vahe rese iporombohe āgua” peyera oreu viña. ² Acoi vireco vahe ocuaitarā, iya ité omboyecua ocuaita mboaviye tuprisa. ³ Mara etemo che areco pe che recocuer rese peporanduse viña. Iyavei cheu mba-hemi tēi che reraso potase que ava tēi porandusave che recocuer rese porandu āgua yuvireco. Che avei ndaicuai eté che recocuer cuapa tupri. ⁴ Yepe ndaicuai

que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vaherā pēu. Yande Yar rumo oicua. ⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesāro ranera rumo yande Yar yevi āgua. Ahe niha omboyecuara opacatu mbahe ndoyecuai vahe, iyavei omboyecuapara ñepei-peí yande pihañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepei-peí yandeu.

⁶ Che rivireta, che añehe cheyese ae, Apolos rese avei pēu mbahe tupri āgua rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi āgua’ ore yapave pēu. Pe evocoyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu. ⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¡Sese ndiyai peyecomboivate etepri co mbahe pereco vahe rese! ¡Aviye opacatu mbahe peyesui tēi pe reco vahe viña!

⁸ Ndoiyavi pereco ité vahe opacatu mbahe pe remimbotar viña, ndoyavi avei nipanei vahe ité Tūpa suindar mbahe pēu. Peyeupe revo ndoyavi mborerecuar guasu peico ore sui viña. ¡Ēgūe peye itera tarahu viña! Ahese, ore avei mborerecuar orocora pe pāhuve viña.

⁹ Ore rumo apóstol oroico vahe ndoyavi cheu Tūpa ore renoi ipa tēi vahe ore mano tēi āgua. Sese seroñrombri oroico inungar ava imboguaipe yucapirā. Ēgūe orohe oroico opacatu ava rovaque, Tūpa rembiguai eta iva pendar rovaque avei. ¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahe-cua etepri vahe peico Cristo rese pe recosa pipe. Iyavei ore ndoyavi ndaseco pīratai vahe oroico ava rembiepi-ave; aheseve avei rumo peyecomomirata tēi peico. Ore seroñrombri tēi oroico, pe evocoyase ava pe mboetei guasu pe rereco yuvireco. ¹¹ Cūritei ore oroicove vite ité ore rieporeñi pipe, ore husei tēi iyavei ndore turucuai eté. Ava rumo evocoyase mara-mara tēi ore rereco yuvireco. Iyavei ndorovirecoi ore rēta ité.

¹² Ore oroporaviquiño ité, oroyembogüerai tēi ipipe. Ava rumo iñehe mara-mara tēi eté yuvireco oreu; ore evocoyase oromboyeviño iñehe mbahe tupri pipe chupe. Ore reca-reca catuño ité ore momara āgua yuvireco; ore rumo oroñemosañi ité yuvireco chupe. ¹³ Iñehe-ñehe tēi ore rese yuvireco; ore rumo saisusa pipe oromboyevi iñehe yuvireco chupe. Ore rereco iti nungar tēi iyavei ore rereco inungar ava ēgūe ehi tēi vahe yuvireco. Cūritei ēgūe ehi viteño ité yuvireco oreu.

¹⁴ Ndahei pe mochi āgua aipo ahe icuachia pēu, ēgūe ehi rumo pe mboaracua āgua tēi. Inungar che rahir ité, che rembiaisu opovireco. ¹⁵ Esepia, yepe pereco ati pe pñiviisar Cristo rese pe reco āgua viña, ndaperecoi rumo setá pe yesupa. Esepia, che amombehuse niha ñehesa pñisirosa resendar pēu, ahese ramo peroya Jesucristo. Seroyasa pipe evocoyase che inungar pe

yesupa ité aico pëu. ¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pëu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi.

¹⁸ Amove oime pe pãhuve oyecomboivate ai vahe. "Ndou iri chietera revo cohava yande repia" ehi yuvireco cheu viña; ¹⁹ aso pãhaviño itera rumo pe repia yande Yar oipotase cheu. Ahese aicua tuprira oyemboivate ai vahe reco pĩratasa yuvireco. Ndahei chira ñehe güeraño tēi aicuara. ²⁰ Esepia, Tūpa omborerecuasave, ndahei oñehe pĩpe tēi oporocuai, opĩratasa pĩpe rumo ěgüe ehi. ²¹ ¿Mbahe pĩha peipota peico? ¿Peipota pĩha che aso vaherã pëu che ñehe pĩrata pe mboaracua ãgua mbahe pe rembiavi rese? Anise, pe moingatu rane pe recocuer, ahese asora mbahe tupri pĩpe pe piri.

Pablo oñehe ñepei Jesús reroyasar pãhu pendar oyemboaguasa vahe rese

5 Ambuae mbahe, oroyandu ñepei mbahe tēi pe pãhu pendar rembiapo oroico: oime aipo osi recocuar rese secoi vahe. Ahe angaipa guasu oyapo oico. Tūpa reroyasarēhi ité ndoyapoi evocoi nungar mbahe tēi yuvireco. ² ¡Pe rumo peyecomboivate ai peico! ¡Iyacatu rumo ndapeyembovihai chira evocoi nungar mbahe tēi repiase viña! Evocoi nungar ava iyacatu ité pemboyepipira pe pãhu sui. ³ Yepe niha che teieté ndaicoi pe pãhuve viña, pe rese che mahenduhasa pĩpe rumo aicove ité pe pãhuve iyavei aicua voi eté aipo oyapo vahe mbahe tēi recocuer inungar-ra aico vahe ité pe pãhuve viña. ⁴ Acoi peñemonuhase, che avei niha aicora pe pãhuve che mahenduhasa pĩpe, yande Yar Jesucristo pĩratasa avei secoira pe rese. ⁵ Evocoyase ahe ava timondosa Carugar povrive secocuerai mocañi ãgua. Ipipe sui iespĩritu oñepisĩrora yande Yar Jesucristo yeve curi.

⁶ Ndapeyecomboivate ai chira peico co mbahe tēi oimese pe pãhuve. Esepia, peicua niha co ñehesa aipo ehi vahe: "Yepe chíhimi imondosa pan mboapeposa panguã rese viña, ahe rumo oiquepa tupri panguã rese" ehi. ⁷ Evocoi ava rembiapo ai inungar pan mboapeposa pe pãhuve. Sese pemombopa pe pãhu sui peicoēhi ãgua angaipa pĩpe peico vaherã inungar panguã ipiasu vahe ndovirecoi vahe omboapeposa oyese. ěgüe peye ité niha. Esepia, yande Yar Jesucristo iparaisu omano yande repirã. ěgüe ehi ahe inungar ovesa yucapri angaipa mocañi ãgua judío pieta Pascua pĩpe yepi. ⁸ Sese inungar judío omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipiasu, ndayapepoi vahe rereco ãgua, ěgüe vahe aveira yaico yande reco piasu supi eté vahe pĩpe; yamombopara yande recocuerai yandeyesui, ahe ava reco momara-mara tēisa, mbahe naporai vahe avei.

⁹ Ambuae aicuachía vahe pĩpe aipo ahe pëu:

"Ndapemborii chira ava oyemboaguasa-guasa tēi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tēi oyerure vahe" ahe. Co che ñehesa rumo ndahei Tūpa ndoicua vitei vahe upendar. Esepia niha, pe yepepi ãgua ñepei reseve evocoi nungar ava sui, pesē itera co ivi pĩpe sui viña. ¹¹ Che niha aipo ahe icuachía pëu: ndapemborii chira que ava acoi "che Jesucristo reroyasar aico" ehi angahu tēi vahe, que oyemboaguasase, anise oipota raise que ambuae ava mbahe, oyerogui tēi vahe que mbahe rahanga upe, iyavei imahechiroi ai vahe, caguar tēi vahe, anise imonda rai vahe. Evocoi nungar ava piri ñepei yepe ndapecarui chietera. ¹² Cheu ndiyai eté ava ndoyuvirecoi vahe Tūpa rese recocuer rese porandu ãgua. Tūpa ahe ava yuvirecoi vahe recocuer opara oicua coiye. Pe rumo pe cuaita ité Tūpa rese yuvirecoi vahe upe pe porandu ãgua secocuer rese. ¡Sese pemboyepipiño ité osi recocuar rese secoi vahe pe pãhu sui!

Ndiyai Jesús reroyasar serasosa ndahei vahe Jesús reroyasar mborerecuar rovai

6 Ambuae mbahe no: Oime pe pãhu pendar "co mbia oyapo mbahe tēi cheu" ehi vahe ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evocoi mbia rembiapo ai rese porandu ãgua! Iyacatu rumo Tūpa reroyasareta upe perasora secocuer moingatu ãgua yuvireco viña. ² Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoyase, ¿ndapeicatui pĩha co tecocuer mbahemi tēi moingatu peico? ³ ¿Ndapeicuai vo yande avei yaporandura Tūpa rembiguai recocuer rese curi? Evocoyase, ¡peporandu catu itera co ivi pĩpendar tecocuer rese peyeupe yepi! ⁴ Percose evocoi nungar mbahe tēi peyeupe, ¡mahera peiporu ava ěgüe ehi tēi vahe tūparo pendar upe mbahe moingatu ãgua! ⁵ Che aipo ahe ité pëu pe chí ãgua: ¿Ndipoimi eté vo pe pãhuve que ñepei yaracua vahe oicatu vahe que mbahe tēi peyeupendar moingatu ãgua? ⁶ ¡Amove pevava peyeupe! ¡Ndahei co güeraño, oime avei pe pãhu pendar Tūpa reroyasar vıraso ambuae omboetas mborerecuar Tūpa reroyasarēhi upe tēi mbahe moingatu ãgua!

⁷ Supi eté evocoyase pe reco pĩpe peyavi guasu ité. Iya peñemosañora co mbahe tēi pe mboetas suindar upe viña. ěgüe ehi eté, iya mbahe pe reco vahe, "Toñomiño yuvireco" peyera chupe pe raso rãgüer sui Tūpa reroyasarēhi mborerecuar upe viña. ⁸ Amove rumo pe avei peyapo mbahe-mbahe tēi eté; peñomi avei pe mboetas Tūpa reroyasar mbahe.

⁹ ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pĩpe curi! Peyembopa ucai rene chupe. Esepia, acoi ava oyemboaguasa-guasa tēi vahe, mbahe rahanga upe tēi oyerogui vahe, omendasa sui oyemboaguasa vahe, cuimbahe pãve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe,

osavaipo serai vahe, imahechiroi ai vahe, iyavei ava virocua yesapihaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi. ¹¹ Oime avei niha acoi pe pāhu pendar yipindar ēgūe ehi vahe yuvireco viña, cūrítei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espiritu pīratasa pipe avei no.

Yande rete ipehapri Tūpa upe nara yaguasaēhi āgua

¹² Iyavei ambuae mbahe: Supi eté niha “aviye que mbahe che remimbotar ayapo vāherā” ehi vahe. Amove rumo co mbahe ndahei aviye vahe yandeu iyavei yandeu ndiyai evocoi nungar mbahe povrive nara tēi yande reco āgua. ¹³ Supi eté niha aipo ehi vahe: “Yande rembihi yande aviter upe nara, yande aviter evocoiyase yande rembihi upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuitai yaguasa tēi vāherā, ahe rumo yande Yar upe nara. Yande Yar evocoiyase yande retecuer upe nara secoi. ¹⁴ Inungar Tūpa ombogūerayevi yande Yar, ēgūe ehi aveira yande mbogūerayevi opīratasa pipe coiye.

¹⁵ Peicua niha yande rete Jesucristo upendar ité. Ndiyai eté evocoiyase Jesucristo upendar yande rete mondo āgua cuña gūetecuer omondo-mondo tēi vahe upe. ¹⁶ Peicua niha pe aipo nungar cuña ndipihai vahe rese peicose, pe retecuer evocoiyase ñepepe vahe nungar ité pereco. Esepia, icuachiapri arachendar pipe aipo ehi yandeu: “Yepe ñuvirío ava yuvirecoi vahe viña, ñepepe vahe nungar ité rumo secocuer yuvireco” ehi. ¹⁷ Acoi ava secoi vahe rumo yande Yar rese, ahe secocuer evocoiyase ñepepeño ité.

¹⁸ Peyepipi voiño catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, gūetecuer ae evocoiyase omomara catu gūembiapo pipe sui tēi. ¹⁹ ¿Ndapeicuai vo pe retecuer Espiritu Santo upendar ité secoi, iyavei ahe Espiritu Tūpa remimbou pe rese ité secoi? Sese pe retecuer ndahei pēundar ité. ²⁰ Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviye vahe pe retecuer pipe Tūpa mboetei āgua.

Poromboaracuasa mendasa resendar

7 Cūrítei amboyevira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña. ² Pe aguasa-guasa tēiēhi āgua rumo peyacatu perecora pe rebireco, cuña avei evocoiyase tovireco oyacatu omer yuvireco. ³ Cuimbahe tomboaviye omendasa gūembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase. ⁴ Esepia, cuña omenda vahe gūetecuer ndahe iri oyeupe nara vireco, omer upe nara ité

rumo. Iyavei cuimbahe omenda vahe, ndahei avei gūetecuer oyeupe nara vireco, ahe rumo gūembireco upe nara ité vireco. ⁵ Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui āgua Tūpa upe, ahe aviyeño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Carugar pe ātoi tiētera.

⁶ Ndahei che opocuai ‘tomenda yuvireco’ viya pēu. ⁷ Che rumo aipota che nungar pe mendaēhi āgua viña. Tūpa rumo ombou yande yacatu yande recorā.

⁸ Iyavei ndomenda vitei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar. ⁹ Ndapeicatuise rumo pe ñemosā āgua, pemendaño. Esepia, aviye catu itera pemenda poropota rai rāgūer sui.

¹⁰ Che rumo amombehu omenda vahe upe ‘topoi eme cuña omer sui’ viya. Ndahei cheyesui tēi aipo ahe. Ahe rumo yande Yar porocuita ité. ¹¹ Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei gūembireco sui.

¹² Ambuae ava opacatu upe rumo cheyesui eté aipo ahe. Esepia, ndipoi eté yande Yar ñeche sesendar: acoi Jesús reroyasar virecose gūembireco ndahei vahe Jesús reroyasar, ahe cuña secoi potaño itese sese, evocoiyase ahe topoi eme ité gūembireco sui. ¹³ Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoiyase ahe cuña topoi eme ité ichui. ¹⁴ Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tūpa rovaque. Égūe ehi aveira cuimbahe Jesús reroyasar virecose gūembireco Jesús reroyasarēhi. Égūe ndehise rumo, tahir avei ndoyavii chira ndahei vahe Jesús reroyasar rahir yuvireco viña. Ahe tahir rumo Tūpa upendar yuvirecoira. ¹⁵ Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rebireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase gūembireco Jesús reroyasar sui, topoiño avei ichui. Esepia, Tūpa oipota mbahe tupri pipe yande reco āgua.

¹⁷ Co rumo mbahe: peicoveño yipindar pēu Tūpa ombou vahe rese seroyaēhi vitesendar pipe. Ahe aporocuai opacatu Cristo upendar ñemonuhasa rupi yepi. ¹⁸ Acoi Tūpa osenoise ava judío oyeupe nara, ahe judíoño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco āgua. ¹⁹ Esepia, ndahei chira que judío, anise que ndahei vahe judío yaicose aviye catura yaico. Co rumo Tūpa oipota catu, “Tomboaviye opacatu che porocuita amondo vahe chupe yuvireco” ehi yandeu. ²⁰ Sese peicoveño peyacatu pe recocuer pēu Tūpa ombou vahe rese pe renoiēhi vitesese. ²¹ Pe mbiguai tēi peico vahe pe renoise Tūpa, pepihañemoñeta etepri eme evo-

coiya pe recosa sui pesē vaheṛā rese. Peicatuse rumo, peyepipiño itera ichui. ²² Esepia, yepe pe mbiguai tēi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tēi peico vahe, yepe ēgüe peye viña, peroyase rumo Cristo, ahese sembiguai peico. ²³ Tūpa upe rumo perepī iteanga, sese ndiyai eté ambuae ava povrive tēi peico. ²⁴ Sese, che rivireta, peicoveño itera pe recouer pipe inungar yipindar Tūpa pe renoise.

²⁵ Cuñatai ndomenda vitei vahe resendar rese rumo ndarecoi Yar suindar che ñehe āgua. Che rumo amondora che pīhañemoñetasa yuvireco chupe. Esepia, yande Yar che paraisuerecosa pipe imboyeroyapri aico. ²⁶ Cheu aviye catuño ité ndomendai vahe ēgüe ehiño tēise yuvireco viña. Esepia niha, tecocuer yavaí eteanga cūrítei. ²⁷ Acoi pemendase, pepoi eme ité oye-sui. Acoi ndapemendaise, ndapeseca iri chietera peye-upe. ²⁸ Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavaí catura co ivi pipe yuvireco chupe. Sese che ndaipotai evocoi nungar mbahe pipe yuvireco vaheṛā.

²⁹ Che rivireta, aipo mbahe amombehu pota pēu: ndipucuvei co ari naporai vahe yepota āgua yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opīhañemoñetasa pipe. ³⁰ Acoi ndovihai vahe, toyuvirecoi eme ovīharēhisa pipe iyavei acoi ovīharete vahe, ahe toyuvirecoi eme avei ovīharetesa pipe, iyavei virocua vahe mbahe omahera, toyuvirecoi inungar mbahe ndovirocuai vahe omahera viña yande Yar rese opīhañemoñetasa pipe. ³¹ Acoi ava ipīhañemoñeta catu vahe co ivi pipendar mbahe poru āgua, tipīhañemoñeta eme evocoi nungar mbahe tēi rese yuvireco. Esepia, co ivi pipendar mbahe yasepia vahe, ocañi tēira.

³² Che ndaipotai co ivi pipendar recouer rese tēi pe pīhañemoñeta etepri peico. Acoi mbia ndomendai vahe rumo, ipīhañemoñeta catuño ité yande Yar rese imboviha āgua; ³³ omenda vahe rumo ipīhañemoñeta avei co ivi pipendar recouer rese tēi, güembireco mboviha āgua rese avei. ³⁴ Evocoyase ndahei ñepe i opīhañemoñetasa vireco. Ēgüe ehi avei cuña opīhañemoñeta rereco; cuña ndomendai vahe, ipīhañemoñeta yande Yar upendar mbahe rese, güetecuer iyavei oespiritu rereco tupri āgua Tūpa upe. Cuña omenda vahe rumo ipīhañemoñeta co ivi pipendar recouer rese tēi omer mboviha āgua oico.

³⁵ Che aipo ahe pēu 'mbahe tupri pipe toyuvirecoi' viya, ndahei mbahe yavaí vahe pipe pe reco āgua. Che aipota ité pe reco catuprisa pipe yande Yar upeño ité mbahe peyapo vaheṛā pe recoeté pipe peico.

³⁶ Acoi ava ipīhañemoñeta vahe güembirecovi rese omenda āgua, "Aviyeteramo ayavira mbahe ichui iyavei niha osupiti ité imenda āgua, sese aviye catu yamenda" ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa. ³⁷ Acoi mbia rumo ndovirecoise que ocuaita

omenda āgua iyavei oicatu ité güemimbotar apo, ipīhañemoñetase ñepe i reseve güembirecovi rese omendaēhi āgua, ahe aviyeño ité. ³⁸ Evocoyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepepi āgua omer sui imanoēhi viteseseve. Omanose rumo ichui, ahese ramo ahe cuña upe aviyeño imenda iri āgua güemimbotar rupi. Yande Yar reroyasar rese avei rumo omendara. ⁴⁰ Ndomenda irise rumo, aviye catuño itera. Ahe che pīhañemoñetasa, iyavei revo ahe che pīhañemoñetasa Tūpa Espiritu suindar.

Pablo oñehe tembihu mbahe rahanga upe tēi seropovēhepri rese

8 Cūrítei ambuae mbahe amombehu pēu mbahe rahanga upe mbahe mimba yucapri seropovēhepri rese. Supi eté aipo ehi vahe: "Yande opacatu yareco yande mbahecuasa" ehi. ¡Yande rumo, "Aicua tupri opacatu mbahe" yande hesa pipe yayecomboivate ai tēi! Yayeaisuse rumo, ahese yañepitívii catu Cristo reroya tupri āgua. ² Supi eté yande, "Che aicua ité co mbahe" vahe tēise que mbahe upe, ipane vite ité rumo icua tupri āgua yandeu. ³ Yande rumo yasaisuse Tūpa, ahese Tūpa, "Co ava cheundar ité secoi" ehira yandeu.

⁴ Evocoyase co mbahe rahanga upe tēi seropovēhepri mbahe mimba yucapri hu āgua rese añehe. Yande niha yaicua co mbahe rahanga ēgüe ehi tēi vahe co ivi pipe, iyavei oime ñepe i güeraño ité Tūpa. ⁵ Esepia, yepe ava upe setá tūpa ivave, ivive avei viña (setá iteanga niha oime tūpa angahu tēi, yar angahu tēi avei). ⁶ Yande rumo yaicua ñepeño ité Tūpa oime, ahe niha yande Ru opacatu mbahe aposar. ¡Evocoyase yande chupe nara ité yaico! Oime avei yande Yar ñepe i vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovēhepri, ipīhañemoñeta, "Co mbahe roho tūpa rahanga upe seropovēhepri" ehi viteño yuvireco oyeupe. Ipipe sui omomara uca Tūpa rese opīhañemoñetasa yuvireco.

⁸ Supi eté tembihu ndayande pñitívii Tūpa rese yaico vaheṛā. Ndahei mbahe roho husa pipe sui tēi aviye catura yaico iyavei ndayahuisse, ndahei chira mbahe tēi catu yaico. ⁹ Pēu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa uca. ¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerēhi aveira ihu uca āgua chupe. ¹¹ Evocoyase co pe mbahecuasa pipe pemo-cañi uca yande rivri Tūpa rese noviracua tupri vitei vahe peico. ¡Cristo rumo omano ipñisiro āgua! ¹² Esepia, pemomarse Tūpa rese ipīhañemoñetasa, ahese pe ae peyemboangaipa uca Cristo amotarēhisa pipe peico.

¹³ Sese yande mbahe roho husa pipe sui yamboangaipa ucase yande rivri viña, ndayahu iri chietera evocoi mbahe roho yande rivri mboangaipa ucaëhi ägua.

Apóstol Pablo ndoporandu potai oyeupe nara apóstol upendar mbahe rese ava upe

9 Supi eté che aicatu avei apóstol upendar mbahe pisi ägua viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico. ² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voifño itera cheu. Esepia, che remimombehu pipe sui niha yande Yar peroya peico. Ipipe sui avei icuasa tupri apóstol che recosa pëu.

³ Ahe ñehesa amboyevi tupri ava che recoäha potasar upe yuvireco yepi. ⁴ Iya ité che remihura pisi, che iguarã avei pe sui viña. ⁵ Iyavei inungar ambuae apóstol viraso ité güembireco oyeupi yuvireco yepi, Jesús rivireta avei ëgüe ehi yuvireco, ëgüe ehi avei Pedro, ëgüe ahe aveira niha che viña. ⁶ ¿Ore güeraño tie Bernabé rese oroporaviquira ambuae mbahe rese ore recove ägua? ⁷ Esepia, sundao nomboepii sundao güeco ägua, ahe rumo oporaviquisa reprim oipisiño. Iyavei ava uva tšsar, ahe avei yaviyese, ohu güemitigüer. Iyavei ovesa rãrosar, ahe avei omohe ovesa cambi igua. ⁸ Che ndahei cheyesui tēi aipo ahe pëu. Esepia niha, Moisés porocuaita pipe avei aipo ehi yandeu: ⁹ “Pe-mondo eme tivi yuru rese mbahe icaruëhisa mbahe rãhi oicambese yuvireco pëu” ehi. Supi eté co Tüpa aipo ehi vahe ndahei tivi upeño. ¹⁰ Yande reco tupri ägua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rãhi, oyoya osãro mbahe oipisi vaherã oporaviquisa sui oyeupe nara yuvireco yepi. ¹¹ Evocoyase ore avei oroñoti Tüpa Ñehengagüer pe piha pipe ore pe mbohese. Sese aviyeño aveira oroipisise mbahe pe sui oreyeupe nara viña. ¹² Esepia, ambuae oicatu mbahe pisi ägua oyeupe nara yuvireco pe sui. Evocoyase ore avei niha orocatu mbahe pisi ägua pe sui ore poraviquisa pipe viña.

Ore rumo ëgüe ndorohei eté. Esepia, ore oroñemosaño ité ‘tiñehe mara eme co ñehesa Cristo re-sendar rese yuvireco’ ore yapave. ¹³ Pe niha peicua ité acoi oporaviqui vahe judío tüparove, ichui ocaru yuvireco. Esepia, yuvirohu mbahe roho Tüpa upe seropovëhepri tüparo rocarve yuvireco yepi. ¹⁴ Ëgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oya-pave oreu. ¹⁵ Che rumo ndaporandui eté mbahe pe rembiereco rese vichico pëu yepi. Ndahei ‘tombou mbahe yuvireco cheu’ che yapave aipo aicuachía imondo pëu. Che rumo evocoi nungar mbahe rese ayembovihaño ité. ¡Yepe che yucapri tēira tieporëhi viña, ndaporandui chietera rumo mbahe rese pëu! Esepia, namocañi potai eté co che yembovihasa cheyesui.

¹⁶ Che rumo amombehuse co ñehesa pširosa re-sendar ava upe, ndiyai ayecomboivate ai ipipe. Esepia niha, che cuaita ité yapo ägua iyavei, ¡cheparaisu

itera ndamombehuse ava upe co ñehesa viña! ¹⁷ Tüpa ndache cuaise oñehe mombehu ägua viña, che rumo che querëhisa pipe amombehuse, ahese aipisira Tüpa suindar porerecosa. Ëgüe ndahei rumo. Esepia, Tüpa che cuaisa pipe niha amombehu. ¹⁸ Ndaporanduse mbahe rese pëu amombehuse co ñehesa pširosa re-sendar, ipipe ayemboviha ahe che vihasa porerecosa nungar cheu. Yepe aicatu mbahe rese che porandu ägua viña, che rumo ëgüe ndahei eté.

¹⁹ Yepe che ndahei ava povrive tēi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquerëhi vahe Cristo reroa ägua’ che yapave. ²⁰ Esepia, aicose judío pãhuve, secocuer rupi aicoveño Yar upe imonguerëhi catu ägua yuvireco. Ëgüe ahe ité, aicose ava Moisés porocuaita povrive yuvirecoi vahe pãhuve, che avei eté mborocuaitavrive nungar aico. Ndahei rumo Moisés porocuaita povrive ité aico imboaviye ägua. ²¹ Iyavei ava ndoyuvirecoi vahe Moisés porocuaita povrive, ipãhuve aicose, inungar ahe yuvirecoi, ëgüe ahe tupri avei imonguerëhi ägua yande Yar upe vichico. Ndahei rumo Tüpa porocuaita mboyeroaëhisa pipe aico. Esepia, Cristo porocuaitavrive che recocuer. ²² Iyavei no, aicose ava yande Yar ndoviroya tupri vitei vahe pãhuve, secocuer nungar tupri avei aico Yar upe imonguerëhi catu ägua. Ëgüe ahe opacatu ava upe ‘toñepisiro catu ahe avei yuvireco’ viya. ²³ Che ayapo co opacatu mbahe ‘taseta catu co ñehesa pširosa reroasasar yuvireco’ che hesa pipe, ‘taipisi avei co porovasasa oime vahe co ñehesa reroaya pipe’ che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoyase inungar co ivava catu vahe, ëgüe peye avei pe recocuer pipe Tüpa porerecosa pisi ägua peico. ²⁵ Iyavei opacatu oyemoingatu vahe oguayi ägua oñearo tupri opacatu mbahe tēi sui oyemomaraëhi ägua yuvireco. Ahe ëgüe ehi porerecosa ndipocopii vahe pisi ägua tēi yuvireco. Yande rumo yayemomborarara porerecosa apirëhi vahe pisi ägua yaico. ²⁶ Evocoyase che avei, ndahei ava oyahuva-huva tēi vahe nungar aico Tüpa remimbotar apo ägua iyavei che ndaicoi ava iguayi tēi vahe nungar. ²⁷ Che rumo mbiguai nungar che retecuer areco, amboyeroa uca pihañemoñeta tuprisa upe. Esepia, ndaipotai ambuae ava mbohe pare imombopri tēi nungar guayisa sui che yereco ägua.

Ndiyai aracahendar ava recocuerai rupi yaguata

10 Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe pštu Tüpa imboguata agüer rese. Iyavei para guasu Pira vahe avei osasa opacatu yuvireco aracahe. ² Ëgüe ehi eté opacatu oguatase mbahe pštuvri rupi iyavei para guasu osasase yuvireco, ndoyavii ñapiramombri yuvirecoi Moisés recocuer rupi oguata ägua aracahe. ³ Iyavei oyoya guasu yuvirohu tembihu Tüpa ombou vahe chupe nara yuvireco, ⁴ opacatu guasu avei oihu ita sui Tüpa ombou vahe

ihiguarã yuvireco. Ahe ita rumo inungar Cristo secoi opacatu iguatasa rupi yuvireco. ⁵Yepe ãgüe ehi Tüpa opacatu yande ramoi judío upe viña, setá iteanga rumo ava ipãhu pendar ndahei aviye vahe ipiha rupi yuvireco. Ipipe sui opa omano ivi iporupirêhisa rupi aracahe.

⁶Co opacatu mbahe sembiapogüer yuvireco ahe yande mbohe água 'toipota rai eme mbahe-mbahe tõi inungar ahe ava yuvirecoi' oyapave yandeu. ⁷Sese yande ndayamboetei chira mbahe rahanga tõi, inungar ahe ipãhu pendar yuvirecoi aracahe. Aipo ehi eté niha icuachiapri aracahendar pipe: "Co ava ocaru vahe, yuviroihu avei yuvinoi. Ichui yuviropüha, oyembovihaño pieta apo yuvireco" ehi. ⁸Ndayayemboaguasa-guasa tõi chaveira inungar ahe amove ãgüe ehi yuvireco. Ipipe sui tõi ñepeí ari pipe ahe opa omano veintitrés mil tupri yuvireco aracahe.

⁹Ndayasecoãha-ãha tõi chaveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco. ¹⁰Iyavei ndayande ñehe mara-mara tõi chira yande Aposar rese, inungar ahe ãgüe ehi yuvireco. Ipipe sui Tüpa ombou güembiguaí ava yucasar íva sui ahe ava yucapa água aracahe.

¹¹Co opacatu yande ramoi upe mbahe oime vahe aracahe icuachiapri yande ipa yaico vahe upe nara: "¡Peicua catu aipo nungar mbahe sui!" he água yandeu. ¹²Sese yande "che aico tupri ité Tüpa rese" yahe vahe, yaicua catura rumo. Aviyeteramo yaviapira mbahe tõi pipe. ¹³Pe recoãhasa rumo oyoya tupri ité ambuae ava recoãhasa rese. Pe rumo peyeroñaño itera Tüpa rese, ahe niha oicua pe yemoviracuasa, noñocuai chira tecoãhasa imbou pëu. Acoi mbahe tõi oimese pe recoãhase, Tüpa ombou voiñora pĩratasa evocoi mbahe tõi sui pe sã água, chupe pe ñemosa água.

¹⁴Sese che rivireta, che rembiaisu, peyepipi mbahe rahanga mboeteisa sui. ¹⁵Ava niha peico pesenducua vaheã mbahe, evocoyase peporandu co che remimombehugüer rese peyeupe icua tupri água.

¹⁶Yaihuse uva ricuer sovasapri, "Aviye ndeu, che Yar" yande hesa pipe, ahese oyoya guasu Cristo rese yaico suvi pipe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara.

¹⁷Yepe yande reta yaico viña, opacatu rumo yahu ñepeí pan sui. Sese yande ñepeí vahe ité yaico.

¹⁸Peyapisaca acoi ava aracahendar Israel recocuer rese. Esepia, acoi yuvirohu vahe Tüpa upendar mbahe seropovêhepri, ahe evocoyase chupendar ité yuvirecoi. ¹⁹Che rumo, "Mbahe rahanga aviye vahe ité" ndahei, iyavei, "Mbahe roho icuavêhepri mbahe rahanga upe, aviye catu ité" ndahei avei. ²⁰Co rumo, acoi ava ndoicuai vahe Tüpa oicuvêhe mbahe caruguar upe tõi yuvireco yepi. Ndahei rumo Tüpa upe nara ité ãgüe ehi yuvireco. Che evocoyase ndaipotai eté caruguar upe nara tõi ãgüe peye vaheã peico. ²¹Peihuse rumo yande Yar upendar igua, ndiyai peihu avei caruguar upendar igua; iyavei pehuse yande Yar upendar mbahe, ndiyai avei pehu caruguar upendar mbahe.

²²¿Yasecara pĩha yande ae yande Yar ñemoiro água yandeyeupe? ¡Yande rumo ndahei chira ipĩrata catu vahe yaico ichui!

Yande renosesa mbiguai tõi nungar yande recosa sui mbahe tupri apo água

²³Amove ava, "Aviyeño opacatu mbahe yayapo yande remimbotar rupi" ehi yuvireco viña. ãgüe ehi eté niha, ndahei rumo opacatu aviye, ndahei avei co opacatu mbahe yande pĩtivii catu Cristo rese yande reco água. ²⁴Ndapesecai chira que mbahe aviye vahe peyeupe nara tõi, pesecara rumo ambuae ava upe nara.

²⁵Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tüpa rese pe pihañemoñetasa momarañhi água. ²⁶Esepia, ivi opacatu ipor reseve, ahe yande Yar upendar.

²⁷Acoi Tüpa reroyasarêhi pe soho ucase oyepiri pe mbocarü água, peso potase ipiri, pehuñora mbahe imboupri pëu. Ndapeporandui chira rumo sese chupe Tüpa rese pe pihañemoñetasa momarañhi água.

²⁸Acoi ava, "Co mbahe roho icuavêhepri mbahe rahanga upe" ehise pëu, ndapehui chira ahe mbahe roho. ãgüe peyera pëu imombehusar rereco meguañhi água, ava pihañemoñetasa momarañhi água avei.

²⁹Supi eté che añehe co ambuae ava pihañemoñetasa rese, ndahei pe pihañemoñetasa rese.

Oimera rumo oporandu vahe sese "¿mahera aipo ndiyai chira cheu mbahe apo, ndaheise ambuae ava pihã rupi?" ehi vahe. ³⁰Iyavei aipo ehira no: "Aviye ndeu' ahese Tüpa upe mbahe ahu vahe rese, ¿mahera pĩha che roñora yuvireco ahuse viña?" ehira. ³¹Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tüpa mboeteisa pipe. ³²Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei. ³³Che opacatu che rembiapo pipe aipota ité mbahe tupri apo água opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro água yuvireco.

11 Che raquicue moñã catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvireco yepi

²Che rivireta, che, "Aviye ité yuvirecoi" ahe pëu yepi che rese pemahenduha vitesa iyavei peguataño vitesa che opombohe vahe agüer rupi. ³Che rumo aicua uca tupri pota pëu, Cristo niha secoi ñepeí-peí cuimbahe cuaisar, cuimbahe evocoyase güembireco cuaisar secoi. ãgüe ehi avei Tüpa Guahir Cristo upe. ⁴Acoi cuimbahe Cristo upe ñemonuhasave oãca ndiru ndosequiise oyerure água, anise Tüpa Ñehengagüer mombehu água, ahe ãgüe ehi güerecuar Cristo mboeteiêhisa pipe. ⁵Iyavei acoi cuña ndoyopiise oãca

oyeroqui água, anise Tūpa Ñehengagüer mombehu água, ahe êgüe ehi omer mboyeroyaêhisa pipe. Ahe cuña evocoyase ndoyavii oñeapipa tupri vahe. ⁶ Acoi cuña ndoyopi potaise oâca, tayapecâraisa tupri. Ochĩse rumo oapecârai água, evocoyase toyopiño oâca sereco. ⁷ Cuimbahe rumo ndoyopii chira oâca sereco. Esepia, ahe Tūpa rahanga ité secoi iyavei iporañetesa omboyecua ité oyese. Cuña rumo omboyecua omer recocuer oyese yuvireco. ⁸ Esepia, Tūpa oyapose cuimbahe, ndahei cuña sui vinose, cuimbahe sui niha cuña oyapo. ⁹ Iyavei ndahei cuña upe nara Tūpa oyapo cuimbahe, ahe rumo oyapo cuña cuimbahe upe nara. ¹⁰ Co rese cuña virecora oâcapisa omer mboyeroyasa mboyecua água omahese Tūpa rembiguai eta yuvireco sese. ¹¹ Yande, yande Yar reroyasar yaico vahe co tecocuer rese, yañepitivii oyoya yaico. Evocoyase cuimbahe ndoicatui cuña porêhi; cuña avei ndoicatui cuimbahe porêhi yuvireco. ¹² Esepia, yepe supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tūpa suindar yuvirecoi.

¹³ Evocoyase peyapisaca tupri co rese: ¿Iya pĩha cuña noñeacapii vahe oyerure Tūpa upe? ¹⁴ Yande ité yaicua yemochisa cuimbahe oyemboha vucuse. ¹⁵ Cuña rumo oviharete oha vucu porañetesa rese. Esepia, chupe imondopri ité ñacapii água. ¹⁶ Acoi ava iñehe-ñehe tẽi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar êgüe ehi avei yuvireco.

Yande Yar rese yemomahenduha raisa

¹⁷ Co ambuae mbahe rese rumo ndaicatui eté, “Aviye tupri yuvirecoi” che he água pẽu. Esepia, aipo pe ñemonuhase, mbahe tẽi eté aipo peyapo. ¹⁸ Esepia, yipindar che ayandu peñemonuhapase aipo oyese yande Yar mboetei água pe pihañemoñetasa ndahoyoyai pipe peico. Amove ayanduse pe rerâcua, aroya ité. ¹⁹ ¡Iya ité revo pihañemoñetasa ndahoyoyai vahe reime água pe pãhuve Jesús reroyasar supi tupri vahe cua tupri água! ²⁰ Peñemonuhase pe pihañemoñetasa ndahoyoyai vahe pipe pe caru água, ndahei yande Yar rese pe yemomahenduhasevê gũe peye. ²¹ Espia, aipo pecaruse, pe rane aipo pepoyava pecaru. Ambuae aipo evocoyase ndasiëpoi tẽi yuvireco; ambuae rumo pe pãhu pendar aipo oyembosavaipoño yuvireco. ²² Pereco niha pe rêta aheve pe caru água iyavei pe ihu água. Pe rumo pe reco pipe opa peroĩro ambuae Jesús reroyasareta peico. Ipipe avei pemochi ava ndovirecoi vahe mbahe. ¡Che evocoyase, “Aviye yuvireco” ndahei chietera co mbahe pe rembiapo ai rese pẽu!

Yande Yar rese yemomahenduhasa supi ité vahe resendar

²³ Co ñehesa aipisi vahe yande Yar suindar amombehu vahe pẽu: ahe pĩtu pipe acoi Jesús mboguisar opisi água renonde, ahe oipisi pan. ²⁴ “Aviye ndeu” ohe

pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco água. Êgüe peyera che rese pe mahenduhasa pipe peico” ehi. ²⁵ Êgüe ehi avei ocarure yuvireco, ahe oipisi igua rĩru aipo ehi: “Co uva ricuer omboyecua pẽu Tūpa oyapora mbahe ipiasu vahe pe recorã. Che ruvi pipe rumo yaposara. Evocoyase co arĩ pipe suive peihuse co, peyemomahenduhara che rese yepi” ehi. ²⁶ Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Êgüe peyera iyevĩ rãro peico.

Mara yahera yande Yar rese yayemomahenduhase

²⁷ Evocoyase acoi ava ocaruño tẽi vahe, yuviroihuño tẽi vahe avei Yar mboeteiêhisave, ahe evocoyase nomboetei yuvireco yande Yar rembiapocuer omondose güetecuer, iyavei oipiyerese vuvi. ²⁸ Sese tipihãmoñeta rane oyacatu güecocuer rese ava co pan hu água renonde, oihu água renonde avei co uva ricuer yuvireco. ²⁹ Esepia, acoi pe yemomahenduhãhisave co setecuer rese pehuse iyavei peihuse, ahese mbahe naporai vahe peseca peyeupe nara peico. ³⁰ Ichui niha setã pembaheasi, oime setã nipirata iri vahe avei pe pãhuve, oime avei omano vahe pe pãhu pendar. ³¹ Yande pihañemoñeta tuprise rumo yande reco água rese, yande Yar evocoyase nomoime chira mbahe tẽi yandeu evocoyaya yande recosa pipe. ³² Yande Yar rumo oicua yande rembiapo ai. Sese omoime mbahe tẽi yandeu. Yande reco mohivi tupri água rumo êgüe ehi yandeu, ndahei yande cañi água opacatu ava viroyasarêhi reseve.

³³ Sese, che rivireta, acoi peñemonuhase pe yemomahenduha água yande Yar rese, peñearo ranera oyoya guasu pe caru água. ³⁴ Acoi ava ndasiëpoise yuvireco, tocaru rane güëtave. Ahese yuvirasose ñemonuhase, ndipoi chira mbahe chupe. Iyavei che asose eipeve pe repia, opara ambuae mbahe amoin-gatu vicho pẽu.

Mbahecuasa Tūpa Espĩritu suindar

12 Che rivireta, che aicua uca pota pẽu co mbahecuasa resendar ñepepe-pẽu Espĩritu omondo vahe.

² Pe niha cũritei peicua tupri ité yipindar Tūpa rese peicoêhi vitese, peyembopa uca mbahe rahanga êgüe ehi tẽi, noñehei vahe upe peico. ³ Sese, che aipota peicua acoi ava iñehe mara Jesús upe ndahei Tūpa Espĩritu pĩratasa pipe êgüe ehi. Iyavei ava ndoicatui chira, “¡Jesús che Yar secoi!” ohe água opĩha pipe Espĩritu Santo ndovirecoise.

⁴ Oime setã ambuae-ae tẽi mbahecuasa Espĩritu suindar yande Jesús reroyasar yaico vahe upe nara, ahe Espĩritu rumo ñepepeño ité imondosar secoi. ⁵ Setã mbahe avei oime mbahe yayapo vaherã yande Yar upe. Ahe yande Yar rumo ñepepeño ité secoi. ⁶ Iyavei setã oime ambuae mbahe Tūpa oyapo vahe yande

rese opĩratasa pipe, Tũpa rumo ñepeĩño ité seci. Ahe oyapo opacatu co mbahe ñepeĩ-pei yande rese. ⁷ Ahe omboyecua yande Espĩritu rerecosa ñepeĩ-pei yandeu opacatu yande reco tupri ĩgua. ⁸ Espĩritu pĩratasa pipe Tũpa omondo ñepeĩ viroyasar upe iñehe ĩgua aracuasa rese iyavei ambuae upe omondo iporombohe tupri catu ĩgua ombahecuasa pipe. ⁹ Ambuae upe evocoyase omondo oyese yeroya tupri catu ĩgua oEspĩritu pipe sui avei. Iyavei ambuae upe omondo opĩratasa imbaheasi vahe mbogũera ĩgua. ¹⁰ Ambuae oipisi pĩratasa mbahe poromondiisa oyapo vaheĩ yuvireco. Ahe ichui avei vireco ambuae ava omombehu vaheĩ ñehesa Tũpa suindar yuvireco. Ambuae upe Tũpa omondo mbahecuasa espĩritu naporai vahe iyavei Espĩritu supi tupri vahe cua tupri ĩgua. Ambuae evocoyase ichui avei oicatu ñehesa ndicuasai vahe Tũpa suindar pipe oñehe ĩgua. Ahe ichui avei ambuae oicatu ahe ñehesa ndicuasai vahe mombehu tupri ĩgua ava upe. ¹¹ Ĕgũe ehi Espĩritu ñepeĩño ité gũemimbotar rupi omondo ñepeĩ-pei yande Jesũs reroyasar yaico vahe upe co mbahecuasa.

Opacatu Cristo rese yaico vahe ñepeĩño ité yande recocuer

¹² Inungar yande retecuer resendar setá mbahe oime viña, ahe rumo ñepeĩño ité; Ĕgũe ehi avei Cristo. ¹³ Ĕgũe yahe avei opacatu, yepe yande pãhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepeĩ vahe nungar yande reco ĩgua Espĩritu ñepeĩ vahe pipe. Ahe ñepeĩ Espĩritu avei opa yaipisi.

¹⁴ Supi eté yande rete resendar ndahei ñepeĩ mbahe, setá rumo mbahe. ¹⁵ Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tẽi ndaseco iri chira yande rete rese. ¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tẽi ndaseco iri chira yande rete rese! ¹⁷ Esepia, opacatu tupri yande rete sesa pãve tẽise, ndayasendui chietera evocoyase mbahe viña. Anise, yande rete yapisacuar pãve tẽise, ndayasẽtui chietera evocoyase mbahe viña. ¹⁸ Tũpa rumo ñepeĩ-pei yande rese mbahe omondo senara rupi tupri gũemimbotar rupi. ¹⁹ Yande opacatu ñepeĩ ava rete resendar nungar pãve tẽise, ndahei evocoyase opacatu tupri ava rete nungar yaico. ²⁰ Supi eté yepe setá mbahe yande rete rese, ñepeĩño ité rumo yande rete.

²¹ Iyavei que yande resa ndiyai aipo ehira yande po upe: “¡Nde Ĕgũe ere tẽi vahe eico!”; anise que yande ĩca avei, “¡Nde Ĕgũe ere tẽi vahe eico!” ndehi chira yande pi upe. ²² Esepia, yande rete resendar mbahe aviye nipiratai vahe yandeu, ahe sese rumo yayeroya catu. ²³ Iyavei yande rete rese mbahe ndayasaisu tupri vahe, ahe rumo yamboyemonda tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco. ²⁴ Oime ru-

mo ambuae yande rete resendar ndayayopii vaheĩ. Ĕgũe ehi Tũpa yande rete resendar mbahe imoingatu tupri. Evocoyase yande rete resendar mbahe ndayasaisu tupri vahe imboetepri catu seci. ²⁵ Tipo eme pihãñemoñetasa ndoyoyai vahe pe pãhuve. Oyoya pehãñeco tupri ñepeĩ-pei peyese peico. ²⁶ Evocoyase que ñepeĩ yande pãhu pendar upe mbahe tasise, opacatu ambuae upe avei tasi; anise que ñepeĩ imboyeroyapri secoise, ambuae avei opacatu oyemboviha yuvireco sese.

²⁷ Supi eté pe inungar Cristo rete peico. Ĕgũe peye ité ñepeĩ-pei chupendar ité peico. ²⁸ Ĕgũe ehi Tũpa iporavo viroyasar pãhuve, “Toime rane yipindar apóstol; ipare toime ava che ñehengagũer mombehu ĩgua, ichui ambuae upe iporombohe ĩgua, ipare ambuae mbahe ndayasepai vahe apo ĩgua, iyavei ambuae ava imbaheasi vahe mbogũera ĩgua, ambuae ava pĩtiviisar tasecoi, ambuae ava recocuer rerogua tupri ĩgua tasecoi, ambuae ava evocoyase toñehe ñehesa ndicuasai vahe pipe” ehi. ²⁹ Ndahei rumo opacatu ava apóstol yuvirecoi, iyavei ndahei opacatu Tũpa ñehe mombehusar yuvirecoi, ndahei opacatu oporombohe yuvireco, ndaopacatu avei oyapo mbahe ndayasepai vahe yuvireco, ³⁰ ndahei opacatu vireco pĩratasa oporombogũera ĩgua yuvireco, iyavei ndahei opacatu ndicuasai vahe ñehesa Espĩritu suindar pipe oñehe yuvireco, ndaopacatu avei oicua evocoi ñehesa renducua uca ĩgua ambuae ava upe yuvireco. ³¹ Peseca ru Espĩritu suindar mbahecuasa aviye catu vahe peyeupe nara.

Yembohesa yande poroaisu ĩgua resendar

Che rumo amombehura tecocuer aviye catu vahe pẽu.

13 Yepe yande yañeheño tẽise ambuae ava ñehe ndayaicuai vahe pipe, iyavei Tũpa rembiguai ñehe pipe avei viña, ndayasaisuise rumo ava ipipe, yande evocoyase Ĕgũe yahe tupri tẽi inungar mbahe guarepochi apopri siapu iteanga vahe, iyavei inungar acoi platillo siapú rai tẽi vahe, Ĕgũe yahe tẽi yaico. ² Iyavei yepe yamombehuño tẽise Tũpa suindar ñehesa ou vahe yandeu viña, iyavei yepe yaicua mbahe opacatu icuapirẽhi Tũpa suindar yaico, yarecose avei yande aracuasa opacatu yandeyese, iyavei yepe yande Tũpa rese yeroya pipe yarosirira ivitri guasu senda sui viña, ndayasaisuise rumo ava ipipe, yande evocoyase Ĕgũe yahe tupri tẽira yaico. ³ Iyavei yande mbahe opacatu yareco vahe yamboyaho-yaho tupri tẽise ava iparaisu vahe upe viña, iyavei yayoapi ucapa tupri tẽise viña, ndayasaisuise rumo ava ipipe yaico, ndayande pĩtívii eté evocoyase yande reco agũer.

⁴ Acoi ava iporoaisu vahe, ahe seco mbegũe tupri, secocuer aviye ai eté iyavei ndoporoamotarẽhii ambuae ava mbahe potasave; “Che aviye catu vahe aico” ndehi avei, ndoyecomboivate ai eté, ⁵ ahe ndovirecoi eté oporomboetẽiẽhisa, ndahei oyeupe gũeraño mbahe oipota, niñemoĩro serai vahe, ahe rumo iñero viño ambuae ava upe. ⁶ Ndahei mbahe tẽi rese oyem-

boviha; ahe rumo oyemboviha mbahe supi tupri vahe rese. ⁷ Oporoaisusa virecose oñemosañño opacatu uve, oyeroya vite sese, osãro vite mbahe tupri ichui, iyavei seco mbegũe viteño chupe.

⁸ Poroaisusa niha ndopai vahe ité. Oyepotara ari ipapri coiye, ahese ndayamombehu iri chira Tũpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiveira yande mbahecuasa. ⁹ Esepia niha, yaicua raimi tẽi mbahe iyavei chĩhi raimi tẽi yamombehu Tũpa Ñehengagũer. ¹⁰ Acoi ouse rumo oicuapa tupri vahe mbahe, ahese ndahe iri chira yaicua raimi tẽi vahe yaiporura.

¹¹ Esepia niha, chĩhivahe vite yande recose, yañehe, yandepihañemoñeta, yasenducua mbahe chĩhivahe nungar; yacuacuase ité rumo cute, yaseyapa chĩhivahe yande reco agũer. ¹² Cũritei yande ndayasenducua tuprii Tũpa resendar mbahe, inungar acoi yepia pipe yasepia hãvomi tẽi que mbahe; oyeovai eté yaicose rumo, yasenducua tupri catu itera mbahe evocoyase. Cũritei rumo yaicua raimi tẽi mbahe Tũpa suindar yaico; coiye rumo yaicua tupri catu itera, inungar ahe oicua tupri ité yande recouer.

¹³ Co oime mbosapi mbahe ndopai vaheã, ahe: Tũpa rese yande yeroyasa, mbahe yande remiaro ivave oime vahe iyavei yande yeaisusa; co imombosapisa rumo aviye catú vahe ité ambuae sui yandeu, ahe yeaisusa.

Yaseca catura Tũpa suindar ñehesa mombehu ãgua

14 Peseca catu pe yeaisu tupri ãgua peico; aheseve avei peipotara mbahecuasa Tũpa Espĩritu remimbou. Ichuindar ñehesa mombehu ãgua rese catu ité rumo peicora. ² Esepia, acoi ava oñehe vahe ñehesa ndayaicuai vahe pipe, Tũpa upe ité evocoyase oñehe; ndahei ava upe tẽi oñehe. Esepia, ndipoi eté ava iñehe renducapar. Ahe rumo oñehe mbahe ndicuasai vahe rese oespĩritu pipe. ³ Acoi ava omombehu vahe rumo Tũpa suindar ñehesa yasenducua vahe pipe, ahe oipĩtivii ambuae ava Tũpa rese iyeroya ãgua, oporomonguerẽhi catu, oporomboviha catu avei. ⁴ Acoi ava oñehe vahe rumo ñehesa ndayaicuai vahe pipe, ahe ae tẽi vireco catu Tũpa rese opihañemoñetasa. Acoi ava omombehu vahe rumo Tũpa suindar ñehesa icuapri ité, ahe ombopihañemoñetá catu Tũpa rese Cristo reroyasar yuvirecoi vahe.

⁵ Yepe aipotara opacatu pe ñehe ãgua ñehesa ndayaicuai vahe pipe pẽu viña, aviye catu rumo pemombehura Tũpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri ãgua, ahese aviyeño oñehe Jesús reroyasar rovaque. Ipipe sui ipihañemoñeta catura Tũpa rese yuvireco. ⁶ Sese, che rivireta, asose pe repia, añehese co ñehesa ndayaicuai vahe pipe pẽu, ndapesenducuai chira che ñehe viña. Amombehuse rumo Tũpa oicua uca vahe cheu que mbahecuasa supi tupri vahe re-

sendar, anise que ñehesa Tũpa suindar, anise que ambuae porombohesa, ahese pesenducua viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbi, arpa avei. Esepia, ndoyoya tupriise iñehegũer yuvireco, ndayasenducuai eté evocoyase mbahe-mbahe sapucaisa osãha yuvireco. ⁸ Anise co inungar mimbi nomoñehe tupriise vavasave nara yuvireco viña, ndipoi chietera que ava oyemoingatu voi vaheã ovava ãgua viña. ⁹ Egũe peye avei niha peico peñehese ava upe ñehesa ndayasenducuai vahe pipe, ahe evocoyase osenduño tẽi, ndosenducuai eté rumo pe ñehe yuvireco. ¡Evocoyase peñeheño tẽi eté! ¹⁰ Supi eté, setá iteanga co ivi pipe oime ambuae-ae tẽi ava ñehesa. Oime avei rumo ava osenducua vahe aipo nungar ñehesa. ¹¹ Acoi ndayasenducuaise rumo ambuae ava ñehe, yande evocoyase inungar ambuae tecua pendar tẽi yaico vahe chupe; yandeu avei evocoyase ahe ava inungar ambuae tecua pendar tẽi yuvirecoi vahe. ¹² Pe niha peipota ité pereco vaheã mbahecuasa Tũpa Espĩritu suindar yepi. Sese peporandu catu mbahecuasa Espĩritu suindar rese opacatu Jesús reroyasar pĩtivii ãgua Tũpa rese yuvirecoi tupri catu vaheã.

¹³ Sese acoi ava oñehe vahe ñehesa ndayaicuai vahe pipe, toporandu rane Tũpa upe ambuae ava upe senducua uca tupri ãgua rese. ¹⁴ Esepia, acoi yayeroquiño tẽise Tũpa upe ñehesa ndayasenducuai vahe pipe, yayeroqui yande espĩritu pipe, ndayasenducuai rumo yande yeroqui. ¹⁵ ¿Mara yahera vo evocoyase? Yayeroqui yande espĩritu pipe, yande aracuasa pipe avei. Yasapucaira yande espĩritu pipe, yande aracuasa pipe avei no. ¹⁶ Esepia, acoi Tũpa upe, “Aviye ndeu” yahese yande espĩritu pipe güeraño, evocoyase ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco. ¹⁷ “Aviye ndeu” yande hesa, aviyeteramo aviyera Tũpa upe viña, ambuae ava rumo osenduse, noipĩtivii chietera Tũpa rese imbopihañemoñeta catu ãgua senducuaẽhi pipe. ¹⁸ “Aviye ndeu” ahe Tũpa upe. Esepia, añehe catu ñehesa ndayaicuai vahe pipe opacatu pe sui. ¹⁹ Jesús reroyasar ñemonuhasave rumo aipota catu amombehu vaheã moviromi tẽi ñehesa yasenducua vahe ava mbohe ãgua setá ñehesa ndicuasai vahe pipe che ñehe rãgũer sui.

²⁰ Che rivireta, pepihañemoñeta eme chĩhivahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoẽhi ãgua. ²¹ Porocuita resendar icuachiapri arachendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara iñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe. ²² Evocoyase co ñehesa ndayaicuai vahe pipe oñehese ava Tũpa pĩratasa pipe, ahe Jesús reroyasarẽhi yuvirecoi vahe upe nara: “¡Peicua catu, co supi tupri vahe!” he ãgua. Ndahei rumo

ava Jesús reroyasar yuvirecoi vahe upendar. Ñehesa Tūpa suindar senducuapri yamombehuse rumo, ahe, “Co supi tupri vahe” he āgua Jesús reroyasar yuvirecoi vahe upe; ndahei ava seroyasarēhi yuvirecoi vahe upendar. ²³ Evocoyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroiquese pe pāhuve Jesús reroyasarēhi ndosenducuai vahe Tūpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pēu. ²⁴ Opacatu rumo peñehese Tūpa suindar ñehesa yasenducua vahe pipe, yuviroiquese evocoi nungar ava yuviraso pe pāhuve, ahe ae evocoyase, “Supi eté ayavi che recocuer Tūpa rovaque” ehira pe ñehe renduse yuvireco. ²⁵ Ēgüe ehira opihañemoñeta rai ndoyecuai vahe imboporēhipa uca oyeupe pe ñehe rendu ramose yuvireco. Ipape sui omboeteira Tūpa yuvireco. Ahese, “Supi eté catu Tūpa ité pereco peyese” ehira yuvireco pēu.

Yayapora mbahe opacatu yande cuaita rupi ñemonuhasave

²⁶ Sese che rivireta, peñemonuhase, oime pe pāhu pendar osapucuai pota vahe sapucaisa Tūpa upendar, ambuae evocoyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tūpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu āgua yuvireco. ²⁷ Acoi ava oñehese ñehesa ndayaicuai vahe pipe, toñehe ñuvirío güeraño yuvireco, anise que mbosapi ñepeipei rupi; ñepeipei evocoyase osenducua ucara iñehe ava upe oico. ²⁸ Acoi ndipoise ité rumo ambuae ava ahe ñehesa ndayaicuai vahe renducua uca āgua, ndiyai ahe oñehera yuvireco pe ñemonuhasave; oyeupeñomi evocoyase ahe oñehera ipape yuvireco Tūpa upe. ²⁹ Ēgüe peye tupri aveira pemombehuse Tūpa suindar ñehesa ambuae ava upe, peñehera ñuviriomi, anise mbosapi. Ambuae evocoyase pe pāhu pendar oyapisaca tuprira sese yuvireco ‘¿supi eté pīha?’ ohe-save. ³⁰ Que ñepeipei oñehe viteses Tūpa oicua ucase mbahe ambuae ava upe, topituhuño yipindar oñehe vahe, ambuae evocoyase toñehe pēu. ³¹ Evocoyase ēgüe peyera peñehe ñepeipei opacatu ambuae osendu vahe mbohe āgua iyavei imonguerēhi catu āgua. ³² Acoi omombehu vahe ñehesa Tūpa suindar, ahe oicatu oñehe mombituhu āgua. ³³ Esepia, Tūpa seci mbahe aviye vahe aposar, ndahei ndoyembohe catui vahe. Ndiyai cuña upe iñehe āgua pe ñemonuhasave. Esepia, ēgüe ehi avei opacatu ambuae Jesús reroyasar ñemonuhasa rupi yuvireco. Evocoyase ndiyai eté aheve iñehe āgua yuvireco chupe. Iyacatu rumo ahe imboyeroyapri yuvirecoira omer upe Tūpa porocuaita rupi. ³⁵ Oicua potase que mbahe, iya omer upe oporandura güētave yuvireco. Esepia, cuña upe ndiyai eté iporandu āgua mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tūpa Ñehengagüer ava upe peico, ndahei avei pēuñomi ou Tūpa suindar ñehesa. ³⁷ Acoi que pe pāhuve oimese “che Tūpa Ñehengagüer mombehusar aico” ehiño tēi vahe, anise que “aicua Espíritu suindar mbahe” ehi vahe, iya rumo oicua tupri co aicuachía vahe imondo pēu, ahe yande Yar porocuaita resendar. ³⁸ Ahe ndoyapisaca potaise rumo che ñehe rese, iñehe rese evocoyase ndapeyapisacai chira.

³⁹ Sese, che rivireta, peyemonguerēhi catu Tūpa suindar ñehesa icuapri vahe mombehu āgua peico. Ndiyai rumo ndapeipotai ambuae ava upe ñehesa ndayaicuai vahe pipe iñehe āgua. ⁴⁰ Peyapora rumo opacatu mbahe ñepeipei pei pe cuaita rupi mbahe tupri pipe.

Cristo cuerayevi agüer

15 Che rivireta, che aipota peyemomahenduha acoi ñehesa pñisirosa resendar pēu mombehu vahecuer rese. Co ñehesa niha peipisi. Ipape sui avei niha peyemoviracua peyese. ² Seroya pipe niha peñepisiro peico peyemoviracuase sese. Ēgüe ndapeyese rumo, peroya tupri tēi.

³ Acoi ñehesa aipisi vahe, opa uca aicua pēu. Esepia, ahe aviye catu vahe: Cristo omano yande angaipa repirā Tūpa Ñehengagüer icuachiapri rupi eté ⁴ iyavei oñoti sehögüer yuvireco. Ipape rumo, imombosapisa ari pipe, ocuerayevi iri icuachiapri rupi eté avei. ⁵ Ichui oyemboyecua Pedro upe. Ipape voi oyemboyecua apóstol yuvirecoi vahe upe. ⁶ Ichui oyemboyecua quiniento sui setá catu vahe viroyasar upe. Evocoyase oyoya guasu osepia yuvireco. Setá vite rumo sepiasarer yuvirecove vite cūrítei; amove rumo ambuae opa omano yuvireco. ⁷ Coiye oyemoporēhi Santiago upe. Ipape opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviye evocoyase che ipá oha vahe aico seroya āgua. ⁹ Esepia, che seco ivi coti catu vahe opacatu ambuae apóstol sui aico. Iyavei ndacheñeroi eté apóstol che reco āgua viña. Esepia, che yipindar seroyasar aseca-seca catu vahe mara-mara tēi sereco āgua. ¹⁰ Che rumo apóstol ité aico. Esepia, Tūpa oyapo mbahe aviye vahe ité cheu; che rovasa oico. Evocoyase che recocuer osecuñaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tēi ēgüe ahe vichico, Tūpa rumo oporovasasa pipe seci che rupi. ¹¹ Ndapepihañemoñetai chira rumo acoi oporaviqui catu vahe rese tēi. Co ñehesa Cristo recocuer resendar ore oromombehu vahe rese rumo pepihañemoñeta catura. Esepia niha, ahe peroya vahe ité peico.

Ava omano vahe cuerayevisa

¹² Oromombehu ité niha Cristo cuerayevi agüer resendar pēu. Oime rumo amove pe pāhu pendar, “¿Maha aipo ocuerayevira omano vahe yuvireco viña?” ehiño yuvireco. ¹³ Ndocuerayeviise ité rumo ava omano vahe viña, Cristo avei evocoyase ndocuerayevii

chietera viña; ¹⁴ iyavei Cristo ndocueraiveiise viña, ore secocuer oromombehu vahe evocoyase ãgũe ehi tẽi etera viña. Iyavei pe yeroyasa Cristo rese ãgũe ehi tẽi aveira viña. ¹⁵ Acoi ãgũe ehise itẽ rumo viña, ore avei evocoyase oroñeheño tẽi etera Tũpa resendar ñehesa rese oroico viña. Esepia, “Tũpa Cristo ombogũeravei” orohe itẽ imombehu ava upe oroico. Ndocueraiveiise itẽ rumo omano vahe yuvireco viña, ahese Tũpa nombogũeraveii chiveira Cristo viña. ¹⁶ ãgũe ehi etẽ, acoi omano vahe ndocueraiveiise yuvireco viña, Cristo avei evocoyase ndocueraiveii chiveira viña; ¹⁷ Tũpa rese pe yeroyasa evocoyase ãgũe ehi tẽi vahe itera viña; angaipa pipe viteño tẽi evocoyase pe recocuer viña.

¹⁸ Iyavei acoi ãgũe ehise itẽ viña, evocoyase omano vahe Cristo reroyasar, ahe avei ocañi tẽira viña.

¹⁹ Ndipoise yasãro vaheã Cristo suindar mbahe yamnose, yande evocoyase imbopapri tẽi catu itera yaico opacatu ambuae ava sui yuvireco viña.

²⁰ Cristo rumo supi etẽ ocueraivei omano vahe pãhu sui; ahe rane yipindar ocueraivei vahe. ²¹ Esepia, ñepepe ava rembiapo sui oime manosa yandeu. Evocoyase ñepepe ava rembiapo sui avei yacueraiveira. ²² Esepia, inungar acoi Adãn rembiapo ai sui ava opacatu omano yuvireco, ãgũe ehi aveira Cristo rembiapo sui opacatu ava sese yuvirecoi vahe virecora tecovesa yuvireco.

²³ Ñepepepe yandeu imombehusa rupi; yipindar Cristo ocueraivei, ichui yande seroyasar yaico vahe yacueraivei aveira sese acoi ahe oyeveise curi. ²⁴ Ahese oura ari ipa vahe cute. Yipindar rumo Cristo omocañipara opacatu seco pĩrata ãgũe ehi tẽi vahe. Ipare omondora opovri pendar Vu Tũpa upe. ²⁵ Ahe rane itẽ rumo opacatu oporocuirã oico acoi Tu opase voi etẽ omondo opacatu yamotarẽhimbar ipovrive. ²⁶ Ahese ipa manosa opa itera. ²⁷ Esepia, Tũpa osecopi opacatu mbahe imondo ipovrive, “Opacatu itẽ mbahe secopipri” ehise. Ndahei rumo Tu Tũpa avei secoi ipovrive. Esepia, Tu itẽ opacatu mbahe osecopi imondo ipovrive. ²⁸ Evocoyase, opase mbahe imondosa ipovrive, ahe ae evocoyase oyemondora Vu Tũpa povrive. Tu evocoyase secoira ivate catu vahe opacatu mbahe sui.

²⁹ Ndipoise omano vahe cueraivei ãgua yuvireco viña, ¿mbahe rese pĩha evocoyase omanose ava, amove chupe nara tẽi ambuae oñeapiramo uca yuvireco? Esepia, omano vahe ndocueraiveiise yuvireco viña, ¿mahera ru evocoyase ahe ava oñeapiramo uca chupe yuvireco? ³⁰ Iyavei ore no, ¿mahera ru evocoyase oroyemondora mbahe tẽi upe ari rupi viña? ³¹ Supi etẽ, che rivireta, ari yacatu aviye che amano vaheã opacatu co mbahe tẽi sui. Ahe pipeve avei rumo che areco itẽ che viharetesa pe rese yande Yar Jesucristo rese che recose. ³² Oime mbia Efeso pendar mbahe tẽi etẽ oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocueraiveiise rumo yuvireco viña, evocoyase ichui ndipoi chiveira mbahe aviye vahe cheu viña. Sese che ayapoño itera inungar ava aipo ehi vahe yuvireco viña

“yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi etẽ ñehesa aipo ehi vahe: “Ava naporai vahe piri peicose, ahe evocoyase vovovara pe reco tuprisa” ehi vahe. ³⁴ Pepihañemoñeta tupri iri, peyemboangaipa uca iri eme. Esepia, amove pe pãhu pendar oime ndoicuai vahe itẽ Tũpa yuvireco. Che aipo ahe itẽ pẽu ‘toyuvinochi che ñehese osenduse yuvireco’ viya.

Yande retecuer cueraiveisa resendar

³⁵ Aviyeteramo pe pãhu pendar oimera oporandu vahe: “¿Mara ehira pĩha omano vahe ocueraivei irise yuvireco coipe? ¿Mara ehi angahura pĩha setecuer ahese yuvireco?” ehira yuvireco oyeupe. ³⁶ ¡Pe aipo peye-peye tẽi peico! Esepia, mbahe rãhii yañotise, ituyu rane itẽ sorĩ ãgua. ³⁷ Yañotise mbahe, sãhii rane itẽ yañoti; ndahei ihĩ opacatu reseve yañoti. ³⁸ Ipare rumo Tũpa omondo ahe mbahe rãhii upe ihiguã gũemimbotar rupi, iyavei ambuae mbahe rãhii yacatu omondo ihiguã. ³⁹ Ndahoyoyai rumo que ñepepe mbahe miti hi ambuae mbahe miti hi rese. ãgũe vahe avei yande yaico vahe ambuae itẽ yande rete mbahe mĩmba sui; vĩrai rete ambuae itẽ iyavei pira rete ambuae tẽi no. ⁴⁰ ãgũe ehi avei niha, oime iva pendar rete, ivive ava yuvirecoi vahe rete avei no. Iva pendar rete catuprigũer rumo ndahoyoyai etẽ ivi pipendar rete rese. ⁴¹ Ari rendigũer avei ndahoyoyai yasi rendigũer rese, yasitata rendigũer rese avei. Ñepepe yasitata ambuae yasitata rese ndahoyoyai avei sendigũer yuvireco.

⁴² ãgũe ehi aveira niha omano vahe cueraiveisa; yañotise sehõgũer, ahe ituyu vaheã. Ocueraiveise rumo ndituyu iri chiveira; apirẽhi vaheã itẽ secoira.

⁴³ Tehõgũer ñotimbrĩ nimomburusai vahe; coipe ocueraiveise rumo, imboeteipri itẽ secoi. Acoi ava rehõgũer oñoti vahe yuvireco, nipirata iri etẽ oico, coipe ocueraiveise rumo, ipĩrata itera. ⁴⁴ Supi etẽ, acoi ava rehõgũer ñotisa vahe, ahe co ivi pipendar tẽi setecuer. Ocueraiveise rumo, setecuer iva pendar secoira. Esepia, oime itẽ ivi pendar setecuer, oime avei iva pendar setecuer.

⁴⁵ Supi etẽ aipo ehi icuachiapri arachendar pipe: “Yipindar ava Adãn serer vahe. Ahe sete upe ombou Tũpa secove ãgua co ivi pipe” ehi. Ichui rumo ambuae itẽ ipa Adãn nungar ou vahe, ahe rumo vireco itẽ tecovesa iva pendar ava upe imbou ãgua. ⁴⁶ Yipindar oime co ivi pipendar tecovesa. Ipare rumo oime co tecovesa iva pendar yandeu. ⁴⁷ ãgũe ehi yipindar ava ivi sui yapopri, ivi rese nara itẽ icuaita oico; coipe catu ava ou vahe evocoyase iva pendar. ⁴⁸ Inungar yipindar ava ivi suindar, ãgũe ehi avei opacatu ava ivi suindar tecovesa rereco yuvireco. Iyavei inungar Jesús iva suindar, ãgũe ehi aveira opacatu iva suindar tecovesa vireco vahe yuvireco.

⁴⁹ Iyavei inungar cũritei Adãn nungar tupri yaico; ãgũe vahe aveira yande Jesucristo iva pendar nungar tupri yaico curi.

⁵⁰ Che rivireta, co mbahe amombehu potami pëu: acoi ava upe güetecuer reseve, ndiyai eté seique água ivave Tüpa mborerecuasave. Esepia, co yande rete ocañi tēi vaheṛā, ndoipisii chira tecocuer apirēhi vahe. ⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara. ⁵² Mimbī moñehese voi yande resapihara inungar yande resapiqui vahe, ěgüe ehira secuñarosapa yande rete. Aheseve avei omano vahe ocuerayevipara apirēhi vaheṛā ité yuvireco; yande evocoyase nayamano vitei vahe, opaño tēira yande rete secuñarosa. ⁵³ Esepia, co yande rete ocañi tēi vaheṛā, ahe yande rete niha opara oñecuñaro apirēhi vaheṛā yuvireco. ⁵⁴ ěgüe ehise yandeu, ahese ramo osupitira Tüpa ñehe icuachiapri pipe imombehupri yandeu curi: “Manosa opara imocañisa” ehi vahe. ⁵⁵ Iyavei aipo ehi: “Ndayasiquiye iri chira yande mano água. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi. ⁵⁶ Angaipa niha inungar mbahe popiar omoime vahe manosa yandeu. Moisés porocuaita arachendar evocoyase ombou pīratasa angaipa upe angaipa aposar mocañi uca água. ⁵⁷ Che rumo, “¡Aviye ndeu!” ahe Tüpa upe. Esepia, ahe ombou angaipa recopi água yandeu yande Yar Jesucristo rembiapo sui. ⁵⁸ Sese, che rivireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ěgüe ehi tēi vahe.

Porerecosa Jesús reroyasar pītivii água resendar

16 Iyavei co guarepochi monuha água iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe. ² Domingu yacatu iya pe avei peipeha voimi guarepochi peico pe poraviqui repri sui yapocatu água. Eipeve che yepotase, ndapeyemañeco iri chira guarepochi monuha água rese peico. ³ Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso água yuvireco ahe pendar yuvirecoi vahe upe. ⁴ Aviyeteramo, iyase cheu, che avei asora aheve. Evocoyase ahe yuvirasora che rupi.

Pablo ipihañemoñeta oguata água rese

⁵ Che sose, asora ivi Macedonia rupi, ipare asora pe repia Corinto ve. ⁶ Aviyeteramo apita pucumira pe piri, anise aviyeteramo pe pirive ité mbahe porañehi che mombitañora. Ipare pe che pītiviiñomira peye eipeve sui ambuae tecuave che so água rese. ⁷ Ndaipotai che

opoepia raimi tēi eipeve vicho. Yande Yar rumo oipotase, aico pucu itera pe piri. ⁸ Che rumo cūritei apitaño vitera cohava Efeso ve, asepia ranera Pentecostés pieta. ⁹ Esepia, oime ité yande Yar upe che poraviquisa aviye vahe ité cohava, yepe setá iteanga ava che amotarēhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar. ¹¹ Tipo eme ñepei yepe sepia potañehisar yuvireco, iya rumo peipītivii catura che piri iyepota tupri água rese. Esepia, che iyavei ambuae Jesús reroyasar rese orosāro ité iyepota água oroico.

¹² Yande rivri Apolos upe, “Eso ambuae Jesús reroyasar piri Corinto ve” ahe tēi. Cūritei rumo niquerēhi oso pe repia; iyase chupe, ahese osora pe piri.

Pablo mahenduhasa ipa vahe

¹³ Pemahemoha peyese; peyemoviracua avei Jesús rese pe yeroyasa pipe. Peñemosaño catu pe cuaita upe. Peicoveño itera Tüpa pīratasa pipe. ¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rivireta, pe peicua Estéfnas opacatu güēta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri água yuvireco no. ¹⁶ Evocoyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

¹⁷ Pe pāhu pendar Estéfnas, Fortunato iyavei Acaico cohava oyepotase che mboviha yuvireco. Esepia, ahe oyapo ité pe ndapeicatu tuprii vahe apo yuvireco.

¹⁸ Ahe che monguerēhi catu yuvireco, ěgüe ehi avei revo pëu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvireco pëu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sētave yuvireco, ahe avei ombou omahenduhasa yande Yar rer pipe yuvireco pëu. ²⁰ Opacatu Jesús reroyasar coha pendar avei omondo omahenduhasa yuvireco pëu. Peyeovaupite catu pe reco marañehisa pipe ahe mahenduhasa mombehu peyeupe pe viharetasave.

²¹ Che Pablo, che po pipe ité aicuachía co che mahenduhasa imondo pëu.

²² Acoi ava ndosaisui vahe yande Yar Jesucristo, ahe tocañi mbahe tēi pipe. ¡Toyeví pihavi voi yande Yar ou!

²³ Yande Yar Jesucristo tape rovasa ité yepi. ²⁴ Pëu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pëu.

2 CORINTIOS

Pablo mahenduhasa Jesús reroyasar Corinto pendar upe

1 Avirave, opacatu Jesús reroyasareta Corinto pendar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pëu. Co yande rivri Timoteo avei omondo omahenduhasa pëu. ² Tapeipisi catu yande Ru Tūpa, yande Yar Jesucristo porovasasa avei pe reco tupri āgua.

Pablo paraisu agüer resendar

³ Yamboeteiño itera yande Ru Tūpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mboviha āgua yepi. ⁴ Ahe niha yande mbovihaño opacatu yande paraisusa pipe, yande avei evocoyase yaicatura ava iparaisu vahe mboviha āgua yuvireco. Ēgüe ehi eté Tūpa imbou vihasa yandeu, ahe avei yande yamondora yuvireco chupe. ⁵ Esepia, inungar Cristo imombaraisupri secoi, ēgüe vahe aveira imombaraisupri yaico yaicose sese. Cristo sui avei rumo oime itera vihasa yandeu. ⁶ Ore paraisu pe mboviha āgua ‘toñepisiro yuvireco’ ore yapave. Iyavei Tūpa ore mboviha pe mboviha āgua avei. Supi evocoyase pe peñemosañora mbegüe rupi ore paraisu agüer nungar tupri pe recose. ⁷ Ore oroyeroya ité Tūpa pe pñiviā āgua rese. Esepia, oroicua ore paraisu agüer nungar tupri peico, ēgüe peye avei peipisi ore vihasa Tūpa suindar.

⁸ Che rivireta, opomomahenduha pota mara orohe oroico ivi Asia rupi. Ore recoāhasa yavai vahe ité oime aheve oreu. Ndroicatu iri eté oroñemosa ore pñirataēhise chupe, seni orepihañemoñeta: “Yamanoño itera co mbahe-mbahe tēi pipe” orohe viña. ⁹ Supi eté oromoha ore cañi tēi āgua viña, ēgüe ehi rumo oreu oroyeroya catu āgua Tūpa rese, ndahei oreyese tēi. Esepia, ahe oporombogüerayevi vahe secoi. ¹⁰ Ahe niha ore repi ore mano rāgüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui, ¹¹ pe ore pñiviā peye pe yeroqui pipe. Ahese setá, “Aviye ndeu” ehira yuvireco Tūpa oporopñiviā ombou vahe rese oreu setá yeroquisa sui.

Mbahe sui Pablo ndosoi Corinto ve

¹² Oime mbahe ore mboviharete vahe: ore piha pipe ité oroicua oroico tupri Tūpa suindar ore reco catuprisa pipe, ore pihañemoñeta tuprisa pipe avei co

ivi pipendar ava rembiepiave, pe rembiepiave avei eté. Tūpa porovasasa pipe niha ēgüe orohe, ndahei ava co ivi pipendar mbahecuasa pipe tēi. ¹³ Esepia, che ñehe aicuachía vahe imondo pëu, aicuachía ñepei reseve pe yeroqui tupri āgua, pe senducua tupri āgua avei no. Iyavei ore cua revo chñhi peye cute. Acoi yande Yar Jesús yevise curi, ahese peyembovihara ore rese, inungar ore oroyembovihara pe rese.

¹⁵ Sese yipindar supi eté che pihañemoñeta aso va-herā ñuvirio yupagüer pe repia, pe mboviha catu āgua viña. Ēgüe ahe ité, che pihañemoñeta pe pñiri rane che so āgua che guatasa rupi Macedonia ve. Ichui ayevi pota iri pe pñiri viña, ipare pe che pñiviāmira peye ivi Judea rupi che so āgua rese viña. ¹⁷ Ndachepihañemoñeta voiño tēi che so āgua, ndahei iporombopa serai vahe aico “che co mbahe ayapora” ehi tēi vahe, ipare rumo nomboaviyei eté. ¹⁸ Tūpa rumo oicua ore ndahei, “Aviye” ore he voisa pëu, ahe pipeve avei, “Aní” ore hesa. ¹⁹ Esepia, Tūpa Rahir Jesucristo avei ñepei reseve vahe ité yayeroyá vahe sese. Ahe secocuer niha oromombehu oroico pëu, che, Silvano, Timoteo avei. ²⁰ Esepia, opacatu Tūpa remimombehugüer imboaviyasa sese. Sese niha serer pipe, “Ēgüe tehi” yahe Tūpa upe imboeteisave. ²¹ Tūpa niha opacatu yande momirata seseño ité yande reco āgua, yande poravo avei. ²² Güerer omondo yande rese ‘cheu nara’ oyapave. Ombou avei oEspíritu yande piha pipe ‘ipipe toicua che remimombehugüer rupi tupri ité mbahe amondora chupe yuvireco curi’ oyapave.

²³ Tūpa niha oicua acoi ndayeviise Corinto ve pe pñiri, ēgüe ahe pëu mbahe aviye āgua rese. ²⁴ Ndahei opocuai pota mbahe pe rembieroyarā rese. Esepia, pe Tūpa rese pe yeroyasa pipe peyemoviracuaño ité Cristo rese. Ore rumo oroipota pe pñiviā pe yemboviha āgua.

2 Co rese ndaso catu iri pe pñiri. Esepia, che aso irise pe pñiri ndopomboviha catui chira viña, ¿ava vo evocoyase che mbovihara viña? Pe ité niha che mbovihasar peico. ³ Sese che aicuachía ñehesa ipñirata vahe pëu cuese. Esepia, ndaipotai eipeve che sose, che mbovihaēhi āgua peye. Pe rumo iya ité che mboviha catura peye viña. Che ayeroya ité opacatu pe rese aviharetese, pe avei evocoyase opacatu peviharetera che rese. ⁴ Supi eté che aicuachiasa che ñehe pëu, che ae ayepihamboasi ité, ayaseho avei. Esepia, aicuachía vahe pëu ndahei pe mbovihaēhi āgua, che rumo aicuachía ‘toicua che guaisu eteprisa yuvireco’ che yapave pëu.

Oime ñerosa ava upe mbahe sembiavi rese

⁵ Acoi yande rivri omoime uca vahe viharêhisa co mbahe tēi apo pipe, ndahei che güeraño ndache mbovihai, pe avei rumo seni opacatu êgüe peye. Che, "Seni" aipo ahe ité pēu. Esepia, ndaipotai che ñehe rasi ãgua. ⁶ Co mbia upe setá mbahe peiporara uca ité, evocoi rupive iya êgüe peye chupe. ⁷ Co suive ité rumo peñerora chupe, peipitívii aveira. Esepia, aviyeteramo oviharêhisa pipe oyemocañi tēira. ⁸ Sese cūrítei opomonguerêhi ité pe mboyecua iri ãgua pe poroaisusa chupe. ⁹ Cuese ambuae che ñehe aicuachía co che pe mbohesa resendar pēu pe recoãha ãgua, "¿Oyapo itera pñha che remimombehu yuvireco?" ahe pēu. ¹⁰ Cūrítei cheñero avei que ava upe peñero vahecuer upe. Esepia, oimese que mbahe rese che ñero ãgua, Cristo rovaque êgüe ahe pe raisusave ¹¹ Carugar yande mbopaêhi ãgua. Esepia, yande yaicua tupri ité iporombopasa.

Tecua Troas ve Pablo nombohe catui opihañemoñetasa

¹² Ayepotase tecua Troas ve Cristo recocuer mombehu ãgua, oime ité yande Yar upe nara aheve che poraviqui ãgua viña. ¹³ Nambohe catui rumo che pihañemoñetasa. Esepia, ndasepiai eté yande rivri Tito. Sese, che, "Aviye" ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe tēi recopi

¹⁴ Aviye yande Ru Tūpa upe. Esepia, yande Cristo rese yaico vahe yande renose oamotarêhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe sñacua vahe yasētu vahe opacatu rupi. ¹⁵ Esepia, inungar itaisi sñacua vahe opacatu rupi, êgüe yahe avei yande Tūpa upe Cristo yande reropovêhese yaico ava ipñsiropirã upe, ava ocañi tēi vahe upe avei. ¹⁶ Ahe ava ocañi tēi vahe upe evocoi ñehesa yaru vahe inungar cañi tēisa resendar; ava ipñsiropirã yuvirecoi vahe upe rumo evocoi ñehesa ombou tecovesa. Yande ae tēi rumo ndayaicatu evocoi nungar mbahe apo. ¹⁷ Ore rumo ndahei setá ambuae ava nungar tēi oroico. Esepia, oromombehuse Tūpa Ñehengagüer, ndahei mbahe pisi ãgua tēi rese êgüe orohe, ore rumo ore pihañemoñeta tuprisa pipe oromombehu co ñehesa Tūpa rovaque Cristo rese ore recosa pipe. Esepia niha, ore semimondo oroico.

Ñehesa Tūpa remimbotar ipiasu vahe resendar

3 Ore aipo orohese, aviyeteramo pēu ndoyavii oroyecomboivate ai pota iri viña, êgüe ndorohei rumo iyavei ndorosecai icuachía ãgua ava ñehesa aviye vahe ore recocuer resendar oromondo vahe pēu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi. ² Esepia, pe ité inungar ore rembicuachía ore recocuer resendar

ore oroipota vahe, êgüe peye peico ore piha pipe. Esepia, opacatu ava pe reco tupri repiase, oicua ore poraviqui tuprisa pe pãhuve yuvireco. ³ Pe niha pemboyecua pe reco tupri pipe ore rembiapo Cristo porocuita pipe pe pãhuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pipe ité icuachiapri itape rese, Espiritu Tūpa oicove vahe suindar pipe rumo yapopri ava piha pipe.

⁴ Oroyeroya ité co rese Tūpa rese ore yeroyasa pipe. Cristo niha êgüe ehi oreu. ⁵ Ndahei oreyesui tēi oroicatu co mbahe apo. Tūpa rumo ombou oreu opacatu co mbahe apo ãgua. ⁶ Ahe niha ombou opiratasa oreu güemimbotar ipiasu vahe rese poraviqui ãgua, ndahei Moisés rembicuachiagüer rupi oroporaviqui. Esepia, ahe imboaviyeêhisa pipe yamano tēira viña. Ahe rumo Espiritu Tūpa suindar pipe oroporaviqui. Esepia, ahe ombou tecovesa yandeu.

⁷ Co Moisés recosendar porocuita icuachiasa ité itape rese, iyavei Tūpa reco porañetesa pipe ou. Israelita evocoyase Moisés rova rese nomahe catui eté yuvireco. Esepia, sendí iteanga, yepe sendigüer ogüe mbegüeño oso viña. Ahe Moisés recosendar porocuita ava upe manosa tēi güeru vahe iporañete ai eté yipindar oico viña. ⁸ Cūrítei rumo iporañeté catu ité ñehesa Tūpa remimbotar ipiasu vahe resendar Espiritu Santo ombou vahe yandeu! ⁹ Supi eté yepe iporañete ai eté Moisés porocuita acoi güeru vahe manosa yandeu viña, jco ñehesa ipiasu vahe rumo yande reco moingatu vahe iporañete catu ité ichui! ¹⁰ Esepia, co yipindar porañete vahe ndahoyoyai ñehesa cūríteindar porañete catu vahe rese. ¹¹ Acoi mborocuita yipindar ndipocopiimi vahe virecose Tūpa reco porañetesa, co ñehesa piasu ipocopi vahe rumo iporañete catu itera ichui.

¹² Ore oroyeroya ité co ñehesa ipocopi vahe rese. Sese oroñehe ava upe ore siquiyeêhisa pipe ité. ¹³ Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiaêhi ãgua ndogüe viteise sendigüer ichui aracahe. ¹⁴ Êgüe ehi ahe ndosenducua ucai eté ndoyavii sovapisa vite vahe cūrítei, êgüe ehi vite oyeroquise Moisés porocuita icuachiapri yipindar vahe pipe yuvireco. Ñomipri vahe nungar tēi chupe ahe senducuaêhi pipe. Esepia, Cristo güeraño ité oicatu sovapisa nungar rerocua ichui senducua uca ãgua chupe. ¹⁵ Êgüe ehi vite cūrítei, senducuaêhi pipe Moisés porocuita pipe oyeroqui viteño tēi eté yuvireco inungar sovapisa vite vahe. ¹⁶ Supi eté que ava oyevise yande Yar upe, ahese ramo serocuasa sovapisa nungar ichui senducua tupri ãgua. ¹⁷ Esepia niha, yande Yar Espiritu secoi. Ahe Espiritu ava rese secoise, ndahe iri mbiguai nungar yuvirecoi. ¹⁸ Sese opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaêhi ãgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, êgüe yahese, yareco catu-catu iri seco po-

rañetesa yandeyese. Yande Yar rumo acoi Espiritu sec-oi vahe ěgũe ehi yandeu.

4 Sese, “Ndorequerẽhi iri” ndorohei eté. Esepia, Tũpa ore poravo ore paraisuerecosa pipe ore poraviqui ģgua co ñehesa rese. ² Ore rumo oroseyapa opacatu mbahe tẽi ore chĩ aisa, ndoromboyecuai vahe avei ore piha pipe sui; ndoroporombopa-mbopa tẽi iyavei Tũpa Ñehengagũer ndorosecuñaro-ñaro tẽi. Ore rumo oroñehe tupri mbahe supi tupri vahe rese gũeraño. ěgũe orohe opacatu ava upe Tũpa rovai ‘Supi eté, tehi yuvireco opiha pipe’ ore yapave. ³ Yavaise co ñehesa pĩsĩrosa resendar ore remimombehu renducua ģgua, ahe ěgũe ehi ava ocañi tẽi vaherã upe. Ahe aviye oyeovapi vite vahe. ⁴ Esepia, supi eté carugar rerecuar inungar nomboesapiso vahe ahe ava yuvireco, sese ndosenducua ucai chupe ‘toviroya eme ñehesa Poropĩsĩrosar Cristo resendar porañete vahe’ oyapave. Ahe niha Tũpa recocuer mboyecuar seci. ⁵ Esepia, oromombehuse ñehesa pẽu, ndahei ore yese tẽi. Ore rumo, “Jesucristo yande Yar seci” orohe oroico. Ore evocoyase mbiguai nungar tẽi oroico pẽu Jesús raisupave. ⁶ Esepia, Tũpa aipo ehi aracahe: “Toime tesapesa pĩtumimbi vahe resape ģgua” ehi. Ahe avei osesape uca yande piha pipe ‘ipipe toicua che porañetesa che Rahir Cristo recocuer rese oime vahe yuvireco’ oya.

Yaicora Cristo rese yande yeroyasa pipe ité

⁷ Co tesapesa nungar porañete vahe Tũpa suindar rumo yareco yande retecuer pipe, inungar-ra que mbahe sepĩrusu vahe yapocatupri ivi mbahemoinda ndipocopii vahe pipe tẽi viña. Ipipe toicua opacatu ava yuvireco co pĩratasa Tũpa suindar, ndahei ore yesuindar tẽi. ⁸ Yepe mbahe-mbahe tẽi oime opacatu rupi oreu viña, oimeño ité rumo ore sã ģgua ichui. Yepe ore pihañemoñeta-ñeta tẽi mbahe rese, yande Yar rese ore pihañemoñetasa rumo ndoromocañi eté ore yesu. ⁹ Yepe ore reca-reca catu tẽi ore amotarẽhimbar yuvireco viña, Tũpa rumo ndore reyai eté; iyavei yepe ore reiti ore recipi ģgua yuvireco viña, aní eté rumo. ¹⁰ Opacatu ore guatasa rupi rumo orovirecoño ité Jesús mara-mara tẽi sereco agũer ore mano ģgua ore yese, “Toyecua avei secocuer ore rese” ore hesave. ¹¹ Esepia, ore recove viteseve imboguai pri oroico ore mano ģgua Jesús rese. ěgũe orohe secocuer mboyecua ģgua ore retecuer ndipocopii vahe rese. ¹² Evocoyase co ñehesa mombehu pipe ore manosa ore ropeña, ipipe sui rumo pesopeña tecovesa apirẽhi vahe peico seroyasa pipe.

¹³ Icuachiapri aracahendar pipe niha aipo ehi: “Ayeroya ité Tũpa rese, ipipe sui añehe” ehi; ěgũe orohe avei ore, sese oroyeroya ité, ichui oroñehe. ¹⁴ Esepia, yaicua niha acoi Tũpa yande Yar Jesús ombogũeravei vahe, yande mbogũeravei aveira supive. Ipare oyoya guasu pe reseve oyeipive yande rerecora. ¹⁵ Co opacatu mbahe tẽi oime vahe oreu, pẽu mbahe aviye ģgua rese niha ‘tovireco catu Tũpa porovasasa yuvireco; ipipe sui, Aviye ndeu, tehi setá catu ava imboetisave yuvireco chupe’ ore yapave.

¹⁶ Sese ore querẽhiño ité mbahe apo oroico pẽu. Yepe ore rete ocañi pota tẽi viña, ore recocuer rumo Tũpa ombopiasu-asuño ité ari yacatu rupi. ¹⁷ Esepia, co mbahe oroiporara vahe co ivi pipe, ahe ěgũe ehi raimi tẽi vahe, ipare rumo opaño; ahe ichui rumo oimera mbahe tupri ivate catu vahe oreu ivave apirẽhi orovireco vaherã. ¹⁸ Sese ore ndorepihañemoñeta atii chira co ivi pipendar mbahe rese; ore rumo orepihañemoñeta mbahe iva pendar ndayasepia vahe rese. Esepia, co mbahe yasepia vahe, ahe ěgũe ehi raimi tẽi vahe; co mbahe rumo ndayasepia vahe, apirẽhi vaherã ité.

5 Yaicua niha yande retecuer ndipocopii vahe, inungar oi ndipocopii vahe avei. Sese imocañisase, aviyeño. Esepia, Tũpa opa omoingatu ambuae yande rete ndopai vahe ivave yandeu. Ndahei ahe ava rembiapo tẽi. ² Supi eté yaicove vitese co yande rete ndipocopii vahe rese, yande poãesa pipe yaipota ité yande rete iva pendar. ³ Aheve yande rete ipiasu vahe yarecose, aheve ndahei chira yande hã nani tupri vahe nungar yuvirecoira. ⁴ ěgũe ehi eté yande retecuer pipe vite yaicose, yande poãese yande viharẽhisa pipe. Esepia, ndayaipotai yande hã nani tupri vahe nungar seco ģgua, yande rumo yaipota yande retecuer ipiasu vahe, ndopai vahe. Evocoyase, “Tocañipa co mbahe ocañi tẽi vaherã yande resendar tecovesa piasu, ndopai vahe rereco ģgua” vahe. ⁵ Tũpa niha yande apo ‘na tehi yuvireco’ oyapave, ombou avei oEspiritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

⁶ Sese niha yayeroyaño ité yepi; iyavei yaicuaño yande yaicove vitese yande rete rese, ndayaico vitei eté ivave yande Yar piri. ⁷ Esepia, cũritei yande Yar rese yeroyasa pipe ité yaguata, ndahei mbahe yande rembiepia pipe. ⁸ Yande rumo yayeroyaño ité sese, iyavei yaipota ité yande retecuer reya ģgua yande Yar piri yande so ģgua ivave. ⁹ Sese yaseca yande Yar mboviha ģgua yepi, que yaicove vitese yande rete rese, anise que yasẽse ichui. ¹⁰ Esepia, yande opacatu yañecuavẽhera Cristo rovai iporandusave yaipisi vaherã ñepeipei mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitese.

Ñehesa yande reco moingatusa resendar

¹¹ Ore niha oroicua yande Yar sui ore siquiye ģgua imboyeroyasave. Sese orosãha ava pihañemoñeta rerova Tũpa rese ipihañemoñeta ģgua yuvireco. Tũpa niha ore cua tupri, tapeicua avei ru ore recocuer.

¹² Ndoroñehei pẽu ore yemboivate ai ģgua tẽi. Ore rumo oroñehe pẽu ‘toviharete catu ore rese yuvireco’ ore yapave. Ipipe sui peicatura ava gũembiepia rese tẽi oyemboivate ai vahe upe iñehe mboyevi ģgua. Esepia, ahe ndahei ava piha pipendar rese oyemboviha yuvireco. ¹³ Ndayaracuai vahe nungar ore rerecose amove pe pãhu pendar yuvireco. Tũpa upe rumo ěgũe orohe oroico. Yaracua vahe nungar rumo, ore rerecose peye, pẽu mbahe aviye ģgua rese ěgũe orohe. ¹⁴ Cristo poroaisusa, ahe ité ore reroguata catu. Esepia, supi

eté ahe omano opacatu ava repirã, ipipe sui yaicua opacatu ava ocañi tēi vaheṛã yuvireco viña. ¹⁵ Cristo niha omano opacatu yande repirã. Yande yaicove vite vahe evocoyase ndahe iri yandeyeupe nara tēi yaico; yande rumo yaico chupe nara ité. Esepia, ahe omano, ocuerayevi yande rese. ¹⁶ Sese, iya ité oreu ore pihañemoñetañi iri ãgua que ava rese, ava tēi pihañemoñeta rupi. Yepe yipindar inungar ava ivi pipendar tēi ěgüe orohe ore Cristo rese ore pihañemoñeta oroico viña, cūritei rumo ěgüe ndorohe iri orepihañemoñeta sese. ¹⁷ Evocoyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipindar vahe sese. Opacatu ité oyembopiasu iri.

¹⁸ Co mbahe opacatu Tūpa oyapo yandeu, ahe niha Cristo rembiapo sui yande recocuer moingatu oyeupe nara. Ipape oreu avei ombou co ñehesa mombehu ãgua ambuae ava upe secocuer moingatu ãgua avei. ¹⁹ Aipo oyapave aipo ehi: Tūpa ombou Guahir Cristo co ivi pipe ava recocuer moingatu ãgua ‘toyevi cheu’ oya; ipipe sui avei ahe ava angaipagüer omocañi yuvireco ichui. Ore evocoyase ore cuai ahe ñehesa ava recocuer moingatusa resendar mombehu ãgua ava upe. ²⁰ Ore evocoyase Cristo porocuaita rupi oroñehe vahe oroico, inungar Tūpa ité oñehera pēu viña. Sese, “Peyevi Tūpa upe, ahe pe recocuer moingatura oyeupe nara” orohe Cristo rer pipe pēu. ²¹ Yepe Cristo ndoyapoi eté angaipa, Tūpa rumo vireco uca angaipa viyar nungar yande repirã yande reco ñvi ãgua Cristo rupi yande guatase.

6 Ore pe mboetasa co Tūpa upendar mboraviqui resendar ore recosa pipe: “Peicua catu, pemocañi tēi rene Tūpa porovasasa peipisi vahe” orohe pēu. ² Esepia, Tūpa aipo ehi icuachiapri aracahendar pipe: “Acoi arí aviye vahe pipe niha che asendu pe yeruresa; iyavei ahe arí poropñisirosa pipe opopñivii” ehi. ¡Ahe arí oyepota cute! iyavei oime ité cūritei ñepisirosa.

³ Ore niha ndoromboyecuai ore reco ai ava pãhuve. Esepia, ndoroipotai que ava Tūpa upe ore poraviquisa rese iñehe rai ãgua yuvireco. ⁴ Ore rumo oromboyecua ité Tūpa rembiguai ore recosa. Esepia, ore reco mbegüesa pipe oroñemosañi mbahe-mbahe tēi upe yepe ipane mbahe oreu viña, iyavei mbahe yavaise; ⁵ ěgüe orohe avei ore nupa-nupase, ore roquendase avei iyavei omonguerēhise ava rehii ore amotarēhi ãgua yuvireco. Oroyapo avei mboraviqui ipĩrata vahe; amove ndoroquei eté, setá rupi ndoreriepoi tēi avei. ⁶ Oromboyecua avei ore reco maranehisa, ore mbahecuasa supi eté vahe, ore reco mbegüe tuprisa, yeaisusa orovireco avei no. ěgüe orohe ité niha Espiritu Santo pĩratasa pipe, ore poroaisusa supi eté vahe pipe avei. ⁷ Ore remimombehu supi eté vahe pipe iyavei Tūpa pĩratasa pipe avei oroico. Ore niha ore reco tupri pipe orosecopi mbahe-mbahe tēi. Ipape avei oroyopei. ⁸ Amove ava ore mboetei ai, amove rumo oñemoiro yuvireco oreu; amove avei oñehe tupri ai ore rese yuvireco, ipape rumo iñehe-ñehe tēi ore rese yuvireco yepi no. Iyavei amove oporombopa tēi vahe nungar

ore rereco yuvireco, yepe oromombehu tēi mbahe supi eté vahe viña. ⁹ Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco, oricoveño ité rumo; iyavei amove ore mombaraísusa catu tēi, ndore yucái eté rumo ipipe yuvireco. ¹⁰ Amove ndoyavii ndoroviñai vahe yuvireco chupe, ore rumo oroviñaño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

¹¹ Che rivireta Corinto pendar, ore ñehesa pipe opacatu mbahe oromboyecua pēu iyavei pe raisu ãgua orovireco ore piha pipe tuvichá pe rese. ¹² Ndorehãpisii pe rese pe raisu ãgua; pe rumo ěgüe ndapeyei ore rese. ¹³ Che niha opovireco che rahir nungar; pemboyevi avei catu ore pe raisusa oreu.

Tūpa oicove vahe rēta nungar ité yaico

¹⁴ Ndapeyovaichoi chira ava Tūpa ndoviroyai vahe rese. Esepia, ndoyoyai eté pe pihañemoñetasa. ěgüe ehi eté teco ñvisa ndoyoyai teco rai rese inungar tesapasa ndoyoyai pñtumimbi vahe rese. ¹⁵ Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tūpa reroyasar Tūpa reroyasarēhi rese yuvireco? ¡Aní eté! ¹⁶ ¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pipe aracahe:

“Che aicovera seseve iyavei aguatara ipãhu rupi yuvireco; che avei aicora iTūpa ité; ahe evocoyase cheundar yuvirecoira” ehi.

¹⁷ Iyavei aipo ehi:

“Sese peyepipi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸ Che aicora pe yesupa; pe evocoyase peicora che rahir, che rayri avei’ aipo ehi yande Yar güeco pĩratasa pipe” ehi.

7 Che rivireta, che rembiaisu, co Tūpa remimombehu imboaviyepirã yandeu. Sese yande yamoin-gatu tupri yande recocuer chupe yarecoēhi ãgua yande retecuer iyavei yande espíritu mbahe tēi pipe. Iyavei Tūpa mboeteisa pipe yasecara yande reco catupri ãgua chupe nara güeraño ité.

Corinto pendar ava recocuer recuñarosa resendar

² ¡Che pisi peye pe piha pipe! Ndoroyapoi niha mbahe tēi que ava upe, ndoromomarai eté que ava recocuer, ndoroporombopai avei. ³ Ndahe pe recocuer rese che ñehe raisave aipo ahe pēu. Supi eté yipindar, “Che pihave ité opoaisu, pēu nara avei aicove, amano aveira pēu” ahe acoi pēu cuese. ⁴ Ayeroya ité pe rese, pe rese avei aviharete. Che paraisu pãhuve ayemonguerēhi iyavei ayembovihareteño.

⁵ Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-

mbahe tēi oreu opacatu rupi: oime ore amotarēhimbar iyavei oime ore yepihamondiisa. ⁶ Tūpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase. ⁷ Ndahei rumo Tito yepotaseño oroviharete, ahe avei oyemboviha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharēhi agüer cheu, pemahenduhaño ité aipo che rese pe che raisusave yepi. Aipo nungar renduse ayembovihá catu.

⁸ Yepe che ñehe aicuachía vahecuer imondo pēu ndape mbovihai viña, cheu rumo aviyeño cūrítei. Yipindar rumo ayepihamboasi aicuase che ñehe tasí iteanga vahe pēu; chíhi rupi tēi rumo ndapevihai peyeroqui pare sese. ⁹ Cūrítei che avihareté. Ndahei rumo pe viharēhisa rese ēgüe ahe. Esepia, co pe viharēhisa sui pemboasi pe angaipa Tūpa upe pe yevi āgua, evocoi nungar Tūpa oipota. Evocoiyase ore ñehe ndoyapo mbahe naporai vahe pēu. ¹⁰ Esepia, co nungar viharēhisa Tūpa oipota vahe yande angaipa mboasi uca, chupe yande yevi āgua. Ipipe sui niha yañepisiro yande pihañemoñeta reroaēhisa pipe. Co ivi pipendar tēi viharēhisa rumo manosa tēi vireco yandeu. ¹¹ Pe rumo peñemosañe pe viharēhisa upe; ahe aviye Tūpa upe. ¡Pesepia ru co mbahe aviye vahe pe recocuer pipe oime vahe evocoi Tūpa remimbou pe viharēhisa sui cute! Supi eté rumo, peyapisaca iyavei pe querēhisa pipe peyoepi, pemboasi pe piha pipe ité co mbahe tēi oimese pe pāhuve, iyavei peyembosiquiye peico. Ichui che repia pota ité peye, iyavei pequerēhi ité mbahe moingatu āgua. Sese pemboyepi ité evocoi mbahe tēi aposar peyesui. Che aicua cute pēu ndahei pe piha rupi co nungar mbahe tēi oimese. ¹² Cuese aicuachiasse evocoi che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tūpa rovaque. ¹³ Co rese ore oroyemboviharete.

Iyavei oroviha catu Tito yembovihasa repiase. Esepia, pe avei niha opacatu pemboviha catu ité pe recocuer pipe. ¹⁴ “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipipe nachí eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe. ¹⁵ Iyavei cūrítei ahe pe raisu catu ité pe rese omahenduhase opacatu pe poreroyasa rese. Iyavei peipisi tupri ité imboeteisave sereco. ¹⁶ ¡Ayeroya ité pe rese, sese aviha ité!

Ava querēhisa porerecosa mondo āgua Jerusalén pendar upe

8 Che rivireta, cūrítei che amombehu potami pēu mara ehi mbahe tupri apo Tūpa ava viroyasar upe ivi Macedonia rupi. ² Yepe ahe ava recocuer yavai eté yuvireco chupe secoāhasa pipe viña, ovihareteño rumo ipipe yuvireco; yepe iparaisu vahe pāve tēi, iporecoño ité rumo yuvireco. ³ Supi eté oquerēhisa pipe

omondo ité ocatugüer rupi; amove oseca iri mbahe güemimbotar rupi yuvireco. ⁴ Ahe, “Ore avei catu toroipñivii ambuae Tūpa reroyasar” ehi yuvireco. ⁵ Ahe rumo oñocua iri ore pihañemoñetasa yuvireco. Yande Yar upe rane oyemondo. Ipare Tūpa remimbotar rupi ēgüe ehi avei oreu yuvireco. ⁶ Evocoiyase ore aipo orohe Tito upe pēu: “Tomboyeapi iri co porerecosa monuha āgua ava upe” orohe. Esepia, yipindar ahe osepe pe pāhuve, ahe pe pñivii imboipi āgua. ⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tūpa ñehesa, pereco ité Tūpa suindar mbahecuasa, pequerēhi ité Tūpa upe mbahe apo āgua iyavei ore raisu ité peye. Evocoiyase ēgüe peye aveira co nungar poroaisusa apo.

⁸ Ndahei pe cuaisa pipe aipo ahe pēu, che rumo ‘toicua ambuae ava rembiapo oquerēhisa pipe oyapo vahe yuvireco’ che yapave. Sese niha peicua, supi eté vahe piha pe poroaisusa. ⁹ Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pipe sui niha pe iva pendar mbahe pereco.

¹⁰ Pēu mbahe aviye āgua che añehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querēhisa pipe peyapo. ¹¹ Cūrítei pemboaviye catu pe porerecosa pe querēhisa yipindar pe reco vahe pipe; pemondoñora mbahe peicatugüer rupi. ¹² Esepia, acoi que ava omondo pota vahe mbahe, Tūpa oipisi ahe iporerrecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

¹³ “Toyemombaraisu ava pñiviiisa pipe yuvireco” ndahei rumo pēu. ¹⁴ Cūrítei mbahe pe rembiereco eta pipe peipñivii catu ambuae ava ipane vahe mbahe yuvireco chupe. Virecomise mbahe, ahe avei pe pñiviiira yuvireco pēu mbahe ipanese. Evocoiyase pe recocuer oyoya tupri itera. ¹⁵ Inungar Tūpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi tēi mbahe omonuha vahe, nipanei mbahe chupe” ehi.

Pablo omondo Tito indugüer reseve Corinto ve

¹⁶ Aviye Tūpa upe ombopihañemoñeta Tito pe rese inungar che pihañemoñetasa pe rese yepi. ¹⁷ Ahe viroya ité che ñehe. Güemimbotar rupi eté rumo iquerēhi oso āgua pe repia.

¹⁸ Supi oromondo yande rivri, ahe opacatu ambuae Jesús reroyasar oicua iporaviqui tupri aise ñehesa pñisirosa rese yuvireco. ¹⁹ Sese opacatu oiporavo yuvireco ore rupi iguata āgua ore pñivii vaherā avei co porerecosa reraso āgua. Ore ēgüe orohe oroico yande Yar mboetei āgua rese ‘toicua ore querēhisa pipe ité oropropñivii yuvireco’ ore yapave. ²⁰ Ore ndoroipotai que ava oñehe tēira ore rese yuvireco co porerecosa monuhasa pipe sui. ²¹ Esepia, ore oroyapo pota mbahe aviye vahe, ndahei Tūpa rovaque güeraño, opacatu ava rembiepiave avei.

²² Supi avei oromondo ambuae yande rívrí. Ahe omboyecua ité oreu oquerēhisa opacatu mbahe güembíapo pipe. Ahe cūrítei iquerēhí catu ité. Esepia, oyeroya ité pe rese. ²³ Acoi oporanduse que ava Tito rese yuvireco pēu, “Ahe oyoya Pablo rese oporaviquí vahe pe pītívii āgua” peyeñora. Acoi oporanduse avei ambuae yande rívrí rese yuvireco pēu, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe. ²⁴ Sese, pe recocuer cua āgua, pemboyecua catu pe poroaisusa supi eté vahe chupe yuvireco. Evocoyase toviroya ité che ayeroyase iyavei ayembovihase pe recocuer rese yuvireco.

Porerecosa imonuhapri Jesús reroyasar upe

9 Porerecosa imonuhapri Jesús reroyasar upe nara rese rumo ñahehe iri pēu. ² Esepia, che aicua pequerēhí ité ipītívii āgua. Evocoyase che viharetasa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pītívii āgua cuese ambuae araviter suive yuvireco” ahe yuvireco chupe. Evocoyase pequerēhise ité ipītívii āgua, ahese setaño ité oymonguerēhí yuvireco. ³ Che rumo amondo co yande rívrí yuvireco pēu cūrítei “ēgüe tehi tēi eme che ñehesa aviye vahe sesendar yuvireco’ viya pēu. Pe yemoingatu tupri āgua ité aipo ahe pēu; ⁴ aní acoi arasose Macedonia pendar cheyeupi, sembiepiave ndapeyemoingatu vītei chira peico. Ēgüe peyese ore mochi guasu uca tiētera peye. Esepia, che ayeroya ité pe rese. Pe avei evocoyase pechīra. ⁵ Sese che pīhañemoñeta yīpīndar añehe co mbosapí yande rívrí upe yuvireco, ahe ranei ore renonde yuviraso āgua pe pīri pe pītívii āgua co porerecosa aviye vahe monuha āgua rese, acoi cuese pe remimombehugüer rupi. Evocoyase ahe pe porerecosa pe remimonuha opara pemoingatu tupri ité pe avagüer mboyecua āgua, ndahei chira rumo pe recatēhisa pipe.

⁶ Peyemomahenduha co rese: acoi noñotí atīimi vahe mbahe, chupe movíromi tēi avei iha; acoi oñotí atí vahe rumo mbahe, ahe setá catu avei iha chupe. ⁷ Ñepipei iya opīhañemoñetasa rupi omondora oporerecosa Tūpa upe yuvireco, ndahei chira opīha vīracuasa pipe tēi iyavei ndahei chiaveira ambuae ava ocuai pīratasa pipe tēi. Esepia, Tūpa osaisu ava oviharetasa pipe omondo vahe oporerecosa chupe. ⁸ Tūpa niha oicatu opacatu mbahe aviye vahe mondo āgua pēu arí yacatu rupi pereco vahe rā opacatu mbahe ipane vahe pēu iyavei sumbírer pipe opacatu ambuae mbahe aviye vahe rese pe poropītívii āgua. ⁹ Inungar icuachiapri pipe aipo ehi:

“Ahe iporereco ai iparaisu vahe rese yepi. Ahe mbahe aviye vahe sembiapo nocañii chietera” ehi.

¹⁰ Tūpa niha ombou mbahe rāhii ava remitīra, mbahe semihura avei. Sese ombou catura mbahe pēu iyavei ombouvicha catura pe rembiapo aviye vahe ava pītívii āgua. ¹¹ Tūpa ombou catura opacatu mbahe pe rembierecorā ava upe imondo catu āgua pe avasa pipe. Ore orovirasose porerecosa pe remimbou yande rívrí-

ta upe, ahe evocoyase, “Aviye ndeu” ehira Tūpa upe yuvireco. ¹² Esepia, co pemondo vahe yande rívríeta pītívii āgua, ndahei peipītívii mbahe ipane vahe rese güeraño, ichui avei niha, “Aviye Tūpa upe” ehira yuvireco. ¹³ Ahe evocoyase omboeteira Tūpa yuvireco. Esepia, co pe poropītíviiisa pipe pemboyecua itera pe Cristo ñehe reroyasa peico. Ahe avei omboeteira Tūpa yuvireco. Esepia, pe pemondoño itera mbahe pe porerecosa chupe iyavei opacatu ambuae ava upe. ¹⁴ Evocoyase ahe oyeroquira pe rese iyavei pe raisu etepriya yuvireco. Esepia, Tūpa pe pītívii eté oporovasasa pipe. ¹⁵ ¡Aviye Tūpa upe! ¡Esepia, ahe ombou mbahe tuvichá vahe aviye catu vahe yandeu, ndayaicatui vahe mombehu tupri āgua!

Pablo cuaita apóstol seco āgua

10 Che Pablo añehe Cristo poroaisusa, seco asiēhisa pipe avei pēu. Amove ava pe pāhu pendar, “Seco mbegüemi tēi yande pāhuve oicose, amombri güecose rumo oñehe pīratá iteanga” aipo ehi tēi yuvireco cheu viña. ² Che rumo asose pe repia, ndaipotai che pīratasa mboyecua āgua pe pāhu pendar upe. Amove rumo ava pe pāhu pendar ipīhañemoñeta: “Oyapo mbahe co ivi pipendar pīhañemoñetasa rupi tēi” ehi yuvireco cheu. Sese che ayemoingatuño ité evocoi nungar ava upe añehe pīrata vahe rā. ³ Supi eté, yepe co ivi pipe orocove viña, ore rumo ndoroyapoi mbahe ava co ivi pipendar rembiapo nungar. ⁴ Esepia, ore yoepisa ndahei ava co ivi pipendar yoepisa nungar; orovireco rumo Tūpa pīratasa mbahe tēi seco pīrata vahe recopi āgua ava aracuasa tēi recopi āgua avei. ⁵ Ahe ipipe ore opa orosecopi yepoepi episa iyavei opacatu semira-mira tēi vahe güeco ivate aisa pipe ndoicua uca potai vahe Tūpa recocuer ava upe. Iyavei opacatu ava pīhañemoñeta raisa orosecopi Cristo reroya tupri āgua yuvireco. ⁶ Iyavei ore oroyemoingatu ité opacatu ndiporeroyai vahe recocuer reroyi āgua. Pe rane rumo peroya tupri rā.

⁷ Pe rumo pemaheño tēi ahe ava recocuer rese. Acoi ava pe pāhu pendar oicua vahe Cristo rese güecosa, toicua tupri avei ore Cristo rese ore recosa yuvireco. ⁸ Yepe ayecomboivate che mborerecuasa rese pēu viña, ipipe rumo nachí eté. Esepia, yande Yar ombou mborerecuasa cheu pe recocuer moviracua tupri āgua, ndahei rumo pe recocuer momara āgua. ⁹ Aní chira, “Pablo yande mbosiquiye pota güembicuachía pipe” peye cheu. ¹⁰ Esepia, amove ava pe pāhu pendar, “Oñehe oicuachía vahe ombou yandeu, ahe ipīratá, yavai avei yandeu; ahe ité rumo aní angai vahe secoi yande pāhuve iyavei iñehe ēgüe ehi tēi vahe” ehi yuvireco cheu. ¹¹ Toicua catu ru yuvireco: eipeve oroso irise, inungar amombehu che rembicuachía pipe amombri che recose, ēgüe ahe tupri aveira yapo pe pāhuve.

¹² Ndoromboyoyai eté ore recocuer ava oyese tēi oñehe vahe recocuer rese. Esepia, omboyoyase oyese, ndoyapisacai eté yuvireco. ¹³ Ore rumo ore remimombehu pipe ndoroyapiraisai chietera ore cuaita ore

yecomboivatesa pipe. Tūpa rumo güemimbotar rupi ombou ore poraviqui āgua oreu, eipeve pe rese ore poraviqui āgua avei. ¹⁴ Ore rumo ndoroyapirasai ore cuaita mombehusa icuachía pëu. Esepia, supi eté ore ranei eté oroico pe pāhuve, ore ranei avei oroviraso Cristo resendar ñehesa imombehu pëu. ¹⁵ Ndoroyapirasai avei ore ñehe pipe ambuae ava poraviquisa sui tēi. Ore rumo, orosāro ore oroporaviqui catu va-herā pe pāhuve Tūpa rese pe yeroyasa rupi. Ndoroyapirasai avei rumo ore cuaita. ¹⁶ Iyavei orosāro ñehesa pñsirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tēi oroyecomboivate oroico.

¹⁷ Acoi ava oyeecomboivate pota vahe, toyeecomboivate catu yande Yar rese. ¹⁸ Esepia, acoi ava “che aico tupri” ehi vahe ndahei ahe osē tupri güecoāhasa sui yande Yar rovaque; “Aviye ité co mbia” ehise rumo yande Yar chupe, ahe osē tupri güecoāhasa sui.

Pablo iyavei apóstol angahu tēi yuvirecoi vahe

11 ¡Peñemosa iriñomi tēira cheu co che ñehe ndayaracuai vahe nungar pipe che ñehese! ² Esepia, che cherecatēhi ité pe rese, ahe tecatēhisa ou cheu Tūpa sui. Che aipota Cristo upe opomondo vahe pe reco maranehisa pipe, inungar cuñatai ndaseco marai vahe imondopri cuimbahe upe imenda āgua. ³ Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe pñhañemoñetasa rerova āgua Cristo mboeteisa supi eté vahe sui. ⁴ Esepia, peñemosañe ava oñehe vahe pëu ambuae Jesús rese ndoyoyai vahe ore remimombehu rese. Ichui peipisi pe querēhisa pipe ambuae espíritu peipisi vahecuer sui. Iyavei ambuae ñehesa pñsirosa resendar peipisi avei ndoyoyai vahe ore pëu oromombehu vahe rese. ⁵ Che rumo namohai eté ivi coti catu tēi aicora evocoi supi peguata vahe apóstol yemboivate ai tēi vahe sui. ⁶ Yepe ndayembohei che ñehe tupri āgua ité, che rumo areco che mbahecua, ahe oromboyecuaño ité opacatu ore rembiapo pipe pe rembiepiave.

⁷ Ndamombehui eté niha ñehesa pñsirosa resendar pe cheu imboepi āgua; pe recocuer mboivate catu āgua rumo Tūpa rovaque ēgüe ahe che reco yeminisa pipe. ¿Mbahe tēi pñha ayapo ēgüe ahese pëu? ⁸ Aipisi ambuae ava Jesús reroyasar sui guarepochi, pe recocuer rese che poraviqui āgua. ⁹ Iyavei acoi aicose pe pāhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. Ēgüe ahe che pepoisupave pe mañecoēhi vichico. Ndopomañecoi chietera niha mbahe ipanese cheu. ¹⁰ Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi virocua vahe herā co che viharetasa che sui yuvireco. ¹¹ ¿Mbahe rese pñha aipo ahe pëu? ¿Pe rañsuēhisave pñha? ¡Tūpa rumo oicua che pe rañsusa!

¹² Ayapoño itera rumo co mboraviqui cheu imboepihisa pipe vichico co ambuae pe pāhu pendar

ava pe mbopaēhi āgua yuvireco. Esepia, che nungar yuvirecoi pota tēi viña. ¹³ Ahe rumo ndahei apóstol supi tupri vahe yuvirecoi, ahe oporombopa tēi, “Ore apóstol oroico” ehi tupri tēi yuvireco. ¹⁴ Yaicua niha Carugar rerecuar oporombopa. Esepia, oyeapo inungar Tūpa rembiguai amove. ¹⁵ Sese yaicua avei Carugar povri pendar oporombopasa pipe oyeapo inungar Tūpa ñehe mombehusar yuvireco. ¡Ahe chupe rumo oimera Tūpa ñemoirosa mbahe sembiapocuer rupi curi!

Pablo oiporara mbahe-mbahe tēi apóstol güecosa pipe

¹⁶ Aipo ahe iri pëu: tipo eme ava “ndayaracuai” ehi vahe cheu. Acoi, “Ēgüe ehi oico” peyese cheu, tañe-heño ayase ndayaracuai vahe nungar, che avei evocoyase tayeecomboivateño vichico. ¹⁷ Ndahei rumo yande Yar che cuaisa pipe aipo ahe, che aracuaēhisa nungar pipe rumo aipo ahe che yemboivate aisa pipe. ¹⁸ Esepia niha, setá iteanga ava ahe ae tēi oyemboivate ai güecocuer aviye angahu vahe tēi pipe. Sese che avei ayemboivatera. ¹⁹ Esepia, yepe pe imbahecua vai vahe nungar peico, pemboyoyá catu pe querēhisa pipe ava ndayaracuai vahe. ²⁰ Pe niha pemboyoyaño acoi que mbiguai tēi nungar pe rereco vahe, que mbahe pe rembiereco sui tēi oicove vahe, que pe mbopa tēisar, pe roerōrosar, que pe rova pete-petesar avei. ²¹ Che chñsa pipe aipo ahe co imombehu, jore reco mbegüe etepri evocoi nungar apo āgua pëu!

Acoi oñehese ambuae ava oyeupendar mbahe rese oyemboivate aisa pipe, che avei evocoyase ēgüe ahera. Aipo ahese rumo aviye ndayaracuai vahe nungar aico. ²² Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico. ²³ “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri tēi aico yuvireco ichui, inupambri catu aico ichui yuvireco, setá rupi avei seni-seni che yuca uca che mombaraisusa pipe yuvireco. ²⁴ Cinco yupagüer judío che nupá iteanga treinta y nueve tupri tucumbo pipe yuvireco. ²⁵ Mbosapi yupagüer che nupasa ivira pipe, ñepeu rupi evocoyase che api-apisa ita pipe. Mbosapi yupagüer avei oñeapivii iar ipive che guatasa rupi cheu, ñepeu pñtu, ñepeu ari avei avevui tēi para guasu aviter rupi vichico. ²⁶ Setá aguata opacatu rupi, iyavei ñai rupi mbahe-mbahe tēi oime cheu, aico avei imonda rai vahe pāhuve; che mu judío mbahe tēi vahe pāhuve avei aico iyavei ndahei vahe che mu pāhuve no. Aico avei tecua guasu pipe mbahe tēisave, amombri vahesa rupi iyavei para guasu pipe, iyavei mbahe-mbahe tēisave Jesús reroyasar angahu tēi pāhuve aico. ²⁷ Aporaviqui ité iyavei ayapo mbahe cheu yayai vahe; iyavei setá yupagüer ndaquei eté; aiporara avei tieporēhi iyavei husei; setá rupi ndacarui; sōhisagüer avei aiporara, ndacheturucuai avei vichico.

²⁸ Ndahei co opacatu mbahe güeraño aiporara, ari yacatu rupi che mahenduhaño ité avei opacatu tecua rupindar Jesús reroyasar rese. ²⁹ Oimese que oiporara vahe mbaherasicuer, che avei ayandu co mbaherasisa. Acoi que oimese oyavi uca vahe mbahe, che moñemoiro uca. ³⁰ Iyase che yeecomboivate ai água cheu, co mbahe omboyecua vahe che pĩrataẽhisa rese ayecomboivate aiño itera. ³¹ Yande Yar Jesucristo Ru Tũpa, ahe imboeteipri apirẽhi secoi vahe, ahe oicua aipo che hesa supi tupri vahe. ³² Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipive che rese osareco vaheã che roquenda água yuvireco viña; ³³ oime rumo ava iruova guasu pipe che mogüeyi vahe tecua achisa metana rupi yuvireco. Êgüe ahe añemi ichui yuvireco.

Tũpa omboyecua Pablo upe mbahe queraisa nungar pipe

12 Ndipoi eté que ava mbahe oipisi vahe ahe ae tẽi oyemboeteisa pipe. Che rumo amombehuño itera mbahe asepia vahe che quer nungar pipe iyavei yande Yar remimboyecua che aipisi vahe ichui. ² Che aicua mbia Cristo reroyasar, omomba cũritei catorce araviter ahe imbosapisa ivave seraso agüer. Ndicuasai gũetecuer rese tie revo oso, anise ihã güeraño tie revo. Tũpa rumo oicua. ³ Che rumo, “Êgüe ehi tie revo oico” ahe aipo mbia upe, Tũpa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tẽi upe ndipotasai imombehu água yuvireco. ⁵ Evocoi nungar mbia rese ayecomboivatera; cheyese ité rumo ndayecomboivate ai chira. Che recocuer nipiratai vahe reseño êgüe ahera vichico. ⁶ Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe supi eté vahe amombehu viña. Ahe rumo ndayapoi. Esepia, “tipiñañemoñeta catu che rembiapo rese, che remimombehu gũer rese avei yuvireco che querve nungar mbahe mombehu rãgũer sui’ viya. ⁷ Sese che yemboivate aiẽhi água che quer nungar mbahe che pihamondii vahe rembiepiagũer rese Tũpa ombou teco asisa cheu. Ahe aviye yu che cutu guasu vahe, ndoyavii avei Carugar mara-mara tẽi che rereco vahe. ⁸ Mbosapi yupagũer yande Yar upe aporandu ité teco asisa che sui serocua água rese viña. ⁹ Ahe rumo aipo ehi cheu: “Che porovasasa ndeu ambou vahe iyara nde ñemosa água. Esepia, che pĩratasa oyecua catu ité ava nipiratai vahe recocuer rese” ehi. Evocoyase che ayemboviha catuño itera che reco nipiratai vahe rese. Êgüe ehira Jesucristo pĩratasa oyecua che rese. ¹⁰ Sese Cristo rese che recosa pipe aviyeño ité ndache pĩratase, que ambuae ava oñehe raise che rese, que mbahe ipanese cheu, ambuae che reca-reca tẽise che reco momara água yuvireco iyavei que mbahe yavai vahe aiporarse Cristo sui. Esepia, ayanduse che pĩrataẽhisa, ahese che pĩrata catu.

Pablo ipiñañemoñeta ité Jesús reroyasareta Corinto pendar rese

¹¹ Che ndayaracuai vahe nungar aico pẽu, pe rese tẽi rumo êgüe ahe. Iya rumo peñehe tupri ra che rese viña. Esepia, yepe ndahei seco ivate vahe aico viña, co apóstol angahu tẽi rumo pe supi peguata vahe ndahei ivate catu vahe che sui yuvireco. ¹² Che ñemosa tupri pipe mboraviqui ayapo pe pãhuve. Ayapo mbahe poromondiisa mbahe pesepia yesapiha rai vahe imboyecua água che supi eté vahe apóstol che recosa. ¹³ Co mbahe reseño pe ivi coti catu peico ambuae Jesús reroyasareta sui, che ndopomañecoise mbahe cheu pembou vaheã rese. ¿Ayavi tie che cuaita, êgüe ahese pẽu? ¡Peñero sese cheu!

¹⁴ Cũritei che ayemoingatu imombosapisa rupi che so água pe piri. Iyavei ndopomañecoi chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyepia omonuha guarepochi guahir upe, ndahei tahir tẽi êgüe ehi oyepia upe yepi. ¹⁵ Evocoyase che querẽhisa pipe amondora opacatu che mbahe areco vahe pe pĩtivii água iyavei opacatu che recocuer rese ayemondo pẽu pe reco tupri água. Che rumo opoaisu ité, pe tie revo ndache raisu tupri eté peye.

¹⁶ Cheu mbahe ipanese, ndaporandui eté mbahe pereco vahe rese pẽu. Amove rumo ava, “Yande mbopa água tẽi êgüe ehi Pablo yandeu” ehi tẽi yuvireco. ¹⁷ ¿Opombopa uca tie ava pẽu che remimondo pipe? ¹⁸ Che Tito upe, “Eresora ipiri yuvireco” ahe. Supi avei ambuae yande rivri Tũpa reroyasar amondo. ¿Pembopa tie Tito? Oyoya tupri mbahe oroyapo Tũpa upe ñepe ore piñañemoñetasa pipe.

¹⁹ Che rivireta, che rembiaisu, pe revo pepiñañemoñeta ore oroicuachia co pẽu, ore yoepi água tẽi. Êgüe ndorohei eté rumo. Ore rumo Cristo rese ore reco pipe oroñehe Tũpa rovaque. Opacatu ité niha mbahe oroyapo pe recocuer moviracua catu água. ²⁰ Che asiquiye asose eipeve pe repia, aviyeteramo ndahei chira che piha rupi pe recocuer. Iyavei pe aviyeteramo êgüe peye aveira che repiase. Che asiquiye ité, oime revo pe pãhuve yepoepi-episa, pe piñañemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe pãhuve ava oyeupeño tẽi mbahe oipota vahe, imahechiroi ai vahe iyavei oñehe-ñehe tẽi vahe ambuae ava rese, seco ivate ai vahe iyavei ndiporoviroyai vahe. ²¹ Asiquiye avei aso irise pe repia, omboura Tũpa pe sui che chí água, che mboyaseho uca tiẽtera peye setá pe cueseve peyemboangaipa vahe rese iyavei ndapemboasii etese mbahe tẽi, yemboaguasa-guasa tẽisa iyavei que mbahe pe remibotari peyapo vahecuer.

Poromboaracusa iyavei mahenduhasa

13 Co niha imombosapisa yupagũer asora pe repia. Pemombehu potase que ava rembiapo ai cheu, toime que ñuvirio, anise mbosapi oicua vahe

sembiapo ai. ² Co yipindar oyemboangaipa vahe upe opa aipo ahe: "Peicua catu" ahe che imoñuvirío yu-pagüesa pipe aicose pe piri. Cũritei amombri aico pe sui, amombehu irira rumo co pëu. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe pãhuve, ndopoparaï-suereco iri chira. ³ Esepia, pe peipota ité che recoãha ãgua '¿Cristo ité pïha omoñehe uca?' pe yapave cheu. Cristo ndaseco mbegüemi pëu mbahe apo oico. Ahe rumo omboyecua opĩratasa pëu. ⁴ Supi eté niha ahe yaticasa, inungar ava nipiratai vahe. Cũritei rumo ahe oicove Tũpa pĩratasa pipe. Ègüe orohe avei ore seco pĩrataëhisa sereco. Oroicose rumo sese oroico Tũpa pĩratasa pipe pe rese hañeco ãgua.

⁵ Pemahecua tupri catu pe recocuer rese: ¿peico ité pïha pe Cristo rese yeroyasa pipe? ¿Ndapeicuai vo Jesucristo secoise pe rese, pesëse pe recoãhasa sui? ⁶ Pe revo peicuara ore ndorocañi tēi vahe oroico ore recoãhasa pipe. ⁷ Iyavei oroyerure pe rese Tũpa upe 'toyapo eme mbahe tēi yuvireco' ore hesave. Ndahei rumo ore ivate catu vahe mbahe tēi rasa pare mboyecuasave ègüe orohe; co catu 'toyapo mbahe aviye vahe yuvireco' ore yapave, yepe pëu ndoyavii orocañi tēi

vahe oroico viña. ⁸ Esepia, ndiyai mbahe supi tupri vahe amotarëhi ãgua oreu; ègüe ehi rumo sese catu ité oroñehe. ⁹ Sese orovihaño ité norepĩratase, ore rumo oroipota ité pe momirata; iyavei ore oroyerure catuño itera pe recocuer catupri catu ãgua rese. ¹⁰ Aicuachía co che ñehe imondo pëu pe piri che so ãgua renonde. Acoi asose, namboyecua pĩratatai chira che mborerecuasa eipeve. Ahe niha yande Yar ombou vahe cheu pe reco momirata catu ãgua, ndahei pe reco momara ãgua.

¹¹ Imomba ãgua, che rivireta, aipota peviharetera peico. Peseca avei pe reco tupri catu ãgua peyeupe, peyemonguerëhi catu, oyoya guasu peico tupri avei peyese mbahe tupri pipe. Evocoyase Tũpa oporoaisusa pipe, güeco tuprisa pipe avei secoira pe rese.

¹² Pemombehu che mahenduhasa ñepei-peipeyeupe pe yeovaupitesa pipe. ¹³ Opacatu ambuae yande rivri, Tũpa reroyasar avei omondo omahenduhasa yuvireco pëu.

¹⁴ Peipisi yande Yar Jesucristo porovasasa, Tũpa poroaisusa iyavei Espiritu Santo tasecoi opacatu pe rese. Aipo rupive che ñehe pëu.

GALATAS

Pablo mahenduhasa Jesús reroyasar Galacia pendar upe

1 Che, Pablo, imondopri aico apóstol che reco āgua. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir. ² Che, Pablo, iyavei opacatu Jesús reroyasar yuvirecoi vahe cohove oroicuachía co ore ñehe pēu, pe opacatu Jesús reroyasar Galacia pipe peico vahe. ³ Tapeipisi yande Ru Tūpa, yande Yar Jesucristo porovasasa pe reco tupri āgua. ⁴ Ahe acoi oyemondo vahe omano āgua yande angaipá repirã. Ēgüe ehi cūrteitei yande renose co ivi pipe mbahe-mbahe tēi sui yande Ru Tūpa remimbotar rupi. ⁵ ¡Imboeteipri apirēhi Tu tasecoi!

Ndipoi ambuae ñehesa poropñisirosa resendar

⁶ Che pihamondii etepri peye. Esepia, peyepipi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohosa pe ñepisiro āgua peico viña. ⁷ Supi eté ndipoi ambuae ñehesa pñisirosa resendar. Ēgüe ehi rumo, oime ava pe mañeco tēi vahe pe mbopa āgua ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco. ⁸ Oimese rumo que ambuae ava oñehe vahe poropñisirosa angahu tēi rese ndoyoyai vahe che ñehesa rese pesendu vahe yipisui, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai iva pendar avei no. ⁹ Amboyupagüe iri, “Evocoi nungar ava upe toime ité Tūpa ñemoirosa” ahe.

¹⁰ Aipo che he pipe, ndasecai ava tēi, “Co mbia aviye vahe” he āgua cheu, Tūpa rumo aseca cheu aipo he āgua. Esepia, java remimbotar rupi tēi mbahe ayapo vitesa, evocoyase ndahei chietera Cristo rembiguai aico viña!

Mara ehi Pablo apóstol güeco āgua

¹¹ Che rivireta, tapeicua co ñehesa poropñisirosa resendar amombehu vahe ava upe ndahei ava tēi pihañemoñetasa. ¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yipindar che recocuer resendar, che mu judío yembohosa rupi aguata vitesa aracaco. Che pñratasa pipe tēi aseca opacatu Tūpa rembiporavo Jesús reroyasar momara āgua. ¹⁴ Ēgüe ahe che ayemboivate ai catu che mboetasa eta sui judío yembohosa

pipe. Ayapó catu opacatu che recocuer pipe yipindar che ramo eta yembohe agüer rupi eté vichico. ¹⁵ Tūpa rumo yipive che ha viteñiseve che poravo oyeupe nara. Iyavei oporoaisusa pipe che renoi güemimbotar rupi. ¹⁶ Ēgüe ehi ahe oicua uca Guahir cheu, che imombehu āgua co ñehesa Tahir recocuer resendar ava ndahei vahe judío upe. Ndasoi rumo ava tēi upe icua āgua; ¹⁷ ndasoi avei Jerusalén ve yipive apóstol yuvirecoi vahe repia āgua. Che rumo aso voi eté ivi Arabia ve. Coiyé ayevi tecua Damasco ve vitu.

¹⁸ Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince arí rupi güerañomi tēi. ¹⁹ Ndasepai eté rumo ambuae apóstol. Yande Yar rivri Santiago güeraño asepa. ²⁰ Tūpa oicua co mbahe aicuachía vahe pēu, supi tupri vahe ité.

²¹ Ipare aso ivi Siria ve, Cilicia ve avei no. ²² Yande Yar reroyasar rumo oñemonuha vahe ivi Judea ve ndache cuai eté yuvireco. ²³ Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo āgua, cūrteitei omombehu Jesucristo reroya āgua oico” ehi, “Ahe acoi yipindar yande mocañi pota rai vahe oico” ehi yuvireco cheu. ²⁴ Ahese, “Imboeteipri Tūpa tasecoi” ehi yuvireco che recocuer rese.

Ambuae apóstol, “Aviye ité Pablo porombohesa” ehi yuvireco

2 Coiye catorce araviter pare, Tūpa omboyecua cheu Jerusalén ve che yevi āgua. Evocoyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai che rembiapo opítara ēgüe ehi tēi vaherã. Evocoyase amombehu co ñehesa poropñisirosa resendar chupe yuvireco acoi amombehu vahe ava eta ndahei vahe judío pãhuve. ³ Oime rumo amove yande rivri angahu tēi, ahe yuviroique mbegüe vahe ore pãhuve ‘yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?’ oyapave. Oipota ahe ore reroyevi iri Moisés porocuitavrive tēi yuvireco viña. Ahese che ndugüer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei vahe judío secoi. ⁵ Ore rumo ndoroipotai eté semimbotar apo āgua yuvireco chupe. Esepia, ‘tovireco viteño oyese co ñehesa pñisirosa resendar supi tupri vahe yuvireco’ ore yapave pēu.

⁶ Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuaita virecora ivate yuvireco viña. Che rumo nañecuñaroi chietera che recocuer sui. Esepia niha, Tüpa ndahei ava rete tēi osepia.) ⁷ Ahe rumo oicua yuvireco Tüpa che cuai oñehengagüer poropñisirosa resendar mombehu água ndahei vahe judío yuvirecoi vahe upe, inungar omondo Pedro oñehengagüer poropñisirosa resendar mombehu água judío upe. ⁸ Esepia, inungar Tüpa omondo Pedro upe apóstol seco água ava judío upe nara, ñgüe ehi avei imbou apóstol che reco água ava ndahei vahe judío upe nara.

⁹ Sese Santiago, Pedro iyavei Juan, ahe chupe, “Oyemoviracua vahe Jesús reroyasar pãhuve” ehi yuvireco, ahe oicua yuvireco Tüpa ombou vahe oporovasasa cheu. Ahese imboetasa ore recosa pipe che po pisi yuvireco, Bernabé upe avei ñgüe ehi yuvireco. Iyavei ipiha rupi eté ore oroporaviqui vahe rã ava ndahei vahe judío pãhuve oroico, inungar ahe oporaviqui judío pãhuve yuvireco. ¹⁰ Co reseño oporandu yuvireco oreu: “Peyemomahenduhami ava iparaisu vahe pñtivii água rese” ehi. Yipive ité rumo che ñgüe ahe pota vichico yepi.

Pablo oñehe pñrata Pedro upe sembiavi rese Antioquía ve

¹¹ Iyavei oose Pedro tecua Antioquía ve. Aheve oyavi güecocuer. Evocoyase añehe pñrata sovai eté chupe mbahe sembiavi rese. ¹² Esepia, yipindar ahe ocaru ndahei vahe judío pñri viña. Ipare rumo, oyepotase ambuae judío Jesús reroyasar Santiago mboetasa yuvireco, ahese Pedro osirñño ichui osiquiyepave. Iyavei ndocar upe ipñri. Esepia, ahe Jesús reroyasar judío yugüeru vahe “judío recocuer rupi yagutara yande ñepisiro água” ehi vahe ité yuvireco viña. ¹³ Evocoyase ambuae Jesús reroyasar judío avei osirñpaño tēi supive yuvireco. Bernabé avei eté supive ñgüe ehiño tēi. ¹⁴ Che asepiase rumo, ndahoyoyai secocuer yuvireco co ñehesa poropñisirosa resendar supi tupri vahe rese. Ichui Pedro upe añehe opacatu Jesús reroyasar rovaque: “Nde niha judío, ereico rumo inungar ndahei vahe judío. Cñritei rumo erembohe tēi nde rembiapo pipe evocoi ava ndahei vahe judío Jesús reroyasar judío rereco uca água” ahe chupe.

Judío, ndahei vahe judío oyoya oñepisiro yuvireco Cristo rese oyeroyasa pipe

¹⁵ Yande niha judío yande hasa suive yaico, ndahei ava ndahei vahe judío nungar yangaipa vahe yaico. ¹⁶ Cñritei rumo yaicua, ndipoi eté que ava seco catupri vahe Tüpa rovaque Moisés porocuaita mboaviyasa pipe. Jesucristo rese yeroyasa pipeño ité rumo yande reco catupri. Sese yande yayeroya ité Jesucristo rese, “Co seco catupri vahe” Tüpa he água yandeu. ñgüe ehi eté seroya pipe, ndahei acoi porocuaita tēi reroyasa pipe. Esepia, ndipoi chietera que ñepepe ava seco

catupri vahe Tüpa rovaque evocoi porocuaita tēi aposa pipe.

¹⁷ Yasecase yande reco catupri água Cristo rese yande yeroyasa pipe, ipipe yaicuase angaipa viyar yande reco, ¿Cristo pñha evocoyase yande mboangaipa? ¡Aní eté! ¹⁸ Che amocañise mbahe, ipare rumo amopuha irise, che evocoyase ayemboangaipa ipipe. ¹⁹ Esepia, ndaicutuise Moisés porocuaita reroya tupri che ñepisiro água, ahese ocañi tēi vahe aico ipipe. Ichui rumo Jesucristo reroyasa pipe asupiti Tüpa upe nara che recove água. Esepia, che aviye yaticapri aico Cristo rese. ²⁰ Sese ndahe iri che ité aicove; Tüpa Rahir Cristo rumo che rese secoi. Sese ité ayeroya che retecuer pipe che recove água. Ahe niha oyemondo omano água che raisupave. ²¹ Naroñroi eté co Tüpa porovasasa. Esepia, ava seco catupri Tüpa rovaque porocuaita tēi reroya pipe viña, evocoyase Cristo mano agüer ñgüe ehi tēi etera viña.

Porocuaita iyavei yeroyasa

3 ¡Ndapembahecuaie eté pe Galacia pendar! Pe ndoyavi ipaye vahe remimbopa peico. Oro-mombehu tupri niha pe rovai eté acoi Jesucristo curusu rese yatica agüer pñu. ² ¡Pemboyecua co che porandusa cheu! ¿Moisés porocuaita mboyeroya pipe pñha peipisi Espñritu Tüpa suindar, co ñehesa pesendu vahecuer reroya pipe tie? ³ ¡Ndapembahecuaie eté! Yipindar Espñritu pipe pemboipi Cristo rupi pe guata água. ¿Ñgüe peye aveira pñha pe pñratasa pipe tēi pe guata tupri água Cristo rupi cñritei? ⁴ ¿Ndape pñtivimi eté vo acoi opacatu pe paradisusa Cristo recocuer rese? ¡Pe pñtivimira tarahu viña! ⁵ Tüpa niha omondo oEspñritu pe rese iyavei oyapo poromondiisa pe pãhuve. ¿Mahera pñha oyapo? Esepia, co ñehesa pesendu vahe peroya ité, sese ñgüe ehi pñu ndahei Moisés porocuaita tēi reroya pipe.

⁶ Esepia, aracahe Abraham oyeroya ité Tüpa rese, ipipe sui Tüpa oipisi seco catupri vahe nungar oyeupe nara. ⁷ Sese iya ité peicuara opacatu acoi oyeroya vahe Tüpa rese yuvireco, ahe Abraham suindar supi tupri vahe. ⁸ Iyavei Tüpa Ñehengagüer icuachiapri pipe omombehu ité senondeve Tüpa oipisi aveira opacatu oyese oyeroya vahe ndahei vahe judío co ivi pipendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pipendar sovasapñra yuvireco nde sui” ehi. ⁹ Evocoyase Tüpa osovasara cñriteindar oyese yeroyasareta inungar Abraham aracahe.

¹⁰ Acoi seco catupri pota vahe Moisés porocuaita pipe tēi yuvirecoi vahe, ahe Tüpa ñemoirosavrive tēi yuvirecoira. Esepia, icuachiapri arachendar pipe aipo ehi: “Opacatu ava nomboaviyei vahe ité opacatu Tüpa porocuaita icuachiapri pipe yepi, ahe iñemoirosavrive tēi yuvirecoira” ehi. ¹¹ Sese, co omboyecua tupri yandeu ndahei Moisés porocuaita reroyasa pipe tēi Tüpa, “Co seco catupri vahe” ehi ava upe. Esepia, icuachiapri arachendar pipe aipo ehi: “Acoi ava seco catupri vahe oicovera Tüpa rese oyeroyasa pipe sui” ehi. ¹² Moisés

porocuita ndahoyoyai Cristo rese yeroyasa rese. Esepia, ahe porocuita aipo ehi: "Acoi ava oico pota vahe co porocuita pipe, tomboaviye tupri ité opacatu porocuita güecove água" ehi.

¹³ Moisés porocuita mboaviyeēhisa pipe yacañi tēira viña. Cristo rumo yande renose yande cañi tēi rāgüer sui. Ahe ae opa oipisi ñemoirosa yande repirã. Esepia, icuachiapri arachendar pipe aipo ehi: "Opacatu ava imboyasecopri ivira rese, oipisi Tüpa ñemoirosa yuvireco" ehi. ¹⁴ Ēgüe ehi Cristo yandeu 'toipisi ava ndahei vahe judío che Ru porovasasa che rembiapo sui' oya-pave. Ahe porovasasa Tüpa omombehu vahecuer Abraham upe aracahe. Ipipe sui yande opacatu yaipisi Espiritu imombehupri yayeroyase Cristo rese cūrítei.

Porocuita iyavei Tüpa güemimombehugüer omboaviye vaheerã

¹⁵ Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepeí reseve oicuachiasse güemimbotar omombehu vahe, ahese ndipoi que ambuae ava omboyeho vaheerã iyavei ndipoi que ambuae ava omboyepi iri vaheerã. ¹⁶ Ēgüe ehi avei Tüpa remimombehugüer Abraham upe aracahe. Esepia, oñehe ñepeí reseve chupe iyavei ichuindar upe avei. Tüpa Ñehengagüer icuachiapri pipe: "Nde suindareta upe" ndehi, inungar-ra que ava rehii upe viña. Ēgüe ehi rumo, "Nde suindar upe ité" ehi 'ñepeí ava' ohesa pipe, ahe Tüpa Rembiporavo Jesucristo. ¹⁷ Co mbahe amombehu pota pēu: evocoi porocuita Tüpa ombou vahecuer cuatrocientos treinta araviter pare, ndoicatui chietera Tüpa ñepeí reseve Abraham upe omombehu vahecuer iyavei oñehe omboaviye vaheerã mboyeho água. ¹⁸ Supi eté acoi Tüpa suindar ou vaheerã porerrecosa Moisés porocuita mboaviyasa pipe suise viña, ahese ndahei chiaveira Tüpa remimombehugüer sui. Ahe rumo ñepeí reseve Tüpa remimombehugüer rupi Abraham upendar porerrecosa.

¹⁹ ¿Mahera pīha evocoyase aviye Moisés porocuita? Esepia, ava porerroyaēhisa cua água Tüpa ombou oporocuita Moisés upe aracahe. Co porocuitavri rumo ava yuvirecoi acoi oyepotase voi Abraham suindar Jesús Tüpa remimombehugüer rupi. Yipindar rumo Tüpa oyocuai güembiguaí íva pendar oporocuita mombehu água Moisés upe aracahe 'tomombehu evocoyase Moisés che porocuita opacatu ava upe' oya-pave. ²⁰ Ñepeí ava rese oñemoñetase, ndipotasai ambuae imoingatu água. Tüpa niha ñepeí vahe secoi.

Mbahe sui Tüpa ombou oporocuita

²¹ "Moisés porocuita co coti tēi Tüpa remimombehugüer imboaviyepirã sui" aipo ndahei eté pēu. Esepia, acoi Tüpa omondose que porocuita ombou vaheerã tecovesa apirēhi ava upe imboaviyasa pipe, evocoyase porocuita reroya pipe yande reco catupri Tüpa rovaque viña. ²² Icuachiapri arachendar pipe rumo omombehu ité co: opacatu ava inungar mbiguai tēi oangaipa pipe yuvirecoi. Evocoi Ēgüe ehi, Jesucristo

rese yande yeroyasa pipe yasē vaheerã ichui mbahe imombehupri pisi água.

²³ Yipindar rumo mbiguai nungar yaico Tüpa nomboyecua viteise Guahir rese yande yeroya água. ²⁴ Inungar chíhivahemi tēi, Ēgüe yahe porocuitavri yaico yipindar. Ahe porocuita rumo yande mbohe Cristo yu água 'toyeroya Cristo rese güeco catupri água curi' oya yandeu. ²⁵ Cūrítei rumo oime Jesucristo rese yeroya água cute. Evocoyase ndahe iri ahe porocuitavri yaico. ²⁶ Pe niha opacatu Tüpa rahir peico Jesucristo rese yeroya pipe. ²⁷ Opacatu pe ñapiramombri peico vahe Jesucristo rupi pe guata água, secocuer avei pereco. ²⁸ Iyavei ndipoi eté yemboya-hosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepeí vahe nungar ité yaico Cristo rese. ²⁹ Jesucristo rese peicose, pe evocoyase Abraham suindar nungar tupri ité peico. Evocoyase pe avei peipisira Tüpa remimombehu porerrecosa yandeundar.

4 Amboyopapi vitera co che ñehesa pēu: inungar que ava omanose, oseyá ombahe eta guahir upe chíhivahemise. Yepe ahe tahir opacatu mbahe yar secoira viña, ahe rumo inungar tupri mbiguai tēi secoi vahe yepi. ² Esepia, ahe guārosar povri secoi imboyeroya água. Ocuacuase voi eté, opoira tu remimombehugüer rupi ichui. ³ Ēgüe ehi avei yandeu. Yande chíhivahemise, evocoyase mbiguai nungar yipindar vahe co ivi pipendar porocuitavri yaico. ⁴ Oyepotase rumo arí imombehupri, Tüpa ombou Guahir, ahe oha cuña sui; evocoyase ahe Moisés porocuitavri secoi. ⁵ Ēgüe ehi ou opacatu yande renose água evocoi mborocuitavri sui Tüpa rahir ité yande reco água. ⁶ Evocoyase Tüpa omboyecua Guahir yande recose ombouse Guahir Espiritu yande pīha pipe, "¡Che Ru!" yande he água chupe. ⁷ Sese yande Tüpa rahir ité yaico, ndahe iri cūrítei mbiguai tēi nungar. Tüpa rahir yande reco pipe ahe ombou aveira oporerrecosa yande mahera.

Pablo ipīhañemoñetaño ité Jesús reroyasar rese oico

⁸ Yipindar tüpa angahu rembiguai tēi peico Tüpa ité cuaēhi pipe. ⁹ Cūrítei rumo peicua Tüpa, Ēgüe ehi rumo Tüpa ité oicua pe recocuer. Sese niha aipo ahe cheyeupe: "¿Mara ehi pīha oyeví iri mborocuita tēi pipe mbiguai tēi güeco iri água yuvireco?" ahe pēu. ¹⁰ Esepia, pemboetei vite arí, yasí, araviter pieta eta tēi peico. ¹¹ ¡Che ayembosiquiye pe rese, "Che porombohesa revo Ēgüe ehi tēi vahe ipāhuve yuvireco chupe" ahe pēu!

¹² Iyavei che rivireta, aipota che recocuer moña peye. Esepia, cuese che asē Moisés porocuita povri sui inungar pe yipindar Ēgüe ahe vichico pe pāhuve. Ahese ndapeyapoi eté mbahe cheu. ¹³ Peicua niha che yipindar chembaheasise vichico, ahese amombehu co ñehesa pīsirosa resendar pēu. ¹⁴ Yepe co che mbaheherasisa yavai etepri pēu viña, pe rumo ndache roerōroi eté peye iyavei ndache momboi peye. Ēgüe

ehi rumo aviye acoi Tūpa rembiguai eté che rereco peye viña iyavei aviye Jesucristo itera aico pēu viña no.¹⁵ ¡Mahera ru cūrítei ndapeyemboviharete vīte che rese peico eipeve! Esepia, supi eté, cuese acoi que pe resa teieté revo pemboura cheu viña.¹⁶ ¡Evocoyase cūrítei che amotarēhi tie peye acoi pēu mbahe supi tupri vahe mombehusa sui tēi!

¹⁷ Evocoi ava iquerēhi ité pe rese, ndahei rumo mbahe aviye vahe apo āgua yuvireco. Ahe rumo oipota pe mboyepepi āgua tēi ore sui yuvireco pe querēhi āgua supi.¹⁸ Aviye ité niha yande querēhise mbahe apo ambuae ava upe, mbahe aviye vahe apo āgua rumo. Ndahei chira pe pāhuve che recoseño pereco pe querēhisa. Iyacatu rumo pequerēhiño itera yepi.¹⁹ Che rahireta, che ayembopiharasi ité vichico pe rese. Inungar cuña imembirasi vahe; ēgüe aheño itera ayemombaraisu vichico 'toico rane ité Cristo sese yuvireco' che yapave pēu.²⁰ Cūrítei rāgüer opoepiara viña añehe tupri catu āgua pe rese. Esepia, "¿Mara ahera revo sereco yuvireco?" ahe pēu.

Agar, Sara recocuer resendar yembohesa

²¹ Pe peroya pota vahe Moisés porocuita pe reco catupri āgua, pemombehumi cheu: ¿Ndapesenducuai tie co mborocuita aipo ehi vahe?²² Esepia, aipo ehi: Abraham aipo vireco ñuvirío guahir, ñepepe tahir aipo sembiguai Agar membri, ambuae tahir evocoyase sembireco Sara membri.²³ Evocoi sembiguai membri oha que ava tēi yesu nungar; sembireco membri rumo oha Tūpa remimombehugüer rupi eté.²⁴ Co tecocuer mboyyasa yaracua vahe ité. Co ñuvirío cuña sui yayembohe ñuvirío Tūpa remimbotar rese. Yipindar sembiguai Agar omboyecua evocoi porocuita imondopri Arabia pipendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuitavriye yuvirecoi. ēgüe ehi avei opacatu Moisés porocuita pipendar, yuviroha mbiguai nungar güeco āgua, opacatu ichuindar ēgüe ehi vite yuvireco.²⁶ Yande rumo inungar-ra que Jerusalén iva pendar suindar yaico viña ēgüe yahe yaico mbiguaiēhi.²⁷ Esepia, icuachiapri arachendar pipe aipo ehi:

"Eyembovihareté, cuña nimembii vahe; esapucaí nde rorivetesá pipe, nde ndereiporarái vahe nde membri rasicuer.

Esepia, acoi cuña seyapri imembii ati catura cuña omer vireco vahe sui" ehi.

²⁸ Che rivireta, inungar Sara membri Isaac, ēgüe yahe avei tahir ité yaico Tūpa remimombehugüer rupi.²⁹ Co rumo aracahe sembiguai membri oha vahe ava tēi yesu nungar, ahe ndoyambotai sembireco membri acoi Espiritu pīratasa pipe sui oha vahe; cūrítei ēgüe ehi tupri avei.³⁰ ¿Mara ehi icuachiapri arachendar pipe? "Pemboyepepi pe rēta sui cuña mbiguai tēi imembii reseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe piši āgua yuvireco" ehi.³¹ Sese, che rivireta, yande ndahei sembiguai tēi membri nungar yaico,

yande rumo sembireco membri nungar yaico. Esepia, ahe ndahei mbiguai.

Peyemoviracuaño ité Moisés porocuita pipe pe recoēhi āgua

5 Jesucristo niha ombou yandeu mbiguai tēi nungar sui yande sē āgua. Sese peyemoviracua mbiguai tēi pe reco iriēhi āgua.

² Pesendu che ñehe. Che, Pablo, aipo ahe pēu: acoi peyembocircuncida ucase, ahese ēgüe ehi tēi vahe Cristo pereco.³ Che amombehu pota irimi pēu, que ava oyembocircuncida uca vahe, vireco niha ocuita opacatu Moisés porocuita mboyyoya āgua.⁴ Pe pereco catupri pota tēi vahe Tūpa rovaque evocoi porocuita tēi reroya pipe, peyepepi ité Cristo sui. Evocoyase Tūpa porovasasa avei pemocañi tēi peyesui.⁵ Yande rumo yande querēhisa pipe yayeroya yande reco catupri āgua rese. ēgüe yahe Espiritu yande pītiviisa pipe iyavei Jesús rese yeroyasa pipe avei.⁶ Esepia, acoi yaicose Jesucristo rese, yepe yayembocircuncidase, anise ndayayembocircuncidaise, ahe ndayande pītivii eté yande reco catupri āgua Tūpa rovaque. Co güeraño rumo yande pītivii Jesús rese yande yeroyasa. Ahe niha yande mboyyeaisu uca.

⁷ Peico tupri niha yipindar viña. ¡Ava ru ndoviroya uca iri mbahe supi tupri vahe pēu!⁸ Ndahei eté rumo pe poravosar Tūpa ēgüe ehi pēu.⁹ ¿Ndapeicuai vo acoi aipo ehi vahe: "Chīhimi pan mboapeposa oso panguā rese opacatu rupi oicahopa tupri yepi" ehi?¹⁰ Che rumo ayeroya yande Yar rese pe piñañemoñeta āgua che piñañemoñetasa rupi. Tūpa rumo omboura oñemoñetasa que ava pe mbopiñañemoñeta yoavirati uca vahe upe.

¹¹ Che rumo, che rivireta, "Iya yayembocircuncida yande reco catupri āgua" ahe vītese Jesús reroyasar upe viña, ahese revo ndipoi chira che amotarēhisar judío pāhuve, ahese avei ndipoi chira ñehesa curusu rese Jesús manosa resendar amotarēhimbar ipāhuve viña.¹² Evocoi ava pe mbopiñañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepepe reseve yuvireco!

¹³ Esepia, pe ore rivireta, Tūpa niha pe renoi mbiguai tēi nungar pe recosa sui pe renose āgua. Ndahei chira rumo pe remimbotarai tēi apo āgua, iyacatu rumo peñepitiviira pe yeaisusa pipe.¹⁴ Esepia, opacatu evocoi mborocuita imboaviyasa yamboaviyese co ñehesa aipo ehi vahe: "Esaisu ambuae ava nde yeaisu nungar" ehi vahe.¹⁵ Peyeseño tetei rene catu; peicua catu, aviyeteramo ēgüe peyese, pe recocuer pemomarapa tiētera.

Yaguatara Espiritu remimbotar rupi, ndahei yande remimbotar tēi rupi

¹⁶ Pesendu che ñehe: Espiritu pīratasa pipe catu peico yepi. Iyavei peyapoi rene mbahe pe remimbotarai.¹⁷ Esepia, co pe remimbotarai ndahoyoyai eté Tūpa Espiritu remimbotar rese. Ndoyyembohe catui eté. Sese

ndapeyapo ucai mbahe pe remimbotar aviye vahe peyeupe. ¹⁸ Acoi Espiritu ité pe reroguatase, ahese ndahe iri chiaveira Moisés porocuaivave peico.

¹⁹ Yande remimbotarai suindar yande rembiapo ai icuasa tupri ité. Ahe: yemboaguasa tēisa, teco quihasa, mbahe tēi aposa; ²⁰ mbahe rahanga upe yerure tēisa, yembopayesa, ñeroirosa, ñehepoepi-episa iyavei ambuae ava mbahe pota raisa; ñemoiro seraisa, yemboyaho-yahosa, pihañemoñeta yoyaēhisa, ²¹ iyavei ambuae ava mbahe pota raisa rese ñemoirosa, savaiposa, yembopieta tēisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tūpa mborerecuasave yuvireco curi.

²² Yayapose rumo Espiritu remimbotar, yande evocoyase yayeaisura, yande rorivetera, yaicora mbahe tupri pipe, yande reco mbegüera, yaporoaisura yande reco aviyesa pipe, yamboycuara yande cuaita mboaviyesa, ²³ yayemominiñora iyavei yande recorã rese yañearo tupri. Evocoi nungar yayapose, ndipoi eté que mborocuaita pipe yande yeamotarēhi āgua. ²⁴ Jesucristo rese ité yuvirecoi vahe rumo, opa ité omombo güecocueraí co ivi pipendar tēi oyesui yuvireco, güemimbotarai, opihañemoñeta raisa avei no. ²⁵ Yande yaicose Espiritu pĩratasa rese, ahese Espiritu rupi eté yagatara.

²⁶ Ndayayemboivate ai chira. Esepia, ipipe sui yayeamotarēhi, yaipota rai avei yande mboetasa recocuer nungar yande reco āgua.

Peñepitívii ñepeipei

6 Che rivireta, acoi que Jesús reroyasar pe pãhu pendar oyavise güecocuer, pe peico vahe Espiritu rese, peipitívii secocuer moingatu āgua pe recocuer mbegüemisa pipe. Peicua catura rumo, aviyeteramo oyoya voi peyemboangaipa uca tiētera. ² Peñepitívii catu que mbahe yavai rai vahe rese. Ēgüe peyese, Jesucristo porocuaita pemboaviyera.

³ Amove ava, “Che ivate catu vahe aico” ehi tēi. Ēgüe ehi rumo ahe ae oyembopa aipo ohesa pipe oico.

⁴ Sese niha ñepeipei eté yaicua tupri yande recocuer. Aviyese, evocoyase sese yaviharetera. Ndahei acoi ambuae ava recocuer rese tēi yamboyyara yande recocuer. ⁵ Esepia, ñepeipei eté yande yacatu yareco yande cuaita imboaviye āgua.

⁶ Acoi oyembohe vahe Tūpa ñehe pĩsirosa resendar rese, tomondo ombohesar upe mbahe güembiereco ipitívii āgua.

⁷ Peyembopa eme catu pe ae. Ndipoi chietera que ava viroiro vahe Tūpa ñemoirosa pisiēhisa pipe. Ēgüe ehi eté: yañotise mbahe, ichui avei mbahe yaipisira.

⁸ Acoi ava rumo oyapo vahe mbahe güemimbotarai pipe, ahe oipisira cañisa apirēhi vahe. Acoi oyapo vahe mbahe Espiritu remimbotar rupi, ahe oipisira tecovesa apirēhi vahe yuvireco. ⁹ Evocoyase tayandecueraí eme mbahe tupri aposa pipe. Esepia, acoi ndayandecueraise, yaipisira mbahe tupri apo repri. ¹⁰ Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

Pablo, “Peicua catu pe mbocircuncida pota vahe sui” ehi iyavei ñehesa ipa vahe

¹¹ ¡Pesepia co ñehesa ipa vahe che pove ité aicuachía tuvicha vahe pēu! ¹² Acoi judío Jesús reroyasar pe mbocircuncida uca potaño tēi vahe ‘Co mbia aviye ité, tehi ndahei vahe Jesús reroyasar judío yuvireco yandeu’ ohesa pipe tēi Ēgüe ehi yuvireco viña. Esepia, ndoipotai evocoi judío oamotarēhi co ñehesa Cristo atica agüer mombehu pipe yuvireco. ¹³ Acoi oyembocircuncida uca tēi vahe avei rumo nomboaviyei eté opacatu mborocuaita yuvireco. Oipota rumo pe mbocircuncida uca vahe avei rumo nomboaviyei eté opacatu mborocuaita yuvireco. ¹⁴ Che rumo ndayemboivate potai eté. Curusu rese yande Yar Jesucristo mano agüer rese güeraño ité ayemboviha. Imano agüer sui co ivi pipendar mbahe pota raisa opa ité che sui. Che evocoyase inungar omano vahe aico chupe. ¹⁵ Yepe que yayembocircuncidase revo, anise que ndayayembocircuncidaise viña, ndayande pĩtívii eté Cristo rese yaico tupri āgua. Co rumo aviye vahe ité yandeu: Tūpa yande recocuer mbopiasuse. ¹⁶ Opacatu yuvirecoi vahe co ñehesa che remimombegüer rupi iyavei opacatu Tūpa upendar supi eté vahe toipisi Tūpa suindar teco tupri iyavei iporoparisuerecosa yuvireco.

¹⁷ Aviye, co pipe suive ndaipota iri que ava che mañeco tēi vaherã. Esepia, che areco che retocuer rese che apicha-picha agüer. Ahe omboycua Jesús rembiguai che recosa.

¹⁸ Che rivireta, yande Yar Jesucristo tape rovasa opacatu. Aipo rupive.

EFESIOS

Pablo mahenduhasa Jesús reroyasar Efeso pendar upe

1 Che, Pablo, Jesucristo apóstol aico Tūpa remimbotar rupi. Che aicuachía co che ñehe pēu pe Efeso pendar, Tūpa upendar Jesucristo reroyasar peico vahe. ²Yande Ru Tūpa iyavei yande Yar Jesucristo tombou oporovasasa pe reco tupri āgua pēu.

Cristo suindar porovasasa

³Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe. ⁴Sese niha Tūpa yande poravo yipivé ité ivi apoēhi viteseve ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe. ⁵Ipipe avei yipisuive yande pisi guahirguā Jesucristo yande p̄sirosa pipe güemimbotar rupi. ⁶Sese yande yasapucal chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui. ⁷Tūpa yande raisu eteprisa pipe yande p̄siro Guahir ruvi piyeresal pipe yande angaipal rese ñero āgua. ⁸Yande raisu pipe avei ombou opacatu yande aracual āgua iyavei yande yapisacal āgua avei yandeu, ⁹iyavei oicual uca güemimbotar yipisuive ndicuasal vahe yandeu co güembiaporā mboaviye āgua. ¹⁰Oyepotase ahe ari imboaviye āgua, Tūpa opacatu mbahe iva pendar, co ivi pipendar avei opara omoingue ñepe reseve Guahir Cristo povrive.

¹¹Cristo rese yaicose, Tūpa yande poravo yipisuive ichuindar mbahe yandeundar pisi āgua. Opacatu rumo mbahe Tūpa remimbotar rupi. Ahe niha oicual ité güemimbotar apo āgua ¹²‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu. ¹³Pe avei niha, pesenduse co ñehesal supi eté vahe p̄sirosa resendar, Cristo peroyal pe piha pipe sese peico vaheñe. Tūpa ombou güemimombehugüer Espiritu Santo pe piha pipe ‘cheundar ité yuvirecoi’ oya. ¹⁴Ipisal pipe niha yaicual yande yaipisi vaheñe yandeundar mbahe imoingatupri, acoi Tūpa opase oip̄siro ava oyeupendar ‘ipipe sui tomboetei che reco ivatesal ava yuvireco’ oya.

Pablo oporandu Tūpa upe mbahecuasa Jesús reroyasareta upe mondo āgua

¹⁵Ayandu peyeroyal tupri yande Yar Jesús rese iyavei pesaisu ité ava opacatu Tūpa upendar. ¹⁶Sese ndapoi eté Tūpa upe, “Aviye ndeu” che hesal sui chemahenduhase pe rese che yeruresal pipe. ¹⁷Che aporandu

yande Yar Jesucristo Ru Tūpa seco porañete vahe upe, pe recocuer resape āgua rese. Ipipe peicual tupri catura semimboyecual iyavei peicual tupri catura yande Yar. ¹⁸Ēgüe ahe ité aporandu Tūpa upe pe piha resape āgua rese. Ipipe peicual catura co pesāro vahe ivave pe reique āgua; chupe nara ité Tūpa pe peha. Iyavei peicual co mbahe imondopirā iva pendar iporañete vahe Tūpa upendar yuvirecoi vahe upe. ¹⁹Ipipe sui peicual tupri aveiral Tūpa p̄ratasal ndopal vahe yande seroyasar yaico vahe rese. Co p̄ratasal ivaté vahe ité. Ahe p̄ratasal Tūpa omboyecual, ombogüerayevise Guahir Cristo omanoval vahe pāhu sui, iyavei omboguapise oacatal coti ivave. ²¹Osecomboivate catur opacatal iva pendar, ivi pendar seco ivate vahe mborerecuarecuar tēi p̄ratasal sui iyavei opacatal cūriteindar sui, que oime vaheñe sui avei. ²²Opacatal mbahe omondo Guahir Cristo povrive, Tahir upe avei ombou mborerecuar ivate catur vahe seco āgua opacatal viroyasar upe. ²³Opacatal yande seroyasar yaico vahe recocuer rese Cristo secoi. Evocoyasal yande setecuer nungar yaico. Ahe opacatal rupi secoi.

Tūpa oporovasasa pipe yande p̄siro

2 Pe rumo, yipindar angaipal pipe peicose, inungar omanoval vahe peico Tūpa upe. ²Co ivi pipendar pihañemoñetasal rupi tēi peico iyavei ivate rupindar carugar rerecuar porocualtal tēi avei peroyal, ahe Jesús reroyasarēhi ombohe vahe. ³Yipindar opacatal yande avei yaguatal yande remimbotar rupi tēi yande recocueral pipe. Yande pihañemoñetal raisal rupi tēi avei yayapo mbahe. Sese Tūpa ñemoirosal yaipisiral opacatal ambual ava rupive viña. ⁴Tūpa rumo yande paraisuereco ité, yande raisu eteprival avei. ⁵Yepe angaipal pipe yaico omanoval vahe nungar viña, ahe rumo ombou Guahir yande recove āgua. Ahe oporovasasa pipe yande p̄siro. ⁶Yande mbogüerayevi iri avei niha sese. Ipare seseve yande moingue oyepirival ivave ⁷‘tamboyecual opacatal iva pendar upe che porovasasa iyavei che poroaisusal tuvichal vahe che Rahir rembiapo pipe sui curi’ oya. ⁸Esepial, oporovasasa pipe pe p̄siro Jesús rese peyeroyasal. Ndaheiral rumo pe recocuer sui tēi peñepisiral, ahe rumo ombou porerecusal pēu. ⁹Ndaheiral avei ava rembiapo sui tēi ou vahe. Evocoyasal ndiyal chiral yayemboivate ai ipipe. ¹⁰Tūpa niha yande recocuer mohivi Jesucristo rese yande reco āgua mbahe icatupri vahe apo āgua. Ahe mbahe icatupri vahe yipisuive Tūpa omoime yande rembiaporā.

Cristo ombou yande reco tupri água

¹¹ Evocoyase peyemomahenduha yipindar pe recocuer rese. Ndahei rumo judío suindar peico: “Co ndoicuai vahe Tūpa, ndoyembocircuncidai vahe tēi yuvirecoi” ehi judío yuvireco pēu, (ahe judío oyembocircuncida vahe güete rese oyeupe, “Yande Tūpa rembiporavo imbocircuncidapri yaico” ehi yuvireco). ¹² Peyemomahenduha yipindar Cristo ndaperecoi vahe rese. Ahese ndapeicoi Tūpa rembiporavo Israel recua pendar iyavei ndapecuai Tūpa remimbotar semimombehu avei ombou vahe judío upe ipřivii água; ndaperecoi Tūpa iyavei ndaperecoi sãrosa pe ñepisiro água co ivi pipe viña. ¹³ Esepia, ahese amombri Tūpa sui peico. Cūrítei rumo Jesucristo rese peico. Esepia, ahe vuví pipe pe reru Vu Tūpa upe. ¹⁴ Ahe avei niha teco tuprisa yandeu. Esepia, ahe yande mboyeseha judío, ndahei vahe judío ñepe vahe nungar yande yeamotarēhiēhi iri água oyeupe. Yande ñemoirosa niha opa omocañi yande sui güetecuer mondosa pipe. ¹⁵ Cristo omomba opacatu Moisés porocuaíta. Ahe oipota ñepe va nungar teco piasu pipe yande reco água, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri água. ¹⁶ Evocoyase ahe ae omanose curusu rese, ombou yandeu yandeyeupe ñero água judío, ndahei vahe judío ñepe va nungar Tūpa rupi yande reco água.

¹⁷ Ahe ou omombehu co tecocuer piasu pēu pe amombri Tūpa sui peico vahe, omombehu avei ore namombrii vahe judío oroico vahe upe ‘tiñero yuvireco oyeupe’ oya. ¹⁸ Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vahe Tūpa rese Espiritu ñepe vahe pipe. ¹⁹ Sese pe ambuae ivi pendar peico vahe, ndahe iri amombri Tūpa sui peico cute. Cūrítei rumo Tūpa upendar ité peico opacatu ambuae seroyasar reseve. Yande evocoyase ñepe reseve oñemu guasu vahe nungar yaico. ²⁰ Pe inungar tūparo maranehi imopuhambri ihivipirã hari pendar peico; apóstol iyavei Tūpa ñehe mombehusar evocoyase inungar ihivipi yuvirecoi tūparo moviracua água. Jesucristo rumo inungar ita yipindar vahe imohivisa yandeu. ²¹ Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguã, ēgüe yahe ipehapri yaico yande Yar upe nara sese ité yande reco água. ²² Sese niha, Cristo rese peicose, pe ambuae viroyasar rese avei sētarã nungar peico. Ipipe Tūpa, oEspiritu pipe, secoira.

Pablo cuaita ñehesa pñisirosa resendar mombehu água ava ndahei vahe judío upe

3 Sese, che Pablo, soquendapri aico cohava Jesucristo recocuer mombehusa sui tēi. Ndahei vahe judío peico vahe pe recocuer aviye água rese ēgüe ahe. ² Peicua tupri revo co che poraviquisa Tūpa ombou vahe cheu oporovasasa mombehu água pēu nara. ³ Co ñehesa yipindar ndicuasai vahe güemimbotar re-

sendar Tūpa omboyecua uca vahe cheu, ahe niha aicuachía chíhi pēu. ⁴ Co rese peyeroquise peicua tupri catura co che aracuasa Cristo recocuer resendar oye-cua ramo vahe. ⁵ Co ñehesa icatupri vahe ndoicuai eté ava yuvireco aracahe. Cūrítei rumo Tūpa oEspiritu pipe omboyecua güembipeha yuvirecoi vahe upe. Ahe sembipeha apóstol, iñehe mombehusar avei yuvirecoi. ⁶ Evocoi oye-cua ramo vahe, ahe co: pe ndahei vahe judío upe avei Tūpa omboura judío upendar nungar tupri porovasasa co ñehesa poropñisirosa resendar reroyasa pipe. Pe avei oñemu nungar tupri peico, oyoya ore judío oroico vahe rese. Pēu nara avei Tūpa remimombehugüer arachendar peyeroyase Jesucristo rese.

⁷ Yepe ndiyai cheu viña, Tūpa rumo che moingo opiratasa pipe ñehesa pñisirosa resendar mombehu água. ⁸ Che recocuer niha ivi coti catu opacatu ambuae Tūpa reroyasar sui viña, ahe rumo ombou oporovasasa co mboraviquisa ñehesa aviye vahe Cristo recocuer resendar mombehu água ava ndahei vahe judío upe nara cheu. ⁹ Iyavei ombou che cuaitarã amombehu tupri vahe Tūpa opacatu vahe upe opacatu mbahe Aposar pihañemoñetasa yipindar ndicuasai vahe. ¹⁰ Ēgüe ehi cūrítei oyesuindar aracuasa cua uca água viroyasareta recocuer rese opacatu mborerecuar guasu, seco pñirata vahe va pendar upe. ¹¹ Ēgüe ehi, Tūpa opihañemoñeta ndopai vahe mboaviye Guahir, yande Yar Jesucristo rese. ¹² Sese yande reroyasa suiño ité yaicatu yande yemboya água Tūpa rese yande siquiyēhisa pipe. ¹³ Sese aní chira, ndapequerēhi iri Cristo rupi pe guata água, pe recocuer rese che yemombaraisusa sui. Iyacatu rumo che paraisusa pereco pe yemboviha água.

Cristo poroaisusa

¹⁴ Sese añenopiha yande Ru Tūpa rovaque. ¹⁵ Ichui serer pãve vireco yuvireco, opacatu seroyasareta va pendar, ivi pendar avei ñepe oñemu yuvirecoi vahe nungar. ¹⁶ Che aporandu chupe ‘tombou güeco porañetesa sui opiratasa yuvireco chupe oEspiritu pipe imoviracua água’ viya pēu. ¹⁷ Ēgüe ahe ayeroqui pe rese pe piha pipe Cristo rereco água sese pe yeroyasa pipe. Iyavei pe poroaisusa pipe pe yemoviracua catu água peyese ¹⁸ ‘toicatu opacatu ambuae Jesús reroyasareta reseve Cristo poroaisusa tuvichá vahe ité reducua tupri catu água yuvireco’ viya pēu. ¹⁹ Che ayeroqui ahe poroaisusa peicua tupri catu água rese (yepe ndayaicatui icuapa tupri água yaico viña). Ipipe sui Tūpa tasecoi pe rese.

²⁰ Cūrítei yamboetei yande Ru Tūpa. Esepia niha, ahe opiratasa pipe ombouvicha catu itera mbahe yande porandusa sui, yande pihañemoñetasa sui avei yandeu. Esepia, opiratasa pipe oporaviqui yande rese. ²¹ ¡Sese ēgüe tehi imboeteipri Tūpa tasecoi seroyasareta recocuer sui, Jesucristo sui avei apirēhi vahe Tūpa!

Ava Espiritu rese oyoya guasu yuvirecoi vahe

4 Sese Cristo recocuer mombehusa sui che roquenda pipe, “Peico tuprira pe cuaita rupi Tupa pe renoisa pipe” ahe pëu. ² Peyemominira peico pe reco aviyesa pipe, pe reco mbegüesa pipe aveira iyavei peñemosañõ pe yeaisusa pipe peyeupe. ³ Peyapo opacatu pe recocuer pipe peico tupri vite água peyepãhuve Espiritu Santo pe pñtiviisa pipe, pe reco tuprisa pipe avei. ⁴ Yaico ñepei nungar Cristo rese iyavei yareco ñepei Espiritu. Ègüe ehi avei Tupa yande poravo ñepei guãrosa rereco água. ⁵ Oime ñepei yande Yar, ñepei yande yeroyasa, oime avei ñepei poroãpiramosa. ⁶ Oime ñepei Tupa, ahe opacatu yande Ru, opacatu yande cuaisar, ahe oporaviqui opacatu yande rese, secoi avei yande rese no.

⁷ Iyavei Cristo niha yande yacatu ñepei-pe mbahe-cuasa ombou. ⁸ Sese aipo ehi icuachiapri aracahendar pipe:

“Oso ivave, viraso secopipireta oyeupi; omondo avei porerecosa ava upe” ehi.

⁹ ¿Mara oya aipo ehi: “Oso ivave”? Yipindar ogüeyi co ivi pipe. ¹⁰ Acoi ogüeyi vahe co ivi pipe oso ivate catusave ‘taico opacatu rupi’ oya. ¹¹ Ahe niha ombou amove apóstol seco água, ambuae upe ombou Vu ñe-he mombehu água, ambuae upe ombou ñehesa pñsirosa mombehu água, ombou avei ambuae upe viroyasar rãro água iyavei iporombohe água. ¹² Ègüe ehi ava viroyasar mbohe oyeupe mboraviqui apo ambuae viroyasar moviracua tupri catu água. ¹³ Opacatu yaico tupri rane itera oyese Jesús rese yeroyasa pipe iyavei yaicua tuprira Tupa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico. ¹⁴ Evocoyase ndahe iri chira chñhivahe tñi nungar ova-ova tñi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti tñi oporombohe vahe upe, que yande rerova pota vahe upe mbahe tñi pipe. ¹⁵ Yande rumo evocoyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rerecuar secoi. ¹⁶ Esepia, ahe yande mboya tupri oyese, yande moenda tupri avei yande rereco, ègüe ehi ahe yande mboyemboya oyese ñepei vahe nungar. Ñepei-pe yaporaviqui tuprise, ahese opacatu yayeroya catu itera, yayemoviracua catu aveira yande yeaisusa pipe.

Cristo yande recocuer mbopiasu

¹⁷ Che aipo ahe Tupa rer pipe pëu che pe cuaisa pipe: peico iri eme ava Tupa cuaparñhi nungar. Ahe yuvirecoi vahe ité opihañemoñeta raisa pipe, ¹⁸ ndoicatu mbahe renducua tupri água iyavei ndovirecoi tecovesa Tupa suindar oyese yuvireco. Esepia, ndoicuai Tupa ñehe opihañemoñetañhisa pipe yuvireco. ¹⁹ Ndoyuvinochi iri mbahe tñi apo água iyavei oyemondo ité mbahe tñi pipe. Ndosiquiyei eté opacatu güemimbo-

tarai apo água yuvireco. ²⁰ Pe rumo ndapeyembohe eté evocoi nungar mbahe rese Cristo rese peicose, ²¹ supi eté pesenduse porombohesa supi tupri vahe Jesucristo resendar iyavei peyembohese secocuer rese. ²² Ahe yande mbohe yande recocuerai yipindar vahe reya água. Esepia, ahe naporai vahe yande mbopa tñi yande pihañemoñeta rai apo água. ²³ Pesecuñaro catu pe yapisacasa. ²⁴ Peicoño ité avei pe recocuer piasu pipe. Sese niha Tupa yande apo yande reco ñvi tupri água yande reco maranehi vaherã supi tupri vahe pipe, inungar ahe.

²⁵ Sese ndaperemira iri chira, iya rumo peñehe ñepei-pe mbahe supi tupri vahe rese peyeupe. Esepia niha, yande opacatu ñepei ava rete resendar nungar yaico.

²⁶ Peyemboangaipai rene peñemoirose, iyavei ndiyai peñemoiro ari momba peico. ²⁷ Peipota ucai rene Carugar upe peyeupe mbahe apo água.

²⁸ Acoi imonda rai vahe, timonda iri eme; toporaviquiño ava iparaisu vahe pñtivii água.

²⁹ Ndapeñehe rai chira, iyacatu rumo peñehe tuprira ñehesa aviye vahe pipe ambuae pe ñehe rendusar monguerñhi catu água yuvireco yande Yar rese.

³⁰ Peyapoi rene mbahe Espiritu Santo mbovihañhi água. Ahe niha Tupa ombou yandeu ‘toicua ava co cheundar oipisira ari ipa vahe pipe poropñsirosa ñepei reseve vahe yuvireco’ oya.

³¹ Peyepipi co nungar mbahe sui: piha vñracuasa, mbahe mboasi pñratasa, ñemoirosa, pe rãse aisa, opacatu pe ñehe rai, opacatu ambuae mbahe-mbahe tñi sui avei. ³² Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tupa iñero Guahir Cristo rese pëu.

Mara ehira ava Tupa rahir yuvireco

5 Pe niha Tupa rahir sembiaisu peico. Sese peyemonguerñhi catu secocuer moña água. ² Peico pe poroaisusa pipe, inungar Cristo yande raisu iyavei oye-mondo yande recocuer rese, ovesa nungar seropovñhepri Tupa uve. Ahe aviye ité inungar mbahe sñacua vahe chupe.

³ Pe niha Tupa upendar ité peico. Sese ndapeyemboaguasai chietera iyavei ndapeicoi chira ambuae mbahe naporai vahe pipe, que yemombotasa opacatu mbahe rese. ⁴ Ndapeñehe rai chira que poromochisa rese, que ègüe ehi tñi vahe rese, anise que co coti-coti tñi vahe rese. Esepia, evocoi nungar ndahei mbahe aviye vahe. “Aviye ndeu” peye catuñora rumo Tupa upe peico. ⁵ Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoi chira Tupa povrive iyavei Tahir Cristo povrive. ⁶ Ndapeyembopa ucai chira evocoi nungar ñehesa tecocuer ègüe ehi tñi vahe upe. Esepia, evocoi nungar mbahe apo pipe sui ou Tupa ñemoirosa ava seroyasarñhi upe. ⁷ Sese ndapeyemboyai chira evocoi nungar ava rese.

⁸ Peicua niha yipindar peico pñtumimbisa nungar mbahe-mbahe tñi pipe. Cñritei rumo peico tesapesa

nungar pipe yande Yar rese. Sese peico tupriño ité Tūpa suindar poroesapesa pipe. ⁹ Esepia, poroesapesa pipe yande recose, yayapo opacatu mbahe tupri ava upe yande reco ñvi tuprisave, mbahe supi tupri vahe pipe. ¹⁰ Sese peyembohe catu mbahe Tūpa piha rupindar apo āgua rese. ¹¹ Peyepipi ité opacatu pītumimbisa nungar ava rembiapo ai, ēgüe ehi tēi vahe sui. Iya peicua uca voira co nungar mbahe. ¹² Esepia, ahe sembiapo yemochīsa ñomipri tēi vireco yuvireco. ¹³ Acoi yamboyecua ucasa rumo evocoi nungar mbahe tesapesa nungar pipe, ahese oyecua tupri secocuer naporai vahe. ¹⁴ Esepia, co tesapesa omboyecua tupri opacatu mbahe recocuer yandeu. Sese aipo ehi: “Peyemopoāse pe oque vahe nungar, peyepipi omano vahe nungar pāhu sui.

Ahese niha Cristo pe recocuer resapera” ehi.

¹⁵ Sese pemahecia tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe. ¹⁶ Peiporu catu ñepeipei ari yande Yar upe nara pe recoveveve. Esepia, cūrítei tecocuer co ñvi pipe mbahe tēi. ¹⁷ Sese peico eme ndoyemboaracuai vahe; iya rumo peyembohe catu yande Yar remimbotar apo āgua. ¹⁸ Ndaheī chira caguar tēi peico, evocoi mbahe ndoporopoisui mbahe tēi apo uca āgua. Peico catura rumo Espiritu Santo pe mbohesa pipe. ¹⁹ Peñehe catu Salmo pipe, opacatu Tūpa upendar sapucaisa pipe avei peyeupe; pesapucui, pemboetei avei opacatu pe piha pipe yande Yar. ²⁰ “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

Omenda vahe cuaitarā mbiguai reseve

²¹ Peyemboyeroya catu ambuae rese Cristo mboeteisa pipe peico.

²² Cuña tomboyeroya omer, inungar yande Yar omboyeroya yuvireco. ²³ Esepia, imer güembireco cuai āgua secoi, ēgüe ehi avei niha Cristo viroyasar cuai āgua oico. Viroyasar Pīsīrosar avei secoi, inungar güetecuer ité sereco. ²⁴ Evocoiyase inungar seroyasar omboyeroya Cristo yuvireco, cuña avei niha ēgüe ehira opacatu omer mboyeroya yuvireco.

²⁵ Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara. ²⁶ Ēgüe ehi yande recocuer moatiro yande angaipa sui i pipe Tūpa Ñehengagüer reroysave.

²⁷ Iyavei oyeupe yande rerecora yande reco catuprisa pipe iyavei yande reco quihaēhisa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe. ²⁸ Ēgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae.

²⁹ Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua āgua, oñearo tupri avei. Ēgüe ehi avei Cristo opacatu viroyasar upe. ³⁰ Esepia, chupendar ité yaico setecuer nungar. ³¹ “Sese ava oseyara vu, osi güembireco rese güeco āgua; ñuvirio yuvirecoira ñepeipei ava nungar.” ³² Ahe ñehesa pipe oime mbahe oyecua ramo vahe aviye va-

he ité. Ahe Cristo opacatu seroyasareta resevendar ñehesa. ³³ Ēgüe ehi eté ñepeipei pesaisu pe rembireco pe yeaisu nungar. Iyavei cuña tomboetei tupri omer yuvireco.

6 Chīhivahe, pemboyeroya pe yesupa, pe si avei yande Yar raisu pipe. Esepia, ahe niha pe cuaita.

² Co porocuita yipindar omombehu vahe porovasasa pisi āgua imboaviyasa pipe aipo ehi: “Pemboeteira pe ru, pe si avei. ³ Ēgüe peyese, pe rorivetera iyavei pe reco pāhumbucu catura co ñvi pipe” ehi.

⁴ Iyavei pe iyesupa, pemoñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saisusa pipe.

⁵ Pe avei no mbiguai, pemboyeroya catura pe rerecuar co ñvi pipe imboeteisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vaheñi viña. ⁶ Peporaviqui tupri catu chupe nara, ndaheī chira rumo pe repiaseño imboviha āgua tēi; peporaviquirea rumo pe querēhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri āgua. ⁸ Esepia, peicua Tūpa omboepira opacatu yandeu yayapose mbahe aviye vahe mbiguai yaicose, anise que ndaheī vahe mbiguai avei.

⁹ Iyavei pe serecuar, peico tupri aveira pe rembiguai upe pe recoasiēhisa pipe. Peicua niha pe opacatu Tūpa pe rerecuar ivave chini vahe povrive peicose. Ahe niha ndayande raisu yoaviratii yande rereco.

Ava Cristo rese yuvirecoi vahe yoepisa resendar

¹⁰ Sese peyemoviracua catu yande Yar rese, ipīratasa rese avei. ¹¹ Peñearo tupri catu Tūpa pīratasa pipe pe yemoviracua āgua Carugar pe mbopa tēiēhi āgua.

¹² Esepia, yande ndaheī ava ité amotarēhisave yayepihamoviracua. Yande rumo yayepihamoviracua espíritu naporai vahe ndoyecuai vahe upe iyavei co ñvi pipendar Carugar ipīrata vahe pītumimbisa pendar reroyaēhi āgua. ¹³ Sese peipisi catu opacatu mbahe Tūpa ombou vahe pēu pe yoepi āgua. Evocoiyase yepe oime tēira mbahe tēi pēu viña, peyemoviracuaño itera rumo chupe.

¹⁴ Ēgüe peye aveira peyemoviracua catu ñehesa supi tupri vahe pipe. Iyavei peyoepira pe reco ñvi tuprisa pipe. ¹⁵ Peyemoingatu voi Tūpa Ñehengagüer ñeroisa resendar mombehu āgua yepi. ¹⁶ Iyavei pereco catu Tūpa rese pe yeroyasa peyese. Ahe inungar sundao yoepisa. Ipipe peyoepira carugar uhu tata resendar nungar pe ātoisa sui. ¹⁷ Poropīsīrosa inungar sundao āca ndiru, ipipe tapeyoepi; peiporu avei Tūpa Ñehengagüer, ahe niha inungar quise pucu Espiritu vireco vahe. ¹⁸ Peyeroqui catu Espiritu pīratasa pipe ari yacatu rupi Tūpa upe opacatu yeruresa pipe. Pemahe-moha catuño ité pe yeruresa pipe. Peyeroquiño ité avei opacatu ava Tūpa reroysar rese yepi. ¹⁹ Peyeroqui avei che rese. Evocoiyase Tūpa tombou che ñehe āgua cheu che siquiyēhisa pipe ñehesa ñepīsīrosa icuapi ramo vahe cua uca āgua ava eta upe. ²⁰ Tūpa niha che cuai co ñehesa mombehu āgua. Ichui tēi cūrítei

soquendapri aico. Peyeroqui catu che rese che siquiyeẽhisa pipe co ñehesa mombehu ãgua.

Ñehesa ipa vahe

²¹ Yande rivri Tíquico, yande rembiaisu, che p̃tiviisar omboaviye vahe ocuaita yande Yar upe mboraviquisa rese, ahe omombehura opacatu che recocuer, mbahe che rembiapo avei p̃eu. ²² Sese amondo eipeve p̃eu ore

recocuer mombehu ãgua 'ipipe toyemonguerẽhi catu yuvireco' viya.

²³ Yande Ru Tũpa iyavei yande Yar Jesucristo tomondo opacatu viroyasar upe teco catupri ãgua, iporoaisu ãgua, oyese yeroya ãgua avei. ²⁴ Tũpa tosovasa opacatu yande Yar Jesucristo raisupar saisusa ñepi reseve vahe pipe. Aipo rupive.

FILIPENSES

Pablo mahenduhasa Jesús reroyasar Filipino pendar upe

1 Che, Pablo, iyavei Timoteo oroico Jesucristo rembiguai. Aicuachía co che ñehe pëu, pe Tüpa upendar Jesucristo rese peico vahe tecua Filipino ve, Jesús reroyasar rãrosar uve, seroyasar rese ihañeco vahe upe avei. ² Yande Ru Tüpa, yande Yar Jesucristo tape rovasa pe reco tupri água.

Pablo yeruresa Jesús reroyasar rese

³ Pe rese che mahenduhasa pipe, “Aviye ndeu” ahe Tüpa upe yepi. ⁴ Iyavei che ayeruresa, ari rupi ayeroqui opacatu pe rese Tüpa upe che viharetasa pipe yepi. ⁵ Esepia, oyoya yañepitívii Jesucristo resendar ñehesa icatupri vahe rese, acoi pe seroya ramo suive. ⁶ Che aicua co Tüpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevíse yande Yar Jesucristo.

⁷ Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tüpa porovasasa yepi co che roquendasave añ, anise que co coti rupi aico mborerecuar rovai co ñehesa pñisirosa resendar repi água iyavei amboyecua vaherã ahe ñehesa supi tupri vahe yuvireco chupe. ⁸ Tüpa oicua ité che opoaisu etepri opacatu. Esepia, Jesucristo niha pe raisu uca cheu. ⁹ Che aporandu vite Tüpa upe che yeruresa pipe: “Toicua tupri oaracuasa pipe oyeaisu catu-catu iri água yuvireco” ahe pëu. ¹⁰ Ipipe sui peicuara mbahe aviye catu vahe poravo água yepi; ãgüe peye aveira pe recocuer moatiro água peico. Evocoyase ndipoi chira angaipa pe rese acoi Jesucristo ouse curi. ¹¹ Percora pe recocuer aviye vahe ité Jesucristo ombou vahe pëu Tüpa mboetei água.

Cristo Pablo recovesa ité secoi

¹² Che rivireta, aipota peicuara co mbahe tã co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco. ¹³ Evocoyase opacatu mborerecuar guasu poraviquisa pendar iyavei opacatu ambuae ava oicuapa che roquendasava Jesucristo rupi che guata sui tã yuvireco. ¹⁴ Iyavei setá etepri yande rivri che repiase soquendapri che recose yuvireco, oyemonguerãhi catu Tüpa Ñehengagüer mombehu água osiquiyeãhisa pipe. Yande Yar rese evocoyase oyeroyá catu yuvireco.

¹⁵ Supi eté oime ava oñehe angahu tã vahe Jesucristo rese che roãrosa pipe tã. Oime rumo amove

ava oñehe tupri Jesucristo rese opihañemoñeta tuprisa pipe. ¹⁶ Evocoi ava oñehe tupri oporoaisusa pipe, ahe oicua cohava che roquendase yuvireco, “Co ñehesa Tüpa ñehe pñisirosa resendar, ahe supi eté vahe, ndahei temira tã” ahesa. ¹⁷ Evocoi ambuae ava Cristo rese oñehe angahu tã vahe oyeupe nara tã oipota mbahe. Ahe che reco momara pota catu co che roquendasave che rã viteve. ¹⁸ Mara etemo che arco aipo mbahe-mbahe tã viña. Yepi amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mboviha.

Che mboviha catu aveira. ¹⁹ Esepia, che aicua co opacatu mbahe-mbahe tã sui añepisiroa pe yeruresa pipe iyavei che pñiviiira Jesucristo Espiritu. ²⁰ Che aipota ité, asãro avei opacatu che recocuer sui che chíehi água añehe vaherã opacatu che siquiyeãhisa pipe. Evocoyase yepi amanora, anise acovera, tombotei catu ava Cristo che recocuer repiase yuvireco. ²¹ Esepia, Cristo che recovesa ité secoi; amanose rumo, aviyeño itera cheu. ²² Aicove vite co ivi pipe, aicatura aporaviqui tupri yande Yar recocuer rese. Evocoyase ndaicuai uma revo aviye cheu. ²³ Ndaicatu co ñuvirio che pihañemoñetasa rereco: amove amano pota che so água ivave Cristo piri. Ahe aviye catura cheu viña. ²⁴ Pëu nara rumo aviye catu aicove vite co ivi pipe. ²⁵ Sese che aicua aicove vite vaherã pe pñivii vite água, pe guata tupri vite catu água iyavei pe viharete catu água pe Jesús reroyasa pipe. ²⁶ Evocoyase che rereco vitera peye pe piri. Ahesa pe viharetasa pipe, “Imboeteipri Jesucristo tasecoi” aipo peyera che repiase.

²⁷ Co catu toyoya tupri pe recocuer co ñehesa aviye vahe Jesucristo resendar rese. Evocoyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pihañemoñetasa yoyasa resendar iyavei pe poraviqui pñratasa resendar pe poreroyasave co ñehesa poropñisirosa resendar rese. ²⁸ Iyavei ndapeyembosiquiyei chira pe amotarẽhimbar sui. Evocoyase ahe oicuara yuvireco chupe ité Tüpa omondora imocañi água; pe rumo Tüpa pe pñisiroa curi. ²⁹ Supi eté ndahei Jesucristo recocuer reroya água güeraño Tüpa oipota pëu, sese pe yemombaraisu água avei oipota. ³⁰ Esepia, pe, che avei oyoya tupri yaporaviqui pñrata yande amotarẽhimbar pãhuve yaico. Iyavei acoi psepia yipindar che aporaviqui pñrata che amotarẽhimbar pãhuve vichico, iyavei cãritei peyandu mara ahe aporaviqui pñrata vite ipãhuve yuvireco.

Cristo yemominisa, seco ivatesa resendar avei

2 Iyavei Cristo pe monguerēhi, pe mboviha oporoaisusa pipe oico, Espiritu avei secoi pe rese. Peyeaису tupri iyavei pe yeaisusa pipe peñepitivii. ² Sese che mboviha catu peye: perecoa pihañemoñetasa ñepeí reseve, oyoya guasu avei peyeaisura, oyoya aveira pe pihañemoñetasa, ñepeí reseve mbahe pe remimbotar rese avei. ³ Ndapeyapoi chira mbahe peyeupe güeraño tēi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae aviye catu perecoa peyesui. ⁴ Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri āgua.

⁵ Inungar Cristo pihañemoñeta, ēgüe peye tupri aveira.

⁶ Yepe ahe Tūpa recocuer vireco, "Taseya eme Tūpa recocuer areco vahe ivive che so āgua" ndehi.

⁷ Opa ité rumo oseya, oyemboava inungar mbiguai tēi ou.

⁸ Ēgüe ehi oyemomoni.

Vu porocuita reroyasa pipe ou iyavei omano poromochisa pipe curusu rese.

⁹ Sese Tūpa omboivate catu, omondo avei sererguā ivate catu vahe opacatu ambuae rer sui.

¹⁰ Evocoyase ahe terer ivate catu vahe renduse 'toñenopiha opacatu iva pendar, ivi pipendar, opacatu omano vahecuer avei yuvireco' oya.

¹¹ Ichui toicua opacatu, "Jesucristo ité yande Yar" tehi yande Ru Tūpa mboetei āgua yuvireco.

Jesús reroyasar tesapesa nungar yuvirecoi co ivi pipe

¹² Evocoyase che rembiaisu, yepe che amombri aico pe sui viña, iya rumo pe che reroya vite ité peye inungar aicose pe pāhuve cuese. Che aipota peicora písirosa pipeño ité Tūpa mboeteisave ichui pe siquiyesa pipe. ¹³ Esepia, Tūpa ombou pe querēhisa semimbotar apo āgua. Güemimbotar rupi avei ombou pīratasa imboaviye āgua pēu.

¹⁴ Peyapo opacatu mbahe pe ñehe-ñehe tēiēhisa pipe, pe yepoepi-epiēhisa pipe avei. ¹⁵ Sese tipo eme mbahe pe rembiavi que pe reco raisa pe rese. Evocoyase peicora Tūpa rahir ndayangaipai vahe ava mbahe-mbahe tēi oyapo vahe pāhuve. Ahe ipāhuve pe recocuer osesapera, inungar tataendi osesape pñumimisave. ¹⁶ Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ēgüe ndehi tēi vaherā. ¹⁷ Jesucristo recocuer rese pe yeroyasa, ahe inungar mbahe seropovēhepri Tūpa upe. Aviyeteramo ichui tēi che yucara yuvireco. Ahe omboaviye tupri itera pe porerecosa Tūpa upe. Yepe che yucara yuvireco viña, che rumo ayembovihañora opacatu pe rese. Pe avei, pevihañora che rese.

Pablo oicuachía Timoteo, Epafrodito recocuer resendar

¹⁹ Che ayeroya yande Yar Jesús rese amondo pihavi vaheerā Timoteo pe repia. Ahe omboyevisse ñehesa pe recocuer resendar, ahese che aviharetera. ²⁰ Iyavei ndipoi eté ambuae ava Timoteo nungar che pihañemoñetasa rupi tupri imahenduha vahe pe rese pe reco tupri āgua. ²¹ Esepia, opacatu oseca güemimbotar tēi apo āgua, ndosecai eté Jesucristo remimbotar yuvireco. ²² Pe niha peicua Timoteo reco tuprisa opacatu upe. Iyavei che pñivii Tūpa Ñehengagüer mombehu āgua, inungar chñivahe oipñivii oyesupa, ēgüe ehi che pñivii oico. ²³ Sese che aipota imondo āgua pe repia acoi aicuse mara ehira che rereco yuvireco. ²⁴ Che rumo ayeroya yande Yar rese aso pihavi vaheerā che teieté pe repia.

²⁵ Iyavei revo aviye catu co yande rivri Epafrodito amboyevira pe piri ahe pembou vahe che pñivii āgua mbahe cheu ipane vahe rese. Ahe che ndugüer oporaviqui pñirata vahe Tūpa upe. ²⁶ Esepia, ahe pe repia pota ité opacatu. Iyavei ahe ehiño oico pēu peicuse imbaheasi. ²⁷ Supi eté imbaheasi oico, seni eté omano viña. Ipare rumo Tūpa oiparaisuereco, ndahei ahe güeraño oipñivii, che avei che paraisuereco co viharēhisa yeapi-apiñoēhi āgua cheu. ²⁸ Sese che amondo pota poyava ité pe piri sese pe yemboviha iri āgua, che mboviha iri āgua avei. ²⁹ Peipisi tupri pēu iyepotase pe viharetesa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi. ³⁰ Yande Yar rese oporaviquise che piri seni omano. Ahe niha oyemondo ité mbahe-mbahe tēi porara āgua che pñivii pipe. Esepia, pe ité ndapeicatui che pñivii peye.

Oicoete ai vahe ité

3 Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri āgua pēu. Iyavei aviye catu ité pēu nara. ² Peñearo acoi ava cave nungar tēi sui, oyapo vahe mbahe tēi iyavei güetecuer omomara tēi vahe. ³ Yande rumo imboircuncidapri nungar supi eté vahe Tūpa mboyeroyasar yaico. Esepia, yayerure Espiritu pipe Tūpa upe; yayemboviha avei Jesucristo reroyasar yande recosa rese. Ndahei yande retecuer rese tēi yayeroya, ⁴ yepe che supi eté ayeroya catura ambuae ava sui evocoi nungar mbahe rese viña. ⁵ Esepia, che imboircuncidapri aico ocho arí pipe che hare, israelita, Benjamín suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoyase ayembohe tupri fariseo aracuaa judío porocuita resendar rese vichico. ⁶ Ipipe sui tēi eté aseca-seca catu ayapo vaheerā mbahe opacatu ava Jesucristo reroyasar upe vichico. Co porocuita reroyasa rese rumo ndipoi eté ava "mara" ehi vahe yuvireco cheu. ⁷ Opacatu co mbahe aviye ité cheu aracaco viña. Cūrítei rumo Jesucristo rese aicose,

ĕgũe ehi tẽi vahe nungar areco. ⁸ Iyavei opacatu que ambuae mbahe aviŕera cheu viña, areco rumo inungar itĩ che Yar Jesucristo recocuer cuasa pipe. Opacatu ahe mbahe aseya Cristo rese che reco āgua. Supi eté Cristo rereco āgua areco opacatu ambuae mbahe itĩ nungar tẽi ⁹ ‘taico sese’ che yapave. Ndahei porocuaita mboaviŕesa rese tẽi aseca che reco catupri āgua, che rumo aseca Jesucristo rese che yeroyasa pipe sui ĕgũe ahe vaheřã. Ēgũe ehi eté Tũpa che pisi seco catupri vahe nungar Cristo rese che yeroyasa pipe. ¹⁰ Che aipota ité Cristo cua tupri catu āgua. Iyavei areco pota pĩratasa icueravevi agũer resendar cheyese. Iyavei aipisi pota iparaisu agũer. Iyavei inungar ahe omano, ĕgũe ahe pota avei. ¹¹ Ēgũe tahe avei che cueravevi āgua omano vahe pãhu sui, ahe co che asãro vichico.

Pablo osupiti pota ité gũeco maranehi āgua

¹² “Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vite chietera. Che rumo aseca vite ahe tecocuer che recorã. Esepia, Jesucristo che pisi ité oyeupe nara. ¹³ Che rivireta, “Che ae tẽi co tecocuer ihĩvi vahe opa ité ayapo vichico” ndahei chira pẽu. Co rumo mbahe che ayapo, ayemboesarai opacatu che reco agũer sui. Iyavei opacatu che recovesa rese aguata tenondeño ité. ¹⁴ Esepia, Tũpa che renoi ivave che so āgua aipisi vaheřã iporererocosa iva pendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande pihañemoñetara opacatu yande yaracua tupri vahe. Que revo yande pihañemoñetase que ambuae mbahe rese tẽi, ahe Tũpa oicua ucara yandeu. ¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rivireta, peico che nungar iyavei pemahecua tupri ava ore recocuer moñasar rese. ¹⁸ Iyavei amombehu setã yupagũer pẽu, cũritei amboyevi iri che yasehosa pipe imombehu pẽu. Setã ité oime ava co ñehesa Cristo mano agũer curusu resendar amotarẽhimbar. ¹⁹ Ahe rumo imocañipirã yuvirecoira curi. Oyemonguerẽhi opacatu mbahe tẽi apo āgua rese yuvireco yepi. Ahe niha otũpa nungar ité vireco. Iyavei gũeco ivate aisa pipe oyapo mbahe tẽi yande mochi ai vahe yuvireco. Co ivi pipendar mbahe-mbahe tẽi reseño ité ipihañemoñeta yuvireco. ²⁰ Yande rumo ivave nara ité yaico. Iyavei yasãro ité yaico iva sui ou vaheřã yande Pĩsĩrosar, ahe yande Yar Jesucristo. ²¹ Ahe opĩratasa pipe virecora opacatu mbahe opovrive. Ahe opĩratasa pipe avei osecuñaropara yande retecuer ĕgũe ehi tẽi vahe, ahe se inungar ahe setecuer sendi yai, nimarai vahe, ĕgũe yahe aveira yande yaico.

Yayemboviha yande Yar rese yepi

4 Sese che rivireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerercosa imboupri peico cheu. Esepia, che vihasa ité peico.

² Ambuae mbahe, Evodia iyavei Síntique toyuvirecoi oyecupihir nungar ité yande Yar reroyasa pipe yuvireco. ³ Nde niha che pĩtivii tupri vahecuer che poraviquisa rese eve. Eipĩtivii evocoi cuña. Esepia, ahe niha oyembopihaŕracua ité che pĩtiviise Tũpa Ñehengagũer pĩsirosa resendar mombehu āgua yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tũpa cuachiar tecovesa apirẽhi vahe resendar pipe.

⁴ Peyemboviharete ari yacatu rupi yande Yar rese yepi, “¡Peyembovihaño ité!” ahe aipo pẽu. ⁵ Pemboye-cua catu opacatu ava upe pe reco mbeğũesa. Esepia, cõimi yande Yar yevi iri āgua yandeu.

⁶ “¿Mara ahera piha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tũpa uve, peporandura evocoi mbahe rese iyavei, “Aviye ndeu” peyera chupe. ⁷ Evocoyase Tũpa omondora gũeco tupriřa pẽu, pe Jesucristo rese peico vahe. Co teco tupriřa niha aviye catu ité opacatu ava pihañemoñetasa sui. Ipipe sui Tũpa osãro pe piha, pe pihañemoñetasa avei pẽu.

Yandepihañemoñetara opacatu mbahe aviye vahe rese

⁸ Co ipa, che rivireta: yande pihañemoñetara opacatu mbahe supi tupri vahe rese, poromboetei āgua rese, mbahe ihĩvi vahe rese, mbahe maranehi rese, mbahe yande mboviha vahe rese, opacatu mbahe aviye vahe icuapri vahe rese. Iyavei yande pihañemoñetara que ambuae mbahe aviye vahe rese, imboeteipri vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoyase Tũpa gũeco tupriřa reseve secoira pe rese.

Filipo pendar porerercosa Pablo upe

¹⁰ Aviharete yande Yar rese. Esepia, pemahenduha irimi che rese pe porerercosa mbou āgua cheu. “Sesarai yuvireco che sui” ndahei chira pẽu. Pe rumo yipindar ndapeicatui eté che pĩtivii āgua peye. ¹¹ “Ipane mbahe cheu” ndahei chira pẽu. Esepia, ayembohe che viharete āgua mbahe che rembiereco rese. ¹² Aicua mara yahe yande paradisusa pipe yaico, aicua avei mara yahe mbahe rereco ati āgua. Ayembohe avei che viha āgua opacatu mbahe oimese cheu, que chehĩtarose, ndache riepoise, que oimese sumbire vahe mbahe cheu, que mbahe ipanese cheu. ¹³ Aicatu opacatu mbahe uve che yemoviracua āgua. Esepia, Cristo ombou che pĩrata āgua. ¹⁴ Pe rumo peyapo mbahe aviye vahe cheu che pĩtivii eteprisave peye mbahe-mbahe tẽi oimese cheu.

¹⁵ Iyavei pe Filipino pendar peicua avei acoi yipindar peipisise pĩsirosa resendar Tũpa Ñehengagũer acoi che sose Macedonia sui, ndipoi eté Jesús reroyasar ambuae tecua pendar iporerereco vahe yuvireco che

rese. Pe güeraño pembou pe porerecosa, "Aviye" pe hesa pipe che pñivii água. ¹⁶ Iyavei aicose Tesalónica ve, pembou pe porerecosa cheu ñuvirío yupagüer che pñivii água. ¹⁷ Ndachepihañemoñetai mbahe arocuaño tēi vaheřã pe sui. Che rumo aipota Tūpa omboyevira pēu co pe porerecosa pembou vahe cheu. ¹⁸ Che opa aipisi pe porerecosa Epafrodito upe pembou vahe. Evocoyase oimeño ité iyavei sumbire vite cheu. Ahe pembou vahe cheu aviye ité, inungar itaisi sñacua vahe, iyavei inungar mbahe seropovēhepri aviye vahe Tūpa upe. ¹⁹ Evocoyase yande Ru Tūpa, ombahe eta porañete vahe sui omondora opacatu mbahe ipane vahe pēu Jesucristo rese oime vahe. ²⁰ ¡Ēgüe tehi timboeteisa yande Ru Tūpa! ¡Ahe apirēhi vahe secoi yepi!

Ñehesa ipa vahe

²¹ Aviye, pemombehu che mahenduhasa opacatu Tūpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pēu.

²² Iyavei opacatu ambuae yuvirecoi vahe cohava Jesús reroyasar iyavei acoi mborerecuar guasu rētave yuvirecoi vahe, ahe ité avei omondo omahenduhasa yuvireco pēu.

²³ Yande Yar Jesucristo tape rovasa opacatu. Aipo rupive.

COLOSENSES

Pablo mahenduhasa Jesús reroyasar Colosa pendar upe

1 Che, Pablo, Jesucristo apóstol aico Tūpa remimbotar rupi yande rivrī Timoteo reseve. ² Co aicuachía pēu, pe Cristo rese peico tuprī vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tuprī āgua pēu.

Pablo yeruresa Jesús reroyasar rese

³ Ari yacatu ore yeroqui pipe, “Aviye ndeu” oroho yande Yar Jesucristo Ru Tūpa upe pe rese. ⁴ Esepia, oroyandu acoi oyepota ramose Tūpa ñehe supi eté vahe, aviye vahe pñsirosa resendar pēu, peyapisaca tuprī sese. Ipipe sui peyeroya ivave pe reique āgua Tūpa porrecosa pisi āgua. Ahe ichui peyeroya tuprī Jesucristo rese iyavei pesaisu opacatu ambuae Tūpa rembiporavo yepi. ⁶ Co ñehesa imombehusa avei opacatu ivi rupi, setá ava oipisi tuprī avei yuvireco. Inungar acoi pesenduse yipindar Tūpa porovasasa resendar ñehesa, ipipe sui peicua tuprī catu ahe porovasasa supi eté vahe. ⁷ Co ñehesa yande rembiaisu yande mboetasa Epafras pe mbohe. Ahe mbia yande Yar Jesucristo rese oporaviqui vahe ore rupi, ocuaita viroya tuprī vahe pe pāhuve. ⁸ Ahe omombehu oreu Espiritu pipe pe ore raísusa resendar.

⁹ Sese avei ore aipo nungar rendu ramoseve ndoroyeroquipai pe rese. Oroyeroqui, oroporandu pe rese ‘toicua tuprī opacatu Tūpa remimbotar ombahacuasa Espiritu suindar pipe, senducua tuprīsa pipe avei yuvireco’ ore yapave pēu. ¹⁰ Ipipe sui tapeguata tuprī yande Yar rupi seroyasar tuprī pe recosa pipe. Tapemboaviye tuprī opacatu semimbotar; mbahe pe rembiapo tuprī pereco catu sovaque. Ipipe sui avei tapeicua tuprī catu Tūpa recocuer peico. ¹¹ Iyavei tombou catu pe momirata āgua güecocuer pñratasa pipe sui. Evocoyase oimese que mbahe tēi pēu, peñemosañora pe reco mbegüesa pipe. ¹² “Aviye ndeu” peyera pe viharetasa pipe yande Ru Tūpa uve. Esepia, ahe omoingatu pe recocuer peipisi āgua iporerecosa oime vaheñā opacatu sembiporavo upe acoi yuvirecoi vahe Tūpa poroesapesa pipe. ¹³ Ahe niha yande pñsiro Carugar povrī sui. Ēgüe ehi yande reraso Guahir güembiaisu povrīve. ¹⁴ Ahe Tahir yande pñsiro iyavei yande angaipa rese iñero yandeu.

Jesús omano curusu rese Tūpa upe opacatu mbahe moingatu āgua

¹⁵ Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yipisuive ivate catu vahe opacatu mbahe yapoprī sui. ¹⁶ Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapoprī opacatu iva pendar mborerecuar, mborerecuar guasu iyavei mborerecuar ivate catu vahe. Ēgüe ehi ipipe sui opacatu mbahe yapoprī, chupe nara avei. ¹⁷ Ahe oicove yipisuive aracahe opacatu mbahe reimeñhi vitesese. Ahe avei omoime vite opacatu mbahe yandeu. ¹⁸ Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yipindar vahe iyavei ahe rane avei ocuerayevi. Evocoyase ahe ivate catu vahe opacatu sui. ¹⁹ Esepia, Tu oipota opacatu güecocuer reseve secoi āgua sese yepi. ²⁰ Iyavei ‘che Rahir recocuer pipe sui taroyevi iri opacatu mbahe cheyeupe ivi pipendar, iva pendar avei’ oya. Ēgüe ehi Jesús oipiyere vuvī curusu rese Tūpa upe opacatu mbahe moingatu āgua.

²¹ Yipindar pe pñhañemoñeta raisa pipe sui tēi amombri Tūpa sui peico yamotarēhisa pipe mbahe pe rembiapo ai rese. ²² Cūrītei rumo Tūpa iñero pēu pe reroyevi oyeupe Cristo mano pipe. Ahe niha Ēgüe ehi Vu rovai ipehaprī pe rereco oyeupe nara, pe reco marañhi āgua mbahe aviñhisa pipe ava rovaque. ²³ Ēgüe peye āgua rumo peyemoviracuaño itera Cristo rese pe yeroyasa pipe yepi. Ndapeyepēñhi chiaveira mbahe oime vaheñā rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuairpī, aico co ñehesa mombehu āgua.

Pablo icuaita Jesús reroyasar rese hañeco āgua

²⁴ Cūrītei avīha pe rese che yemomborarasa pipe. Ēgüe ahe iporara che rete rese cohave vichico. Ēgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico. ²⁵ Jesús reroyasar pñtivī āgua niha Tūpa che cuai. Sese amombehu opacatu iñehengagüer pēu pe reco tuprī āgua rese. ²⁶ Ahe ñehesa aracahe suive ndicuasai vahe ité. Cūrītei rumo Tūpa omboyecua viroyasar upe. ²⁷ Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuasai vahe, ahe Cristo pe rese secoi vahe. Co

yande remiario yareco vaheřã teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe avei ava yaracua tupri ãgua ore aracuasa pipe 'toyuvirecoi tupri ite Cristo rese Tũpa rovai' ore hesa pipe. ²⁹ Co rese niha che aporaviqui etepri opacatu Cristo pĩratasa pipe.

2 Che aipota peicua che yemboaquisa pe recocuer rese, Laodicea pendar recocuer rese, setã ambuae ava che cuaparẽhi recocuer rese avei ² 'toyemonguerẽhi catu, toyemboyoya guasu oyeaisusa pipe yuvireco' viya. Iyavei 'senducua tupri pipe toyuvirecoi mbahe tupri pipe' viya opacatu pẽu. Esepia, ichui avei peicua tupri co mbahe imboyecuapi ramo, ahe niha Cristo. ³ Ahe vireco opacatu mbahe yande mboaracua ãgua, mbahe renducua tupri ãgua avei. ⁴ Aipo mbahe amombehu pẽu ava oñehe tupri aisa pipe tẽi pe mbopaẽhi ãgua. ⁵ Iyavei yepe amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ñvisa pipe, ndapeyepẽise co coti rupi Jesucristo reroyasa sui. Sese che mbovihareteño ite peye.

Jesús suindar tecocuer piasu

⁶ Evocoyase inungar acoi peipisi Jesucristo pe Yarã, ãgũe peye aveira peico sese ari yacatu rupi ⁷ pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, "Aviye ndeu" peye itera Tũpa upe ari yacatu yepi.

⁸ Peicua catu, peyembopa ucai rene aracahendar tẽi ava aracuasa pipe. Esepia, ahe ãgũe ehi tẽi vahe, ava suindar tẽi yembohesa, ivi pipendar ava seco ivate catu vahe pihãñemoñetasa tẽi. Ndahei Cristo suindar porombohesa.

⁹ Esepia, Cristo vireco opacatu Vu Tũpa reco oyese. ¹⁰ Evocoyase pe pereco Tũpa reco Cristo rese peicose. Ahe opacatu mborerecuar ivi pipendar iyavei iva pendar rerecuar secoi. ¹¹ Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo tẽi. Co rumo Cristo oyapo vahe pe recocuer rese. Esepia, ahe virocuã pe recocuerai pe sui. ¹² Pe ãpiramosa pipe ndoyavii pe recocuerai ñotimbri Cristo reseve. ãgũe ehi avei ndoyavii pe recocuer ocuerayevi vahe seseve avei, peyeroyase Tũpa pĩratasa rese. Ahe niha ombogũerayevi vahe Guahir omano vahe pãhu sui. ¹³ Pe niha acoi cuese omano vahe nungar peico Tũpa upe pe angaipa pipe, pe ndahei vahe judio peico vahe. Ahe rumo pe recocuer mbogũerayevi Guahir reseve iyavei iñero pe angaipa rese pẽu. ¹⁴ Ahe yande cañi rãgũer rumo opa omboepi. Esepia, yande iporocuaite pipe yaico imboaviye ãgua viña, evocoyase imocañipri tẽi yaico ipovrive viña; ombou rumo Guahir curusu rese yatica ãgua yande cañi rãgũer sui yande renose ãgua. ¹⁵ ãgũe ehi ahe omano pipe curusu rese carugar, ipovri pendar mborerecuareta reseve secopi. ãgũe ehi seco reroyi, inungar vavasa pendar ipisipri serasosa opacatu ava rembiepiave.

Peseca iva pendar mbahe pe recocuer upe nara

¹⁶ Evocoyase toñehe-ñehe tẽi eme que ava pe rembiuhu rese yuvireco, pe igua rese avei; anise que ndapemboeteise judio pieta, que ari, yasi osẽ ramomi vahe, anise que judio ari mbituhusa avei no. ¹⁷ Esepia, opacatu co mbahe, ahe yipindar vahe, "ãgũe ehira Cristo ou" hesa tẽi yandeu. Co rumo Cristo ite cute. ¹⁸ Peyapisacai rene acoi ava "ndapeipisii chira porerecosa iva pendar ndaperoyaise ore ñehe" ehi tẽi vahe rese pẽu. Acoi ava "Tũpa rembiguai pemboeteira" ehi tẽi vahe yuvireco. Ahe avei, "Che seco mbegũe vahe aico" ehi angahu tẽi. Iyavei, "Che asepia che quer nungar pipe iva pendar mbahe" ehi tẽi. Esepia, ahe oyemboivate ai oaracua rai tẽisa pipe yuvireco. ¹⁹ Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoyase ahe omboyemboya tupri oyese, ñpepi vahe nungar vireco oyeupe Vu Tũpa remimbotar rupi.

²⁰ Pe omano vahe nungar peico Cristo rese. Evocoyase ndahe iri co ivi pipendar pihãñemoñetasavrive peico. ¿Mahera evocoyase peroya vite co ivi pipendar porocuaite ãgũe ehi tẽi vahe, ²¹ inungar "pepocoi rene co mbahe rese, pehui rene evocoi nungar mbahe" ehi tẽi vahe? ²² Opacatu co nungar porocuaite ocañi tẽi vaheřã. Esepia, ahe ava remimbotar tẽi yembohesa, iporocuaite tẽi avei. ²³ Co mbahe aviye angahu aracuasa supi ete vahe. Esepia, seroyasar ahe ehiño oyeruresa uve, oyeecomomini tẽi iyavei omombaraisu gũetecuer yuvireco viña. Ahe aracuasa rumo ãgũe ehi tẽi vahe. Esepia, ndayande pĩtivii ete yande yepipi ãgua yande remimbotarai sui.

3 Cũritei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oĩ gũeco mborerecuasa pipe Vu acato coti. ² Pepihãñemoñeta mbahe iva pendar rese, ndahei chira ivi pipendar mbahe rese tẽi. ³ Esepia, cũritei omano vahe nungar peico pe recocuerai upe. Iyavei Cristo reseve peico Tũpa piri, inungar-ra ivave viña. ⁴ Cristo niha yande recovesa ite secoi. Sese ahe oyevi irise curi, ãgũe peye aveira perecora ipiri seco ori porañetesa.

Yande recocuer yipindar iyavei yande recocuer piasu

⁵ Evocoyase pepoi opacatu co mbahe naporai vahe co ivi pipendar tẽi pe rese oime vahe sui: ndapeyemboaguasai chira, ndapeyapoi chira mbahe tẽi pe recocuer pipe, ndapeipota rai chira pihãñemoñeta raisa, ndapeipota rai chiaveira ambuae ava mbahe (esepia, ahe niha oyoya mbahe rahanga tẽi mboeteisa rese). ⁶ Acoi oyapo vahe co nungar mbahe, ahe Tũpa ñemoirosa oipisira seroyaẽhisa pipe yuvireco. ⁷ ãgũe peye avei yipindar pe recocuerai pipe peico. ⁸ Cũritei rumo peseya opacatu co mbahe-mbahe tẽi: pe ñemoirosa, pe poroyucaĩ aisa, pe reco raisa, pe ñehe mara-mara tẽisa iyavei pe ñehesa ndayamombehui vahe. ⁹ Ndaperemirai chira peyese. Esepia, pepoi yipin-

dar pe reco ai sui iyavei pe rembiapo ai sui. ¹⁰ Iyavei peipisi tecocuer piasu, aviye vahe. Ipipe peyembohe ari yacatu yande Aposar Tūpa recocuer rese peico, icua tupri catu āgua. ¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidapri aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tēi secoi” ehi vahe. Anise que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

¹² Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoyase peyapora co nungar mbahe: peporoaisura, peavara peyeupe, peñemomini-ra, pe reco mbegüera iyavei peñemosañora. ¹³ Ēgüe peyera peñemosa oyeupe, peñero aveira opacatu oyeupe acoi pe pāhu pendar oñemoirose pēu. Inungar Cristo ñerosa ombou yandeu, pe avei Ēgüe peyera ambuae ava upe. ¹⁴ Iyavei peyeaisu catura. Esepia, ahe yande mboyemboya tupri oyese yepi. ¹⁵ Acoi teco tupri Cristo ombou vahe pēu, tape mbohe pe pihañemoñeta tupri āgua. Esepia, co rese Tūpa pe renoi ñepeí ava nungar pe reco āgua. Iyavei, “Aviye ndeu” peyera chupe.

¹⁶ Topita tupri Cristo ñehengagüer pe piha pipe. Pe aracuasa tuprisave peyembohe tupri, peyemonguerēhi catu sapucaisa Tūpa resendar rese. Pesapucaí opacatu sapucaisa Tūpa upendar pe pihá pipe, “Aviye ndeu” pe hesave yepi. ¹⁷ Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tūpa upe yepi.

Jesús reroyasar cuaita resendar

¹⁸ Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe. ¹⁹ Pe avei no imer: pesaisu pe rebireco. Perecoi rene pihaviracuasa pipe.

²⁰ Pe avei no chíhivahe: peroya aveira pe yesupa. Esepia, ahe yande Yar oipota. ²¹ Pe avei no tu: pemoñemoiro ucai rene pe rahir peyeupe. Esepia, aviyeteramo niquerēhi iri chira ocuaise pēu.

²² Pe avei no mbiguai: peroya tupri avei pe rerecuar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe pihañemoñeta tupri pipe, Tūpa sui pe siquiyesa pipe avei. ²³ Opacatu mbahe peyapo vahe, peyapo pe querēhisave yande Yar mboviha āgua. Ndahei chira ava mboviha āgua tēi. ²⁴ Esepia, peicua tupri co: yande Yar omboura oporerocosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe. ²⁵ Acoi ava oyapo vahe mbahe naporai vahe, oipisi aveira güembiapo ai repri. Tūpa niha nomboaviratii yande raisu.

4 Pe avei serecuar: peyapo mbahe ihivi vahe pe pihañemoñeta tupri pipe pe rembiguai upe.

Peyemomahenduha co rese: pe avei pereco pe rerecuar ivave.

² Iyavei no opacatu peyeroqui catu ari rupi pe mahe-mohasa pipe. “Aviye ndeu” peye Tūpa upe. ³ Peyeroqui avei ore rese. Tore pñivii Tūpa oñehengagüer mombehu vite āgua. Toroñehe vite avei co ñehesa Cristo resendar Tūpa omboyecua ramo vahe rese yandeu. Sese tēi niha co che roquendasa. ⁴ Evocoyase peyeroqui che rese, tamombehu tupri catu co ñehesa opacatu upe senducua tupri catu āgua. Ēgüe tahe che cuaita mboaviye.

⁵ Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseve. ⁶ Pe reco aviye tupri pipe peñehera yepi. Iyavei peicua tupri ñehesa mboyevi āgua ñepeí-peí ava uve.

Ñehesa ipa vahe

⁷ Co yande rivri, yande rembiaisu, Tíquico, che pñivii tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pēu. ⁸ Sese co amondo pēu ore recocuer cua tupri āgua, pe monguerēhi catu āgua avei. ⁹ Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirío mbia omombehura pēu opacatu mbahe oime vahe cohava.

¹⁰ Aristarco, che ndugüer che roquendasave, omondo omahenduhasa pēu iyavei Marcos, Bernabé rihir. Pe revo peicuaño Marcos so āgua eipeve; osose pe piri, peipisi tupriñora. ¹¹ Iyavei omahenduhasa omondo Jesús, ahe serer acoi Justo, pēu. Co güerañomi Jesús reroyasar pāhuve judío oporaviqui vahe che rupi yuvireco Tūpa mborerecuasave nara. Ahe niha che mboviha yuvireco yepi. ¹² Epafras avei omondo omahenduhasa pēu. Ahe pe recua pendar ité, Jesucristo rembiguai. Ahe oyeroqui vahe pe rese yepi ‘toyemoviracua tupri iyavei toyuvirecoi Tūpa remimbotar rupi yuvireco’ oyapave. ¹³ Che aicua ité secocuer. Ahe oyemboaquí oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei. ¹⁴ Iyavei yande rembiaisu Lucas, oporoposano vahe, Demas reseve omondo omahenduhasa yuvireco pēu.

¹⁵ Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tūpa reroyasar yuvireco. ¹⁶ Peyeroquire, pemondo co cuachiar Laodicea pendar Jesús reroyasar upe iyeroqui āgua. Iyavei Laodicea pendar cuachiar rese peyeroqui avei. ¹⁷ Iyavei emombehu Arquipo upe aipo ere: “Emboaviye tupri Tūpa nde cuaisa” ere.

¹⁸ Che Pablo aico. Che ité aicuachía co che mahenduhasa pēu. Tapemahenduha vite che roquendasave che rese. Aviye pēu. Yande Aposar tape pñivii. Aipo rupive.

1 TESALONICENSES

Pablo mahenduhasa Jesús reroyasar Tesalónica pendar upe

1 Che, Pablo, Silvano reseve iyavei Timoteo, aicuachía co che ñehe pëu, ore rivireta, peñemonuha vahe Tüpa upe tecua Tesalónica ve, yande Ru Tüpa, yande Yar Jesucristo rese peico vahe. Tape rovasa pe reco tupri água yande Ru Tüpa, yande Yar Jesucristo avei.

Tesalónica pendar yeroyasa resendar ñehesa

2 Ore, “Aviye ndeu” orohe ari rupi Tüpa upe opacatu pe rese yepi. Iyavei oremahenduha pe rese ore yeruresa pipe. **3** Pe niha yande Yar rese pe yeroya tuprisa pipe peporaviquiño yepi, iyavei pe poroaisusa pipe peyapo mbahe Tüpa upe, iyavei peñemosañño mbahe tēi upe Jesucristo rãrosa pereco vahe rese. Sese oremahenduha pe rese ari yacatu rupi yande Ru Tüpa rovai. **4** Ore rivireta, Tüpa niha pe raisu, oroicua avei ahe ité pe poravo. **5** Esepia, acoi oromombehuse ñehesa p̄sirosa resendar, ndahei ñehesa oreyesuindar tēi oromombehu pëu; Espiritu Santo reco p̄ratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pãhuve oroicose, oroico tupriño ité, orosecaño avei pe reco tupri água.

6 Ipare pemboyeapi ore recocuer peico iyavei yande Yar recocuer avei no. Iyavei yepe peparaisu mbahe mbahe tēi pãhuve peico viña, peipisiño ité rumo co ñehesa pe vihasa pipe Espiritu Santo ombou vahe pëu.

7 Evocoya pe reco pipe pemboyecua catu pe reco catuprisa Tüpa reroyasar Macedonia pendar upe, Acaya pendar upe avei. **8** Esepia, pe Tüpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tüpa reroyasa pereco vahe peyese. Sese ore ndoromombehu iri chira pe recocuer. **9** Esepia, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tüpa oicove vahe rupi pe guatasa yuvireco, pe chupe nara mbahe apo água avei no. **10** Omombehu avei pesãro vahe Tüpa Rahir Jesús iyevi água iva sui yuvireco oreu, acoi Tüpa ombogüerayevi vahe omano vahe pãhu sui. Ahe niha yande p̄sirora Tüpa ñemoirosa ipirata vahe ou vahe rã sui.

Tesalónica pendar yeroyasa mboyecua

2 Ore rivireta, pe niha peicua ore so agüer pe piri ndahei ãgüe ehi tēi vahe. **2** Peicua tupri avei niha

acoi cuese yipindar mara-mara tēi ava ore rereco yuvireco tecua Filipino ve. Tüpa rumo ore p̄tivii oñehengagüer p̄sirosa resendar mombehu água opacatu ore siquiyeñhisa pipe ore amotarēhimbar pãhuve. **3** Esepia, ndoroyavii eté ore ñehe iyavei ndoroñehei ore p̄hañemoñeta raisa tēi pipe pëu, ndahei avei ore porombopa água oroñehe. **4** Tüpa rumo ore recoãha, ichui ore cuai oñehengagüer p̄sirosa resendar mombehu água; ãgüe ehi ore ñehe, ndahei ava tēi mboviha água. Tüpa yande p̄hañemoñetasa oicua vahe rumo oromboviha. **5** Peicua niha ore ndoroñehei ñehesa icatupri catu vahe tēi rese pe mbopa água, iyavei ndahei guarepochi potasave tēi oroñehe tupri. Tüpa niha oicua. **6** Ore ndorosecai eté ava ore mboetei catu água pe, que ambuae ava eta avei no. **7** Ehi oroyandu ucara ore mborerecuasa Jesucristo ore cuaisa pëu viña; oroyemominiño rumo oroico pe pãhuve inungar acoi cuña osãro tupri vahe omembri imboacua. **8** ãgüe orohe avei ore pe raisu. Sese ndahei Tüpa Ñehengagüer año oromondo pota pëu, ore recocuer avei no. Esepia, opoaisú ité. **9** Ore rivireta, peyemomahenduha acoi ore paraisu agüer rese, ore poraviqui agüer rese avei ari, p̄itu reseve. Ndahei que ñepei mañeco tēi água mbahe rese oromombehu Tüpa Ñehengagüer oroico pëu.

10 Pe niha ore repia peye Tüpa avei oicua, ore reco tuprisa, ore rembiapo supi eté vahe, ihñvi vahe pe Jesús reroyasar pãhuve. **11** Peicua niha, inungar mbia guahir upe, ãgüe orohe pe monguerēhi, pe mbovihasa avei ñepei-pe opacatu. Iyavei oromondo pe cuaitarã pe reco tupri água Tüpa remimbotar rupi. Ahe niha oroñehe pëu peico vahe rã sese imborerecuasa porañetesave.

13 Co rese, “Aviye ndeu” orohe Tüpa upe ari yacatu rupi. Esepia, Tüpa Ñehengagüer, oromombehu vahe pëu, peipisi ité, “Co Tüpa ñehe, ndahei ava tēi ñehe” aipo peye ité pe chupe. Supi eté Tüpa ñehe. Ahe niha osecuñaro ité pe recocuer peroyare. **14** Ore rivireta, acoi cuese peiporara mbahe-mbahe tēi pe mu eta pãhuve peicose; ãgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarēhisave yuvireco.

15 Ahe niha oyuca yande Yar Jesús yuvireco. Ahe avei oyucapa Tüpa ñehe mombehusar yuvireco aracahe. Ore avei opa ore mombo yuvireco. Ndoviroyai Tüpa yuvireco iyavei opacatu ava amotarēhimbar tēi yuvirecoi. **16** Esepia, acoi oroñehe potase ava ndahei vahe judío upe iñepisiro água rese, ahe rumo ndoipotai yuvireco oreu. Ipipe sui oyemboangaipa catu yuvireco.

Cūrítei rumo Tūpa ñemoirosa ipĩrata vahe ou iharive yuvireco cute.

Pablo oso pota iri Tesalónica pendar repia

¹⁷ Ore rivireta, yepe ndayayoepia iri yayepipi raimise yandeyesui, ore piha pipe rumo, "Ahé" oroheño ité pëu. Iyavei orequerêhiño ité yepi oroso iri vaherã pe repia. ¹⁸ Orosãha tēi ore so āgua pe repia yepi; che Pablo teieté setá yupagüer tēi aso pota. Carugar rumo ndoipotai. ¹⁹ ¿Ava sui pĩha orosãro mbahe aviye vahe? ¿Uma ore vihasa? ¿Uma ore mboviharete catura? ¡Peño itera acoi yande Yar Jesucristo yevise curi! ²⁰ Pe ité niha ore mbovihara peye, iyavei oroviha catura pe rese no.

3 Evocoyase che nañemosa irise pe repiaēhi rese, chepihañemoñeta yande rivri Timoteo mondo āgua pe repia; "Che güeraño tapita Atenas ve" ahe. Esepia niha, ahe oporaviqui vahe Tūpa upe ore rupi, omombehu vahe co ñehesa pĩsirosa resendar Cristo suindar ou vahe. Ahe amondo pëu pe moviracua catu āgua, pe monguerēhi catu āgua avei peyeroya catu vahe herã Cristo rese. ³ Evocoyase tipo eme oyembosiquiye vahe co mbahe tēi pe mombaraĩsuse. Peicua niha yaiporara rane itera co nungar mbahe. ⁴ Iyavei niha acoi oroico vitesse pe piri, "Yande paraisu rane itera mbahe yavai vahe" orohe voi eté acoi pëu. Ahe niha cūrítei peicua. ⁵ Evocoyase che nañemosa irise, amondo Timoteo '¿yuvirecoiño ité pĩha Tūpa rese?' che yapave. Che asiquiye, "Aviyeteramo Carugar omondora mbahe tēi pipe yuvireco" ahe 'ore poraviqui agüer evocoyase ocañi tēira' che hesave.

⁶ Cūrítei rumo Timoteo oyevi Tesalónica sui, güeru ñehesa aviye vahe pe resendar oreu pe Tūpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tēi peye no; inungar ore pe repiasa pota tēi avei. ⁷ Sese, ore rivireta, ore paraisusa pãhuve ore mboviharete peye, co oroicuase pe reco tupri Tūpa reroyasa pipe. ⁸ Cūrítei ore mopoase catu iri oroyanduse pe yemoviracua tuprisa yande Yar rese. ⁹ "¿Mara yahera pĩha, 'Aviye ndeu' yande he tupri catu āgua Tūpa upe?" orohe pe reco tuprisa rese, iyavei ore yemboviha catura rese avei no ¹⁰ pĩtu, ari rupi oroporandu Tūpa upe ore so āgua pe repia eipeve iyavei Tūpa reroyasa ipane vite vahe mboaviye tupri āgua pëu.

¹¹ Iyavei ore oroipota ore pĩtiviira yande Ru Tūpa, yande Yar Jesucristo avei ore so āgua pe piri. ¹² Evocoyase yande Yar tape moviracua catu, tombou catu avei pe yeaisu āgua, iyavei opacatu raisu catu āgua, inungar ore orovireco pe raisusa. ¹³ Ipipe sui tape moviracua pe reco maranehi pipe pe mbahe aviēhisave yande Ru Tūpa rovai acoi oyevise yande Yar Jesús opacatu ovoya reseve. Ēgüe tehi pëu.

Teco tupri Tūpa oipota

4 Ore rivireta, cūrítei oroñehe pota pëu pe cuaitarã rese yande Yar Jesús rer pipe: inungar cūrítei pe

recocuer pereco, Ēgüe peyeño ité catu peico ore pe mbohe agüer rupi Tūpa mboetei āgua.

² Pe niha, peicua acoi ore pe mbohe agüer yande Yar Jesús rer pipe. ³ Esepia, Tūpa oipota pe reco maranehi āgua oyeupe. "Tipo eme que ñepeí oyemboaguasa tēi vahe" ehi. ⁴ Iyavei peico tupri pe rembireco rese pe reco ĩvisa pipe Tūpa remimbotar rupi, iyavei pemboetei tupri sereco yepi. ⁵ Peicoi rene ava Tūpa ndoicuai vahe reco pipe pe remimbotar tēi apo āgua. ⁶ Tipo eme avei oyapo vahe co nungar angaipa yande rivri reco momara āgua tēi. Esepia, Tūpa omondora oñemoirosa ipĩrata vahe evocoi nungar ava upe. Evocoi niha yipi-suive oromombehu vahe pëu. ⁷ Esepia, Tūpa niha yande poravo yande reco maranehi āgua, ndahei angaipa pipe yande reco āgua tēi. ⁸ Sese acoi ndosendu potai vahe co yembohesa, ndahei eté ava tēi viroĩro, ahe rumo Tūpa ité viroĩro yuvireco acoi ombou vahe oEspíritu Santo pëu.

⁹ Iyavei co peyepãhuve pe yeaisusa rese, ndaicuachía iri chira pëu. Esepia, Tūpa ité niha pe mbohe pe yeaisu āgua opacatu. ¹⁰ Ēgüe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha vite catu pe poroaisusa. ¹¹ "Peico tupriño avei pe reco mbegüesa pipe; mbahe pe rembiapo reseño tupri pehañeco; peporaviqui pe po pipe ité" aipo orohe acoi pëu cuese. ¹² Evocoyase pe mboyeroyara ava ndahei vahe Jesús reroyasar yuvireco; iyavei Ēgüe peyera mbahe pëu ipaneēhi āgua avei no.

Oyevira yande Yar co ivi pipe

¹³ Ore rivireta, ore oroipota peicua aveira manosa recocuer; sese ndapeicoi chira pe viharēhisa pipe inungar co ava ndoyeroyai vahe Tūpa rese. ¹⁴ Esepia, yande yaroya: Jesús omano, ichui ocuerayevi. Evocoyase yande avei yaroya Tūpa Guahir Jesucristo reseve ombogüerayevira opacatu acoi seroyasa pipe omano vahe yuvireco.

¹⁵ Sese co oromombehu pëu, ahe niha yande Yar porombohesa: yande yaicove vite vahe co ivi pipe, acoi oyevise yande Yar, ndahei chira yande rane omano vahecuer sui yayemboya yande Yar rese. ¹⁶ Esepia, yande Yar ité ogüeyi irira íva sui ou mborerecuar ivate vahe ñehesa pipe; ahese oyeendura Arcangel ñehe iyavei Tūpa remimbi moñehe pĩratasa. Ahese seroyasar omano vahecuer rane opũhara yuvireco. ¹⁷ Ipare voi yande yaicove vite vahe, serasopri yaicora opacatu íva quiha rese co yande Yar rovaichi āgua ivitu rupi. Ēgüe yahera yande Yar piri yaico vaheherã apirēhi. ¹⁸ Sese peyemonguerēhi catu co ñehesa pesendu vahe rese.

5 Iyavei no, acoi ari yande Yar yusa resendar ore ndoroicuachiai chira pëu. ² Esepia, pe peicua tupri co yande Yar ari oyepotara imohaēhisa pipe, inungar acoi imonda rai vahe oyepota pĩtu pipe. ³ Acoi ava aipo ehise yuvireco: "Opacatu aviye ité yaico, ndipo iri mbahe-mbahe tēi yandeu" ehise, ahese inungar acoi cuña imembirasí aviyeteramo tēi, Ēgüe ehi aveira, aviyeteramo tēi icañi oura iharive, ahese ndoicatui chira ichui

oñemi yuvireco. ⁴ Pe rumo, ore rívířeta, ndahei pĩtu-mimbisa pendar nungar peico. Evocoiyase oyepotase yande Yar ari, ndahei chira imonda rai vahe nungar pe resapiha tēi ou. ⁵ Esepia, pe opacatu peico vahe Tūpa poroesapesa pipe, ndahe iri yande pĩtumimbi pipendar yaico. ⁶ Evocoiyase ndayaicoi chira co ambuae yuviroque tēi vahe nungar pihañemoñetasa pipe; iyacatu rumo yande yayemopoase yande pihañemoñeta tuprisa pipe. ⁷ Acoi yuviroque vahe, yuviroque pĩtu pipe; iyavei acoi osavaipo vahe, osavaipo avei pĩtu pipe yuvireco. ⁸ Yande rumo yaico vahe Tūpa poroesapesa pipe. Evocoiyase yareco tuprira yande pihañemoñetasa yande reco tupri āgua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oāca ndiru guarepochi apopri yuvireco oāca repi āgua, yande avei tayareco yande remiario yande ñepisiro āgua. ⁹ Esepia niha, Tūpa yande poravo ndahei yaico vaheñā iñemoirosa pipe nara; ahe rumo yande poravo yasupiti vaheñā ñepisirosa yande Yar Jesucristo rembiapo sui. ¹⁰ Esepia, ahe omano yande recocer rese oyese yande rereco āgua opacatu yande recove vitesese, yamanose avei. ¹¹ Sese peyemonguerēhi catu, iyavei peyemoviracua catu vite peyeupe inungar co peyapo peico.

Pablo omboaracua Jesús reroyasar oico

¹² Iyavei no, ore rívířeta, pemboyeroa acoi oporaviqui vahe yuvireco pe pāhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco. ¹³ Pemboyeroa iyavei pesaisu tuprira iporaviquisa rese. Peico tupri avei peyepāhuve.

¹⁴ Iyavei ore rívířeta, pe cuaisa: pemboaracua acoi ndoporaviqui potai vahe imbohe catu āgua. Iyavei pe-

monguerēhi acoi niquerēhi iri vahe. Peipĩtivii avei acoi ndoyemoviracuai vahe Tūpa rese güeco āgua. Iyavei peñemosañe opacatu ava uve yepi.

¹⁵ Peicua catu pe rereco megua potasar sui. Ndapemboyevii chira mbahe-mbahe tēi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

¹⁶ Peyembovihanora ari yacatu peico. ¹⁷ Iyavei peyeroquira ari yacatu rupi no. ¹⁸ “Aviye ndeu” peyera Tūpa upe opacatu mbahe rese. Esepia, ahe niha Tūpa oipota yandeu Cristo rese yaico vahe.

¹⁹ Iyavei ndapemombituhui chira mbahe Espiritu Santo oyapo pota vahe pe rese. ²⁰ Ndapeyamotarēhi chira Tūpa ñehe imombehupri. ²¹ Pesāhapa rane opacatu mbahe. Ichui peipisira mbahe aviye vahe peyeupe. ²² Peyepipi opacatu mbahe naporai vahe sui.

²³ Tūpa acoi ombou vahe teco tuprisa yandeu tape pehapa tupri oyeupe nara. Iyavei tosāro tupri opacatu pe espĩritu, pe hā, pe rete avei pe reco maranehi āgua co yande Yar Jesucristo yevi irise. ²⁴ Ahe acoi pe poravo vahe oyeupe nara seco tupri vahe. Ahe omboaviyera opacatu co mbahe.

Pablo imahenduha Jesús reroyasar rese

²⁵ Ore rívířeta, peyeroqui ore rese.

²⁶ Pemboavirave opacatu yande rivri eipe pendar pe yeovaupitesa pipe.

²⁷ Che opocuai yande Yar rer pipe: peyeroqui co cuachiar opacatu yande rívířeta upe.

²⁸ Yande Yar Jesucristo tape rovasa tupriño pe rereco. Aipo rupi.

2 TESALONICENSES

Pablo mahenduhasa Jesús reroyasar Tesalónica pendar upe

1 Che, Pablo, Silvano, Timoteo reseve, aicuachía co ore ñehe pëu, ore rivireta, peñemonuha vahe Tüpa uve tecua Tesalónica ve, yande Ru Tüpa, yande Yar Jesucristo rese peico vahe. ² Tombou pëu oporovasasa pe reco tupri água yande Ru Tüpa, yande Yar Jesucristo avei.

Tüpa omombaraisura viroyasarëhi Jesucristo yevise curi

³ Ore rivireta, “Aviye ndeu” orohe itera Tüpa upe pe recocuer rese yepi. Esepia, Tüpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe. ⁴ Evocoyase, ore oroñehe pe rese ore vihasa pipe Tüpa reroyasar ñemonuhasa rupi. Esepia, acoi ava mbahe-mbahe tैसे pëu, peñemosañu chupe pe Cristo rese pe yeroyasa pipe. ⁵ Co niha omboyecua Tüpa reco ñvisa ava upe. Esepia, ipipe pe rereco omborerecuasave pe reique água. Sese niha, peparaisu vite tēi peico.

⁶ Tüpa omombaraisura acoi pe mombaraisusarer. Iya ité égüe ehi vaheřa chupe. ⁷ Pe rumo imombaraisupri peico vahe, Tüpa omondora pe pituhu água, ore pituhu água avei, acoi yande Yar Jesús oyevise tata rendigüer pãhuve iva sui opacatu güembigüai seco pĩrata catu vahe reseve. ⁸ Ahe oura opacatu Vu Tüpa reroyasarëhi mombaraisu água iyavei oyesuindar ñehesa poropĩsirosa resendar rendu tēisar mombaraisu avei. ⁹ Evocoi iparaisura yuvireco, imocañipri yuvirecoira apirëhi. Iyavei imboyepepisara amombri yande Yar reco pĩratasa porañetesa sui. ¹⁰ Acoi ouse ahe ari pipe, yande Yar imboeteiprira opacatu seroyasar pãhuve; ipãhuve pe peicora. Esepia, peroya ité oromombehu vahe pëu.

¹¹ Co rese oroyeroqui pe rese yepi: oroporandu yande Ru Tüpa upe tape rereco tupri güemienoi pe recosa pipe. Iyavei oroyeroqui chupe, tomboaviye güeco pĩratasa pipe opacatu ñepeipei mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe. ¹² Evocoyase yande Yar Jesucristo rer imboeteiprira pe recocuer pipe sui; iyavei pe imboeteiprira peico yande Yar rese peico vahe yande Ru Tüpa, yande Yar Jesucristo pe raisusave.

Yande Yar Jesús yevisa resendar mombehu tuprisa

2 Iyavei, ore rivireta, ore oromombehu potami pëu opacatu acoi yande Yar Jesucristo yevisa resendar yande monuha vaheřa oyese. ² Peicua catu, tapepihañemoñeta rerova eme iyavei peyembosiquiyei rene que ava “che añehe Espiritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pëu. ³ Peicua catu peyembopa ucai rene ñepeipei yepi ava upe. Esepia, yipindar ari Jesucristo yu água renonde, yugüerura mbahe-mbahe tēi aposar. Ahe Tüpa amotarëhisar yuvirecoi vahe. Ahese oyemboyecua ava yangaipa guasu vahe. Ahe ocañi tēi vaheřa. ⁴ Oyemboivate aira opacatu Tüpa rer rerecosar amotarëhisave iyavei ndoipotai chira ambuae mboetei. Oique aveira, oguapi Tüpa rēta pipe inungar-ra Tüpa ité viña. “Supi eté che Tüpa aico” ehi tupri tēira oĩ.

⁵ ¿Ndapemahenduhai vo acoi che ñhengagüer rese pe pãhuve aico vitesese cuese? ⁶ Co imombitasar peicua cūritei. Ihari oyepotase voi, oyemboyecua. ⁷ Co porocuaite amotarëhisar ndoyemboyecua vitei vahe rembiapo oime cūritei. Co güeraño ipane imombitasar renose água ipãhu sui, ⁸ ahese voi oyemboyecua acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer pĩratasa pipe oyevise curi. ⁹ Yucasa renonde rumo, acoi ava yangaipa guasu vahe oura Carugar pĩratasa pipe; güerura güeco pĩratasa tuvicha vahe; omboyecua angahura poromondiisa. ¹⁰ Oyapo angahura opacatu mbahe tēi oporombopa água oico ava ocañi tēi vaheřa upe. Esepia, evocoi ava ndosendu potai porombohesa supi eté vahe oñepisiro água yuvireco. ¹¹ Sese Tüpa oseyara co porombopasa reroya água yuvireco ¹² ‘Ipipe tocañi tēi co ava, opacatu mbahe supi eté vahe reroyaëhisar, acoi oyemboviha catu vahe mbahe-mbahe tēi rese yuvireco’ oya.

Iporavopri ipĩsiropirã

¹³ Ore rumo, “Aviye ndeu” orohera Tüpa upe pe recocuer rese yepi, ore rivireta, yande Yar rembiaisu peico vahe. Esepia, Tüpa niha pe poravo yipisuipe pe pĩsiro água pe reco marañehi água rese Espiritu pipe iyavei porombohesa supi eté vahe reroya água. ¹⁴ Sese niha, Tüpa oñehe yandeu yande piha pipe co ñehesa pĩsirosa resendar pipe, ore oromombehu vahe pëu ‘tovireco che Rahir Jesucristo reco porañetesa’ oya.

¹⁵ Sese ore rívířeta, peyemovíraca iyavei peresarai eme acoi oromombehu vahecuer iyavei oroicuachía vahe acoi pëu. ¹⁶ Yande Yar Jesucristo teieté, yande Ru Tūpa avei, yande raisusa yande rovasasa pipe ombou vahe vihasa apírēhi vahe yandeu iyavei yande reco tupri rāro āgua, ¹⁷ ahe tape monguerēhi, tape movíraca avei opacatu ñehesa aviye vahe rese, opacatu mbahe pe rembiapo aviye vahe rese avei.

Pablo oporandu Jesucristo reroyasar yeroquisa rese oyeupenara

3 Ore rívířeta, co mbahe ipa vahe amombehu pota pëu: peyeroqui ore rese. Evocoyase toyepota pihaiyi yande Yar ñehengagüer opacatu rupi; tipisisa tupri imboeteisa pipe inungar oyepota pe pāhuve. ² Peyerure avei ore repi āgua rese ava ndaseco pōrai vahe, ipihañemoñeta rai vahe sui. Esepia niha, ndaopacatui Tūpa rese ipihañemoñeta yuvireco. ³ Yande Yar rumo seco ñvi vahe. Ahe pe recocuer movíracuara iyavei pe rāra mbahe tēi sui. ⁴ Ore oroyeroya yande Yar rovai peyapo vahe rese iyavei peyapo viteño vahe rese acoi ore pe cuai agüer. ⁵ Yande Yar tape pñivii pe poroaisu āgua inungar Tūpa oporoaisu iyavei Cristo ñemosasa rereco āgua.

Yande cuaita yande poraviqui āgua

⁶ Ore rívířeta, opocuai yande Yar Jesucristo rer pipe: acoi ndoporaviqui potai vahe yande rivri pe pāhuve, peyepiño ichui, acoi ndoviroya potai vahe avei ore porombohesa oromombehu vahe pëu. ⁷ Pe peicua

mara peyera ore recocuer moña āgua peico. Ore oroicose pe pāhuve, ndoroico tēi, ⁸ ndorohu tēi avei ambuae tembihu imboepirēhi. Ore rumo que ñepe mañeco tēiēhi āgua rese oroporaviqui ore cuerai rane ité ari, pñtu reseve. ⁹ Iya ité niha mbahe rese ore porandu āgua pëu ore pñivii āgua rese viña; ore rumo oroporaviqui pe ore recocuer rupi pe guata āgua rese. ¹⁰ Acoi oroico vitesse pe pāhuve, oromondo pe cuaitarā: acoi ndoporaviqui potai vahe, ahe tocaru eme. ¹¹ Oroyandu amove aipo pe pāhu pendar yuvirecoiño tēi ndoporaviqui vahe. Evocoi omañeco tēi ambuae ava recocuer. ¹² Ore oromondo acoi ava upe mborocuita yande Yar Jesucristo rer pipe: toporaviqui güeco quiririsa pipe; ipipe sui yuvirecovera. ¹³ Ore rívířeta, pecuerai eme mbahe aviye vahe apo. ¹⁴ Oimese ndoviroyai vahe ore remimombehu co cuachiar pipe, peicua tupri evocoi nungar. Peyemboya eme sese. Evocoyase tochí ahe. ¹⁵ Pereco eme catu yamotarēhisa chupe; iyacatu rumo pemboaracua catuñora inungar yande rivri.

Ñehesa ipa vahe

¹⁶ Aviye, yande Yar ae tombou güeco tuprisa pe reco tupri āgua pëu ari yacatu rupi opacatu pe reco pipe. Tasecoi pe rese ari yacatu.

¹⁷ Che, Pablo, aicuachía co mahenduhasa che po pipe ité pëu. Che rembicuachía icuapri opacatu che cuachiar pipe. ¹⁸ Yande Yar Jesucristo tape rovasa opacatu yepi. Aipo rupive.

1 TIMOTEO

Pablo mahenduhasa Timoteo upe

1 Che, Pablo, aicuachía che ñehe ndeu, Timoteo. Nde niha che rahir Tūpa reroyasa pipe ereico. Che niha Jesucristo apóstol aico, yande P̄s̄irosar Tūpa porocuita rupi iyavei yande Yar Jesucristo porocuita rupi. Ahe niha yande remiaro. Tombou yande Ru Tūpa, yande Yar Jesucristo oporovasasa, oporoparisuerecosa ndeu nde reco tupri āgua.

Pablo, “Eicua catu porombohesa co coti tēi vahe sui” ehi Timoteo upe

³ Iyavei acoi aipo ahe ndeu cuese che so āgua Macedonia ve: nde epita co tecua Efeso ve. Evocoyase eremboaracuara co ava co coti tēi oporomboaracua vahe, toporomboaracua eme p̄ihañemoñetasa co coti coti tēi vahe rese yuvireco. ⁴ Toyapisaca eme avei tecocuer ipapapri tēi vahe rese, tecocuer aracahendar ěgüe ehi tēi vahe rese avei. Ahe ichui osē yeacasa naporai vahe yepi; ndayande p̄t̄ivii rumo Tūpa remimbotar reroya tupri āgua rese.

⁵ Sese co amondo porocuita ndeu yande yeaisu āgua yande p̄ihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe. ⁶ Esepia, amove ava oime ichui oyearacua mocañi oñehe-ñehe tēisa pipe yuvireco. ⁷ Oporombohe pota tēi Tūpa porocuita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

⁸ Yaicua niha co porocuita aviye ai eté yaiporuse Tūpa remimbotar rupi eté. ⁹ Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua āgua, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nombotei vahe Tūpa iyavei chupendar p̄ihañemoñetasa; acoi vu, osi oyuca vahe; opacatu ava oporapichi vahe upendar. ¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocua tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuita; imondosa avei opacatu porombohesa nimarai vahe amotarēhisar upe nara. ¹¹ Co porombohesa nimarai vahe oyoya tupri ñehesa porañete vahe porop̄s̄irosa resendar rese. Tūpa sovasapri secoi, ahe che cuai vahe sese.

Pablo oparisuerecosa rese, “Aviye ndeu” ehi Tūpa upe

¹² “Aviye ndeu” ahe yande Yar Jesucristo upe. Ahe niha ombou p̄iratasa co che ñehe āgua. Esepia, ahe oyeroya che rese. Sese che mondo oñehengagüer mombehu āgua. ¹³ Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguã yamotarēhimbave che yemboivate aisa pipe, Tūpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapo vahe. ¹⁴ Ęgüe ehi yande Yar ombou catu oporovasasa che rese iyavei ombou che oyese yeroya āgua iyavei che poroaisu āgua Jesucristo rese che recosa pipe.

¹⁵ Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pipe ava yangaipa vahe p̄s̄iro āgua. Che rumo acoi ivate catu vahe yipindar aico ipāhuve. ¹⁶ Sese Tūpa che paraisuereco che rese rane Jesucristo reco mbegüe tuprisa mboyecua āgua. Ęgüe ehi che recocuer upe ambuae ava seroya āgua. Ip̄ipe sui osupitira tecovesa apirēhi vahe yuvireco. ¹⁷ ¡Sese yamondo imboeteisa apirēhi yande Rerecuar ndopai vahe upe! ¡Ahe no-manoi vahe, ndayasepiai vahe, ahe ñepei vahe Tūpa!

¹⁸ Che rahir Timoteo, co amondo nde cuaitarā ndeu nde reco moviracua āgua mbahe tēi recopi āgua Cristo rese nde yeroyasa pipe nde p̄ihañemoñeta catuprisa pipe avei. Supi tupri cuese Tūpa reroyasar oñehe yuvireco nde rese serer pipe. Amove ava op̄ihañemoñeta tupri reroyaēhisave, omocañi uca Tūpa rese oyeroyasa ²⁰ inungar vahe Himeneo rese, Alejandro yuvirecoi. Ahe che amondo Carugar povrive evocoyase toicua tiñehe-ñehe tēi eme Tūpa upe yamotarēhisave yuvireco’ che yapave.

Ñehesa yeruresa resendar

2 Iyavei no, co che opomonguerēhi pe yerure āgua, peporandu, pemondo avei “aviye” pe hesa Tūpa upe opacatu ava recocuer rese. ² Iyavei peyerure opacatú mborerecuar rese. Evocoyase tayareco yande reco tupri Tūpa mboetei tuprisa pipe, yande poromboeteisa pipe avei. ³ Co aviye ité; ahe niha yande P̄s̄irosar Tūpa remimbotar. ⁴ Supi eté ahe oipota opacatu ava ñep̄is̄iro iyavei co porombohesa supi eté vahe cua tupri āgua. ⁵ Esepia, ñepeiño ité Tūpa, iyavei ñepeiño ité ava oicatu vahe yande reraso Tūpa upe: ahe Jesucristo. ⁶ Esepia, Jesucristo omano opacatu ava yangaipa vahe repirā ip̄is̄iro āgua. Ahe imombehusa

chupendar arí iporavopri rupi. ⁷ Sese che supi eté apóstol, icuai pri aico Tūpa Ñehengagüer mombehu āgua, ava ndahei vahe judío mbohe āgua, co yeroyasa rese iyavei supi eté vahe rese. Supi eté ndopombopai.

⁸ Evocoyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiēhisa pipe, oyeacaēhisa pipe avei. ⁹ Iyavei cuña toyemondo tupriño turucuarño tēi pipe yuvireco. Aní chira rumo oāca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomondo eme yuvireco. ¹⁰ Iyacatu rumo yuvirecoi tupriña güembiapo aviye vahe pipe, inungar cuña oyemondo tupri vahe Tūpa upe yuvireco yepi. ¹¹ Iyavei cuña tosendu porombohesa oquiririsa pipe imboyeroyasave. ¹² Ndaipotai cuña oporombohe ava rehíi pāhuve iyavei toyocuai eme cuimbahe. Iyacatu rumo iquiririñora yuvireco. ¹³ Esepia, Tūpa oyapo yipindar Adán; ipare Eva oyapo. ¹⁴ Adán ndahei imboaparí; cuña rumo oyembopa uca. Ichui oviapi angaipa pipe. ¹⁵ Oñepisíroro rumo ocuaita mboaviyasa pipe oyese yeroyasa rereco pipe, iporoaisusa pipe, güeco maranehisa pipe avei.

Tūpa reroyasar rārosar cuaita

3 Iyavei co supi eté: acoi amove oico pota vahe Tūpa reroyasar rāro āgua, ahe oipota mboraviqui aviye catu vahe. ² Sese acoi vireco vahe ocuaita Tūpa reroyasar rāro āgua, ahe secoi tupriña mbahe aviye vahe pipe yepi. Ipipe ava noñehi chira yamotarēhisave. Iyavei omendara ñepe cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oye-pota vahe güētave. Oicua aveira ava mbohe tupri āgua. ³ Iyavei ndahei chira caguar tēi. Ndosecai chiaveira ovava āgua. Iyacatu rumo seco mbegüera opacatu ava upe. Ndoipota rai chiaveira guarepochi. ⁴ Iyavei oicua tupriña güēta pipendar rāro āgua. Ombahe aveira guahir iporeroya āgua, iporomboetei āgua avei. ⁵ Esepia, acoi ndoicuai vahe güēta pipendar rāro, ¿mara ehira evocoyase Tūpa reroyasar rāro? ⁶ Tūpa reroyasar rārosar rumo ndahei chira oipisi ramo vahe Tūpa opiha pipe. Esepia, aviyeteramo oyemboivate ai tiētera. Ipipe sui imocañipri avei secoira Carugar nungar. ⁷ Iyavei oyecua uca tupri ranera Tūpa reroyasarēhi pāhuve. Ahese ndipoi chira imboeteiēhisa iyavei ndoviapi chira Carugar povrive.

Tūpa reroyasar rese ihañeco vahe cuaita

⁸ Iyavei Tūpa reroyasar rese ihañeco vahe yuvirecoira oporomboeteisa pipe. Tomboaviye oñehi. Ndahei chira caguar tēi; ndahei chiaveira guarepochi pota raisar tēi. ⁹ Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco. ¹⁰ Iyavei secoāhasa ranera. Acoi osē tuprise, ahese toyuvirecoi Tūpa reroyasar rese ihañeco vaherā. ¹¹ Iyavei sembireco yuvirecoi aveira oporomboeteisa

pipe, nimahechiroi chira, osāro tupriña güecocuer yuvireco, iyavei imboyeroyapri aveira opacatu mbahe rese yuvireco. ¹² Iyavei Tūpa reroyasar rese hañecosar ñepeño itera sembireco, oicua aveira guahir rāro tupri āgua, güēta pipendar rāro āgua avei. ¹³ Esepia, Tūpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyēhisave avei secoira Jesucristo reroyasa pipe.

Tūpa reco oyecua ramo vahe reroya tuprisa

¹⁴ Che aso pihai pota nde repia. Aicuachía rumo co che ñehi ndeu ¹⁵ acoi che aracahese, ereicuañora rumo pe reco tupri āgua ava Tūpa rese yuvirecoi vahe pāhuve; ahe acoi Tūpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua āgua. ¹⁶ Supi eté tuvichá etepri Tūpa reco oyecua ramo vahe reroya tuprisa:

Cristo oyemoporēhi yande reco nungar pipe yandeu. Ipare Espiritu pipe imboyecua seco cuer supi tupri vahe.

Iyavei Tūpa rembiguai rembiepiave secoi.

Ichui imombehusa opacatu ivi rupi; opacatu rupi avei seroyasa.

Iyavei ipisipri secoi ivave nara.

Oimera ava oyepipi vahe Tūpa rese oyeroyasa sui yuvireco coiye

4 Iyavei Espiritu aipo ehi tupri yandeu: coiye, arí cañi renonde, amove ava oyepipira Tūpa rese oyeroyasa sui yuvireco. Omboyeroyara espíritu oporombopa tēi vahe, porombohesa Carugar suindar avei. ² Oyapisacara ava aipo ehi tēi vahe rese, semirañete ai vahe ñehi rese avei yuvireco. Ēgüe ehira opihañemoñetasa mocañi tēi yuvireco. ³ Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tūpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tūpa upe yuvireco. ⁴ Esepia, opacatu mbahe Tūpa rembiapo, aviye ité. Ahe ndiyai chira yaroñi yaipisise, “Aviye ndeu” yande hesa pipe chupe. ⁵ Esepia, Tūpa oñehi pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ericora.

⁷ Ndereyapisacai chira rumo acoi mbahe aracahendar co ivi pendar yapisaca tēisa rese. Eyembohe catu yande Yar uveño ité nde reco āgua. ⁸ Esepia, yepe aviyeño chíhi yande retecuer yamoviracua viña, yande Yar upe yande reco āgua aviye catu opacatu yande reco uve nara. Esepia, ahe yande pñiviira yande recove āgua cūritei iyavei curi yande recove āgua. ⁹ Co supi

eté vahe, evocoyase yande yaroyara opacatu yepi.

¹⁰ Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava P̄sīrosar, iyavei viroyasar P̄sīrosar catu ité secoi.

¹¹ Co porombohesa eremombehura ava p̄ahuve, erembohe aveira sese. ¹² Tipo eme ava nde roeroiro vahe ch̄hivahe catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprisa pipe. Esaisu tupri nde yeroyasave nde recocuer maranehi pipe. ¹³ Che yepota renondeve, eyeroqui catu Tūpa Ñehengagüer rese opacatu ava rovaque. Emonguerēhi catu yande rivireta iyavei erembohe tuprira. ¹⁴ Nderepoi chira Tūpa ndeu mbahecuasa ombou vahe sui. Esepia, ava Jesús reroyasar r̄rosar upe Tūpa omombehuse nde cuaitarā, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco. ¹⁶ Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ēgüe erese, ip̄sīropri ereicora; nde ñehe rese oyapisaca vahe avei ip̄sīropri yuvirecoira.

Mara ehira Jesús reroyasar oyepāhuve yuvireco

5 Eremboaracua p̄rata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia ch̄hivahe upe ereñehe tuprira secocuerā rese inungar nde rivri upe. ² Cuña ot̄ñaro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererecora opacatu nde reco catuprisa pipe.

³ Acoi imer mano vahecuer ité ereip̄tiviira que mbahe ipane vahe rese. ⁴ Que oimese imembri, anise que semiariro, toyembohe rane ocuaita mboaviye āgua yuvireco chupe. Ēgüe tehi guaisu mboyevi chupe, ahe niha Tūpa remimbotar. ⁵ Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tūpa rese, iyavei oyeroquiño ité arī, p̄tū yacatu yepi. ⁶ Osecase rumo mbahe güemimbotar yuvireco, ahese omano vahe tēi secocuer yuvirecoi. ⁷ Eyocuai tupri ava co ñehesa rese; ichui ndahei chira ava ñehedora tēi yuvirecoi. ⁸ Acoi ava rumo nosaroi vahe omu; acoi güēta p̄pendar nosaroi vahe avei, ahe ndoguata iri Tūpa rese oyeroyasa rupi iyavei mbahe tēi catu Jesús reroyasarēhi sui.

⁹ Icuachiasara rumo ambuae cuña imer mano vahecuer p̄ahuve ivate catu sesenta sui iharaviter vahe, iyavei ñepeiño ité omer vireco vahecuer. ¹⁰ Icuaprira secocuer icatuprisa rese, omboacua tuprise ch̄hivahe oyesuindar, omoinguese ava güēta pipe, ihañecose ava Tūpa reroyasar rese ipi sei āgua, oip̄tiviise ava iparaisu vahe, oyapo tuprise opacatu mbahe aviye vahe.

¹¹ Ereicuachía eme iharaviter ndosupitii vahe sesenta cuachiar pipe. Esepia, amove güemimbotar pipe tēi oyepepi Cristo sui, omenda yupagüe pota iri vahe.

¹² Ipipe oimera Tūpa poronupasa chupe. Esepia, yipin-

dar oyemondo Tūpa upeño ité oyecuachiasa. Ipare rumo nomboaviyei eté oñehe. ¹³ Iyavei oi yacatu rupi tēi oguatase oico, ahese virecora oatēhisa, iyavei imahchiroi tēira, oñangareco tēira opacatu rese, omombehu-mbehu tēi aveira mbahe naporai vahe.

¹⁴ Sese co aipota acoi imer mano vahecuer cuñatai vite vahe: tomenda iri, timembī iri avei yuvireco, iyavei tosāro tupri güēta p̄pendar. Sese yamotarēhimbar secocuer ndahei chira oñehedora tēi vireco yuvireco.

¹⁵ Esepia, oime ité amove oyepepi vahe güemimbotar pipe Caruguar rupi güeco āgua.

¹⁶ Acoi oimese que cuña Tūpa reroyasar vireco vahe que cuña imer mano vahecuer oyepiri, ahe toip̄tiviī yuvireco. Ahe sese evocoyase tūparo pendar nihañeco chira. Ahese oicatura supi eté imu ndipoi vahe rese hañeco āgua yuvireco.

¹⁷ Iyavei acoi Tūpa reroyasar r̄rosar osāro tupri vahe, ahe toipisi catu ava porop̄tiviisa imboyeroyasave. Acoi oyemondo vahe Tūpa Ñehengagüer mombehu āgua, ava mbohe āgua avei, ahe co porop̄tiviisa oipisi catura. ¹⁸ Esepia, aracahendar icuachiapri pipe aipo ehi: “Ereyuru āpichi rene tivi oporaviqui vahe trigo cambesar” ehi. Iyavei aipo ehi: “Mbia oporaviqui vahe iyacatu oipisira oporaviqui reprī” ehi.

¹⁹ Iyavei nde, ndereroyai chira mbahe omombehu vahe Tūpa reroyasar osāro vahe yamotarēhisave yuvireco. Oimese que ñuvirío sepiasar, que mbosapi, ahese ramo ereroyara.

²⁰ Acoi oimese rumo angaipa aposar ip̄ahuve, ahese eremboaracuara opacatu ava rovaque. Evocoyase ambuae osiquiyera angaipa apoēhi āgua yuvireco.

²¹ Iyavei che orocuai Tūpa rovaque, Jesucristo rovaque iyavei opacatu Tūpa rembiguai iva pendar rovaque avei: ereyapo tuprira co mborocuaita, nderemomahuatī chira ava imboaracua nde remimbotar rupi tēi. ²² Ndahei chira p̄haivi eresenoī mbia mborocuaita rese ihañeco vaheñā. Aviyeteramo nde rese p̄ave mbahe oimera. Eñearo tupri nde reco maranehisa pipe.

²³ Nde rie mbaherasisa upe nderehui chira i güeraño tēi, ch̄himi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu āgua renonde. Oime rumo acoi oñomi vahe oangaipa yuvireco. Ipare tēi icuasa. ²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6 Iyavei co ava mbiguai Jesús reroyasar, ahe oyeroya tuprira güerecuar yuvireco ava oñehe-ñehe tēiēhi āgua Tūpa rer rese, yande porombohesa rese avei no. ² Acoi co mbiguai virecose güerecuar Tūpa viroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroyasar saisupri yuvirecoi yepi.

Tūpa rese yande pīhañemoñetasa sepīrusu vahe nungar

Eporombohe, emombehu co mbahe: ³ oimese oporombohe vahe oyesuindar pīhañemoñetasa co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tuprisa rese, ⁴ ēgūe ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoãha āgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroaēhisa ⁵ iyavei iporoacasa ndopai vahe ava yaracua rai vahe pāhuve. Ndoicuai rumo mbahe supi tupri vahe yuvireco. Ipihañemoñeta Tūpa rese omahenduhasa pipe mbahe rereco ati āgua yuvireco viña. ⁶ Yayembovihañose mbahe yande rembiereco rese, ahese Tūpa rese yande pīhañemoñetasa inungar mbahe sepīrusu vahe yandeu. ⁷ Esepia, ndayarui eté niha mbahe yahase co ivi pipe iyavei ndayarasoi chiaveira mbahe yamanose yande yeupi. ⁸ Iyacatu rumo yarecose yande remihura, yande yemonde āgua avei, sese yayembovihañora yaico. ⁹ Amove rumo ava, “Mbahe rerecosar ité taico” ehi tiēte viña, ndoyemoviracuai rumo tecoãhasa upe. Ipare oviapi mbahe tēi pipe, setá mbahe pota raisave, ipipe oyeecomomara. Ipare oye-mocañi tēi. ¹⁰ Esepia, guarepochi pota raisa sui osē opacatu mbahe naporai vahe. Amove ava ipota raisa pipe oyepepi Tūpa reroyasa sui iyavei omombaraisu güecocuer ipipe ahe ae yuvireco.

Tūpa rese yande reco vīracuasa

¹¹ Nde rumo, Tūpa rese ereico vahe, eyepepi opacatu co nungar mbahe naporai vahe sui. Eico nde reco ñvisa pipe, ndemahenduhāño ité Tūpa rese. Eroya, esaisu, eñemosa avei eico nde reco mbegüesave. ¹² Eye-moviracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa

oñehe ndeu. Iyavei eremombehu ité niha Tūpa reroyasa nde reco āgua ava eta rovai. ¹³ Cūrítei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai ¹⁴ ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tuprisa sui acoi ouse yande Yar Jesucristo. ¹⁵ Acoi oyepotase ari imombehupri curi, ahese Tūpa omboevira Guahir. Ahe niha ñepei vaheño ité imboeteipri, seco pīrata catu vahe. Aheño ité niha mborerecuar ivate catu vahe rerecuar. ¹⁶ Aheño ité teco apirēhi vahe, tesapesa secoi; ndipoi oyemboya vahe sese, ndipoi eté que ava osepia vahe. ¡Ēgūe tehi, imboeteipri tasecoi opacatu opīratasa apirēhi vahe rese!

¹⁷ Acoi imbahe eta vahe co ivi pipe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe ēgūe ehi tēi vahe. Iyacatu rumo Tūpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporuguā. ¹⁸ Eyocuai avei evocoi ava: toyuvirecoi mbahe yar nungar mbahe aviye vahe aposa pipe. Iyavei toyemoingatuño acoi mbahe vireco vahe mboyaho āgua ambuae ava upe yuvireco. ¹⁹ Evo-coiyase virecora mbahe aviye vahe, apirēhi vahe oyeupe nara yuvireco curi tecovesa supi eté vahe rereco āgua.

Timoteo cuaitarā ipa vahe

²⁰ Timoteo, esāro tupri co porombohesa supi tupri vahe Tūpa ombou vahe ndeu. Ereyapisacai rene ava tēi pīhañemoñetasa ēgūe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe. ²¹ Ipipe sui niha amove ava oyavi Tūpa reroyasa yuvireco.

Aviye, yande Aposar tande rovasa. Aipo rupive.

2 TIMOTEO

Pablo mahenduhasa Timoteo upe

1 Che, Pablo, amondo co cuachiar ndeu, che rembi-
aisu, che rahir nungar, Timoteo. Che niha Jesu-
cristo apóstol aico Tūpa remimbotar rupi acoi “che
amondora teco piasu che reroyasar uve” ehi vahe rupi
tupri. Ahe cūrítei oime yandeu Jesucristo rese yande
recose. Yande Ru Tūpa iyavei yande Yar Jesucristo
tombou oporovasasa, oporoparaisuerecosa nde reco
tupri āgua ndeu.

Pablo oyocuai Timoteo Cristo recocuer mombehu āgua

3 Che yeroqui pāhuve, chemahenduha nde rese pītu,
ari yacatu rupi. “Aviye ndeu” ahe Tūpa upe nde re-
cocuer rese. Che aporaviqui tupri ité Tūpa rese che
pihañemoñeta tuprisa pipe yepi inungar che ramoi eta
oyapo yuvireco aracahe. **4** Ndacheresarai eté acoi nde
yaseho agüer sui. Iyavei oroepia pota tēi che yem-
boviharete āgua. **5** Supi eté chemahenduhaño ité nde
Tūpa reroyasa supi eté vahe erereco vahe rese. Iyavei
nde yari Loida, nde si Eunice, ahe niha yipindar ēgüe
ehi yuvireco. Evocoyase ayeroyaño ité nde rese, nde
avei ēgüe erese.

6 Sese che oromonguerēhi embouvicha catu co Tūpa
ombou vahe ndeu acoi amondose che po nde harive;
ahe ereco catu ndeyeupe. **7** Esepia, Tūpa nomboui
siquiyesa yandeu. Ahe rumo ombou yande reco
moviracuasa, poroaisusa, iyavei yande mbopihañe-
moñeta tupri āgua. **8** Evocoyase eresiquiye eme catu
yande Yar recocuer mombehu. Nderechī chiaveira che
roquendasa sui tēi. Esepia, yande Yar recocuer
mombehusa sui tēi niha che roquenda yuvireco. Iya-
catu rumo, nde avei ereñemosañora co mbahe-mbahe
tēi Tūpa pīratasa pipe. Ahe oura ndeu ñehesa pīsirosa
resendar mombehusa sui. **9** Tūpa niha yande pīsiro
iyavei yande renoi yande reco tupri āgua sese, ndahei
yande rembiapo pipe. Ahe rumo güemimbotar rupi
yande raisu Cristo Jesús rese yande recose. Ahe Tūpa
ité yande raisu yipisuive ivi apo viteēhiseve. **10** Cūrítei
rumo ahe omboyecua oporoaisusa yande Pīsirosar Je-
sucristo ouse, acoi ou vahe co ivi pipe manosa pīratasa
recopi āgua. Iyavei ñehesa pīsirosa pipe avei oicua uca
tecovesa ndopai vahe.

11 Tūpa niha che cuai co ñehesa mombehu āgua. Che
cuai avei apóstol che reco āgua iyavei che porombohe
āgua. **12** Sese niha che opacatu aiporara co mbahe-
mbahe tēi vichico. Nachi eté rumo yande Yar rese che

yeroyasa pipe. Esepia, aicua ahe vireco pīratasa acoi
ñehesa ombou vahe cheu imocañiēhi āgua acoi Jesús
yevi āgua rupi eté.

13 Erecoveño ité porombohesa aviye vahe che suin-
dar, iyavei eicoño ité Tūpa rese nde yeroyasa pipe
iyavei poroaisusa yareco vahe pipe Cristo rese yaicose.
14 Esāro avei co ñehesa aviye vahe Tūpa ombou vahe
ndeu Espiritu Santo reco pīratasa pipe yareco vahe
yandeyese.

15 Ereicua niha co ava opacatu Asia pipendar
oyepipiño che sui yuvireco. Ipāhuve yuvirecoi mbia
ñuvirío, ahe serer: Figelo, Hermógenes. **16** Yande Yar
tomondo paraisuerecosa Onesíforo mu upe. Esepia,
Onesíforo setá yupagüer che mboviha. Iyavei nochi
eté ava rovaque che roquendasa sui. **17** Ouse rumo Ro-
ma ve, ndopituhui eté che reca. **18** Yande Yar tomondo
oporoparaisuerecosa chupe ahe ari pipe curi. Iyavei
nde ereicua tupri ité ahe mbia yande pītivi vahe Efeso
ve.

Jesucristo sundao oyemoviracua vahe

2 Iyavei nde no, che rahir, eyemoviracua mbahe-
cuasa Jesucristo ombou vahe pipe ndeu. **2** Acoi
che porombohesa eresendu vahe ava rehii rovaque
amondo vahe ndeu, embohe tupri mbia oyeroya vahe,
oicatu vahe avei ambuae mbohe āgua.

3 Nde eyemoviracuaño teco asi upe Jesucristo uve
nara inungar sundao oyemoviracua vahe ité. **4** Ñepei
yepi sundao ndosirii eté ocuaita sui. Esepia, ahe oye-
moingatu voi eté ocuai āgua güerecuar upe. **5** Iyavei
iguayi rai vahe, ndoipisii chira porerecosa oguayi
tupriēhi pipe. **6** Iyavei yande inungar que ava oñoti va-
he mbahe, ahe rane omonuha güemiti yaviyese oye-
upe yepi. **7** Eyapisaca tupri co che ñehese rese. Yande Yar
niha osenducua uca tupri opacatu co mbahe ndeu.

8 Iyavei no ndemahenduha Jesucristo rese. Ahe niha
ocuerayevi vahe. Iyavei aracahendar mborerecuar
David suindar secoi. Co niha ñehesa ñepisirosa re-
sendar amombehu vahe vichico. **9** Co ñehesa mombe-
husa sui tēi che mombaraisu yuvireco. Che roquen-
dasave aviye oporapichi vahe che rereco yuvireco. Tū-
pa Ñehengagüer mombita rumo ndoicatu eté yuvire-
co. **10** Sese che añemosañora opacatu mbahe-mbahe tēi
upe opacatu Tūpa rembiporavo recocuer aviye āgua
rese ‘tovireco catu pīsirosa porañete, apirēhi vahe Je-
sucristo rese yuvireco’ che yapave.

11 Co niha supi tupri vahe:

Yamanose Cristo rese, ahese yaicove aveira sese.

¹² Yañemosase mbahe tēi upe, ahese yande yaicora mborerecuar imborerecuasave ipiri.

“Ndaicuai Jesucristo” yahese, ahese ahe avei, “Ndopocuai vahe” ehiñora yandeu.

¹³ Yepe co coti tēi yarovara yande recocuer seroya aēhisave, ahe rumo ndovirovai chietera güeco ñvisa. Esepia, ndoicatui, “Ndahei che ahe aico” ehi vaheñã.

Ava osē tupri vahe güecoñhasa Tūpa upe nara

¹⁴ Emomahenduha yuvireco co ñehesa rese, iyavei eyocuai Tūpa rovaque: topoi ñehepoepi-episa sui yuvireco, co ñehepoepi-episa ěgüe ehi tēi vahe. Esepia, omomara ambuae ava osenduse iñehe rai yuvireco. ¹⁵ Eyapo tupri mbahe opacatu nde catugüer rupi nde recocuer mboyecua āgua Tūpa rovai inungar oporaviqui tupri vahe, nochi vahe. ěgüe ere, eporombohe tupri ñehesa supi eté vahe rese. ¹⁶ Eyepepi ñehe tēisa, ěgüe ehi tēi vahe sui. Esepia, co nungar ñehesa tēi ombouvicha catu mbahe naporai vahe. ¹⁷ Iyavei iporombohesa rai oyembouvicha inungar caracha vai ndocuera catui vahe, oyembouvicha-vichaño yepi. ěgüe ehi Himeneo, Fileto ¹⁸ oyavi porombohesa supi eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipipe Jesús reroyasar oipihañemoñeta rerova yuvireco. ¹⁹ Tūpa rumo omondo mbahe moviracua tupri āgua, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rer vireco vahe, toyepipi mbahe naporai vahe sui yuvireco yepi” ehi.

²⁰ Oi guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Ñepe iporupirã ari imboeteisa pipe nara, ambuae rumo ari rupi iporupirã. ²¹ Acoi ava oñemoatiro vahe co tecocuera sui Tūpa upe nara, ahe ipehasa inungar vaso oro apopri poromboeteisa pipe iporupirã; ahe ava oyemoingatu voi eté oico mbahe icatupri vahe apo āgua Tūpa upe.

²² Eyepepi mbia chñhivahe pihañemoñeta rai tēisa sui. Emohivi tupriño ité nde recocuer sereco. Eyeroyañño ité Tūpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo oipihañemoñeta tupri pipe yuvireco. ²³ Eremboyeroyai rene ñehesa porandu-randu tēisa, ěgüe ehi tēi vahe. Ereicua niha ichui tēi oime yeamotarēhisa yepi.

²⁴ Iyavei yande Yar rese oporaviqui vahe, ndiyai oyecopi oñehe pipe yuvireco. Iyacatu rumo, aviyera secocuer opacatu upe, oporombohe tupri, oñemosañño ombahe mboasiēhisa pipe oico. ²⁵ Iyavei omboaracuara güeco asiēhisa pipe acoi ava ndiporeroyai vahe. Esepia, aviyeteramo Tūpa osecuñarora ipihañemoñeta raisa oyeupe yevi iri āgua: ipipe sui porombohesa supi eté vahe oicua yuvireco. ²⁶ Ipipe sui avei toyemopoase, toyuvinose Carugar povri sui semimbotar apo iriēhi āgua.

Mara ehira ava ari ipa vahe pipe curi

³ Iyavei tereicua ari ipa vahe yepotasa, ahese oimera tecocuer yavai catu vahe. ² Ahese ava ahe ae tēi oyeaisura yuvireco, guarepochi tēi oipota raira, oyemboivate aira, oyemboetei ai tēi aveira. Oñehe raira Tūpa rese yamotarēhisave. Nomboyeroyai chira oyesupa yuvireco. Setá aveira, “Aviye ndeu” ndehi vahe ava upe. Iyavei nomboetei chira Tūpa rese pihañemoñetasa yuvireco. ³ Ndosaisui chira oyesuindar yuvireco. Niñeroi chiaveira oyeupe yuvireco. Iyavei imahchiroi aira. Noñemosai chira mbahe tēi apo āgua yuvireco. Güeco ası pipe avei yuvirecoira. Iyavei opacatu mbahe aviye vahe oyamotarēhira yuvireco. ⁴ Iyavei omondora ava yamotarēhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tēi oyemboivha āgua yuvireco. Ipipe rumo Tūpa ndosaisui chira yuvireco. ⁵ Ahe inungar-ra Tūpa rese ité yuvirecoi vahe viña. Tūpa pñratasa rumo nomboyecuai chietera güembiapo pipe yuvireco oyese.

Sese nde, eyepepiño evocoi nungar ava sui. ⁶ Esepia, evocoi nungar ava pñhuve oime yuviroiqueño tēi vahe oi rupi cuña ndoicatui vahe angaipa rerecosar mbopa āgua. Esepia, ahe cuña oipihañemoñeta raisa pipe yuvirecoi vahe. ⁷ Yepe oyapisaca tupri tēira ñehesa rese yuvireco viña, ndosupitii eté rumo co porombohesa supi eté vahe renducua āgua yuvireco. ⁸ Inungar co ava ipaye vahe Janes, Jambres serer vahe oyemboyere Moisés amotarēhi yuvireco, ěgüe ehi avei evocoi ava porombohesa supi eté vahe amotarēhisar yuvireco. Ahe oyemomara vahe oipihañemoñeta rai pipe yuvireco. Ndoviroyai eté Jesús porombohesa yuvireco. ⁹ Ndoporombopa iri chira rumo yuvireco. Esepia, opacatu ava oicua yuvireco imbahecuaēhi rese, inungar co ñuvirio mbia Moisés amotarēhimbar yuvirecoi arache.

Timoteo cuaitarã ipa vahe

¹⁰ Nde rumo che reco rupi tupri ité ereico. Esepia, ereroya tupriño ité che porombohesa, che pihañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa ¹¹ opacatu mbahe tēi porarasa rese. Nde niha ereicua opacatu mbahe tēi oime vahe cheu co tecua guasu, Antioquia ve, Iconio ve, Listra ve avei no, iyavei che paraisusa mara-mara tēi che rerecose yuvireco. Yande Yar rumo che pñsiro opacatu evocoi mbahe-mbahe tēi sui. ¹² Supi eté opacatu acoi Jesucristo rese güecocuer vireco pota vahe oiporarara mbahe-mbahe tēi yuvireco. ¹³ Ava secocuer naporai vahe rumo, iporombopa serai vahe avei ombouvicha catura güecocuera; oporombopa-mbopa tēira yuvireco. Iporombopasa pipe rumo ambuae omboyevira chupe.

¹⁴ Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepia niha, nde mbohesar ereicua. ¹⁵ Iyavei eyemomahenduha co rese:

nde chĩhivahe suive ité niha ereicua Tũpa ñehe icuachiapri eico. Ahe niha nde mombahecia vahe nde pĩsĩro ãgua Jesucristo reroyasa pipe. ¹⁶ Opacatu co ñehesa icuachiapri ou vahe Tũpa sui, aviye ai eté porombohe ãgua, iyavei poromboyapisaca ãgua, poromboaracua tupri ãgua iyavei ava upe ñehe tupri ãgua secocuer mohĩvi ãgua yepi. ¹⁷ Ichui, ava Tũpa rese yuvirecoi vahe oyemoingatu voira opacatu tecocuer tupri apo ãgua yuvireco.

4 Iyavei no, co rese che orocuai pota Tũpa rovaque, Jesucristo rovaque avei acoi ou vaheřã omborerecuasa reseve oicove vahe, omano vahe recocuer rese porandu ãgua. ² Emombehu Tũpa Ñehengagũer ari rupi. Erova ité ava reco. Eporomboaracua, eporomonguerẽhi tupri avei opacatu nde reco asiẽhisa pipe. ³ Esepia, coiye ava ndosendu pota iri chira porombohesa aviye vahe yuvireco. Ahese gũemimbotar tẽi oseca omohe ãgua, gũemimbotar tẽi avei omombehu ucara oyeupe yuvireco. ⁴ Iyavei oyepepĩra co mbahe supi eté vahe sui. Vĩroyara rumo opacatu ava remimombehu tẽi yuvireco. ⁵ Nde rumo, ererecoveĩora nde aracua tupri. Eñemosañõ mbahe naporai vahe upe. Ndehañeco catu ñehesa pĩsĩrosa resendar mombehu ãgua. Emboaviye tupri avei opacatu nde poraviĩusa.

⁶ Vĩrovĩ ari che retecuer mondo ãgua manosave inungar mbahe seropovẽhepri yande Yar upe. ⁷ Ayapopa che recoeté pipe che poraviĩusa aviye vahe che amotarẽhimbar pãhuve. Amboaviye che cuaita. Ndayepepĩ eté che yeroyasa sui. ⁸ Cũritei che rãro ivave co porerecosa che poraviĩqui aviye vahe resendar. Yande Yar mborerecuar seco ĩvi vahe niha omboura cheu ahe ari pipe. Ndahei chira cheu gũerañõ. Ombou aveira opacatu Cristo raisusa pipe iyevisa osãro vahe upe yuvireco.

Pablo, "Eyu rane che repia" ehi Timoteo upe

⁹ Ndepoyava catu eyu che repia. ¹⁰ Esepia, Demas che reya co mbahe ivi pipendar tẽi potasave, ichui tẽi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve. ¹¹ Lucas gũerañõ oicove che piri. Eseca Marcos, tou nde rupi che pĩtivii ãgua mboraviĩqui rese. ¹² Tĩquico amondo tecua Efeso ve. ¹³ Acoi ereyuse, eru avĩrave che yemboyohasa aseya vahe Troas ve Carpo rẽtave. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴ Alejandro, guarepochi mombesar, oyapo mbahe tẽi cheu. Yande Yar rumo oicua sembiapogũer rese chupe. ¹⁵ Iyavei nde eicua catu ichui. Esepia, ahe yande amotarẽhi mbahe yande remimombehu rese oico.

¹⁶ Yĩpĩndar añehese che yoepĩ ãgua mborerecuareta rovai, ndipoi eté que che pĩtivĩsar; opacatuñõ ité che reya yuvireco. Tũpa tiñero sese yuvireco chupe.

¹⁷ Yande Yar Jesucristo rumo che pĩtivii. Che momirata co ñehesa pĩsĩrosa resendar mombehu tupri ãgua opacatu ava ndahei vahe judío upe. Eẽgũe ehi avei che renose mbahe tẽi sui. ¹⁸ Ahe che pehara opacatu mbahe-mbahe tẽi sui iyavei che pĩsĩrora oyepĩri ivave che so ãgua. ¡Eẽgũe tehi timboeteisa catu yande Yar apĩrẽhi vahe yepi!

Mahenduhasa opacatu upe

¹⁹ Emombehu che mahenduha Prisca upe, Aquila upe iyavei opacatu Onesĩforo rẽta pendar upe avei.

²⁰ Erasto opĩta Corinto ve, Trófimo rumo imbaheasi, evocoyase aseya Mileto ve. ²¹ Ndepoyava catu eyu irohĩ yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar vĩroya vahe yuvireco.

²² Yande Yar Jesucristo toico nde rese. Iyavei Tũpa tape rovasa opacatu pe rereco. Aviye. Aipo rupive.

TITO

Pablo mahenduhasa Tito upe

1 Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mondo āgua sembiporavo eta upe iyavei Tūpa rese pihañemoñetasa supi tupri vahe cua uca tupri āgua. ² Esepia, tecovesa apirēhi vahe rārosa pipe sui viroyara, oicua aveira yuvireco. Tūpa ndoporombopai vahe niha omombehu co tecovesa mondo āgua ivi apo viteēhi-seve oico. ³ Ichui cūritei ari oyepota yandeu iñehengagüer cua āgua. Sese Tūpa, yande Pīsīrosar, che cuai oñehengagüer mombehu. ⁴ Tito, co che ñehe aicuachía ndeu; nde niha che rahir ité ereico Jesucristo rese yande recosa pipe. Esepia, oyoya yaroya vahe yaico. Yande Ru Tūpa, yande Pīsīrosar Jesucristo tombou oporovasasa nde reco tupri āgua ndeu.

Tito poraviquisa caha pāhu Creta ve

⁵ Che oroeya vitu co caha pāhu Creta ve mbahe opita vite vahe moingatu tupri āgua. Iyavei, “Eiporavo ava, Jesucristo viroya vahe rāro āgua ñepeipei tecua rupindar” ahe acoi ndeu cuese. ⁶ Evocoi Jesucristo viroya vahe rārosar toyuvirecoi güeco tupri āgua. Tipo eme “co oyapo mbahe” ehi-ehi tēi vahe yuvireco oyeupe. Ñepeño güembireco virecora yuvireco; tahir evocoyase Jesucristo reroyasar pāvera. Iyavei ndoyuvirecoi chira ndoyemboaracuai vahe nungar oporeroyañehisa pipe ambuae ava ñeheēhi āgua sese yuvireco. ⁷ Acoi Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco ñvi tupri yuvireco. Iyavei toico eme oporeroyañehisa pipe, toñemoiro eme avei, ndahei chiaveira caguar tēi; ndivava serai chiaveira, tiguarepochi pota rai eme yuvireco. ⁸ Iyacatu rumo omoinguera ava oyepota vahe güētave oyepiri. Iyavei aviye aira yepi. Osāro tupri ra güecocuer. Iyavei taseco ñvi güeco catupri pipe Tūpa upe. Tosāro tupri avei opihañemoñetasa yuvireco. ⁹ Iya oyemboya catu oyembohesa supi tupri vahe rese yuvireco. Ipipe sui tomonguerēhi catu ambuae yuvireco co ñehesa maranehi pipe iyavei ambuae seroñrosar pihañemoñeta mohivi āgua.

¹⁰ Esepia, oime setá nimbahe reroyai vahe; judío “peyembocircuncida pe ñepisiro āgua” ehi vahe pāhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco.

¹¹ Ēgüe ehi vahe iyacatu pemonguiriri. Esepia, ahe niha setá ava oñemu vahe omboyepipi uca porombohesa supi tupri vahe sui yuvireco. Oporombohe mbahe co

coti tēi vahe rese guarepochi rereco āgua tēi yuvireco.

¹² Ñepeipei mbia, otūpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mimba nungar tēi, icaru ai, yangaipa vai yuvireco yepi” ehi oñehe. ¹³ Supi eté aipo ehi; sese emboaracua pīrata ité. Evocoyase toviroya tupri Tūpa yuvireco. ¹⁴ Iyavei toviroya eme co judío oyesui tēi mbahe omombehu vahe iyavei ava porocuita tēi yuvireco. Esepia, ahe oyemboyere mbahe supi vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndiporeroyai vahe, ipihañemoñeta rai tēi vahe upe rumo, ndipoi eté mbahe nimarai vahe. Esepia, ipihañemoñeta, yaracuasa avei naporai eté. ¹⁶ Iyavei, “Che aicua Tūpa” ehi tupri tēi angahu yuvireco. Mbahe sembiapo rese rumo icuasa seroyañehisa yuvireco. Ahe niha ava ndosepia potai vahe, ndiporeroyai vahe yuvireco, ndoicatui mbahe aviye vahe apo yuvireco yepi.

Porombohesa nimarai vahe

2 Nde ñehe toyoya tupri co porombohesa nimarai vahe rese yepi. ² Evocoyase mbia otāro catu vahe Tūpa reroyasar toñearo tupri, imboyeroyapri toyuvirecoi, tosāro tupri güecocuer, toviroya tupri avei Tūpa reroyasa, oporoaisusa. Iyavei güeco mbegüesa pipe toñemosa mbahe-mbahe tēi upe. ³ Ēgüe tehi avei cuña otāro vahe Tūpa reroyasar yuvireco: güeco tupri toviroya oporomboeteisa pipe yuvireco. Iyavei timahechiroi eme, ndosavaipo chiaveira. Ahe rumo omboyecua güecocuer aviye vahe, ⁴ ombohera cuñatai imer raisu āgua, imembri raisu āgua avei. ⁵ Tombohe avei seco tupri āgua, iñearo tupri āgua angaipa sui iyavei sēta pipendar rese hañeco tupri āgua yuvireco. Tomboaracua avei seco aviye āgua, imer mboyeroya āgua avei. Evocoyase noñehe-ñehe tēi chira ava Tūpa Ñehengagüer rese yuvireco.

⁶ Ēgüe ere avei emonguerēhi mbia chíhivahe secocuer rese iñearo tupri āgua. ⁷ Iyavei emboyecua nde recocuer aviye vahe opacatu mbahe rese yuvireco chupe; nde imbohe tupri pipe emboyecua nde reco maranehisa, nde poromboeteisa avei. ⁸ Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoyase yande amotarēhimbar yuvinochira ndoicatuise, “Mbahe” ohe āgua yuvireco yandeu.

⁹ Emboaracua avei mbiguai yuvirecoi vahe: toviroya opacatu mbahe rese güerecuar, tomboyeroya imboeteisave, toiñehepoepi eme avei yuvireco. ¹⁰ Iyavei

toñomi eme mbahe. Iyacatu rumo seroyapri tupri yuvirecoira. Evocoyase opacatu osepiase seco tuprisa, omboeteira yande P̄sirosar Tūpa recocuer resendar yembohesa yuvireco.

¹¹ Tūpa niha omboyecua oporoaisusa yandeu. Ahe güeru p̄sirosa opacatu ava upe. ¹² Co poroaisusa Tūpa suindar yande mbohe mbahe-mbahe tēi iyavei yande remimbotar tēi reya āgua. Iyavei yande mbohe co ivi pipe yande ñearo tupri āgua, yande reco ñvi āgua iyavei Tūpa mboetei āgua. ¹³ Iyavei yasāro yande viharetesa pipe Tūpa omboaviye vaheřā güemimombehu, ahe Jesucristo yande Tūpa seco ivaté vahe, yande P̄sirosar yevi irisa oporañetesa pipe. ¹⁴ Ahe oyemondo oyeyuca uca yande rese yande p̄siro āgua opacatu mbahe-mbahe tēi sui yande reco moatiro tupri āgua. Evocoyase yande yaico chupe nara güeraño ité yande querēhisave opacatu mbahe aviye vahe apo āgua.

¹⁵ Evocoi rese erembohera, eremonguerēhira, eremboaracua aveira opacatu nde porocuaita pipe. Sese tito eme que nde rerořrosar.

Jesús reroyasar cuaita

3 Co rese emomahenduha: toyapo ava mborerecuar guasu porocuaita yuvireco iyavei opacatu ambuae mborerecua-recuarmi porocuaita avei. Iyavei toyemoingatu tupri opacatu mbahe aviye vahe apo āgua yuvireco. ² Toñehe-ñehe tēi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

³ Esepia, yipindar yande avei ndayande mbahecua yaico iyavei ndayaroyai Tūpa. Ocañi tēi vahe yaico, iyavei yande mbiguai tēi yaico opacatu mbahe yande remimbotar apo pipe; iyavei yaseca-seca mbahe tēi vahe yande yemboviha āgua. Iyavei yaicoño mbahe tēi pipe, yaipotaño tēi ambuae ava mbahe, yamotarēhimbri yaico iyavei yandeyupe ae-ae yayeamotarēhi.

⁴ Ipare rumo Tūpa, yande P̄sirosar, omboyecua güeco tuprisa, oporoaisusa opacatu ava upe. ⁵ Yande p̄siro, ndahei rumo yande rembiapo aviyesa sui, ahe rumo vireco oporoparisuerecosa yandeu nara. Ichui

omoatiro yande recocuer yande reco mopiasu. Iyavei Espiritu Santo pipe yande recocuer recuñaro tecove piasu rereco āgua. ⁶ Iyavei yande P̄sirosar Jesucristo rembiapo sui Tūpa ombou catu oEspiritu Santo yandeu, ⁷ ipipe yande reco ai sui yande renose yande reco ñvi tupri āgua oporoaisusa pipe 'toipisi co tecovesa apirēhi güemiario yuvireco' oya.

⁸ Aipo ñehesa supi eté vahe. Che aipota sese erembohera. Ipipe Tūpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vaheřā yuvireco. ⁹ Ereyepira rumo opacatu co nungar mbahe sui: yipindar ñehesa yepoepi tēisa sui, ipare aracahendar ava recocuer rese ñehesa sui. Ereyepi aveira iporomoñemoiro serai vahe sui, Moisés porocuaita resendar sui tēi ñehepoepi-episa sui avei. Esepia, evocoi nungar mbahe ēgüe ehi tēi vahe.

¹⁰ Acoi ava omoimese yemboyahosa Tūpa reroyasar pāhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui.

¹¹ Tereicia evocoi nungar ava oyavi vahe güecocuer yepi, ahe ae oyemocañi vahe oangaipa pipe oico.

Tito upendar ñehesa

¹² Acoi amondose Artemas, anise Tíquico ndeu, eyu p̄haivi che repia tecua Nicópolis ve. Esepia, aheve apita pota sōhisa vahe pituhu rāro. ¹³ Eip̄tivii opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoyase toyuviraso tupri oguatasa rupi; tipane eme que mbahe chupe yuvireco. ¹⁴ Iyavei ambuae Jesús reroyasar eipe pendar toyembohe avei yuvireco mbahe tupri apo āgua iyavei ava mbahe chupe ipane vahe p̄tivii āgua. Evocoyase secocuer aviye itera yuvirecoi.

Mahenduhasa iyavei porovasasa ipa vahe

¹⁵ Opacatu yuvirecoi vahe cohava che piri omondo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tūpa tape rovasa eipeve opacatu. Aipo rupive.

FILEMÓN

Pablo mahenduhasa Filemón upe

1 Che, Pablo, che roquendasa Jesucristo recocuer sui tēi. Aicuachía co che ñehe yande rívrí Timoteo reseve ndeu, Filemón. Nde niha ore rembiaisu iyavei ore ndugüer ité Tūpa upe mboraviqui apo água ereico. ² Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboraviqui apo água Tūpa upe nara yuvirecoi, iyavei opacatu Jesús reroyasar nde rēlave oñemonuha vahe upe nara. ³ Yande Ru Tūpa, yande Yar Jesucristo tombou oporovasasa, güeco tuprisa avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tūpa upe che yeruresa pipe nde rese yepi. ⁵ Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. ⁶ Aporandu Tūpa upe nde rese nde ereyeroyase yande Yar rese inungar ore ‘to-icua tupri opacatu mbahe aviye vahe orovireco vahe nde Rahir Jesucristo reroyasa sui’ viya. ⁷ Cherorivete, ayemonguerēhi catu opacatu nde poroaisusa rese. Che rívrí, nde niha eremonguerēhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai água viña. ⁹ Che rumo aporandu ndeu nde poroaisusa rese mbahe aviye vahe apo água co nde rembiguaigüer Onésimo upe nara. Che niha Pablo, acuacuami vichico. Cūrítei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohava che roquendasave.

¹¹ Aracaco co nde rembiguai secoise nde piri, ēgüe ehi tēi vahe secocuer ndeu viña. Cūrítei rumo ēgüe ndehi iri chira oico ndeu, iyavei cheu no. ¹² Amboyevi co imondo ndeu eipeve. Eipisi inungar-ra che itera viña. ¹³ Che aipota opita vaherā nde nungar tupri che

přivii água viña, co soquendapri vite che recose Jesucristo ñehengagüer sui. ¹⁴ Che rumo ndaipotai mbahe apo nde pihañemoñetasa cuaēhi viteseve. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe. ¹⁵ Aviyeteramo Onésimo oyepepi pucu raimi nde sui oyevi iri vaherā nde piri nara. ¹⁶ Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rívrí niha yande rembiaisu secoi cūrítei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tupri sa-susa pipe yande rívrí nungar tupri ité yande Yar upe nara.

¹⁷ Inungar nde rívrí che rereco eve. Ēgüe ere tupri aveira co mbia pisi. ¹⁸ Acoi oyapose mbahe ndeu, anise vırocuase que mbahe nde sui, cheu emombehu. Che evocoyase amboepira ndeu. ¹⁹ Che Pablo, aicuachía che po pipe ité seroya tupri água, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ēgüe ere cheu. Che rumo, “Ndereve cheu” ndahei eté ndeu. ²⁰ Supi eté, che rívrí, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mboviha catumi eve.

²¹ Che aicuachía ndeu. Esepia, aicua nde ereyapo tupri aipo che porandusa, iyavei ereyapo catu itera co sui. ²² Iyavei amoha Tūpa che renose vaherā che roquendasa sui pe yeruresa pipe che so água eipeve pe repia. Sese emoingatumi avei che pıtuha água.

Mahenduhasa, porovasasa ipa vahe

²³ Che ndugüer, Epafras, omondo omahenduhasa ndeu. Ahe avei soquendapri cohava yande Yar Jesucristo recocuer rese. ²⁴ Iyavei Marcos, Aristarco, Demas, Lucas che ndugüer oporaviqui vahe Tūpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

HEBREOS

Guahir Jesucristo pipe Tūpa oyemboyecua yandeu

1 Aracahe suive setá yupagüer Tūpa omombehu uca yande ramoí eta upe oñehe mombehusar upe. Iyavei ambuae mbahe rupi oseca imombehu tuprí ãgua yuvireco chupe. ² Cūritei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité. ³ Ahe niha Vu Tūpa recocuer porañetesa secoi. Ēgüe ehi eté, ahe Vu recocuer tuprí ité. Ahe opacatu mbahe omoviracua oñehe pīratasa pipe. Yande angaipagüer sui yande moatiro pare oso, oguapí Vu acato cotí oĩ ivave cute.

Tūpa Rahir seco ivate catu Vu rembiguai íva pendar sui

⁴ Tūpa Rahir secoi ivate catu vahe Vu rembiguai íva pendar yuvirecoi vahe sui. Ahe vireco omborerecuasa ivate catu vahe ichui. ⁵ Esepia, Tūpa aipo ndehi eté güembiguai upe:

“Nde che Rahir ereico; co pipe amondo nde recove ãgua” ndehi eté.

Iyavei:

“Che Tu aicora, ahe evocoyase che rahir secoira” ndehi avei chupe.

⁶ Ichui rumo ombouse Guahir ñepei vahe co ívi pipe aipo ehi:

“Tomboetei opacatu che rembiguai yuvireco”

ehi. ⁷ Evocoyase güembiguai rese oñehe Tūpa aipo ehi icuachiaprí arachendar pipe:

“Ayapo che rembiguai ívitu nungar, tata nungar avei cheu oporaviqui vahe ñehe” ehi.

⁸ Tahir rese ñehesa rumo aipo ehi icuachiaprí arachendar pipe:

“Che Yar Tūpa, nde mborerecuasa rumo apirēhi vahe ñehe ité.

Ereporocuai nde reco ívi tuprísa pipe yepi.

⁹ Mbahe ihívi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesa ndeu ivate catu vahe opacatu nde mboetasa sui” ehi.

¹⁰ Iyavei aipo ehi iri:

“Nde, ore Yar, yipisuive eremoviracua vahe ívi.

Nde ité avei ereyapo íva.

¹¹ Opacatu co nde rembiapo opa vahe ñehe tēi, inungar turucuar cuacua oyearo vahe opa.

Nde rumo apirēhi vahe ñehe ité ereico.

¹² Ipare ereyapara inungar turucuar yapapí iyavei eresecuñarora inungar oturucuar osecuñaro vahe.

¡Nde rumo ndereñecuñaroi chietera!

Iyavei nde recocuer ndopai vahe ñehe ité” ehi.

¹³ Ndahei que ñepei íva pendar güembiguai upe Tūpa aipo ehi:

“Eguapí che acato cotí, ahesa che amondora nde amotarēhimbar nde povrive” ehi.

¹⁴ Esepia, opacatu Tūpa rembiguai espíritu yuvirecoi chupe oporaviqui ãgua, icuapí avei ava ipīsiropirā pītiví ãgua.

Yandemahemoha tuprísa yande pīsirosa rese

2 Sese iyacatu co ñehesa yasendu vahe rese yayapisaca tuprí catu co tecocuer piasu sui yande yepipiēhi ãgua. ² Esepia, co Tūpa rembiguai remimombehu güer seroyapí ité secoi, iyavei oyemboangaipa vahe, ndoviroyai vahe avei imombaraisuprí ité sembiapo rupi yuvirecoi aracahe. ³ ¿Mara yahera pīha evocoyase yande yañemi Tūpa ñemoirosa sui víña acoi ndayandemahemoha tuprísa co yande pīsirosa aviye vahe rese? Esepia, yande Yar ahe rane ité omombehu co ñehesa ñepisirosa resendar. Ipare sendusar, “Supí eté co ñehesa” ehi yuvireco. Ichui ahe avei omombehu yuvireco yandeu. ⁴ Iyavei Tūpa oyapo setá mbahe yavai rai vahe poromondiisa ndayasepai vahe. Iyavei oEspíritu Santo pipe, omboyovirati mbahecuasa imbou yandeu güemimbotar rupi ‘toicua yuvireco co ñehesa supí tuprí vahe’ oyapave.

Jesucristo ava nungar tuprí secoi

⁵ Ndahei güembiguai povrive omondo Tūpa ívi oime vahe ñehe, acoi oromombehu vahe pēu. ⁶ Oime rumo icuachiaprí arachendar pipe omombehu tuprí vahe:

“Che Yar, ¿uma vo evocoyase ava?

¿Mahera ndemahenduha ava tēi rese, iyavei eresāro no?

⁷ Ndaseta ariimi erereco ívi cotí catu nde rembiguai sui.

Ipare voi rumo eremondo nde porañetesa imboetisave chupe.

⁸ Iyavei opacatu erereco uca mbahe nde rembiapo ipovrive” ehi imombehu.

Ēgüe ehise Tūpa, ndoseyai eté que ñepei yepi mbahe ipo pendarēhi. Cūritei rumo ndaopacatu tuprí víteí mbahe ipovrive. ⁹ Yaicua niha Jesús, ahe Tūpa güembiguai sui ndaseta araviter ívi cotí catu vireco.

Oporoaisusa pipe oipota imano ãgua opacatu ava repirā. Cūritei rumo iyemombaraisu pare, omondo oporañetesa imboetisave chupe.

¹⁰ Iyavei opacatu mbahe oime Tūpa upe, ichuindar avei 'toyuviroique opacatu che rahir che reco porañetesave' oyapave. Sese omombaraisu uca Guahir Jesucristo 'tomboaviye tupri rane che remimbotar Poropñisrosar güeco āgua' oya. ¹¹ Esepia, opacatu vireco ñepe Vu yuvireco co seco catupri vahe, seco mbo-catuprisar avei. Sese Tahir nochi eté, "Che rivireta pe-ico" ohe āgua viroyasar upe. ¹² Ahe aipo ehi icuachiapri aracahendar pipe:

"Añehera nde rese che rivireta upe.

Asapucaí aveira sapucaisa ndeu opacatu ava ndeu oñemonuha vahe pāhuve" ehi.

¹³ Iyavei aipo ehi:

"Che ayeroya itera sese" ehi.

Ichui aipo ehi iri:

"Co oroico Tūpa rahir cheu ombou vahe rese" ehi icuachiapri pipe aracahe.

¹⁴ Inungar ava vireco vahe guahir, oyoya soho, suvi; ēgüe ehi avei Jesús vireco voho, vuvi yande nungar; omano pipe sui omocañi vahe rā iporoyuca ai vahe pñratasa; ahe Carugar. ¹⁵ Opacatu ava manosa sui osiquiyesa pipe mbiguai tēi nungar yuvirecoi vahe güecove viteseve, evocoi nungar sui senose āgua, ēgüe ehi Jesús. ¹⁶ Esepia, ahe ndoui Tūpa rembiguai pñtivii āgua, ahe rumo ou Abraham suindareta pñtivii āgua.

¹⁷ Sese niha tivireta nungar tupri ité oyapo Tūpa, "Toime che rovaque pahi rereciar ivate catu vahe seco tupri vahe; taseco mbegüe avei, tomondo güetecuer ava angaipa repñrā ñeroisa reime āgua" ehi. ¹⁸ Esepia, ahe avei oiporara Carugar poroātoisa. Sese cūrtei ahe oicatu ité ava Carugar remiatoi pñtivii āgua.

Jesús ivate catu vahe Moisés sui

3 Evocoyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secoi yandeu apóstol iyavei pahi ivate catu vahe yande yeroyasa. ² Ahe ité niha omboaviye tupri Vu remimbotar, osenoise imbou co tecocuer apo āgua inungar Moisés omboaviye tupri ocuaita Tūpa mbahe rāro aracahe. ³ Jesús rumo imboeteipri catu Moisés sui. Inungar acoi oi aposar imboeteipri catu oi sui secoi. ⁴ Esepia, ñepepei oi vireco oaposar viña. Tūpa rumo opacatu mbahe aposar secoi. ⁵ Supi eté Moisés Tūpa rembiguai güeco pipe omboaviye opacatu oporaviquisa itūparo rese. Esepia, omombehu Tūpa omboyecua pota vahe ava upe yepi. ⁶ Cristo rumo tahir güeco pipe omboaviye ocuaita Vu tūparo rese. Ahe tūparo yande yaico yayeroyaño itese Cristo rese iyavei yasāroño itese yande yembovihasa pipe co mbahe aviye vahe oime vahe rā yandeu curi.

Mbituhusa Tūpa upendar yuvirecoi vahe upe

⁷ Sese inungar aipo ehi Espiritu Santo icuachiapri aracahendar pipe:

"Co pipeve voi, pesenduse Tūpa ñehe,

⁸ peyepñhamoatai rene catu chupe, ndapeicoi chira ava ndiava reroyai vahe nungar acoi ivi iporupñrēhisa rupi Tūpa recoāhasar yuvirecoi vahe aracahe.

⁹ Aheve avei acoi che recoāha tēi pe ramo mbahe güembiapo pipe, yepe cuarenta araviter rupi osepia tēi mbahe che rembiapo yuvireco viña.

¹⁰ Sese añemoiro ahe ava upe, aipo ahe:

'Ipihañemoñeta rai co coti tēi vahe rese yepi iyavei ndoicua potai eté che recocuer yuvireco' ahe chupe.

¹¹ Sese che añemoiro ahe ava upe, 'Ñepe reseve ndapepituhi chietera che pituhusa pipe' ahe yuvireco chupe" ehi aracahe.

¹² Che rivireta, peñearo catu; tipo eme que ñepe ipihañemoñeta naporai vahe Tūpa reroyāhisa pipe oyepepi vahe rā ichui. ¹³ Iya rumo peyemonguerñhi catu ñepepei ari yacatu rupi cūrtei pe recove pipe angaipa upe pe yembopa uca iriñhi āgua, pe mbahe reroya iriñhi āgua rese avei. ¹⁴ Esepia, yayemoviracua tuprise Cristo rese yande yeroyasa yipisuive yareco vahe pipe yande mano āgua rupi eté, ahese yaico itera sese.

¹⁵ Supi niha acoi aipo ehi ñehesa:

"Co pipe voi pesenduse Tūpa ñehe, peyepñhamoatai rene catu chupe; ndapeicoi chira ava ndiava reroyai vahe nungar" ehi vahe.

¹⁶ ¿Ava pñha acoi ava iñehe mara vahe yuvireco Tūpa ñehe rendu pare chupe? Moisés remienose Egipto ivi sui ēgüe ehi yuvireco. ¹⁷ ¿Ava upe pñha acoi Tūpa oñemoiro cuarenta araviter rupi? Acoi oyemboangaipa vahe omanopa vahe yuvireco ivi iporupñrēhisa rupi.

¹⁸ ¿Uma upe pñha acoi ñepe reseve, "Ndapeiquei chietera che pituhusa pipe pe pituhu āgua" ehi Tūpa? Acoi viroyāhisar upe aipo ehi. ¹⁹ Sese yaicua seroyāñhi pipe ndoicatui yuviroique ipipe.

4 Oime vite Tūpa remimombehu yande yaique vahe rā ipiri yande pituhu āgua. Sese iya ité yañearo tupri. Aní chira que ñepepei pe pñhu pendar ndoiquei chira. ² Esepia, yandeu avei imombehusa ñehesa poropñsirosa resendar inungar yande ramo upe ivi iporupñrēhi rupi yuvireco aracahe. Co ñehesa rumo ndoipñtivii eté ahe ava yuvireco. Esepia, ahe osendu yuvireco seroyāñhisave tēi. ³ Yande rumo yaroya vahe, yaiquera yande pituhu āgua, ahe chupe Tūpa aipo ehi: "Sese añemoiro ahe ava upe; ñepe reseve, 'Ndoyuviroiquei chietera che pituhusa pipe opituhu āgua yuvireco' ahe" ehi.

Tūpa rumo yipive ité opa omboaviye oporaviquisa iva, ivi. ⁴ Esepia, co imbosietesa ari resendar ñehesa oime icuachiapri aracahendar pipe:

"Tūpa opituhu opacatu oporaviquisa sui imbosietesa ari pipe" ehi.

⁵ Iyavei aipo ehi iri icuachiapri pipe:

"Ndoyuviroiquei chietera che pituhusa pipe opituhu āgua yuvireco" ehi.

⁶ Ipane vite rumo amove ava yuviroique vahe rā ahe pituhusave. Acoi yipindar osendu tēi vahe rumo ñehesa poropñsirosa resendar, ndoyuviroiquei eté seroyāñhisa pipe yuvireco. ⁷ Sese Tūpa omombehu tupri iri ambuae

ari, chupe ité, “Co pipe” ehi. Ahe acoi coiyé mborere-cuar guasu David upe omombehu ucasa aracahe yandeu icuachiapri pipe, aipo ehi vahe:

“Co pipe voi, pesenduse Tüpa ñehe, peyepihamoatai rene catu chupe” ehi vahe.

⁸ Ehi revo Josué omondose co pituhusa israelita upe aracahe viña, Tüpa evocoyase noñehe iri chira co ambuae ari rese viña. ⁹ Evocoyase oimeño itera mbituhusa iporavopri ava Tüpa upendar upe nara: ¹⁰ Acoi oique vahe evocoyase pituhusa pipe, opituhu oporaviquisa sui inungar Tüpa opituhu ombahe mboaviye pare aracahe. ¹¹ Sese yayemoviracua catura yande reique água evocoi mbituhusa pipe. Aní chira ava arachandar seroyañhisar recocuer rupi tupri avei yaicora.

¹² Esepia, Tüpa Ñehengagüer oicove vahe, ipirata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande aviterve; égüe ehi avei ñehengagüer oñatoi eté yande hã, yande espíritu avei. Iyavei omboyecua tupri ité yande pihañemoñeta. ¹³ Ndi poi eté niha mbahe Tüpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

Jesús niha pahi ivate catu vahe secoi

¹⁴ Jesús, Tüpa Rahir, pahi ivate catu vahe secoi yandeu oique vahe ivave Tüpa piri. Sese yayemoviracuaño itera sese yande yeroyasa pipe. ¹⁵ Esepia, yande pahi ivate catu vahe oicuaño ité yande recocuer píratañhisa. Ahe avei niha yande nungar aracaco viroparaisu opacatu mbahe-mbahe tēi güecoñhasa. Ahe rumo ndoyemboangaipai eté ipipe. ¹⁶ Sese yayemboya catura yande yeroyasa pipe yande Ru Tüpa rese. Esepia, ahe yande raisu ité. Ipipe sui tayande paraisuereco güeco aviyesa pipe yande pñivii água mbahe tēi oimese yandeu.

⁵ Opacatu pahi ivate catu vahe iporavopri secoi ava pãhu sui ava recocuer reropovēhe água Tüpa upe iyavei porerecosa mondo água chupe, mbahe mimba yucapri reropovēhe água avei ava angaipa repirã. ² Ahe pahi niha oiporara avei teco asisa ambuae ava nungar. Sese güeco asiñhisa pipe oipñivii ava ndayaracuai vahe, oyavi vahe avei. ³ Ahe rumo güeco píratañhisa pipe viropovēhe mbahe mimba yucapri Tüpa upe oangaipa repirã, opacatu ambuae ava angaipa repirã avei. ⁴ Ndiyai chira que ava oyesui tēi pahi oyeapo. Tüpa ité rumo osenoira imboetei uca água inungar acoi Aarón upe aracahe. ⁵ Égüe ehi avei Cristo, ahe noñeenoi pahi ivate catu vahe güeco água oyesui tēi. Tüpa ité osenoi imboetei uca água acoi aipo ehise: “Nde che rahir ereico, co pipe amondo nde recove água” ehi.

⁶ Aipo ehi avei ambuae icuachiapri pipe:

“Nde ereico pahi ivate catu vahe apirēhi vaherã, inungar tupri mbia Melquisedec serer vahe” ehi.

⁷ Co ivi pipe Cristo oicove vitesa, oyeroqui pírata oyasehosa pipe Vu Tüpa upe yepi. Esepia, ahe oicatu ipñisiro água manosa sui. Égüe ehi iporeroya tuprisa pipe, Tu

osendu iyeroqui yepi. ⁸ Yepe Tahir ité viña, güeco paraisu pipe rumo oyembohe imboyeroya água; ⁹ evocoya güeco pipe omboaviye güeco catuprisa. Ipipe sui güeru poropñisiro ndopai vahe opacatu viroyasar upe nara. ¹⁰ Esepia, Tüpa niha osenoi pahi ivate catu vahe seco água inungar Melquisedec aracahe.

Peicua catu, “Ndaroyai eté co tecocuer piasu” pe hesa sui

¹¹ Orovireco vite mo setá mbahe ore ñehe água pēu co mbahe tecocuer resendar rese. Yavai etepri rumo imombehu tupri água. Esepia, pe ndapesenducua tupri vitei eté. ¹² Aracacove peporombohera viña; peipota vite rumo pēu mbahe ndayavaimi vahe imombehu iri água yembohesa Tüpa suindar. Ndapeyemoviracuai rumo; peihu iri pota cambi mbahe sãta vahe hu rãgüer sui. ¹³ Esepia, acoi égüe ehi vahe pñitani osi rese ocambu vite vahe nungar tēi pe recocuer. Ipipe sui ndapeyembohei eté Tüpa Ñehengagüer rese mbahe tupri pe reco água. ¹⁴ Co tembihu sãta vahe rumo ahe ava ocuacua vahe upe nara. Esepia, ahe oyembohe tupri catu ñehengagüer rese güeco tupri água yepi. Ipipe sui oicua ité mbahe aviye vahe poravo mbahe naporai vahe sui.

⁶ Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tüpa suindar co mbahe rese yembohe iri rãgüer sui. Ahe yipindar vahe co: yande ñecuñarosa, yande reco ai sui yande poisa, manosa apirēhi vahesave yande rerasoñhi água, iyavei Tüpa rese yande yeroyasa, ² yembohesa poroñpiramosa resendar, po mondosa Tüpa reroyasar harive, omano vahe cuerayevisa iyavei ava recocuer rese porandusa resendar avei. ³ Tüpa oipotase yayembohera ambuae mbahe yavai catu vahe rese.

⁴ Acoi ava yipindar osenducua vahe Tüpa remimbotar, osãha vahe avei Tüpa suindar porerecosa iyavei oyandu ité Espíritu Santo güecocuer pipe, ⁵ osãha vahe avei Tüpa Ñehengagüer aviye vahe iyavei osãha chíhi ipiratasu curi oime vaherã viña, ⁶ oyepepise rumo ichui, ndayaicatu iri seco reroyevi iri água Tüpa upe. Esepia, yaticapri nungar iri eté vireco Tüpa Rahir iyavei ambuae ava omoñehe-ñehe tēi iri sese. ⁷ Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoyase evocoi nungar ava oipisira porovasasa Tüpa suindar. ⁸ Ahe ivi rese yu pãve tēi oyesuse, ahe naporai eté. Evocoi nungar ava Tüpa poromocañisavrive tēi, sapipirã tēi avei yuvirecoira curi.

Yande remiaro aviye vahe yande moviracua tupri vahe

⁹ Che mboripar saisupri, yepe aipo orohe pēu viña, oromoha ité rumo mbahe aviye catu vahe pēu co ñepisirosa pare. ¹⁰ Esepia niha, Tüpa seco aviye vahe, ahe ndasesarai chietera pe rembiapo aviye vahe sui pe

poroaisusa pemboyecua vahe peip̄t̄iviise seroyasar. Ahe niha co peyapoño vite peico. ¹¹ Ore rumo oroipotaño ité ñepei-pei pe pemboyecuaño itera arí cañi rupi eté co pereco vahe pe querēhisa pe remiaro aviye vahe rupiti āgua. ¹² Ndoroiptoi pe atēhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombe-hupri Tūpa sui.

¹³ Peyemomahenduha acoi Tūpa güemimbotar omombeuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ēgüe ehi vaheherā. Sese ahe güerer ité osenoi ¹⁴ aipo ehi chupe: “Supi eté oroovasa itera, iyavei setara ava nde suindar” ehi. ¹⁵ Evocoiyase Abraham osāro güeco mbegüesa pipe, ēgüe ehi ipisi oyeupendar Tūpa remimombehu. ¹⁶ Ava omoingatu potase oñehe, ivate catu vahe rer pipe omoingatu yuvireco yepi. ēgüe ehise yuvireco, ndiya iri eté ipare oñehe vitera sese. ¹⁷ Tūpa güerer pipe ité omoingatu oñehe omombeuse güemimbotar aracahe ‘toicua tupri che remimombehu pisi āgua che ñehe ñepei reseve vahe yuvireco, iyavei amboaviye itera che remimombehu chupe’ oyapave aipo ehi aracahe. ¹⁸ ēgüe ehi oime ñuvirío mbahe imboye-poepip̄rēhi: Tūpa niha ndoporombopai vahe ité, ipipe avei yande monguerēhi catu yande yaseca vahe iporop̄t̄iviisa iyavei yayeroya vahe ñearosa yandeu ombou vahe rese. ¹⁹ Co mbahe yasāro vahe omoviracua tupri yande hā, inungar mbahe carite guasu mombitasa omoviracua tupri carite ivitu sui. ēgüe ehi yande remiaro oique turucuar guasu tūparo asiasa cupeve oi imaranehi catu vahesave ivave. ²⁰ Aheve Jesús oique yande raperā mboi āgua. ēgüe ehi ahe apirēhi vahe ité pahi ivate catu vahe güeco āgua, inungar tupri Melquisedec aracahe.

Jesús pahi Melquisedec nungar tupri ité

7 Co Melquisedec aipo mborerecuar guasu Salem pendar, iyavei pahi Tūpa ivate catu vahe upendar secoi aracahe. Abraham oyevise peri rupi ovavasa sui ou mborerecuar guasu eta momba pare, ahese aipo osē voi eté oso Abraham rovañchi Tūpa porovasasa mondo āgua chupe. ² Iyavei aipo Abraham omondo oporerecosa vavasa sui mbahe güeru vahe diez vahe sui ñepei-pei chupe. ‘Mborerecuar guasu seco ñvi vahe’ oyapave Melquisedec ehi. Iyavei ahe mborerecuar Salem pendar, ahe tecua Salem ‘mbahe tupri’ oya; sese mborerecuar guasu mbahe tupri vahe secoi. ³ Ahe iyesupa rumo ndicuasai eté iyavei ichi, tamoi, arí iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tūpa Rahir recocuer; ahe pahi apirēhi vahe ité.

⁴ Peyapisaca tupri co mbia recocuer rese: ivate ité secoi aracahe. Yande ramoi Abraham teieté avei omondo diez sui ñepei-pei mbahe porerecosa mborerecuar guasu eta sui güembierocua chupe. ⁵ Moisés porocuita pipe rumo opacatu Leví suindar pahi eta

yuvirecoi vahe vireco ité ocuita opacatu ava sui diez sui ñepei-pei iporaviquimi reroqua āgua yuvireco. Abraham suindar ité niha ēgüe ehi yuvireco. ⁶ Yepe Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi vaheherā mbahe Tūpa remimombehu. ēgüe ehi Melquisedec Abraham rovasa. ⁷ Supi eté sovasapri sui oporovasa vahe ivate catu secoi yepi. ⁸ Evocoi levita suindar oipisi ava poraviqui reprim diez sui ñepei-pei. Ahe ava rumo omano vaheherā tēi yuvirecoi. Icuachiapri arachendar pipe rumo Melquisedec serer vahe oicoveño vahe ité. ⁹ Ndojavii evocoiyase opacatu pahi eta Leví suindar omondo vahe porerecosa Abraham rupive chupe yuvireco viña. ¹⁰ Esepia, Abraham oye-seve vite Levi oyesuindar vireco, evocoiyase ihaēhi viteseve oyeepia Melquisedec rese yuvireco aracahe.

¹¹ Ava israelita yuvirecoi vahe oipisi mborocuita pahi levita sui yuvireco; ahe Aarón suindar yuvirecoi. Supi etese rumo ava virecosa Tūpa suindar güeco catuprisa evocoi mborocuita reroqua pipe viña, evocoiyase ndoyemboyecuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera. ¹² Esepia, Tūpa osecuñarose evocoi pahi cuaita, osecuñaro aveira supive mborocuita; ¹³ iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramoi suindar. Ahe ichui acoi ndipoi eté osē vahe ambuae pahi. ¹⁴ Esepia, icuapri ité yande Yar Judá suindar secoise. Iyavei Moisés noñehei ahe ichuindar turi vahe rese oñehese pahi cuaita rese.

¹⁵ Iyavei co oyecua tupri catu itera, oyecuae pahi ipiasu vahe Melquisedec nungar. ¹⁶ Ahe rumo ndahei porocuita “uma sui osēra pahiguā” ehi vahe sui oique pahi güeco āgua; güecocuer p̄rata ndopai vahe reseve oique. ¹⁷ Esepia, Tūpa ité aipo ehi oñehe sese: “Nde pahi apirēhi vaheherā ité ereico inungar Melquisedec” ehi.

¹⁸ Sese mborocuita arachendar opa ité. Esepia, ahe nipiratai, ndayande p̄t̄ivii eté. ¹⁹ Esepia, Moisés porocuita ndosecocuer mbocatupri eté ava. Yande rumo yasāro mbahe aviye catu vahe yande recocuer uve nara. Supi niha yayemboya Tūpa rese.

²⁰ Tūpa rumo oñehe omoingatu ñepei reseve güerer pipe. Ambuae pahi rumo ndahei ñepei reseve senopri yuvirecoi Tūpa rer pipe. ²¹ Yande Yar rumo Tūpa osenoi ñepei reseve güerer pipe pahi seco āgua icuachiapri pipe aipo ehise chupe:

“Yar Tūpa osenoi ñepei reseve, sese nosecuñaroi chietera:

‘Nde pahi apirēhi vaheherā ité ereico’ ehi” ehi icuachiapri pipe. ²² Sese Jesús rese yaicua Tūpa omboaviyera güemimbotar ipiasu vahe yandeu aviye catu vahe yipindar vahe sui. ²³ Yipindar setá pahi yuvirecoi. Opa-opaño rumo omano. ²⁴ Jesús rumo nomanoi vahe ité, sese nomonoi chietera pahi güecosa ambuae upe. ²⁵ Sese ahe oicatu ité ñepei reseve viroyasar Tūpa rese oyemboya vahe p̄s̄iro āgua apirēhi. Esepia, ahe

oicove vaherã ité apirêhi oyerogui vaherã Vu Tûpa upe sese.

²⁶ Supi eté Jesús pahi ivate catu vahe secoi. Evocoi nungar niha ipane ité yandeu yipîndar. Ahe ndaseco marai vahe, ndoyapoi vahe mbahe tãi güeco marane-hisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui. ²⁷ Ndahei eté ambuae pahi eta nungar secoi, ndoyuca ranei arî yacatu rupi mbahe mimba Tûpa upe seropovêhe âgua yipîndar oangaipa rese, ipare opacatu ambuae angaipa rese. Ñepeï reseve ité rumo güete viropovêhe opacatu ava angaipa repirã. ²⁸ Moisés porocuita rupi iporavopri pahi ivate catu vaherã ava ndahei seco tupri vahe; Tûpa rumo Moisés porocuita pare osenoi ñepeï reseve Guahir seco catupri vahe 'tasecoi pahi ivate catu vahe apirêhi vaherã ité' oya.

Jesús Tûpa remimbotar ipiasu vahe omoime yandeu

8 Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe oguapi Vu acato coti omborecuasa pipe ivave oï. ² Aheve pahi secoi oporaviqui Vu rêta supi eté vahe pipe. Ahe ivave ité yande Aposar rembiapo, ndahei ava tãi rembiapo.

³ Opacatu pahi ivate catu yuvirecoi vahe senoisa mbahe oporerecosa iyavei mbahe mimba yucapri viropovêhe vaherã Tûpa upe yuvireco. Sese Jesucristo avei vireco mbahe viropovêhe vaherã Vu Tûpa upe. ⁴ Ahe secoise co ivi pipe viña, ndahei chietera pahi sec oi viña. Esepia, cohave oime vite ité pahi mbahe viropovêhe vahe Moisés porocuita rupi yuvireco. ⁵ Co ivi pipendar pahi rumo ihañeco iva pendar rahanga rese tãi yuvireco. Yaicua niha ahe sahanga tãi. Esepia, Moisés oyapo potase tûparo, Tûpa aipo ehi chupe: "Emahecua tupri acoi ivitri ve amboyecua vahe rese ndeu. Ahe inungar tupri eyapo" ehi chupe. ⁶ Yande pahi ivate catu vahe rumo, Jesús, vireco ocuaita aviye catu vahe ambuae pahi sui. Esepia, Tûpa remimbotar ipiasu vahe Jesús güeru vahe yandeu aviye catu vahe ité yipîndar vahe sui iyavei sesendar Tûpa remimombehu aviye catu vahe avei.

⁷ Esepia, yipîndar Tûpa remimbotar oicatus yande recocuer recuñaro âgua viña, ndipoi chira ambuae semimbotar ipiasu vahe yandeu viña. ⁸ Tûpa rembiepiave rumo ava recocuer mbahe tãi eté. Sese aipo ehi icuachiapri pipe co ava rese aracahe:

"Yande Yar aipo ehi:

'Oimera arî ayapo iri âgua che remimbotar ipiasu vahe ahe Israel pendar upe, Judá pendar upe avei.

⁹ Ndahoyoyai chira rumo acoi tamoi eta rese yipîndar ayapo vahe che remimbotar.

Ahese acoi opa anose ivi Egipto sui, nomboaviyei eté rumo che porocuita yuvireco.

Sese apoi ichui' ehi yande Yar Tûpa.

¹⁰ 'Co arî pare rumo na ahera che remimbotar apo Israel pendareta upe' ehi yande Yar Tûpa, 'Amondora che porocuita iyapisacasa pipe, aicuachía aveira ipihañemoñetasa pipe.

Evocoiyase che iTûpa aicora; ahe evocoiyase cheundar yuvirecoira.

¹¹ Nombohe iri chira ondugüer, omu avei che cua uca âgua yuvireco.

Esepia niha, opacatu chíhivahe catu vahe sui, ava ocuacua catu vahe avei che cuara yuvireco.

¹² Iyavei cheñero aveira mbahe tãi sembiapogüer rese yuvireco chupe; ndayemomahenduha iri chiaveira yangaipagüer rese' ehi yande Yar"

ehi icuachiapri pipe aracahe. ¹³ Oñehese Tûpa güemimbotar piasu rese, omombehu yipîndar vahe cañi âgua; chíhimi tãi ipane icañipa âgua.

Tûparo ivi pipendar iyavei tûparo iva pendar

9 Evocoiyase yipîndar Tûpa remimbotar vireco ava cuaitarã iñemonuha âgua Tûpa mboeteisa pipe iyavei vireco tûparo co ivi pipendar. ² Ahe tûparo pipe na ehi mbahe imoingatusa: yipîndar oi Nimarai Vahe serer. Ipipe oime vera renda iyavei mesa pan sovasapri Tûpa upendar reseve. ³ Imoñuviriosa turucuar tûparo asiasa cupeve oime ambuae oi, ahe serer Nimarai Catu Vahe. ⁴ Aheve oime itaisi rapisa renda oro apopri, aheve avei oime Tûpa porocuita riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sorî vahe, iyavei mborocuita cuachiapri ita ipe vahe rese oime ipipe. ⁵ Ahe mborocuita riru harive oime Tûpa rembiguai rahanga oyovai yuvinohai, "Tûpa oime ité cohave" he âgua. Ahe ipepo oyopi tupri Tûpa porocuita riru rovapisa yuvireco. Co rupive revo amombehu co mbahe pëu.

⁶ Evocoi nungar mbahe moingatupri pare, pahi eta yuviroiqueño yipîndar oi asiapri pipe arî rupi ocuaita apo âgua. ⁷ Imoñuviriosa oi pipe rumo pahi ivate catu vaheño oique ñepeï reseve ñepeï-peï araviter pipe, iyavei güeique yacatu viroique mbahe mimba ruvi viropovêhe vaherã Tûpa upe oangaipa rese, ava icuaehi pipe angaipa oyapo vahe repirã avei. ⁸ Co rese Espiritu Santo oicua uca yandeu avaño tãi ndiya vitei eté oique ipa vahe oi imaranehi catu vahe pipe Tûpa rovai oime vitesse yipîndar oi yasiapri. ⁹ Co opacatu mbahe yande mbohe mbahe cûriteindar rese. Esepia, co porerecosa iyavei mbahe seropovêhepri aheve Tûpa upe, nomoatiroi eté imboeteisar pihañemoñetasa. ¹⁰ Ahe rumo carusa, ihusa, ñemoatirosa nungar mbahe resendar tãi; yande retecuer resendar tãi porocuita. Ahe rumo êgüe ehiñomi tãi yuvireco Tûpa remimbotar ipiasu vahe yu âgua renonde.

¹¹ Poropisrosar rumo ou cute. Iyavei ahe ité cûritei yande pahi ivate catu vahe secoi mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tãi, ahe rumo aviye catu ité iyavei ndahei eté co ivi pipe yapopri. ¹² Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovêhe âgua, ahe rumo viropovêhe vuvi ité opacatu rese; êgüe ehi ahe ñepeï reseve oique apirêhi vahe ñepisirosa reime âgua yandeu. ¹³ Supi eté guaca cuimbahe ruvi iyavei ovesa

ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tēi pīratasa ava rete moatiro āgua. ¹⁴ Cristo ruvi rumo vireco catu ité pīratasa. Esepia, Cristo, Espiritu apirēhi vahe pipe, oyemondo ahe ae Tūpa upe inungar mbahe seropovēhepri nimarai vahe, iyavei suvi yande pihāñemoñetasa moatiro opacatu yande rembiapo ai manosave yande rereco vahe sui Tūpa oicove vahe upe mbahe apo uca āgua yandeu.

¹⁵ Sese Jesucristo secoi Vu remimbotar ipiasu vahe moingatusar ava reru āgua Tūpa upe omano pipe. Ipipe sui oime ñeroisa oyemboangaipa vahe yipindar mborocuaivavri yuvirecoi vahe upe 'toipisi che rembiporavo yuvireco oyeupendar mbahe apirēhi vahe che remimombegüer rupi' oya. ¹⁶ Que ava oicua ucace güemimbotar ombahe mondo āgua omano renondeve, icuasa tupri ranera rumo imanosa semimbotar apo āgua renonde. ¹⁷ Esepia, ndiya vitei eté omano vaheṛā recove vitesese mbahe imondosa iyarā upe. Imanore voi rumo aviye imondosa. ¹⁸ Sese yipindar vahe Tūpa remimbotar yaposā mbahe mimba ruvi piyere pipe. ¹⁹ Esepia, Moisés omombepase mborocuaita opacatu ava upe, oipisi ovesa ragüer pīra vahe iyavei ivira hisopo serer vahe rāca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipii cuachiar mborocuaita resendar, opacatu ava avei. ²⁰ Evocoyase aipo ehi icuachiapri pipe: "Co mbahe ruvi oicua tupri uca co porocuaita Tūpa ombou vahe omboyeroa āgua pēu" ehi. ²¹ Mbahe mimba ruvi pipe avei opa Moisés osipii tūparo iyavei opacatu mbahe ipipendar iporupri. ²² Porocuaita rupi eté tuvi pipe seni opacatu mbahe oñemoatiropa Tūpa rovaque; ndipoi eté ñeroisa angaipa upe mbahe ruvi piyerepri porēhise.

Tūpa upe güete reropovēhe pipe Cristo omocañi angaipa

²³ Iyacatu ité imoatirosa evocoi nungar mbahe mbahe mimba seropovēhepri ruvi pipe. Esepia, co mbahe iva pendar nungar tēi sahangaposa; iva pendar ité rumo ipotasa seropovēhepirā mbahe aviye catu vahe evocoi sui. ²⁴ Esepia, Cristo ndoiquei tūparo oi imaranehi catu vahe ava rembiapo pipe tēi. Esepia, ahe iva pendar rahanga tēi. Ēgüe ehi rumo ahe oique ité ivave. Aheve cūritei secoi Tūpa rovai yande pītivii āgua oyerouqui pipe. ²⁵ Judío pahi ivate catu vahe niha ñepepe reseve oique araviter yacatu oi imaranehi catu vahe pipe mbahe ruvi tēi reropovēhe āgua; ndahei rumo vuvu ité viropovēhe. Cristo rumo ndoyeeropovēhe pihi Tūpa upe. ²⁶ Ēgüe ehise rumo, yipisuive omano pihira viña. Cūritei rumo oyemboyecua co ipa ari rupi ñepepe reseve, apirēhi vaheṛā viropovēhe āgua güete Tūpa upe 'tocañipa angaipa' oya. ²⁷ Supi eté opa rane itera ava omano yuvireco, ipare voi ñepepe reseve oimera porandusa. ²⁸ Indó, Cristo oyeeropovēhe ñepepe reseve opacatu angaipa mocañi āgua. Ipare rumo oyevi irise ou, ndahe iri chira angaipa recocuer rese. Ahe rumo oyevira ou guārosar pīsiro āgua.

10 Esepia, Moisés porocuaita mbahe aviye vahe ou vaheṛā rahanga tēi, ndahei ahe eté vahe ité.

Sese ahe porocuaita ndoicatui eté ava Tūpa rese oyemboya vahe reco mohivi tupri āgua mbahe seropovēhepri araviter yacatundar pipe tēi. ² Porocuaita oicatusē pe angaipa sui pe moatiro tupri āgua, ndapeyandu iri chira pe angaipa viña iyavei pahi ndovirovovēhe iri chiaveira mbahe ruvi Tūpa upe yuvireco viña no. ³ Co seropovēhepri rumo yande momahenduha uca āgua tēi yande angaipagüer rese araviter yacatu. ⁴ Esepia, mbahe mimba ruvi tēi nomocañi eté yande angaipa yande sui.

⁵ Sese Cristo co ivi pipe ouse, aipo ehi Tūpa upe: "Ndereipota iri niha mbahe mimba tēi porerecosa seropovēhepirā ndeyeupe, nde rumo ereyapo che retecuer evocoi nungarā.

⁶ Ndahei niha nde piha rupi mbahe rapipri mbahe mimba yucapri ndeu seropovēhepri ñepepe reseve angaipa mocañi āgua.

⁷ Evocoyase che aipo ahe:

'Che ayu nde remimbotar apo āgua, che Ru Tūpa, che resendar icuachiapri remimombehu rupi tupri mboaviye āgua' ahe" ehi.

⁸ Yipindar aipo ehi, Tūpa ndoipotai eté, iyavei ndahei ipiha rupi mbahe mimba reropovēhepri, porerecosa mbahe sapipri avei angaipa mboyeho āgua, yepe ahe mborocuaita rupi seropovēhesa viña. ⁹ Ipare aipo ehi: "Che ayu nde remimbotar apo āgua" ehi. Ahe ipipe omombopa yipindar vahe mbahe seropovēhepri co ambuae mbahe ipiasu vahe apo āgua. ¹⁰ Tūpa evocoyase yande peha angaipa sui oyeupe nara. Esepia, Jesucristo oyapo ité semimbotar mbahe ñepepe reseve apirēhi vaheṛā güete mondo pipe.

¹¹ Opacatu judío pahi eta ari yacatu oyapo ocuaita iyavei mbahe mimba avei-vei viropovēhe Tūpa upe yuvireco. Yepe ahe viropovēhe tēi yuvireco viña, nomocañi catui eté rumo angaipa. ¹² Jesucristo rumo oyeeropovēhe ñepepe reseve angaipa repirā apirēhi vaheṛā. Ipare oso ivave, oguapi oi Vu acato coti. ¹³ Aheve osāro oi Vu Tūpa opase voi omondo yamotarēhimbar ipovri. ¹⁴ Esepia, ñepepe reseve oyeeropovēhe pipe osecomohivi tupri Vu Tūpa rembipeha apirēhi vaheṛā. ¹⁵ Iyavei Espiritu Santo aipo ehi tupri avei icuachiapri arachendar pipe yandeu:

¹⁶ "Co ari pare rumo na ahera che remimbotar apo chupe' ehi yande Yar Tūpa, 'Coie amondora che porocuaita ipihāñemoñetasa pipe, amondo aveira iyapisacasa pipe' ehi.

¹⁷ Ndayemomahenduha iri chietera yangaipagüer rese iyavei mbahe tēi sembiapogüer rese yuvireco" ehi aracahe.

¹⁸ Ēgüe ehi angaipa rese oimese ñeroisa, ahese ndiya iri seropovēhesa mbahe angaipa repirā.

Yayemboya catura Tūpa rese

¹⁹ Sese che rivireta, iya ité cūritei yande reique āgua Tūpa rovai yande siquiyeñhisa pipe Jesucristo ruvi pipe sui. ²⁰ Yaicoveño itera ipiasu vahe tecocuer tecovesa

yandeu ombou vahe pipe. Ahe niha omboi tūparo pipe asiāsa turucuar yande reique āgua Tūpa rovai. Ahe turucuar inungar Jesús rete. ²¹ Iyavei ahe yande pahi ivate catu vahe ité secoi Vu Tūpa rēta rārosar; ²² sese yayemboya catura Tūpa rese yande pihāñemoñeta tuprisa pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pihāñemoñeta raisa sui iyavei omoatiro yande rete i maranehi pipe. ²³ Yayemoviracua catura mbahe aviye vahe yande remiario pipe yamombehu vahe ava upe yande pihāñemoñeta rerovaēhisa pipe. Esepia, Tūpa omboaviye itera mbahe güemimombehugüer yandeu. ²⁴ Iyavei yasecañora ñepei-peí yañepitívii vahe rā yande yeaisu catu āgua iyavei mbahe tupri apo āgua yandeyeupe. ²⁵ Ndayamopanei chira yande ñe-monuhasa Tūpa upe. Ndayaicoi chira omopane vahe nungar, iya rumo yayemonguerēhi catura ñepei-peí yandeyeupe. Esepia, viroví ari yande Yar yeví iri āgua. ²⁶ Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovēhepirā evocoi yande angaipa repirā yandeu; ²⁷ Tūpa ñemoirosa ipīrata vahe güeraño oimera yandeu iyavei tata guasu apirēhi vahe opara omocañi Tūpa amotarēhimbar yuvirecoi vahe. ²⁸ Ava Moisés porocuaita ndoviroyai vahe que ñuvirío, anise mbosapi rembiepiave, ahe secocuer mombehuse, ahe yucapri ité saisuēhisa pipe yuvirecoi. ²⁹ Peyapisaca tupri co rese: ipīrata catu oimera Tūpa ñemoirosa tahir roerōrosar upe curi iyavei acoi ava vireco vahe suvi inungar mbahe ēgüe ehi tēi vahe iyavei viroiro tēi vahe guaisusar Espiritu, chupe avei oimera Tūpa ñemoirosa ipīrata catu vahe. Esepia, co tuví rese niha seroyapri ité Tūpa remimbotar. Ipipe avei niha ahe ava Tūpa rembipeha yuvirecoi. ³⁰ Yaicua niha yande Yar aipo ehise: “Che ité asepira, sembiapo ai amboyevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi. ³¹ ¡Mbahe tēi eté yaiquese Tūpa oicove vahe ñemoirosa pipe!

³² Peyemomahenduha acoi aracaco co tesapesa nungar supi eté vahe pisi ramose, peyemoviracuaño ité pe recoāhasa upe pe yemombaraisusa pipe. ³³ Esepia, acoi amove pe pāhu pendar rese iñehe-ñehe tēi yuvireco, mara-mara tēi avei pe rereco opacatu ava rovaque. Ambuae pe pāhu pendar evocoiyase peipitívii pe yemombaraisusa rese. ³⁴ Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosañi avei pe viharetesa pipe peico. Esepia, peicua ivave pereco mbahe aviye catu vahe iyavei apirēhi vahe. ³⁵ Sese pemocañi tēi eme Tūpa rese pe yeroyasa. Esepia, evocoiya pe recosa pipe omoime ucara mbahe tupri pēu curi. ³⁶ Pe rumo peyemoviracuaño itera mbahe-mbahe tēi upe Tūpa remimbotar apo āgua semimombehugüer oime vahe rā pisi āgua curi. ³⁷ Supi eté icuachiapri pipe Tūpa aipo ehi:

“Pihaiivi eté oura acoi ou vahevi.
Ndiaracahei chietera.

³⁸ Acoi cheundar seco catupri vahe rumo che rese oyeroyasa pipe oicovera.

Acoi oyepepise rumo che sui, che evocoiyase ndavihai chira sese” ehi aracahe.

³⁹ Yande ndahei oyepepi vahe nungar yaico. Evocoi nungar niha ocañi tēi vahe rā yuvireco. Yande rumo yayeroya sese; ipipe yañepisiro.

Tūpa rese yeroyasa

11 Supi eté yarecose yande yeroyasa Tūpa rese, ahese yaicua ahe ombou itera mbahe yasāro vahe yandeu, iyavei yaicua ité oime mbahe ndayasepia vahe. ² Supi eté amove yande ramoi aracahendar upe, “Aviye ité” ehi Tūpa oyese yeroyasa pipe sui.

³ Tūpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cūrteindar mbahe yasepia vahe mbahe ndayasepia vahe apopri.

⁴ Sese oyeroya pipe Abel viropovēhe oporerecosa aviye catu vahe Caín porerecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerecosa. Yepe Abel omano viña, oimeño vite rumo Tūpa rese yeroya agüer resendar ñehesa.

⁵ Enoc avei Tūpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoēhi viteseve, “Enoc recocuer aviye ai rane ité chupe” ehi icuachiapri aracahendar.

⁶ Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

⁷ Noé avei oyeroya Tūpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoiyase seroyasave oyapo arca oyesuindar pīsiro āgua. Iyavei sese oyeroya pipe omombehu ava co ivi pipendar cañi āgua. Ahe rumo Tūpa rese oyeroya pipe oñepisiro.

⁸ Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vahe rā vahesave, ahe amondora ndeu” ehise, omboyeroyaño ité. Yepe ahe ivi ndoicuai viña, osēño ité rumo oivi sui oso. ⁹ Ipare Tūpa rese oyeroya pipe avei secoiño ité ahe ivi pipe. Ndoyavii ambuae ivi pendar secoi vahe; oi mbahe pիրer apopri pipe tēi aheve secoi. Ēgüe ehi tupri avei tahir Isaac iyavei sumino Jacob. Ahe avei oipisi vahe rā Tūpa remimombehu ivi yuvireco. ¹⁰ Esepia, aipo Abraham osāroño ité tecua ivave oviracua vahe. Tūpa niha ahe tecua rāhasar, yaposar avei.

¹¹ Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi pīratasa Tūpa sui guahí āgua. Esepia, viroyaño ité Tūpa oñehe omboaviye āgua chupe. ¹² Evocoiyase yepe Abraham ocuacuami viña, vireco rumo guahir. Ahe ichuindar sehii eteanga coiye inungar yasitata iyavei inungar ivi cuhi para guasu popi rupindar ndayaipapa catui vahe ité.

¹³ Ahe ava rumo opacatu omanopa tēi; ndoipisii eté mbahe semimombehugüer oyeupendar. Ahe mbahe amombrí rupi osepiañomi tēi yuvireco oyeroyasa pipe, soriveteño avei sese. Ēgüe ehi oicuaño ité ndahei co ivi pipendar güecosa; ahe rumo yuvirecoveño raimi tēi co ivi pipe. ¹⁴ Aipo ehi vahe oicua uca tupri yandeu oseca vite oyeupendar ivi yuvireco. ¹⁵ Ipihañemoñetase rumo ivi güeco agüer rese yuvireco viña, oyevi iriño itera aheve avei yuvireco viña. ¹⁶ Ahe rumo oipota ambuae ivi aviye catu vahe yuvireco, ahe iba pendar. Sese Tüpa nochi eté, “Che Ru Tüpa” oyeupe hese. Esepia, vireco ité tecua imoingatupri chupe.

¹⁷ Tüpa rese yeroyasa pipe avei Abraham oyemoin-gatu voi guahir ñepeí vahe Isaac reropovēhe āgua Tüpa upe güecoāhasa pipe. Yepe Tüpa aipo ehi chupe aracahe viña: ¹⁸ “Nde rahir Isaac sui setá oimera nde suindar” ehi. ¹⁹ Esepia, oicua ité Tüpa vireco pīratasa ava omano vahe mbogüerayevi iri āgua. Evocoyase imano rāgüer sui eté oipisi iri guahir aracahe. Ahe evocoyase omboyecua mbahe yandeu.

²⁰ Tüpa rese oyeroya pipe avei Isaac osovasa Jacob, Esaú avei mbahe oime vahe rā pisi āgua.

²¹ Iyavei Tüpa rese oyeroya pipe avei Jacob omano pota āgua, osovasa ñepeí-peí José rahir. Ahese opococa rese tēi eté oyemoviracua oyerogui āgua Tüpa upe imboeteisa pipe.

²² Tüpa rese oyeroya pipe avei José, omano āgua renonde, aipo ehi: “Yande mu israelita opara yuvínose ivi Egipto sui curi” ehi. Ipare oyocuai omu oitacuer rerova āgua aracahe.

²³ Tüpa rese oyeroya pipe avei, ohase Moisés, iyesu-pa oñomi mbosapi yasí rupi yuvireco. Esepia, ahe pī-tani icatupri ai, iyavei ndoyembosiquiyei eté mborerrecuar guasu porocuaíta yuca āgua sui.

²⁴ Tüpa rese oyeroyasa pipe avei, ocuacuase Moisés, ndoipotai eté, “Egipto pendar mborerrecuar guasu rayri membri” oyeupe he āgua. ²⁵ Ahe rumo oipota catu mara-mara tēi güereco āgua Tüpa reroyasar reseve chíhi rupive mbahe tēi rese yembovīha rāgüer sui. ²⁶ Aviye catu ité chupe Tüpa rembiporavo upe nara mbahe tēi porara āgua Egipto pendar mbahe eta sepīrusu vahe rereco rāgüer sui. Esepia, ahe oicuaño ité oyeupe nara porerrecosa Tüpa ombou vahe rā.

²⁷ Tüpa rese oyeroya pipe avei osē ivi Egipto sui os-iquiyēhīsa pipe mborerrecuar guasu roriēhīse. Oye-moviracuaño ité oyese mbahe apo āgua; aviye osepia vahe ité Tüpa acoi ndoyecuai vahe. ²⁸ Tüpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mimba ruvi Tüpa rembiguai oporoyuca vahe ava israelita rahir ipi yucaēhi āgua.

²⁹ Tüpa rese oyeroya pipe avei ava israelita osasa para guasu Pīra Vahe ivi ipiru vahe hari rupi yuvīraso. Ipare yamotarēhimbar Egipto pendar, “Ēgüe vahe avei” ehi yuvireco viña, i rumo opaño oyopi.

³⁰ Tüpa rese oyeroya pipe avei israelita oyerese siete ari rupi tecua Jericó rese, opa ñachisa onduru. ³¹ Tüpa rese oyeroya pipe avei Rahab, oyemondo-mondo tēi

vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güētave israelita Jericó ivi repiasar.

³² ¡Setá vite ambuae ava recocuer oime amombehu vahe rā pēu! Ipane ité rumo ari imombehupa āgua: Gedeón, Barac, Sansón, Jefe, David, Samuel iyavei opacatu Tüpa ñehe mombehusar recocuer. ³³ Evocoi avei Tüpa rese oyeroya pipe osecopi ité ambuae ivi pendar, oporocuai tupri güeco ñvisa pipe, oipisiño ité Tüpa suindar mbahe semimombehugüer yuvireco, oiyurumboyaño avei yaguar, ³⁴ ombogüe avei tata ipīrata vahe, oyeepi avei quise pucu pipe oyuca rāgüer sui; ava nipiratai vahecuer rumo oyemomirata yuvire-co, oyemoviracua ité vavasave oyese; opaño ité oamotarēhisar sundao osecopi yuvireco. ³⁵ Oime amove cuña ipāhuve vireco iri vahecuer omu manosa sui im-bogüerayevipri.

Ambuae rumo omanopaño ité teco rasisa pipe, “Yasē catu co nungar mbahe sui” ndehi eté yuvireco cuer-avevīsa aviye catu vahe pipe güeco āgua. ³⁶ Ambuae iparaisu catu ava upe oñeeroirosa pipe, onupasa pipe, oapīchi-pīchisa pipe, voquendasa pipe avei yuvireco.

³⁷ Ambuae ita pipe oapi-apisave omano, amove imom-bitesa ivira asiāsa pipe, anise ambuae yucasa quise pucu pipe, amove ipāhu pendar oguata tēi, ovesa, cavara pīrer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no.

³⁸ Evocoi seco catupri vahe yuvireco ndiyai co ivi pipen-dar Tüpa cuaparēhi upe vireco vahe rā oyepāhuve, ahe oguata tēi ivi iporupirēhīsa rupi, ivitri rupi, mbahecuar rupi avei yuvireco.

³⁹ Yepe ahe opacatu aviye ité Tüpa upe oyeroyasa rese yuvireco viña, ndoipisii eté rumo oyeupe Tüpa remimombehugüer yuvireco. ⁴⁰ Esepia, Tüpa omoime mbahe aviye catu vahe yandeu ‘oyoya tupri toipisi güe-cocuer ihivi tupri āgua che remimombehugüer rupi yuvireco’ ohesa pipe chupe, yandeu opacatu avei.

Yamahecua tupri yande yeroyasa pipe Jesús rese

12 Sese yande, yaicuase setá ité evocoi ava oime omboyecua vahe Tüpa rese oyeroyasa, iyacatu ité yaseyapa opacatu mbahe ndayande mbohe catui vahe Tüpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tüpa ombou vahe rese yandeu inungar ivava catu vahe. ² Yamahe tupri itera Jesús rese. Ahe ichui niha yareco yande yeroyasa Tüpa rese. Ahe avei oyese yande mboporeroya tupri catu. Oiporara curusu rese omano ochīhīsa pipe. Esepia, ahe oicua ité oparaisu pare virecora ovīharetasa, oguapise ombor-erecuasave Vu acato coti oī.

³ Pe avei catu, pepihañemoñeta Jesús recocuer rese; ahe oiporara ité mbahe rasícuer ava yangaipa vahe mara-mara tēi güerecose. Sese pecuerai eme Cristo rese peico āgua iyavei, “Ndorequerēhi iri” ndapeyeyi chira. ⁴ Esepia, pe ndapemano vitei eté angaipa upe pe yembopihavīracuasa pipe. ⁵ Peresarai eté Tüpa pe

mboaracuasa sui tahir ité pe recosa pipe; icuachiapri arachendar pipe aipo ehi:

“Che rahir, eyemoingatu voiño Yar nde mombaraisusa upe nde reco mohivi tupri água, iyavei, ‘Ndache-querêhi iri’ nderei chiveira chupe ndeu oñehe pĩratase.

⁶ Esepia, Tũpa osecomohivi tupri ava güembiaisu iyavei omombaraisu rane guahir sereco água” ehi. ⁷ Peñemosañu catu pe mombaraisusa upe pe reco mohivi água. Esepia, Tũpa êgüe ehise pẽu guahir ité pe rereco. ¿Oime pĩha que ñepeí ava guahir upe noñehe pĩratái vahe secocuer mohivi água? ⁸ Tũpa ndape recocuer mohivise inungar oyapo ambuae guahireta upe yepi, pe evocoyase inungar-ra chíhivahe ndiyesu-pai vahe, êgüe peye tẽi peico chupe. ⁹ Iyavei, chíhivahe tẽi vite yaicose, yande yesupa co ivi pipendar yande nupa yande recocuer mohivi água, ahese yamboetei. Sese yamboetei catura yande Ru Tũpa iva pendar tecovesa rereco água. ¹⁰ Yande yesupa co ivi pipendar opihañemoñetagüer rupi tẽi yande nupa yaicove raimi tẽise co ivi pipe; Tũpa rumo yande mombaraisu yandeu mbahe tupri água rese yande reco maranehi água inungar ahe ndaseco marai vahe. ¹¹ Supi eté yipindar, poronupasa yaipisí ramose, tasi yandeu. Coiye rumo yande imboyeroyasa pipe yayapo catura mbahe ihĩvi vahe. Ahe evocoyase yande recocuer rerecora mbahe tupri pipe.

Peicua catu Tũpa ñehe rendu potaẽhi sui

¹² Sese pemopoase iri pe reco pĩratasa iyavei peyemonguerẽhi iri pe guata água yande Yar rupi. ¹³ Ipare peseca peri ihĩvi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

¹⁴ Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepiai chietera yande Yar. ¹⁵ Peñearo tupri catu, tipo eme ava ndoipisii vahe Tũpa porovasasa pe pãhuve, iyavei tipo eme mbahe tẽi que ava piha pipe; aviyeteramo opacatu rese ova tiẽtera. ¹⁶ Tipo eme catu pe pãhu pendar oyemboaguasa tẽi vahe. Tipo eme avei ava Tũpa upendar mbahe viroĩro vahe pe pãhuve inungar Esaú aracahe. Ahe omondo Tũpa porovasasa oyeupendar tahir ipi güecosa resendar mimoi repirã tẽi vivri upe. ¹⁷ Iyavei peicua, ipare acoi Esaú oipisí pota Tũpa porovasasa vu sui viña. Ahe rumo ndiya iri eté sovasapirã secoi. Yepe oyasehó iteanga viña, ndiya iri eté rumo mbahe sembierecovi rãgüer mboyevi água chupe.

¹⁸ Peyemboyase Tũpa rese, ndahei inungar pe ramoí israelita arachendar. Esepia, ahe ivitri Sinaí sese yapoco vahe rese tẽi oyemboya vahe yuvireco; ahe ivitri rese sendí ité inungar tata rendigüer; oime pĩtu, pĩtumimbi vahe, ivitu ai avei sese. ¹⁹ Iyavei ndape-sendui mimbí imoñehepri, Tũpa ñehe avei. Arachendar rumo osendu ité yuvireco. Iñehe renduse rumo, osiquiyepave ndoipota iri ahe oyeupe ñehe yuvireco. ²⁰ Esepia, ahe oyembosiquiye ité evocoi porocuaíta

aipo ehi vahe sui: “Acoi opĩro vahe ivitri rese, yepe que mbahe mimba tẽi viña, ahe peyapi-yapi yuca ita pipe, anise lanza pipe avei” ehi. ²¹ Ahe mbahe oyecua vahe aipo oporombosiquiye vahe ité. Evocoyase Moisés tei-eté aipo ehi: “Che siquiyepave aririi eté” ehi.

²² Pe rumo peyemboya iva pendar ivitri Sión ve, Tũpa oicove vahe recuave. Ahe tecua Jerusalén iva pendar. Aheve Tũpa rembiguai setá iteanga vahe oñemonuha imboetei água yuvireco yepi. ²³ Iyavei peyemboya opacatu ava Tũpa rahir ipi Cristo reroyasar rese, ahe serer icuachiapri ivave. Peyemboya avei Tũpa rese, ahe niha yande recocuer rese oporandu vahe secoi; iyavei peyemboya ava seco aviye vahe espíritu yuvirecoi vahe rese. Ahe niha Tũpa osecomohivi tupri sereco.

²⁴ Peyemboya avei Jesús rese, ahe omoime yandeu Tũpa remimbotar ipiasu vahe, ahe suvi yande moatiro vahe. Ahe aviye catu yandeu Abel ruvi sui.

²⁵ Sese peicua catu, “Ndoroviroyai” peye vaheerã acoi pẽu oñehe vahe upe. Esepia, Moisés reroyaẽhisa pipe pe ramoí noñemi eté Tũpa ñemoirosa sui yuvireco, oyeupe, “¡Peicua catu!” ehise co ivi pipe aracahe. Êgüe ehise chupe yuvireco aracahe, êgüe ehi catu iri tiẽtera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu. ²⁶ Tũpa oñehe pipe omboririi eté ivi aracahe; cüritei rumo yandeu aipo ehi: “Che amboriri irira ivi, ndahei chira rumo ivi güeraño, iva avei amboririira” ehi. ²⁷ ‘Amboriri irira’ aipo oyapave aipo ehi: “Opara mbahe omii vahe omocañi güembiaipo Tũpa ‘topita apirẽhi mbahe nomii vahe’ oyapave” ehi. ²⁸ Tũpa mborerecuasa ombou vahe yandeu ahe nomii chietera. “Aviye ndeu” yahera evocoyase sese chupe; ipipe sui yayerure catu yande piha pipe chupe imboeteisave semimbotar rupi. ²⁹ Esepia niha, ahe inungar tata ñepeí reseve mbahe omocañipa vahe.

Mara yahera Tũpa mboviha

13 Ndapepoi chietera pe yeaisusa sui ñepeí-peí oyeivri nungar pe recosa pipe. ² Iyavei peresarai eme pe avasa sui ava oyepotase pe piri. Esepia, co nungar apo pipe amove ava omoingue Tũpa rembiguai güetave icuaẽhi pipe.

³ Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tẽi serecopri rese. Esepia, aviyeteramo êgüe ehi aveira pẽu.

⁴ Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tũpa oicuara oyemboaguasa tẽi vahe upe.

⁵ Ndahei guarepochi tẽi peipota raira. Iya rumo peyembovihaño mbahe pereco vahe rese. Esepia, Tũpa aipo ehi: “Ndoroeyai chietera, ndapoi chietera nde sui” ehi aracahe. ⁶ Evocoyase aipo yahera Yar rese yande yeroyasa pipe:

“Che Yar che pĩtivii, ndasiquiyei chietera ava tẽi sui oyapo potase mbahe cheu” yahera.

⁷ Peyemomahenduha pe roguatarar rese, pẽu Tũpa Ñehengagüer mombehusar rese avei. Pepihañe-

moñeta tupri secocuer rese, seco apri rese avei; iTüpa reroya agüer rupi tupri avei peico.

⁸ Jesucristo recocuer noñecuñaroi vahe ité, yipisuive secói apirēhi vahe. ⁹ Peyembopa ucai rene yembohesa co coti tēi vahe upe. Aviye catu yayemomirata Tüpa poroaisusa rese que mborocuaita tembihu resendar sui. Esepia, co nungar mbahe ndovireco ucai mbahe aviye vahe ohusar upe.

¹⁰ Yande rumo yareco ambuae ité Tüpa upe seropovēhepri. Ahe niha ndiyai eté pahi tūparo yipindar yuvirecoi vahe pendar yuvirohu. ¹¹ Supi eté judío pahi ivate catu vahe viroique mbahe ruvi tēi Tüpa rēta oi imaranehi catu vahe pipe seropovēhe ava angaipa terocua āgua; ahe mbahe mimba rete rumo osapi tecua ivii yuvireco yepi. ¹² Ēgüe ehi avei niha Jesús iparaisu, omano tecua ivii ava reco mbocatupri āgua vuvi pipe. ¹³ Ēgüe yahe aveira yasora Jesús upe yande paraisu āgua supi ava yande reroirosa pipe yaico. ¹⁴ Supi eté, co ivi pipe ndayarecoi eté tecua apirēhi vahe. Yande rumo yaseca evocoi tecua oime vahe rā yande curi. ¹⁵ Sese Jesús rembiapo rese iyacatu yamboeteira apirēhi vahe rā yande Yar Tüpa. Co imboeteisa inungar mbahe seropovēhepri ari rupi chupe. ¡Ēgüe yahera imboetei yande ñehe pipe! ¹⁶ Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovēhepri Tüpa upe. Ahe niha Tüpa oipota.

¹⁷ Pemboyeroya pe cuaisar, peyapo semimbotar. Esepia, ahe ndopituhui eté pe recocuer rāro yuvireco. Esepia, oicua Tüpa oicuara mbahe sembiapo rese chupe

curi. Sese pemboyeroya catu 'tayavai eme iporaviquisa chupe; tasorivete oporaviquisa rese yuvireco' pe yapave. Pemboavaise rumo, nosei chietera mbahe aviye vahe ichui pe recocuer upe nara.

¹⁸ Peyerure Tüpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave. ¹⁹ Che yevi pihavi āgua rese ité aporandu pe yeruresa rese pēu Tüpa remimbotar rupi.

Mahenduhasa ipa vahe

²⁰ Tüpa mbahe tupri rerecosar, ahe niha ombogüerayevi vahe yande Yar Jesucristo yande rārosar ivate catu vahe, suvi pipe omboyecua güemimbotar piasu ndopai vahe imbou yandeu, ²¹ tombou pe reco mohivisa iyavei pe reco aviyesa opacatu pe semimbotar apo āgua; iyavei ahe toyapo mbahe opacatu güemimbotar yande rese Jesucristo rembiapo sui. ¡Ēgüe tehi imboeteipri apirēhi tasecoi Cristo yepi!

²² Che rivireta, peñemosañō co che opomboaracua vahe rese, moviro tēi niha co ñehesa aicuachía pēu. ²³ Aipota pe peicua yande rivri Timoteo imosesa soquendasa sui. Oyepota pihavise, arasora cheyeupi che sose pe repia.

²⁴ Pemombehu che mahenduha opacatu ava pe cuaisar upe, opacatu ambuae Tüpa upendar ava upe avei. Ivi Italia rupindar avei ombou omahenduhasa yuvireco pēu.

²⁵ Aipo rupive, yande Ru Tüpa tape rovasa opacatu.

SANTIAGO

Mahenduhasa

1 Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbahecuasa ou vahe Tūpa sui

² Che rivireta, pevhareteñora peico acoi oimese tecoãhasa pëu yepi. ³ Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosã ãgua rese peico. ⁴ Peicoño ité pe reco ñemosasa pipe pe reco mohivi tupri catu ãgua. Evocoyase nipane iri chira mbahe Tūpa suindar pëu.

⁵ Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoyase ahe omboura chupe. Esepia, ahe opacatu upe mbahe ombou güecatëhiëhisa pipe iyavei ombahe mboasiëhisa pipe avei. ⁶ Iyacatu rumo evocoi ava oporandura Tūpa upe sese oyeroyã pipe, ndahei chira opihañemoñeta rerova-rova tëisa pipe inungar acoi ivitu i ombohitu-hitu tëi vahe. ⁷ Acoi ëgüe ehi-ehi tëi vahe ava ndoipisii chira mbahe yande Yar sui yuvireco. ⁸ Esepia, ñepei ari ipihañemoñeta ñepei mbahe rese, ambuae ari ambuae rese. Ndoymoviracuai güeco tupri ãgua rese yuvireco.

⁹ Iyavei que Jesús reroyasar seco mbegüe vahe toyembovhareteño yepi Tūpa omboeco ivate ãgua rese. ¹⁰ Iyavei mbahe yar secoi vahe pe pãhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri ëgüe ehi raimi tëi vahe yuvireco. ¹¹ Evocoyase acoi ari osëse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Ëgüe ehi aveira ava mbahe yar; omanora oporaviquisa sui.

Tecoãhasa, poroãtoisa resendar

¹² Acoi ava oyemoviracua vahe poroãtoisa upe oyembovhara oico. Esepia, osasa tuprise evocoi poroãtoisa, oipisira porerocosa, ahe tecovesa apirëhi vahe Tūpa ombou vahe guaisupar upe. ¹³ Acoi ava oyanduse poroãtoisa oyeupe mbahe tëi apo ãgua, "Tūpa revo ëgüe ehi cheu" ndehi chira. Esepia niha, Tūpa atoisar ndipoi eté mbahe tëi oyapo uca vaherã chupe. Iyavei ahe noñatoi avei mbahe tëi apo ãgua ava. ¹⁴ Co rumo ava opihañemoñeta rai upe oñeatoi uca mbahe tëi apo ãgua yepi. ¹⁵ Güemimbotarai pipe evocoyase oy-

apo angaipa. Ipare angaipa apo pipe sui ou manosa chupe.

¹⁶ Che rivireta, che rembiaisu, peyembopai rene. ¹⁷ Esepia, opacatu mbahe aviye vahe ahe Tūpa ombou vahe yandeu. Ahe niha opacatu iva rese mbahe aposar. Ndahei rumo güembiapo nungar secoi. Esepia, sembiapo oñecuñaro vahe. ¹⁸ Ahe rumo ombou ité tecovesa yandeu co ñehesa supi eté vahe pipe 'toyuvirecoi inungar yipindar mbahe miti ha seropovëhepri cheu opacatu che rembiapo sui' ohe-save yandeu.

Tūpa rese yande pihañemoñetasa supi tupri vahe

¹⁹ Iyavei che rivireta, che rembiaisu, peyemomahenduha co che ñehe rese: peyapisaca tupri voira ambuae ava ñehe rese, mbegüe rupi rumo peñehera chupe iyavei ndapembahemboasi voi tëi chiaveira. ²⁰ Esepia, yambahemboasi voi tëise, ndayayapoi Tūpa remimbotar. ²¹ Evocoyase peseya teco raisa, opacatu ambuae oime vahe mbahe naporai vahe pe pãhuve. Co catu pe yemominisave peroya catu vite Tūpa ñehe omoingue vahe pe piha pipe. Ahe niha vireco pīratasa pe pīsiro ãgua.

²² Pe rumo pemboaviyera co pe mbohe vahe ñehesa; ndahei acoi pesenduño tëira. Esepia, pesenduño tëise, pe ae peyembopara. ²³ Supi eté acoi ava osenduño tëise Tūpa Ñehengagüer, ipare rumo ndoviroyai, ahe inungar acoi ava osepiño tëi vahe vova yepiasa pipe.

²⁴ Ipare rumo oyepepise ichui, cūrteimi sesaraño ichui. ²⁵ Acoi ndasesarai vahe ité rumo güemiendu sui iyavei oyapisaca tupri vahe co mborocuita marañehi mbahe-mbahe tëi sui yande rerocua vahe rese iyavei oyemoviracuano ité vahe oyapo vaheã iporocuita, ahe oviharetera opacatu güembiapo tupri rese.

²⁶ Amove ava, "Che aguata tupri Tūpa rupi" ehi tëi. Ndoicuai rumo oñehe monguiriri ãgua. Evocoyase ahe ae oyembopa oico. Sembieroya evocoyase ëgüe ehi tëi vahe. ²⁷ Yarecose rumo yande rembieroya icatupri, nimarai vahe yande Ru Tūpa rovai, ahese yaipñivira co tirëhi, imer mano vahecuer avei iparaisusa rese. Iyavei ndayayapoi chira mbahe naporai vahe.

Ndayamboyoaviratii chira ava mboeteisa sereco

2 Iyavei no, che rivireta, pe peroya vahe yande Yar Jesucristo seco porañete vahe peico, ndapeyeaisu yoavii chira. ² Inungar-ra que ava mbahe yar oiquese pe ñemonuhasave viña, ahe icuã penda oro vahe, itu-

rucuar catupri ai vahe. Sese pehañeco tupri, “Eguapi co tenda aviye catu vahesave” peyera chupe. Ahe pipeve avei co oiques pe pãhuve iparaisu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña. ⁴ Evo-coiyase ãgüe peyese, peyapo mbahe ndoyoyai vahe, naporai vahe pe pãhuve ae iyavei peyeapo ava poravasar nungar peico pe pihañemoñeta raisa pipe.

⁵ Che rivireta, che rembiaisu, pesendu aipo ñehesa: Tũpa oiporavo ava iparaisu vahe co ivi pipe ‘toyuvirecoi mbahe yar nungar che reroyasa rereco’ oya, iyavei ‘toipisi che remimombehugüer rupi che mborerecuasa oyeupe nara’ oyapave guaisupar upe. ⁶ Pe rumo seroïrosa pipe pemochi ava iparaisu vahe. ¿Ndahei vo mbahe yar mara-mara tẽi pe rereco yuvireco yepi? Ahe niha pe mbotiriri mborerecuar rovai pe reraso yuvireco yepi. ⁷ Ahe avei niha oñehe-ñehe tẽi seroïrosa pipe yande Yar yaroya vahe rer imboyeroyapri rese yuvireco.

⁸ Supi eté yayapo mbahe aviye vahe yamboaviyese mborocuita ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe. ⁹ Acoi yayeaisu yoavirati tẽise rumo, ahese yayapo angaipa, yayavi mborocuita Tũpa rovai. ¹⁰ Esepia, acoi ava viroya vahe opacatu mborocuita, ipare rumo oime que ñepei nombaviye tupri vahe, ahe oyavi opacatu mborocuita. ¹¹ Esepia, Tũpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyucaï chira no” ehi. Yepe acoi ndapeyemboaguasai chira viña, pe poroyuca pipe rumo, peyavi mborocuita. ¹² Evocoyase peñehe tupri iyavei peico tupri aveira. Esepia, oporandura yande recocuer rese yande Yar oporocuita pipe güeru vahe yande reco tupri ãgua. ¹³ Supi eté acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pipe mborandusave curi.

Yamboaviye itera mbahe; ndahei chira yande ñehe tẽi

¹⁴ Che rivireta, ¿aviyera piña acoi ava, “Ayeroya yande Yar rese” ehi tẽi vahe, ndoyapoise mbahe aviye vahe yuvireco? ¿Oicatura piña ahe oñepisiro aipo ohe pipe tẽi yuvireco? ¹⁵ Inungar-ra oimese que yande rivri, anise yande reindri upe ipanera iturucuarã, semihura ari yacatu rupindar viña. ¹⁶ Evocoyase que pe aipo peyeñora chupe viña: “Aviye, eso tupri eico. Eyeao eso sõihsagüer sui, ecaru tupri” peyera. Ipore rumo ndapemondoise mbahe ipane vahe chupe, ¿aviyera piña ava upe aipo yande he tẽi viña? ¹⁷ ãgüe ehi avei, “Ayeroya yande Yar rese” yande hesa; ndayayapoise rumo mbahe aviye vahe aipo yande hesa pipe, aipo vahe tẽi yaico.

¹⁸ Aviyeteramo ava pe pãhu pendar aipo ehira cheu: “Nde ereyeroa yande Yar rese, che rumo ayapo mbahe tupri” ehi. Che evocoyase aipo ahera chupe: “Emboyecua ru nde yeroyasa mbahe nde rembiapoẽhi pipe. Evocoyase che amboyecua che yeroyasa oime

vahe che rembiapo pipe ndeu” ahera. ¹⁹ Nde niha aipo, “Che aicua oime ñepei Tũpa” ere. Supi eté aipo ere. Co rumo caruguar avei oicua. Ichui osiquiyepave rumo ahe oririi eté yuvireco. ²⁰ Mbia, tapeico eme ndayaracuai vahe! ¿Ereicua vo co nde mbahe apoẽhisa nde yeroyasa ãgüe ehi tẽi vahe? ²¹ Esepia, Tũpa oipisi yande ramoi Abraham seco tupri pipe oicuavẽhese porerocosa nungar guahir Isaac chupe aracahe. ²² Indó, Abraham yeroyasa omboyecua ité güembiapo catupri reseve. Evocoyase ãgüe ehi ahe güembiapo tupri pipe omboaviye tupri oyeroyasa oico aracahe. ²³ ãgüe ehi yaviye icuachiapri aipo ehi vahe: “Abraham viroya ité Tũpa, evocoyase, ‘Co seco catupri vahe’ ehi Tũpa ipisi” ehi. Ahese ava, “Abraham Tũpa mboripar ité” ehi yuvireco chupe.

²⁴ Indó, Tũpa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño. ²⁵ ãgüe ehi tupri avei cuña ndipihai vahe Rahab upe. Esepia, ahe omoingue ñuvirio ava ivi repiasar imondopri güeta pipe, ipare oñomi imondo ambuae peri rupi yamotarẽhisar sui. Ipipe sui Tũpa oipisi inungar-ra seco ñvi tupri vahe viña. ²⁶ ãgüe ehi yande rembiapo catupri ndayamboyecuaise yande yeroyasa pipe, ahe inungar avei Espiritu ndasecoise yande rese, yande yeroyasa evocoyase omano tẽi eté oico.

Yande ñehe resendar

3 Che rivireta, yipindar ndapeyeapoi chira setá etepri oporombohe vahe peyepãhuve. Esepia, peicua niha yande oporombohe vahe yaicose, Tũpa oporandu catu itera ambuae ava sui yande porombohe agüer rese yandeu curi. ² Opacatu yande yayavi setá mbahe rese yepi. Oimese que ava ndoyavi vahe oñehe, ahe ava seco ñvi tupri vahe. Iyavei oicua tupri opacatu güeco rereco tupri ãgua. ³ Inungar acoi yamondose cavayu yuru penda sese seroguata ãgua. Ahese opacatu cavayu retecuer yaicatu imboyahuva ãgua. ⁴ Inungar tupri avei carite guasu, yepe tuvicha iyavei yepe ivitu omoañii opiratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi. ⁵ ãgüe ehi avei yande ãpecu, yepe chihimi tẽi viña, ipipe rumo yayapo tẽi mbahe tuvicha vahe ava upe. Inungar avei que tata chihimi vahe sui tẽi yuvi guasu opa ocai. ⁶ ãgüe ehi yande ñehesa tata nungar. Iyavei yande ãpecu pipe opacatu mbahe-mbahe tẽi yamombehu. ¡Evocoi mbahe-mbahe tẽi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehe tẽisa caruguar suindar. ⁷ Ava oicatu opacatu mbahe mimba nimasoi vahe mboaracua ãgua, vïrai, mboi iyavei mbahe ipi para guasu pipendar avei no. ⁸ Ndipoi eté rumo que ava oipoepi vaherã oñehe. Yandeu ndiyai eté ipoepi ãgua. Yande ñehesa oporoyuca vahe nungar ité yepi, mbahe tẽi eté. ⁹ Co yande ãpecu pipe yamboetei yande Yar Tũpa, ipipe avei rumo yamomara ava, ahe ava rumo Tũpa oyapo onungar. ¹⁰ ãgüe ehi eté, yande ñehe pipe yamboetei Tũpa, ipipe avei

yaroïro ava. Che rivireta, ndiyai evocoi nungar mbahe yayapo yepi. ¹¹ ¿Oicatura pïha osë ñepei i ohë vahe sui sêhe vahe, iro vahe avei viña? ¹² ¿Ihara pïha higuera ivira rese aceituna viña? ¿Iyavei oicatura pïha uva hi rese oha higo viña no? ¡Aní, ndoicatui eté! Iyavei ndoicatui ñepei i ohë vahe sui osë i, sêhe vahe sêhe asi vahe reseve.

Mbahecuasa supi eté vahe

¹³ Acoi oimese pe pãhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecuata tuprisa pipe. ¹⁴ Oimese rumo pe pihave pe poroamotarêhisa mbahe pota raisa pipe, iyavei peyeupe nara tēi mbahe peseca, ahese ndiyai peyembovïha tupri tēi 'che yaracuá vahe aico' pe yapave. Esepia, peremira tēira supi eté vahe mbahe rese. ¹⁵ Ēgüe ehi eté evocoi nungar aracuasa ndahei Tūpa suindar. Ahe rumo co ivi pipendar tēi vahe, ava pihañemoñeta sui tēi osë vahe iyavei caruguar suindar tēi avei. ¹⁶ Esepia, poroamotarêhisa yande mbahe pota raisa pipe yarecose iyavei yaipotase mbahe yandeyeupe nara tēi, ichui osë ñehepoepisa iyavei opacatu mbahe tēi. ¹⁷ Acoi vireco vahe rumo Tūpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asii chiaveira. Iyavei oyemoingatu voi vahe, ahe oporoparaisuereco vahe, nomboyoviratii vahe güecocuer. Ahe ipihañemoñetasa ñepei reseve vahe iyavei oyapo tupri vahe mbahe. ¹⁸ Iyavei acoi oseca vahe mbahe tupri yepi, oipisi itera opïha pipe teco ñvisa.

Co ivi pipendar mbahe raisusa

4 ¿Que sui pïha ou vavasa iyavei ñehepoepi-episa pe pãhuve? Ahe ou pe mbahe pota raisa sui pereco vahe pe pihañemoñetasa pipe. ² Pe peipota rai mbahe. Ipare rumo ndapeicatui sereco ãgua. Evocoyase peporoyuca pe mbahe pota raisa pipe. Ndiyai eté rumo pëu sereco ãgua. Ipipe sui peyeecoãha, pevava avei no. Ndapeyosui eté rumo mbahe pe remimbotar. Esepia, ndapeporandui Tūpa upe. ³ Acoi peporanduse rumo sese, ndapeipisii. Esepia, peporandu rai tēi, peipota pe yembovïha ãgua rese nara tēi. ⁴ ¡Pe mbia, peyavi vahe pe recocuer! ¿Ndapeicuai vo acoi ava Tūpa cuaparêhi mboripar tēi yuvirecoi vahe, ahe Tūpa amotarêhimbar yuvirecoi? Ēgüe ehi eté acoi oipota vahe co ivi pipendar mbahe-mbahe tēi pipe güeco ãgua, ahe oyeapo Tūpa amotarêhimbar. ⁵ Supi eté Tūpa Ñhengagüer aipo ehi: "Tūpa osaisu güecatêhisa pipe o Espíritu omondo vahe yande pïha pipe" ehi. ⁶ Ahe rumo yande pñtivii catu oporoaisusa pipe. Esepia, icuachiapri arachendar pipe aipo ehi: "Tūpa oyamotarêhi ava oyeecomboivate ai vahe. Oipñtivii rumo seco mbegüe vahe saisusave" ehi. ⁷ Sese pemboyeroya catu Tūpa. Peyemoviracua caruguar remimbotar apoêhi ãgua. Ahese ahe oyepepira pe sui. ⁸ Peyemboya Tūpa rese, ahe evocoyase oyemboyara pe rese. Pe, angaipa viyar, ¡peñemoatiro mbahe

peyapo vahe sui! ¡Iyavei pemoatiro pe pihañemoñetasa ñuvirio pereco vahe sui! ⁹ ¡Tatasï pëu, tapeyaseho, perorivete iri eme, pemboasi pe angaipa pe yembovïharêhise! ¹⁰ Peñenopïha Yar rovai imboyeroya pipe. Ahe evocoyase pe reco mboivatera.

Peroïro eme pe mboetasas

¹¹ Che rivireta, aní chira peñehe mara peyeupe. Acoi oñehe rai vahe iyavei vïroïro vahe ambuae Jesús reroyasar, ahe oñehe rai tēi aveira mborocuita rese seroïrosave. Ēgüe peyese, evocoyase seroyaêhisa pipe peyemboivate catura mborocuita sui viña. ¹² Oime rumo ñepeiño ité ombou vahe mborocuita yandeu iyavei oporandu vahe yande recocuer rese. Ahe güeraño avei oicatu oporopñsiro iyavei oporomocañi ãgua no. Evocoyase pe, ¡ndiyai pe cotindar reroïro ãgua pëu!

Ndayaicuai mbahe oime vahe rã yandeu ayihive

¹³ Pesendu pe aipo peye vahe: "Cūrítei, anise ayihive yasora que tecuave, anise que tecua guasuve revo. Aheve yaicora ñepei araviter yande poraviqui ãgua. Ahese yamogana catura guarepochi" aipo peye vahe. ¹⁴ ¡Ndapeicuai rumo mbahe oime vahe rã pëu ayihive! ¿Mara ehi pïha yande recocuer? Ahe inungar ñvichi oyecua raimi tēi vahe, ipare opaño ocañi. ¹⁵ Iyacatu aipo peyera viña: "Oipotase yande Yar yande reco ãgua, yayapora co nungar mbahe, que ambuae mbahe" peyera yepi. ¹⁶ Pe rumo peñeheño pe yemboivate aisa pipe mbahe pe rembiaporã rese. Opacatu evocoi nungar mbahe rumo naporai. ¹⁷ Esepia, acoi oicua vahe mbahe tupri apo ãgua, ipare rumo ndoyapoi eté, ahe oyapo angaipa.

Imbahe eta vahe paraisusa resendar

5 ¡Pe mbahe yar, pesendu co: peyaseho iyavei perãse! Esepia, peiporarara mbahe tēi peico. ² Opacatu pe mbahe eta ocañi tēi vahe rã. Esepia, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi. ³ Pe oro, pe guarepochi opa opochi ati-ati no. Ahe niha pe recoãha ãgua, omboyecua vahe mbahe tēi pëu. Iyavei pe mbahe pota raisa ndoyavii pe roho ocai vahe vireco. Esepia, pemonuha guasu tēi mbahe pereco ati vahe sereco co ari ipa vahe pipe. ⁴ Peyapisaca, acoi oipoho vahe mbahe pëu nara yuvireco, chupe ndapemboepii eté. Sese sãsé tēi yuvireco. Ahe rumo yande Yar ipirata vahe, ivate catu vahe oicua. ⁵ Co ivi pipe tēi pe peyeecomendiyai peico iyavei peyembovïha co ivi pipendar mbahe rese inungar guaca imonguirapri yuca ãgua. Ipipe peyemoingatu pe cañi ãgua. ⁶ Pe ñehe pipe pemombaraisu ava ndoyapoi vahe mbahe yuvireco; yepe, "Mara" ndehi yuvireco pëu viña, pe rumo peyucãño.

Ñemosasa iyavei yeroquisa resendar

⁷ Che rivireta, peñemosañño yande Yar yevi iri ãgua rese. Inungar ava omaheti vahe osãro rane güemiti poho ãgua. Esepia, ahe osãro yipindar oqui vahe iyavei ipa oqui vahe mbahe miti aviye ãgua. ⁸ Pe avei peñemosañño, peyemonguerẽhi catu. Esepia, cõimi eté yande Yar yevi ãgua cute.

⁹ Iyavei che rivireta, peñemoiroi rene peyeupe. Evo-coiyase Tũpa ndoporandui chira co mbahe rese pẽu. Esepia, mborerecuar guasu iva pendar oyemoingatu voi ohã yandeu porandu ãgua. ¹⁰ Che rivireta, peico catu inungar Tũpa ñehe mombehusar aracahendar yuvirecoi vahe. Ahe oñemosañño mbahe rasicuer upe yande Yar rer pipe oñehe ãgua yuvireco. ¹¹ Yande rumo yaicua sovasapri ava oñemosañño vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviye vahe yande Yar oyapo chupe. Yande Yar niha oporoparaisuereco vahe.

¹² Che rivireta, peyapisaca tupri catu co che ñehe rese. Pe ñehe ãgua ndapeiporui chietera que iva rer iyavei que ambuae mbahe pe ñehe reroya uca ãgua. Iyacatu rumo, "Supi eté" peyese, supiño itera; "Aní" peyese, aní chiño itera Tũpa poronupasa pisiẽhi ãgua.

¹³ Aviyeteramo que pe pãhu pendar iparaisura oico; toyoeroqui. Aviyeteramo oimera que sorivete vahe oico; ahe tosapucái Tũpa upe. ¹⁴ Aviyeteramo que ava imbaheasira oico, toñehe evocoyase Jesús reroyasar rãrosar upe. Ahe tomondo aceite yande Yar rer pipe yuvireco sese. Ipare toviroyeroqui yuvireco. ¹⁵ Acoi oyoeroquise oyeroyasa pipe sese yuvireco, imbaheasi vahe evocoyase ocuerara; yande Yar avei omopuhara. Acoi angaipa virecose, oime aveira ñerosa chupe. ¹⁶ Sese pemombehu pe angaipa peyeupe, peyeroqui avei peyese pe yembogüera tupri uca ãgua. Ava aviye vahe oyoeroquise oquerẽhisave opacatu güecocuer pipe, ahe iyeroquisa ipĩratá ité. ¹⁷ Acoi Tũpa ñehe mombehusar Elías yande nungar avei. Ahe oporandu oyoeroquisa pipe Tũpa upe, "Toqui eme" ehi. Aipo ehise, ndoqui eté ivi harive mbosapri araviter imombitesa rupi. ¹⁸ Ipare oyoeroqui iri, ahese oqui iyavei mbahe miti iha iri.

¹⁹ Che rivireta, acoi oimese oyahuva vahe supi eté vahe sui pe pãhuve, ipare ambuae viroyevise Jesús upe, ²⁰ tapeicua pe acoi viroyevi vahe angaipa viyar secocuerai sui, oipĩsiro ihã imano rãgüer sui. Iyavei omoime ñerosa tuvichá vahe yangaipa upe. Aipo rupive.

1 SAN PEDRO

Pedro mahenduhasa Jesús reroyasar opacatu rupi oñemosai vahe upe

1 Che, Pedro, Jesucristo apóstol aicuachía co che ñehe pëu, pe Tüpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. ² Supi eté pe yande Ru Tüpa rembiporavo yipisuive peico semimbotar rupi. Evocoyase oEspíritu Santo pipe pe peha oyeupe nara viroyasar pe reco água 'imoatiroprí toyuvirecoi che Rahir ruvi pipe oangaipagüer sui' oya. Peipisi catu Tüpa porovasasa pe reco tupri água.

Tüpa suindar mbahe aviye vahe rãrosa

³ ¡Imboeteipri tasecoi Tüpa, yande Yar Jesucristo Ru! Ahe niha oporoparaisuerecosa pipe yande recocuer mbopiasu. Ēgüe ehi yandeu Guahir Jesucristo ocuerayevisé. Ipipe sui yaicuaño ité oimera mbahe aviye vahe Tüpa suindar yandeu. ⁴ Ipipe sui avei Tüpa oipisi ucara pëu pe mombahesa ivave yapocatupri nocañi vaherã, ndituyui vaherã iyavei ndopai vaherã ité. ⁵ Pe peyeroya ité Tüpa rese. Sese niha ahe opiratasa pipe pe repi mbahe tēi sui poropširosa pe reco água. Ahe vireco vahe imoingatupri ari ipa vahe mboyecua água pëu.

⁶ Co rese peyembovihareteño peico, yepe cūritei pe reco pipe peparaisu pucu raimi tēi setá pe recoãhasa pipe peico viña. ⁷ Esepia, pe yeroyasa Tüpa rese aviye oro, ahe sãhasa tata pipe yepi. Ēgüe ehi aveira pe recocuer sãhambri tata nungar mbahe yavai vahe pipe, "¿Aviye vahe ité pñha?" hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaherã sui. Ēgüe yahese, "Che rese pe yeroyasa aviye ité" ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevisé curi.

⁸ Pe niha pesaisu yande Yar Jesucristo, yepe ndapesepiai viña; cūritei rumo sepiaēhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu. ⁹ Esepia niha, pesupiti pe remiario poropširosa apirēhi vahe peico pe yeroyasa pipe.

¹⁰ Aracahe suive ava Tüpa ñehe mombehusar oicua tupri pota ité co poropširosa resendar yuvireco '¿mara ehi eté pñha co tecocuer?' oyapave yuvireco. Iyavei oñemoñeta yuvireco Tüpa oporoaisusa pipe pëu mbahe ombou vaherã rese. ¹¹ Cristo Espiritu senondeve oicua uca mbahe Tüpa ñehe mombehusar upe aipo

ehi: "Poropširosar oyemombaraisu ranera, ipare rumo teco orisa porañete vahe oimera" ehi chupe aracahe. Sese, "¿Umara pñha evocoi mbia?" ehi; "¿Mbahesera vo oimera co Espiritu remimombehu yandeu?" ehi yuvireco. ¹² Tüpa rumo omboyecua chupe, ndahei chupe nara ité imombehupri yuvireco, pëu nara ité rumo. Ahe avei niha poropširosa resendar ñehesa mombehusar omombehu pëu cūritei, Espiritu Santo pñratasa pipe imboupri iva pendar yandeu. ¡Tüpa rembiguai avei oicua tupri pota tēi cūritei yuvireco viña!

Tüpa yande poravo yande reco maranehi água

¹³ Sese pe pihañemoñeta tuprisa pipe pemahemoha tuprira peyese Tüpa porovasasa pëu ombou vaherã rese pe yeroya catu água acoi Jesucristo oyevisé curi.

¹⁴ Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tüpa recocuer cuaēhi vitesese. ¹⁵ Peicora rumo pe reco maranehisa pipe ité. Esepia, Tüpa pe poravo oyeupe nara; ahe ndaseco marai vahe ité. ¹⁶ Supi eté icuachiapri arachendar pipe aipo ehi imombehu: "Pe tapeico seco maranehi vahe. Esepia, che ndaseco marai vahe aico" ehi.

¹⁷ Tüpa niha opacatu ava upe secocuer rese nomboyoaviratii chira oporandu curi, sese pe, "Che Ru" peye vahe chupe peyembosiquiyera mbahe tēi apoēhi água imboeteisave co ivi pipe peico vitesese. ¹⁸ Esepia, Tüpa pe pñsiro arachendar pe ramoi suindar aracuasa ēgüe ehi tēi vahe sui. Peicua tupri ité niha co poropširosa repri nimboepisai eté que mbahe ocañi tēi vaherã pipe inungar oro, anise guarepochira viña. ¹⁹ Imboepisa rumo Cristo ruvi maranehi pipe. Ahe seropovēhepri, inungar ovesa nimarai vahe. ²⁰ Ahe Tüpa oiporavo aracahe ivi, iva apoēhi vitesese ēgüe ehi vaherã. Cūritei rumo oyemboyecua pëu mbahe tupri água. ²¹ Secocuer sui niha peroya Tüpa peico, ahe ombogüerayevi vahe omano vahe pãhu sui, ipare omondo oyemboeteisa, güeco porañetesa avei chupe. Ipipe sui peyeroya Tüpa rese iyavei pesãro co mbahe aviye vahe pisi água ichui.

²² Cūritei Tüpa Ñehengagüer supi tupri vahe mboyeroyasa pipe imoatirosa pe recocuer pesaisu vaherã ambuae Jesús reroyasareta. Evocoyase ēgüe peyera peyeaisu catu opacatu pe pihañemoñeta tuprisa pipe, iyavei opacatu pe pñratasa pipe. ²³ Pe niha pereco tecovesa piasu, ndahei pe yesupa omano tēi vahe suindar. Ahe rumo Tüpa Ñehengagüer supi tupri

apirēhi vahe reroya pipe. ²⁴ Esepia, icuachiapri arachendar pipe aipo ehi:

“Opacatu ava inungar caha, iyemboeteisa evocoyase inungar ipotri.

Ipape ahe caha opa omano, ipotri avei opa oviapi; ²⁵ Tūpa Ñehengagüer rumo apirēhi vaherā ité yepi” ehi.

Ahe co ñehesa imombehupri poropĩsirosa resendar pēu nara.

2 Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar. ² Inungar pĩtanimi ocuacua āgua oipota cambi; ěgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropĩsirosa pipe, ³ que peicua itese yande Yar reco aviyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo oviroĩroño yuvireco. Tūpa rumo ahe ita oiporavo aviye catu vahe. ⁵ ěgüe ehira pe rereco oyeupe inungar ita ndopai vahe; ipipe sui omopuhara otūparoguā pe rese. Iyavei pahi ndaseco marai vahe nungar peicora semimbotar rupi chupe. Pe evocoyase Jesucristo rembiapo pipe sui peyapora Espĩritu upendar mbahe aviye vahe. Ahe inungar mbahe seropovēhepri aviye vahe Tūpa upe. ⁶ Esepia, icuachiapri arachendar pipe aipo ehi:

“Che amondo ñepe ita nungar ava aviye vahe tecua Sión ve imoviracua āgua.

Ahe che rembiporavo iporañete vahe, imboeteipri. Acoi oyeroyá vahe sese, ahe nochĩ chietera ichui” ehi.

⁷ Pe seroyasar peico vahe upe evocoi ita aviye vahe ité. Seroyasarēhi upe rumo imboaviyesa co ñehesa aipo ehi vahe:

“Oĩ aposar rumo viroĩroño co ita yuvireco.

Ahe ita rumo coiye vĩracuasa aviye catu vahe” ehi. ⁸ Iyavei omboaviye aipo ñehesa:

“Co ita oipĩhapi oitĩ uca ava” ehi. Esepia, Tūpa suindar ñehesa reroyaēhi pipe sui oyemondo uca mbahe tēi pipe yuvireco. ěgüe ehi vaherā ité rumo ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imborerecuasa upendar pahi, iyavei chupendar ava seco maranehi vahe peico. ěgüe peye Tūpa reco pĩratasa mombehu āgua peico. Esepia, ahe pe renose pĩtumimbisa nungar pe recocuerai sui tesapesa aviye vahe pipe pe reique āgua. ¹⁰ Yipindar ndahe vitei eté Tūpa upendar ava peico, cūritei rumo ahe ité peico; yipindar ndaperecoi Tūpa poroparaisuerecosa, cūritei rumo pereco ité cute.

Peico catu Tūpa mboetei āgua

¹¹ Che rivireta, che rembiaisu, peico raimi tēi vahe co ivi pipe, pepoi opacatu co ivi pipendar pe pihañemoñeta raisa sui. Esepia, pemomara uca tēi pe re-

cocuer ipipe. ¹² Pereco tupri pe recocuer aviye vahe ava Tūpa ndoicua vitei vahe rovaque. Yepe ava remieroĩro peico inungar-ra mbahe tēi aposar viña, os-epiase rumo pe rembiapo catupri, omboeteira Tūpa yuvireco ahe arĩ pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe, ¹⁴ anise yivirindar. Ahe pe recua pipendar rārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua. ¹⁵ Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiēhi āgua.

¹⁶ Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tupri rumo Tūpa rembiguai pe recosa pipe. ¹⁷ Pemboeteira opacatu ava. Pesaisu catu pe rivireta Jesús reroyasar; pemboetei Tūpa; pemboyeroya avei mborerecuar guasu.

Yembohesa yande Yar Jesucristo mombaraisu agüer resendar

¹⁸ Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco pōrai vahe avei. ¹⁹ Esepia, aviye catu yañemosase mbahe-mbahe tēi ava rembiapo upe Tūpa mboyeroya tuprisa pipe. ²⁰ Mbahe tēi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipape peñemosase chupe, ahe rumo aviye catu itera Tūpa upe. ²¹ Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ěgüe ehi pe rese pe secocuer moña āgua. ²² Ahe ndoyapoi vahe ité angaipa iyavei ndoporombopai vahe ité. ²³ Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ĩvi vahe oicuaru chupe yuvireco” ehiño oyeupe mbahe-mbahe tēi aposar upe. ²⁴ Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco ĩvisave’ oyapave yandeu. Ahe niha yapichapri secoi pe recocuer moingatu āgua. ²⁵ Esepia, pe niha yipindar inungar ovesa ocañi tēi vahe peico viña. Cūritei rumo peyevi Cristo upe. Ahe pe recocuer osāro cūritei inungar ovesa rārosar.

¿Mara ehira ava omenda vahe recocuer yuvireco?

3 ěgüe peye aveira cuña, pemboyeroya itera pe mer. Esepia, amove ndoviroya vitei Tūpa Ñehengagüer yuvireco; pemboyecuae rumo pe reco tuprisa imboeteisa avei chupe, aviyeteramo ahe avei viroyara, yepe ndapeñehei chira chupe viña. ³ Acoi pemboyecua potase pe yemoporañetesa ndahei chira pe rete rese

inungar oãca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe. ⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiñhisa pipe. Evocoi nungar aviye catu ité Tüpa rovaque.

⁵ Ègüe ehi avei cuña seco catupri vahe güeco porañetesa imboyecua aracahe. Ahe oyeroya Tüpa rese yuvireco, omer avei omboyeroya yuvireco. ⁶ Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeñhisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tüpa omboura güeco tuprisa pipe tecovesa apirēhi vahe oyoya voi pēu. Ègüe peyese, Tüpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepeñe oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe. ⁹ Oyapose ava que mbahe tēi pēu, anise que oñehe raise, ndapemboyevii chira chupe. Iyacatu rumo mbahe tuprisa pipe pemboyevira chupe. Evocoi nungar mbahe apo āgua niha Tüpa pe poravo ‘toipisi che porovasasa’ oyapave. ¹⁰ Esepia,

“Peipotase pe recocuer aviye tupri āgua pe yemboviaharetasa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviye vahe.

Peseca teco tuprisa peyeupe nara, peguata supi.

¹² Esepia, supi eté, yande Yar osāro ava seco catupri vahe iyavei osendu oyeupe yeruresa.

Ava mbahe tēi aposar rumo ndoipisii eté” ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerēhise mbahe aviye vahe apo. ¹⁴ Peparaisuse rumo mbahe pe rembiapo aviye vahesa rese, ¡sovasapri peico! Peyembosiquiyei rene que ava sui. ¹⁵ Pemboeteiñora rumo Cristo pe Yar secosa rese pe piha pipe. Peyemoingatu voira ava pe remiario rese oporanduse pēu pe querēhisa pipe imombehu tupri āgua. ¹⁶ Ègüe peyera rumo pe reco mbegüesa pipe imboetisave. Peico tuprira pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tüpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgüer sui.

¹⁸ Esepia niha, Cristo teieté omano yande angaipa repirā ñepeñe reseve. Güeco maranehi pipe ègüe ehi ava recocuerai rese opacatu pe reraso āgua Vu Tüpa upe. Ahe omano güete rese. Ipare rumo ocuerayevi güeco espíritu pipe. ¹⁹ Güeco espíritu pipe avei oso, omombehu Vu Tüpa remimbotar ava hā soquendapri yuvirecoi vahe upe. ²⁰ Ahe ava Noé recosendar ndi-

poreroyai vahe yuvireco aracahe. Tüpa osāro güeco mbegüesa pipe secocuer moingatu āgua viña Noé oyapo viteseve arca oico. Ahe ipipe oñepisiro ochomi tēi yuvireco amarusu sui. ²¹ Ahe i osāhangapo i poroāpiramosa, ahe omboyecua yande ipñisiroprī yande recosa. Poroāpiramosa rumo i pipe ndahei yande rete moatiro āgua. Co rumo yaporandura Tüpa upe, yande pihañemoñetasa moatiro āgua. Ipipe sui evocoiyase yañepisiora yande Yar Jesucristo cuerayevisa pipe. ²² Ahe oso ivave oguapi oñ Vu acato coti. Opacatu sembiguai eta, mborerecuareta, opacatu imborerecuasa ipirata vahe avei ipovri pendar yuvirecoi.

Yandehañeco yandeyese mbahecuasa Tüpa suindar yaipisi vahe pipe

4 Cristo oiporara mbahe rasicuer güete rese. Pe avei evocoiyase peyemoingatu voi ègüe peye vahe herā peico chupe nara. Esepia, acoi ava oyemomborara vahe güete pipe oseyā angaipa yuvireco. ² Ipipe sui ndoyuvireco iri chira ari rupi ava tēi pihañemoñetasa pipe. Tüpa remimbotar rupi eté rumo oyapo pota mbahe co ivi pipe yuvirecoi vitese. ³ Ègüe peye pucurane niha pe rembiapo ai pipe peico ava Tüpa reroyasarēhi recocuer nungar rupi tupri. Ahese mbahe mbahe tēi peyapo pe pihañemoñeta raisa pipe, savai-posita, pietasave pe rāse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico. ⁴ Cüritei rumo pe mboriparer, ndoyemboviihā tēi pe rese, ndapeico irise supi semimbotarai apo āgua. Ahe oñehe-ñehe tēi yuvireco pe recocuer piyasu rese. ⁵ Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu āgua omano vahe upe, oicove vite vahe upe avei curi. ⁶ Sese niha co ñehesa pñisirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirā, iespíritu rumo yuvirecoi apirēhi inungar Tüpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tuprisa pipe. ⁸ Co catu opacatu tupri ité peyeaisura pe piha pipe. Esepia, ègüe yahera poroaisusa pipe yande ñero voira seta ava yangaipa vahe upe. ⁹ Peipisi tupri ava yuvirasō vahe pe rētave; “¿Mbahe rese piha co ou?” peyei rene pe pihañemoñeta pipe pe piri ou vahe upe. ¹⁰ Ñepeñe-pe yande yaiporura Tüpa suindar mbahecuasa yareco vahe ambuae Jesús reroyasar rese hañeco tupri āgua. Yaiporu tuprira co Tüpa porovasasa setā vahe yande cuaita mboaviye tupri āgua. ¹¹ Acoi pemombehuse Tüpa suindar mbahe, pemombehura inungar iñehe ité; acoi peporopñivii potase, peyapoño opiratasā pēu Tüpa ombou vahe pipe. Opacatu mbahe peyapo vahe peyapo ‘tomboetei ava yuvireco Tüpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. Ègüe tehi apirēhi vahe herā ité.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tēi yande recoãhasa pēu 'ndoyavii, ndipoi chietera evocoi nungar mbahe cheu viña' pe hesa pipe. ¹³ Yayembovihareteñora rumo ipipe. Esepia, yande rereco yande Yar yemombaraisu agüer nungar pipe yuvireco. Evocoiyase yayemboviharete itera acoi yande Yar oyevise güeco pīratasa pipe. ¹⁴ Iñehe marase yuvireco pēu Cristo reroyasar pe recosa rese, sovasapri peico. Esepia, Tūpa Espíritu güeco porañetesa pipe secoi eté pe rese. ¹⁵ Acoi pe pāhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tēi aposa rese. Ndahei chiaveira que ambuae ava mbahe rese iñemañeco tēisa sui ēgüe ehira serecosa. ¹⁶ Co rumo acoi peparaisuse Cristo reroyasar pe recosa pipe, ndapechī chietera. Pesapucaira rumo Tūpa upe imboeteisa pipe serer pereco vahe rese.

¹⁷ Esepia, oyepota ité arī Jesús reroyasar upe rane ité tecocuer rese porandu āgua. Ēgüe ehise yandeu, mbahe tēi catu itera Jesús reroyasarēhi upe. ¹⁸ Yavaise seco catupri vahe upe iñepisiro āgua, ¿mara ehira pīha ava ndaseco pōrai vahe ava angaipa viyar yuvirecoi vahe upe? ¹⁹ Sese peyemomborarase Tūpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hā rāro āgua. Esepia, ahe niha yeroyasa ité secoi.

Aracuasa Jesús reroyasar upe

5 Che amboaracua pota pe pāhu pendar Jesús reroyasar rārosar. Inungar avei niha che aico iyavei asepiya vahe ité yande Yar mombaraisu agüer. Inungar ahe vireco teco orisa, ēgüe ahe aveira acoi yande Yar oyevise curi. ² Pesāro tupri catu Tūpa upendar ava eta pe remiaro co omondo vahe pēu inungar ovesa rese yangarecuar osāro tupri vahe ovesa; peyapora pe querēhisa pipe ité. Ahe niha Tūpa oipota, ndahei ambuae yande cuaisa pipe tēi, ndahei avei guarepochi pota raisave yayapo. Yayapora rumo mboraviqui yande querēhisa pipe ité. ³ Ndapeicoi chira pe remiaro upe inungar que mborerecuar güeco ivatesa pipe oporocuai pīrata vahe. Pemboyecuaru rumo pe re-

cocuer aviye vahe chupe imbohesa tupri pipe. ⁴ Evocoiyase acoi oyevise yande Yar, yande rārosar ivate catu vahe, ahese peipisira mbahe porerecosa, teco ori porañete apirēhi vahe.

⁵ Iyavei no pe mbia chīhivahe, pemboyeroyara ava pe rārosar peico. Iyavei opacatu peyemboyeroyara pe reco mbegüesa pipe peyeupe peico. Esepia,

“Tūpa ava oyeecomboivate ai vahe amotarēhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tūpa pīratasa povrive. Evocoiyase pe reco mboivatera curi. ⁷ Opacatu mbahe rese pe pihañemoñeta atisa pemombehura Tūpa upe. Esepia, ahe pe rārosar ité secoi.

⁸ Pearacua cañii rene peyesui, pemahemoha arī rupi peyese. Esepia, pe amotarēhimbar Carugar pe reco momara pota yepi inungar yaguar oñaro vahe oguata tēi oporoeca 'tamomara ava' oyapave. ⁹ Sese peyemoviracuara Tūpa rese pe yeroyasa pipe Carugar upe. Esepia, peicua niha opacatu rupi avei yande rivireta Tūpa rese yuvirecoi vahe iparaisu co nungar mbahe pipe. ¹⁰ Peparaisumi pare rumo, Tūpa teieté pe reco mohivi tuprira, iyavei pe reco moviracuara, pe momirata aveira pe yepepi iriēhi āgua ichui. Ahe niha oporovasasa pipe yande poravo oyeupe nara, yande yaso vahe rā supi teco ori ndopai vahesave yande Yar rese yande recosa pipe. ¹¹ Ēgüe tehi tasecoi güeco pīratasa apirēhi vahe pipe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che pītiviisa pipe co ayapo imondo che rembicuachía ndipucuimi vahe pe mboaracua catu āgua 'ipipe toicua tupri catu yuvireco co porovasasa oipisi vahe, supi eté omboyecua vahe Tūpa poroaisusa' che hesave. ¡Peyemoviracuara tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pēu. Marcos, che rahir nungar avei imahenduha pe rese. ¹⁴ Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

2 SAN PEDRO

Pedro mahenduhasa Jesús reroyasar upe

1 Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tüpa, yande Pñisrosar Jesucristo seco ñvi vahe yuvirecoi. ² Tapeipisi catu porovasasa iyavei teco tuprisa Tüpa, yande Yar Jesús cua tupri pipe.

Jesús reroyasar recocuer

³ Tüpa ombou güeco pñrata pipe opacatu mbahe ipane vahe yande recove ägua, sese yande pihañemoñeta catu ägua avei yande secocuer cua tupri pipe. Ahe yande poravo güeco porañetesa pipe, güembiapo porañete vahe pipe avei. ⁴ Ipipe avei oseya oñehe imboaviyepirã yandeu; ahe iñehe ãgüe ndehi tã vahe, aviye catu vahe ité. Co yandeu iñehesa pipe sui pereco ra Tüpa reco aviye vahe peyese pe yepipi ägua mbahe tã sui. Ahe acoi oime vahe co ñvi pipe ava remimbotar tã sui. ⁵ Sese pe peyeroya vahe Jesús rese, peyemomirata catu aveira peyapo vahe rã mbahe aviye vahe. Peseca aveira Tüpa remimbotar cua tupri catu ägua. ⁶ Iyavei peñearo tuprira. Ipare peñemosañõ aveira mbahe tã upe. Ipipe sui peyemondo tupri catu ra Tüpa upe. ⁷ Ipare peyaisura peyevri nungar pe recosa pipe. Ipipe sui peseca catu vitera ava raisu tupri ägua.

⁸ Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer ãgüe ndehi tã chira, peicua tupri catu aveira yande Yar Jesucristo. ⁹ Acoi ndovirecoi vahe rumo evocoi nungar mbahe oyese, ahe oyeapo inungar ndasesapisoi vahe, anise mbahe ndosepia tupri vahe, sesaraiño oangaipa rese ñero agüer sui. ¹⁰ Sese che rivireta, peyemoviracua catu Tüpa pe renoisa mboyecua ägua iporavopri pe recosave. ãgüe peyese, ndapeviapi chitera mbahe tã pipe. ¹¹ Evocoi nungar pipe sui pe pisi tuprira omborerecuasa ndopai vahe pipe yande Yar, yande Pñisrosar Jesucristo.

¹² Sese niha opomomahenduhã itera evocoi nungar mbahe rese, yepe peicua, peicoveño avei mbahe supi tupri vahe rese. ¹³ Aviyeño itera revo che recove viteseve opomomahenduha vite co aracuasa rese.

¹⁴ Esepia, yande Yar Jesucristo oicua uca cõimi che mano ägua cheu. ¹⁵ Opombohera rumo opacatu che catugüer rupi co tecocuer rese che manore pe mahenduha ägua.

Co osepia vahe ité Jesús mborerecuasa yuvireco

¹⁶ Co porombohesa oromombehu vahe pëu yande Yar pñratasa resendar, iyeve iri ägua resendar avei, ndahei oreyesui tã. Ore rumo orosepia vahe ité ore resa pipe yande Yar mborerecuasa. ¹⁷ Orosepia niha yande Ru Tüpa omboeteise Guahir iyavei omondose chupe seco porañete iri ägua aipo ehise oñehe güeco porañetesa pipe: “Co che Rahir, che rembiaisu ité, sese niha che ayemboviaharete vichico” ehise. ¹⁸ Ore ité niha aipo ñehesa orosendu ñva suindar orocose yande Yar rupi ñvitri imboeteipri vahesave.

¹⁹ Ahe ñehesa omboyecua catu ñehesa arachendar Tüpa ñehe mombehusar remimombehugüer supi tupri vahe Cristo resendar. Iya ité pëu pe yapisaca tupri ägua sese; inungar que tataendi pñtusave osesape vahe oico acoi osese voi cõhe rerusar yasitata guasu ou, ãgüe ehi co ñehesa pe piha pipe sesape.

²⁰ Peicua catu co mbahe, co ñehesa arachendar icuachiapri Tüpa suindar ité, ndahei yandeyesui tã yaicua imombehu ägua. ²¹ Esepia, ndahei iñehe mombehusar oyesui tã omombehu yuvireco. Ahe rumo ava seco catupri vahe ité. Tüpa ité omombehu uca oñehe chupe Espiritu Santo pñratasa pipe aracahe.

Oporombopa vahe porombohesa

2 Yuvirecove rumo aracahe porombohesar oporombopa tã vahe Israel ñvi rupi. Oime aveira niha pe pãhuve co nungar oporombopa tã vahe yuvireco. Ahe ñemisa pipe oporombohera co coti tã vahe ava reco momara tã ägua; evocoiya güeco pipe oicuacuñõra oyar opñisrosar. Co rumo güecocuer momba pihaivi ägua tã ãgüe ehira yuvireco. ² Setã ava oguatara secocuerai rupi. Ipipe sui ambuae ava oñehe rai tãira porombohesa supi tupri vahe rese yuvireco.

³ Mbahe pota raisa pipe pe mbopara yuvireco co porombohesa co coti tã vahe rese. Icañi rumo oimeño itera yuvireco chupe. Yipisuive ité niha ahe imocañipirã yuvirecoi.

⁴ Esepia, aracahe Tüpa niñeroi eté güembiguai oyemboangaipa vahe upe. Ahe opa ité omondo mbahe tãisave. ãgüe ehi seyapa pñtumimisave, inungar ñapichimbri carena pipe yapocatupri yuvireco cañisave nara. ⁵ Iyavei acoi Tüpa niñeroi avei ava arachendar ndaseco pñrai vahe ñvi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihñvi vahe resendar iyavei ava siete yuvirecoi vahe supindar, ahe güeraño

ité oip̄siro. ⁶ Iyavei opa omocañi tata pipe tecua Sodoma, Gomorra avei; ěgüe ehi imbotanimbu tupri 'na ahe aveira niha ambuae ava che reroyaĕhisar upe curi' ohesave. ⁷ Lot güeraño rumo ahese oip̄siro. Ahe mbia aviye vahe secocuer; ndoyembovihal tēi ambuae ava recocuer mbahe-mbahe tēi yuvirecoi vahe repiase.

⁸ Co mbia aviye vahe secoise ahe ava pāhuve ari rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo. ⁹ Indó, yande Yar oicua viroyasar renose āgua mbahe tēi sui; oicua avei mbahe tēi pipe yuvirecoi vahe rereco imombaraisu āgua ari cañise curi. ¹⁰ Tūpa omombaraisu catu itera acoi ndopoi vahe güemimbotarai sui, viroïro vahe yande Yar mborerecuasa, oyeecomboivate ai vahe güemimbotar aposa pipe, acoi osiquiyeehisa pipe oñe-he rai vahe seco ivate, ip̄rata vahe rese. ¹¹ Tūpa rembiguai eta iva pendar rumo yepe ip̄rata catu vahe, omborerecuasa vireco catu vahe avei yuvireco viña, niñehe-ñehe tēi rumo Yar rovai yuvireco sese.

¹² Co ava mbahe mimba nungar tēi ndovirecoimi eté opihañemoñetas yuvireco. Opoco voiño tēi mbahe rese; evocoi nungar yuviroha yucapirā tēi eté. Ahe oñehe rai tēi vahe mbahe güemienducuaĕhi rese. Mbahe mimba nungar tupri avei rumo omanora yuvireco güecocuerai pipe. ¹³ Oyemombaraisu uca ambuae ava mombaraisusa pipe sui tēi, "Yayembovihal mbahe yande rembiapo ai rese" ehi tēi eté yuvireco viña. ¡Oporomochi pipe tēi rumo yuvirecoi, yuvirasose pe pietasave pe piri, güeco rai reseve oyembovihal oporombopasa tēi pipe yuvireco!

¹⁴ Osepiase cuña, oipota voiño tēi; ndaporambai avei iyemboangaipasa chupe. "Yayapoño mbahe" ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca āgua oyeupe yuvireco. Ava ocañi tēi vaherā yuvirecoi. ¹⁵ Ocañi tēi secocuer yuvireco Tūpa ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo āgua guarepochi pota raisa pipe yuvireco. ¹⁶ Tūpa rumo oyaca yangaipasa rese guaricu omoñehe ucase ava ñehe pipe chupe. Ahese ramo opoi oaracuaĕhisa sui.

¹⁷ Co ava oporombohe vahe inungar ivicuar ipiru vahe. Iva quiha ivitu remimombo nungar tēi avei. Apirēhi vahe ité imombopirā yuvireco p̄tumimbi catu vahe-save nara. ¹⁸ Esepia, oñehe tupri ai angahu tēi ava monguerēhi āgua ava pihañemoñeta raisa rupi seroyevi āgua. Ipipe sui ombopa tēi ahe ava seco catupri pota vahe yuvireco evocoi nungar mbahe tēi pipe iyevi iri āgua. ¹⁹ "Opacatu mbahe apo yaicatu yande reco pipe" ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvinose catui eté ichui. Supi eté, yayapoño itese que mbahe tēi, ahe evocoyase mbiguai nungar ité yande rereco uca. ²⁰ Esepia, acoi oicua vahe yande Yar, yande P̄sirosar Jesucristo yuvireco, ipipe oyepepi co ivi pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvinose. Ipare mbahe tēi catu yip̄ndar secocuer sui yu-

vireco chupe. ²¹ Oyeupe Tūpa porocuaite imondopri aviye vahe cua pare oyepepise ichui, aviye catura revo ndoicuaite co tecocuer ih̄vi vahe yuvireco viña. ²² Supi tupri ité yaviye ñehesa sesendar: "Cave rumo ohu iri ogüēhe. Iyavei cuchi oyasu pare, oyevi iri tuyuve oyemboavaete āgua" ehi vahe.

Yande Yar yevisa

3 Che rivireta, che rembiaisu, co aicuachía iri che ñehe p̄eu. Ipipe opomopihañemoñeta tupri uca pota che pe mboaracuasa pipe. ² Peyemomahenduha aracahendar Tūpa ñehe mombehusar seco catupri vahe ñehengagüer rese, yande Yar Porop̄sirosar porocuaite rese avei acoi apóstol pe mbohe vahecuer yuvireco.

³ Peicua ranera co ari imombehupri ipa vahe virovise, oimera ava ahe oviroïrora co tecocuer aviye vahe Tūpa suindar güemimbotarai pipe yuvireco ⁴ aipo ehira, "¿Marase tēi vo aipo oura Tūpa Rembiporavo imombehupri ou vaherā curi? Esepia, yande ramoi opa tēi omano yuvireco. Cūritei opacatu ahe tupriño tēi tecocuer aracahe ivi apo suive" ehi tēira yuvireco. ⁵ Ahe nimahenduha potai yuvireco co aracahendar rese. Esepia, Tūpa oyapo oñehe pipe iva, ivi avei, ahe ivi osē vahe i sui, i pāhuve avei secoi. ⁶ Coiye i pipe avei opa omocañi ivi, ombouse amarusu aracahe. ⁷ Cūriteindar rumo iva, ivi imoingatupri tata uve nara Tūpa porocuaite rupi. Evocoi tata pipe avei ocañi tēira ava mbahe tēi aposar yuvirecoi vahe curi.

⁸ Che rivireta, che rembiaisu, peresarai rene co mbahe sui: yande Yar upe ñepepe ari inungar mil araviter; mil araviter evocoyase inungar ñepepe arimi tēi chupe. ⁹ Esepia, yande Yar ndiaracahei eté oñehe mboaviye āgua; inungar amove ava, "Iharacahe tēi" ehi yuvireco viña. Ahe rumo aviye etepri güeco mbegüesa pipe yandeu. Esepia, ndoipotai que ñepepe yepe yande cañi tēi āgua; ahe rumo oipota opacatu tupri ité yande recocuer ñecuñaro āgua.

¹⁰ Yande Yar ari yande resapiha tēira inungar imonda rai vahe ou p̄tu pipe yepi. Ahese iva ocañi tupri tēira viapugüer ip̄rata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tēi etera.

¹¹ Opacatu ité niha co mbahe yapopri ocañi tēi vaherā. Sese, ¡peyemoviracuaño itera pe reco maranehisa rese Tūpa rese pe pihañemoñetas pipe!

¹² Pesāroño Tūpa yepotasa resendar ari, iyavei peyapo opacatu peicatulugüer rupi 'toyepota poyava voi' pe yapave. Ahe ari pipe iva opara ocañi tēi eté tata pipe. Ipipe sui opacatu mbahe yapopri ticupa tupri rai curi.

¹³ Yande rumo yasāro ité iva, ivi ipiasu vahe Tūpa remimombohe. Aheve opacatu ava yuvirecoira güeco aviyesa pipe.

¹⁴ Sese che rembiaisu, pesāro viteseve co tecocuer, ěgüe peyera opacatu peicatulugüer rupi pe reco tupri āgua pe angaipāĕhi pipe, p̄eu Tūpa, "Peyavi mbahe" ehiĕhi āgua. ¹⁵ Tapeicua co: yande Yar seco mbegüer yandeu yande p̄siro āgua. ěgüe ehi avei yande rembi-

aisu Pablo icuachía oyeupe Tūpa ombou vahe mbahe-cuasa pipe pëu. ¹⁶ Opacatu ocuachiar pipe omombehu evocoi nungar mbahe pëu, yepe amove yavai senducua água yuvireco viña. Sese amove ndoyemoviracua tuprii vahe yande Yar rese iyavei ndoyemboaracua tuprii vahe, ahe co coti tēi virova ñehesa, inungar oyapo ambuae ñehesa icuachiapri Tūpa suindar rese. Ipape güecocuer omocañi tēi ahe.

¹⁷ Che rivri, che rembiaisu, peicua ité niha evocoi mbahe; sese peñearo tupriira pe yembopa ucañi água ava ndiporeroyai vahe upe Tūpa rese pe recocuer yemoviracua sui pe yepepiñi água. ¹⁸ Peicua tupri catura rumo yande Yar Poropñisrosar Jesucristo iyavei peicoveño itera iporovasasa pipe. ¡Ëgüe tehi imboeteipri tasecoi cūritei apirñi vaheerã! Aipo rupive che ñehhe pëu.

1 SAN JUAN

Ñehesa tecovesa resendar

1 Co cuachiar pipe oromombehu pëu co yipisuive seci vahe. Ahe orosendu, orosepia avei ore resa pipe ité iyavei oropoco ité sese. Ahe niha Tüpa Ñehesa tecovesa resendar. ² Co tecovesa oyemboyecua, orosepia iyavei ahe secocuer oromombehu. Ahe tecovesa apirëhi oromombehu vahe pëu. Ahe Vu rese seci vahe oyemboyecua vahe oreu. ³ Oromombehu co orosepia vahe, orosendu vahe ñepe vahe nungar pe reco ägua ore rese inungar ore oroico yande Ru Tüpa rese, Tahir Jesucristo rese avei. ⁴ Evocoyase cüritei oroicuachía evocoi mbahe pëu yande yemboviharete catu ägua.

Tüpa tesapesa seci

⁵ Iyavei Jesucristo ore mbohe co ñehesa rese, ahe oromombehu pëu: yande Ru Tüpa niha tesapesa seci; ndipoi eté pñtumimbisa sese. ⁶ “Che aico tupri Tüpa rese” yahese, yaicoño rumo angaipa pipe, ahe inungar pñtumimbi vahe, ahese yande remira tñi iyavei ndayayapoi mbahe supi tupri vahe. ⁷ Yaicose rumo tesapesa pipe inungar yande Ru Tüpa seci tesapesa, evocoyase yaico tupri yandeyeupe. Iyavei suvi yande moatiro opacatu angaipa sui.

⁸ Iyavei, “Ndarecoi angaipa che piha pipe” yaha tñise, yande ae yayembopa ipipe. Evocoyase mbahe supi eté vahe ndayarecoi yandeyese. ⁹ Acoi yamombehuse yande angaipagüer Tüpa upe, ahese ahe omboura oñeroisa yande angaipa rese yandeu iyavei omoatiro-ra opacatu mbahe-mbahe tñi yande sui. Esepia, ahe seco ñvi vahe. ¹⁰ Iyavei, “Che ndacheangaipai eté” yaha tupri tñise yaico, evocoyase Tüpa semirañete ai vahe nungar yareco. Ipipe ndayaroyai iñhengagüer.

Jesucristo yande reco moingatusar

2 Che rahireta, co aicuachía pëu pe angaipaëhi ägua. Que revo ava oime oyemboangaipa vahe pe pähuve, yareco rumo yande Pñtiviisar yande Ru rovai. Ahe Jesucristo, seco ñvi vahe. ² Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi ägua yande sui.

³ Acoi yayapo tuprise Tüpa porocuaita, ahese supi eté yaicua Tüpa. ⁴ Oime amove ava “che aicua Tüpa” ehi vahe; nomboaviyei rumo iporocuaita. Ahe semirañete ai vahe, ndovirecoi mbahe supi tupri vahe oyese. ⁵ Acoi yamboviyese iñhengagüer, ahese supi

eté yasaisu Tüpa. Ipipe sui yaicua yande reco tupri Jesucristo rese. ⁶ Acoi “aico tupri Tüpa rese” ehi vahe, ahe secoira Jesucristo nungar.

Mborocuaita ipiasu vahe resendar

⁷ Iyavei, che rivireta, ndaicuachiai mborocuaita ambuae ipiasu vahe pëu. Aheño ité mborocuaita pereco vahe yipisuive. Ahe acoi yipindar pesendu vahe. ⁸ Co aicuachía vahe rumo ogüeru mborocuaita ipiasu vahe. Ahe supi eté tesapesa Jesucristo vireco vahe iyavei pereco vahe avei. Esepia, pñtumimbi opara. Tesapesa evocoyase osesape.

⁹ Oime amove ava “che aico tesapesave” ehi angahu tñi vahe; oyamotarëhiño rumo ambuae omboetasa Tüpa reroyasar. Evocoi nungar recocuer pñtumimbisave tñi vite. ¹⁰ Acoi osaisu vahe ambuae omboetasa Tüpa reroyasar, ahe seci tesapesave. Sese nomboangaipa ucai omboetasa. ¹¹ Acoi ndoyambotai vahe omboetasa, pñtumimbisa pipe tñi seci, ndoicuai avei que rupi güecocuer virecora. Esepia, pñtumimbi vahe nomboesapiso.

¹² Che rahireta, co aicuachía pëu nara. Esepia, Tüpa iñero pe angaipa rese pëu Jesucristo recocuer pipe. ¹³ Pe, yesupa peico vahe upe co aicuachía. Esepia, peicua yipisuive oicove vahe. Aicuachía avei pëu, mbia chñhivahe. Esepia, pesecopi Carugar. ¹⁴ Iyavei pe tahireta aicuachía opacatu pëu. Esepia, peicua vahe niha yande Ru Tüpa. Aicuachía avei pëu, pe iyésupa. Esepia, peicua yipisuive oicove vahe. Aicuachía avei pëu, mbia chñhivahe. Esepia, peyemoviracua etepri, peipisi avei Tüpa Ñhengagüer pe piha pipe. Ipipe pesecopi Carugar.

¹⁵ Evocoyase pesaisu eme co mbahe tñi ivi pipendar. Acoi ava co mbahe tñi osaisu vahe, ahe ndosaisui yande Ru Tüpa yuvireco. ¹⁶ Esepia, opacatu co mbahe tñi ndahei yande Ru Tüpa suindar; ahe rumo co ivi pipendar suindar. Ahe niha opacatu yande pihañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tñisa. ¹⁷ Co ivi pipendar mbahe tñi iyavei ava mbahe pota raisa opa pota ité ocañi. Acoi ava oyapo vahe rumo Tüpa remimbotar, yuvirecoira apirëhi vählerä ité.

Mbahe supi eté vahe iyavei mbahe ndahei vahe supi

¹⁸ Che rahireta, co ari ipa vahe ité yandeu. Iyavei acoi pesendu “oura Jesucristo amotarëhimbar” ehi vahe, ahe cüritei setá oyemboyecua yamotarëhimbar yuvireco. Sese yaicua ari ipa vahe yepota ägua. ¹⁹ Ahe

oyepepi yande pāhu sui; ndahei eté rumo yande rivri yuvireco Tūpa rese. Esepia, acoi yande rivri itese, ahese opitara yande piri yuvireco viña. Ēgüe ehi oyecua ndahei opacatu yande rivri yuvirecoi.

²⁰ Cristo omondo Espiritu Santo pēu. Sese opacatu pe peicua mbahe supi tupri vahe. ²¹ Pe niha peicua co mbahe supi eté vahe. Sese aicuachía co pēu. Esepia, mbahe supi eté vahe sui ndoui temira. ²² Acoi “Jesús ndahei Poropĩsrosar imboupri” ehi vahe, ahe semira tēi vahe, yamotarēhimbar yuvirecoi. Ahe niha ndoviroyai Tu, Tahir avei yuvireco. ²³ Acoi ava “evocoi ndahei Tūpa Rahir” ehi vahe, ndovirecoi Tu oyese yuvireco. Acoi “evocoi niha Tūpa rahir” ehi vahe rumo, ahe vireco yande Ru Tūpa oyese yuvireco.

²⁴ Sese yipisuipe pesendu vahe ñehesa peyapocatu pe piha pipe. Ēgüe peyese, ahese peico tupri Jesucristo rese, Tu rese avei. ²⁵ Esepia, Jesucristo aipo ehi: “Pe perecoa co tecovesa apirēhi vahe peyese” ehi yandeu.

²⁶ Sese co ava pembopa pota vahe resendar aicuachía pēu. ²⁷ Pe pereco Espiritu Santo Jesucristo ombou vahe pēu. Sese ndiyai eté ambuae pe mbohera. Espiritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espiritu Santo pe mbohesa rupi.

²⁸ Iyavei che rahireta, peicoño ité Cristo rese yareco vaherā sese yande yeroyasa. Acoi ogüeyise iva sui curi, ahese nayachĩ chietera sovai ichui. ²⁹ Pe niha peicua Jesucristo seco ñvi vahe. Iya peicua avei opacatu oyapo vahe mbahe ihivi vahe, ahe Tūpa rahir ité yuvirecoi.

Tūpa rahir yuvirecoi vahe

3 Mara ehi rutei Tūpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tūpa, ndoicatu eté yande recocuer cua āgua. Esepia, ndoicuai Tūpa recocuer yuvireco. ² Che rivireta, yaico ité Tūpa rahir. Yande rumo ndayaicua tupri vitei yande reco āgua ipare. Cūrutei rumo co mbahe yaicua: acoi oyemboyecuase Jesucristo, yaicora inungar. Esepia, yasepia itera opacatu seco reseve. ³ Iyavei opacatu osāro vahe Jesucristo yuvireco, oyepipiño ité opacatu angaipa sui güeco catupri āgua, inungar ahe secoi.

⁴ Opacatu ava oyemboangaipa vahe, ahe oyavi Tūpa porocuaita. Esepia, angaipa Tūpa porocuaita mboaviyeēhisa yepi. ⁵ Pe rumo peicua Jesucristo ou co ivi pipe yande angaipagüer mocañi āgua. Ahe niha ndovirecoi eté angaipa oyese. ⁶ Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepia, ndoicuai avei secocuer yuvireco. ⁷ Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo. ⁸ Acoi oyapo vahe angaipa, ahe Carugar suindar. Esepia, Carugar yipisuipe ité oyapo angaipa. Sese ou Tūpa Rahir Carugar rembiapo mocañipa āgua.

⁹ Opacatu yuvirecoi vahe Tūpa rese ndoyapoi angaipa. Esepia, ahe vireco ité Tūpa recocuer oyese yuvireco. Sese ndoicatu iri angaipa apo āgua yuvireco. Esepia, ahe Tūpa rahir ité yuvirecoi. ¹⁰ Icuapri ité Tūpa rahir yuvireco, icuapri avei Carugar rahir yuvirecoi vahe. Esepia, acoi ndoyapoi vahe mbahe tupri iyavei ndosaisui vahe Tūpa reroyasar, ahe ndahei eté Tūpa rahir yuvirecoi.

Yayeaisura ñepeipei yande yacatu

¹¹ Co niha ñehesa, acoi pesendu vahe yipisuipe, ahe co yayeaisura ñepeipei. ¹² Ndayaicoi chira inungar Caín, ahe Carugar remimbohe oyuca vivri. ¿Mahera piha oyuca? Esepia, tivri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Tūpa ndoicuai vahe pe roerose yuvireco. ¹⁴ Yande rumo yaicua aracacondar yande hā cañi tēi agüer. Cūrutei rumo yasē evocoi nungar sui tecovesa apirēhi vahe pipe yande reco āgua. Esepia, yande niha yasaisu yande rivireta Tūpa rese yuvirecoi vahe. Acoi ndosaisui vahe rumo ahe ihā ocañi tēi vite ité yuvireco. ¹⁵ Opacatu ava ndoyambotai vahe yande rivri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apirēhi vahe oyese. ¹⁶ Jesucristo niha omondo güecocuer manosave yande recocuer repirā. Ichui yande yaicua poroaisusa. Sese yande avei ēgüe tayahe yande rivireta rese. ¹⁷ Acoi ava vireco tēi vahe mbahe eta oyeupe nara, osepiaño tēi rumo vivri upe mbahe ipane vahe, iyavei ndoipitivi, ahe ndovirecoi Tūpa poroaisusa oyese yuvireco. ¹⁸ Che rahireta, yande poroaisusa rumo ndahei chira yande ñehē pipe tēi, iyacatu rumo yamboyecua mbahe yande rembiapo pipe.

Yande yeroyasa yareco vahe Tūpa rovai

¹⁹ Ēgüe yahese, yande yaicua yande recocuer supi eté vahe pipe yaico. Acoi, “Ndahei revo Tūpa rahir aico” yahese, ahese Tūpa rovaque yayemomahenduhara evocoi nungar rese: “Tūpa niha tuvichá catu yande pihañemoñetasa sui. Ahe opacatu mbahe oicua.” Sese yayeroyara. ²¹ Supi eté che rivireta, yaicua itese yande piha pipe yande reco tupri Tūpa rese, ahese yayeroyañi itera sovai. ²² Ahe avei niha ombou opacatu mbahe yandeu yaporanduse chupe. Esepia, yamboyeroya iporocuaita iyavei yayapo semimbotar yaico. ²³ Co ité iporocuaita: yaroyara Tahir Jesucristo iyavei yayeaisura ñepeipei Tūpa yande cuaisa rupi tupri. ²⁴ Acoi yaroyase iporocuaita, ahese yaicora Tūpa rese; ahe avei sec-oira yande rese. Iyavei ahe ombou Espiritu yandeu. Ichui yaicua Tūpa secoi yande rese.

Espiritu Tūpa suindar iyavei espíritu Cristo amotarēhimbar

4 Che rahireta, aní chira peroya opacatu “Espiritu pipe añehē” ehi vahe. Iyacatu rumo pesāha rane ¿Tūpa suindar ité piha? pe hesa pipe. Esepia, setá vai

oporombohe angahu tēi vahe oguata opacatu ivi rupi yuvireco. ² Co rese peicuara ava Espiritu Tūpa suindar vireco vahe: “Jesucristo ou opacatu güete reseve” ehise, aipo ehi vahe vireco Espiritu Tūpa suindar ité. ³ Acoi aipo ndehi vahe rumo, ndovirecoi eté Espiritu Tūpa suindar oyese. Ahe rumo vireco espíritu Cristo amotarēhimbar tēi. Aracaco niha pesendu ñehesa acoi yamotarēhisar espíritu ou vaheñā resendar. Ahe cūrítei secói co ivi pipe.

⁴ Che rahireta, pe rumo Tūpa suindar peico. Iyavei pesecopi ité acoi semira tēi vahe peico. Esepia, Espiritu secói vahe pe rese, ahe ipirata catu Carugar sui.

⁵ Evocoi co ivi pipendar tēi yuvirecoi vahe. Esepia, oñe-he mbahe ivi pipendar rese tēi yuvireco. Iyavei ava supindar ae ité oyapisaca iñehe rese yuvireco. ⁶ Yande rumo Tūpa suindar yaico. Acoi oicua vahe Tūpa oyapisaca yande ñehe rese yuvireco. Acoi ndahei vahe Tūpa rahir, ahe yande ñehe ndosendu potai yuvireco. Sese yande yaicuara vireco vahe Espiritu supi eté vahe, yaicua aveira vireco vahe espíritu oporombopa tēi vahe.

Tūpa oporoaisu vahe

⁷ Che rivireta, che rembiaisu, yayeaisu ñepeipei. Esepia, yeaisusa Tūpa suindar. Opacatu osaisu vahe ava, ahe Tūpa rahir, oicua ité avei Tūpa yuvireco. ⁸ Acoi ndosaisui vahe ava, ahe ndoicuai Tūpa yuvireco. Esepia, Tūpa yeaisusa secói. ⁹ Ēgüe ehi omboyecua oporoaisusa yandeu. Ahe niha, ombou Guahir ñepeipei vahe co ivi pipe ichui yande recove āgua. ¹⁰ Ndahei yande rane yasaisu Tūpa. Ahe rane rumo yande raisu iyavei ombou Guahir imano āgua yande angaipa repirā. Ahe niha poroaisusa supi eté vahe.

¹¹ Che rivireta, che rembiaisu, ēgüe ehi Tūpa yande raisu. Evocoyase ēgüe vahe aveira yande yayeaisu ñepeipei yepi. ¹² Ndipoi eté ava osepia vahe Tūpa. Yayeaisuse rumo, Tūpa secói yande rese. Iporoaisusa evocoyase oime ité yande rese. ¹³ Ahe ombou oEspiritu yandeu; ipipe sui yaicua sese yande reco iyavei yaicua ahe secoise yande rese. ¹⁴ Iyavei orosepia vahe, oromombehu: yande Ru ombou Guahir ava ivi pipendar pīširo āgua. ¹⁵ Acoi ava “Jesús niha Tūpa Rahir” ehi vahe, ahe secói eté Tūpa rese; Tūpa evocoyase secói sese.

¹⁶ Ēgüe vahe icua, seroya tupri āgua co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei secói sese. ¹⁷ Ēgüe vahe Tūpa poroaisusa mboaviye tupri ichui yande siquiyēñi āgua acoi oyepotase ari cañi yandeu. Esepia, yande yaico co ivi pipe inungar Jesucristo.

¹⁸ Yasaisu tupri itese Tūpa, ndipoi chira siquiyesa yandeu. Ēgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tuprii eté.

¹⁹ Yipindar Tūpa yande raisu. Sese cūrítei yande avei yasaisu Tūpa. ²⁰ Amove ava aipo ehi tēi: “Che asaisu Tūpa” ehi. Ahe ramoseve rumo viroñro omboetasa Tūpa reroyasar. Evocoyase ahe semira tēi vahe. Esepia, acoi

ndosaisui vahe omboetasa Tūpa reroyasar sepiase, ndoicatui Tūpa ndayasepiai vahe raisu āgua. ²¹ Jesucristo ombou co porocuaita yandeu: acoi osaisu vahe Tūpa, tosaisu avei omboetasa seroyasar yuvireco.

Yande mbahe-mbahe tēi co ivi pipendar recopisa

5 Opacatu viroya vahe Jesús Tūpa Rembiporavo Poropširosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco.

² Yande yasaisuse Tūpa, yayapose avei iporocuaita, ahese yaicua yasaisu avei ava Tūpa rahir yuvirecoi vahe.

³ Yamboaviyese Tūpa porocuaita, ahese yamboyecua Tūpa raisusa yaico. Iyavei iporocuaita ndahei yavai etepri yapo āgua. ⁴ Esepia, opacatu Tūpa rahir yuvirecoi vahe osecopi mbahe-mbahe tēi ivi pipendar Cristo rese yeroyasa pipe yuvireco. ⁵ Acoi oyeroya vahe Jesucristo Tūpa Rahir secosa rese, ahe oicatu co ivi pipendar mbahe-mbahe tēi recopi āgua yuvireco.

Tūpa rahir recocuer resendar ñehesa

⁶ Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espiritu avei osecoco mombehu. Esepia, ahe omombehu mbahe supi eté vahe yepi. ⁷ Evocoyase oime mbosapi imboyecuarar: ⁸ Espiritu, i, iyavei suvi. Ahe mbosapi oyoya tupri. ⁹ Yaroya revo ava remimombehu; Tūpa remimombehu rumo aviye catu vahe ité ichui. Esepia niha, ahe Guahir omombehu. ¹⁰ Acoi viroya vahe Tūpa Rahir vireco ité ahe semimombehu opiha pipe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehe Tahir resendar. ¹¹ Co Tūpa remimombehu: ahe ombou yandeu tecovesa apirēñi vahe. Co tecovesa Tahir rese secói.

¹² Acoi oipisi vahe Tūpa Rahir opiha pipe, ahe vireco avei co tecovesa. Acoi ndoipisii vahe rumo, ndovirecoi eté tecovesa oyese.

Poromboaracuasa ipa vahe

¹³ Co aicuachía pēu, pe pereco vahe Tūpa Rahir, peicua āgua pe supi eté pereco tecovesa apirēñi.

¹⁴ Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehe osendu. ¹⁵ Evocoyase yaicua ahe osendu yande yeruresa, yaicua avei mbahe yande porandusa ombou vaheñā yandeu.

¹⁶ Acoi osepia vahe yande mboetasa Tūpa reroyasar oyemboangaipa vahe, ahe rumo ndahei manosave nara, oyerquirā sese. Evocoyase Tūpa omondora secove āgua chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pēu. ¹⁷ Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

¹⁸ Yaicua Tūpa rahir ndoyapoi angaipa yuvireco. Esepia, Tahir osāro evocoi nungar. Ichui Carugar ndopocoi sese. ¹⁹ Sese yaicua yande Tūpa rahir yaico. Iyavei opacatu ava ndoviroyai vahe Tūpa, ahe

Caruguar povri pendar tēi yuvirecoi. ²⁰ Iyavei yaicua Tūpa Rahir ogüeru oaracuasa yandeu Tūpa supi eté vahe cua ãgua iyavei yaico co supi eté vahe rese. Ahe niha Tahir Jesucristo, ahe avei Tūpa supi eté vahe

iyavei tecovesa apirēhi vahe. ²¹ Che rahireta, peñearo tupri tūpa angahu tēi sui. Aipo rupive co che ñehesa amombehu pēu.

2 SAN JUAN

Mbahe supi eté vahe iyavei yeaisusa

1 Che, icuapri, aicuachía co che ñehe pëu pe Tūpa rembiporavo peico vahe opacatu eipeve peico vahe upe. Che niha supi eté opoaisu. Ndahei rumo che güeraño opoaisu, opacatu oicua vahe porombohesa supi eté vahe avei pe raisu yuvireco. ² Opoaisu ité mbahe supi eté vahe yande piha pipe yareco vahe rese. Ahe ndopai chivaherã ité. ³ Yande Ru Tūpa, yande Yar Jesucristo, Tūpa Rahir, tombou oporovasasa, oporoparisuerecosa pëu nara. Tombou avei güeco tuprisa, güeco supi eté vahe pipe oporoaisusa pipe avei pëu.

⁴ Che mboviharete aicuase pe pãhu pendar yuvirecoi vahe güecocuer aviyesa pipe. Esepia, ahe viroya porombohesa supi eté vahe yuvireco. Ahe niha yande Ru Tūpa porocuita yandeu. ⁵ Iyavei, che rivireta, che rembiaisu, tayayeaisu catu ñepeipei. Co aicuachía vahe ndahei porocuita ipiasu vahe. Ahe niha acoi yipindar icuachiapri pëu. ⁶ Co yande yeaisusa, yande guata tupri ãgua Tūpa porocuita rupi. Co Tūpa porocuita yipisuive pesendu vahe, ahe omombehu yande yeaisu tupri ãgua yandeu.

Iporombopa serai vahe resendar

⁷ Setá vai oguata ivi yacatu rupi oporombopa tēi vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa tēi vahe Jesucristo amotarēhimbar yuvirecoi. ⁸ Peñearo catu pe poraviqui repri mocañi tēiēhi ãgua. Tapeipisi catu opacatu Tūpa porerecosa peyeupe nara.

⁹ Oime ava oyepepiño vahe Cristo porombohesa sui. Ahe Tūpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tūpa, Tahir avei oyese. ¹⁰ Acoi oyepotase ava oporombopa tēi vahe pëu, ndovirecoi vahe co porombohesa, ndapeipisii chira pe rētave. Iyavei ndapemboaviravei chiaveira. ¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe pëu. Namombehu potai rumo cuachiar pipe. Che teieté aso pota pëu che ñehe ãgua. Ahese yayemboviharetera oyese.

¹³ Iyavei Tūpa rembiporavo oñemonuha vahe cohove opacatu omondo omahenduhasa yuvireco pëu. Aipo rupive co che ñehesa amondo pëu.

3 SAN JUAN

Gayo recocuer aviye vahe resendar

1 Che, icuapri, aicuachía co che ñehe ndeu, che mboripar, che rembiaisu, Gayo. Che supi eté oroaisu yepi.

² Che rembiaisu, che rivri, cūrítei nde recocuer erereco tupri Tūpa rese. Che ayeroqui nde rese opacatu nde reco tupri āgua iyavei tipo eme mbaherasisa ndeu.

³ Che aviharete asenduse yande rivri ñehe nde recocuer resendar yugūeruse cohava. Ahe aipo ehi yuvireco cheu: “Evocoi Gayo oyemoviracua tupri mbahe supi eté vahe pipe” ehi yuvireco ndeu. ⁴ Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

⁵ Che rivri, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei. ⁶ Ahe omombehu ore ñemonuhasave opacatu nde poroaisusa resendar yuvireco oreu. Eyapo catu mbahe icatupri vahe; eipřivii catu chupe mbahe ipane vahe rese iguataño āgua Tūpa remimbotar rupi yuvireco. ⁷ Esepia, ahe oguata yuvireco Jesucristo rer pipe. Ndoipisii eté rumo mbahe ipane vahe opřivii āgua yuvireco ava Tūpa reroyasarēhi sui. ⁸ Sese yande ēgūe yahera yaico evocoi nungar upe ñehesa supi eté vahe rese ipřivii āgua.

Diótfes recocuerai iyavei Demetrio recocuer aviyesa

⁹ Che aicuachía che ñehe eipeve Tūpa upe oñemonuha vahe upe cuese. Diótfes rumo ndoviroyai

ore mborerecuasa. Esepia, ahe oipota rai mborerecuar güeco āgua ipāhuve. ¹⁰ Evocoyase asose eipeve, amboaracuara opacatu Tūpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisi potai avei güētave yande rivireta oyepota vahe. Iyavei ndoipotai ambuae upe ipisi āgua sētave. Acoi oipisise, omombo voiño ité ñemonuhasa sui. ¹¹ Che rivri, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

¹² Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

Ñehesa ipa vahe

¹³ Che niha amombehu pota setá mbahe ndeu. Namombehu potai rumo cuachiar pipe tēi ndeu. ¹⁴ Esepia, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepeipei yande mboripareta upe eipeve. Aipo rupive.

SAN JUDAS

Judas mahenduhasa Jesús reroyasar upe

1 Che, Judas, aico Jesucristo rembiguai, Santiago rívrí. Che aicuachía co che ñehe pëu. Pe niha yande Ru Tüpa rembiaisu semienoi peico. Jesucristo niha pe rãro opacatu mbahe-mbahe tēi sui. ² Tüpa tombou catu pëu pe paraisuerecosa pe reco tupri ãgua pe raisusa pipe.

Oporombohe vahe ava mbopa tēi ãgua resendar

³ Che rívríeta, che rembiaisu, yípíndar chepihañemoñeta ité yande pširosa resendar cuachía ãgua pëu viña. Ipare rumo chepihañemoñeta iri: iyaño revo che aicuachía pe yemoviracua tupri catu ãgua yembohesa yaroya vahe rese. Ahe yembohesa yaroya vahe ñepeí reseve imondopri opacatu yandeu Jesucristo rese yaico vahe. ⁴ Esepia, amove ava iporombopa serai vahe yuviroique mbegüe angahu pe pãhuve. Aracahe suive rumo Tüpa Ñehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tüpa aviye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rereciar” ehiño tēi vahe yande Yar ñepeí vahe upe yuvireco.

⁵ Che opomomahenduha pota iri acoi peicua tupri vahe rese. Yípíndar yande Yar Tüpa vínose yande ramoí eta Egipto sui. Ipare rumo opa omocañi víroyasarēhi. ⁶ Inungar avei Tüpa rembiguai yípíndar vahe yuvirecoi, nomboaviyei vahe ocuaita. Ipípe sui Tüpa osoquenda pñtumimbi ndopai vahesave ari cañise nara.

⁷ Iyavei ava Sodoma pendar, Gomorra pendar iyavei ahe tecua ivirindar avei inungar acoi Tüpa rembiguai oyemondo mbahe tēi pipe, ahe avei oyemondo vahe oyemboaguasa-guasa tēi ãgua yuvireco. Iyavei cuimbahe, cuimbahe rese; cuña, cuña rese no. Ipípe sui oiporara tata guasu apirēhi vahe yuvireco. Ahe opita opacatu yande yembosiquiye ãgua.

⁸ Ēgüe ehi avei niha evocoi nungar ava pe pãhu pendar. Esepia, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe íva pendar rese yuvireco. ⁹ Aracahe Tüpa rembiguai ivate vahe Miguel oyepoepi-epi Carugar rese yuvireco Moisés retecuer rese. Yepe ahe Tüpa rembiguai rereciar viña, ndiyai rumo chupe iñehe mara ãgua Carugar upe. Evocoyase aipo ehi

chupe: “¡Tüpa oicuara co rese ndeu!” ehiño. ¹⁰ Evocoi ava pe pãhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi ãgua tēi.

¹¹ ¡Iparaisu yuvireco! Caín recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano oporeroyaēhisa pipe.

¹² Pe peñemonuhase pe yeaisusa pipe pe caru ãgua, ahese ahe avei yuviroique pe pãhuve; noyuvinochi eté ocaru ãgua pe piri. Ndapeicuai rumo ahe pe recocuer monguiha ãgua tēi yuviroique vahe pe pãhuve. Evocoi inungar ovesa rãrosar oyese tēi ihañeco vahe yuvireco. Iyavei ahe inungar íva quiha ndovirecoi vahe í, ívitu remimombo tēi. Ahe avei inungar ívira ndihai vahe ohasa rupi, ipiru vahe, evocoyase ahe sapohopri. ¹³ Inungar avei acoi íai pipe itu omombo tiyui vahe oyesui yepi. Ēgüe ehi avei evocoi mbia rembiapo poromochisa. Iyavei inungar yasitata amove omocañi vahe guaper co coti tēi oso pñtumimbisave, Ēgüe ehi aveira ava Tüpa sui oyepepi vahe pñtumimbisa apirēhive secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepi che queraisa nungar pipe yande Yar turi íva pendar rehii reseve ¹⁵ opacatu ava recoña ãgua iyavei icañi mombehu ãgua opacatu mbahe-mbahe tēi aposar upe, opacatu oñehe-ñehe tēi yamotarēhisave yuvirecoi vahe upe avei” ehi. ¹⁶ Ahe mbia niha oporoviroiro yuvireco. Iyavei oseca oyeupe nara mbahe güemimbotar tēi apo ãgua. Ahe oyemboivate ai vahe oñehe pipe tēi yuvireco. Iyavei oñehe tupri ai angahu tēi ambuae ava upe imbahe rerocua ãgua ichui.

Jesús reroyasar upendar poromboaracuasa

¹⁷ Pe rumo, che rívríeta, che rembiaisu, peyemomahenduha acoi yande Yar Jesucristo apóstol ñehengagüer rese ¹⁸ aipo ehi vahe: “Co ari cañi renonde oimera ava víroiro ai vahe Tüpa rembiapo yuvireco. Iyavei oyapoño itera güemimbotarai yuvireco” ehi vahe. ¹⁹ Ahe ava niha omboyaho-yaho ucara ava Jesús reroyasar yuvireco. Güecocuer ívi pípendar tēi víreco vahe. Ahe niha ndovirecoi Tüpa Espíritu yuvireco.

²⁰ Pe rumo, che rívríeta, che rembiaisu, peyemoviracua pe poreroyasa maranehi vahe rese. Iyavei

peyeroqui Espiritu Santo pe rãrosa pipe. ²¹ Peñearo tupri Tũpa pe raisusa pipe. Iyavei pesãro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

²² Pesaisu ava ndoviroya tuprii vahe Jesús. ²³ Amove ava pesecoreroyevi voi icañi rãgũer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepei yangaipa pipe pe viapiẽhi ãgua.

Tũpa mboetei tuprisa

²⁴ Tũpa yande Pĩsirosar ñepei vahe vireco pĩratasa pe rãro angaipa pipe pe viapiẽhi ãgua. Ahe avei pe rerec-ora güecocuer porañetesave pe reco angaipaẽhisa pipe. Ichui peicora pe viharetesa pipe. Ahe imboeteipri tasecoi. Ēgũe tehi timboyeroyasa seco pĩratasa iyavei imborerecuasa yande Yar Jesucristo sui, yipisui, cũritei apirẽhi vaherã.

APOCALIPSIS

Jesucristo yemoporēhisa

1 Che, Juan, aikuachía mbahe imboaviye pihavipirā pēu acoi Tūpa omboyecua vahe Guahir Jesucristo upe 'tomboyecua oviroyasar yuvirecoi vahe upe' oyapave. Ahe niha Jesucristo oicua uca Vu rembiguai pipe imboyecua uca āgua güembiguai che recose cheu.

² Che supi eté amombehu opacatu mbahe asepiya vahecuer iyavei amombehu evocoi Tūpa Ñehengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyeroqui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovi ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aikuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cūriteindar apirēhi vahe avei; siete espíritu suindar avei no, ahe senda rovai yuvinochai vahe, ⁵ iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tēi mborerecuar sui. Ahe yande raisu iyavei yande pīsiro yande angaipa sui vuví pipe, ⁶ iyavei yande rereco mborerecuarã, pahiguã avei no Vu Tūpa upe yande poraviqui āgua. ¡Ēgüe tehi imboeteipri tasecoi opīratasa pipe apirēhi vaheerã!

⁷ ¡Esepia, Cristo iva quiha rese oura curi! Ahese opacatu ava osepiara yuvireco, yamotarēhisarar, oicutu vahecuer avei. Iyavei opacatu tecua ivi pipendar ahese oyaseho tēira yuvireco sepiase.

Ēgüe ehi etera curi.

⁸ "Che aico yipindar iyavei ipandar" aipo ehi yande Yar Tūpa opacatu mbahe mboavaisarēhi evocoi yipivé vahe ité, cūriteindar apirēhi vahe avei.

Juan osepiya oquer nungar pipe Jesucristo porañetesa

⁹ Che, Juan, pe riquehir aico, iyavei che pe nungar Tūpa povri pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico caha pāhumi para guasu aviterve Patmos serer vahesave Tūpa Ñehengagüer mombehusa pipe sui tēi, Jesucristo recocuer mombehusa pipe

sui tēi avei no. ¹⁰ Acoi yande Yar ari pipe Espiritu povrive aicose, asendu che raquicuei oñehe pīrata vahe aviye acoi mimbí ñehe ¹¹ aipo ehi: "Eicuachía mbahe erese pia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve" ehi cheu.

¹² Che evocoyase ayemboyere sese '¿ava pīha oñehe cheu?' che yapave. Ahese asepiya siete tupri vera hi oro apopri, ¹³ iyavei asepiya ipāhuve mbia aviye tupri ava ité viña, iturucuar pucucuer ipi rupi tupri ité sese, sumbicuasa evocoyase oro apopri ipochiha rupi tupri ité oyepota. ¹⁴ Iha morochí inungar acoi mbahe saviyu vahe, inungar avei yesapi ñapirata morochí vahe, sesa evocoyase aviye tupri ité tata rendigüer. ¹⁵ Ipi evocoyase sendi yai eté, aviye acoi bronce ocai vahe horno pipe, iyavei iñehe ipīratá iteanga inungar itu riapugüer. ¹⁶ Oacato coti vireco siete tupri yasitata, iyavei iyuru sui osé quise pucu saimbe yoya vahe. Sova evocoyase aviye ari rendigüer ipīratá vahe.

¹⁷ Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: "Nderesiquiyei chira. Esepia, che yipindar ité aico, ipandar avei. ¹⁸ Aicove vahe ité; yepe amano viña, cūritei rumo aicove iri ndopai chivaheerã ité aico. Che areco che mborerecuasa ava recocuer mocañi āgua. ¹⁹ Sese eicuachía co mbahe erese pia vahe: cūriteindar oime vahe mbahe iyavei mbahe oime vaheerã curi. ²⁰ Co acoi ndereicuai vahe erese pia vahe siete yasitata che acato coti, ahe yuvirecoi Tūpa rembiguai siete tecua rupindar che reroyasar rārosar; evocoyase vera hi oro apopri, ahe yuvirecoi siete tupri tecua pipendar che reroyasar" ehi.

Ñehesa siete tupri tecua-tecua pendar Jesús reroyasar upe. Ñehesa Efeso pendar upe

2 "Eicuachía Tūpa rembiguai Efeso pendar che reroyasar rārosar upe: 'Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu: ² Che aicua opacatu mbahe pe rembiapo, pe poraviqui pīratasa iyavei pe yemoviracuasa. Aicua avei ndapeipotai ava naporai vahe pe pāhuve yuvirecoi vaheerã. Pesecoãha avei ava, ore apóstol oroico, ehi tēi vahe; ipare peicua iporombopa tēisa yuvireco. ³ Che aicua peñemosañe peyemombaraisu peico che raisupave; ndapecuerai eté ipipe. ⁴ Che rumo aicua oime mbahe ndahei vahe che pīha rupi pe recocuer: ndapeyeaisu iri inungar yipin-

dar. ⁵ Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tūpa upe; peyeaisu iri catu inungar yipindar. Anise ayevíra pēu, arocuapara pe vera hi senda sui acoi ndapeyeviise Tūpa upe. ⁶ Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté. ⁷ ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi oyemoviracua vahe mbahe-mbahe tēi apoēhi āgua, itohu amondora ivira ha tecovesa resendar oime vahe teco orisave che Ru piri, ehi' erera icuachía chupe.

Ñehesa Esmirna pendar upe

⁸ "Eicuachía avei Tūpa rembiguai Esmirna pendar che reroyasareta rārosar upe: 'Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pēu aipo ehi: ⁹ Che aicua pe yemombaraisusa, pe paraisusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tēi vahe, ore Tūpa rembiporavo judío oroico, ehi tēi vahe. Ndahei rumo ahe yuvirecoi. Esepia, Carugar reroyasar tēi evocoi yuvirecoi. ¹⁰ Ndapesiquiyei chira pe paraisu āgua sui. Esepia, Carugar osoquenda ucara amove pe pāhu pendar secoāha āgua; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porrecosa tecovesa pēu. ¹¹ ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tēi apoēhi āgua, ahe imanore ihā ndoiporarai chira imoñuviriosa manosa pipe, ehi' erera icuachía chupe.

Ñehesa Pérgamo pendar upe

¹² "Eicuachía avei Tūpa rembiguai Pérgamo pendar che reroyasareta rārosar upe: 'Aipo ehi acoi vireco vahe quise pucu saimbe yoya vahe: ¹³ Che aicua pe recosa. Aheve acoi Carugar oguapí oí; mborerecuar guasu nungar imboyeroyapí secoi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tēi che recocuer mombehu tuprisar Antipas evocoi tecua Carugar recosave. ¹⁴ Che rumo aicua mbahe pe resendar: eipeve amove ava ndoyepepi potai eté Balaam porombohesa sui yuvireco. Ahe omboaracua Balac israelita mboangaipa uca āgua, toyuvirohuño mbahe roho seropovēhepri mbahe rahanga upendar tēi, oya, iyavei, toyemboaguasaño yuvireco, oyapave avei. ¹⁵ Iyavei amove ava pe pāhuve ndoyepepi potai eté nicolaíta porombohesa sui yuvireco. ¹⁶ Sese pemboasi pe recocuerai, peyevi Tūpa upe, anise che aso poyava voira pēu, ahese avavara chupe yuvireco che yuru pipe sui osē vahe quise pucu pipe, ehi. ¹⁷ ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! Acoi ava oye-

moviracua vahe mbahe-mbahe tēi apoēhi āgua, semi-hura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oí, evocoi ava oipisi vahe güeraño oicuara, ehi' erera icuachía.

Ñehesa Tiatira pendar upe

¹⁸ "Eicuachía avei Tūpa rembiguai Tiatira pendar che reroyasareta rārosar upe: 'Tūpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu: ¹⁹ Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracua. Aicua avei yipindar sui mbahe peyapocatú aviye vahe. ²⁰ Oime rumo mbahe pe rembiavi: peñemosañño evocoi cuña Jezabel pe pāhu pendar upe, ahe acoi oñehe tēi angahu vahe Tūpa rese viña. Ahe rumo ombopa tēi oporombohesa pipe che rembiguai iyemboaguasa-guasa tēi uca āgua sereco iyavei ohu uca mbahe roho mbahe rahanga tēi upe seropovēhepri yuvireco chupe. ²¹ Che amondo vite tēi ari chupe, tomboasi oangaipa Tūpa upe oyevi āgua, che yapave viña. Ahe rumo ndopoi potai eté oyemboaguasa tēisa sui. ²² Evocoiyase cūrítei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco. ²³ Ipare ayucapara imembri ichui. Ēgüe ehi opacatu che reroyasar oicuara yuvireco che aicua tupri ité opacatu ava pihañemoñetasa iyavei ñepeipei pe yacatu amondora pe rembiapogüer repri pēu. ²⁴ Pe rumo opacatu Tiatira pendar ndaperoyai vahe co porombohe raisa iyavei ndapeyembohe vahe Carugar suindar aracuasa, ndicuasai yavai vahe, ehi vahe rese, pēu ndarecoi que ambuae che porocuita. ²⁵ Peyemoviracuañña rumo evocoi mbahe pereco vahe rese, acoi che ayevice voi vitu curi. ²⁶ Acoi ava oyemoviracua vahe mbahe-mbahe tēi apoēhi āgua, oyapo vahe che remimbotar mano rupi eté, chupe amondora mborerecuar seco āgua opacatu ivi rupi ²⁷ inungar che Ru ombou che mborerecuarā cheu; Ēgüe ehi aveira oporocuai opacatu tecua rupi inungar acoi vara guarepochi, mbahe riapiipa uca āgua, aviya acoi mahe-moinda ñaihu apopri viña. ²⁸ Iyavei amondora yasitata cōhe rerusar chupe. ²⁹ ¡Acoi ava osendu pota vahe, toyapisacaño Espíritu omombehu vahe rese opacatu che reroyasar yuvirecoi vahe upe! ehi' erera icuachía.

Ñehesa Sardis pendar upe

3 "Eicuachía avei Tūpa rembiguai Sardis pendar che reroyasareta rārosar upe: 'Acoi ava vireco vahe siete tupri Tūpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tūpa upe nara, ehi pēu viña; omano vahe nungar tēi rumo peico. ² Peyemopoase catu peico iyavei pemonguerēhi catu acoi viroya vite vahe. Esepia, oyepepipa pota ité yuvireco viña. Supi eté mbahe

pe rembiapo che Ru rovaque, ndahei supi tupri vahe. ³ Peyemomahenduha acoi porombohesa peipisi vahe rese; pepoi rene ichui. Peyevi catu Tüpa upe. Ndapeyemopoaseise rumo, asora pëu inungar imonda rai vahe, ëgüe ahera vicho pe resapiha. ⁴ Oime rumo amove ava pe pãhu pendar ndoyapoi eté angaipa yuvireco, evocoyase inungar ava oguata vahe oturucuar morochi vahe rese, ëgüe ehi aveira ahe güeco maranehi pipe oguata che rupi yuvireco. Esepia, ahe chupe iya ité. ⁵ Acoi ava oyemoviracua vahe mbahe-mbahe tēi apoēhi ãgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pipe sui, asenoira rumo che Ru rovai iyavei sembiguai eta rovaque avei curi. ⁶ ¡Acoi ava osendu pota vahe, toyapisacaño Espiritu omombehu vahe rese che reroysar yuvirecoi vahe upe! ehi' erera icuachía.

Ñehesa Filadelfia pendar upe

⁷ "Eicuachía avei Tüpa rembiguai Filadelfia pendar che reroysareta rãrosar upe: 'Co seco maranehi vahe, supi tupri vahe ité, vireco vahe mborerecuasa arachendar mborerecuar guasu David nungar, acoi omboise que oquenda, ñepe yepe que ava nomboyai chietera; iyavei acoi omboyase, ñepe yepe que ava nomboi chiete aveira, ahe aipo ehi: ⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pëu pemombehu vaherã che recocuer. Ahe que ñepe yepe ava nomboyai chietera yuvireco. Esepia, yepe pe nipirata tuprii vahe, peroya ité rumo che ñehe iyavei ndacheñomi eté ava sui peye. ⁹ Co Caruguar reroysar semira tēi vahe, ore Tüpa rembiporavo judío oroico, ehi tēi vahe, ndahei rumo ahe eté vahe yuvirecoi. Ahe amoñenopiha ucara pe rovai, toicua yuvireco che pe raisusa, che yapave. ¹⁰ Esepia, peroya ité che porocuita, peyemoviracua ité evocoi mbahe tēi upe peico. Evocoyase che opoepira acoi ari tecoãhasa ouse opacatu ivi rupindar upe curi. ¹¹ Ayevi poyavara. Peyemoviracua catu Tüpa reroysa pereco vahe rese. Evocoyase ñepe yepe que ava ndovirocui chietera Tüpa suindar porerecosa pe sui. ¹² Acoi oyemoviracua vahe mbahe-mbahe tēi apoēhi ãgua yuvireco, ahe che Ru piri nara ité yuvirecoira. Ahe evocoyase inungar-ra che Ru Tüpa rēta vīracuasa ndopai vahe yuvireco. Sese arova ucara che Ru Tüpa rer iyavei che Ru Tüpa recua rer avei no, ahe Jerusalén piasu, evocoi ou vaherã iva pendar che Ru Tüpa sui, iyavei che rer ipiasu vahe ité arovara sese no. ¹³ ¡Acoi ava osendu pota vahe, toyapisacaño Espiritu remimombehugüer rese che reroysareta upe! ehi' erera icuachía.

Ñehesa Laodicea pendar upe

¹⁴ "Eicuachía avei Tüpa rembiguai Laodicea pendar che reroysareta rãrosar upe: 'Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tüpa rembiapo, ahe aipo ehi: ¹⁵ Che

aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raimi tēi vahe nungar peico pe rembiapo pipe. ¡Ñepe reseve vahe rumo aipota, ndahei iguayi tēi vahe! Pe recocuer rumo iguayi tēi vahe nungar, sese opomboyevñora cheyesui. ¹⁷ Esepia, pepihañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraisusa che Ru rovaque inungar ndasesapisoi vahe peico. Iyavei ndapeyavii nditurucuai vahe peico. ¹⁸ Sese opomboaracua; peseca iva pendar oro tatave imoatiroprī nungar che sui pe paraisuēhi iri ãgua che Ru rovaque; peseca avei turucuar morochi vahe teco tuprisa peyeupe che suindar nani tupri vahe nungar pipe pe recoēhi ãgua, pe chīēhi ãgua avei iyavei inungar ava oseca mosa güesa upe nara osareco iri ãgua, ëgüe peye aveira. ¹⁹ Che añehe pīrata seco mohivi ãgua che rembiaisu upe yepi. Peyemonguerēhi catu, pemboasi ité pe recocuer che Ru Tüpa upe pe yevi ãgua. ²⁰ Esepia, inungar que ava oquenda omotara oquendipive ohã viña, ëgüe ahe pe pihave vichico; pesenduse che ñehe, pemboira cheu. Che evocoyase aiquera pe piri, yacarura oyepiri. ²¹ Acoi ava oyemoviracua vahe mbahe-mbahe tēi apoēhi ãgua yuvireco, ahe amboguapi ucara che ipive imoi che porocuaisave, inungar che mbahe tēi reco reroyi pare, aguapi che Ru ipive vite. ²² ¡Acoi ava osendu pota vahe, toyapisacaño Espiritu remimombehugüer rese che reroysareta upe! ehi imombehu pëu' erera icuachía" ehi Jesús cheu.

Tüpa mboeteisa ivave

4 Ipare asepia mbahe inungar oquenda oyemboi vahe ivave. Ahese evocoi ñehesa ipirata vahe mimbī nungar yipindar oñehe vahe cheu, ahe asendu iri: "Eyeupi ave. Che evocoyase mbahe amboyecuar ndeu mbahe imboaviyepirã curi" ehi.

² Ahe pipeve voi, Espiritu pīratasa pipe aico iyavei asepia tenda ivave, ahe iharive ñepe oguapi oñ. ³ Co oguapi vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda. ⁴ Iyavei asepia evocoi rese oyere tupri ambuae veinticuatro tenda, ahe iharive oguapi yuvinoi veinticuatro avei icuapri yuvirecoi vahe; iturucuar morochi vahe yuvireco iyavei oãca rese omboyere tupri oro apopri yuvireco. ⁵ Evocoyase Tüpa renda sui yuvinose overa-vera vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoi tenda rovai, ahe co siete tupri Tüpa espíritu. ⁶ Evocoi tenda rovai oime avei ndoyavii tupri para guasu tīpiu vahe oyecua tupri vahe mbahe ipipe.

Ambuae tenda pãhu rupi oyere tupri Tüpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no. ⁷ Yipindar yuvirecove vahe pãhu pendar ahe ndoyavii tupri yagua pīta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoy-

avii vira guasu oveve vahe. ⁸ Evocoi ìva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pïtu rupi aipo ehi yuvireco:

“¿Santo, santo, santo ité secoi, yande Yar Tüpa ité, ahe mbahe mboavaisarëhi, yipivé vahe ité, cüriteindar, apirëhi vahe!”

ehi yuvireco.

⁹ Evocoi yuvirecove vahe omboetei yuvireco, “Aviye ndeu” ehi co uguapi vahe oï tenda harive ndopai vahe upe. ¹⁰ Ëgüe ehise evocoyase veinticuatro tupri icuaipri yuvirecoi vahe, ahe oñenopiha imboeteisa pipe sovai yuvireco. Ipare osequiï oãca resendar oyere tupri vahe omborerecuasa resendar sovai aipo ehi:

¹¹ “Ore Yar Tüpa, iya ité nde mboeteisa, ndeu sapucaisa nde pïratasa rese.

Esepia, nde ereyapo vahe mbahe opacatu; nde remimbotar rupi niha oime opacatu mbahe” ehi yuvireco chupe.

Ovesami upe güeraño iyacatu cuachiar imboyapri mboi ãgua

5 Che asepiã cuachiar Tüpa vireco vahe oacato coti, icuachiapri ipipe coti, ocar coti avei no, imboyapri siete sello pipe. ² Ipare asepiã Tüpa rembiguai seco ìvate vahe, ahe oporandu pïrata oico aipo ehi: “¿Ava upe vo iya cuachiar mboi ãgua iyavei sello imboyeroyapri mondoro ãgua no?” ehi. ³ Ndipoi eté rumo que ìva pendar, ìvi pipendar, ìvivri pendar oicatu vaherã cuachiar pipira sepia ãgua viña. ⁴ Evocoyase che ayasehó iteanga. Esepia, ndipoi eté que ñepei yepe oime angara aviye vahe cuachiar pipira sepia ãgua viña. ⁵ Ahese icuaipri pãhu pendar ñepei aipo ehi cheu: “Ereyaseho iri eme. Esepia niha, evocoi ava yagua pïta yahe vahe chupe, Judá suindar, acoi mborerecuar guasu David suindar avei, ahe niha Carugar osecoreroyi. Sese iya ité chupe siete sello mondoro cuachiar pipira ãgua” ehi.

⁶ Evocoyase, asepiã Tüpa rovai ìva pendar irungatu yuvirecove vahe pãhuve, icuaipri yuvirecoi vahe mbiterve, ñepei ava Ovesami nungar ihãi, aviye seropovëhepri. Ahe niha vireco siete tupri sãchi, siete tupri avei sesa; sesa evocoyase siete tupri Tüpa espíritu yuvirecoi opacatu ìvi rupi imboguatapri. ⁷ Ipare evocoi Ovesami oso, oipisi cuachiar evocoi tenda harive uguapi vahe yacato coti sui; ⁸ ipisi pare, evocoi irungatu yuvirecove vahe, iyavei veinticuatro tupri icuaipri, ahe oñenopiha Ovesami rovai yuvireco. Oyacatu ñepei-peï vireco arpa yuvireco, itaisi riru oro apopri, ahe avei vireco yuvireco, ahe itaisi niha Tüpa reroyasar yeruresa. ⁹ Osapucaï ipiasu vahe sapucaisa pipe aipo ehi yuvireco:

“Ndeu iyacatu ité cuachiar pisi ãgua,

imboyapri mondoro ãgua avei no.

Esepia niha, nde yucapri seropovëhepri ereico.

Evocoyase nde ruvi pipe eremboepipa Tüpa upe nara opacatu ava ambuae-ae tãi vahe, iñehe ambuae-ae tãi

vahe avei, ñepei-peï tecua yacatu rupindar, ìvi rupindar avei yuvireco.

¹⁰ Iyavei eremomborerecuã uca Tüpa upe nara, erembopahi uca avei no, ipare ahe oporocuaïra opacatu ìvi rupi yuvireco” ehi osapucaï yuvireco.

¹¹ Ipare asepiã, asendu avei Tüpa rembiguai rehii ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuaipri ñehe avei asendu setã iteanga yuvirecoi. ¹² Ahe aipo ehi pïrata yuvireco no:

“¿Co Ovesami yucapirer, ahe chupe iyacatu ité mborerecuasa pisi ãgua, opacatu Tüpa suindar porerecusa pisi ãgua, mbahecuasa,

pïratasa, mboyeroyasa, poromboeteisa, iyavei sapucaisa pisi ãgua avei no!” ehi.

¹³ Ahese asendu avei opacatu Tüpa rembiapo ìvave yuvirecoi vahe, ìvi pipendar, ìvivri rupindar iyavei para guasu pipendar, aipo ehi yuvireco:

“¿Toime sapucaisa, Tüpa upendar mboyeroyasa, imboeteisa, iyavei pïratasa, ahe timondosa apirëhi vaherã Tüpa acoi güendave uguapi vahe upe, Tahir Ovesami nungar upe avei no!” ehi.

¹⁴ Evocoi irungatu ava yuvirecove vahe, “¿Ëgüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopiha yuvireco sovai imboeteisave.

Siete sello

6 Ipare asepiã acoi Ovesami omondoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pãhu pendar oñehe pïrata. Iñehe ndoyavii osunu vahe, “¿Erio!” ehi cheu. ² Ahese asepiã cavayu morochi vahe, ahe ava ihari pendar vireco virapar. Chupe omondo yeguaca yuvireco. Ëgüe ehi ahe osë seco pïrata catu vahe ava reco reroyi ãgua.

³ Omondorose acoi Ovesami imoñuviriosa sello, ahese asendu imoñuviriosa yuvirecove vahe pãhu pendar ñehe, “¿Erio!” ehi vahe cheu. ⁴ Ipare osë cavayu pïra vahe, ahe ava ihari pendar oipisi pïratasa mbahe tuprisa rerocua ãgua ìvi pipendar ava sui ‘toyeyuca-yuca tãi yuvireco’ oyapave. Ipare imondosa quise pucu chupe.

⁵ Omondorose acoi Ovesami imombosapisa sello, ahese asendu imombosapisa yuvirecove vahe pãhu pendar ñehe, “¿Erio!” ehi vahe cheu. Amahe sese, ipare asepiã cavayu sũ vahe, ahe ava ihari pendar vireco opo pipe mbahe rãhasa. ⁶ Ipare asendu yuvirecove vahe cotindar ñehe, ahe aipo ehi: ‘Nëpei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no” ehi.

⁷ Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¿Erio!” ehi cheu. ⁸ Amahe, ipare asepiã cavayu iyu rasi

vahe, ahe ava ihari pendar serer Tehögüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa teco pīratasa ivi imoirungatusa yahocuer rupi iguata āgua ava yuca āgua vavasa pipe, tieporēhi pipe, mbaherasi pipe, mbahe ipi pipe avei no.

⁹ Evocoi Ovesami omondorose imbopoyandeposa sello, ahese asepia mbahe seropovēhepri rendavri ve ava hā, ahe yucasa vahe yuvireco Tūpa Ņehengagüer mombehusa sui tēi iyavei Jesús roroyasa sui tēi avei no. ¹⁰ Ahe aipo ehi pīrata yuvireco: "Ore Yar Tūpa seco maranehi, supi tupri vahe, ¿mbahese vo eremombarai-sura ore yucasarer yuvirecoi vahe ivi pipendar ore repisave?" ehi yuvireco. ¹¹ Ipare imondosa iyacatu turucuar morochi vahe chupe, ahese aipo ehi: "Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco" ehi.

¹² Ipare Ovesami omondorose imoñepei ovasa sello, ahese oime ivi ririi ipīratá vahe. Ari evocoiyase sū, aviye acoi turucuar sū vahe mano sendar yemondosa iyavei yasi pīrá inungar tuvī, ¹³ yasitata evocoiyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi. ¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pāhu avei no osiri güenda sui yuvireco. ¹⁵ Mborerecuareta avei co ivi pipendar yuvirecoi vahe opa tēi oñemi mbahecuar pipe yuvireco, ita guasu pāhu rupi avei yuvireco no, oyoya guasu seco ivate vahe, sundao rerecuareta, mbahe yar seco pīratá vahe, iyavei opacatu tupri mbiguai eta, ava ndahei vahe mbiguai avei; ¹⁶ iyavei aipo ehi yuvireco ivitri upe, itape guasu upe avei no, "¡Eviapi ore harive, toroñemipa tēi Tūpa sui iyavei Ovesami sui acoi ombou vahe co poronupasa ipīrata vahe oreu! ¹⁷ Esepia, oyepota ité Tūpa ñemoirosa oreu. Ndipoi chietera ava oyemoviracua tupri vahe oyese chupe" ehi yuvireco.

Israel suindar iporavopri yuvirecoi vahe

7 Ipare asepia irungatu tupri Tūpa rembiguai iva pendar yuvinohai vahe irohi coti, norte coti, ari sēsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuēhi āgua, que para guasu pipe angara viña, que ñepei yepe ivira ro angara viña no. ² Ipare asepia avei ambuae Tūpa rembiguai iva pendar ou vahe ari sēsa coti sui, ahe vireco oyese Tūpa oicove vahe rer mondosa. Ahe niha osapucai pīratá evocoi irungatu tupri Tūpa rembiguai iva pendar yuvirecoi vahe upe, oipisi vahe pīratasa ivi, para guasu momara āgua yuvireco, aipo ehi: ³ "¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tūpa rembiguai eta upe isiva rese Tūpa rer icuachiapri!" ehi.

⁴ Ipare asendu Tūpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoi suindar pāhu sui iporavopri yuvireco. ⁵ Doce mil tupri yuvirecoi iporavopri Judá suindar, doce mil tupri

Rubén suindar, doce mil tupri Gad suindar, ⁶ doce mil tupri Aser suindar, doce mil tupri Neftalí suindar, doce mil tupri Manasés suindar, ⁷ doce mil tupri Simeón suindar, doce mil tupri Leví suindar, doce mil tupri Isacar suindar, ⁸ doce mil tupri Zabulón suindar, doce mil tupri José suindar, ipa evocoiyase doce mil tupri Benjamín suindar.

Ava rehii iturucuar morochi vahe

⁹ Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa āgua. Esepia, setá etepri yuvireco iyavei iturucuar morochi vahe pāve; pindo-pindomi vireco opove yuvireco no. ¹⁰ Ipare opacatu guasu oñehe pīrata yuvireco aipo ehi:

"¡Poropñisirosa yande Ru Tūpa suindar, ahe oguapi vahe oñ güendave, iyavei Ovesami suindar avei no!" ehi.

¹¹ Iyavei opacatu Tūpa rembiguai iva pendar yuvirecoi vahe oyere tupri Tūpa renda rese, icuai pri rese avei yuvinoha iyavei irungatu yuvirecove vahe rese avei no; ahese oyeavi omboya ité osiva ivi rese senda rovai Tūpa mboeteisave yuvireco, ¹² aipo ehi:

"¡Ēgüe tehi!

Sapucaisa, poromboeteisa, mbahecuaasa, '¡Aviye ndeu' hesa, poromboyeroyasa, mborerecuasa, teco pīratasa avei tasecoi yande Ru Tūpa upe!

¡Ēgüe tehi apirēhi vaherã ité yepi!" ehi.

¹³ Ahese icuai pri ipāhu pendar aipo ehi cheu cute: "¿Ereicua vo co ava rehii iturucuar morochi vahe pāve yuvirecoi, ereicua que sui pīha yugüeru?" ehi. ¹⁴ Che evocoiyase, "Nde rumo ereicua" ahe chupe. Ipare ahe aipo ehi cheu: "Co acoi yuvinoso tupri vahe ité teco asisa sui yuvireco, inungar oyosei, omomorochi vahe oturucuar, Ēgüe ehi avei güecocuer imomorochi Ovesami ruvi pipe yuvireco.

¹⁵ "Sese Tūpa renda rovai yuvirecoi, chupe mbahe apo āgua ari, pñtu rupi avei sēta pipe.

Güendave oguapi vahe oñ, güecocuer pipe osepira.

¹⁶ Evocoi ndiyumbiasí iri chira yuvireco, ndihusei iri chaveira, iyavei ari ndoyope iri chira, ndasacuvasi iri chaveira chupe no.

¹⁷ Esepia, evocoi Ovesa secoi Vu renda rovai, ahe osārora ava rehii sereco inungar ovesa rārosar. Ipare opara viraso tecovesa resendar i ndopai vahe-save imboihu āgua.

Tūpa evocoiyase omombituhupara imboyasehosa sui yuvireco" ehi.

Imoñuvirío ovasa sello iyavei itaisi rapisa oro apopri

8 Ipare coiye cute co Ovesami omondorose imoñuvirío ovasa sello cuachiar mboyasa ichui, ahese sñu tupri ivave ñepei hora yemombitesa rupive. ² Ichui asepia siete tupri Tūpa rembiguai iva pendar yuvinohai vahe Tūpa rovai, chupe opa imondosa siete tupri mimbí. ³ Ipare ou ambuae Tūpa rembiguai iva pendar

oro itaisi rapisa reseve, iyavei ou ohā itaisi rapisa renda rovai; ipare imondosa tuvichā itaisi chupe oicuavēhe vaherā oyoya tupri opacatu ava Tūpa upendar yeruresa rese oro mbahe reropovēhepri renda harive; ahe Tūpa renda rovai chini vahe. ⁴ Itaisi rātachi evocoyase oso Tūpa rembiguai iva pendar po sui. Ēgūe ehi oyepota oso Tūpa recosave, oyoya tupri chupendar yeruresa rese. ⁵ Ipare evocoyase Tūpa rembiguai iva pendar opoco itaisi rapisa rese, omboapipo mbahe reropovēhepri renda pendar tātapii pipe. Ipare opa omombo ivi hari rupi. Aheseve voi osunu vahe opororo-roró, overa-vera iyavei ivi oririi.

Siete vahe mimbi

⁶ Evocoyase siete tupri Tūpa rembiguai iva pendar oyemoingatu voi güemimbi moñehe āgua yuvireco.

⁷ Yipindar vahe Tūpa rembiguai omoñehe güemimbi, ahese imombosa ivi hari rupi amanda iyavei tata oye-seha vahe tuvi rese. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihī reseve avei opa yuvirocai.

⁸ Imoñuviriosa Tūpa rembiguai omoñehe güemimbi. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yohacuer oyeapo tuvi. ⁹ Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imocañisa.

¹⁰ Ipare imombosapisa Tūpa rembiguai iva pendar omoñehe güemimbi, ahese yasitata tuvichā vahe oviapi iva sui ou. Sendi guasu inungar acoi ivira rese tata sendi guasu vahe. Ahe oviapi iai mombosapisa yahocuer pipe iyavei ivi sui i ohē vahe mombosapisa yahocuer pipe avei no. ¹¹ Yasitata rer evocoyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

¹² Imoirungatusa Tūpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosape iri yuvireco ari mombosapisa yahocuer pipe, pītu mombosapisa yahocuer pipe avei no.

¹³ Ipare asepia, asendu avei no vira guasu ovevese iva mbiter rupi, aipo ehi pucu oñehe oico: “¡Too, too! ¡Iparaísu catura moco ava yuvirecove vite vahe ivi pipe yuvireco acoi omoñehese ambuae mbosapī Tūpa rembiguai güemimbi yuvireco!” ehi.

9 Tūpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu pītumimbi vahe mboisa. ² Ipare omboise ivicuar rovapisa, ichui opūha tātachi, inungar acoi horno guasu pipe sui osē vahe. Evocoyase evocoi tātachi ndosape uca iri ari upe, niporēhi iri eté mbahe. ³ Iyavei evocoi tātachi sui opa yuvinose tucru guasu rehii oñemosai opacatu ivi rupi; chupe avei imondosa seco pīrata āgua inungar acoi mbaherumbiquiāpe. ⁴ Icuaisa rumo opacatu capihī mbahe rocri iyavei ivira momaraēhi āgua, ēgūe ehi

rumo acoi ava nomboyecuai vahe osiva rese Tūpa rer, chupe nara ité. ⁵ Nimondosai rumo mborocuaia chupe ava yuca āgua. Ēgūe ehi rumo ‘tomombaraisu pucu rane poyandepo yasi rupi sereco’ oyapave tēi, inungar tupri acoi mbaherumbiquiāpe rasicuer.

⁶ Evocoi ari rupi ava oipota tēira omano āgua yuvireco viña. Imanosa rumo que vitera yuvireco ichui.

⁷ Tucru guasu rehii inungar cavayu imoingatupri vavasave nara yepi; oāca rese evocoyase vireco ndoyavii yeguaca oro apopri, iyavei sova aviye tupri ité ava repiaca. ⁸ Iha ndoyavii cuña ha, sāi evocoyase ndoyavii tupri yagua pīta rāi. ⁹ Setecuer evocoyase oyopia tupri guarepochi apopri, iyavei ipepo riapugüer aviye tupri ité acoi cāreto riapugüer cavayu vinoña vahe vavasave. ¹⁰ Vireco vuguai rese opopiar aviye mba-herumbiquiāpe popiar. Ahe niha vireco opīratasa poyandepo yasi rupi ava momara āgua tēi. ¹¹ Evocoi tucru guasu rerecuar, ahe icuai pri ivicuar ipicucu vahe mboi āgua. Ahe serer hebreo ñehe pipe Abadón; griego ñehe pipe evocoyase Apolión ehi.

¹² Opa yipindar vahe mbahe-mbahe tēi; oime vite rumo co pare ñuvirío mbahe tasi vahe.

¹³ Imoñepei ovasa Tūpa rembiguai omoñehese güemimbi, ahese asendu ñehesa itaisi rapisa renda oro apopri Tūpa rovaindar irungatu sāchi vahe pāhu sui. ¹⁴ Ahe aipo ehi evocoi imoñepei ovasa Tūpa rembiguai upe: “Eyorapa evocoi irungatu Tūpa rembiguai ñapichimbri iai guasu Eufrates ivirindar” ehi. ¹⁵ Evocoyase opa yorasa ava mombosapisa yahocuer yuca āgua yuvireco. Esepia, evocoi imoingatupri co ari rupi tuprise nara yuvireco. ¹⁶ Ipare asendu sundao rehii cavayu harive yuvirecoi vahe, ahe setacuer doscientos millones tupri.

¹⁷ Ēgūe ehi asepia cavayu rehii che quer nungar pipe, ihari pendar evocoyase vireco opochiha rupi tupri oyoe-pisa guarepochi apopri yuvireco, ahe iparagüer pīra vahe tata nungar, sovi vahe, iyu vahe avei no. Cavayu rehii āca evocoyase aviye tupri yagua pīta āca, iyuru sui evocoyase yuvinose-nose tata, tātachi iyavei azufre. Ipipe sui ava mombosapisa yahocuer opa tupri omano yuvireco. ¹⁹ Esepia niha, cavayu pīratasa iyuru rese chini, suguai rese avei no; ahe suguai ndoyavii tupri ité mboi āca, ipipe avei ava omomara.

²⁰ Ava rumbirer rumo nomanopa vitei vahe co mbahe tēi sui yuvireco, nosecuñaroi eté güecocuerai yuvireco. Ndopoi potai eté carugar mboetei aisa sui, iyavei opacatu mbahe rahanga tēi oro apopri, guarepochi, bronce, ita, anise ivira apopri mboeteisa sui avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei.

²¹ Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

Tūpa rembiguai iva pendar vireco vahe icuachiapri cuachiarmi

10 Ipare asepia ambuae Tūpa rembiguai iva pendar ipīratá vahe ogüeyise iva sui ou mbahe pītu

pāhuve; ahe ñaca rese arco iris oyere tupri. Sova sendí aviye ari, setima evocoyase ndoyavii tata rendigüer opūha tupri vahe. ² Cuachiarimi oyemboi vahe vireco opove. Opí oacato cotindar pipe opīro para guasu rese, ambuae opive evocoyase opīro ivi rese. ³ Evocoyase sāsese pīratá, inungar yagua pīta rāse; sāsese, evocoyase siete tupri osunu vahe ñehe oyendu yuvireco. ⁴ Oñehepase, ahese iñehe che aicuachiará viña; asendu rumo iva sui ñehesa aipo ehi vahe: “Eremboye-cuai rene acoi siete tupri osunu vahe ñehe, ndere-icuachiará chietera” ehi cheu.

⁵ Evocoyase Tūpa rembiguai asepiá vahecuer, ahe acoi opīro vahe para guasu rese, ivi rese avei opo oacato cotindar omopuha iva coti. ⁶ Ichui Tūpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera; ⁷ oyepotase rumo imoñuvirío ovasa Tūpa rembiguai upe güemimbi moñehe āgua, ahese imboaviesara Tūpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

⁸ Ñehesa asendu vahe iva sui oñehe iri cheu aipo ehi: “Eso, tereipisi cuachiarimi imboipri Tūpa rembiguai vireco vahe evocoi opīro vahe para guasu rese ohā, ivi rese avei no” ehi. ⁹ Evocoyase aso Tūpa rembiguai upe, aporandu cuachiarimi rese, ahese ahe aipo ehi cheu: “Ndo co, eipisi, ehu. Nde yuru pipe evocoyase sēhera eiri nungar, nde aviterve rumo irora” ehi cheu.

¹⁰ Ahese aipisi cuachiarimi cute Tūpa rembiguai sui, ipare ahu; yipindar sēhé che yuru pipe inungar eiri, amocopase rumo, che aviterve iró cheu. ¹¹ Evocoyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborrecuar rese avei no” ehi.

Ñuvirío ava Tūpa recocuer mombehusar

11 Ipore ombou vara mbahe rāhasa yuvireco cheu, ichui aipo ehi yuvireco cheu no: “Erio, teresāhapa tūparo, mbahe reropovēhepri renda avei, ipare opara ereipapa ipipendar Tūpa mboeteisar retacuer” ehi. ² “Nderesāhai chira rumo ñachimbrí pipe tūparo rocar rupi. Esepia, evocoi opa imondosa ava Tūpa ndoicuai vahe upe, ahe opīrora tecua nimarai vahe rese yuvireco cuarenta y dos yasi rupi” ehi. ³ “Ipore ñuvirío ava amondora che recocuer mombehu āgua opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai.

⁵ Acoi que oimese ovireco mara pota vahe, ahese che reco mombehusar yuru sui osēra tata sapipa āgua; ēgüe ehira ava omano que che reco mombehusar reco momara potasar. ⁶ Co ñuvirío vireco opīratasa oqui vahe mombita āgua, acoi ari rupi che reco mombehu vitesese yuvireco; iyavei vireco pīratasa i recuñaro āgua tuvi pipe yuvireco, imombaraisu uca āgua avei ivi opacatu-catu tēi mbaherasi pipe güemimbotar rupi.

⁷ Omboavieyepase rumo Tūpa reco mombehusa yuvireco, ahese osēra ivicuar guasu ipicucu vahe sui mbahe ipi vai. Ahe ovavara sese, osecopira, ichui oyucara. ⁸ Sehögüer evocoyase yangarecuavēhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no. ⁹ Ipore mbosapi ari yemombitesa rupi, ava-ava tēi tecua rupindar, ava ambuae-ae tēi vahe, iñehe ambuae vahe iyavei ambuae-ae ivi rupindar osepiaño tēira sehögüer yuvireco iyavei ahe noñoti ucai chietera ava upe yuvireco. ¹⁰ Ava yuvirecove vahe ivi pipe, ahe oviharetera yuvireco imano rese. ēgüe ehira sorivete, iporrecora oyese yuvireco. Esepia, evocoi ñuvirío ava Tūpa ñehe mombehusar imombaraisupirer yuvirecoi.

¹¹ Mbosapi ari yemombite pare rumo, Tūpa opa ombogüerayevi, ahese opūhapa yuvireco. Evocoyase ava opacatu osepia vahe osiquiyé iteanga yuvireco ichui.

¹² Ipore ahe ñuvirío osendu yuvireco ñehesa ipīrata vahe iva suindar aipo ehi vahe: “¡Peyeuropa ave ivate!” ehi. Evocoyase opa oyeupi ivave yuviraso iva quiha pāhu rupi oamotarēhisareta rembiepiave. ¹³ Aheseve voi oime ivi riríi tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoyase ava rumbirer, osiquiyepave tēi osapucai Tūpa iva pendar upe imboeteisa pipe yuvireco.

¹⁴ Opa mbahe-mbahe tēi moñuviriosa cute; ou poyava irira rumo imombosapisa.

Imoñuvirío ovasa Tūpa rembiguai omoñehe güemimbi

¹⁵ Imoñuvirío ovasa Tūpa rembiguai omoñehese güemimbi, ahese oyeendu ñehesa ipīrata vahe iva suindar aipo ehi vahe:

“Yande Yar Tūpa, Sembiporavo Poropīsiosar avei vireco co ivi pipendar mborrecuasa opovrive yuvireco cute.

Ahe evocoyase mborrecuar apirēhi vahe itera secioi” ehi.

¹⁶ Evocoyase veinticuatro tupri icuaiipri, evocoi oguapi vahe yuvirio Tūpa renda rovai, ahe oyeaivi omboya ité osiva ivi rese imboeteisa pipe yuvireco, ¹⁷ aipo ehi:

“Aviye ndeu ore Yar, Tūpa mbahe mboavaisarēhi, nde acoi yipisuive vahe ité, ereicoveño avei cūritei.

Esepia, nde pīratasa tuvichá vahe pipe ereporocuai eico.

¹⁸ Ambuae tecua rehii pendar nde amotarēhi ité yuvireco.

Nde ñemoirosa rumo cūritei oyepota, iyavei nde porandusa oime vora ava omano vahe upe.

Iyavei eremondora mbahe porrecosa nde rembiguai eta nde ñehe mombehusar upe,

ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco

ivi coti catu vahe upe avei no; iyavei eremocañira co ivi pipe mbahe tēi rerusar" ehi yuvireco.

¹⁹ Ahese oyemboi tūparo iva pendar, iyavei oyecua tupri cuachiar porocuaita resendar riru. Ipare overa- vera, siapu guasu, osunu, ivi oririi, amanda osururú avei no.

Cuñia iyavei mbahe ipi oporomocañi vahe

12 Evocoyase iva rese oyecua mbahe poromondiisa tuvichá vahe ambuae mbahe mboyecua água: oime cuñia iturucuar inungar arí rendigüer, aviye op̄ro vahe yasi rese ohã, oãca yeguaca rese doce tupri yasitata vireco. ² Co cuñia ipuruha oico, sãse tēi omembri iha pota água oyesui. Esepia niha, oiporará ité tasicuer. ³ Ipare coiye oyecua iva rese ambuae mbahe mboyecua tupri: mbahe ipi p̄ira vahe, ahe ñaca siete tupri, sãchi evocoyase diez iyavei vireco yeguaca oãca yacatu. ⁴ Suguai evocoyase ombotiriri yasitata iva pendar imombosapisa sui ñepi iyahocuer seraso. Ipare opa omombo ivive. Ahe evocoyase opita osãro cuñia imembira pota vahe rovai ohã, "Tahupaño voi imembri oha ramoseve" ehi viña. ⁵ Ipare co cuñia membri oha cuimbahemi, ahe mborerecuar virecora mbococa guarepochi apopri, ip̄rata catu vahe secoira opacatu ava ivi rupindar upe. Ichui serocuasa voi serasosa Tūpa rovai. ⁶ Cuñia evocoyase oñemi ivi iporupirēhisave oso. Aheve omoingatu Tūpa iyemboerecua água, eipeve icaru água mil dosciento sesenta arí rupi.

⁷ Oime avei vavasa ivave; ahese Tūpa rembiguai iva pendar ivate catu vahe Miguel güeru ovoya eta ovava água mbahe ipi oporomocañi vahe upe ivoya upe avei yuvireco. ⁸ Ndoicatu eté rumo Miguel recopi água yuvireco. Sese ndipoi eté ivave seco água yuvireco chupe. ⁹ Ēgüe ehi imboyepipisa mbahe ipi oporomocañi vahe reco p̄ratasa sembiguai eta reseve; opa imombosa ivi pipe yuvireco. Evocoi mboi vai, "Carugar" ehi vahe yuvireco chupe; "Satanás" ehi avei yuvireco chupe. Evocoi niha ava ombopa-mbopa tēi vahe opacatu ivi pipe yuvireco.

¹⁰ Evocoyase asendu ñehesa ip̄rata vahe ivave, aipo ehi vahe:

"Cūritei oime porop̄sirosa, p̄ratasa iyavei yande Tūpa mborerecuasa, Porop̄sirosar mborerecuasa avei no.

Esepia niha, imboyepipisa iva sui acoi oseca-seca vahe yande rivri Tūpa rero yasareta recocuer momara água p̄tu, arí yacatu rupi yande Ru Tūpa rovai.

¹¹ Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tupri pipe sui avei no.

Esepia niha, ndosiquiyei eté güetecuer mocañi água yuvireco.

Ahe rumo oyemoingatu voi eté omano água.

¹² ¡Peyemboviha catu pe iva iguar peico vahe!

Pe rumo, ¡peparaisu catura ivi pipe, para guasu pipe avei peico vahe!

Esepia niha, Carugar ogüeyi p̄eu oñemoirosa pipe, oicuase güeco pucuēhi água" ehi.

¹³ Ipare mbahe ipi oporomocañi vahe oicuase imombopri güecose ivi rese, ahese omoña cuñia imembri cuimbahemi reseve yamotarēhisave pipe. ¹⁴ Evocoi cuñia upe rumo imondosaño ñuvirío vira guasu pepo iveve água chupendar ivi imoingatupri ava porēhisave seco água, amombri mbahe ipi oporomocañi vahe sui.

Aheve oyopoi mbosapi araviter yemombitesa rupive.

¹⁵ Ipare mbahe ipi oporomocañi vahe oyuru rupi ombotipimacua cuñia raquicuei iai apo 'tocañi tēi' oyapave viña. ¹⁶ Ivi rumo oime co cuñia p̄tiviisa, ahe oyeca.

Ipare opa omoco iai evocoi mbahe ipi oporomocañi vahe rembiapo. ¹⁷ Evocoyase, oñemoiró iteanga cuñia rese, ipare oso ovava ambuae ichuindar rehii rese, ahe omboyeroya vahe ité Tūpa porocuaita yuvireco iyavei yuvirecoi tupri vahe Jesucristo remimombehu rupi.

¹⁸ Ipare mbahe ipi oporomocañi vahe opita para guasu popive ohã.

Ñuvirío mbahe ipi vai

13 Ipare asepia para guasu pipe sui osēse mbahe ipi vai, ahe siete tupri ñaca vahe iyavei diez tupri sãchi. Guãchi yacatu evocoyase vireco ñepi-pey oyeguaca, iyavei oãca yacatu rese vireco terer Tūpa upe mbahe tēi vahe. ² Co mbahe ipi vai aviye tupri acoi yaguar iparaũ vahe; iyavei ipi aviye tupri oso pi, iyuru evocoyase aviye yagua p̄ta yuru. Mbahe ipi oporomocañi vahe evocoyase omondo op̄ratasa iyavei omborecuasa chupe. ³ Ñepi mbahe ipi vai áca oyeapicha guasu vahe ndoyavii omano vaheerã ité viña; ahe rumo ocuera tupri iriño evocoyase opacatu guasu ava sepia, ndoyembovihai. Ichui viroya catu yuvireco. ⁴ Omboetei guasu mbahe ipi oporomocañi vahe sereco yuvireco. Esepia, omondo omborecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: "Ndipoi eté mbahe ipi vai nungar, iyavei ndipoi eté ava oicatu vahe ovava vaheerã sese" ehi yuvireco.

⁵ Iyavei mbahe ipi vai upe ipotasa iyemboivate ai água oñehe pipe ava rovaque iyavei Tūpa roerío água avei no, iyavei mborerecuar guasu seco água cuarenta y dos yasi rupi. ⁶ Ēgüe ehi iñehe mara-mara tēi Tūpa rese, iñehe-ñehe tēi avei serer maranehi rese, sēta rese, iva pendar rese avei no. ⁷ Imondosa avei chupe vavasa apo uca água Tūpa upendar ava eta upe secopi água. Ipare imondosa avei mborerecuar seco água chupe ava ambuae-ae tēi vahe upe, secua ambuae vahe upe, ambuae-ae tēi iñehe vahe upe, iyavei ambuae ivi rupindar upe avei no. ⁸ Ipare omboetei ai sereco yuvireco opacatu ava ivi pipendar acoi ivi apoēhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ "Acoi ava oyeoquenda uca vaheerã, oyeoquenda ucaño itera; iyavei acoi ava omano vaheerã quise pucu pipe, ipipeño ité omanora."

Co pipe oyecua Tūpa rese yeroyasa iyavei ipĩratasa ava chupendar rese.

¹¹ Ipare asepia ambuae mbahe ipi vai osẽ vahe ivivri sui. Co vireco ñuvirio guãchi ndoyavii tupri Ovesa rãchi, mbahe ipi oporomocañi vahe ñehe pipe rumo oñehe oico. ¹² Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rãgüer sui. ¹³ Iyavei oyapo setá mbahe poromondiisa mbahe mboyecua ãgua. Iva sui eté niha oiti uca tata ivive imbou opacatu ava rembiepiave. ¹⁴ Ombopa tẽi ava ivi pipendar yuvirecoi vahe mbahe poromondiisa pipe evocoi imondosa vahe yapo ãgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo ãgua imboeteisave. ¹⁵ Ipare imondosa pĩratasa chupe tecovesa mondo ãgua evocoi sahanga upe 'toñehe, toyuca uca avei ava opacatu omboeteiẽhisar' oyapave. ¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecoprii vahe upe, mbiguai tẽi upe, ahe chupe, "Toyecuachía opo oacato cotindarve yuvireco, anise osivave" ehi. ¹⁷ Ahese ava ndipoi eté oicatu vahe mbahe reroqua, anise que mbahe mondo ãgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Iya pereco mbahecuasa co renducua tupri ãgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

144,000 ava iporavopri sapucaisa

14 Ipare asepia Ovesami ivitri Siõn rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco. ² Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, ãgüe ehi siapugüer. ³ Ipare osapucaí sapucaisa ipiasu vahe yuvireco Tūpa rovai iyavei iva pendar irungatu yuvirecove vahe rovai, icuairi eta rovai avei no. Ñepeí yepe que iva pendar ndoicatu eté evocoi sapucaisa rese oyembohe vaherã. ãgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pãhu sui, ahe güeraño tupri ité oicatu osapucaí yuvireco. ⁴ Co ava ndoyapoi vahe ité mbahe co coti tẽi cuña rese. Esepia, oñearo tupri güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pãhu sui iyavei inungar yipindar mbahe seropovẽhepri Tūpa upe, Ovesami upe avei. ⁵ Ndipoi eté que temira sese. Esepia niha, ndipoi eté mbahe oyavi vahe yuvireco.

Mbosapĩ Tūpa rembiguai omombehu iñehe ava upe yuvireco

⁶ Evocoiyase asepia ambuae Tūpa rembiguai iva pendar oveve vahe iva mbiter rupi iyavei vireco Tūpa Ñehengagüer pĩsirosa resendar ndopai vahe imombehu ãgua opacatu ava co ivi pipendar upe: opacatu ivi rupindar upe, ava ambuae-ae vahe upe, iñehe ambuae-ae vahe upe, opacatu tecua rupindar upe avei no. ⁷ Ipare oñehe pĩrata aipo ehi: "Pesiquiye Tūpa sui iyavei pesapucaí seco ivatesa rese chupe no. Esepia niha, cüritei oyepota ari chupe ava recocuer rese iporandu ãgua. Pemboetei catu oyapo vahecuer iva, ivi, para guasu, i ohẽ vahe avei no" ehi.

⁸ Ambuae Tūpa rembiguai iva pendar raquicuerindar aipo ehi oico: "¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tẽisa resendar pipe!" ehi.

⁹ Ipare ambuae Tūpa rembiguai iva pendar imombosapisa, saquicue moña aipo ehi pĩratá iri oico: "Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oyecuachía ãgua osiva rese, que opo rese no, ¹⁰ oipisi itera Tūpa ñemoirosa ipĩrata vahe ité; ipare omombaraisura setecuer azufre ocai vahe pipe güembigui iva pendareta reco maranehi rovaque, Ovesami rovaque avei no. ¹¹ Tãtachi icaigüer pendar evocoiyase oyeupira ndopai vaherã, ahese ndipoi chietera pituhusa pĩtu, ari pipe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no" ehi.

¹² ãgüe ehira Tūpa rese ité yuvirecoi vahe yeroyasa oyecua ahe acoi iporocuaíta mboaviye tuprisar, Jesús reroya tuprisar avei yuvireco!

¹³ Ahese asendu ñehesa iva pendar aipo ehi vahe cheu: "Eicuachía co: Co pipe suive sorivete catura acoi ava omano vahe yande Yar rese yuvireco" ehi.

"ãgüe ehi eté —ehi Espiritu imombehu—, opituhura oporaviquisa sui yuvireco. Esepia, mbahe sembiapo rerãcua osora ivave supi" ehi.

Ivi pipendar recoãhasa

¹⁴ Ahese asepia iva quihã morochí vahe; iharive ndoyavii ava oguapí vahe oĩ. Vireco niha oyeguaca oro apopri oãca rese iyavei mbahe miti asiasa saimbé vahe vireco opove. ¹⁵ Ipare osẽ ambuae Tūpa rembiguai tũparo sui. Ahe osapucaí pĩrata evocoi iva quihã harive chini vahe upe: "¡Eyasia nde remiti iyavei emonuha nde rembiasia! ¡Esepia, nde remiti ivi pendar yaviye ité!" ehi ava recocuer uve chupe. ¹⁶ Evocoiyase evocoi chini vahe oyasia güemiti ivive oico, ahese opa omonuha güembiasia.

¹⁷ Ipare osẽ ambuae Tūpa rembiguai tũparo sui, ahe avei vireco mbahe miti asiasa saimbé vahe. ¹⁸ Ipare ambuae Tūpa rembiguai osẽ mbahe reropovẽhepri renda sui, ahe tata rese hañecosar secoi. Iyavei oñehe pĩrata evocoi vireco vahe mbahe miti asiasa upe aipo

ehi: “¡Eyasia uva ha apacuar, evocoi oime vahe ivi pipe! ¡Esepia niha, opa yaviye!” ehi. ¹⁹ Evocoiyase co Tūpa rembiguai inungar oyasia vahe uva ha ěgüe ehi opa ava ipeha ivi pipendar. Ipare opa oyapocatu Tūpa ñemoirosa rāro āgua. ²⁰ Ipare inungar uva ha icambepri tecua cupeve, ěgüe ehi co ava imombaraisu; ichui osē tuvī evocoi tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

Ipa siete tupri Tūpa rembiguai güeru mbaherasi yuvireco

15 Ipare asepia ivave ambuae mbahe mboyecuasa tuvichá vahe poromondiisa: siete Tūpa rembiguai, siete tupri mbaherasi ipa vahe vireco vahe, ahe ipá vahe ité Tūpa ñemoirosa.

² Iyavei asepia para guasu ndoyavii yepiasa oyeseha vahe tata rese. Ahe ipopive yuvinoha ati mbahe ipi vai recopisar, sahanga recopisar iyavei nomondo uca potai vahe serer cuachía āgua yuvireco oyese. Ahe vireco Tūpa upendar arpa yuvireco. ³ Ipare osapucaí Tūpa rembiguai Moisés sapucaisa yuvireco, iyavei Ovesami sapucaisa aipo ehi:

“Tuvichá opacatu mbahe nde rembiapo, che Yar Tūpa opacatu mbahe mboavaisarēhi; nde recocuer supi tupri vahe ité; seco ñvi vahe.

¡Too, nde mborerecuar guasu opacatu ivi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei āgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

⁵ Ipare asepia ivave oyemboise Tūpa rēta imaranehi vahe. Aheve acoi yapocatusa mborocuita resendar.

⁶ Evocoiyase ichui yuvinosepa evocoi siete Tūpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoiyase oyeumbicua opochiha rupi tupri yuvireco.

⁷ Ipare ñepeí evocoi irungatu iva pendar yuvirecove vahe pāhu pendar omondo siete tupri Tūpa rembiguai upe siete Tūpa ñemoirosa riru oro apopri, ahe oicove vahe ité, ndopai vahe. ⁸ Ipare Tūpa rēta omboapipo tātachi, evocoi ou vahe Tūpa reco porañetesa iyavei ipīratasa sui. Aheve ndiyai eté que ava upe seique āgua acoi opase voi eté omomba siete tupri mbaherasi vai vireco vahecuer siete Tūpa rembiguai.

Siete Tūpa ñemoirosa riru

16 Evocoiyase asendu ñehesa ipīrata vahe osē vahe Tūpa rēta pipe sui. Ahe aipo ehi siete Tūpa rembiguai yuvirecoi vahe upe: “Peso, tapeipiyerepa ivi hari rupi evocoi siete tupri mbahe riru pipendar Tūpa ñemoirosa” ehi.

² Yipindar vahe Tūpa rembiguai opa oipiyere igua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tē avei, ahe chupe oime setá caracha vai tasi vahe.

³ Tūpa rembiguai imoñuviriosa opa oipiyere igua riru pipendar para guasu pipe. Ahe evocoiyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

⁴ Tūpa rembiguai imombosapisa opa oipiyere igua riru pipendar iai pipe, ¡ ohē vahe pipe avei no. Ipare opa ahe oyeapo tuvī yuvireco. ⁵ Co pare asendu Tūpa rembiguai ¡ rese ihañeco vahe ñehesa aipo ehi:

“Nde seco tupri vahe ité ereico evocoi ava upe erembose nde ñemoirosa, che Yar Tūpa, seco maranehi vahe.

Nde yipisuivendar ité ereico.

⁶ Esepia, ahe opa oyuca ndeundar ava iyavei nde ñehemombehúsar yuvireco.

Cūrítei rumo eremboihu uca tuvī pipe.

¡Evocoi nungar upe aviyesa rupi eté!” ehi.

⁷ Asendu avei ambuae ñehesa mbahe ropovēhesa renda sui aipo ehi vahe: “Supi eté, che Yar Tūpa, opacatu mbahe mboavaisarēhi, nde ava recocuer mombaraisusa supi tupri vahe ité iyavei nde reco ñvi vahe ité no” ehi.

⁸ Tūpa rembiguai imoirungatusa, opa oipiyere mbahe riru pipendar ari rese, ipare ari upe imondosa pīratasa ava rapipa āgua. ⁹ Ipare opacatu ité ava yuvirocaipa tupri; ndoyevii eté rumo Tūpa upe iyavei nomboeteiño ité yuvireco. ěgüe ehi rumo iñehe mara-mara tēiño mbaherasi rerecose Tūpa upe yuvireco.

¹⁰ Tūpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tēi serecuar ipovri pendar avei pītumim-bisave yuvirecoi. Ava evocoiyase oñeapecusuhu-suhu tēi yuvireco mbahe rasícuer pāhuve; ¹¹ ndopoiño ité rumo mbahe-mbahe tēi aposa sui yuvireco, ahe rumo iñehe mara-mara tēiño Tūpa ivate vahe rese oyeupe mbahe tasi vahe pāhuve yuvireco.

¹² Tūpa rembiguai imoñepeí ovasa oipiyere mbahe riru pipendar iai guasu Eufrates pipe. Ahe evocoiyase opa ipiru peri apo āgua añihivei coti sui mborerecuareta yu āgua.

¹³ Ipare asepia mbahe ipi oporomocañi vahe, mbahe ipi vai, ndahei vahe Tūpa ñehe mombehúsar supi vahe avei, ahe yuvirecoi vahe yuru rupi yuvinose mbosapi caruguar vireque nungar. ¹⁴ Co Caruguar suindar yuvirecoi, ahe oyapo poromondiisa mbahe mboyecuasa yuvireco. Ipare opa yuvinose opacatu ivi rupi mborerecuareta monuha āgua vavasave nara, acoi ari cañi pipe Tūpa mbahe mboavaisarēhi amotarēhisave.

¹⁵ “Peyapisaca tupri che ñehe rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembipapo aviye vahe pipe. Ahese nochi chietera oico che sui” ehi.

¹⁶ Ipare opa omonuha mborerecuareta hebreo ñehe pipe serer Armagedón ve.

¹⁷ Evocoyase imbosietesa Tūpa rembiguai oipiyere iñemoirosa mbahe riru sui ivitu rupi. Ipare iva pendar Tūpa rēta pipe sui osē ñehesa ipīrata vahe evocoi ou vahe senda sui: “¡Opa ité yaposa cute!” ehi. ¹⁸ Ahese oime overa vahe, mbahe siapu guasu vahe iyavei osunu vahe. Ipare ivi orirīi ipīrata catu vahe opacatu ivi rirīi sui ava yuvirecove viteseve ivi pipe. ¹⁹ Tecua guasu oyeca-yeca mbosapī rupi, opacatu tecua evocoyase opa onduru ivi pipendar. Ipare Tūpa oyemomahenduha evocoi tecua guasu Babilonia pendar rembiapo ai rese, evocoyase omondo oñemoirosa ipīrata catu vahe chupe. ²⁰ Opacatu caha pāhu, ivitri avei ocañipa ité yuvireco. ²¹ Iyavei yuviroviapīpa iva sui ava harive amanda guasu, ahe iposiigüer cuarenta kilos rutei. Ava rumo iñehe mara-mara tēiño vite ité Tūpa upe yuvireco amanda sui tēi. Esepia niha, evocoi Tūpa poronupasa ivaté catu vahe.

Cuñā oyemondo-mondo tēi vahe mocañisa

17 Siete Tūpa rembiguai vireco vahecuer mbahe riru yuvireco, ipāhu pendar ñepe ou aipo ehi cheu: “Erio, amboyecuara co cuñā yaguasa serai vahe upe ñemoirosa ndeu, ahe evocoi oguapī i harive oī” ehi. ² “Co cuñā rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

³ Ipare che quer nungar pipe Espiritu omboyecua vahe cheu, Tūpa rembiguai iva pendar che reraso ava porēhisave. Aheve asepia cuñā mbahe ipi vai pīra vahe harive chini. Evocoi mbahe ipi vai opacatu rupi oyapete tupri ñehesa vai Tūpa amotarēhisave sereco oyese, iyavei vireco siete tupri oāca, diez tupri guāchi. ⁴ Co cuñā turucuar, suendi vahe, pīra vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasa-guasa tēisa; ⁵ iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuñā yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi. ⁶ Ipare aicua evocoi cuñā osavaipo vahe oī Tūpa reroyasar ruvi pipe iyavei acoi Jesús recocuer mombehusa sui tēi yucapri vahe ruvi pipe avei no.

Co asepiase che quer nungar pipe, ndache mbovihai eté. ⁷ Ahese ahe Tūpa rembiguai iva pendar aipo ehi cheu: “¿Mahera vo nderevīhai eico? Aicua ucara mo ndeu co imombehusa ndicuasai vahe cuñā resendar, iyavei acoi mbahe ipi vai vireco vahe siete tupri oāca, diez tupri avei acoi sāchi” ehi. ⁸ “Acoi mbahe ipi vai eresepia vahe ahe yipive secoi vahe, cūrītei rumo ndipo iri; osēra rumo ivicuar guasu ipicucu vahe sui omano āgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoēhiseve, ahe ndovīhai chira yuvireco osepīase evocoi mbahe ipi vai yipive oicove vahe viña, ndoicove iri rumo, oyevi irira curi.

⁹ “Co rese icuasara uma vireco mbahecuasa senducua āgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuñā oguapī oī iyavei ahe siete ñaca avei omoporēhi ‘siete tupri mborerecuar’ oyapave. ¹⁰ Cinco tupri mborerecuar evocoi ipāhu pendar ndipo iri yuvireco, ñepeñiño evocoyase oporocuai cūrītei oico, ambuae rumo ndou vitei. Ouse rumo ipandar, ou raimi tēira. ¹¹ Mbahe ipi vai secoi vahe yipandar, ndoicove iri cūrītei, ahe imbohochosa secoira mborerecuarā, yepe siete tupri vahe mborerecuar guasu mboetasa viña, ahe rumo ocañi tēi vaheerā secocuer” ehi.

¹² “Evocoi diez tupri vahe sāchi, ahe mborerecuar diez tupri ndoyuviroique vitei vahe oporocuai vaheerā yuvireco. Oyoya rumo oporocuai raimi tēira mbahe ipi vai reseve yuvireco curi. ¹³ Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vaheerā pīratasa iporocuai āgua yuvireco. ¹⁴ Ipare ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuaño vahe ité supi oguata āgua yuvireco” ehi.

¹⁵ Iyavei Tūpa rembiguai aipo ehi cheu: “Evocoi para guasu eresepia vahe, iharive cuñā yaguasa-guasa tēi vahe oguapī oī, ahe ‘ava rehī tecua yacatu rupingar, iñehe ambuae-ae vahe iyavei opacatu ambuae tēi vahe ivi rupingar’ oyapave. ¹⁶ Evocoi eresepia diez tupri vahe sāchi mbahe ipi vai rese, ahe ndoyambotai chira cuñā yaguasa-guasa tēi vahe; iyavei osequi tupri seya; ohupara soho, ipare opara osapī. ¹⁷ Tūpa niha omondo ipiha pipe mbahe güemimbotar apo āgua ‘ahe toyemonguerēhi yuvireco omborerecuasa mondo āgua mbahe ipi vai upe; tomboaviye rane ité che remimombehugüer yuvireco’ oyapave. ¹⁸ Iyavei evocoi cuñā yaguasa-guasa tēi vahe eresepia vahe, evocoi niha tecua guasu ivi pipendar mborerecuareta vireco vahe opovrive yepi” ehi Tūpa rembiguai cheu.

Babilonia viapi agüer

18 Ipare asepia ambuae Tūpa rembiguai ipīrata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi.

² Iyavei oñehe pīrata oico aipo ehi:

“¡Oviapi tecua Babilonia cute!

Carugar yuviroique sese, opacatu carugar naporai vahe iyavei vīrai vai nungar yuviroique sese.

³ Esepia niha, opacatu ambuae ivi rupingar inungar osavaipo vahe ndopoi potai eté yemboaguasasa sui, evocoyase mborerecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

⁴ Evocoyase asendu ambuae ñehesa iva sui ou vahe, ahe aipo ehi:

“Peyepipi evocoi tecua guasu sui, pe peico vahe che-undar evocoi yangaipa rese imboyoyaēhi āgua.

Iyavei ñepei yepe taperupiti eme imbaherasisa.

⁵ Esepia niha, yangaipagüer oyepota ité ivave.

Tüpa evocoiyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upe, ēgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

⁷ pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapi vite mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

⁸ Sese niha aviyeteramo tēi oura mbaherasisa chupe: paraisusa, tieporēhi, manosa; ipare sapisara.

Esepia niha, yande Yar Tüpa mbahe mboavaisarēhi secoi, ahe, ‘Tomano’ ehi chupe” ehi.

⁹ Evocoiyase mborerecuar ivi pipendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovihal chira sese osepiase evocoi cuña rātachi yuvireco curi. ¹⁰ Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pīrata vahe tie viña!

Esepia niha, co aviyeteramo tēi ou nde mombaraisu catusa” ehira yuvireco.

¹¹ Evocoiyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovihal chietera evocoi tecua rese yuvireco. Esepia niha, ndipo iri chietera que virocuva vaheñā imbahe yuvireco ichui, ¹² co opacatu mbahe sepi vaheñā ahe: oro, guarepochi, ita iporañete ai vahe, mbohir sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatu-catu tēi ivirape sñacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei; ¹³ mbahe serocuapri yahu vahe canela, tembihu moiacuasa; itaisi, mirra, mbahe sñacua vahe; uva ricuer, mbahe quira, trigo cuhi aviye vahe, trigo avei; iyavei mbahe mimba ovosii vahe no, ovesa, cavayu, cāretomi iyavei mbiguai no. ¹⁴ Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehira.

¹⁵ Evocoiyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tēira iyavei ndoyembovihal tēi chira yuvireco no, ¹⁶ iyavei aipo ehi tēira yuvireco:

“¡Too! ¡Iparaisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi, pīra vahe; oro pipe oyemboetei vahecuer, itami iporañete vahe pipe iyavei mbohir sendi vahe pipe oyemboetei vahe no.

¹⁷ ¡Aviyeteramo tēi rumo opa ocañi imbahe eta ichui!” ehi.

Evocoiyase opacatu ava carite guasu pipendar rerecuar, ava imbehi ivirindar carite guasu reroquatar, i rupi oporaviqui vahe oyeupe nara mbahe rereco āgua, ahe opaño opita amombrive yuvireco ichui ¹⁸ iyavei co tecua rātachi repiase, ahese osapucaí pīrata tēi yuvireco: “¡Ndipoi eté niha yipisui tecua na ehi vahe!” ehi yuvireco. ¹⁹ Ipore imboasipave omondo ivi cuhi oācave yuvireco, oyaseho iyavei ndoyembovihal tēi, ipare osapucaí tēi yuvireco aipo ehi:

“¡Too! ¡Iparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

²⁰ Peyembovihanño evocoi tecua rese, pe iva pendar, iyavei opacatu chupendar peico vahe, pe no Jesús apóstol peico vahe,

opacatu Tüpa ñehe mombehusar peico vahe avei no.

Esepia niha, co tecua omocañisa pipe Tüpa oyapo mbahe tupri pēu nara.

²¹ Ahese Tüpa rembiguai iva pendar seco pīrata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipore ndapesepia iri chietera apirēhi vaheñā” ehi.

²² “Ndasendusa iri chietera ocar rupi arpa moñehesar, mimbí moñehesar, iyavei mimbí guasu moñehesar avei no; ndererecoi chietera ava oporaviqui vaheñā, ndasendusa iri chiaveira ita mbahe mbocuhisa monarasa nde suindar.

²³ Iyavei ñepei yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco pīrata etepri vahe opacatu rupi ereico viña.

Iyavei erembopa-mbopa tēi opacatú ambuae tecua rupindar eico nde payesa pipe” ehi Tüpa rembiguai chupe.

²⁴ Esepia niha, evocoi tecua guasu pipe oyecua Tüpa ñehe mombehusar ruvi, Tüpa upendar ava ruvi, iyavei opacatu ava yucapri vahe ivi pipendar ruvi avei.

19 Co pare, asendu ava rehii ñehe pīrata ivave aipo ehi vahe:

“¡Imboeteipri yande Yar tasecoi!

Poropisirosa, teco porañetesa iyavei ipīratasa ahe yande Ru Tüpa suindar.

² Esepia niha, ahe oyapo mbahe supi eté vahe, ‘Tocañi’ ehise co cuña oyemboaguasa-guasa tēi vahe nungar tecua guasu upe evocoi niha oseco momara tēi vahe ava ivi pipendar güeco rai pipe; ichui Tüpa osopi oyeupendar” ehi.

³ Ipore aipo ehi iri yuvireco no:
 “¡Imboeteipri yande Yar tasecoi!
 Esepia niha, evocoi tecua râtachi ndopai chietera” ehi.
⁴ Evocoiyase veinticuatro tupri iva pendar icuai pri yu-
 virecoi vahe iyavei irungatu iva pendar yuvirecove va-
 he, ahe Tûpa mboeteisa pipe oyeaivi ivi rese yuvireco.
 Ipore aipo ehi yuvireco no: “¡Ëgüe tehi! ¡Imboeteipri
 yande Yar tasecoi!” ehi. ⁵ Evocoiyase Tûpa renda sui
 tupri oyeendu ñehesa aipo ehi vahe:
 “¡Pemboetei yande Ru Tûpa opacatu peroya vahe,
 que seco ivi coti catumi vahe, que seco ivate vahe avei,
 pe pesiquiye vahe imboyeroa âgua!” ehi.

Pieta mendasa Ovesami resendar

⁶ Asendu avei ava rehii ñehe, inungar acoi itu guasu
 riapu, ndoyavii avei osunú guasu vahe aipo ehi:
 “¡Imboeteipri yande Yar tasecoi!
 Esepia niha, yande Yar Tûpa opacatu mbahe
 mboavaisarêhi omboipi oporocuai.
⁷ Tayayembovîha catu yaico iyavei tayamondo yande
 viharetasa, yande sapucaisa yande Ru Tûpa upe.
 Esepia niha, cûritei oyepota mendasa ari Ovesami up-
 endar.
 Sembireco evocoiyase opa oyemoingatu oico:
⁸ chupe ipotasa iyemonde âgua turucuar secose va-
 he, ndiquihai, sendi vahe pipe.
 Esepia niha, co turucuar secose vahe ‘Tûpa rese yu-
 virecoi vahe recocuer ihîvi vahe’ oyapave aipo ehi” ehi.
⁹ Evocoiyase Tûpa rembiguai, “Na ere icuachía:
 ‘Sorivete catu acoi ava mendasave ichohopri yuvireco’
 ere” ehi cheu. Iyavei aipo ehi cheu no: “Co niha Tûpa
 ñehesa supi tupri vahe ité” ehi.
¹⁰ Ipore ahenopiha Tûpa rembiguai rovai imboetei
 âgua. Ahe rumo aipo ehiño cheu: “Ëgüe erei rene. Es-
 epia, che Tûpa rembiguai tēi aico nde nungar iyavei
 nde rivireta nungar oguata vahe Jesús ñehengagüer
 rupi. Emboetei Tûpa” ehi.
 Esepia niha, evocoi Jesús recocuer mombehúsar
 moñehe ucasar, ahe niha acoi omombehu uca vahe
 Tûpa ñehe mombehúsar upe.

Cavayu morochi vahe reroguatasar

¹¹ Evocoiyase asepia iva oyemboi vahe. Aheve
 aviyeteramo tēi cavayu morochi vahe oyemboyecua,
 evocoiyase ava sese oyeupi vahe rer: “Ocuaita-om-
 boaviye-tupri-vahe iyavei Supi tupri vahe” ehi. Esepia,
 güeco ñvîsa pipe oporocuai iyavei oyapo vavasa. ¹² Sesa
 evocoiyase ndayaviyei eté acoi tata rendigüer; iyavei
 oâca rese setá vireco oyeguaca, iyavei vireco terer
 icuachiapri oyese; ahe güeraño ité oicua. ¹³ Iturucuar
 evocoiyase imopirapri tuvi pipe; serer evocoiyase, “Tû-
 pa Ñehe” ehi. ¹⁴ Sundao rehii iva pendar saquicuerive
 yuvirecoi. Iturucuar secose vahe pãve morochí vahe,
 ndiquihai vahe avei. Ahe cavayu morochi vahe harive
 yuvirecoi. ¹⁵ Iyuru pipe sui osē quise pucu saimbe vahe
 opacatu ambuae-ae tecua rupindar momara âgua.
 Ahe oyocuai oamotarêhisar guarepochi apopri opo

pendar pipe. Iyavei osecoãhara inungar uva opive
 otiamii vahe yuvireco iyavei omboihura evocoi uva
 ricuer paraisu catusa resendar pipe. Aheve Tûpa mba-
 hemboavaisarêhi oñemoiro itera chupe. ¹⁶ Oturucuar
 popi rese vireco icuachiapri ohivipi rese avei aipo ehi
 vahe: “Mborerecuareta rerecuar guasu iyavei ava Yar
 ivate catu vahe” ehi.

¹⁷ Ipore asepia Tûpa rembiguai opûha vahe arisave.
 Ahe osapucai pîrata opacatu vîrai mbahe rohoguar
 upe oveve vahe iva rese: “¡Perio! ¡Peñemonuha Tûpa
 suindar carusa guasusave; ¹⁸ pehu co mborerecuareta
 roho, sundao eta rerecuar roho iyavei ava oico eté va-
 he roho, cavayu roho, ihari pendar roho avei, opacatu
 ava roho ava nimañecosai vahe roho, mbiguai roho,
 seco ivi coti catumi vahe roho, seco ivate vahe roho
 avei!” ehi.

¹⁹ Aheve asepia mbahe ipi vai iyavei mborerecuareta
 ivi pipendar osundao reseve-seve. Ahe oñemonuha
 yuvireco ovava âgua evocoi cavayu hari pendar rese
 iyavei isundao rese avei no. ²⁰ Co mbahe ipi vai yipin-
 dar vahe soquendasa, oyoya evocoi Tûpa ñehe
 mombehúsar angahu tēi rese. Ahe acoi oyapo vahe
 mbahe yavai rai vahe yipindar mbahe ipi vai rovaque,
 evocoi mbahe yavai rai vahe apo pipe ombopa-mbopa
 tēi ava, acoi seroyasar vireco vahe mbahe ipi vai rer
 oyese iyavei omboetei vahe sahanga yuvireco. Evo-
 coi yase co mbahe ipi vai iyavei Tûpa ñehe mombe-
 húsar angahu tēi, ahe opa imombosa secove reseve
 ipa azufre ocai vahe pipe yuvireco. ²¹ Ambuae evo-
 coi yase evocoi cavayu morochi vahe hari pendar yuru
 pipe sui osē vahe quise pucu pipe opa omano yuvire-
 co. Evocoiyase opacatu vîrai mbahe rohoguar opa so-
 ho pipe oyemohitaro yuvireco.

Mil araviter resendar ñehesa

20 Ipore asepia Tûpa rembiguai ogüeyi vahe ou iva
 sui ivicuar guasu ipicucu vahe mboiyasar iyavei
 carena ipo guasu vahe opove vireco. ² Ipore oipisi
 mbahe ipi oporomocañi vahe mboi nungar arachen-
 dar, ahe niha Carugar secoi, Satanás serer vahe; ahe
 oicuhacua carena pipe mil araviter rupi imoi. ³ Aheve
 omombo ivicuar guasu ipicucu vahe pipe. Aheve oso-
 quenda. Omondo sello soquenda rese opacatu am-
 buae-ae tecua rupindar mbopa-mbopa tēi iriêhi âgua
 rese acoi osupitise voi mil araviter. Coiye rumo mil ar-
 aviter pare, imosesa raimi tēira.

⁴ Ipore asepia tenda, iharive setá ava oguapi yuvinoi
 evocoi oipisi vahe omborerecuasa yuvireco ava upe
 mbahe rese porandu âgua. Iyavei asepia ava hã evocoi
 opa vahecuer oyasia ñaca yuvireco Jesús recocuer
 mombehusa sui tēi iyavei Tûpa Ñehengagüer mombe-
 husa pipe sui tēi avei. Ahe ava nombotei vahe mbahe
 ipi vai yuvireco; sahanga avei nombotei yuvireco no;
 iyavei nomondo ucai vahe avei osiva rese serer yuvire-
 co, opo rese avei. Ahe asepia opa ocuerayevi yuvireco.
 Ipore oporocuai Cristo rese mil araviter rupi yuvireco.
⁵ Ahe co yipindar vahe cuerayevîsa. Ambuae ava
 omano vahe rumo ndocuerayevi iri eté yuvireco os-

upitise voi mil araviter. ⁶ ;Sorivete catu acoi ava vireco vahe yipindar cuerayevisa yuvireco! ;Esepia niha, ahe Tūpa upendar ité yuvireco! Imoñuviriosa manosa evocoyase chupe ndipo iri eté. Ēgüe ehira rumo ahe Tūpa upe naraño ité pahi yuvirecoira, Cristo upe avei. Ipare mborerecuar yuvirecoira sese mil araviter rupi.

Carugar recopisa

⁷ Acoi osupitise rumo mil araviter cute, ahese Carugar yorasara soquendasa sui. ⁸ Ichui osēra opacatú ava ivi pipendar mbopa-mbopa tēi oico; osēra ivi Gog mbopa tēi āgua, ivi Magog mbopa tēi āgua avei. Ipare omonuhara vavasave nara isundao eta. Esepia niha, ahe sehii etepri yuvireco inungar ivi cuhi para guasu popi rupindar.

⁹ Ēgüe ehi yugüeru ati amombrí sui, oyerepa tupri Tūpa recua rese yuvireco no, evocoi tecua Jerusalén sembiaisu rese avei. Tūpa rumo ombou tata iva sui, ahe ipipe opa tupri ité osapi. ¹⁰ Carugar evocoyase, ava mbopa-mbopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tūpa ñehe mombehusar angahu tēi vahe avei no. Aheve iparaisura pītu, ari yuvireco apirēhi vaherā.

Tūpa oguapira güendave ava recocuer rese porandu āgua ari ipa vahe pipe

¹¹ Evocoyase asepia tenda imboeteipri, morochi vahe. Iharive oime ava oguapi vahe oī. Sovai ivi iyavei iva opa ocañi tupri tēi. Ndoyecua iri eté co coti rupi yuvireco. ¹² Ipare asepia omano vahecuer seco ivate vahe, seco mbegüemi vahe avei no opūha yuvinoha Tūpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoyase porandusa evocoi cuachiar pipendar mbahe sembiapogüer rese.

¹³ Omano vahecuer opa yuvinose para guasu pipe sui, iyavei tehögüer recosa sui opa yuvinose; ichui opacatú mbahe sembiapogüer rese porandusa yuvireco chupe no. ¹⁴ Ipare manosa recua opa imondosa tata nungar ipa pipe. Evocoi ipa niha imoñuviriosa manosa.

¹⁵ Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

Iva piasu iyavei ivi piasu

21 Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no. ² Che asepia tecua nimarai vahe, ahe Jerusalén piasu, evocoi ogüeyi vahe Tūpa sui ou. Opacatu imoingatusa tupri vahe, inungar acoi cuña omenda āgua oyemboetei tupri omevi upe. ³ Ipare asendu ñehesa pīrata tenda suindar aipo ehi vahe: “Tūpa cūrteit oicove ava rehii pāhu rupi oico. Ahe oicove vaherā ité sese yuvireco yepi, ahe ava evocoyase chupe nara ité yuvirecoira. Ahe teieté niha sec-oira yuvireco chupe. ⁴ Ahe niha omombituhura opacatu ava resai; iyavei ava nomanoi chietera; ndoy-

asehoi chira yuvireco; ndipoi chira viharēhisa, tecoasisa avei chupe. Esepia niha, opacatu mbahe oime vahecuer yipindar, ndipo iri eté” ehi.

⁵ Ahese evocoi oguapi vahe tenda harive oī, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoyase iya ité peyeroya sese” ehi.

⁶ Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tēira i tecovesa resendar ndasepi vahe pipe. ⁷ Acoi ava oyemoviracua vahe ité mbahe-mbahe tēi apoēhi āgua, ahe oipisira co mbahe opacatu omahera yuvireco. Evocoyase che aicora chupendar ité, ahe evocoyase che rahir ité yuvirecoira. ⁸ Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye serai vahe, mbahe rahanga mboeteisar tēi iyavei opacatu ava semira-mira tēi vahe, ahe opara yuviraso ipa nungar azufre ocai pīrata vahe pipe. Ahe niha imoñuvirio manosa” ehi.

Tecua Jerusalén piasu

⁹ Evocoyase ou ñepe siete Tūpa rembiguai pāhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecua cuña omenda vahevi ndeu, Ovesami rembirecovi” ehi. ¹⁰ Evocoi che quer nungar pipe Espiritu osepia uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tūpa sui.

¹¹ Ahe tecua sendí iteanga Tūpa rendigüer pipe. Sendigüer evocoyase oyoya tupri ita iporañete vahe rese, oyoya avei ita jaspe serer vahe ipīrerimi vahe rese. ¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoyase ñepe-pe Tūpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese. ¹³ Vireco niha mbosapi oquenda añihivei coti, mbosapi norte coti, mbosapi irohí coti iyavei mbosapi caharu coti no.

¹⁴ Tecua guasu āchisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

¹⁵ Evocoi Tūpa rembiguai oñehe vahe cheu vireco vara oro apopri tecua rāha āgua, opacatu soquendipi rāha āgua, ñachisa rāha āgua avei no. ¹⁶ Tecua guasu pucucuer oyoya tupri ipigüer rese. Evocoyase Tūpa rembiguai osāha tecua guasu ruvichagüer; osāhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pāve tupri ité no. ¹⁷ Ipare osāha ñachisa: osāhase ipigüer sesenta y cinco metro tupri. Evocoi Tūpa rembiguai osāha ava rembiporu pipe.

¹⁸ Tecua āchisa ahe ita porañete vahe Jaspe serer vahe apopri; tecua evocoyase oro pāve tupri, aviye vidrio secose catu vahe. ¹⁹ Ñachisa moviracuasa vireco opacatu ambuae ita-ita tēi iporañete vahe pāve: yipin-

dar ivĩracuasa jaspe, imoñuviriosa zafiro, imombosapisa ágata; imoirungatusa esmeralda; ²⁰ imobopoyandeposa ónice; imoñepei ovasa, cornalina; imoñuvirio ovasa, crisólito; imombosapi ovasa, berilo; imoirungatu ovasa, topacio; imobopoyandepo ovasa, crisoprasa; co opoyandepo yovaivesa ahe jacinto; imoñuvirio yovaivesa, amatista. ²¹ Doce tupri vahe oquenda guasu ahe doce tupri mbohĩr; ñepei-pei oquenda ñepei mbohĩr sui yapopri. Calle guasu tecua aviter rupindar evocoyase oro pãve, inungar vidrio yande porẽhi tupri vahe ipipe.

²² Ndasepiai eté evocoi tecua guasu pipe ñepei yepe tũparo. Esepia niha, yande Yar Tũpa mbahe mboavaisarẽhi, Ovesami reseve yuvirecoi aheve. ²³ Evocoi tecua guasu ndovireco iri eté ari, yasi gũesape ãgua. Esepia niha, Tũpa ité osesape güendigüer pipe, iyavei Ovesami tataendi nungar secoi aheve yuvirecoi vahe upe.

²⁴ Sendigüer osesapera opacatu tecua rupindar iguatasa rupi, iyavei ava mbahe yar mborerecur ivi pipendar opara güeru ombahe eta porañete vahe yuvireco chupe. ²⁵ Evocoyase soquendipi nimboyasai chietera ari yacatu rupi. Pĩtu ndipoi chiaveira aheve.

²⁶ Ipare opara aheve ambuae tecua mbahe eta, porañete vahe omoingue yuvireco; ²⁷ ava angaipa viyar rumo, Tũpa remimbotarẽhi oyapo vahe, iporombopa serai vahe, ahe ndoyuviroiquei chietera aheve. Ëgüe ehi rumo acoi ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

22 Ipare Tũpa rembiguai omboyecua iai tecovesa resendar cheu, tĩpiu, oyecua tupri, osẽ vahe Tũpa iyavei Ovesami renda porañete vahe sui. ² Calle guasu mbiter rupi oso. Iyavei iai ique yacatú oime ivira tecovesa resendar, iha vahe doce yupagüer rupi ñepei araviter pipe. Iyavei evocoi ivira ro aviye ai ava opacatu rupindar mbogüera ãgua. ³ Ndipoi chietera aheve que mbahe tẽivri pendar. Tũpa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco. ⁴ Osepia sova iyavei virecora serer osiva rese yuvireco. ⁵ Aheve ndipoi chietera pĩtu, iyavei ava aheve yuvirecoi vahe ndosecai chietera tataendi. Ndosecai chiaveira que ari gũesape ãgua yuvireco. Esepia niha, yande Yar Tũpa teieté osesapera. Ipare ahe ava mborerecur apirẽhi vahe ité yuvirecoira sese.

Cõimi eté Jesucristo yevi ãgua

⁶ Ipare Tũpa rembiguai aipo ehi cheu: “Co ñehesa supi tupri vahe ité, sese iya ité peyeroa. Iyavei yande Yar Tũpa acoi omboyecua tupri vahe mbahe oyesuindar oñehe mombehusar upe, ahe ombou güembiguai iva pendar mbahe omboaviye poyava voi vaheã mboyecua ãgua viroyasareta upe” ehi.

⁷ “¡Ayevi poyava voira curi! ¡Sorivete catura acoi ava viroya vahe ñehesa Tũpa suindar mbahe oime vaheã resendar co cuachiar pipe!” ehi.

⁸ Che, Juan, asepia iyavei asendu ité co mbahe. Sendu pare voi, añenopiha evocoi Tũpa rembiguai rovai imboetei ãgua viña. ⁹ Ahe rumo aipo ehiño cheu: “Ani ereñenopiha che rovai. Esepia niha, che Tũpa rembiguai tẽi aico, nde nungar, nde rivireta nungar avei evocoi oñehe vahe Tũpa Ñehengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tũpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tũpa suindar mbahe oime vaheã resendar sereco, evocoi icuachiapri cuachiar pipe. Esepia niha, ari cõimi secoi imboaviye ãgua. ¹¹ Acoi ava mbahe tẽi aposar, toyapoño mbahe tẽi; iyavei acoi ava seco rai vahe, taseco raiño ité oico; acoi ava seco tupri vahe rumo, ahe toyapoño mbahe tupri oico; iyavei acoi ava Tũpa upe oyemondo tupri vahe ité, ahe taseco tupriño avei oico chupe” ehi.

¹² “Supi eté ayevi poyavara, iyavei arura mbahe porerecosa ñepei-pei ava rembiapogüer rupi-rupi amondo vaheã chupe. ¹³ Che aico inungar letra A iyavei Z, yipindar vahe, ipandar vahe avei no; yipive vahe ité apirẽhi vaheã” ehi.

¹⁴ “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirẽhi vahe resendar. Ipipe sui oiquera tecua guasu pipe.

¹⁵ Ava rehii ndiporeroyai vahe rumo opitapara ocarve tẽi yuvireco, iyavei ava ipaye serai vahe, oyemboaguasa-guasa tẽi vahe, oporoyuca vahe, mbahe rahanga upe tẽi oyoerqui vahe, iyavei opacatu ava oipota rai vahe oporombopa-mbopa tẽi ãgua yepi” ehi.

¹⁶ “Che, Jesús, amondo che rembiguai iva pendar mbahe mombehu ãgua opacatu che reroyasar upe oñemonuha vahesa rupi-rupi. Che aico mborerecur guasu David suindar. Iyavei aico inungar yasitata guasu sendi vahe añihiveindar no” ehi cheu.

¹⁷ Espiritu Santo iyavei Ovesami rebireco aipo ehi: “¡Perio!” ehi ava upe yuvireco. Iyavei acoi ava osendu vahe iñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüerüño; acoi ava oipota vahe, toipisi i tecovesa resendar ndasepii vahe yuvireco.

¹⁸ Opacatu acoi ava osendu vahe co ñehesa Tũpa suindar mbahe oime vaheã resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboeapi iri vahe, ahe chupe Tũpa omboeapi aveira co cuachiar pipendar mbahe-mbahe tẽi imombeupri. ¹⁹ Amove que ava virocua vahe co cuachiar pipe sui ñehesa Tũpa suindar, Tũpa avei evocoyase ndoipotai chira chupe co cuachiar pipe imombeupri ivira ha tecovesa resendar rereco ãgua iyavei co tecua maranehi pipe seique ãgua.

²⁰ Acoi co mbahe mombehusar aipo ehi: “Supi eté ayevi poyavara” ehi.

Ëgüe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviye, aipo rupive.